


Diidz ne rdeed  
guielmban



New Testament in Zapotec, Mixtepec (MX:zpm:Zapotec,  
Mixtepec)

## **Diidz ne rdeed guielmban**

### **New Testament in Zapotec, Mixtepec (MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

### **Copyright Information**

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

---

PDF generated using Haiola and XeLaTeX on 18 Apr 2025 from source files dated 29 Jan 2022  
5317ca58-7555-5e4c-a420-e1e9210e2df2

## Contents

MATEO . . . . .	1
MARCOS . . . . .	52
LUCAS . . . . .	84
JUAN . . . . .	139
HECHOS . . . . .	179
ROMANOS . . . . .	228
1 CORINTIOS . . . . .	250
2 CORINTIOS . . . . .	273
GALATAS . . . . .	288
EFESIOS . . . . .	297
FILIPENSES . . . . .	305
COLOSENSES . . . . .	311
1 TESALONICENSES . . . . .	316
2 TESALONICENSES . . . . .	321
1 TIMOTEO . . . . .	324
2 TIMOTEO . . . . .	331
TITO . . . . .	336
FILEMON . . . . .	339
HEBREOS . . . . .	341
SANTIAGO . . . . .	357
1 PEDRO . . . . .	363
2 PEDRO . . . . .	369
1 JUAN . . . . .	373
2 JUAN . . . . .	379
3 JUAN . . . . .	380
JUDAS . . . . .	381
APOCALIPSIS . . . . .	383

## XTIIDZ NDZON DIOS MINE PQUIAA MATEW

<sup>1</sup> Jesús men ne pxeel Dios ga, lo xtii Abraham, lo xtii David, ga brieequia me. Lëe grë xmenḡoldoo me nu:

<sup>2</sup> Abraham goc pxoz Isaac, Isaac goc pxoz Jacob, Jacob goc pxoz Judá (bio zla xpëed Jacob),

<sup>3</sup> Judá goc pxoz Far ni Zar (Tamar brieelë tsieel Judá), Far goc pxoz Srom, Srom goc pxoz Aram.

<sup>4</sup> Aram goc pxoz Minadab, Minadab goc pxoz Naasón, Naasón goc pxoz Salmon.

<sup>5</sup> Salmóngoc pxoz Booz (Rahab brieelë tsieel Salmon), Booz goc pxoz Obed (Rut brieelë tsieel Booz), Obed goc pxoz Isaí.

<sup>6</sup> Isaí goc pxoz rey David, David goc pxoz Salomón (lëe Salomón ga gop tsieel Urí wnaa ne bionie David).

<sup>7</sup> Salomón goc pxoz Roboam, Roboam goc pxoz Abí, Abí goc pxoz Asá,

<sup>8</sup> Asá goc pxoz Josafat, Josafat goc pxoz Joram, Joram goc pxoz Uzí.

<sup>9</sup> Uzí goc pxoz Jotam, Jotam goc pxoz Acaz, Acaz goc pxoz Ezequí.

<sup>10</sup> Ezequí goc pxoz Manasés, Manasés goc pxoz Amón, Amón goc pxoz Josí,

<sup>11</sup> Josí goc pxoz Jecóní (bio zla xpëed Josí).

Len dze ne nac Jecóní mëed, len dze co güeybee zhoo zha Babiloin grë zha Israel, beynie zho zho Babiloin.

<sup>12</sup> Babiloin, ga gol tib xpëed Jecóní brieelë Salatiel, Salatiel goc pxoz Zorobabel.

<sup>13</sup> Zorobabel goc pxoz Abiud, Abiud goc pxoz Liaquim, Liaquim goc pxoz Azor.

<sup>14</sup> Azor goc pxoz Sadoc, Sadoc goc pxoz Aquim, Aquim goc pxoz Liud.

<sup>15</sup> Liud goc pxoz Leazar, Leazar goc pxoz Matán, Matán goc pxoz Jacob.

<sup>16</sup> Jacob co nagon goc pxoz José, men ne ptsieelnia Marí.

Marí goc xniaa Jesús, Men ne nacle diidz ga cxeel Dios guiaad lo guidzliu.

<sup>17</sup> Zig choopchop bdziḡ lo dii co, dzigoraa brieequia Jesús. Tsiida zho wban desde Abraham haxta David; stsiida zho wban desde Salomón haxta len dze ne bey zho Babiloin; stsiida zho wban desde len dze co haxta bdziḡ dze ne goc me mëed.

### *Gol Jesús (Lc. 2:1-7)*

<sup>18</sup> Znu bzhaac Marí grop José len dze ne ziaadyob gal Jesús. Gard ct-sieelnia Marí loxaque xtiidz me no ne laa me ycaa José, zeene bnabey Espíritu Sant pquialo tib mëed zdoo me.

<sup>19</sup> Zeene bien Joséw, mine been me gocladz me mazd nsaan me Marí; sac sca rnabey ley ni zienalpaa me mine rnabey ley; per laa me gocladz zhli-aanse nzoziḡ me, sacne racladzd me nríee xquieltó Marí.

<sup>20</sup> Zhgab co no me, tibaque blulo tib xanjl Dios lo me lo mcaal.

—José (xiag David) —rëb anjl co—, peet tsienied guic luu, pcaania Marí gac me tsieel luu; sac gon mëdyeen ne zoney me ga, Espíritu Sant bnabey pquialo win zdoo me.

<sup>21</sup> Zeene gal dze ne laa win gal, JESUS cueelë luu win, sca grieelë win sac win csilaa grë menladz win lo dol.

<sup>22</sup> Ga brieequia mine bnee Dios padzeela, zeene bzeet zha ne biadnee xtiidz mew, rëb zho:

<sup>23</sup> Bii zan to ganle zeene laa tib mëedbgui yquiaalo zdoo tib wnaayeen ne gard gnee mgui lo.

Zeene laa win gal, Emanuel grieelë win.

(Emanuel nac zig nacne rnee ne: Dioszhal ziaad lo ne.)

<sup>24</sup> Zeene bna José laa guic me goc tibli; bin me xtiidz anjl co laa me ptsieelnia Marí.

<sup>25</sup> Laa me wban tipse grop me per ib bgaald me Marí, haxta bded dze ne laa mëdyeen co gol. Bdzin dzew, laa win gol, dzigo bleelë José win JESUS.

## 2

### *Güeygan bla zha rac Jesús*

<sup>1</sup> Tib guiedz win ne ndxie xtan Judé lë Belén, ga gol Jesús. Lëetse len dze co zob men ne lë Herod nac me rey ne rnabey dan co.

Goc palal dzew, laa bla zha ne runbey lo mel ziaad nëz ne rlan ng-bidz bdzin Jerusalén,

<sup>2</sup> bnabdiidz zho rëb zho:

—¿Pa lo dien no mëed ne gac men ne gnabey ladz to nu, mëed ne griin gol ga? Bdzion no tib mel nëz ne no no, mel co blu lo no laa win gol-le, min co ne ziaad no nu ziaaddzian no win.

<sup>3-4</sup> Grë menquiedz Jerusalén, zeene bin zhow bzee zdoo zho. Laa Herod, rienndraa me zha gun me, bnabey me pcaalsa grë zha ne nac pxoz non, grë zha ne rseed miech ley, bnabdiidz me lo zho dien pa lo nac diidz gal Men ne nole diidz cxeel Dios guiaad lo guidzliu ga.

<sup>5</sup> Dzigo rëbcha zho lo me:

—Belén, guiedz ne ngab Judé ga none gal men co, sac scale zhobnee lo guits ne pquiaa zha ne pxeel Dios padzeela biadteed xtiidz me, zeene psiaab me guic zho znu bnee zho:

<sup>6</sup> Tel Belén,

niicle ne winraaw lo grë guiedz ne ngab Judé, per nroob nona; sac gon ga grieequia tib men ne gnabey, men ne so yquiaanap grë men Israel, ne nac zho zha ne ngab lo naa.

<sup>7</sup> Nacne zhlianse bnabey Herod gocredz gza zha rac co, bnabdiidz me lo zho dien blapaa dze rac psilo gon zho blan mel co.

<sup>8</sup> Blozhse ga, dzigo pxeel me zho Belén, rëb me lo zho:

—Ga goltsie goltsieguib mëed co. Zigne gdziel to win, goltëniegazh diidz lo naa nu, zeena ye naa ga gagan naa win.

<sup>9</sup> Blozhse sca pso me diidz lo zho, laa zho bio nëz stib laa zho zie. Laa mel ne gon zho brieequia nëz ne ziaad zho ga, laa ma neraque lo zho; haxta bdzin ma ngali guic yu ne no mëdyeen co, gataa laa ma blëz.

<sup>10-11</sup> Zeene gon zho laa mel co blëz ga, per nli rley zho. Bzëeb zho len yu co, gon zho laa mëdyeen co no ga grop xniaa win, dzigo pquiitsgzhib zho lo win, bnee zho tib xtiidz zho lo win. Blozh ga blee zho ncuane zienie zho lo win, blee zho or, blee zho tiblo yaalnex, ni tiblo nceit nex rnee zho mirr, bgad zho lo win.

<sup>12</sup> Zeene laa gza zha rac co wbi Belén, laa ne nieted zho Jerusalén, stible nëz bzhen zho zey zho; sac bnee Dios lo zho lo mcaal, rëb me tsienied zho diidz lo Herod.

<sup>13</sup> Laa gza zha rac co zey, zeene güeylulo tib xanjl Dios lo José lëetse nixguies me, rëb anjl co lo me:

—José, na zeena guche i pcanie mëdyeen qui nëz grop xniaa win, golsë nëz Egipt, sac laa Herod yquiaguib win gut me win. Egipt, ga cuëznie to win, na naaque guiaalnie diidz lo to zeene laa to gbi ga.

<sup>14</sup> Guieel cogazh guche José, pcanie me mëdyeen co nëz grop xniaa win, laa zho ziese nëz Egipt;

<sup>15</sup> ga blëz me haxta bdzin dze ne laa Herod gut. Ga brieequia mine bnee zha ne biadteed xtiidz Dios padzeela, zeene znu bnee zho: “Nëz Egipt no xpëed naa, zeene bredz naa me.”

### *Bnabey Herod gut grë mëedlas*

<sup>16</sup> Laa zeene gon Herod whiredraa gza men rac co nienie zho diidz lo me, per nli blëe me. Ntseeb rac me, pxeel me zha ne güey Belén ni grëraa guiedz ne ndxie gax ga, güeygut zho grëse mëedbgui yeen ne no grë guiedz co, desde win ne golnëz, haxta win ne rap chop iz. Tibaque nan me sca ngaa

mëdyeen ne nac Jesús ga niet win, sac blee me cuent zhile gac chop iz psilo gon gza zha rac co blan mel co.

<sup>17</sup> Guielñëdox ne bio grë miech co, ga briequia mine bzeet Jeremí men ne biadteed xtiidz Dios padzeela, zeene znu rëb me:

<sup>18</sup> Tib redz nroob ne zëeb len guiedz Ramá.

Grë wnaa Judá, zha ne ziaad lo xtii Raquel,

mbanse rac zho, roon zho no zho xquielñë xpëed zho;

zha rna zha ne cchoobladz zdo zho, sac laa xpëed zho gut.

<sup>19</sup> Goc palal dzew laa Herod gut, dzigo pxeel Dios tib xanj me güeynee lo José lo mcaal zaatne no José nëz Egipt, rëb me lo José:

<sup>20</sup> —José, guche i, pcaanie mëdyeen qui nëz grop xniaa win, gołbire nëz Israel stib; laa zha ne quianał win ga gutle.

<sup>21</sup> Dzigo brieenie José mëdyeen co ga grop xniaa win, bio me nëz laa me wbire zeynie win nëz Israel.

<sup>22</sup> Per zeene bin José lëëque tib xpëed Herod men ne lë Arquela, men co biaan xlugar Herod zobnabey xtan Judé, bdzieb José ndzinie me mëdyeen co nëz co. Dzigo bneeque Dios lo me lo mcaal tsie me nëz Galilé.

<sup>23</sup> Goł zho Galilé, bdzinaque zho guiedz Nazaret, ga wbannie zho mëdyeen co. Ga briequia mine bzeet grë zha ne biadteed xtiidz Dios padzeela, zeene rëb zho: men Nazaret guiab miech nac Jesús.

### 3

*Psilo Juan Bautist noseed me miech (Mr. 1:1-8; Lc. 3:1-9, 15-17; Jn. 1:19-28)*

<sup>1</sup> Len dze ne psilo Juan Bautist noseed Juan miech xtan zha Judé, dan zit ne no me ga;

<sup>2</sup> rnee me lo zho:

—iGołsaan xquielntseeb to, gołnab lo Dios gun me to perdon grëtaa dol ne ziyun to; sac gon laa dze bdzinle laa me csilo gnabey!

<sup>3</sup> Lëe Juan Bautist ga bzeet profet Isá, zeene znu pquiaa me:

Bii zon miech ganle zeene laa tib tsi men zëeb tib dan zit, rnee me:

“Gołzhixcuaa nëz ne ted men ne rnabey,

gołsaan grë guielntseeb ne run to.”

<sup>4</sup> Niapse guits lad camell niaa xab Juan, guid nac ncuaane ndxie len me, ni niapse nguzhanch ni dzin dan row me.

<sup>5</sup> Nzian grë men guiedz Jerusalén, grë men Judé, grë men ne no gax ro guiubee Jordán, rree zho riequiaadiag zho zhiwseed me.

<sup>6</sup> Grë zha ne rxobdol grëse xtol zho, dzigo rchoobnis me zho ro guiubee co.

<sup>7</sup> Laa zeene ran me grë zha farisé, zha saducé ne rdzin lo me ga racladz zho ye zho chobnis, dzigo rnee me lo zho:

—iMiech ngoopdol, masaque nac to zig nac meel! Nan to na lëe, loxaque chobnis to laa to laale lo grë guielñëdox ne ziaadyob.

<sup>8</sup> Led scada gon, none zaacse gban to zeena glu nli dib zdo to psaan to grë xquielntseeb to.

<sup>9</sup> Ni gacniatsde to guiab to loxaque por nace to xtii Abraham, laa Dios csilaale to; sac gneli naa lo to ganle telne gacladz Dios, haxta grë quie zac gnabey me tsaalow miech ne gac zha xtii Abraham.

<sup>10</sup> Nanle to ganle, grë yag nex, zeene rquiad nex lowled rruga, rlozh ga rliaala lo gui, ga reca. Scadaa nagon gdzieelo miech ne gband zigne racladz Dios, sac rriequia laa me nzhenle xquiibyag me chug me yag ne scã nac.

<sup>11</sup> Nli tib wrobnisse nu rnedz naa lo to, nacsew zig tib seń, sac lëe gdib rluw laa to psaan xquielntseeb to, laa to bzëeb xnëz Dios. Sangue men ne no guiaad ga, mesi Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa tib men non nac me, tel naa peet nond naa, per ni par tib ngundziin ne glit lab me raguiald naa gac naa.

<sup>12</sup> Laa me guiaad zig tib zha ne rbeeguizh zhobxtil, sac zha co rlozhse runmbe zho zhob, rgotsow zhow, laa paj rielaal zho lo gui, ga reca. Per gui ne gzëeg grë paj ne guiadbee me ga, gdziṅd dze guiuuw.

### *Brobnis Jesús*

(Mr. 1:9-11; Lc. 3:21-22)

<sup>13</sup> Len dze co brieer Jesús nëz Galilé zie me nëz ro guiubee Jordán, laa me zie par cchoobnis Juan me. Bdziṅ me

<sup>14</sup> nëd Juan cchoobnis Juan me, rëb Juan lo me:

—Lëda i gon, naa none guial lo luu cchoobnis luu naa.

<sup>15</sup> Dzigo rëb me lo Juan:

—Nli scaw, per mazd pchoobnis naa, sac gon ib nonguiela dziuun ne mine rnabey Dios.

Dzigoraa pchoobnis Juan me.

<sup>16</sup> Laa me zieriee lo nis zeene laa zhan gbaa bzhiäl, gonpaa me zig rlu tib palom rlu Espíritu Sant laa me ziad-zëeb bdziṅ me guic me,

<sup>17</sup> ni blu zëeb tib tsi men co nëz gbaa rnee me:

—Xpëed naa gon nac men qui, rleynie naa me, men nziuu nac me lo naa.

## 4

### *Gocladz mendox niungüet ma Jesús*

(Mr. 1:12-13; Lc. 4:1-13)

<sup>1</sup> Zeene blozh brobnis Jesús, dzigo güeynie Espíritu Sant me tib dan zit, zaatne guiend miech; ga gocladz mendox niungüet ma me niun me mine racladz ma.

<sup>2</sup> Zeene goc choo ngbidz choo guieel no me dan co ni tib lë peet rowd me, laa me pcaabedz

<sup>3</sup> hor co bdziṅ mendox zaatne no me ga, rëb ma:

—Telne nli Xpëed Dios nac luu, bnabey tsaalo grë quie rii ncuaane gow luu.

<sup>4</sup> Dzigo pquiab me rëb me lo ma:

—Znu zhobnee lo Xtiidz Dios: “Niapse por xtiidz Dios mban miech, yquiamband zho loxaque guielwagwse.”

<sup>5</sup> Blozh ga güeynie ma me Jerusalén, blep ma me glaa guic yadoo nroob ne zob lad guiedz co,

<sup>6</sup> rëb ma lo me:

—Telne nli Xpëed Dios nac luu, bringaa nu, benque led znu zhobnee lo Xtiidz Dios: “Znabey Dios grë xanj me yquiaanap luu, zha queedz luu, zeena ni tib quie ycaand ni luu.”

<sup>7</sup> Pquiab me rëb me lo ma:

—Psoladz ganle, noque stib zaatne znu rnee lo Xtiidz Dios: “Bieṅ, Dios nac men ne rnabey luu, nodne quitnie luu me gnab luu lo me ncuaane nod gon me.”

<sup>8</sup> Blozh ga bii güeynie ma me glaa tib guic gui, ga blu ma grëse guiedz ne ndxie dib lo guidzliu lo me, ni blu ma grëse ncuaan ndaan ne rap tib tib guiedz co,

<sup>9</sup> rëb ma lo me:

—Bui ganle, grëse ncuaan qui gon gnedz naa lo luu telne squitsgzhib luu lo naa niina, gunnon luu naa.

<sup>10</sup> Horco pquiab me rëb me lo ma:

—jBiche lo naa nu mendox! Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me rieguial yquitsgzhib luu; ni mine rnabey me min co none gon luu.”

<sup>11</sup> Dzigoraa biche ma lo me, dzigo bdziṅ bla anjl bdeed zho ncuaane dow me.

### *Psilo Jesús pseed me miech nëz Galilé*

(Mr. 1:14-15; Lc. 4:14-15)

<sup>12</sup> Zeene bin Jesús laa Juan biab ladzguuib, dzigo brieer me ga güey me nëz Galilé, guiedz ne lë Nazaret.

<sup>13</sup> Zhisaque goca, brieer me ga güey me Capernaum tib guiedz ne ndxie gax ro Nisdoo Galilé, zaatne nac xtan zha xtii Zabulón ni zha xtii Neftalí.

<sup>14</sup> Ga brieequia mine bzeet Isá (men ne pxeel Dios padzeela biadnee xtiidz me), zeene psiaab Dios guic Isá rëb Isá:

<sup>15</sup> Grëse menzit ne ndxie xtan Galilé, nëz dan ro guiubee Jordán, gax ro Nisdoo Galilé, zaatne gocchen Zabulón ni Neftalí;



16 miech ne no lo ncow nac zho, per niina tib biini nroob biab lo zho. Ladzniale guielgut no zho, per laa biini co biab lo zho par griece zho ga.

17 Ga psilo Jesús pseed me miech, rnee me lo zho csaan zho xquielntseeb zho, gbig zho lo Dios, sac laa dze ne csilo gnabey Dios ziaadgaxle.

*Bredz Jesús tap ngoozmel  
(Mr. 1:16-20; Lc. 5:1-11)*

18 Leñ dze co, tib dze zieded Jesús gax ro Nisdoo Galilé gon me chop ngoozmel, tib zho lë Simón Pedr, stib zho lë Ndrés; grop bets zho lëetse laa zho noron guix ne rgaa mel lo nis.

19 Dzigo bredz me zho, rëb me lo zho:

—¡Goltë goltënal zhits naa! ¡Laa naa cxeł to tsie to stib gooz, tsietop to grë miech ne sëëb xnëz Dios!

20 Horcogazh psan zho guix ne rgaa mel ga, laa zho zienal zhits me.

21 Zhisaque bzë me ro nis co, gon me laa Jacob ni Juan (lëë grop xingan men ne lë Zebedé ga) no tib leñ barcw gza pxoz zho, noquiaabdie zho guix ne rgaa mel; dzigo bredz me zho.

22 Zigne bredz me zho biaanñieque pxoz zho barcw ga, laa zho zienal zhits me.

*Zëëb diidz grëtaa milagr ne run Jesús*

23 Dipse xtan zha Galilé, guiedz ne rdziñtaa Jesús rie me grë yadoo ne zob lad guiedz co rseed me miech Xti-idz Dios, rnee me lo zho zha racladz Dios gban zho, ni runguiac me grë men rzacnë, tel pe guielguidztaa rzac zho.

24 Tel pa lotaaw zëëb diidz scataa run me grë milagr, haxta nëz Siria bin miecha. Nzian grë men co brieeg a bdziñnie zho grë zhimguidz zho lo me: no grë men rzacnë co noguitnie mendox, no zho rlan guielguidz gutye, no zho gutoo dipse xcuerp, no zho rlan grë pe stib guielguidz, nogaa zho rlan grë pe yoob; grëse zho beenguiac me zho.

25 Zaatne zieetaa me, miech guizhiu ne nal zhits me, grë zha

Galilé, grë zha Decápolis, grë zha Jerusalén, grë zha Judé, haxta grë zha ne no stib nëz ro guiubee Jordán.

## 5

*Cho nac zha ne wen zie  
(Lc. 6:20-23)*

1 Tib dzew, gon Jesús laa grë miech guizhiu co bdziñ lo me, dzigo bzoquia me glaa tib guic gui win. Ga zob me, bdziñ grë xpëëdscuel me lo me,

2 dzigo psilo me pseed me zho, rëb me:

3 —¡Wen zie zha ne rien ib none gbig zho lo Dios, sac ib dzziñ zho zaatne rnabey me!

4 ¡Wen zie zha ne mban rac roon niina, sac schoobladz Dios zdoo zho!

5 ¡Wen zie zha ndooladz, zha ne zienie guic gban zigne rnabey Dios, sac scaania zho guidzliu ne gdeed me lo zho!

6 ¡Wen zie zha ne racladz gun grë mine rnabey Dios, rzac zhow zigne rzac zha ne rcaabedz, zha ne rnabgaa zhis, sac ible zacnie Dios zho parne grieelo gun zhow!

7 ¡Wen zie zha ne rquia zdoo miech, sac zigne rquia zdoo zho samiech zho scaque Dios squia zdoo me zho!

8 ¡Wen zie zha ne mbele zdoo, zha ne biaanmbele lo xtol, sac zanlo zho Dios!

9 ¡Wen zie zha ne noxco zaacse gban miech, tild zho, sac masaque mëëd gac zho lo Dios!

10 ¡Wen zie zha ne loxaque porne quiayun zho mine rnabey Dios, rquianal miech zho, sac ible dzziñ zho zaatne rnabey me!

11 'Zig nac to, zeene csilo grë miech yquiaago zho to, ctsidil zho to, yquiadiidzguizh zho to loxaque ne rililadz to naa, ¡wen zie to ga!

12 ¡Nley golco zdoo to, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been zho grë zha ne pxeel me padzeela biadnee xtiidz me.

*Nac to zig nac zed, zig nac biini  
(Mr. 9:50; Lc. 14:34-35)*



13 'Masaque nac to lo guidzliu rii zig nac zed. Nanle to ganle pa lotaa rquiin zed, per telne nzhida, zpa dien rquiina? jLëë gdib rliaala lo guizh, zaatne rded rzë miech rzëëni zhow!

14 'Nac to zig tib biini ne noziini lo guidzliu. Grieelod tsongueets to, sac tib guiedz ne ndxie glaa tib guic gui, grieelod tsongueetsa.

15 Golguien ganle nacd biini parne tsolana, sinque parne gziiniw lo grë miech ne no len yu.

16 Zaacse sca golgac, mine rquiin min co golgun, masaque lëew gac zig tib biini; zeena zeene gan miech biini co zien zho ganle pa lotaa men nroob nac PxoZ to men ne no gbaa.

17 'Guiabde to togo bod laa naa zial zialtichee naa ley ne psan Moisés, o grëgaa mine bnee zha ne biadteed xtiidz Dios padzeela; sac led mincod zial naa, sinque laa naa zial gun naaw zigne no gaca.

18 Gnelli naa lo to ganle: Laga niaa guidzliu rii, laga niaa gbaa, ib none gac mine zhobnee lo ley, mine bnee-gaa zha ne biadteed xtiidz Dios, ni tib lë paat gdzëëda.

19 Gacxe waa zha ne quiits tib ley niicle mine mazdraa wina, ni cseed zho miecha zigne run zho ga, ib ted-sod zha nac zha ne mazdraa win guiaan lo grë zha ne yгаа zaatne rnabey Dios. Sangue zha ne guna zigne rnabeya, ni cseed zho miech scaque tsienal zhow, zha cosi nroob gacnon zho lo grë zha ne gdziñ zaatne rnabey Dios.

20 'Rso naa diidz lo to sca, zaacse golgac gunde to zigne run grë maistr ley, grë zha farisé; sac telne tsox-code to gban to zigne racladz Dios, grieelod gdziñ to zaatne rnabey me.

*Nodne gut miech  
(Lc. 12:57-59)*

21 'Led nanle to ganle, no tib ley ne biaan lo xmenjol to padzeela, rneew: "Gute luu samiech luu"; rnabeya zha ne gut samiech, ib none guetaque zho, quizhgazh zho dol co.

22 Sca rnee ley co, per zig nac zha ne gon në rac zdoo ran samiech, rriee-quia beetle zho ga, ye zho riegual quizh falt co. Zig nac zha ne gnee pe tib diidznë lo samiech, none gacredz zho lo wxtis zeena gunquizh zho zho dol co; zha ne quiegaa samiech, lëëque zha rguib guey zho gabil ga.

23 'Gacxe waa tel ziesan to tib gon, per lo pcoogle zo to rsoladz to rdilne to tib samiech to,

24 gase golsan gon co, goltzie goltzienabgazh perdon lo zha ne rlëë to lo ga, gbireraa to dzigo gdeed to gon co.

25 Zha ne sca rlëënie to, goltsoxco pront golguiaan wen; zeena tsiezod zho to lo wxtis, sac tel laa zho tsiezo to lo wxtis ib znabey wxtis tso to ladzguiib.

26 Gnelli naa lo to ganle grieede to ga, haxtaque lozh quizh to grë dimi ne gnab wxtis lo to.

*Nodne tsonie miech zha ne led tsiæld zho*

27 'Nanlaque to ganle zha rnee stib ley ne biaan lo xmenjol to, rneew: "Zha ne nole tsiel, zigtaa mguiw zigtaa wnaaw, nodne tsonie zho zha ne led tsiæld zho."

28 Per zig nac zha ne gon, ran tib wnaa ni rsilo zho riogui zho tsonie zho wnaa co, laa zho bdiitsle ley co.

29 'Gacxe waa, bziaalo to mine rquiaqui runctal to xtol to, mazd golcueegazha; niicle tel bziaalo derech tow. Peet nacd nitlo tib lëque xcuerp to, lëdle dib nacsew tsietsobe gabil.

30 Laa tel niagaa tow, mine rquiaqui runctal to xtol to, niicle tel nia derech tow, golchuggazha. Peet nacd nitlo tib nia to, lëdle nitlo to len gabil dib nacse xcuerp to.

*Nodne csëbtsieel miech  
(Mt. 19:9; Mr. 10:11-12; Lc. 16:18)*

31 'No stib ley znu rnee: "Mgui ne racladz csaan tsiel, zac ctso zho; totsaque gdeed zho tib guits lo wnaa, zaatne raquiet ne laa zho psaan wnaa."

32 Per gni naa lo to ganle: telne quiangobd tsiel zho stib mgui, ni rsëbtsieel zho, lëëque zha rguib ga

yquianie tsieel zho stib mgui. Mgui ne ctsieelnia wnaa co, dol ga gun zho, sac gon nole tsieel wnaa co.

### *Nodne yquidie miech*

<sup>33</sup> 'Ziyon to ganle zha nac stib ley ne biaan lo xmen gol to rneew: "Zha ne gzeet le Dios par glu zun zho mine bnee zho, yase zeene gdeed zho tib gona, gungaa zho pe tib dziina, ib none gun zhow."

<sup>34</sup> Per gni naa lo to ganle: nodne sca gzeet to le Dios, per ni gbaa nodne ne sca gzeet to, sac gon ga nac zaatne zob Dios;

<sup>35</sup> per ni guidzliu, sac lo guidzliu nac zaatne zo ni me; per ni Jerusalen, sac ga nac guiedz nroob ne rnabey me;

<sup>36</sup> guiaabgaa to gzeet to guic to. Gunscade to, sac gon zig nac guic to, per ni tib guitsguic to grielod csan nquits to, grielodgaa csan ngas tow.

<sup>37</sup> Gacxe waa ncuaane rgobey to zrieelo gun to, golguiab: "zun naaw", togo riengaa to grieloda, golguiab: "grieloda"; tsode to dieen cho gzeet to, sac gon led Diosdraa rnabey min co.

### *Nodne ctsire miech guienne* (Lc. 6:27-36)

<sup>38</sup> 'No stib ley znu rnee: "Tel cuee zho tib bziaalo luu, guiaand luu scase bleeque stib bziaalo zho, tel cueegaa zho tib lay luu, scaque been blee stib lay zho."

<sup>39</sup> Sangue naa laa naa rso diidz lo to gon, gunscade to; zha ne gacntseeb lo to, gacndaande to lo zho. Tel cap zho lo to, tiblise golgac, ib gunde to glisague nia to.

<sup>40</sup> 'Zha ne tsiezo to lo wxtis, ni lozh ga haxta gla zho xibiaagw to, golsaan guey zhow haxta xabnal to goldeed lo zho.

<sup>41</sup> Zeene grieequia zha ne gnabey to guey to xyo zho tib grol hor, golgueya, haxta tib hor goltsie guey tow.

<sup>42</sup> Zha ne gnabtaa pe cos lo to, goldeeda; zig nac zha ne ziadtiin, goldeed ncuaane ziadtiin zho, ctsirede to zho scase.

<sup>43</sup> 'Ziyonle to ganle no zha ne znu rnee: "Zha ne rdzieel xtiidz luu bleyne zho, scagaa zha ne rlee lo luu, bleenie zho."

<sup>44</sup> Per led scada gon, inone zaacse gac to lo zha ne rlee lo to! iZha ne rgodee to, golnab lo Dios gunlay me zho!

<sup>45</sup> Zeena sca glu nli xpued men ne zob gbaa nac to. Golgan ganle tel me rnabey me rziini ngbidz lo grese miech, zigtaa lo zha wena, zigtagaa lo zha ntseeba; scaque nisguie me rsiaba rquiin zho grese zho, rbed me dien cho ngable lo me, chogaa ngabd lo me.

<sup>46</sup> iGase nasca golwi! Tel loxaque zha ne ndzieeldiidz to zha cose rleyne to, iniacxe zgaa to guienzaac ne gdeed Dios? Haxta zha ne mazdraa ntseeb run min co.

<sup>47</sup> Tel loxaque zha ne nase menlidz to, lo zha cose zaacse rnee to, ipe lee guienwen ga na rlu to? Haxta zha ne runbeyd Dios run min co.

<sup>48</sup> Goltsoxco sca ndzinli golgac, zigne rleyne Pxoze to (men ne zob gbaa) grese miech, scaque none gun to.

## 6

### *Zha ne run xyudar samiech*

<sup>1</sup> 'Zeene gun to xyudar samiech to, ib gunde to zaatne ndxiepaa miech ga so to glu to xquienwen to, par gan zho mine run to. Telne sca gun to, ygaade to guienzaac ne gdeed Pxoze to men ne zob gbaa.

<sup>2</sup> Gacxe waa, zeene gun to xyudar zha ne guien pe yquiin, gooldide tow zigne run gre zha ne rquiaalo rquia zdoo samiech; sac zha co tel pe ncuaane rgad zho, rzo zho len yadoo, rzo zho ro nez rlozhd yquiaabdzie zhow par gacnanpaa miecha, zeena zha ne gona guiab zho: iZha wentaa zha qui! iGneli naa lo to ganle ne sca rianziuu zho lo miech, leele gdib guienzaac ne ygaa zho ga!

<sup>3</sup> Golguien sca, zeene gun to xyudar zha ne no tib liaadz, choot lo gzodidzde tow, per ni zha ne mazdraa ndzieeldiidz to nodne gacnana.

4 Dzigo scagaa Pxoꝝ to nroob guieḷnzaac ne gneedz me lo to, sac tel me grësew ran me.

*Zha gzodiidznie miech Dios*

(Lc. 11:2-4, 34-36; 12:22-31, 33-34; 16:13)

5 'Scaque zeene gzodiidznie to me, gunde to zigne run grë zha ne rquiaalo miech wen nac zho. Sac tel zha co zeene rzodiidznie zho me, rzo zho zaatne ganpaa miech zho, zig nac len yadoo, zig nac len guiedz zaatne rded rzë miech. Gneli naa lo to ganle lëele guieḷnzaac ne yгаа zho ga.

6 Golguieḷ zeene gzodiidznie to me, golsëeb len lidz to dziits golsioog ro yu, ga golzodiidznie me. Ible tedsod nroob guieḷnzaac gneedz me lo to, sac niicle ncuaane mazdraa ngeets zhliana, ran mew.

7 'Ni zeene nozodiidznie to me, gunde to ncuaane nonee to lëew rlozh, lëew rsilo zigne run grë zha ne runbeyd me. Sac zha co rzac zho por nroob diidz gnee zho, por nzian vuelt gnee zhow dzigo squiaadiag mew.

8 Gunscade to, sac me ne nac me Pxoꝝ to gardle gnee to xliaadz to lo me laa me nanle pe nac ncuaane rquiin to.

9 Gacxe waa zeene gzodiidznie to me, znu golnee:  
Dios, luu ne nac luu Pxoꝝ no, zob luu gbaa;

luuse nac men ne mazdraa ndzon.

10 Luu nac men ne gnabey no, mine gnabeytaa luu zigne raca gbaa, scaque none gaca lo guidzliu nu.

11 Been guieḷnzaac bneedz ncuaane dioow no nadze.

12 Bzhiguiel been no perdon grëse dol ne ziodziuun no lo luu, zigne rdziuun no samiech no perdon grë falt ne run zho lo no.

13 Gdeete luu diidz yquii mendox no, been guieḷnzaac bla no lo ma.  
Luu nac men ne rnabey, men ne rap poder, men ne mazdraa nroob.  
Mine rnab no nu, ndionpaa no zun luuw.

14 'Sca nagon none gnee to. Ni golgona ganle, zha ne gon gun

samiech zho perdon tel pe nactaa falt ne been zho lo zho, scaque Pxoꝝ to men ne zob gbaa, zun me zho perdon.

15 Zha ne gund samiech zho perdon, niicle megaa gund me perdon xtol zho.

16 'Stiba, zeene nocuan to nozodiidznie to me, gunmbande to lo to. Sac grë zha ne rquiaalo miech wen nac zho, sca run zho; zeene nocuan zho xtsiinpaa run zho runmban zho lo zho par gan miech laa zho nocuan. Gneli naa lo to ganle, zha ne sca run lëele guieḷnzaac ne yгаа zho ga.

17-18 Gunscade to, nguieel golgac ine golzëe biegw guic to, golquiib lo to, zeena ni tib choot guiend laa to nocuan, loxaque Pxoꝝ to gacnaa, sac grëse ncuaane rac ngeets ran mew. Grëse ncuaane rac, me raana, me nac men ne gneedz tib guieḷnzaac nroob lo to.

19 'Tsienalde to loxaque dieḷ zha gapchen to lo guidzliu rii, sac nac ncuaan lo guidzliu rii rban ngbaana, rnitlo mxila, haxta noxtseeb guioochena.

20 Mazd goltsoxco yгаа to guieḷnzaac ndzon ne no gbaa, sac mine no gbaa, led yed min co guioochen, led yed min co cuan ngbaan, led yedgaaw gnitlo mxil.

21 Golgona ganle, guieḷnzaac ne gon gunlo to, ga glu pa gdziḷn xalm to, sac zaatne gunlo to guieḷnzaac co ga nac zaatne gdziḷn xalm to.

22 'Rrieequia nac bziaalo to zig nac tib biini. Telne niapse lo grë ncuaane ndzinli rwi to, dzigo gdipse xcuerp to no lo guieḷbiini.

23 Laa telne loxaque lo grë ncuaane nonguield rwi to, dzigo gdipse xcuerp to no lo guieḷcow ga. ;Zha rnazhe lo guieḷcow co, tel lëeque biini noyac guieḷcow!

24 'Golgona ganle, grieelod gon gleynie to dimi, ni gleynieque to Dios. Ib none telne Dios rleynie to, me none gleynie to, togo dimigaaw, dimi golleynie.

25 'Gacxe waa, gni naa lo to ganle: Tsode to zhgab dieḷ zha gban to lo

guidzliu rii, pa griee pe gow to, pe guie to, pe gacwxabгаа to. Stiba, ¿niacxe mazdraa non guielwagw lo xquielmban to? Xabгаа tow, ¿niacxe mazdraa nona lo xcuerp to?

<sup>26</sup> Golwi lo grë mguin ganle, led yed ma rquia gon, led yed ma rquia wlaap, led yed ma rgotsow pe guielgon, per row ma, sac Pxoz to men ne zob gbaa, men co rdeed ncuaane row ma. ¡Tel to gon, mazdraa non to lo grë mguin co!

<sup>27</sup> Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow?

<sup>28</sup> 'Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee ne ganle zëëb dan, zha rrooba, led yeda rio zhgab dien zha gacwxaba, per niow rnaw;

<sup>29</sup> gni naa lo to ganle, per ni rey Salomón con grë xab niazh me, blud me scataa niow.

<sup>30</sup> 'Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecle, ni scataa niow rgacwxab Diosa, ¿pe lel to dzigo ygacwxabd me, niicle ne squi gard guien to dib zdo to gnalo to me?

<sup>31</sup> 'Tsode to zhgab sca guiab to: "¿Bay pa griee pe dioow ne, pa griee pe dio ne, pa griee pe dziaacwxab ne?"

<sup>32</sup> Grë miech ne runbeyd Dios, tibaque zhgab co rio zho. Sangue to golsoladz ganle, Pxoz to men ne zob gbaa, nanle me pe nac grë xliadz to,

<sup>33</sup> me nac men ne gneedz ncuaane yquiuin to, per ib none glo tsoxco to gban to zigne rnabey me.

<sup>34</sup> Golguien sca tsode to zhgab dien zha ted to gzhe widz, sac gzhe widz co zhaalae xco ne ziaad. Tib tib dze zhaase zhaase zhgab ne ziaadniew.

## 7

*Nodne gzee zdo ne cho zha rac*  
(Lc. 6:37-38, 41-42)

<sup>1</sup> Blozh ga rëbchaа me lo zho:

—Golguien, ib gunde to në gac zdo to zeene ran to ncuaan nonguield ne run stib miech, sac to tozhal gunquizh zhow; zeena scagaa Dios, gunscad me to.

<sup>2</sup> Sac gon tel zha rzac to samiech to, scasaque sac Dios to.

<sup>3</sup> 'Lëda ga gon tso to lozhd gzee zdo to dien cho pe run, ni nenda mazdraa mine run to!

<sup>4</sup> ¿Pe ro to glisqui to mine run stib zho, ni tel mazdraa nac mine run to?

<sup>5</sup> ¡Golguien sca glude to ncuaane nacde to! Glo goltsoxco ndzinli gac to, dzigo lozh ga zac tsienee to lo stib zho zha gacndzinli zho.

<sup>6</sup> 'Ndzon nac Xtiidz Dios, gdeete tow lo zha ne rlëeniew, sac gon rriequia lo mëcw ga gdeed tow, ib zun zho mine run mëcw zacntseeb zho lo to. Naca zig nac quie perl, gdeete tow lo zha ne rleynieda, sac gon rriequia lo nguts ga gdeed tow, tel ngutsa niicle ncuaane mazdraa non glaal zho lo ma, loxaque gzëeni maw.

*Ncuaane gnabtaa ne zгаа new*  
(Mr. 1:22; Lc. 6:31, 43-44, 47-49; 11:9-13; 13:24-27)

<sup>7</sup> 'Ncuaane rquiin to, golnaba lo Dios, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to.

<sup>8</sup> Sac grëse zha ne rbig lo me rnab zho ncuaane rquiin zho, rdeed mew. Zha ne rguib ncuaane racladz, racnie me zho rdziel zhow. Zha ne rbedzle me, rcaania me zho.

<sup>9</sup> 'Golwi ganle, zig nac to zeene rnab xpëed to quiet gow win, ¿niacxe ziazh to co to tib quie nia win?

<sup>10</sup> Zeene rnabгаа win mel, ¿niacxe zdeed to tib meel lo win?

<sup>11</sup> Led rioxco to lëë niapse ncuaane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel Pxoz to dzigo, men ne zob gbaa, tsoxcod me to. Ib tedsod grëse zha ne gnab lo me gdeed me ncuaane rquiin zho, zdeed mew.

<sup>12</sup> 'Zha ne racladz ndzinli gac miech lo zho, none glo zho zaacse gac zho



lo miech. Zigtaa ley ne psan Moisésa, zigtagaa mine bnee grë zha ne biadteed xtiidz Dios padzeelaw, sca rnabeya.

13-14 'Goltsoxco sca tsienal to mine rnabey Dios, niicle ne nac guielmban co zig nac zeene rzë ne tib nëz nia. Zhis zha ne rzëeb nëz co, per nëz co zgaa miech guielmban ndzon ne rdeed Dios. Sac gon zha ne mban zigne notaa guic zho, rriequia tib nëz nzhen ga zie zho; ndal miech ne zie nëz co, per nëz ne nitlo zho ga zie zho.

15 'Nsin golso lo zha ne gacladz yquidie to gnë zho xtiidz Dios noteed zho, niicle ndooladz rlu zho pale cho grë mëcwxiiil yeen, per zha ntseeba, masaque nac zho zig grë coyot blë.

16 Zigne runbey miech tib yag por nex ne rquia low, scaque wen wen golwi zha nac ncuaane run zho, dzigo ga gunbey to cho nac zho. Sac gon zig nac uv, rquiada lo yag guiets; niicle guigwgaaw rquiada lo grë lbë guiets.

17 Tib tib yag nex rdeedsew xnexa. Tib yag wen, nex wen rquia low; sca-gaa yag ncuaana, nex ncuaan rquia low.

18 Griee lod yquia nex ncuaan tib lo yag ne rquia nex wen, ni griee lod gaa yquia nex wen tib lo yag ncuaan.

19 Gacxe waa grë yag ne rquia nex ncuaan, paat rquiinda, lëe gdib rruga, rlozh ga rzëeg zhow.

20 Min co nagon rne naa lo to, zha ne sca guiaad, por ncuaane run zho ga gunbey to cho nac zho.

21 'Grë zha ne rnee noxco zho mine rnabey Dios, no zho lega rneesew. Nenda haxta rnee zho, naa nac men ne rnabey zho, per gdziind zho zaatne rnabey Pxoz naa. Sac zha ne nlipaa run mine rnabey me, zha cose gdziinga.

22 Gal dze co, nzian zha ne grieequia gnë lo naa: "Conque rdziuunbey no luu, blactaa name bio no bionee no Xtiidz luu lo miech, nzian milagr ne bdziuun no, haxta mendox bdziuunxoön no zeene bzeet no lë luu."

23 Niicle sca gnë zho, ib ycaaniad naa zho, sonëz naa zho; sac ni lalnu beend zho ncuaane ndzinli.

24 'Zha ne rquiaadiag mine rne naa, ni rioxco zho rban zhow zigne naca, rriequia nac zho ga zig tib zha ndzielguic ne bzaa lidz zaatne nac tib lo quie.

25 Niicle riab guiedox per peet racd lidz zho, niicle rrie medox, nis naal ne raclo rded zaatne zoba ga, per rbixcheda.

26 'Laa grë zha ne rquiaadiag xtidz naa, ni rioxcod zho gban zhow zigne naca, ziaad gac zho ga zig tib zha nxen ne güeyzoob lidz zaatne nac tib lo yuzh.

27 Znuse bnitlo lidz zho, sac zeene biab guiedox, lo medox ne brieë, lo nis naal ne goclo bded zaatne zoba, znuse bixchew, ni stib lëw biaand.

28 Zeene blozh bnee Jesús, grë miech ne noquiaadiag ga, per nli rzee zdoo zho gon zho zha rseed me,

29 sac rlu men rnabey nac me, led yed me rseed miech zig rseed grë maistr ley.

## 8

### *Biac tib mgui ne rlan lepr (Mr. 1:40-45; Lc. 5:12-16)*

1 Laa Jesús ziad-zëeb cho gui win co, miech guizhiu ne nal zhits me,

2 tibaque briequia tib mgui ne rlan guiedzdox ne lë lepr, wbig me pquiitsgzhib me lo Jesús, rëb me:

—Tebaa siguieel luu gunguiac luu naa.

3 Dzigo pxobnia Jesús guic mgui, rëb Jesús:

—Zunguiac naa luu. ¡Niinagazh laa luu guiaanmbe!

Horcogazha laa grë guiedz co bnitlo.

4 Dzigo rëbchaa Jesús lo me:

—Bina ganle, choot lo gzodiidz luu gon zha biac luu; sinque güey lo pxoz güey san gon ne riegual gdeed luu zigne rnabey ley ne psan Moisés, zeena gan zho ganle laa luu biacle.

*Biac tib zha ne rquia dziin tib lo men<sub>g</sub>uiib*

*(Lc. 7:1-10)*

<sup>5</sup> Loxaque bdziñ Jesús guiedz Capernaum, laa tib meñ ne rnabey lo xmen<sub>g</sub>uiib zha Roma bdziñle lo me, rnab meñ co gunguiac Jesús tib zha ne quia xtsiñ me, rëb me:

<sup>6</sup> —Been tib guiel<sub>n</sub>zaac been<sub>g</sub>uiac tib zha ne rquia xtsiñ naa, laa zho nix lidz naa ib gacd grial<sub>l</sub> zho, mban rac zho yoobdox ne rquia zho.

<sup>7</sup> Dzigo rëbchaa Jesús:

—Peet nacda, na së naa guio ne gunguiac naa zho.

<sup>8</sup> —Coo —rëb men<sub>g</sub>uiib co—, riegual<sub>d</sub> csodziin naa luu sëe luu haxta lidz naa. Nan<sub>p</sub>aa naa zrieelo luu nugazh gnabey luu guiac zho.

<sup>9</sup> Sac zig nac naa no zha ne rnabey lo naa, ni ron naa miñe rnabey zho; scagaa tel<sub>l</sub> guiep naa tib lo zhaguiib ne rnabey naa: “Güey nu”, rie zho; rnegaa naa: “Dë nu”, riaad zho; zha ne run<sub>g</sub>aa dziin lo naaw, miñe rnabeytaa naa zho, run<sub>l</sub> zhow. Scaque luu nagon<sub>l</sub> nan<sub>p</sub>aa naa zrieelo sca gnabey luu guiac xmoz naa.

<sup>10</sup> Zeene gon<sub>l</sub> Jesús sca rnee meñ co, rley me, rëb me lo grë zha ne zienal<sub>l</sub> zhits me ga:

—Lo grë zha Israel, gard gon<sub>l</sub> gan<sub>l</sub> naa tib zha ne squitaa dib zdoo rnalo Dios.

<sup>11</sup> Ni gol<sub>l</sub>quiaadiaga gan<sub>l</sub>le, zdziñ dze grële zha zit ne squi gnalo Dios, zha co ygaa sobnie Abraham, sobnie Isaac ni Jacob zaatne rnabey Dios.

<sup>12</sup> Laa grë zha Israel, niicle nac zho zha ne nac diidz gdziñ ga, lel<sub>l</sub> lo ncow nëz ley guiaan<sub>l</sub> zho, ga tso zho goonnë zho, haxta gow lay zho lo guiel<sub>n</sub>ëdox co.

<sup>13</sup> Blozh ga rëbchaa me lo men<sub>g</sub>uiib co:

—Bzë nasca, gocnan<sub>l</sub> gan<sub>l</sub>le zigne biladzse luu guiac xmoz luu, sca gaca.

Horcogazha laa moz co biac.

*Biac xniadzoop Pedr*

*(Mr. 1:29-34; Lc. 4:38-41)*

<sup>14</sup> Laa zeene bdziñ Jesús lidz Pedr, gon<sub>l</sub> me laa xniadzoop Pedr nix rlan<sub>l</sub> xlëe.

<sup>15</sup> Dzigo bded me zaatne nix zhuz co, zigne bzhen<sub>l</sub> me nia zhuz laa xlëe co blëz. Horcogazh guche zhuz been<sub>l</sub>lo zhuz ncuaane dow zho.

<sup>16</sup> Ziedzele dzew, laa ngbidz rzëëblew, zeene bdziñ grë miech co, nzian grë zha ne nosacsi men<sub>d</sub>ox bdziñnie zho lo me. Grëse zho been<sub>g</sub>uiac me, goctox me lo grë men<sub>d</sub>ox ne nosacsi zho ga, ben<sub>c</sub>xoon me ma; ni zha ne rlangaa pe stib guiel<sub>g</sub>uidz, grëse zho been<sub>g</sub>uiac me.

<sup>17</sup> Ga brieequia miñe bzeet Isá, meñ ne biadteed xtiidz Dios lo miech padzeela, zeene rëb me: “Grëse xquiel<sub>n</sub>ë ne, grëse guiel<sub>g</sub>uidz ne rziaac ne, me biw.”

*Zha ne racladz sëeb xnëz Jesús*

*(Mr. 4:35-41; Lc. 8:22-25; 9:57-62)*

<sup>18</sup> Zeene gon<sub>l</sub> Jesús scataa ndal miech ne goclo lo me ga, dzigo bnabey me xpëëdscuel me gzhixcuaa zho, sac laa zho no tedquia stib nëz ro nisdoo co.

<sup>19</sup> Dzigo wbig tib meñ ne nac maistr ley lo me, rëb maistr co:

—Zaatne tsietaa luu gon<sub>l</sub>, sënäl<sub>l</sub> naa zhits luu.

<sup>20</sup> Dzigo rëbchaa me:

—Gocnana gan<sub>l</sub>le, naa ne nac naa Mgui ne pxeel<sub>l</sub> Dios, peet rapd naa nu, mazd zig nac grë mëz, grë mguin<sub>l</sub>, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

<sup>21</sup> Wbigaque stib zha ne rzënalle zhits me, rëb zho:

—Ye naa gon<sub>l</sub> sënäl<sub>l</sub> naa zhits luu, per bzhiguiel<sub>l</sub> bneedz diidzbey cuëz naa gan<sub>g</sub>azh naa tsoliu pxoz naa.

<sup>22</sup> Pquiab me rëb me:

—Dënäl<sub>l</sub> zhits naa. Psaan, nzian grë zha gut no, tsow tsiequeets zho samengut zho.

<sup>23</sup> Dzigo laa me bzëëbnie xpëëdscuel me tib len<sub>l</sub> barcw, laa zho zie.

<sup>24-25</sup> Laa zho zie lo nis co, tibaque zeene psilo brieetib medox, masaque rlis me lo nis co, laaw psilo rzëeb



len barcw. Dzigo lëäläd güey zho güeycuaan zho me, sac lëätaque nixguies me.

—Ligier ganle —rëb zho—, blee mcaal lo luu. ¡Bui ganle laa ne nitlo lo nis rii, csaand luu guet ne nu!

<sup>26</sup> Dzigo rëbchaa me lo zho:

—¿Pe nacne squitaa rdzieb to? ¡Gardaque dzigo lëä gliladz to cho nac naa!

Dzigo guche me, bnee me lo me co, bnee me lo nis co cuedzew. Horcogazha blëz me co, niicle nis cow laaw bredze.

<sup>27</sup> Zeene gon zhow, bzee zdoo zho.

—Bay chozhe waa nac men rii —rnee zho—. ¿Zha nac ne haxta me, haxta nis ron xtiidz me?

*Men Gadar ne nosacsi mendox*  
(Mr. 5:1-20; Lc. 8:26-39)

<sup>28</sup> Laa zho bdziidze stib nëz ro nisdoo co, zaatne nac xtan zha Gadar, zeene brieequia chop mgui ne nosacsi mendox, bdziin lo Jesús ga. Zha ntseeba, rdzieb miech zho, choot rdete nëz co. Len baa brieegrop mgui co bdziin zho ga,

<sup>29</sup> nguiedz roptsie zho rnee zho:

—¡Peet gund luu no Jesús, psaan no! Rdziuunbey no luu, Xpëed Dios nac luu. Ne nligaa been guielnzaac csacsid luu no niinaga.

<sup>30-31</sup> Zitlaaque ga ndxie tib dzoon nguts notop lag, dzigo bnab grë mendox co lo Jesús rëb ma:

—Telne cuee luu no nu, bzhiguiel bneedz diidz lose grë nguts qui gdziin no.

<sup>32</sup> —Niinaga sca goltsie —rëb me.

Zigne psaan mendox co grop mgui co, güey ma bdziin ma lo grë nguts co. Horco psilo grë nguts co, rquiaa ma corr güeypix ma tib ro yeedox ne quia ro nisdoo co, bliaal ma lo nis, grëse ma gut.

<sup>33</sup> Zha ne quianap grë nguts co, gzase zho bzhoon. Güey zho lad guiedz güeyzodiidz zho zha goc grë nguts co, ni bzodiidz zho zha biac grop mgui ne nosacsi mendox ga.

<sup>34</sup> Grëse miech co, brieë zho zieso zho. Zeene bdziin zho gon zho laa Jesús zo ga, dzigo bnab zho lo me siguiel me gbi me xtan zho.

## 9

*Biac tib men ne gutoo*

(Mr. 2:1-12; Lc. 5:17-26)

<sup>1</sup> Dzigo wbiireque bzëeb zho len barcw, bdziin zho guiedz Capernaum stib, sac ga nac zaatne rbëz Jesús len dze co.

<sup>2</sup> Zhisaque goc bdziin me, laa zho bdziinniele tib men rzacne lo me, dipse men co gutoo, ib gacd së me. Lo yag zhoob me bdziinnie zho me ga.

Zeene gon Jesús dib zdoo grë zha co rnalo zho ne me gunguiac men rzacne co, rëbchaa me lo men rzacne co:

—¡Nley bloo zdoo luu xin! ¡Laa naa benle perdon grëse xtol luu!

<sup>3</sup> Ga zob blalaa maistr ley, zeene gon zho sca bnee me, bza zdoo zho rëb zho: “¡Quiaguitnie men qui Dios gon squi rzë xtiidz me!”

<sup>4</sup> Bienga Jesús sca rza zdoo zho, dzigo rëbchaa me:

—Lëda i gon squi rza zdoo to.

<sup>5</sup> Nli nganda guiab ne lo miech: “Laa naa benle perdon grëse xtol luu”; per grielod lega guiab ne laa ne gunguiac zho.

<sup>6</sup> Gacnan to sca ganle naa ne nac naa Mgui ne pxeel Dios, ible rap naa poder par gun naa miech perdon.

Dzigo rëbchaa me lo men rzacne co:

—¡Niinagazh guche i, bi yag ne bzhooob luu i, zeen bzë!

<sup>7</sup> Zigne sca bnee me, laa mgui co bzoli, laa me zey.

<sup>8</sup> Grë miech guizhiu ne ndxie ga, zeene gon zho sca beenguiac me mgui co, bdzieb zho. Psilo zho rdeed zho xquizh lo Dios, scataa poder ne bdeed Dios lo me.

*Bredz Jesús Matew*

(Mr. 2:13-17; Lc. 5:27-32)

<sup>9</sup> Blozh ga laa Jesús brieë ga. Ro nëz zieded me gon me tib men lë Matew, lëätaque laa men co zob lo mezh zaatne razh dimi ne rey lo zha Roma; sac me rcaania dimi co. Dzigo bredz Jesús me tsienal me zhits Jesús. Ga guso me, laa me zienal.

<sup>10</sup> Bded ga güeynie me Jesús tib wagw lidz me. Grë zha ne rcaania dimi ne razh lo zha Roma, grë zha

ne zëeb diidz nac zha ntseeb, tipse brenie Jesús zho grë xpëedscuel me.

11 Blalaa zha farisé, gon zho sca tipse zobnie me grë zha co, bded ga, rëbchaa zho lo xpëedscuel me:

—¡Mod scataa na rownie xmaistr to grë zha ngoopdol, grë zha beed ne nac recaudador!

12 Bin Jesús sca quianee zho, dzigo rëbchaa me lo zho:

—Nanle to ganle, zha ne run rmed, zaatne no zha rzacnë ga rquiin zho, ¿niacxe squiin zho zaatne no zha ne ndip ndaan?

13 Golsoladz ganle znu rnee Dios: “Laa naa racladz gacndooladz miech, yquia zdo zho samiech zho, racladz-daxe naa waa guiaad zho dieen peraa guiaadlogon zho lo naa.” Mazd ganle goltsie, tsow golsob golguien dien zha nacne sca rnee me. Tel naa, zialguibd naa miech wen, sinque laa naa zialguib grë zha ngoopdol.

*¿Pe nacne rcuand xpëedscuel Jesús?  
(Mr. 2:18-22; Lc. 5:33-39)*

14 Bdzinaque xpëedscuel Juan Bautist, bnabdiidz zho lo Jesús, rëb zho:

—¿Pe nac waa ib rcuand xpëedscuel luu? Ni no grë no zha farisé, zhiga zhiga laa no rcuanle.

15 Pquiab me rëb me lo zho:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho, ni ran zho laa mgui ne notsieelnia zo lo zho? Per dzin dze zeeñe laa mgui co gbiche, ni zeeñe laa dze co gdzin, dzigosi nagon rieguial tso zho guielnë, rieguial ycuan zho.

16 Ranle to ganle, zha ne rquiaabdie tib lë lar, yquiaad zho lar cub lad lar gox, sac zha ne sca gun paat yquiind wquiaabdie co. Zeeñe laa lar cub gbe, lëëque lëew gunnat zaatne nriez lar gox.

17 Scaque tsod zha ne cotsow vin cub tib len guid ne padzeela noquiin, sac stsiez nziu cuba; dzigo niicle guid cow, niicle nziugaaw laaw nitlo ga. Gacxe, tel nziu cuba none len guid cubaque tsotsowa.

*Brieaban tib mëdwnaa yeen  
(Mr. 5:21-43; Lc. 8:40-56)*

18 Lëëtaaque sca quianee Jesús lo xpëedscuel Juan Bautist, zeeñe bdzin tib mgui ne nac zha non yadoo. Zigne bdzin me pquiitsgzhib me lo Jesús, rëb me:

—Been tib guielnzaac së luu guio ne lidz naa. Laa tib xpëdwnaa naa blozh niina, per nanpaa naa telne cxobnia luu guic win, zbeeban luu win.

19 Dzigo bio Jesús nëz zienal me zhits men co, gza xpëedscuel me.

20 Lad grë miech ne zienal ga, lad co no tib men wnaa, gocle tsiipchop iz rlan me tib guielguidz, rzac me zigne rzac grë men wnaa gzob mëë, tibaque rlan mew ib rbëzda.

Ga zie me, zeeñe wbig me nëz zhits Jesús, bzhen me ro lar ne mbix Jesús,

21 sac tibaque güeynie guic me, ziac me totsaque ygaa xab Jesús nia me.

22 Dzigo wbire lo Jesús, dze bui Jesús lo me.

—Xin —rëb Jesús—, peet tsienied guic luu. Laa luu biac sacne bliladz luu naa.

Gataa laa wnaa co biac lo guielguidz co.

23 Laa zeeñe bdzin Jesús lidz men rnabey co, laa zha ne rool ndxiele, noquiaa zho grë di ne rac lo ngutoo, grëraa zha ne ndxie ga, nguiedz zëeb tsi zho roon zho, tib ruid ne rac.

24 Dzigo rëbchaa me lo zho:

—Golriee nëz ley, sac gon gute mëed qui, nixguiesse win.

Zha ne rlëë, zha ne rzhidzniegaa me, laa zho brie ley.

25 Dzigo laa me bzëeb len yu zaatne nix mëed co, bzhen me nia win. ¡Horcogazha laa win guche!

26 Grëse guiedz ne ndxie dib gax ga, gocnan miech scataa milagr nroob ne been me, bleeban me mëed co.

*Biac chop zha ne rold lo ni tib zha ngop*

27 Zeeñe laa Jesús wbi ga, nëz zie me brieenal chop zha ne rold lo zhits me, nguiedz rbedz zho rnee zho:

—¡Jesús, xingan David, pquia zdo no!

28 Bdzin Jesús yu ne rbëz me, laa zho wbig lo me. Dzigo rëbcha me lo zho:

—¿Dib zdoo to dzigo lëë rliladz to zrieelo gunguiac naa to?

—Dib zdoo now —rëb zho.

29 Dzigo pquiaania me zhits bziaalo zho, ni rëb me:

—Mine bliladz to i nasca, laaw gac niina zigne bliladz tow.

30 ¡Horcogazha laa lo grop zha co biac!

Dzigo pso Jesús diidz lo zho choot lo gzodiidz zho zha biac zho,

31 ni zigne brie zho ga, laa zho bzodiidzlew. Blozh ga, grëse guiedz ne ndxie dib gax ga, gocnañ miech scataa nac milagr ne run me.

32 Loxaque wbi grop zha ne biac lo ga, laa bla zho bdzinlaque, bdzinnie zho tib men ne nosacsi mendox, psanngop ma men co.

33 Dzigo benxoon Jesús mendox co, zeene laa ma bzhooñ laa men co psilo bnee. Grë miech guizhiu ne ndxie ga, per nli rzee zdoo zho, rnee zho:

—¡Wlaltaa gard dzian ne tib men ne squitaa gun grë milagr qui!

34 Laa grë zha farisé rnee:

—Ma ne rnabey lo mendox nacie men qui, gane rrieelo runxoon me mendox.

35 Grëse guiedz ne ndxie gax ga, zig-taa guiedz nrooba, zigtagaa guiedz lasa rie Jesús rieseed me miech. Zaatne rdzintaa me, rie me xyadoo zho rnee me lo zho zha racladz Dios gban zho, ni runguiac me zho tel pe nactaa guielguidz ne rzac zho.

36 Zeene ran me grë miech guizhiu ne rcaalsa lo me, rquia zdoo me zho, sac ran me mban rac zho guiend cho tib zha ne gacnie zho, rac zho zig grë mëcwxiil yeen ne guiend xbaxtor.

37-38 Tib vuelt haxta rëb me lo xpëedscuel me:

—Golnab lo Dios cxeelraa me zha ne gun xtsiin me. Golwi ganle pe zhidaa grë miech qui, quiambëz zho dien cho gnee Xtiidz Dios lo zho. Masaque nac zho niina, zig tib guielgon ne gollie gliiap.

## 10

*Bzo Jesús zha ne tsienee xtiidz me (Mr. 3:13-19; Lc. 6:12-16)*

1 Blozhse sca bnee Jesús, dzigo bredz me gza tsiipchop zha ne nac xpëedscuel me ga, bzo me zho tsienee zho Xtiidz Dios lo miech, bdeed me poder lo zho gunxoon zho mendox zaatne nosacsi ma miech, ni gunguiac zho grë men rzacnë.

2-4 Znu lë gza tsiipchop zha co:

Simón (zha ne rneeque zho Pedr),

Ndrés (bets Simón),

Jacob ni Juan (zha co nac xingan Zebedé),

Lip,

Bartol,

Mazh,

Matew (zha ne ptop dimi ne razh lo zha Roma),

Jacob (xingan Alfé),

Lebeo (zha ne rneeque zho Tadé),

Simón (zha ne no lo partid ne racladz grie zha Roma Israel),

ni Judas Iscariot (zha ne güeyto Jesús).

*Pxeel Jesús zha ne tsienee xtiidz me (Mr. 6:7-13; Lc. 9:1-6)*

5 Blozhse ga, pso me diidz lo zho zha tsie zho, rëb me lo zho:

—Nanle to nagon, tsiede to zaatne no grë zha ne nacd zha Israel, niicle sëebde to grë guiedz ne ndxie xtan zha Samar.

6 Zaatne no grë zha Israel, gase goltsie; lëë grë mëcwxiil ne nonziaab ga.

7 'Goltsie, goltsienee lo zho gacnan zho ganle laa dze ziaadgaxle zeene laa Dios csilo gnabey.

8 'Grëse zha ne rzacnë, golgunguiac zho; zha ne rlan guiedz lepr, golsanmbe zho; zaatne nix zha ne gutle, golcueeban zho; grë zha ne nosacsi mendox, golgunxoon ma. Peet gnabde to lo miech, golguien ganle lega bnedz naa poder qui lo to, bzhiide tow.

9-10 'Peet güeyde to, xab tow, lab tow, mine nacwse to, mine quiase ni to, mincose goltsienie. Güeyde to dimi, per ni tib quiet güeyde to; sac zaatne

tsiegun to dziin rii, ib ga none gneedz zho ncuaane gow to.

<sup>11</sup> 'Guiedz ne gdzintaa to, golguib dien pa lo no tib zha ne ndzinli, dzigo lidz zha co goltsiebëz, haxta gza dze ne laa to gbi guiedz co.

<sup>12</sup> Zeene noguib to pa cuëz to, yu ne tsie to, zaacse golgac, golquiaabdiuzh zha ne no yu co,

<sup>13</sup> golnab gunlay Dios zho. Telne wen gac zho lo to, zunlay me zho, togo guncasdgaa zho to, dzigo toque gunlay me.

<sup>14</sup> Zha ne sca siguield ycaania to, golrieegazh lidz zho; guiedz ne siguield zho yquiaadiag zho mine nonee to, golbigazh guiedz co; gollit grë yudie co ni to, gollu lo zho ganle led xtoldraa to ga tel laa zho nitlo.

<sup>15</sup> Gneli naa lo to ganle zeene gal dze ne laa Dios gun xquielwxtis me, bii lëëtaa gac guielnë ne ygaa grë miech ne bio guiedz Sodom, guiedz Gomorr, lëdle guielnë ro ne ygaa grë miech ne sca siguield ycaania to.

<sup>16</sup> 'Nsin golso, golguien ganle rrieequia tib mëcwxiiil yeense nac to, ni laa naa rxel to zaatne no grë coyot dox. Ndoooladz golgac, niowse golgac lo miech zig rac grë palom, per scagaa con cuidad goltsie, golgan ganle zha rzë meel.

<sup>17</sup> Nligaa nsin golso, sac gon ib ziezo miech to lo wxtis, ni lëëque len yadoo ga quin zho to,

<sup>18</sup> haxta ziezo zho to lo grëraa zha nroob ne rnabey. Laa zho guna, loxaque ne nac to zha ne no xnëz naa, ni gagaa nagon gdeeda diidz gnee to xtudz naa lo grë zha co, ni lo grëragaa miech ne nacd zha Israel.

<sup>19</sup> 'Zeene sca tsiezo zho to lo grë zha rnabey co, tsoode to zhgab dien pe gnee to, dien zhagaa gnee tow; sac zeene sca tsiegala, Dios gneedz diidz ne gnee to.

<sup>20</sup> Led tod gnee, sinque, ¡zhiEspíritu PxoZ to men ne zob gbaa, men co gnee ga!

<sup>21</sup> 'Zlëëniedox miech zha ne no xnëz naa. Zio zha ne lëëque bets zho, zha ne lëëque pxoz zho, zha ne lëëque

xpëed zho ctsidil zho, tsielo zho zho ladznia zha ne gut zho.

<sup>22</sup> Tel to, guiets yag gan miech to, per telne dziits so to tel pe nactaa lo guielnë ne ted to, ib zгаа to tib guielmban ndzon ne gdzindraa dze lozh.

<sup>23</sup> Guiedz ne no to, zeene laa miech csilo yquiaanal to, golriee ga, goltsie stib guiedz. Gneli naa lo to ganle, niicle stib guiedz stib guiedz tsie to, gardaque lozh tsieted to grë guiedz ne ndxie Israel zeene gal dze ne laa Mgui ne pxeel Dios guiaad stib.

<sup>24</sup> 'Golwi ganle zha ne nac mëedscuel, tsod zha ne ndziibraa non lo maistr, zha ne rquiagaa dziin, tsod zha ne nonraa lo zha ne rree zho.

<sup>25</sup> Tel zha gun miech maistr, scaque gun zho mëedscuel; tel pe cteed zho bizhuan dziin, mincoque cteed zho zha ne quia dziin. Gacxe waa peet tsienied guic to, tel pe nactaa ncuaane gnee miech to, sac gon niicxe naa name ne nac naa Dad, mendox rnee zho nac naa.

<sup>26</sup> 'Gdziebde to, zdziin dze ne glu ganle cho zienal mine nac diidzli, chogaa zienal guielntseeb, gal dze co grësew xoobnen.

<sup>27</sup> 'Grëse mine rne naa lo to zeene nese rziodiidza, golneew lo miech, haxta glaa guic yu golso, nguiedz golneew.

<sup>28</sup> Gdziebde to miech, golguien ganle no tib men nroobraa, lëë men co nac Dios. Tel miecha, loxaque cuerpse zrieelo zho csacsi zho, sangue Dios, zrieelo me gnitlo me miech dib xcuerp zho, dib xalm zho len gabil.

<sup>29</sup> 'Nligaa gdziebde to, csaand Dios lega pe gac to. Golwi ganle, zig nac grë mguin niicle ne rzac miech peet nond ma, haxta chop ma rdeed zho por tib gaay centav; per PxoZ to gon men ne zob gbaa rsaanladzd me ma, ni tib ma guete telne gdeete me diidz.

<sup>30</sup> Pelel to dzigo csaan me, haxta guits guic tow, grësew ngaba lo me.

<sup>31</sup> Gdziebde to sca, golguien ganle nonraa to lo tib dzoon mguin.



32 'Gneli naa lo to ganle, zha ne glu lo miech nacie zho naa, scaque naa zeen gal dze co zlu naa lo Pxoze naa men ne zob gbaa, nacie naa zho.

33 Saŋgue zha ne ctoladzie naa lo miech, scaque naa ziep naa lo me runbeyd naa zho.

34 'iGuiabde to togo laa naa zial loxaque par cuiŋ wense miech! Lēda gon, ye zial naa zialgunctil naa zho.

35 Sac zha ne sēeb xnēz naa, zlēenie xpēed zho zho, tel mēēdgaaw, zlēenie pxoze zho zho; scaque men wnaaw, zlēenie xinzhih zho zho, zha ne nac-gaa nguzhih, zlēenie xnīaa tseel zho zho.

36 iLēēque menlidz miech gac zha ne glēe gan zho!

37 'Zha ne mazdraa rquia zdooglēenie pxoze zho zho, glēenie xnīaa zho zho, glēeniegaa xpēed zho zho, porne gun zho mine rnabey naa, peet xtsiind zha co par ygab zho xnēz naa.

38 Scaque zha ne yquia zdoocueeladz zho zho guiaadnal zho zhits naa, grielod ygab zho lo naa.

39 Sac grēse zha ne rquia zdooguielmban ne rap zho lo guidzliu rii, ygaad zho guielmban ndzon ne gneedz Dios; saŋgue zha ne cueeladz xquielmban, niicle tel csacsi miech zho loxaque ne no zho xnēz naa, ib zgaa zho guielmban ndzon co.

40 'Niina gon ne squi tsie to, grēse zha ne zaacse ycaania to, zaacse gnee zho lo to, rriequia naa ga sca ycaania zho; ni zha ne sca ycaania naa, rriequia men ne pxeelle naa ga sca ycaania zho.

41 Zha ne cuēzlo tib men ne noteed xtiidz Dios lo miech, guielnzaac ne gdeed Dios lo men co, ye zho yga guielnzaac co. Zha ne cuēzlo tib miech ndzinli, guielnzaac ne gdeed Dios lo zha co, ye zho ygaaw.

42 Ni zha ne gneedz maase tib zhi-gaque nis yag lo cho tib zha win ne nac to ne nac to xpēedscuel naa, ib ted-sod zdeed Dios guielnzaac ne tsieguial zho.

## 11

### Zha ne pxeel Juan Bautist (Lc. 7:18-35)

1 Zeene blozh pso Jesús diidz lo gza tsiipchop zha co, dzigo laa zho zie. Blozh ga laa me brieque, güey me grē guiedz ne ndxie gax ga, güeyseed me grē miech co.

2-3 Len dze co no Juan Bautist ladzguiib, ga no Juan bin Juan zha nactaa grē milagr ne run Jesús, dzigo pxeel Juan bla xpēedscuel Juan güeynabdiidz zho lo me, dien pe lēele Men ne zēēble diidz cxeel Dios lo guidzliu ga nac me, te dzigora gdziŋ men co ye.

4 Dzigo rēbchaa me lo zho:

—Grē ncuaane bin to rne naa, grēgaa ncuaane gon to run naa, goltsie golzodiidza lo Juan.

5 Ran to ganle grē zha ne rold lo, grē zha ne gacd sē, grē zha ne rlan guiedz lepr, grē zha ne rcuaat, laa zho riac; haxta grē zha ne gutle, laa zho rrieeban. Xtiidz Diosa, laaw quia-gaaz lo grēse zha ne rquiina. Grēsew, golzodiidza.

6 Ni golguiab lo me, dichos zha ne racchopd guic, sinque tiblīque rac zho riladz zho cho nac naa.

7-8 Zeene laa xpēedscuel Juan zey, dzigo psilo me bzeet me Juan lo miech guizhiu ne ndxie lo me ga, rēb me:

—Zeene güey to dan ngan co, güey to lo Juan, ¿zha dien güeynie guic to nian to me? ¿Pe rēb to rlu me zig tib goobgui ne nēzrii nēzrec rey me, te rēb to ye masaque grē lar niazh ne racw zha non nacw me? Per nanle to ganle zha ne scataa racwxab riid zho dan.

9 Nligaa cho dien güeynie guic to nac me, ¿te rēb to ye tib men ne noteed xtiidz Diosa? Gacnan to ganle tib men ne noteed xtiidz Dios gon nac me, ni me nac tib zha ne mazdraa nroob lo grē zha ne ziyun dziin co.

10 Me ga raquiet lo Xtiidz Dios zatne znu rnee:

Sxel naa tib zha ne tednerga lo luu, zha co gzhixcuaa nēz ne ted luu.

11 Ne nligaa lo grēse mgui ne zieded lo guidzliu gard grieequia tib zha ne

mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

<sup>12</sup> 'Desde psilo Juan noseed me miech zhapaa racladz Dios gban zho, ni rchoobnis me zho, hor co psiloque brieequia zha ne rlëenie zhiwseed Dios, gacxe waa zha ne nlipaa rdziebd, zha cose rcaaniaw, rzëeb zho xnëz me.

<sup>13</sup> Mazd glo tibaque raquiet ne laa men ne cxeel Dios ga guiaad, zigtaa lo leya, zigtagaa grë zha ne biadteed xtiidz Diosa, bzeet zhow. Ni niina ne laa Juan biaad, laa men co blanso.

<sup>14</sup> Juan gon biaad niina zig no diidz guiaad Lí; golgacnan sca ganle cho nac me.

<sup>15</sup> Zha ne racladz guien zho zha nac grë mine none naa nu, jyquiaadiag zhow!

<sup>16-17</sup> 'Nac grë miech rii, rien zho pe racladz zho. ¿Cho ganle run zig run zho? Lëe zho run mine run mëedlas ne rio wguir ro nëz, niicle rool xcompañer win di nguieel rieed win, niicle roolga zho di ngan, roond win.

<sup>18</sup> Sac gon biaad Juan, ran zho rowd me tel pe ncuaane row zho, ried me ncuaane rie zho, dzigo laa zho rnee mendox nacie me.

<sup>19</sup> Blozh ga ziaad Mgui ne pxeel Dios, ran zho row me, rie me, laa zho rneeque, lega rowcho me, lega riecho me, ib rien me cho rtsieelsa me, haxta grë zha ngoopdol, haxta grë zha yozh ne rtop dimi ne razh lo zha Roma rzënie me. Sca rnee zho, sangue zha ne rgaa guielbiini ne rdeed Dios, rien zho cho nac zha ne ziaadgun xtsiin me.

### *Miech ne bzhiguiel ncaania xtiidz Jesús*

*(Lc. 10:13-15, 21-22)*

<sup>20</sup> Blozhse ga, dzigo psilo Jesús bzeet me mine yгаа grë zha ne pcaaniad xtiidz me; sac nzian guiedz ne güey me niicle gon zho grëtaa milagr ne been me, per ib psaand zho xquielntseeb zho, rëb me:

<sup>21</sup> —jProbsaxe grë men guiedz Corazín, grë men guiedz Betsaid! Sac gon gonpaa zho grë poder ne rap

Dios, per ib psaand zho xquielntseeb zho. Tel niaca mine nian grë men guiedz Tiro, grë men guiedz Sidón, grë milagr ne gon zho ben naa, ib ndedsod mban niac grë zha co nio zho guielnë, zëeb nsaan zho xquielntseeb zho, mbig zho lo Dios.

<sup>22</sup> Gacnan zha Corazín, gacnan zha Betsaid sca ganle, gal dze ne gon Dios guielwxtis, lëetaa caxtigw ne yгаа zha Tiro ni zha Sidón, mazdraa mine yгаа zho.

<sup>23</sup> Scaque zha Capernaum, masaque rzac zho niina zha nziurua lo Dios, per gacnan zho ganle haxta quiet lo ncowdoo ne guey mendox ga guey zho; sac gon tel niaca mine nian zha Sodom grë milagr ne ran zho noyun naa, ible nsaan zha co xquielntseeb zho, nitlod zho.

<sup>24</sup> jGacnan zha Capernaum ganle gal dze ne gon Dios guielwxtis, lëetaa caxtigw ne yгаа zha Sodom, mazdraa mine yгаа zho!

<sup>25</sup> Dzigo bzodiidznie Jesús Dios, rëb me:

—Dios luu ne nac luu Pxo z naa, luu rnabey gbaa luu rnabey guidzliu, rnedz naa xquizh lo luu sac grë mine noyun luu nu niina bdeete luu diidz niacnan grë zha raca, sinque laaw blu luu lo grë zha ne nac zig grë mëedlas.

<sup>26</sup> Sca quiayun luu, sac ib scale racladz luu gaca.

<sup>27</sup> Blozh ga rëb me lo grë miech ne ndxie ga:

—Grëse ncuaane ran to quiayun naa, Dios men ne nac Pxo z naa, me bneedz poder rii lo naa; sac ib laa me bzo naa, naa gūa. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gacladz naa gunbey me, zunbey zho me.

<sup>28</sup> 'Grëse to ne nac to zha ne në noded, rdib rdzag to quiaguib to dien zha guiaanwen zdoo to, goltë lo naa, naa gneedz tib wdziiladz ndzon lo to.

<sup>29</sup> Nligaa golbig lo naa, goltënal zhiwseed naa, golgac tib miech tibliladz,



tib miech ndooladz zigne nac naa; zeena gap to descans co.

<sup>30</sup> Nacda ncuaane ngan, nacda ncuaane guiab to glëbde to gun tow.

## 12

*Dze ne rdziiladz zha Israel lo dziin  
(Mr. 2:23-28; Lc. 6:1-5)*

<sup>1</sup> Len dze coquew, tib dze lëetaque dze ne rdziiladz zha Israel lo dziina, bded Jesús zaatne zëeb zhobxtil grë xpëedscuel me. Ga zie zho rcaabedz zho, dzigo psilo zho ptop zho mzion co dow zho zhobxtil co.

<sup>2</sup> Gon bla zha farisew, dzigo rëb zho:

—jLëda i gon noyun to, noguiits to ley i! Golguien ganle dze nda nac dze rii.

<sup>3</sup> Pquiabchaa me rëb me lo zho:

—jPe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

<sup>4</sup> Rneew, bzëeb me len yadoo güey nab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co, jpe led bdiitsd me ley ga?

<sup>5</sup> Lo xley Moisés name zhobnee ganle zha haxta dze ne rdziiladz to lo dziin run grë pxoz dziin len yadoo, ni rneeda dol ga sca run zho.

<sup>6</sup> Golwi ganle zha rats ley par gac dziin len yadoo, ni yadoose ga, gacnan to ganle lo to nu zo men ne mazdraa non lo yadoo.

<sup>7</sup> Rnee Dios lo Xtiidz me, quiambëzd me dien peraa gun miech, dien peraa cogan zho lo me, sinque mine racladz me guien zho yquia zdoo zho samiech zho. Tel niaca mine nli rien to min co, zien to gdziibdolde to zha ne rapd dol.

<sup>8</sup> Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia  
(Mr. 3:1-6; Lc. 6:6-11)*

<sup>9</sup> Bded ga, gol stib dze ne rdziiladz zho lo dziina, güey Jesús len yadoo win ne zob lad guiedz co.

<sup>10</sup> Lad grë miech ne ndxie len yadoo co, no tib mgui ne mband tib nia; porque laa zha farisé bnabdiidzlaque lo me dien pe nonguiela gunguiac me miech dze ne rdziiladz zho lo dziin. Sca bnabdiidz zho, sac quiaguib zho dien pe yquiaaqui zho me tsiezo zho me lo wxtis.

<sup>11</sup> Dzigo pquiab me rëb me lo zho:

—Togase dien, zha run to zeene lëetse dze rii rietsobe tib xpëcwxiil to tib len blë nroob, jled zëeb lëe rie to riebee to ma?

<sup>12</sup> Tel sca rquia zdoo to mëcwxiil, jgolguien ganle mazdraa gon non miech lo tib mëcwxiil! Gacxe waa ible nonguiela gun ne xyudar samiech ne, niicle maase dze nda nac dze co.

<sup>13</sup> Dzigo rëbchaa me lo mgui ne në nia ga:

—jBzigaa nia luu!

Zigne bzigaa mgui nia mgui, biacgazha, biana zig nac stib mine ndaantaque ga.

<sup>14</sup> Grë zha farisé co, zigne brie zho ga laa zho psilo bnediudz dien zha gdeeda diidz gut zho Jesús.

<sup>15</sup> Bien Jesús sca no guic zho, dzigo mazd brie me ga. Miech guizhiu ne zienal zhits me, grëse men rzacne ne zienal ga, beenguiac me zho;

<sup>16</sup> per pso me diidz lo zho, choot lo gzodiidz zhow.

<sup>17</sup> Ga briequia mine pquiaa Isá, tib men ne biadteed xtiidz Dios padzeela, zeene rëb me:

<sup>18</sup> Lëe men rii bzooblo naa gun xtsin naa,

rleynie naa me, rzac zdoo naa grë ncuaane run me.

Zded naa zhiEspíritu naa gacnie me, me nac men ne cxobnen xtidz naa lo grëse miech.

<sup>19</sup> Tilnied me miech, sedzd yan me lo zho,

sod me ro nëz goptsie me.

<sup>20</sup> Grë zha ne gzhe gzhele rac, zig tib goobgui ne quiaxweele, zig tib lë guier ne noyiidiele,

csand me zdoo zho;

zha ne mban rac lo xliaadz zho, csaand me zho.

Min co tsoxco me, haxta gan me grëse miech gacnan mine nac diidzli, ni tsienal zhow.

<sup>21</sup> Haxta zeene gan me ye grë zha ne nacdraa zha Israel, laa zho gnalo me.

*Rëb zho mendox nacie Jesús*

(Mr. 3:20-30; Lc. 6:43-45; 11:14-23; 12:10)

<sup>22</sup> Dzigo güeynie zho tib mgui lo Jesús rold lo mgui ni gacdaque gnee mgui, sac nosacsi mendox mgui. Znuse beenguiac me mgui, gagazh psilo gon mgui, psilo bnee mgui.

<sup>23</sup> Grë miech ne ndxie lo me ga, per nli bzee zdoo zho, rnee zho:

—¡Bay pe lëe men qui naye nac Men ne zëeble diidz ga cxeel Dios!

<sup>24</sup> Zeene gon zha farisé sca rnee grë miech co, rzachaa zdoo zho rnee zho: “Pe Dios nazho cxeel me, ma ne rnabey lo mendox ma co nacie me, gane rrieelo runcxoon me mendox.”

<sup>25</sup> Bien Jesús sca rza guic zho, dzigo rëbchaa me lo zho:

—¡Ncuane gacd gon rnee to! Tel tib wxtis nadien lëëque zha ne nacie zho csilo tilnie zho, ¿niacxe zac gnabey zho? Tib guiedza, tel lëëque zha guiedz co tilnie menladz zho, led znuse lozh guiedz co; tib diigaa miecha, tel lëëque zha tilnie menlidz zho, ¿niacxe nitlod dii co?

<sup>26</sup> Scaque mendox nagon, telne lëëque lëë ma guncxoon samendox ma, ipe nale na bnitlo ma!

<sup>27</sup> Nana ne squi rnee to Beelzebú nacie naa gane rrieelo runcxoon naa mendox, ¿zha ne nacgrë to dzigo, cho nacie zho ne ye zho runcxoon ma? Gase naganle rlu dolldox i quiayun to, squi rnee to.

<sup>28</sup> Sangue tel naa zhiEspíritu Dios nacie naa gane runcxoon naa mendox, ni ga rlu ganle laa Dios psilo quianabeyle nu.

<sup>29</sup> ¡Masaque nac mendox zig tib zha ne no xfuers, zha ne gacladz cuee grë ncuane no lidz zha co, none cxidoogazh zho zho!

<sup>30</sup> Tel mendoxa rlëënie ma naa, ni nanle to ganle zha ne rlëë lo ne, gacnied zho ne.

<sup>31-32</sup> ‘Gacnan to ganle, grëse dol ne run miech, grë tel zha rguie zho, rdzibdee zho, niicle tel haxta gneenë zho naa, bii zun Dios zho perdon min co; sangue zha ne gneenë zhiEspíritu me, ib gundraa me zho perdon.

<sup>33</sup> ‘Nanle to ganle zig nac yag nex, mine nac yag, min co nac nex ne rdeeda. Tel yag wena nex wen rquia low, togo yag ncuangaaw, nex ncuanaaque rquia low.

<sup>34</sup> ¡Scaque to nagon zhin mendox! ¿Zha nan to nadien gac to miech wen, tel desde zdoo to ntseeb? Miech ntseeb to gane squi rzë xtiidz to, sac gon, ¡grëse diidz ne rrieë ro miech, zdoo zho rzaw!

<sup>35</sup> Gacxe waa, zha ne mbe zdoo, niapse diidz wen, diidz ndooladz nac xtiidz zho. Sangue zha ne ntseeb zdoo, niapse diidz ntseeb, niapse didznë rrieëche ro zho.

<sup>36</sup> Ni gal dze ne gon gun Dios guielwxtis, ib tedsod zunquish me miech tib tib diidz ntseeb, tib tib didznë ne sca rrieë ro zho.

<sup>37</sup> Sac gon zigne rzë xtiidz zho nina, min co cueequia zho gal dze co, o mincogaa cteedquie zho.

*Racladz zha farisé gan zho milagr*  
(Mr. 3:31-35; 8:12; Lc. 8:19-21; 11:24-26, 29-32)

<sup>38</sup> Tib dze wbig zla zha farisé lo Jesús gza zho zla maistr ley, rëb zho lo me:

—Maestro, racladz no dzian no gun luu tib milagr, milagr ne glu nli Dios pxeel luu.

<sup>39</sup> Pquiab me rëb me lo zho:

—Nazdpaa ntseeb to, squitaa gocndip zdoo to nëz lo Dios, ¿zha nacraa milagr ne racladz to gan to?

<sup>40</sup> Stibaque milagr gon gan to, lëë min co gac zeen gal dze ne laa Mgui ne pxeel Dios, tso len liu tson dze, tson guieel zigne bio Jonás len melnroob co tson dze ni tson guieel.

<sup>41</sup> Ni gal dze ne gon gun Dios xquielwxtis me, ib steedquie zha Nive miech ntseeb ne nac to i; sac

gon zeene güeynee Jonás lo zho, grëse zho psaan xquielntseeb zho wbig zho nöz lo Dios, laa to nède to gon to diidz niicle ne lo to nu zo tib men ne mazdraa non lo Jonás.

<sup>42</sup> Scaque rein ne bzob nöz Sabá, steedquie me to gal dze co, sac tel rein co gołwi ganle pa lo guidzliu ne briece me biaadgan me rey Salomón, biadquiaadiag me grë xtiidz Salomón. Ni to lo to nu zo men ne mazdraa non lo Salomón, ni ib ronde to xtiidz me.

<sup>43</sup> Telne csaande to xquielntseeb to i gon, low lozh to. Sac to zig bzhaac tib zha ne psacsi men dox. Zeene briece ma zdoo zho, güey ma güeyquianzë ma grë dan zit güeyguib ma dien pa cuöz ma. Gonse ma rdzielz zaatne cuöz ma,

<sup>44</sup> rëb ma: “Mazd laa naa gbireque guia naa zaatne brie naa ga.” Zeene biire ma bdziñ ma zdoo zha co, gon ma nroob lugar no, pale tib yu dets,

<sup>45</sup> nacne güeyaque ma güeyxi ma zgadz samendox ma, ma ne mazdraa ntseeb blëznie ma zdoo zha co. ;Dzigole mazdraa mban biaan zha co, lëdlegaa zigne goc zho glo! Scadaa nagon gdzieelo to.

<sup>46</sup> Laa me bii noneeque, zeene laa xniaa me ni zha bets me bdziñ, racladz zho gzodiidznie zho me. Per brieelod nzëeb zho haxta len yu, sac scataa miech guizhiu ne ndxie lo me ga.

<sup>47</sup> Dzigo rëb tib zho lo me:

—Laa xniaa luu gon ni zha bets luu quiambëz luu nöz ley, racladz zho gzodiidznie zho luu.

<sup>48</sup> Pquiab me rëb me:

—;Xnia naa ye, bets naa ye?

<sup>49</sup> Blis nia me, blu me grë xpëedscuel me, dzigo rëbcha me:

—Zha ne gon nac zig zha rii, lëe xnia naa ga, lëe bets naa ga.

<sup>50</sup> ;Sac grëse zha ne run mine rnabey Pxoz naa men ne zob gbaa, grëse zha co nac bets naa, nac bzian naa, nac xnia naa!

### 13

*Nac Xtiidz Dios zig zhobxtil  
(Mr. 4:1-20; Lc. 8:4-15)*

<sup>1</sup> Blozh ga briece Jesús güey me ro nisdo. Ga zob me,

<sup>2</sup> zeene gon me nzian miech ne nocaalsa lo me ga, nacne biepe me güeysob me tib len barcw zo gax ro nis co, psilo me pseed me zho.

<sup>3-4</sup> Ndal grë ncuaane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

—Tib zha name güey gon zhobxtil. Zeene laa zho quialaal zhob co, now bliaal gax ro nöz, now bliaal lad quie, now bliaal len yag guiets. Mine bliaal gax ro nöz ga, güey grë mguin znuse dow maw.

<sup>5</sup> Mine bliaal zaatne nac lad quie, znuse znuse blana,

<sup>6</sup> per zeene laa lo ngbidz briece, znusaque bgoolá, bidzgaw; sac guien nroob low.

<sup>7</sup> Mine bliaal zaatne nac len yag guiets co, zeene laa yag guiets pxii, bnitlogaw.

<sup>8</sup> Sangue mine bliaal zaatne nac lo liu naal, blana, brooba ni goca; lo tib tib zhob co no zhimziona briece galptsii zhob, now briece tsongala, no-gaaw briece haxta tib gayoow.

<sup>9</sup> Blozh ga, rëbcha me:

—Zha ne racladz guien mine rne naa nu, yquiaadiag zhow.

<sup>10</sup> Zeene laa grë miech co zey, dzigo wbig xpëedscuel me bnabdiidz zho lo me dien pe nac ne sca niapse con cuent rseed me grë miech.

<sup>11</sup> Pquiab me rëb me:

—Tel to, Dioszhal rlu lo to zha rnabey me, niicle ncuaane mazdraa ngeetsa; laa grëraa miech ne gard gbig lo me, grieelod guien zhow.

<sup>12</sup> Sac zha ne noxcole dien zha rnabey me, zdeedraa me guiełbiini lo zho guien zhow, laa zha ne noxcoda, mine riense zho, stiche mew.

<sup>13</sup> Sca rseed naa zho parne tsoguic zho zha rnabey Dios, per nac zho niicle nzhial lo zho rwi zho, per peet rand zho; niicle nzhial diag zho per peet rond zho; ib peet riend zho.

<sup>14</sup> Lëe mine nac zho i bzeet Isá, zeene znu rëb me:

Nac miech qui, niicle peraa ron zho,  
per peet riend zho;

niicle rwiraa zho, per peet rand zho.

<sup>15</sup> Ne nlipaa miech nad, miech ndip  
zdoonac zho,  
rrieequia ntse zho diag zho, ntse zho  
lo zho;

parne peet gond zho, peet gand zho.  
Ib riend zho zha gbig zho lo naa, ygab  
zho xnöz naa, parne csilaa naa  
zho.

<sup>16</sup> 'Sangué to —rëb Jesús lo zho—,  
¡Dichos to porne rien to pe ran to, ni  
riengaa to mine ron to!

<sup>17</sup> Blactaa zha ne biadteed xtiidz  
Dios padzeela, blactaa zha ne güeynal  
mine nac diidzli, bzoobladz zho nian  
zho grë ncuaane ran to niina, per  
bgaad zho nian zhow; bzoobladz  
zho nquiaadiag zho grë ncuaane no-  
quiaadiag to, per bgaad zho nion  
zhow.

<sup>18</sup> 'Golquiaadiag sca ganle zha nac  
xcuent zha ne güey gon ga.

<sup>19</sup> Ro nöz ne sca bliaal zhob co, sca  
nac palal miech ne riepaa zha ne rie-  
nee Xtiidz Dios lo zho, per rioguicd  
zhow, rlozh ga rdzinaque mendox, ri-  
etiche ma tel palalse mine rien zho.

<sup>20</sup> Lad quie ne bliaal spalal zhob co,  
sca nac grë zha ne rley rcaania Xtiidz  
Dios;

<sup>21</sup> per led dib zdood zho rcaania  
zhow, gane zeene laa miech rsilo rlëe  
lo zho, laa miech rtsidil zho porne  
rliladz zhow, rsaanga zhow.

<sup>22</sup> Nogaa zho nac zig nac len yag  
guiets co. Rquiaadiag zho Xtiidz Dios,  
per rsilo zho lel grë ncuaane no lo  
guidzliu rii mazdraa rionie guic zho,  
rquidie grë dimi zho. Grë ncuaan  
co rioxcoraa zho, laa ne tsonie Xtiidz  
Dios guic zho, min co rquiaqui ib  
rund zho mine rnabey me.

<sup>23</sup> Laa liu naal ne bliaal mine scataa  
goc ga, sca nac grë zha ne dib zdoon  
rquiaadiag Xtiidz Dios, rien zho zha  
naca, ni rban zhow zigne rnabeya.  
Rrieequia grë ncuaane run zho, no  
zho nac zig mzion ne brieegalptsii  
zhob ga, no zho nac zig mine brieeg  
tsongala, nogaa zho nac zig mine  
brieeg tib gayoow ga.

*Zha nac xquielrnabey Dios*  
(Mr. 4:30-34; Lc. 13:18-21)

<sup>24</sup> Biire pcaalsa miech lo me stib,  
dzigo psiloque me pseed me zho con  
stib cuent, rëb me:

—Ziaad gac xquielrnabey Dios lo  
guidzliu rii zig bzhaac tib men ne gon  
zhobxtil. Niapse zhob wen, zhob nal  
gon me,

<sup>25</sup> per no tib zha ne rlëe lo me,  
gol tib pcow liu, horne grëse miech  
nixguies, güey zho güeylaal zho xmidz  
guizh ncuaan zaatne gon me.

<sup>26</sup> 'Zeene laa zhobxtil co psilo  
blan mzion, hor coraa blu laa guizh  
ncuaan co no lada.

<sup>27</sup> Grë zha ne quia xtsiin me, zeene  
gon zhow güey zho rëb zho lo me:  
“Tebaa gan luu ganle, dipse lad xoob  
luu zëeb guizh ncuaan, ¿dieen pa  
brieew gocbniw ga?”

<sup>28</sup> Dzigo rëb me: “Rien naa no cho  
tib zha ne rlëe lo naa, zha co been  
dziin co.”

'Gocladz zho, hor cogazh nielaadz  
zhow per bzhiguiel me,

<sup>29</sup> rëb me lo zho: “Tsielaadzde tow,  
sac tel glaadz tow niina ye zhobxtil  
gliaadzniew.

<sup>30</sup> Golsaan sca zëeba ga, na zeene  
laa wlaap gac, hor co gnabey naa zha  
ne quiits zhob, ctopgazh zhow gdziin  
zhow tib lad tseca; lozhraa ga quiits  
zho zhob, tsasa ga, glansow ro yu.”

<sup>31</sup> Blozh ga bzeet me midz moxtaz,  
rëb me:

—Nac xquielrnabey Dios zig nac tib  
midz moxtaz ne ran miech dan rii.  
Nan to ganle midz moxtaz nac midz  
ne mazdraa win,

<sup>32</sup> ni tel gacbniw, rrooba ni lëew  
rroobraa lo grë guizh ne ran zho ro  
yu, raca lal tib yag nex, haxta rdzin  
grë mguin rzhixcuaa ma zhiptsieez  
ma lo grë zhicwa.

<sup>33</sup> Rëbaque me:

—Nac xquielrnabey Dios zig nac  
ncobi ne rquiaa men wnaa lad ncob  
ne riaa guietxtil. Niipaque ncobi ri-  
ots tson lmud rin, ni dib nacse ncob  
co rzibe.



<sup>34</sup> Grëse miñe pseed Jesús grë miech co, niapse con cuent bnee mew lo zho.

<sup>35</sup> Ga brieequia miñe bzeet zha ne biadteed xtiidz Dios padzeela, zeene rëb zho: “Niapse con cuent cseed naa miech, sca gnee naa lo zho grëtaa ncuaane gard gacnañ miech wlal ne bre guidzliu.”

*Zha nac xcuent guizh ncuaan co*

<sup>36</sup> Blozhse bnee Jesús lo grë miech co guey zho, yeque me laa me zey gza xpëedscuel me. Bdziñ zho ro yu, ga bñab zho lo me siguiel me gnee me lo zho dieñ zha nac xcuent guizh ncuaan ne bzeet me ga.

<sup>37</sup> Dzigo rëbchaa me lo zho:

—Golgona sca, znu gon nac cuent co. Rrieequia gon naa ga nac men ne gon zhob co.

<sup>38</sup> Liu ne bñiaaw ga, nac lo guidzliu, zhobxtil co nac grë miech ne nole xnëz Dios, laa guizh ncuaan co nac grë zha ne no ladznia mendox.

<sup>39</sup> Zha ne güeygan guizh ncuaan co, lëe mendox ga. Dze lo wlaap co, gac dze ne gon Dios xquielwxtis me, zha ne tsie wlaap ga, lëe anj ga.

<sup>40</sup> Ni zigne sca cuee zho guizh ncuaan co lad zhobxtil, gzëeg zhow, scapaa nagon gal dze ne gac xquielwxtis Dios,

<sup>41</sup> sxel naa grë xanj naa tsie zho tsiebee zho grë zha ntseeb, zha ne sca runctal xtol grëraa miech, lad zha ne no xnëz naa.

<sup>42</sup> ¡Grëse zha ntseeb co, hor co laa zho guey lo guidox ne rieguial zho! Ga tso zho goonnë zho, haxta gow lay zho lo guielnëdcox co.

<sup>43</sup> Laa grë zha ne güeynal miñe nac diidzli, zha co gdziñ zaatne rnabey Pxoza naa, masaque zig xbiini ngbidz glu zho ga. ¡Zha ne racladz guienay quiaadiag zhow!

<sup>44</sup> 'Ziaad gac xquielrnabey Dios zig tib ncuaan non ne noliu tib lo xcuaa miech. Zha ne gdziel tib ncuaane sca non, ib tedsod zie zho sto zho grëse ncuaane rap zho grieedimi si zho liu co, parne gunchen zho ncuaan non co.

<sup>45</sup> 'Zha ne rzëeb lo xquielrnabey Dios ziaad gac zho zig tib zha ne rzi quie perl miñe mazdraa niazh.

<sup>46</sup> Zeene ron zho pa no tib perl co, rto zho grëse ncuaane rap zho, rie zho rzi zhow.

<sup>47</sup> 'Nacaque xquielrnabey Dios, zig tib guix nroob ne rgaa mel niina, zeene rsëeb ngooz mela lo nis grë lose mel rtopa.

<sup>48</sup> Rlozhse riodzëw, dzigo rbeequia zhow ro nis, garaa rzob zho rbe zho grë mel co; ma ne rquiin laa tib chicuid zole rio ma, laa ma ne rquiind rsëeb zho.

<sup>49</sup> Scapaa nagon gac miech gal dze ne gon Dios xquielwxtis me, ziaad grë xanj me cuee zho grë zha ntseeb lo zha ne no xnëz me,

<sup>50</sup> tsieron zho zho lo guidox ne rieguial zho. Ga tso zho goonnë zho, haxta gow lay zho lo guielnëdcox co.

<sup>51</sup> Blozhse ga, rëb me lo zho:

—¿Pe bien to na zha nac grë miñe blozh bne naa lo to nu?

Grëse zho pquiab rëb zho:

—Bien now.

<sup>52</sup> Dzigo rëbchaa me:

—Tib zha ne rienle zha nac grë ley ne psan Moisés, ni squi guien zho zha nac zhiwseed Dios miñe zialnie naa niina, masaque nac zho zig tib zha gol ne quianie chop lo ncuaan non lidz zho, quianie zho grë min gol-le ni quianiequegaa zho min cub.

*Güey Jesús ladz me*

(Mr. 6:1-6; Lc. 4:16-30)

<sup>53</sup> Blozhse sca bzodiidz me grë cuent co lo zho, laa me brieega zie me nëz ladz me.

<sup>54</sup> Bdziñ me ga güey me yadoo, psilo me pseed me grë miech co. Per nli rzee zdoo zho ron zho grë miñe rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me?

<sup>55</sup> Tib zhinse ngurëeyag name nac me. Led lëe xingan Marí i, bets me name nac Jacob, nac José, nac Simón ni Judas;

<sup>56</sup> grë bzian mew, nu no zho grë zho. ¿Pa dzigo güey me wseed qui?

<sup>57</sup> Ib beencasd zho me, haxta rlëë zho lo me. Zeene gon me sca rac zho, rëbchaa me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho ni menlidz zho ni menladz zho nëd gunbey zho.

<sup>58</sup> Beend me nzian milagr ga, sac sca ndip zdoo grë miech co ib nëd zho nliladz zho cho nac me.

## 14

### *Gut Juan Bautist*

(Mr. 6:14-29; Lc. 9:7-9)

<sup>1</sup> Len dze co bin rey Herod (men ne rnabey Galilé) grë ncuaane run Jesús, sac tel pa lotaaw zëëb xtiidz me;

<sup>2</sup> dzigo rëb Herod lo grë zha ne run dziin lo me:

—Rien naa lëë Juan Bautist ga quiayun grë min co, segur brieëban me.

<sup>3</sup> Sca rnee Herod sac nanwen me zha been me Juan. Me bnabey bgaa Juan bzoob zho Juan caden bio Juan ladzguiib,

<sup>4</sup> loxaque ne rnee Juan lo me nonguielda ga lëëque Herodí ptsieel-nia me, sac tsieelpaa bets me Lip nac Herodí.

<sup>5</sup> Gocladz Herod niut me Juan, per bdzieb me menguiedz, sac rleynie zho Juan, rien zho xtiidz Dios ziadteed Juan lo miech.

<sup>6</sup> Laa tibtaa dzew, lëëtaque noyac zhilni Herod dze ne bloozh me stib iz, bded tib xindzoo Herodí squi ndxie grë zha ne zobnie me psilo ndzoo biee ndzoo. Bdziladz me gon me zha biee ndzoo,

<sup>7</sup> haxta brieë ro me rëb me: “Ncuaane gacladztaa luu gnab luu, znedz naaw.”

<sup>8</sup> Per glole pquuil Herodí ndzoo, nagne rëb ndzoo lo me: “Min racladz naa, xoob guic Juan tib len bandej gneedz luuw lo naa niinagazh.”

<sup>9-10</sup> Zeene bin Herod sca rëb ndzoo, mbanse rac me; per rdeetraaw diidz niab me grieeloda, sac grëse

zha ne zobnie me ga, bin zho rëb me zdeed me ncuaane gnabtaa ndzoo. Dzigo racse me pxeel me zha ne güeychug guic Juan len ladzguiib.

<sup>11</sup> Zeene wbire zho, zhoobse guic Juan tib len bandej bdeed zhow lo ndzoo, dzigo güey ndzoo güeydeed ndzoo pa lo xniaa ndzoo.

<sup>12</sup> Zeene gocnan xpëëdscuel Juana, güey zho güeylis zho me ga güeyqueets zho me. Blozh ga güeyzodiidz zho lo Jesús zha bzhaac me.

### *Bguiaan Jesús gaay mil miech*

(Mr. 6:30-44; Lc. 9:10-17; Jn. 6:1-14)

<sup>13</sup> Zeene bin Jesús sca bzhaac Juan, dzigo brieë me ga bzëëb me barcw zie me tib zaatne guien miech. Per znuse bien diidza, nzian grë guiedz co zha ne gocnana, tib ro nis güey zho, glole zho bdzin zaatne no gdzin me ga.

<sup>14</sup> Laa me noyet len barcw, zeene blis lo me gon me laa grë miech guizhiu co ndxie ga; pquia zdoo me zho, beenguiac me grë mguidz ne zienie zho.

<sup>15</sup> Laa dze ziedzelew, wbig xpëëdscuel me rëb zho lo me:

—Mazd gudz lo grë miech qui guey zho na, zeena guiob tsie zho grë guiedz win ne ndxie gax i tsiesi zho ncuaane gow zho; sac gon laa dze bdzele.

<sup>16</sup> Pquiab me rëb me lo zho:

—¿Pe nagne guey zho squise? To none gdeed ncuaane gow zho.

<sup>17</sup> Rëbchaa zho:

—¿Per pe dien yguiaan no zho? Pe rnase gaay quietxtil ni chop mel ne ziaadnie no nu, lo grëtaa miech qui.

<sup>18</sup> Dzigo bnabey me zho güeynie zho quietxtil co, güeynie zho mel co lo me,

<sup>19</sup> ni bnabey me grë miech co bzob zho lo grë guizh nguia ne zëëb ga. Horco bzhen me gza quietxtil co ni grop mel co, blis lo me nëz gbaa, bdeed me xquizh lo Dios. Blozhse bdeed me xquizh, beengrol me gza quietxtil co, mel co ne, zigse rdeed mew lo xpëëdscuel me scase scase bdiiz zhow lo grë miech co.



20-21 Grëse zho dow zho haxta zaatne bieltaa zdoo zho. Miech tafa, zha bguise rga zīg gaay mil, nandragaa grē meṅ wnaa, grē mēēdla; ni zeene blozh dow zho, scase ncuaane nroob biaan, biodzē tsiipchop chicuid bio grē guietxtil co, bio grē mel co.

*Rzē Jesús lo nisdo*  
(Mr. 6:45-56; Jn. 6:16-21)

22 Zeene blozh ga, bnabey Jesús xpēēdscuel me bzēēb zho len barcw, zeena zienerga zho tedquia zho stib nēz ro nis co; laa me bii blēz ga, nozonēz me grē miech co.

23 Blozhse bzonēz me zho, dzigo güey me tib guic gui zob gax ga, güeyzodiidznie me Dios, tipse me zo ga laa liu pcow.

24 Horco laa barcw ne zie xpēēdscuel me ga no lo nis co, ib gacd csēēniob zhow, sac rree me rtsire mew, nēzrii nēzrec raca lo nis.

25 Merle guini liuw, tibaque zeene laa me bdziṅ zaatne zie zho ga, tib lo nis co ziezē me.

26 Zeene goṅ zho laa meṅ co sca ziaad-zē lo nis co, bdzieb zho, bropt-sie zho rnee zho:

—i Tib ndziin i goṅ ziaad i!

27 Dzigo bnee me lo zho rēb me:

—i Gdziebde to, naa zial nu!

28-29 Pquiab Pedr rēb Pedr:

—Telne luu i ziaad i, bneedz diidz sē naa lo nis glanso naa lo luu i.

—i Dē sca! —rēb me.

Lēēlēd biet Pedr len barcw, laa Pedr ziezēle lo nis co

30 zeene goṅ Pedr scataa rlis me low, bdzieb Pedr. Tibaque zeene bien Pedr laa Pedr nodedquiele low, horco broptsiedan Pedr, rbedz Pedr me, tsiebee me Pedr ga.

31 Dzigo wbig me bzhen me nia Pedr, bzoli me Pedr lo nis co.

—i Aque luu goṅ Pedr! —rēb me—. i Pe nacne gocchop guic luu? i Gard goṅ gliladz wen luu cho nac naa?

32 Zeene laa me biepnie Pedr len barcw, laa me co blēz.

33 Grēraa zha ne no len barcw ga, rleynie zho me, rzee zdoo zho rnee zho:

—i Nasi nagon ndion no nli Xpēēd Dios nac luu!

34 Zeene bdziṅ zho stib nēz ro nis co, zaatne rnee zho Genesaret, ga biet zho barcw.

35 Grē miech co zeene gocnaṅ zho laa me bdziṅ ga, znuse znuse pxoon zho diidz grēraa guiedz ne ndxie gax ga. Dzigo brieē grē miech co, güeynie zho grē meṅ rzacnē lo me,

36 rnab zho lo me siguiel me maase ni xabse me xen grē meṅ rzacnē co. Grēse zha ne bzhen ni xab me, biac zho.

## 15

*Ncuaane runctal xtol miech*  
(Mr. 7:1-23)

1 Tib dze, bdziṅ bla zha farisé ni zla maistr ley ne ziaad nēz Jerusalén, lo Jesús; rēb zho lo me:

2 —i Pe nacne dien zienald xpēēdscuel luu miṅe blu xmengol ne, pe nacne zeene laa zho row, ib rguibd zho nia zho zigne nopaa tsara?

3 Pquiab me rēb me lo zho:

—i To waa, pe nacne quiaguiits to xley Dios? Golguien ganle laa ne goṅ to miṅe rnabey Dios zigne naca, lel ncuaane blu xmengol to, miṅ co zienal to.

4 Led znu goṅ rnee lo xley Dios: “Goṅ pxoz luu, goṅ xniaa luu”, ni rneew: “Zha ne quie pxoz, quiegaa zho xniaa zho, ib none guet zho.”

5 Laa to goṅ rnee to: “Peet nacda gund zho xyudar xmengol zho niicle no me liaadz, totsaque gdeed zho gon.”

6 Tib lad rsan to xley Dios, miṅe blu xmengol to miṅ co noxcoraa to.

7 i Loxaque guielwquidie qui no to! Rquiaalo to miech wen nac to, per lēēpaa miṅe run to i ga bzeet Isá zeene rēb me:

8 Grē miech rii, rquiaalose zho runnon zho naa, rond zho diidz goṅ zho miṅe rnabey naa.

9 Zhlēse nac grē ncuaane run zho, rnee zho laa zho riaadgaṅ naa;

sac niapse guicle zho riab grë wseed  
ne quialu zho lo miech.

10 Dzigo bnee me lo grë miech ne  
ndxie lo me ga, rëb me:

—Golquiaadiag minë gni naa lo to  
nu, ni goltsoxco guien to zha naca.

11 Golgacnañ ganle, grë ncuaane  
rdziñ zdoos miech, led mincod runctal  
xtol zho; sinque grë ncuaan ntseeb  
ne rza guic zho, diidz ntseeb ne rrie  
ro zho, min co runctal xtol zho.

12 Horco wbig xpëedscuel me, rëb  
zho:

—¿Pe bien luu ganle blëe zha farisé  
gon zho sca rëb luu lo zho?

13 Pquiab me rëb me:

—Grëse yag ne squi beenbnid Pxo  
naa men ne zob gbaa, ib none laaw  
gliaadz zolo zolow.

14 Golsaan zho, nli zha noseed  
miech per nac zho zig nac zha ne rold  
lo. Ni nanle to ganle, tel tib zha ne sca  
roldle lo ni xenaque zho nia stib zha ne  
rand, zaatne nac tib len blë, ib tedsod  
grop xcuaa zho tsietsoe ga.

15 Bdedse ga, wbig Pedr lo me rëb  
Pedr:

—Bzhiguiel bnë lo no dien zha nac  
diidz ne në luu ga, ne rnee luu led  
ncuaane rowd miech runctal xtol zho.

16 Pquiab me rëb me:

—¿Pe niicle to riendaquew dzigo lëe?

17 ¿Pe riende to grë ncuaane row  
miech, led mincod runctal xtol zho?  
Sac grë ncuaane row zho rdzinda len  
zdoomban zho, zhaa zaatne rdzina;  
tib rietedsew xcuerp zho, rlozh ga  
rriegaw.

18 Sangue grë diidznë ne rrie  
ro zho, zdoomban zho ga rzaw, ni lëe  
min co nac minë runctal xtol zho.

19 Zdoomban zho nac zaatne rza  
grë ncuaan ntseeb ne run zho, zig  
nac:

zeene rio zho grë zhgab yozh,  
zeene rut zho samiech zho,  
zeene rionie zho zha ne nole tsieel,  
zeene rionie zho zha ne nacd tsieel  
zho,

zeene run zho guielggaan,  
zeene lega rnexuu zho samiech zho,  
zeene rneenë zho samiech zho.

20 Grë ncuaan ntseeb co nagon nac  
minë runctal xtol miech, gunctald zho  
xtol zho niicle tsard nia zho zigne  
nacpaa grë zhiwseed menjol.

*Biac xpëed tib wnaa zit*

*(Mr. 7:24-30)*

21 Ga brie Jesus, güey me haxta nëz  
Tiro ni nëz Sidón.

22 Nëz co no me güey tib wnaa  
ne ziaad lo xtii zha Canaan lo me,  
nguietz zëeb tsi wnaa co rnab me  
lo Jesus siguiel Jesus tsiegunguiac tib  
xpëdwanaa me nosacsi mendox.

23 Per ib pquiabd Jesus lo xtiidz  
wnaa co, dzigo wbig xpëedscuel me,  
rëb zho:

—Mazd bzhiguiel pquiaadiag minë  
rnee wnaa qui, bui ganle zha ncuëtaa  
zëeb tsi me nal me zhits ne.

24 Pquiab Jesus rëb me:

—Ziald naa par gun naa xyudar zha  
zit, sinque laa Pxo naa pxeel naa  
par gun naa xyudar grë zha Israel ne  
rzac zig grë mëcwxiiil ne zonziaab lo  
xbaxtor.

25 Scaque nonee me laa wnaa co  
wbig pquiitgzhil lo me.

—Bzhiguiel —rëb me—, been tib  
guielnaac been xyudar naa.

26 Rëbchaa Jesus lo me:

—Nonguielda gon, cob ne guiet ne  
no nia mëed gdeed new lo mëcw.

27 —Nliw, scaw —pquiab wnaa  
co—, per niicle mëcwa name  
rsaanaque bizhuan ma rbig ma row  
ma minë rrieengaa nia mëed.

28 Horco pquiab Jesus rëb me:

—¿Squiw nagon! ¿Rlu nli dib zdo  
luu rnalo luu naa! Gacxe waa minë  
rnab luu i gun naa, niinagazh laaw  
gac.

Horcogazh biac xpëed wnaa co.

*Nzian miech ne beenguiac Jesus*

*(Mr. 8:1-10)*

29 Nëz co wbi Jesus bdziñ me ro  
Nisdo Galilé.

Ro nis co no me, miech guizhiu  
ne pcaalsa lo me. Tib dze gon me  
scataa nzian miech co, dzigo güey me  
güey sob me tib guic gui win zob gax  
ga.

<sup>30</sup> Ga zob me rdziñ grë miech co rdziñnie zho grë zhimguidz zho lo me, no zho zienie grë zha ne në ni, no zho zienie grë zha ne rold lo, grë zha ne guiend tib nia, grë zha ne guiend tib ni, grë zha ngop, ni grëragaa zha ne rlan pe stib guielguidz; grëse zho beenguiac me.

<sup>31</sup> ¡Ncuaane gzee zdoo ne goc ga! Grë zha ne ni tib diidz gard gnee, per nli rley zho laa zho psilo rnee; grë zha ne guiend tib ni, guiend tib nia, laa ni zho laa nia zho biaan zigne no gaca; grë zha ne rgob ni, haxta rias zho laa ni zho goc-wen; grë zha ne rold lo, rlozhd gzee zdoo zho grë ncuaane ran zho. Grëse miech ne ndxie ga, rzee zdoo zho, rley zho roolnie zho Dios.

<sup>32</sup> Dzigo bredz me xpëedscuel me rëb me lo zho:

—Rquia zdoo naa grë miech rii. Nadzele rac tson ngbidz blanso zho lo ne nu, ni na quianiedraa zho pe gow zho. Telne squise gzonëz naa zho, nend pa lo zie zho nëz ycow zho.

<sup>33</sup> Pquiab zho rëb zho:

—¿Per pe yguiaan ne zho? ¿Pa guioxi ne guielwagw ne yquiin grëtaa miech qui dan rii, naca zaatne guiend miech?

<sup>34</sup> Dzigo bnaabdiidz me lo zho, rëb me:

—¿Bla guietxtil ziaadnie to i?

—Gadzaquew no —rëb zho—, ni chop tson mel win.

<sup>35-36</sup> Dzigo bnabey me grëse miech co bzob zho lo liu. Blozh bzhen me gza gadz guietxtil co, ni gza mel co, bdeed me xquizh lo Dios; blozhse bdeed me xquizh, zigse rungroł me guietxtil co scase scase rdeed mew lo xpëedscuel me rguiz zhow lo grë miech co; scaque been me gza mel co.

<sup>37-38</sup> Grëse miech co dow zho haxta zaatne bieltaa zdoo zho. Miech guizhiuw, zha bguise rgaa zho maase tap mil, nandragaa grë men wnaa, grë mëedlas; ni zeene blozh ga bii biodzë gadz chicuid bio grë mine biaan.

<sup>39</sup> Blozhse bnee me lo grë miech co, blozhse bzonëz me zho, dzigo laa me

bzëeb len barcw zie ne nëz xtan zha Magdal.

## 16

*Gocladz zha farisé niungüet zho Jesús*

(Mr. 8:11-21; Lc. 12:54-56)

<sup>1</sup> Magdal no Jesús, bdziñ bla zha farisé ni zla zha saducé lo me, gocladz zho niungüet zho me dien pe nxiñd me tib diidz, pe tib ncuaane nonguieldgaa niun me. Rquiaalo zho rnab zho lo me gun me pe tib milagr, zeena gliladz zho nli Dios pxeel me.

<sup>2-3</sup> Dzigo pquiab me rëb me lo zho:

—¡Pe nlipaa rnee to riende to zha nac grë ncuaane noyac len dze rii! Zha zëeb dzigo runbey to pe rlu lo xcow. Zeene ran to rquia xcow nizhnie bdze dze, rienle to guiet stib dze co zriee lo ngbidz. Sil ne rangaa to quia xcow nizhnie, quia xcow nlaan zhan gbaa, rienle to guixoo guiab dze co.

<sup>4</sup> Nazdpaa ntseeb to, squitaa gocndip zdoo to nëz lo Dios, ¿zha rnaraa milagr ne racladz to gan to? Stibaque milagr gon gan to, tib mine gac zigne bzhaac Jonás.

Blozhse sca rëb me lo zho, zoque zho ga, ziega me.

<sup>5</sup> Zeene brieë zho ga, zoladz xpëedscuel me ney zho guietxtil ne niow zho.

<sup>6</sup> Lega nacle psilo me nonee me lo zho, rëb me:

—Golguien gon, napaa noyab to lo zhincobi zha farisé, lo zhincobigaa zha saducé.

<sup>7</sup> Zeene gon zho sca rëb me, rneechaa zho:

—Porne nagon ziaadnied ne guietxtil, gane squi rnee me lo ne.

<sup>8</sup> Bien me sca nonee zho, dzigo rëb me lo zho:

—¡Gardaque lëë guien to cho nac naa! ¿Pe nacte tso to zhizhgab guietxtil?

<sup>9</sup> ¡Ni lalnu lëë peet riende to! ¿Pe rsoladzde to zeene gaayaque guietxtil bguiaan ne gaay mil miech, bla chicuida biaan?

10 Scaque zeene gadzaque guietxtil ni bgaaw dow tap mil miech, ¿pe nicle min co rsoladzdraa to?

11 ¿Zha nac dzigo rzac to guietxtil nozet naa? Golguien ganle zhincobi zha farisé, zhincobi zha saducé ni naa.

12 Dzigoraa bien zho led ncobidpaa rzeet me, sinque rëb me lo zho gap zho cuidad lo zhiwseed zha farisé, lo zhiwseedgaa zha saducé.

*Bnee Pedr cho nac Jesús  
(Mr. 8:27-30; Lc. 9:18-21)*

13 Bdziñ Jesús nëz xtan zha Cesarea de Filipo grë xpëëdscuel me, nëz co no me bnabdiidz me lo zho rëb me:

—¿Cho dien ron to rnee miech nac naa?

14 Pquiab zho rëb zho:

—No zho rnee Juan Bautista, no zho rnee Líw, no zho rnee Jeremíw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Diosa zig biaad zha ne biaad padzeela.

15 Dzigo rëb me lo zho:

—¿To waa? ¿Cho rzac to nac naa?

16 Pquiab Pedr, rëb Pedr:

—¡Luu nac Men ne zëëble diidz ga cxeel Dios! ¡Xpëëd Dios nac luu!

17 Dzigo rëbcha me:

—Dichos luu Simón (xingan Jonás) brieë diidz qui ro luu, sac gon Pxoza naa men ne no gbaa, men co bneedz guielbiini qui lo luu, nacda ncuaane cho miech nëw lo luu.

18 Ye naa gon niina laa naa gni ganle cho nac luu, luu nac zig tib quie, ni quie ne gon squi nac gzhixcuaa naa xyadoo naa; tsod zha ne grieelo gnitlo yadoo co, per ni guielgut gnitloda.

19 Laa naa rzo luu, luu gnee Xtidz naa lo miech zeena gacnan zho zha grieelo ygaa zho zaatne rnabey Dios; luu gac zig tib zha ne rey liow, tel zha cow, zha zac cxal ro yu, ni zha zac csiooga.

20 Dzigo pso me diidz lo zho choot lo gneed zho, me nac Men ne zëëble diidz ga cxeel Dios.

*Bzeet Jesús zha gun miech me  
(Mr. 8:31-9:1; Lc. 9:22-27)*

21 Len dze co psilo Jesús bzeet me lo xpëëdscuel me zha csacsi miech me. Rëb me nroob ncuaane cteed zho me, zeene laa me tsie Jerusalén; grë zha non lo menguedz, grë pxoz ne rnabey, grë maistr ley, ible stsidil zho me ni haxta zut zho me; per zeene gac tson ngbidz gut me, laa me grieeban.

22 Gon Pedr zha rnee me, dzigo bredzaque Pedr me blisqui Pedr lo me dien pe nacne rnee me laa me guet.

23 Zeene bin mew, zoque Pedr ga, biecw me rëb me:

—¡Biche lo naa nu mendox! ¡Loxaque no luu par gungüet luu naa! Zienied guic luu mine rnabey Dios, sinque mine rleynie miech, min co zienie guic luu.

24 Dzigo bnee me lo zho, rëb me:

—Zha ne racladz sëëb xnëz naa, none cueeladz zho zho, none lëb zho guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoos zho xquielmban zho,

25 sac zha ne yquia zdoos xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ndzon ne gdziñd dze lozh.

26 Zha ne zienie guic loxaque gapchen, ¿pa dien yquiina lo zho, tel lëew yquiaaqui guey zho gabil? ¿Niacxe zrieelo gdziib zho dimi, laa zho len gabil?

27 Naa ne nac naa Mgui ne pxeeł Dios, dzin dze ne gbiire guial naa stib, guialnie naa grë xanjł naa, glu naa ganle pa lotaa men nroob nac Pxoza naa; dze co gded naa mine tsieguial tib tib miech, tel zha wban zho.

28 Ib tedsod lo grë zha ne ndxie nu niina, bii no zha ne gan ganle, zeene laa naa csilo gnabey lo guidzliu rii.

## 17

*Bdzëëlo Jesús  
(Mr. 9:2-13; Lc. 9:28-36)*



<sup>1</sup> Goca xoop ngbidz, bredz Jesús Pedr, Jacob ni Juan bets Jacob güeynie me zho tib guic gui glaa.

<sup>2</sup> Guic gui co no zho, zeene gon zho laa me bdzëelo. Masaque biinidoo rriee lo me, pale lo ngbidz; xab mew, per nli rquiabniw, masaque biini ne rrona.

<sup>3</sup> Tibaque zeene gon zho laa Moisés ni Lí men ne biadteed xtiidz Dios padzeela, nozodiidznie me.

<sup>4</sup> Rdzieb zho, lo dzeb co brieer ro Pedr rëb Pedr:

—Maestro, itebaa zha grielo guiaan ne nu! Telne racladz luu, na maase gzaa no tson yu yag xiid nu, tiba cuëz luu, tiba cuëz Moisés, stiba cuëz Lí.

<sup>5</sup> Scaque nonee Pedr, zeene znuse pquia tib xcow ngali zaatne zo zho ga, masaque biini ne rron xcow co, lo xcow co bin zho zëeb tsi tib men co, rnee me:

—Lëe xpëed naa i gon, rleynie naa me, rzac zdoo naa mine quiayun me. Mine rnee me, golgona.

<sup>6</sup> Mazdraa bdzieb zho bin zho sca rnee men co, lëelëd pquiitsgzhib zho haxta bdziñ lo zho lo liu.

<sup>7</sup> Dzigo wbig Jesús, pcaañnia me zho, rëb me:

—Golsoli, gdziebde to.

<sup>8</sup> Zeene blis lo zho bui zho, mese zo ga, gondraa zho schop men co.

<sup>9</sup> Blozhse ga, laa zho wbi ga. Cho gui co ziad-zëebnie me zho, pso me diidz lo zho mine gon zho ga, choot lo gzodiidzd zhow, nieeda gal dze ne laa me brieaban.

<sup>10</sup> Dzigo bnabdiidz zho lo me, rëb zho:

—¿Bay zha nacne rnee maistr ley, glo Lí no guiaad stib, dzigora guiaad Men ne zëeble diidz ga cxeel Dios?

<sup>11</sup> Rëbchaa me:

—Nliw, ible nacle diidz ne glo Lí guidseed miech gon zho xtiidz Dios.

<sup>12</sup> Ni gacnan to ganle laa me bиаadle, per beenbeyd miech me, lel psacsi zho me been zho me mine gocladztaa zho; ni ib tedsod gon, scaque csacsi zho Mgui ne pxeel Dios.

<sup>13</sup> Zeene blozh sca rëb me, dzigo bien zho Juan Bautist ga rzeet me.

*Biac tib mëed ne nosacsi mendox*  
(Mr. 9:14-29; Lc. 9:37-43)

<sup>14</sup> Zeene blozh biet zho cho gui co, gon zho miech guizhiu ndxie ga quiambëz Jesús. Lad co brieer tib mgui, wbig me lo Jesús, pquiitsgzhib me lo Jesús, rëb me:

<sup>15</sup> —Laa naa rnab lo luu, bzhiguiel beenguiac xpëed naa, nrooble nosacsi guidz gutye win. Blactaa ziyobe win lo gui, ziyobe win lo nis ne.

<sup>16</sup> Blansonie naa win lo xpëedscuel luu nu, per rriee lod zho gunguiac zho win.

<sup>17</sup> Dzigo rëbchaa Jesús lo xpëedscuel me:

—¿Pe na squitaa miech ntseeb nac to, ib nëde to gnalo to Dios! ¿Palal tiemp ne so naa gne naa lo to? ¿Ncuaañe cxeewdraa naa lo to squi nac to! ¿Goltënie mëed qui nu!

<sup>18</sup> Dzigo goctox Jesús lo mendox ne nosacsi mëed co, bencxoon me ma, hor cogazh laa mëed co biac.

<sup>19</sup> Haxta wbiraa zho ga, wbig zho lo me bnabdiidz zho dien pe nacne brieelod zho niuncxoon zho mendox ne nosacsi mëed co.

<sup>20-21</sup> Dzigo rëbchaa me:

—Brieelode to niuncxoon to ma, sacne rnalode to Dios. Tel niaca mine rnalole to Dios siquier palal yeen, gzoob ne siquier lal tib midz moxtaz, niicxe ncuaañe mazdraa ngan gnab to lo me, zun mew; tsod ncuaañe griee lod gun to.

*Bzeet Jesús laa miech csacsi me*  
(Mr. 9:30-32; Lc. 9:43-45)

<sup>22</sup> Xtan zha Galilé no zho, tib dzew rëb me lo zho:

—Naa ne nac Mgui ne pxeel Dios, ib znaaz miech naa,

<sup>23</sup> haxta zut zho naa; per zeene gac tson ngbidz gut naa, zriebaan naa.

Zeene bin zho sca rnee me, bio zho guielnë, mbanse rac zho.

<sup>24</sup> Bdziñ me guiedz Capernaum, loxaque bzëeb me lad guiedz, laa zha ne rtop dimi ne razh yadoo wbigle lo Pedr, bnabdiidz zho dien pe rguizh me dimi co. Pquiab Pedr rëb Pedr lo zho:

25 —Rguizh mew, ¿pe nacne quizhd mew?

Zeene bdziñ zho len yu ne rbëz me, gardle guiab Pedra lo me, glole me bñabdiidz rëb me lo Pedr:

—Zig nac dimi ne razh lo men ne nac rey dien, ¿pe ye xpëed me rguizha, te loxaque zha zit rguizha ye?

26 Pquiab Pedr rëb Pedr:

—Zha zitse rguizha.

—Nligaa sca naca —rëb Jesús—. Zha ne nac mëed nodne quizh zho,

27 per par guiabd zho rdziond ne diidz, güey güeyron xanzuel luu lo nis. Mel ne glopaa ygaa low, bzhen ma pxal ro ma, ga gdziel luu dimi; dimi co güeynie bdiizh mine no dizh ne grop ne.

## 18

*¿Cho nonraa?*

(Mr. 9:33-37, 42-48; Lc. 9:46-48; 15:3-7; 17:1-3)

1 Len dze co bñabdiidz xpëedscuel Jesús lo me, dien cho tib zho gac zha ne mazdraa gacnon lo grë zha ne no xnëz Dios.

2 Dzigo bredz me tib mëedbgui win, bzo me win glowtaa lo zho,

3 rëb me:

—Gneli naa lo to ganle, telne csaande to xquieIntseeb to, telne gacnguudzladzde to, gac to zig mëedwin rii, per ni xnëz Dios grieelod sëeb to.

4 Zha ne racladz gac zho zha non, none gac zho tib miech ndooladz, none gac zho zig tib mëedlas.

5 Miech ne gacnie zha ne sca nac, zha ne rleynie naa, rrieequia naale ga racnie zho.

6 'Per miech ne yquiil zho guncal zho xtol zho, jprobsaxe zha co! Mazd zhi guieInëw lo zho ygadoo tib quie molin zhobxtil yan zho tsieron zho zho nisdoo.

7 jNac lo guidzliu rii, runfalte guieIntseeb low! Runfalte ncuaane guncal xtol miech, jper probsaxe zha ne yquiil zha ne nole xnëz naa, guncal zho xtol zho!

8 'Golguien telne tib nia to, tib nigaa to rquiaqui runctal to xtol

to, goltichegazha. Peet nacda maase tibaque ni to, tibaque nia to zob totsaque ygaa to guieImban ndzon ne gdziñd dze lozh, lëdle zob gropa ni laa to guey gabil, lo beldox ne gdziñd dze guuu.

9 Scaque bziaalo to, mine rquiaqui runctal to xtol to, goltichegazha, peet nacd maase tibaque lo to zob totsaque ygaa to guieImban ndzon ne gdziñd dze lozh, lëdle zob gropa ni laa to guey lo beldox ne nac gabil.

10 'Ib gunde to csanwin to grëraa zha ne no xnëz naa, zha ne nac zha mban, sac gon non zho lo Dios, anjl ne quianap zho, tibaque zo me lo Pxoza naa men ne zob gbaa.

11 'Nziuu miech lo Dios, tel naa ne nac naa Mgui ne pxeel me, ib laa naa zial zialsilaa naa grë zha ne zonziaab lo me.

12 'Rzac Dios miech zig tib men ne rquianë zdoo xpëcwxiil. Telne quianie zho tib gayoo ma, ni gziaab tib ma, led zëeb lëe rsan zho stapgal tsiimtap ma ne zo lo zho, rbire zho rieguib zho ma ne bziaab ga.

13 Zeene rdziel ma lo zho, rlozhd gleynie zho ma, lëe ma rac guieIbley que grëraa xcompañer ma.

14 Scadaa nagon rzac Pxoza naa miech, grë zha ne nole xnëz me, ib racladz me gziaab zho.

15 'Golguien sca, tib tib to zeene cho tib zha ne nacgrë to gun pe tib falt lo to, goltzie goltsienee lo zho; gropsa to golzodiidz pe nac mine pxin zho. Telne siguiel zho guiaan to mpas, laa to beenle gan ga gneewen to stib.

16 Laa telne nëd zho, dzigo golguib tib zha ne së, chopgaa zha ne së gan ganle zha rac zho.

17 Tel niicle scaw nëdaque zho guiaan to mpas, dzigo mazd golguiab lo grëse zha ne nacgrë to gnee zho lo zho. Telne niicle xtiidz zha co nëd zho gon zho, dzigotaa mazd golsaan zho, sacdraa to bets to ga, golcuee zho lad to, golsac zho zig rzac miech grë zha ne zienal guieIntseeb.

18 'Gneli naa lo to ganle, grëse zha ne gon xtiidz to zeene rnee to lo zho gac-



wen zho, scagaa Dios scaania me zho; per zha ne gonda, ycaaniad me zho.

19 'Ni racladz naa gacnan to ganle, grë zha ne no xnëz naa, niicle tib nëzaque zho, per telne tipse rac zho, ncuaane gnabtaa zho lo Pxoz naa men ne zob gbaa, zdeed mew.

20 Sac zeene rcaalsa zho roolnie zho naa, ga zo naa lo zho; niicle maase chopaque, tsonaque zho.

21 Dzigo wbig Pedr rëb Pedr lo me:  
—Zha ne sca dzigo gun falt lo naa, ¿blataa vuelto no gun naa zho perdon? ¿Gadztaaw lëë?

22 Pquiab me rëb me:  
—Lëda gon Pedr, led loxaque gadzse vuelta. Tel blataa vuelto gun zho falt lo luu, none gun luu zho perdon.

### *Zha ne beend perdon*

23 'Grë zha ne no xnëz Dios, ib none gun zho perdon samiech zho.

'Tib rey name, tib dzew bredz me grë zha ne rquia dziin lo me, par dien zha quiayun zho dziin.

24 Loxaque psilo me, zeene laa xcuent tib zha co blozh brieë, nroob brieëquia zho lo me;

25 par quizh zhow, peet nzhend zho. Dzigo bnabey me to zho grop tsiel zho, xpëed zho ne, ni grëse ncuaane rap zho, parne grieelo gazh xquielqui zho.

26 Zeene gon zho sca rëb me, pquiitgzhib zho lo me, rëb zho: "¿Been guielnzaac, gop tib paciens, na dien zha gun naa quizh naa xquielqui naa lo luu!"

27 Gon me zha rac zho, pquia zdoo me zho, psilaa me zho, beenquizhdaque me zho xquielqui zho.

28 'Loxaque brieë zho ga, bdziel zho tib zha ne nzëëb palal yeen dimi lo zho, tib zha ne rquiaque xtsiin rey cow. Zigne gon zho zha co, zolinëz wbig zho bdie zho yan zho, rnab zho gagazh quizh zho xtimi zho.

29 Dzigo pquiitgzhib zha co lo zho, rnab zho siguiel zho gap zho paciens, dien zha gaclo dimi co quizh zhow.

30 Pe nquiaadiag zho ga, bnab zho bio zha co ladzguiib, haxta bdiizh zho dimi ne zëëb zho ga.

31 Grëraa zha ne rquia dziin lo rey co, zeen gocnan zhow, bdeednë zho, güey zho güeyzodiidz zhow lo me.

32 Zeene bin mew, bnabey me gocredz zho, goctox me lo zho rëb me: "¿Pe clas miech nac luu! Pe rsoladz luu zha rac luu bnab luu pquia zdoo naa luu, haxta beenquizhd naa luu guielquidox ne zëëb luu ga.

33 ¿Pe nacne pquiad zdoo luu zha co, zigne pquia zdoo naa luu?"

34 Blëë me gon me sca been zho, bnabey me bio zho ladzguiib, haxta blozh bdiizh zho grëse xquielqui zho.

35 'Scadaa nagon gun Pxoz naa to, telne gunde to samiech to perdon, tel pe nac falt ne gun zho lo to.

## 19

### *Zha ne rsëbtsieel (Mr. 10:1-12; Lc. 16:18)*

1 Blozhse sca bnee Jesús lo zho, brieenie me zho ga güeyted zho grë guiedz ne ndxie xtan zha Judé, grë mine riaan nëz dan ro guiubee Jordán, nëz ne rlan ngbidz.

2 Miech guizhiu ne rrieë grë guiedz co, rdzin lo me; grë men rzacnë ne rdzinne zho, beenguiac me zho.

3 Ga no me, bdzin bla zha farisé gocladz zho niungüet zho me, par dien pe nxind me tib diidz; bnabdiidz zho lo me rëb zho:

—Pe gnë luu dien, ¿pe wena csëbtsieel zha bgui ne gacladztaac csëbtsieel?

4 Pquiab me rëb me:

—¿Mod rande to zha zhobnee lo Xtidz Dios? Lo co zhobnee ganle zeene psan me miech, tib nëz zho psan me, tib mgui ni tib wnaa.

5 Ni rneew, ib none grieexhaa mgui lo pxoz zho, lo xniaa zho par gbannie zho wnaa ne nac tsiel zho, gac zho tibaque miech grop zho.

6 Nligaa nacdreaa zho chop miech, sinque laa zho rac tibaque. Dios nac men ne psan ycatsieel miech, cho

dzigo nac miech par quiits zho mine rnabey me.

<sup>7</sup> Dzigo rëb zho lo me:

—¿Pex nac dzigo waa bdeed Moisés diidz csëbtsieel mgui ne racladz csëbtsieel? Rëb Moisés, zac csëbtsieel zho, totsaque yquia tib guits gdeed zho lo wnaa zaatne raquiet laa zho psaan wnaa.

<sup>8</sup> Pquiabchaa me rëb me:

—Ne squitaaxe waa miech nad, miech ndip zdoo goc xmengol to, gane bdeed Moisés diidz csëbtsieel zho; sangue Dios psand me diidz csëbtsieel miech.

<sup>9</sup> Gacnan to ganle, zha ne csëeb wnaa ne nac tsieel zho, ni tel peet guielyozh beend wnaa co, dol ga gun zho csëeb zho tsieel zho ycaa zho stib wnaa. Scaquegaa mgui ne ycaa wnaa ne psëeb zho ga, dol ga gun zho sac gon no tsieel wnaa co.

<sup>10</sup> Dzigo rëbchaa xpëedscuel me:

—Tel scataa nac xcuent guieltsieel, mazd lëequew dzigo ctsieelniad ne.

<sup>11</sup> Pquiab me rëb me:

—Nligaa no mgui ne rtsieelniad, per zhis zho, ni no pe nacne sca riaan zho.

<sup>12</sup> No zho desde rac zho mëed, nacd zho zha ne grieelo tsonie wnaa; no zho ib miech sca rsan zho. Nogaa zha ne ib zha rbeeladz zho ctsieelniad zho, parne grieelo tsoxcoraa zho gun zho xtsiin Dios. Zha ne sca rquiabladz ctsieelniad, maase ctsieelniad zho.

*Beenlay Jesús mëedlas*

*(Mr. 10:13-16; Lc. 18:15-17)*

<sup>13</sup> Ga no Jesús, ndal zha ne bdzin bdzinne zho xpëedlas zho lo me, parne cxobnia me guic win gunlay me win. Grë zha ne nac xpëedscuel me, lel psilo zho rtsidil zho pe nacne nodzinne zho grë mëedlas co lo me.

<sup>14</sup> Zeene gon me sca quiayun zho, rëbchaa me lo zho:

—Ctsirede to grë mëedlas yeen qui, golsaan guiaad win lo naa. Sac gon grë mëedlas yeen, ni zha ne nac zig nac win, zha co nac zha ne sëeb ygab lo Dios.

<sup>15</sup> Dzigo psilo me pxobnia me guic grë mëedlas yeen co, beenlay me win. Blozhse ga, laa me brieeg ga.

*Bzodiidznie tib zha ricw Jesús*

*(Mr. 10:17-31; Lc. 18:18-30)*

<sup>16</sup> Laa me zierieeg ga, zeene bdzin tib mgui nguieg, tib zha ricwa, rëb zho lo me:

—Nan naa luu nac tib men ne noseed miech, ni tib men wen nac luu. Bnë dien, ¿pe nac mine gun naa parne grieelo ygaa naa guielmban ndzon ne gdziind dze lozh?

<sup>17</sup> Pquiab Jesús rëb me:

—Rnee luu lëe tib men wen nac naa. ¿Nligaaw, Diosse nac men wen! Telne nli racladz luu ygaa luu guielmban co, none tsoxco luu gban luu mine rnabey Dios.

<sup>18</sup> Pquiab zho rëb zho lo me:

—¿Pa min waa?

Rëbchaa me:

—Mine rnee:

Gute luu samiech luu,  
telne nole tsieel luu, tsonied luu zha  
ne led tsieeld luu,  
cuand luu samiech luu,  
yquiadiidzguizhd luu samiech luu,  
<sup>19</sup> gon pxoz luu, gon xniaa luu, cueed  
luu xquielto me.

Bleynie samiech luu, zigne rleynie  
luu luu.

<sup>20</sup> Dzigo rëbchaa zho:

—Ni tib mine rnee luu i gard quits naa, grësew zana naaw zigne naca. Racladz naa gacnan naa, dien peraa no gun naa.

<sup>21</sup> Horco rëb me lo zho:

—Tel racladz luu gac luu tib zha ne gban grëse mine rnabey Dios, güey sca güeyto grëse ncuaane rap luu, dzigo güeytiiz dimi co lo grë zha ne guiend pe yquiin. Lozh ga, dë dënal zhits naa. Min co nagon gun luu, dzigo zgaa luu guielmban ndzon co; ni scagaa nroob guielnzaac ne ygaa luu nëz lo Dios.

<sup>22</sup> Zeene bin zho sca rëb me, mbanse rac zho laa zho zey, sac nroob ncuaane quianie zho.

<sup>23</sup> Dzigo rëbchaa Jesús lo xpëedscuel me:

—Gneli naa lo to ganle, grë zha ne squi rapchen rzacxuu zho par sëeb zho xnëz Dios gnabey me zho.

<sup>24</sup> ;Ne nligaa ngan rzac zhow! Mazd ngandse rded tib camell guieer guzh lëdle sëeb tib zha ne squi rapchen xnëz Dios.

<sup>25</sup> Zeene bin zho sca rëb me, rzee zdoo zho, rnee zho:

—Bay, ;chomezhe dzigo waa nac zha ne zrieelo sëeb xnëz Dios?

<sup>26</sup> Dze bui me lo zho, dzigo rëbchaa me:

—Nligaa par miech zootle tsod zha ne grieelo sëeb xnëz me; sangue me nan me no zho. Sac tel me, tsod ncuaane grieelod gun me.

<sup>27</sup> Horco pquiab Pedr rëb Pedr lo me:

—No dzigo waa, ;pe nac mine yгаа no? Nanle luu ganle, tel no grëse ncuaane rdziaap no, laa no psana, ziaadnal no zhits luu.

<sup>28</sup> Pquiab me rëb me:

—Golgona ganle, dze ne gacncub grëse ncuaane no, zeene laa Mgui ne pxeel Dios zob lo xcan ne zo zaatne nac lo guielndzon ne no me, dze co lo gza to ne nac to zha ne biaadnal zhits naa, sob to lo gza tsiipchop xcan ne rieguial to. To gac zha ne gun guielwxtis lo gza tsiipchop dii ne nac zha Israel.

<sup>29</sup> Grëragaa zha ne psan lidz, psan zho bets zho, bzian zho, xniaa zho, pxoz zho, tsieel zho, xpëed zho, liun zho porne noyun zho xtsin naa, na lo guielmban rrique laa zho gana stib tib gayoogaw tib tiba; ni ib tedsod zгаа zho tib guielmban ndzon ne gdzindraa dze lozh.

<sup>30</sup> 'Nli zig nac niina, nzian zha ne rzac zha non nac zho, nogaa zha ne rzac zho peet nond, per zeene gal dze co lalga gac zho grë zho.

## 20

### *Lalga nac grë zha ne no xnëz Dios*

<sup>1</sup> Grë zha ne no xnëz Dios, zac zho lo me zig bzhaac grë zha ne güey xtsiin tib men co.

'Tib men co name nroob dziin quianie me, tib dzew zigne biini liu

briee me güeyguib me zha ne tsielaap xuy me.

<sup>2</sup> Bdzial me palal zho, biaan zho diidz palal quizh me zho dze, laa zho bzëeb lo dziin.

<sup>3</sup> Glaale ngbidza briee me güeyted me len guiedz, lëetse güeytsib me lo bla zha ne zob ga racladz dziin.

<sup>4</sup> Dzigo bree me zho, rëb me: “Goltsie xtsin naa, na quizh naa to mine non xtse to.”

<sup>5</sup> 'Rwe ngbidza, biire me güey me güeyguib me spalal zho. Maase las treza güeyaque me stib.

<sup>6</sup> 'Zhile sëeb ngbidza, biire me güey me len guiedz. Ga bdzieel me zla zho, gon me scase zob zho ga. Dzigo rëbchaa me lo zho: “;Pe nacne squise noded dze to?”

<sup>7</sup> Pquiab zho rëb zho: “Choot rneedzdaxe dziin waa yquiaa no.” Rëbchaa me: “Nasca zeena tsie to lo xtsin naa, maase quizh naa xtse to.” Dzigo laa zho zie.

<sup>8</sup> 'Zeene laa dze blozh bdze, bnee me lo zha ne zo lo xtsiin me, rëb me: “Bredz grë zha qui na, bdiizh xtse zho grëse zho. Zha ne bza bzëeb lo dziin, zha co glo bdiizh, lozhraa ga quizh luu zha ne glo bzëeb.”

<sup>9</sup> Dzigo bded zha ne bdzele dze bzëeb lo dziin ga, tib tib zho pcaase zho mine non zho tib dze.

<sup>10</sup> Grë zha ne glo bzëeb lo dziin, zeene gon zhow, tibaque güeynie guic zho nroobraa nguizh me zho. Per zeene laa zho gozh, lalgaque pcaa zho.

<sup>11</sup> 'Zeene gon zho lalga pcaa zho grë zho, blëe zho, güey zho güeylisqui zhow lo men ne nacchen dziin ga, rëb zho:

<sup>12</sup> “Psacsi luu no i gon squi been luu. Bui ganle gdipse dze ptsuu ngbidz no pquiaa no xtsiin luu, ;zha nac dzigo lalga quizh luu no grë no zha qui, ni niipyeen aque been zho dziin?”

<sup>13</sup> Pquiab me rëb me: “Bets, nosacsid naa to, biaanle ne diidz name palal quizh naa xtse to.

<sup>14</sup> Nana sca golgüey xtimi to i, zeena golsë. Ib zdoo naa rala lalga quizh naa to grëse to.

15 ¿Stiba, xtimi naaw, zrieelo gundziin naaw zigne racladz naa! ¿Te në rac zdoo to ye, ran to rquia zdoo naa miech?”

16 ‘Scapaa nagon gac zha ne no xnëz Dios. Lal gacnon zho, zigtaa zha ne glo bzëëb xnëz mew, zigtagaa zha ne sëëb bzaw.

*Bzeet Jesús stib laa miech csacsi me (Mr. 10:32-45; Lc. 18:31-34)*

17 Nëz no Jesús zie me nëz Jerusalén, tibaque bredz me gza tsiipchop xpëëdscuel me,

18 bzeet me lo zho zha gun miech me zeene laa zho gdziñ Jerusalén, rëb me:

—Ib ziaab naa ladznia grë pxoz ne rnabey grë zho maistr ley, zha gnab guet naa.

19 Zha co naa ladznia zha zit, parne gunnguzee zha co naa, parne quin zho naa, ni haxta squiaa zho naa lo cruz. Per zeene gac tson ngbidza, zriebaan naa.

20 Tibaque zeene wbig tsiel Zebedé wbignie me grop xingan me Jacob ni Juan, pquiitgzhil me lo Jesús rnab me gun Jesús tib favor ne racladz me.

21 Dzigo bnabdiidz Jesús lo me, pe nac favor ne racladz me. Pquiab me rëb me:

—Racladz naa gneedz luu diidz sob tibga xpëëd rii naa cue luu zeene gdziñ dze ne laa luu zob zobnabey luu; tib zho nëz derech, stib zho nëz revés.

22 Pquiab Jesús rëb me lo wnaa co:

—¿Ni luu gon riend pe rnab luu! ¿Niacxe zlëb zho gan zho grë guielnë ne gan naa, tedgaa zho grë mine teed naa?

Pquiab zho rëb zho:

—Zlëëb no.

23 Rëbchaa me lo zho:

—Nli nenda zan to grë guielnë ne gan naa, ni zdedgaa to mine teed naa; per ne gneedz naa diidz sob to cue naa nëz derech, nëz revésgaa, led naad raguial min co; sac laa lugar co biaanle par zha ne tsieguiala, ni Pxoza naa men ne zob gbaa men cose nan dien chow.

24 Grëraa xpëëdscuel me, zeene bin zho pe nac mine rnab Jacob grop Juan, blëë zho lo zho.

25 Dzigo bredz Jesús zho grë zho, rëb me lo zho:

—Ran to ganle zha ran grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladzaa zho.

26 Sangue to gon gunscaade to. Zha ne racladz gac zho zha non lo to, laa ne glu zho zha non zho, none glo zho guiaanwin, gac zho zig tib ngundziin lo to.

27 Scaquegaa zha ne racladz gnabey zho lo to, none glo cseed zho gun zho mine gnabey to zho.

28 Golgan ganle, niicle naa ne nac naa Mgui ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

*Biac chop zha ne rold lo*

*(Mr. 10:46-52; Lc. 18:35-43)*

29 Miech guizhiu nal zhits Jesús, laa me zieriee guiedz Jericó.

30 Ro nëz co zob chop zha ne rold lo, zeene bin zho laa me ziaad ga, psilo zho nguiedz rbedz zho rnee zho:

—¿Jesús, men xtii rey David, pquia zdoo no!

31 Blalaa zha ne zie ga, psilo zho ndox zho lo grop zha co parne guioog ro zho, per lel hor cole nguiedzraa rbedz zho me.

32 Nacne zeene bdziñ me zaatne zob zho, blëz me, bnabdiidz me lo zho rëb me:

—¿Pe nadien gun to naa?

33 Pquiab zho rëb zho:

—¿Racladz no guiac lo no!

34 Pquia zdoo me zho gon me sca rac zho, dzigo pquiaania me zhits guidlo zho. Horcogazh laa lo zho biac, laa zho zianal zhits me.

## 21

*Bdziñ Jesús Jerusalén*

*(Mr. 11:1-11; Lc. 19:28-40; Jn. 12:12-19)*



<sup>1</sup> Sca no Jesús nêz grê xpëedscuel me, laa me bdziñ guiedz Betfagé. Gaxle ga riaan Jerusalén, nêz danse squi riaan Gui Oliv. Dzigo pxeel me chop xpëedscuel me, rêb me lo zho:

<sup>2</sup> —Goltsie guiedz win ne ndxie danse lo ne i. Ga gdziñ to zaatne quadoo tib burr gus grop xpëed, dzigo golxadz ma goltënie ma nu.

<sup>3</sup> Teļ cho gnabdiidz pe nacre noxadz to ma, golguiab lo zho: Men ne rnabey ne, men co rquiin ma, na zigne lozh xtsiñ ma guiaadsan no ma.

<sup>4</sup> Ga brieequa miñe bnee tib men ne biadteed xtiidz Dios lo miech padzeela, zeene rêb me:

<sup>5</sup> Golguiab lo men Jerusalén:

“Golwi ganle, laa men ne nac zhirey to ziaad i.

Tib men ligase rlu me, zob me lad tib burr win,

tib ladse ma ne rey yo zob me.”

<sup>6</sup> Laa zho zie, zigne bnabeyse me zho ga, scase been zho.

<sup>7</sup> Zeene wbiere zho, laa zho bdziñnie burr co grop xpëed ma. Pxob zho lar ne rbix zho lad xpëed ma, laa me bzob ma.

<sup>8</sup> Zigse zie me, no grê miech guizhiu co, rta zho lar ne rbix zho ro nêz rded burr ne zob me ga; nogaa zha ne rchoo nia grê yag nguia, rdziñ zhow ro nêz rded me.

<sup>9</sup> Grêse zho, zigtaa zha ne nera, zigtaa zha ne nala, nguiedz roptsie zho rnee zho:

—¡Golgotsaa co ne xviv xingan David! ¡Golgotsaa gleyne ne me! ¡Zha ndzontaa Dios, pxeel me men nroob qui lo ne!

<sup>10</sup> Zeene bdziñ me Jerusalén, rlozhd gzee zdoo grê miech ne ndxie ga, rnabdiidzlsa zho rnee zho:

—¡Bay cho nac men qui?

<sup>11</sup> Rquiab grê zha ne nal zhits me ga, rnee zho:

—¡Lëe Jesús i! ¡Lëe men Galilé qui, noteed xtiidz Dios lo miech!

*Blee Jesús miech len yadoo*

(Mr. 11:15-19; Lc. 19:45-48; Jn. 2:13-22)

<sup>12</sup> Biini liu co, zeene bdziñ Jesús Jerusalén stib, güey me yadoo nroob

ne zob lad guiedz co. Bdziñ me gon me nzian miech ne ndxie ga, masaque tib lgui quiayun zho, zha ne no wto, zha ne no wzi. Nacne güey me ptiixche me xmezha zha ne notsëe dimi, ptiixche me xmezha zha ne no wto palom; blee me zho ga grêse zho,

<sup>13</sup> rêb me lo zho:

—Led znu gon zhobnee lo Xtiidz Dios: “Zaatne nac lidz naa nu, nu none guiaad grêse miech sodiidznie zho naa.” Laa to gon, quiayun to lugar rii zig tib zhibliee ngbaan.

<sup>14</sup> Ga no me bdziñ bla zha ne rold lo, zla zha ne në ni, wbig zho lo me. Gzase zho beenguiac me.

<sup>15</sup> Nzian mëedlas yeen ne ndxie len yadoo ga, psilo win nguiedz rnee win: “¡Zha ndzontaa xingan rey David!”

Grê zha ne nac pxoz ne rnabey, ni grê maistr ley, zeene gon zho milagr ne been me ga, ni gon zho zha rnee grê mëedlas co, rlëe zho,

<sup>16</sup> rêb zho lo me:

—¡Pe ib rond luu ganle pe nonee grê mëedlas qui?

Pquiab me rêb me:

—Ron naaw. ¿To waa, pe rande to ganle zha zhobnee lo Xtiidz Dios, zaatne raquiet miñe noyac nu? Led rneew lëe:

Haxta grê mëedlas ne bii radz, ye win rley win roolnie win me.

<sup>17</sup> Blozhse sca rêb me, zoque zho ga, laa me bio nêz zie me nêz Betain. Ga blëz me wdze co.

*Wbidz tib yag guigw*

(Mr. 11:12-14, 20-33; Lc. 20:1-8)

<sup>18</sup> Sil co zeene no me nêz gdziñ me Jerusalén, pcaabedz me.

<sup>19</sup> Gon me zob tib yag guigw gax ro nêz, dzigo güey me güeyso me low dien pe ndziel tib nex low niow me. Bdziñ me gon me loxaque zhiblagsew zëeb, nacre rêb me low:

—¡Lëe blozh xtse luu nu gon! ¡Gdzindraa dze ne yquia nex lo luu!

<sup>20</sup> Biini liu, zeene laa zho zie Jerusalén stib, gon xpëedscuel me, laa yag guigw co bidzle. Bzee zdoo zho, bnabdiidz zho lo me rêb zho:

—¿Bui ganle, bay zha nacne squi znuse wbidz yag guigw qui?

<sup>21</sup> Pquiab me rëb me:

—Gneli naa lo to ganle, telne dib zdoo to rnalo to Dios, niicle ncuaane mazdraa ngañ gnab to lo me, zun mew. Lëëraasi none dib zdoo to gliladz to zaca, ni palal gacchopd guic to.

<sup>22</sup> Grëse ncuaane gnab to zeene rzodiidznie to me, zneedz mew, totsaque dib zdoo gliladz to laa to ycaaniaw.

<sup>23</sup> Bdziñ me Jerusalén, wbiire güey me len yadoo. Ga noseed me miech, zeene bdziñ bla zha ne nac pxoz ne rnabey ni zla zha ne nac men non lo mengüiedz, bnabdiidz zho lo me rëb zho:

—¿Cho dzigo nac luu ne squitaa ziaadnabey luu len yadoo? ¿Cho rnabey luu?

<sup>24</sup> Pquiab me rëb me lo zho:

—Ye naa laa naa gun tib wbnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuaane noyun naa.

<sup>25</sup> Golnë dien, ¿cho pxeel Juan Bautist biaad me pchoobnis me miech? ¿Pe Dios pxeel me, te miechsew ye?

Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee me?”

<sup>26</sup> Tel na dzieetsgaa ne, miechse pxeel Juan, grieequiadaque ne.

Rdzieb zho niab zho miechse pxeel Juan, sac nan mengüiedz nli Dios pxeel Juan biadteed Juan xtiidz me lo miech.

<sup>27</sup> Dzigo mazd mine been zho rëb zho lo me:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grieelod gni naa lo to cho rnabey naa quiayun naa grë min rii.

### *Zha nac zha ne rond diidz*

<sup>28</sup> 'Golquiaadiaga ganle. Tib mgui, quianie me chop mëëdbgui. Tib dzew, bredz me tib zho rëb me lo zho: “Xin,

none gon tsie luu nadze, tsietop luu uv xcuaa ne.”

<sup>29</sup> Pquiab zho rëb zho: “¿Gad naa!” Wdzeelaaw, bien zho nonguielda ga sca gun zho, dzigo bio zho nëz güey zho.

<sup>30</sup> Laa stib zho, zeene bredz me zho bnabey me zho tsie zho lo dziin, rëb zho: “Peet nacda, na maase ga naa.” Blozh ga pasë zho nie.

<sup>31</sup> 'Golnë dien, lo grop mëëd co, ¿cho nac zha ne bin xtiidz pxoz?

Pquiab zho rëb zho:

—Zha glo cow.

Dzigo rëbchaa me:

—Gneli naa lo to ganle, mincodaa quiayac nu niina: Grë zha ne rzac to mazdraa ngoopdol, zig nac grë zha ne rtop dimi ne razh lo zha Roma, zig nac grë wnaa ro nëz, mazd glole zha co nozëëb xnëz Dios, lëdle to.

<sup>32</sup> Biaadpaa Juan Bautist name biadseed me miech csaan zho xquielntseeb zho, gban zho zigne racladz Dios, ni pe liaadz to nion to mine rnee me. Mazd grë wnaa ro nëz, grë zha ne rtop dimi ne razh lo zha Roma, znuse psaan zho xquielntseeb zho. Laa to, niicle ran to nosaan grë zha co xquielntseeb zho, per ib rsaande to mine nac to.

### *Xcuent zha ne pquianap liu*

(Mr. 12:1-12; Lc. 20:9-19)

<sup>33</sup> Dzigo bzodiidz me stib cuent lo zho rëb me:

—Tib men name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieë, laa me zey zit.

<sup>34</sup> 'Zeene gol mëë ne laa nex co gol, pxeel me bla zha ne quia xtsiin me zie lo zha ne quianap liun me ga, parne gdeed zha co uv ne rieguial me ycaa me.

<sup>35</sup> Per lel bnaaz zho zho, zha ne blooqueie zho, zha ne bdeedgolp zho, haxta beet zho tib zho.

<sup>36</sup> Wbiire pxeel me zla zho, hor cole nzianraa zho pxeel me, per niapse sca psacsi zha co zho.

37 'Tibaque zeene pxeelaque me xpëed me, bza guic me rëb me: "Ganse zho xpëed naaw, zon zho mine gnee me."

38 'Pex nion zho diidz, zeene gon zho xpëed me, rëbcha zho: "¡Lëë zha qui nagon guiaanne liu rii! ¡Golgotsaa dziuut ne zho, zeena guiaana lo ne!"

39 Dzigo bnaaz zho xpëed me, güeynie zho me zaatne nac tib lad lo liu co, ga güeygut zho me.

40 '¿Zha sca dieñ rzac to gun bizhuan liu co gza zha co, zeene laa me gbire?

41 Pquiab grë zha ne nac pxoz ne rnabey, ni zha ne nac zha non lo menquiedz ga, rëb zho:

—Ni lalnu yquiad zdoo me zho, znitlogazh me zho. Lozhse ga, cuediinga me liun me lo zla zha ne gundziina, zha ne guien gdeed nex ne rieguial me ycaa me.

42 Dzigo rëbcha me lo zho:

—Haxta lo Xtiidz Dios no tib zaatne znu rnee, ¿pe gard ganle glab tow? Rneew:

Quie ne psëeb zha ne nozaa yu, ni nan zho lëepaa quie co nac mine rnazdziits yu.

¡Ncuane gzee zdoo new! Sac Dios bnabey sca goca.

43 'Gacnan to ganle, scadaa nagon grie to lad grë zha ne ngab lo Dios, parne gbig zha ne tsoxcopaa gun xtsiin me, zha cole guiaan xlugar to.

44 Zha ne tsietsobe lo quie ne raquiet ga, zac zho zig tib ncuane rac tson tap lë; laa tel lëegaaw tsoe lad zho, zac zho zig tib ncuane die die rac.

45 Grë zha ne nac pxoz rnabey ga, ni grë zha farisé, zeene blozh pquiaa-diag zho cuent ne bzodiidz me lo zho ga, bien zho zha ga rzeet me.

46 Nacne gocladz zho naaz zho me, per bdziebaque zho; sac ndal miech rleynie me, niicle ne rzac zho tib zha ne noteedse xtiidz Dios nac me.

## 22

*Zha ne nëd sëeb xnëz Dios*

1 Bzodiidz Jesús stib cuent lo zho, rëb me:

2 —Grë zha ne rbedz Dios ygab zho xnëz me, none tsoxco zho gon zho mine rnee me; sac nenda gdzieelo zho zig bdzieelo zha ne bredz tib rey co nie zho lo zhilni xpëed me.

3 'Tib rey name, ziaadyob ctsieelnia xpëed me, nzian zha ne bredz me tsie lo lni. Zeene laa dze co bdzin, pxeel me zha ne quia dziin lo me zietsedz grë zha ne bredz me lo lni ga, per nëd zho nienal zho.

4 Wbiire me pxeel me zla zho rëb me: "Goltsietsedz zho, golguiab, laa guielwagw ne yquii goclole, siguiel zho na guiaad zho."

5 Per ib beencasd zho zha ne pxeel me ga, no zho brie zie lo xcuaa, no zho brie zie zhiwto,

6 nogaa zho lel bnaaz zho zha co, psacsi zho zho, beet zho zho.

7 Zeene gon me sca been zho, blëe me, bnabey me grë xmenquib me güey zho güeygut zho grë zha ntseeb ne psacsi xmandad me ga, ni bnabey me bzëeg zho guiedz co.

8-9 Blozh ga biire pxeel me zla zho, rëb me: "Laa guielwagw rii goclole, mine naca goltsie tib nëz yu, zha ne gdzieeltaa to, golcuedz zho guiaad zho lo lni; sac grë zha ne bredz naa ga niaad, laa zho blule ganle rieguiald zho guiaad zho nu."

10 'Dzigo brie zho güey zho, miech ne bdzieeltaa zho, zigtaa zha ndzin-liw, zigtaa zha ntseeba, grëse zho bredz zho bdzinne zho zho lo lni. Gol hor wagw, biodzëse len yu ndxie miech.

11 Zeene laa rey bzëeb ziene me lo zho, gon me lad co no tib zha co nacwxabd zho zigne rieguial gacwxab zha ne sca rie tib lo guieltsieel.

12 Dzigo rëbcha me lo zho: "Bets, ¿pe nacne squise luu bzëeb luu nu, bui ganle nacwd luu lar ne bneedz zho niacw luu?"

'Dzese zob zho, rdziel zho pe guiab zho lo me. Gonse me sca rac zho,

13 bnabey me zha ne nodziib lo mezh rëb me: “Golxobdoo zha rii, golxidoo grop nia zho, grop ni zho, golcuae zho nu goltsieron zho lo ncow nëz ley. ¿Ga nac zaatne rieguiäl zho, ga gañ zho guielnëdox ne no ted zho, goonnë zho, haxta gow lay zho!”

14 ‘Minçodaa nagon rac len dze rii —rëb Jesús—, ndal zha ne racredz sëëb xnëz Dios, per zhis nac zha ne rioxco rzëëb.

*Pe nonguiel quizh miech contribucion*

(Mr. 12:13-17; Lc. 20:20-26)

15 Blalaa zha farisé ne ndxie ga güey zho bnediidz zho dien zha gungüet zho Jesús cxin me tib diidz, zeena min co yquiaaqui tsiezo zho me lo wxtis.

16 Dzigo pxeel zho bla zha ne nacgrë zho, ni güey zla zha ne racnie Herod gocgza zho. Bdziñ zho rëb zho lo me:

—Maestro, ndion no niapse diidzli zienäl luu, ni scagaa zeene rseed luu miech, rdziebd luu mine nac diidzli min co rnee luu lo zho.

17 Gane niina, racladz no gnë luu dien pe nonguiela ga rdeed no dimi ne razh lo rey ne zob Roma, te nonguiel da ye.

18-19 Bienga me racladz zho gungüet zho me, dzigo rëbcha me lo zho:

—¿Pe nan to na riend naa pe no guic to? Masaque rëb to na lëë, znuse gungüet to naa. Golneedz tib pes ne rguizh to nu ganle.

Dzigo bdeed zho tib pes plat lo me.

20 Blozh ga, rëbcha me lo zho:

—¿Cho nu, cho lë nu quia lo pes rii?

21 Pquiab zho rëb zho:

—Lëë rey i, lëë lë me i quia lo qui.

Dzigo rëb me lo zho:

—Mine rieguiäl sca ycaa rey, goldeeda lo rey; scaquegaa mine rieguiäl ycaa Dios, lo Dios goldeeda.

22 Zeene gon zho sca ptsire me lo xtiidz zho, bzee zdoo zho, mazd mine been zho laa zho wbichese ga, laa zho zey.

*¿Pe nli zrieeban miech?  
(Mr. 12:18-27; Lc. 20:27-40)*

23 Dze coquew, güey bla zha saducé lo Jesús. Nac zha saducé rliladz zho zdziñ dze grieeban miech. Dzigo bdziñ zho,

24 rëb zho lo me:

—Maestro, znu psan Moisés diidz: Telne glo mgui guet lo wnaa ne nac tsiel mgui, ni gopd wnaa mëëd, dzigo none betsaque zho ctsieelna wnaa co stib, zeena gap wnaa mëëd ne guiaan xlugar xpëëd zha ne gut ga.

25 ‘Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut biaand xpëëd zho. Dzigo ptsieelna stib bets zho wnaa co.

26 Blozh ga gutaque zha co, pa së zho nsan mëëd. Ptsieelnaque me stib zho, goc zho tson, niicle zha co psandaque mëëd. Sca sca haxta bza gza gadzse zho ptsieelna me,

27 tibaque zeene yeque me laa me gut.

28 Mine racladz no gacndion no, ¿chopaa dzigo gac tsiel wnaa co zeene laa zho grieeban? Sac gza gadzse zho ptsieelna me.

29 Pquiab Jesús rëb me lo zho:

—I nagon laa to rxin, mine naca riende to zha nac Xtiidz Dios, niicle rliladzde to zrieelo me gun me ncuaan ro ne gard gan miech.

30 Sac gon zeene gal dze ne laa grë miech grieeban, niicle mguiw niicle wnaaw led yedraa hor co dien cho ctsieelna zho; sac hor co laa zho gac zig nac grë anjl ne no gbaa.

31 Stiba, ib nli zrieeban mengut. Mod rande to zha zhobnee zaatne raquiet zeene rëb Dios:

32 “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Niicle ne gutle gza zha co hor co, per zeene sca bnee Dios gase rlu mban zho no zho lo me; sac tel Dios, ¡nacd me xDios mengut, sinque xDios zha mban nac me!

33 Grë miech ne ndxie ga, zeene gon zho sca ptsire me lo xtiidz zha saducé co, rzee zdoo zho.

*Xley Dios mine mazdraa non  
(Mr. 12:28-34)*



<sup>34</sup> Grë zha farisé ne ndxie ga, gon zho sca psioog Jesús ro grë zha saducé co.

Horco biire grë zha farisé co bzodidz zho stib.

<sup>35-36</sup> Lad zho no tib maistr ley, dzigo wbig maistr ley co lo Jesús, rëb zho:

—Maestro, lo grë xley Dios, bzhiguiel bnë lo naa dien, ¿pa min nac mine mazdraa non?

Sca rëb zho, sac gocladz zho niungüet zho me.

<sup>37-38</sup> Pquiab me rëb me lo zho:

—Lëë mine mazdraa non nu znu rnee: “Dib zdoo luu, dib xalm luu, dib guielbiini ne no guic luu, bleyne Dios, men nroob ne rnabey luu.” Lëew nac mine mazdraa non, ni lëew gloopaa raquiet lo grëse ley.

<sup>39</sup> No stib mine rnee: “Bleyne samiech luu zigne rleyne luu luu.” Ye min rii nona, meraque lala con min glo.

<sup>40</sup> Zha ne gban zigne rnabey grop ley rii, lëele grë ley ne psan Moisés ga, lëele grë zhiwseed zha ne biadteed xtiidz Dios ga, zienal zho.

*¿Cho xpëed nac Crist?*

*(Mr. 12:35-37; Lc. 20:41-44)*

<sup>41-42</sup> Gon Jesús nzian farisé ndxie lo me ga, nacne bnabdiidz me lo zho rëb me:

—¿Zha dien rzac to guiaad Men ne zëëble diidz ga cxeel Dios? ¿Cho lo xtii griequia me?

Pquiab zho rëb zho:

—Lo xtii David griequia me.

<sup>43</sup> Dzigo rëbchaa me lo zho:

—¿Pe scaw sca? Zha nac waa zeene bdeed Espíritu Sant guielbiini lo David bzeet David men co, rëb David me nac men ne rnabey David. Golgan ganle znu bnee David:

<sup>44</sup> Rëb Dios lo men ne rnabey naa:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csan naa zho ladz-  
nia luu.”

<sup>45</sup> Gase nagon telne nli zha xtii David gac Men ne cxeel Dios ga, ¿zha nac dzigo rnee David men co rnabey David?

<sup>46</sup> Ni tib zho ib bdzielz zho zha ntsire zho lo xtiidz me; desde dze co ni stib zho biazhdraa pe nabdiidz zho lo me.

## 23

*Mine nac maistr ley grë zho zha farisé*

*(Mr. 12:38-40; Lc. 11:37-54; 13:34-35; 20:45-47)*

<sup>1</sup> Dzigo psilo Jesús bnee me lo grë miech co, ni lo xpëedscuel me,

<sup>2</sup> rëb me lo zho:

—Grë maistr ley ni grë zha farisé ib lëë xtsiin zho ga, nac cseed zho miech zha nac ley ne psan Moisés.

<sup>3</sup> Golguien golgon xtiidz zho, ¿per nsin golso, ib gunde to mine run zho! Nac zho, ni lalnu rund zho mine rseed zho miech.

<sup>4</sup> Rio zho rnee zho lo miech, min rii, min rii rnabey ley gun to, ni per ni zha rioxcod zho siquier csilo zho gun zhow.

<sup>5</sup> ¿Grë ncuaane run zho, laaw runse zho par ganpaa miecha! Par guiab miech nguzobdiidz zho lo Dios, rio zho led zhid nzhen grë lo cint rquiaa zho Xtiidz Dios, rlozh ga rzhidoow yan nia zho, rzhidoow quia zho ne. Lar ne rbix zhow, rlozhd dieen peraa rquia lada, xab zhow, haxta zhits ni zho rbiba.

<sup>6</sup> ¿Zeene rbedz miech zho tib wagw nroob, rdziladz zho zhapaa rzob grol mezh, niicle len yadoogaaw, zaatne glupaa zha non nac zho, ga rzob zho!

<sup>7</sup> Ro nëza, rdziladz zho ndooladz gnee miech bdiuzh lo zho, zeene rnee miech “zha rac”, “zha non”, nac zho, rlozhd gley zho.

<sup>8</sup> 'Sangue to gon yguibde to dien zha gnee miech “zha rac” nac to, sac tibaque men rac no, lëë me ga zëëble diidz cxeel Dios; golguien ganle tel to lalga nac to, rriequia bets to grë to.

<sup>9</sup> Ib gunde to zig run grëraa miech, runnon zho tib samiech zho rnee zho lëë pxoz zho ga, sac tibaque men ne nac Pxoze to, lëë men co no gbaa.

<sup>10</sup> Yguibde to sac miech topaa gunctsin zho lo Dios, sac loxaque Men

ne nole diidz ga cxeel me, men cose zrieelo gunctsin zho lo me.

11-12 Nodne gacglaa to lo samiech to, mazd ndooladz golgac lo zho, sac zha ne racglaa, ziaanwin zho. Gacxe waa, telne racladz to gacnon to, none ndooladz gac to lo samiech to.

13 'iProbsaxe to maistr ley, probsaxe to zha farisé! Lëda i gon noyun to, rzac to noxco to sëeb miech xnëz Dios, per lel noca to sëeb zha ne racladz sëeb. Ni stiba, per ni to nod xnëz me.

14 [iProbsaxe to! Guielntseeb i gon run to, rio to rlozhd gool to xlay to rzo to ro nëz, ni noque to rla to ncuaane rapse grë wnaa viud; ib tedsod gon guielndëd ne ygaa to.]

15 iProbsaxe to, rzac to na lëew ga run to! Rio to gui dan rbix to, haxta rded to nisdoo, rquiaguib to dien cho sëeb xnëz to ni rlozh ga laa ne ygab zho nëz lo Dios, lel nëz len gabil zienie to zho.

16 iProbsaxe to, nac diidz name to noseed miech, ni per ni to riend pe rnee to! Rnee to lo miech: "Zha ne rzeet yadoo ni tel gund zho mine rnee zho, peet nacd ga, per tel gzeet zho grë or ne no len yadoo ni gund zhow, dol ga gun zho."

17 iNadzpaa nxen to, nadzpaa ncow nac guic to! iNiacxe mazdraa non or lo yadoo? Golguien ganle por yadoo, naclay grë or co.

18 Rneequa to: "Zha ne gzeet lo pcoog, led dolda telne gund zho mine rnee zho; per tel gzeet zho gon ne ndziib lo pcoog ni gund zhow, dol ga gun zho."

19 iPe nlipaa rnee to peet riende to! iNiacxe mazdraa dzigo non gon que lo pcoog? iPe rande to por lo pcoog co raclay gon?

20 Golguien ganle, zha ne rzeet lo pcoog, yele grë ncuaane ndziib low ga quiazeet zho;

21 zha ne gzeetgaa yadoo, haxta Diosle ga gon rzeet zho, sac ga rbëz me.

22 Scasaque zha ne gzeet gbaa, zaatne rzoble Dios ga nozeet zho, masaque rrieequia me ga rzeet zho.

23 'iProbsaxe to maistr ley, probsaxe

to farisé! Rzac to na demas nguzob-diidz to lo Dios, rio to haxta grë guizh bitxtil, guizh nizh, guizh comin run to tsi lal, rdeed to tib lala mine rieguial tsiesan to yadoo, laa ley ne mazdraa non zienied guic to gun to mine rnabeya. Nli rieguiala gdeed to grë gon co, per none scaque tsoxco to gun to mine nac diidzli, none yquia zdoo to samiech to, none dib zdoo to gnalo to Dios. Min rii nac mine mazdraa non.

24 'iNe nlipaa ib riende to pe quiayun to! Rzac to na noxco to gunctalde to xtol to, masaque ni tib ngurudz rsaande to tso lo ncuaane row to, ni riende to rrieequia haxta tib camell rab to.

25 iProbsaxe to, masaque nac to zig tib plat, zig tib tas ne nëz zhitssew mbe rna, laa nëz lena rnadraa! Laglaase rquiaalo to miech wen nac to, per tibaque noban to, tibaque nosacsi to samiech to.

26 Golguien none glo csaan to xquielntseeb to, none gac to zig tib plat zig tib tas ne zigtaa mbe nëz zhitsa, scagaa mbe nëz lena.

27 iProbsaxe to, nac to gon zig grë baa ne dieen paraa nquitsbie rna! Niow rlu nëz zhitsa, laa nëz lena loxaque grë ncuaan biodz, loxaque grë dzit ngutoo nodzë.

28 Sca gon nac to, ne rac to zootxe luu waa nli miech ndzinli nac to, per nëz len zdoo to loxaque zhgab ne dien zha yquidie to miech, zha csacsi to miech no to.

29 'iProbsaxe to maistr ley, probsaxe to farisé! Ni lalnu guielto guiend lo to, rio to rzhixcuaa to ro xpa grë zha ne biadteed xtiidz Dios, ni lëepaa grë pxozgol to beet zho. Dieen peraa run to rquiaalo to rsoladz to zho.

30 Rnee to: "Telne niaca mine nole ne len dze co, ndeete ne diidz nsacsi xmengol ne grë men rii."

31 iLëëque to gon nobeero ga, zha nactaa lo dii ntseeb ne ziaad to!

32 iScaque nasca golgun! iGoltsienal grë mine been pxozgol to ga!

33 iMiech ngoopdol! iZhin mendox! Telne csaande to xquielntseeb to i, ib tedsod gon gabil guey to.

<sup>34</sup> 'Grë zha ne cxel naa, zig nac zha ne guiadteed xtidz naa, zha ne nacnie Espíritu Sant, zha ne yгаа гуелбиини yquiaa zho mine gnabey Espíritu Sant zho, ib tedsod sacsí to zho. No zho gutgazh to, no zho yquiaa to lo cruz, no zho lëëque len xyadoo to gdeed yag to zho, ib gandzede to zho, stib guiedz, stib guiedz tso to ctsidil to zho.

<sup>35</sup> Blactaa grë miech ne sca peet xtold ziyut to grë xmengol to, psilow desde Abel haxta Zacarí xingan Berequí, men ne beet xmengol to zaatne nac gax lo pcoog len yadoo. Ni ye to gon zëeb xchen grëse zha co.

<sup>36</sup> ¡Gneli naa lo to ganle, grë miech ne gon mban len dze rii, grë to zho yгаа гуелñëdox ne tsieguial to por grëtaa guelñtseeb co!

<sup>37</sup> '¡Aque tow men Jerusalén! ¿Pe nacte squitaa nac to, rut to zha ne ziadteed xtiidz Dios lo to, rgoquie to grë zha ne rxeele me lo to? Blactaa gocladz naa, niacnie naa to, nquianaap naa to, zig run nguid rgueedz ma xpëed ma, per bzhiguiele to.

<sup>38</sup> Gacnan to sca ganle, nadzetaa gon laa lidz to nu guiaan ngan,

<sup>39</sup> sac gandraa to naa, haxta gal dze ne guiab to: "¡Zha ndzontaa men qui pxele Dios lo ne!"

## 24

*¡Nsin golso!*

*(Mr. 13:1-23; Lc. 17:22-24; 21:5-24)*

<sup>1</sup> Laa Jesús zieriee len yadoo grë xpëedscuel me, zeene pcuëezdze zho me, rëb zho:

—Gotsaa gwi ne ganle zha niaataa yadoo rii.

<sup>2</sup> Blozhse bui zho low, rëbcha me lo zho:

—Niicle squitaa nagon niaaw, per zdzin dze ne nitlow dib nacsew. Ni stib quie qui guiaandraa zigne squi zhobxcuaaw i.

<sup>3</sup> Brie me len yadoo ga grë me zho, laa zho zie nëz Gui Oliv. Bdzin zho cho gui co, ga bzob me grë me zho. Dzigo wbig gax bla zho lo me, bnabdiidz zho rëb zho:

—Bzhiguiele bnë lo no dien, ¿pa hor dzigo gac mine bzeet luu ga? ¿Zha glu zeene laa luu ziaadyoble guiaad? Zeene nitlogaa guidzliu, ¿zha gacdion no laa dze co ziaadyoble?

<sup>4</sup> Pquiab me rëb me lo zho:

—Nsin golso, zeena choot yquidiede to.

<sup>5</sup> Sac nzian zha ne griequia guiab zho zha nac Men ne zëeble diidz cxeel Dios; ni nzian miech ne yquidie zho.

<sup>6</sup> Zeene gon to nëzrii nëzrec noxtseeb csilo dil, guiabde to togo lëële dze ne guial naa ga bdzin; sac niicle noyacle dila, noxtseebragaa pa csilo gaca, led ledle ne nitlo guidzliu ga.

<sup>7</sup> Garaa csilo grë dildox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zhodox, nzian zaatne gan miech gbin.

<sup>8</sup> Ni lega loxaque mine rsilosew ga, sac nroobraa guelñë ne gan miech lozh ga.

<sup>9</sup> 'Zeene laa grë ncuaan rii noyac, ¡nsin golso! Sac hor co laa miech tsielo to ladznia zha ne csacsi to, haxta zut zho palal to, grëse miech stsidil zho to loxaque ne nac to zha ne no xnëz naa.

<sup>10</sup> Nzian zha ne nole xnëz naa, len dze co laa zho gbiche, laa zho csilo lëëque zha glëenie zha ne nacgrë zho, haxta zielo zho zho ladznia zha ne gut zho.

<sup>11</sup> Len dze co zriequia nzian zha ne yquidie miech guiab zho xtiidz Dios noteed zho, ni nzian zha ne gliladza.

<sup>12</sup> Grë zha ne nole xnëz naa, zeene gan zho grëtaa guelñtseeb, grëtaa dol ne quiayun miech len dze co, ndal zho gleyniedraa zho Dios dib zdo zho.

<sup>13</sup> Per zha ne tiblique gac, gbiched zho lo Dios, niicle tel petaa gan zho noyac, zha co gac zha ne gdzin lo me.

<sup>14</sup> Niicle scataa noyac grë ncuaan co, ib none ygaaz Xtiidz Ndzon Dios lo grëse miech, grëtaa zaatne ndxie miech laa zho gacnana; lozhraa ga dzigo laa guidzliu rii nitlo.

15 'Zeene gan to zaatne nac Lugar Nda len yadoo, zo tib ncuaane rieguiald so ga, tib ncuaane ziaad gnitlo, zigne bzeet Daniel men ne biadteed xtiidz Dios (zha ne glaba, none guien zho zha naca), hor co golguib dien zha xoon to.

16 Zha ne no grëraa guiedz ne ngab Judé, none xoon zho tsie zho dan, ga tsietsolan zho.

17 Zha ne lëëtaque hor co no glaa guic lidz, none lëëléd xoon zho, ib guiabd zho sëëb zho len yu tsiebee zho ncuaane rap zho.

18 Zha ne quiagaa lo dziin dan, ib gund zho tsie zho lad guiedz tsiexi zho xab zho.

19 ¡Prob grë men wnaa ne lëëtse len dze co zoney xpëéd, men ne quanie-gaa mëdyeen ne bii radz!

20 Golnab lo Dios gande to guielnë co len mëe ne rac nal, dze ne rdziiladz-gaa to lo dziin.

21 Ne nligaa guielnëdoxa. Wlal ne biaan guidzliu haxta lo nadze, gard gan miech tib guielnëdox sca, ni gandragaa zhow ted ga.

22 Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëëb xnëz me, gdeete me diidz gaca nroob dze.

23 'Zigne rne naa ga, len dze ne scataa gan miech grë dil co, zha ne gnë lo to: "Golte nu ganle, lëë Men ne nole cxeel Dios ga blanso nu", gnëgaa zho: "Goltsie nec ganle, laa me bdzin ga", gliladzde tow.

24 Sac zrieequia zha ne yquidie guiab zho zha nac men co, zrieequia zha ne guiab xtiidz Dios ziadteed zho lo miech, zun zho grë milagr nroob, parne yquidie zho miech, haxta zha ne nole xnëz Dios, zguib zho dien zha gdeeda diidz yquidie zho zho.

25 ¡Nsin sca golso! Benque laa naa nilew lo to.

26 Nligaa zha ne gnë lo to laa men ne pxeel Dios ga blansole, gliladzde tow. Nenda cxeel zho to tib dan zit, gnë zho: "Goltsie ganle laa me no ga", gnëgaa zho pa tib len yu ne no me, ni

tib xtiidz zho gliladzde to.

27 Sac zeen gal dze ne guiaad me stib, gacda ncuaan ngueets zhliaan, grëse miech gan me. Zig tel guiab tib belye nroob ne glu zhan gbaa, desde nëz ne rlan ngbidz haxta nëz ne rzëëb ngbidz, ¿niacxe gand grëse miecha?

28 Zlupaa zeene laa me guiaad; nanle to ganle zaatne nix ma gut, ga rcaalsa pech.

### Ziaad Jesús stib

(Mr. 13:24-37; Lc. 12:41-48; 17:26-30, 34-36; 21:25-33)

29 'Zeene lozhse gan miech grë guielnëdox co, laa lo ngbidz ycow, gzi-inidraa mëe. Grë mel ne ndziib gbaa, laa ma gliaal; grëraa ncuaane no gbaa, masaque nëzrii nëzrec gaca.

30 Horco zlu ganle zeene laa Mgui ne pxeel Dios ga, ziad-zëëb lo xcow con grë guielndzon, con grë poder ne rap me, grëse miech mban gac zho, zoon zho gan zho me.

31 Grë xanjl Dios, hor co laa Dios cxeel zho tsiecuedz zho zhitrompet zho parne ycaalsa grëse zha ne ngab xnëz me, tel pa lotaa lo guidzliu no zho.

32 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëe nëëg ziaadgaxle.

33 Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne guiaad men co ziaadgaxle.

34 Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca.

35 Zdzin dze ne nitlo gbaa, nitlo guidzliu, sangue mine rne naa lo to nu, nitloda; ible laaw none gac.

36 'Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda, loxaque Pxozse naa nana.

37-39 'Nanle to ganle zha bzhaac miech len dze ne wban Noé, ib bliladzde zho xtiidz me. Guxt no zho lo zhilni zho, zha ne notsieelna, zha



ne nobediingaa xpëed, laa dze bdzin laa Noé bzëëb len barcw; tibaque zeene biala zho biini laa guiedox co nonitlole zho. Scadaa nagon sac grë miech nad rii, tibaque zeene tsaa zho biini laa Mgui ne pxeel Dios ga ziaadle.

<sup>40</sup> Horco zaatne quia chop mgui lo dziin dan; tib zho tsienal zhits me, stib zho guiaan.

<sup>41</sup> Zaatne quiayot chop wnaa, tib zho tsienal zhits me, stib zho guiaan.

<sup>42</sup> 'iNsin sca golso, sac gon nande to dien pa horpaa guiaad me, benque laa vis racle lo to!

<sup>43</sup> Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw; i'niacxe zaaguies zho? Led sobna zho lëë, nsin nsin so zho.

<sup>44</sup> Scaque to nagon, none nsin so to, sac gon lega naclew zeen gan to laa me ziaadle.

<sup>45</sup> 'Golgan ganle, masaque laa to gac nagon zig tib ngundziin ne riaannie ro lidz men ne quia zho xtsiin.

'Ngundziin ne ndzinli, zeene laa men ne quia zho xtsiin ga gree, ine niowse guiaan zho guiaannie zho grëraa zha ne no lidz me.

<sup>46</sup> Zha ne sca gun, iwen tsie zho, sac zeene gbire me gan me scataa noxco zho dziin ne pso me zho, zianzuiu zho lo me

<sup>47</sup> haxta so me zho, zha yquiaanap grëse ncuane rap me!

<sup>48</sup> 'Tel ngundziin yozhgaaw, mine tsienie guic zho guiab zho gbireniobd men ne quia zho xtsiin ga,

<sup>49</sup> csilo zho csacsi zho grëraa zha ne nac ngundziin, csilo zho ctsieelsa zho grë ngonziu tso zho loxaque gzudz zho, loxaque gowcho zho,

<sup>50</sup> tibaque zeene gan zho laa me bdzinle.

<sup>51</sup> Zha ne sca gun, per peraa dien gun me, ib tedsod nroob caxtigw ne cteed me zho, sonëz me zho guey zho zaatne no grëraa zha ne rond diidz, ga tso zho grë zho zha co goonnë zho, haxta gow lay zho lo guielnedox ne ted zho.

## 25

### *Zha bzhaac tsii wnaa nguieg*

<sup>1</sup> Blozh ga rëbchaa Jesús lo zho:

—Par sëëb miech zaatne rnabey Dios, masaque naca zig rzëëb miech tib lo lni zaatne noyac tib guieltsieel.

'Tsii wnaa nguieg name, brie zho ziexinëz zho mgui ne ctsieelna, tib tib zho bise zho psin win ne rec nceit ne rziini.

<sup>2-4</sup> Gaay zho goc ligier pcodzë zho zhipsin zho nceit, ni zhaaque bi zho zniipa; laa zgaay zho gocnroladz, zigne bzheñse zho psin co scase bi zhow, bid zho nceit ne niodzëraaw.

<sup>5</sup> 'Goc pa hora rio zhimcaalo zho, ni rdzindaque mgui ne ziexinëz zho ga, tibaque zeen laa zho pquia mcaal.

<sup>6</sup> Gol grol guieela, zeen laa vis rac, laa mgui co ziaadle, zha ne ziexinëz me ga, zac gree zho tsiedzieel zho me.

<sup>7</sup> Lëëlëd brie mcaallo gza wnaa nguieg co, psilo zho nozhixcuua zho zhipsin zho.

<sup>8</sup> Zeene gon gza zha nroladz co ygaadraa zhinceit zho, dzigo bnaab zho lo zgaay zha co, gdeed zho niip nceit yquiiin zho, sac laa zhipsin zho noyuule.

<sup>9</sup> Pquiab zho rëb zho: “Grieeloda, sac mine yquiiinse zhipsin no ziaadnie no. Mazd goltsie zaatne rto zhow, ga goltsiexiw.”

<sup>10</sup> Per lo lal ne ziexi zho nceit, laa mgui co bdzin. Zeene wbire zho, laa ro yu nioogle, loxaque gza zha ne nsinle zo ga, zha cose bzëëb len yu.

<sup>11</sup> Dzigo psilo zho, rcaan nia zho ro yu, rbedz zho mgui co cxal me ro yu sëëb zho.

<sup>12</sup> Per bdeete me diidz nzëëb zho, rëb me: “Runbeyd naa to gon, nand naa dien cho nac to.”

<sup>13</sup> 'iNsin sca golso! —rëb Jesús—. Sac gon nande to pa dzepaa, pa horpagaa gbiire guiaad Mgui ne pxeel Dios.

### *Zha ne biaannie dimi*

<sup>14</sup> 'Mgui ne pxeel Dios ga, ziaad gac me zig tib men ne no gree tsie tib viaj zit.

'Tib men name no grie me tsie me tib guiedz zit, dzigo bredz me zha ne run dziin lo me, bdeed me palalga xtimi me lo zho gundziin zhow len dze ne guieñd me ga.

<sup>15</sup> Tib zho pcaania gaay mil pes plat, tib zho chop mila, stib zho pcaania tib mila. Tib tib zho, bdeedse me mine rgobey me grieelo zho gundziin zho, dzigo laa me brie laa me zie.

<sup>16</sup> 'Zha ne biaannie gaay mil pes plat co, güey zho bloonon zhow, beena gan zgaay mila.

<sup>17</sup> Zha ne biaannie chop mila, ye zho güey zho bloonon zho dimi co, scaque beena gan schop mila.

<sup>18</sup> Laa zha ne pcaania tib mila ga, lel güey zho güeyteen zho tib guieer güeyliu zhow.

<sup>19</sup> 'Goc bla iza laa men co bdziñ, dzigo bredz me zho tib tib zho, tsie zho gzodiidz zho dien yo dimi ne biaannie zho ga.

<sup>20</sup> 'Bdziñ zha ne pcaania gaay mil pes plat co, bdzinnie zho xtimi me, rëb zho: "Laa xtimi luu nu gon, lëe gaay mil pes ne psan luu lo naa nu, laa zgaay mil min rii nac mine bdzinaaw."

<sup>21</sup> Rley me rëb me lo zho: "¡Zha squi nagon racladz naa! Rley naa ran naa squitaa ndzinli luu, squitaa nguzobdiidz luu; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ¡Na bded, zeena yгаа luu grë guieñbley ne quiayac nu!"

<sup>22</sup> 'Blozh ga, bdziñaque zha ne biaannie chop mila ga, ye zho laa zho bdzinnie xtimi me, rëb zho: "Laa xtimi luu nu gon, lëe chop mil pes ne psan luu lo naa nu, laa schop mil min rii nac mine bdzinaaw."

<sup>23</sup> Pquiab me rëb me: "¡Squi nagon! Rley naa ran naa squitaa ndzinli luu, squitaa nguzobdiidz luu lo naa; sac gon lo palalse dimi ne psan naa lo luu ga, bioxco luu zaacse bendziin luuw. Nana gon, nroobraa mine gnedz naa gundziin luu. ¡Na

bded, zeena yгаа luu grë guieñbley ne quiayac nu!"

<sup>24</sup> 'Zeene bdziintaa zha ne biaannie tib mila ga, rëb zho lo me: "Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana;

<sup>25</sup> gane mazd bialoliu naaw. Tib mil naca bneedz luuw, ledaaw nu."

<sup>26</sup> Blëe guic me, rëb me lo zho: "¡Biche nu, paat rquiind naa miech yozh, miech nroladz ne squi nac! Conque nanle luu sca nac naa,

<sup>27</sup> ¿pex nac dzigo waa bioxcod luu maase mbediin luu dimi qui, ndzinaaw palal ncaania naaw niina?"

<sup>28</sup> Dzigo rëbcha me lo zha ne ndxie ga: "Niinagazh golcob tib mil pes qui lo zha qui, goldeeda lo zha ne ziaadnie tsiwi.

<sup>29</sup> Sac zha ne rioxco rundziin ncuaane rcaania zho, zacnroobraa ncuaane yquianie zho. Laa zha ne squi nac, haxta mine pcaaniale zho, zdiooba lo zho.

<sup>30</sup> Golxen zha yozh qui, goltsiesan zho lo ncow nëz ley. Ga gan zho guieñnedox ne tsieguial zho, ga goon zho haxta gow lay zho."

### *Zha gun Jesús guieñwxtis*

<sup>31</sup> Blozhse bzodiidz Jesús cuent co lo zho, rëbcha me:

—Naa ne nac naa Mgui ne pxeel Dios, zeen gal dze ne laa naa guial stib, zialnie naa grë xanj l naa, zlu grëtaa guieñndzon ne rap naa, laa naa sob lo xcan ne raguial naa soob naa.

<sup>32</sup> Grëse miech ne ndxie dibdoose lo guidzliu, hor co laa zho gacredz lo naa, laa naa cueextso zho zig rbeextso baxtor chiv lad xpëcwxiil zho.

<sup>33</sup> Zha ne no xnëz naa, zha co gdziñ naa cue naa nëz derech, laa zha ne nod xnëz naa, cue nëz revés.

<sup>34</sup> 'Lozhse ga, naa ne nac naa men ne rnabey, hor co laa naa cuedz zha ne no xnëz naa, guiep naa lo zho: "Goltë grëse to, to ne nac to zha ne nziuu lo Pxoz naa. Goltëd zeena ycaania to zaatne cuëz to, ible par to bzaa mew desde zeene bzaa me guidzliu.

<sup>35</sup> Sac zeene pcaabedz naa, bneedz to ncuaane dow naa; zeene bñab zhis naa, bneedz to ncuaane go naa; zeene bial naa ladz to, bneedz to lidz to blöz naa;

<sup>36</sup> zeene gon to guiend xab naa, bgacwxab to naa; zeene bzhacnë naa, zeene bio naa ladzguiib, biaad to bi-aadgan to naa.”

<sup>37-39</sup> See zdoo zho gnë zho: “¿Per pa hor bneedz no ncuaane doow luu, ncuaane go luu, pa hor bneedz no zaatne blöz luu, pa horgaa bneedz no lar ne gotxab luu, ib bdziond no nzhaacnë luu, bdziond no niogaa luu ladzguiib?”

<sup>40</sup> 'Dzigo guiep naa lo zho: “Gzob-taa hor ne gon been to xyudar zha ne nacgrë to, güeygan to zho, pcaaniagaa to zho, niicle zha ne bzoob miech peet nonda, rrieequia xyudar naa ga been to, rrieequia naa ga biaadgan to.”

<sup>41</sup> 'Laa zha ne ndxie nöz revés, hor co laa naa gzonöz zho, guiep naa lo zho: “¿Golbiche lo naa nu, miech ndzi-ibdee! ¿Golsë lo guidox ne rieguial to, zaatne no guey mendox grë xanj ma!

<sup>42</sup> Sac gon, bio dze pcaabedz naa ni bneedzde to ncuaane niow naa; bñab zhis naa, ni bneedzde to pe nie naa.

<sup>43</sup> Bial naa ladz to, ni bneedzde to zaatne mböz naa; gon to guiend xab naa, ni ni tib lë lar bneedzde to niacw naa. Bio naa ladzguiib, bzhacnë naa, ni pe liaadz to niaadgan to naa.”

<sup>44</sup> 'Squiab zho gnë zho lo naa: “Per pa hor bdzion no luu rcaabedz luu, rnabgaa zhis luu; pa hor bdzion no guiend pa cuöz luu, guiend lar ne gacw luu; pa horgaa bdzion no no luu ladzguiib, nixgaa luu rzacnë luu.”

<sup>45</sup> 'Dzigo guiep naa lo zho: “Grëse vuelt ne bzoliaadz to niun to xyudar zha ne no xnöz naa, bzoliaadz to niegan to zho niicle zha ne mazdraa wina, rrieequia naa ga sca been to.”

<sup>46</sup> 'Horco grëse zha co laa zho guey lo guidox ne gdziñdraa dze grieë zho; laa zha ne bioxco wban zigne rnabey naa, grëse zho laa zho ygaa tib guiemban ndzon ne gdziñdraa dze lozh.

## 26

*Bnediidz zho dien zha gnaaz zho Jesús*

(Mr. 14:1-2; Lc. 22:1-2; Jn. 11:45-53)

<sup>1</sup> Zeene blozh sca bnee Jesús lo grë miech co, dzigo rëbchaa me lo xpëedscuel me:

<sup>2</sup> —Nanle to ganle schopaque ng-bidz, laa lni Pascw csilo. Naa ne nac naa Mgui ne pxeel Dios, lo lni co gon gnaaz miech rii naa, tsielo zho naa ladznia zha ne yquiaa naa lo cruz.

<sup>3</sup> Grë zha ne nac pxoz ne rnabey, grë maistr ley ni grë zha ne nac men non lo men guiedz Israel, lëëtaque hor co laa zho ndxie lidz Caifás, men ne nac pxoz nroob.

<sup>4</sup> Laa zho ndxie ga, nonediidz zho dien zha grieelo gnaaz zho Jesús, gut zho me, per tib mod ne grieelod glisqui men guiedza.

<sup>5</sup> Rnee zho: “Lëëraasi choot gnabeyd ygaa me merpaa dze lni, zeena gacntseebd menguedz.”

*Pchoob tib wnaa nceit nex guic Jesús*

(Mr. 14:3-9; Jn. 12:1-8)

<sup>6</sup> Betain ga no tib men ne biac lo guiedz lepr, lë Simón. Lëëtaaque no Jesús lidz men co,

<sup>7</sup> zeene bdzin tib wnaa bdzinnie tiblo nceit nex, nosew tib len ncuaan win niaa niapse quie rbebni, tiblo nceit niazha. Squi zob Jesús lo mezh, güey wnaa co güeychoob me nceit co guic Jesús.

<sup>8</sup> Zeene gon xpëedscuel Jesús sca been wnaa co, blëë zho, rnee zho:

—¿Pa rieguiala squi pxin zhlë wnaa qui nceit qui!

<sup>9</sup> Tel niaca mine ndow, pe zhi-daa dimi ne nguizh zhow, nquiinpaa dimi co ngaaza lo grë zha ne guiend pe yquii.

<sup>10</sup> Gon Jesús sca rac zho, dzigo rëbchaa me lo zho:

—¿Pe nacne rlëë to lo wnaa qui? Golsaan me. Par naa nroob non mine been me i.

<sup>11</sup> Tel nli lëë racladz to gun to xyudar zha ne guiend pe yquii, zac ygad to lo zho stib dze, sac tibaque ran to

zho; sangue naa zhile laa naa gbiche lo to.

<sup>12</sup> Led pxin zhlöd wnaa rii zhincit me, sac gon rreequia laa me bzhixcuaale xcuerp naa nu gal dze ne ygueetsa.

<sup>13</sup> Gneli naa lo to ganle, dipse lo guidzliu zaatne cseedtaa miech Xtiidz Dios, ible soladz zho wnaa rii, seet zho mine been me nu.

*Güeyto Judas Jesús*  
(Mr. 14:10-11; Lc. 22:3-6)

<sup>14</sup> Lo gza tsiipchop zha ne nac xpëedscuel Jesús ga, brie zha ne lë Judas Iscariot güeyzodiidznie Judas grë zha ne nac pxoz ne rnabey,

<sup>15</sup> rëb Judas lo zho:

—¿Palal quizh to naa telne gun naa Jesús ntregar lo to?

Dzigo biaan zho diidz quizh zho Judas galptsii pes plat.

<sup>16</sup> Nacne psilo Judas noguib Judas dien zha gdeeda diidz csañ Judas me ladznia zho.

*Dowxtseenie Jesús xpëedscuel me*  
(Mr. 14:12-25; Lc. 22:7-23; Jn. 13:21-30; 1Co. 11:23-26)

<sup>17</sup> Mer dze ne rsilo lni Pascwa, len dze ne sca row zho quietxtil ne riotsd ncobi ga, bnabdiidz xpëedscuel Jesús lo me dien pa lo racladz me tsiegunlo zho ncuane gowxtseenie me zho wdze co.

<sup>18</sup> Dzigo rëbcha me lo zho:

—Nanle to ganle cho lidz zrieelo gdziñ ne. Goltsie Jerusalén golguiab lo zho: “Znu në xmaistr no: Gneedz luu lidz luu me dioow no xtsee Pascw rii. Niinataa laa xtse me bdziñ, gane racladz me lidz luu nu diowxtsee no nawdze grë no me.”

<sup>19</sup> Dzigo laa zho zie. Güey zho zaatne pxeel me zho ga, ga beenlo zho xtsee co.

<sup>20-21</sup> Wdze co, laa me no xtsee grë me zho, zeene bnee me lo zho rëb me:

—Gacnan to ganle, lëeque tib to gon tsielo naa ladznia zha ne gnaaz naa nawdze rii.

<sup>22</sup> Zeene bin zho sca rëb me, mbanse rac zho, dzigo psilo zho tibga tibga zho rnabdiidz lo me, rnee zho:

—Bnë dien, ¿cho gun min co? ¿Pe naaw?

<sup>23</sup> Pquiab me rëb me lo zho:

—Zha ne gan to csëeb xcuun len xquien naa, lëe zho ga.

<sup>24</sup> Naa ne nac naa Mgui ne pxeel Dios, niina laa miech gut naa zigne raquietsew lo Xtiidz Dios; per, ¡prob-saxe zha ne tsielo naa ladznia zho! ¡Mazd wen nie zho, ib niacd zho miech lo guidzliu!

<sup>25</sup> Yeze Judas rnabdiidz lo me rnee Judas:

—Maestro, ¿pe goon naaw ye?

Rëbcha me lo Judas:

—Luuw gon Judas, luu güeyto naa.

<sup>26</sup> Laa zho noyow, zeene bzhen Jesús tib quietxtil, bdeed me xquizh lo Dios, blozh ga beengrol mew, dzigo bdiiz mew lo zho, ni rëb me:

—Golquiina, lëe xcuerp naa i gon.

<sup>27</sup> Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo pteed me cop co lo zho grëse zho, rëb me:

—Golguie vin qui,

<sup>28</sup> sac lëe xchen naa i, mine no gzhiee par guiaanmbe grë miech lo xtol zho sëeb zho xnëz Pxz naa, sac lëe stib mod cub nu psañ me parne sëeb miech xnëz me.

<sup>29</sup> Lëe lultm vult nu guie naa vin rii, sac zhaale stib vin cub ne guie naa gal dze ne guenie naa tow zaatne rnabey Pxz naa.

Dzigo psilo me biilnie me Dios gza me zho.

*Bzeet Jesús zha gun Pedr*

(Mr. 14:26-31; Lc. 22:31-34; Jn. 13:36-38)

<sup>30</sup> Blozhse biilnie zho Dios, laa me brie ga gza me zho, laa me zienie zho nëz Gui Oliv.

<sup>31</sup> —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiiil.”

<sup>32</sup> Mincopaa nagon gun miech naa, per zeene laa naa grieaban glole naa ga Galilé, ga cuëz naa to.

<sup>33</sup> Dzigo rëbcha Pedr lo me:

—Niicle telne saan grë zha qui luu, sangue naa gon csaand naa luu.



34 Pquiab me rëb me lo Pedr:

—Gneli naa lo luu ganle, guieel riigazh, gardle ycuedz gall, laa luu csale tson vuilt guiab luu runbeyd luu naa.

35 Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa xpëëdscuel me.

*Bzodiidznie Jesús Pxoze me Getsemani*

(Mr. 14:32-42; Lc. 22:39-46)

36 Zeene bdzinnie Jesús zho zaatne lë Getsemani, dzigo rëbchaa me lo zho:

—Nuse nagon golsob, laa naa ga gazodiidznie naa Pxoze naa.

37 Horco psilo mban rac zdoo me, riabguieñe me, dzigo bredz me Pedr, ni grop xingan Zebedé, bzënie me zho palal

38 dzigo rëbchaa me lo zho:

—Mban rac zdoo naa, zootle zig zet naa lo guieñe rii. Nuse nagon golguiaan, per golsobna.

39 Bzë me spalal, dzigo pquiitsgzhib me haxta bdzin lo me lo liu; psilo me bnab me lo Dios, rëb me:

—Papá, laa naa rnab lo luu, telne zala zdoo luu, bzhiguiel psilaa naa lo grë guieñe rii. Min rii rnab naa lo luu, per telne grieeloda, mine gnëtaa luu, min co gac.

40 Zeene guso me, güey me zaatne biaan gza tson zha co, gon me laa zho nixguiesle; dzigo rëbchaa me lo Pedr:

—¿Pe ni palal blëbde to nzobna to?

41 Golsobna, golvab lo Dios zeena yquiild mendox to. Niicle ne squi lëbdraa xcuerp to sobna to, per golvab lo Dios, sac gon min co nac mine racladz zhiespíritu to.

42 Dzigo güey me stib, güeyzodiidznie me Dios; scaque mine bnab me glo mincoque bnab me.

43 Zeene wbiire me bdzin me lo zho, gon me laa zho nixguieslaque, sac lëbdraa zho mcaal.

44 Wbiire güey me güeynab me lo Dios, scaque mincoque bnab me.

45 Zeene laa me wbiretaa bion vuilt co, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Mgui ne pxeel Dios, laa hor nagon bdzin zeene laa grë miech ntseeb rii guiadnaaz naa.

46 Golsieso, zeena zio ne; sac gon laa zha ne glu naa lo zho ziaadle nu.

*Bnaaz zho Jesús*

(Mr. 14:43-50; Lc. 22:47-53; Jn. 18:2-11)

47 Laa Jesús bii quianeeque, zeene laa Judas (tib zha ne nac xpëëdscuel me) bdzin, bdzinnie Judas tib dzoon zha ne pxeel grë pxoze ne rnabey, ni grë zha ne nac zha non lo men guiedz Israel. No zho nzhen spad, nogaa zho nzhen yag.

48 Biaaniele Judas zho diidz zha glu Judas cho nac Jesús, rëb Judas lo zho zha ne gan zho gow Judas bzhid cuas, lëe me ga, ligier so zho gnaaz zho me.

49 Zigne bdzin Judas pquiaabdiuzh Judas me, blozhse ga wbig Judas dow Judas bzhid cuas me.

50 Dzigo rëbchaa me lo Judas:

—Judas, ¿pe ziaadgun luu nu?

Lëelëd wbig be grë zha co, bzhen zho me.

51 Horco biet tib zha ne rzënie me ga, bdoob zho zhispad zho psilaa zho tib niaw, bliengaa zho diag tib zha ne rquia xtsiin men ne nac pxoze nroob.

52 Dzigo rëb Jesús lo zha ne pquiaaw ga:

—Blootsow zhispad luu, ib gundraa luu squi cob luuw. Sac gon zha ne rdil con spad, noxtseeb ne low guet zho.

53 ¿Niacxe nan to na grieelod gnab naa lo Pxoze naa niina cxeel me tsiip-chop partid xanj me guiaadla ne nu?

54 Per telne sca gun naa, ¿zha dzigo gac mine zhobnee lo Xtiidz Dios, zaatne raquiet mine noyac nu?

55 Dzigo rëbchaa me lo grë zha ne bdzin ga:

—¿Pe nacne squitaa rac to? ¿Niacxe naa cho zha ntseeb, ne squitaa nzhen to spad, nzhen to yag ziadnaaz to naa? Blactaa name gon to noseed naa

miech len yadoo, ¿pe nacne bnaazde to naa ga?

<sup>56</sup> Per ible laa grë ncuaan rii gon noyac, zeena grieequia grë mine bzeet grë zha ne biadteed xtiidz Dios lo miech padzeela.

Horco grëse zha ne nac xpëedscuel me laa zho bzhooñ, tipse me psan zho ga.

*Güeynie zho Jesús lo zhiwxtis zha Israel*

(Mr. 14:53-65; Lc. 22:54-55, 63-71; Jn. 18:12-14, 19-24)

<sup>57</sup> Ga brieenie zho Jesús bdziñnie zho me lidz Caifás, men ne nac pxoz nroob. Grë zha ne rnabey lo menguiedz Israel, laa zho ndxiele ga.

<sup>58</sup> Ye Pedr maase zit zit nañ Pedr laa Pedr bdziñ xley men co. Bdziñ Pedr güeysobga Pedr lo grë zha ne ndxienap, quiambëz Pedr dien zha gun zho Jesús.

<sup>59</sup> Grë pxoz ne rnabey, grë zha ne nac zha non lo menguiedz, grëse zha ne nac wxtis, laa zho ndxie nëz len yu co, quiaguib zho zha ne gzhixcuaa maase diidzguizh ycaadz zho Jesús, parne gdeeda diidz gnab zho guet me.

<sup>60</sup> Ndal zha ne sca been, per brieequiad xtiidz zho, sac zhaase zhaase rnee zho. Tibaque zeene guso chop zho,

<sup>61</sup> rëb zho:

—Bdzion no gon rnee me laa me ctixche yadoo ne zob lad guiedz nu, zaatne riodzian ne Dios, lozh ga tsonaque ngbidz gzaalo me stiba.

<sup>62</sup> Dzigo hor co bzoli men ne nac pxoz nroob, rëb me lo Jesús:

—¿Pe nacne rquiabd luu? ¿Pe nli sca rnee luu, te nñida ye?

<sup>63</sup> Gon pxoz nroob co rquiabdaque Jesús, rëbcha me:

—Zig zob Dios mban ne no gbaa, laa naa rnab lo luu bneeli lo no dien cho nac luu. Bnë tel nli Xpëed Dios nac luu, Men ne zëëble diidz ga cxeel me.

<sup>64</sup> Dzigo pquiab Jesús rëb me:

—Scaw gon, naa nac men co. Naa ne nac naa Mgui ne pxeel Dios, bii zan to ganle zeene laa naa zoob cue Dios

nëz derech, ni zeene laa naa guieet gbaa zialzëëb naa lo xcow.

<sup>65</sup> Horco ptsiez pxoz nroob co xab me, sac blëë me bin me sca rëb Jesús.

—¿Pe mazdraa textigw ne racladz ne? —rëb me—. Laa to binle ganle zha rzëtaa xtiidz me noguitnie me Dios.

<sup>66</sup> Nana waa, ¿pe gnë to zha dziuun ne me?

Pquiab be zho rëb zho:

—ñb rieguial guet me!

<sup>67</sup> Dzigo hor co psilo zho nosacsi zho me. Zha ne rtsuc lo me, zha ne rdeed puñet me, nogaa zho rgap lo me,

<sup>68</sup> rlozh ga rzhidznie zho me rnee zho:

—Luu ne nac luu men ne pxeel Dios, ¿bnë dien cho ga bdiñ luu?

*Rëb Pedr runbeyd Pedr Jesús*

(Mr. 14:66-72; Lc. 22:56-62; Jn. 18:15-18, 25-27)

<sup>69</sup> Horco laa Pedr bii zob nëz ley. Ga zob Pedr, güey tib ndzooop ne quia dziin lidz men rnabey co; rëb ndzooop lo Pedr:

—¿Ye luu lëë rzënie Jesús, men Galilé ne bdziñnie zho i?

<sup>70</sup> Per bneelid Pedr. Squi zob grë zha co, rëb Pedr:

—Riend naa dien cho men rnee luu.

<sup>71</sup> Laa Pedr ziele nëz ro puert ne quia ro nëz, zeene gon stib ndzooop ne rquia dziin ga Pedr, rëb ndzooop lo zha ne ndxie ga:

—Ye mgui qui gon nacgrë men Nazaret ne bdziñnie zho i.

<sup>72</sup> Scaque bneelid Pedr, haxta rzeet Pedr Dios rëb Pedr runbeyd Pedr me.

<sup>73</sup> Wdzeepaaw, rëb zha ne ndxie ga lo Pedr:

—Ne nligaa ye luu rzënie men ne bdziñ i. ñRlupaa name zig rnee zha nëz Galilé rnee luu!

<sup>74</sup> Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—Dios zobwi ganle, telne led diidz lidz nu rne naa, maase cuibdee naa.

Loxaque blozh sca brie ro Pedr zeene laa tib gall pcuedz.

<sup>75</sup> Horco psoladz Pedr xtiidz Jesús zeene rëb me lo Pedr: “Gardle ycuedz gall, tsonle vuilt rëb luu runbeyd luu naa.” Dzigo mbanse rac Pedr. Briece Pedr ga, psilo Pedr biin Pedr guielnë co.

## 27

<sup>1</sup> Ziadyiinile liuw, wbiire pcaalsa grë pxoz rnabey, grë zha non lo menquiedz, bnediidz zho dien zha gnabey zho guet Jesús.

<sup>2</sup> Blozhse bzodiidz zho, dzigo laa zho bzobdoo me blee zho me ga ziesan zho me lo Pilat, men ne nac gobernador.

### Gut Judas

(Mr. 15:1; Lc. 23:1-2; Jn. 18:28-32)

<sup>3</sup> Laa Judas Iscariot zha ne pto Jesús ga, zeene bin Judas laa zho rnab guet me, lëëlëd güey Judas lo grë pxoz rnabey co, lo grë zha non lo menquiedz ga, zietsire Judas dimi ne bdiizh zho Judas ga. Mban rac Judas,

<sup>4</sup> bdzin Judas rëb Judas lo zho:

—Naraa rien naa lëda nu ben naa. i Tib dol nrooble nu, znu bialto naa tib men ne peet xtold!

Pquiab zho rëb zho:

—i Mincotaa gon ndiond no! i Xcuentzhe luu ga!

<sup>5</sup> Horco pchel Judas dimi co len yadoo. Lo guielnë co briece Judas ga güey Judas lëëque Judas pxiiyan Judas.

<sup>6</sup> Grë zha ne nac pxoz rnabey ga, güey zho ptop zho dimi co. Per blozh ga, rien zho dien zha gun zhow.

—i Zha dziuun ne dimi rii? —rëb zho—. Telne guiaana yadoo, per rdzieelda, sac gon xchen tib miech bdzëw.

<sup>7</sup> Dzigo bzodiidz zho dien zha gaca, nacne mazd pquiin zhow bzhii zho tib lë liu, zaatne rdieen yu ne rias grë ncuuan psin ne rquiin; parne lo liu co ygueets grë zha zit ne guet Jerusalén.

<sup>8</sup> Nacne brieelë liu co “Liu ren”, ni sca runbey zhow len dze rii.

<sup>9-10</sup> Ga brieequia mine bzeet zha ne biadteed xtiidz Dios padzeela, zeene rëb zho: “Galptsii pes plat ne bzhii zha Israel men nziuu co, dimi co bzhii zho

tib lë liu, zaatne rdieen yu ne rias grë ncuuan psin ne rquiin. Sca në Dios lo naa.”

### Bnab zho guet Jesús

(Mr. 15:2-20; Lc. 23:3-5, 13-25; Jn. 18:33-19:16)

<sup>11</sup> Bdzinnie zho Jesús lo Pilat, ga bnabdiidz Pilat lo Jesús rëb Pilat:

—Bnë dien, ipe nli luu nac zhirey zha Israel?

Pquiab me rëb me:

—Nliw.

<sup>12</sup> Grë zha ne nac pxoz rnabey ga, ni grë zha ne nac zha non lo menquiedz, rzadraa ncuane rquiaqui zho me; per ni tib diidz rtsired me lo zho.

<sup>13</sup> Dzigo rëbcha Pilat lo me:

—i Pe nacne rquiabd luu? i Pe ib rond luu grëta ncuane rquiaqui zho luu i?

<sup>14</sup> Bzee zdoo Pilat gon Pilat, ible rquiabd me.

<sup>15</sup> Gzobse iz, zeene ral lni Pascw rnabey Pilat rlaa tib zha ne no ladzguiib, zha ne gnabtaa menquiedz laa.

<sup>16</sup> Len dze co no tib zha ntseeb ladzguiib lë Barrabás, zëeb xtiidz zho.

<sup>17</sup> Nacne rëb Pilat lo grë zha ne ndxie ga:

—i Cho racladz to csilaa naa? i Pe silaa naa Barrabás, te silaa naa Jesús ye, men ne nac diidz pxeel Dios lo to?

<sup>18</sup> Sca rëb Pilat sac bien Pilat lox- aque porne ndal miech nobig lo Jesús min co ne rlëenie zho me, bnabey zho bgaa me.

<sup>19</sup> Laa Pilat zob lo xcan ne run me guielwxtis, zeene bdzin tib mandad rëb lo me:

—Znu në tsieel luu: bzhiguel me peet gund luu men qui, rlu peet xtold me; sac nieewdze me nroob ptseb mcaal tsieel luu.

<sup>20</sup> Grë zha rnabey co, bio zho pquiil zho menquiedz gnab zho csilaa Pilat Barrabás, ni gnab zho guet Jesús.

<sup>21</sup> Zeene wbiire Pilat bnabdiidz Pilat stib, dien chopaa racladz zho laa, grëse zho nguiedz pquiab be zho, rëb zho:

—i Barrabás psilaa!

<sup>22</sup> Dzigo rëbcha Pilat:

—Men ne waa nac diidz pxeel Dios lo to nu, ¿zha guñ naa me?

Pquiab zho rëb zho:

—¡Bnabey yquia me lo cruz!

<sup>23</sup> —¿Per pe nacne yquia men rii lo cruz? —rëb Pilat—. ¡Ni tib dol rapd me!

Biireque zho nguiedz roptsie zho rnab zho yquia me lo cruz.

<sup>24</sup> Gonse Pilat rquiaadiagd zho xti-idz me, lel mazdraa rac zho, dzigo bnab me nis, squi ndxie zho bdiib me nia me, rëb me lo zho:

—¡Nanle to nasca, led xtoldraa naa nu ne laa xchen men rii gzhiee, sac nanpaa naa peet falt rapd me!

<sup>25</sup> Pquiab be zho rëb zho:

—¡Peet nacd ga! ¡Zhits no grë xpëed no cuib dol co, na no guiotizha!

<sup>26</sup> Dzigo bnabey Pilat blaa Barrabás, laa Jesús racse me bnabey me zha ne bdiñ Jesús, blozhse ga laa me psañ Jesús lадznia menquiib ne tsiequiaa me lo cruz.

<sup>27</sup> Biire grë menquiib co bzëebnie zho me nëz len yulow, ga pcaalsa grëraa menquiib ne nacgrë zho, brin zho igose me.

<sup>28</sup> Blee zho xab me, bgacw zho me tib lar nizhnie nlaan, zig rna lar ne racw grë rey,

<sup>29</sup> bzieecw zho bla lë yag guiets, bzoob zhow guic me zig rzob coron guic zha ne nac rey, ni bloo zho tib lë goobgui nia me. Runnguzee zho me, rquiitsgzhib zho lo me, rnee zho:

—¡Golwi ganle zha ractaa zhirey zha Israel!

<sup>30</sup> No zho rtsuc zho lo me, rgob zho goobgui ne no nia me ga, rdeed zhow guic me.

*Güeyquiaa zho Jesús lo cruz*

*(Mr. 15:21-32; Lc. 23:26-43; Jn. 19:17-27)*

<sup>31</sup> Blozhse sca bdziitnie zho me, blee zho lar nizhnie co lad me, bgacw zho me xab me stib, dzigo laa zho brienie me ga zienie zho me zaatne yquia me lo cruz.

<sup>32</sup> Nëz zienie zho me bdzieel zho tib men Ciren lë Simón, bnabey zho men co bi me zhicruz me.

<sup>33</sup> Zeene bdziñ zho zaatne nac “Gui Beerguic Ngutoo” (Gólgota),

<sup>34</sup> ga bdeed zho nziu lo me notsa tiblo guizh nlayag, per zeene pquiaaro mew bien me nziu cow, bnëd me nie mew.

<sup>35-36</sup> Blozhse pquiaa zho me lo cruz, bzhen zho tib xab me pchug zhow bi-aannie zho tib lëgaw, laa stiba bio zho rif; dzigo laa zho bzob ga, bzobnap zho.

<sup>37</sup> Guic zhicruz me, ga pquiaa zho bla lan diidz zaatne rnee: “LËË JE-SUS NU, MEN NE NAC ZHIREY ZHA ISRAEL.” Sca pquiaa zho, sac minco pquiaqui sca pquiaa zho me lo cruz.

<sup>38</sup> Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me.

<sup>39</sup> Grëse miech ne rdedtaa ran zho laa me quia ga, rzhidznie zho me, haxta rdzi zho guic zho

<sup>40</sup> rnee zho lo me:

—Led rëb luu lëe laa luu ntsil yadoo, ni tsonaque ngbidz nzaalo luu stiba, ¿pe nac dzigo rriee lod luu guieet luu i? Telne nli Xpëed Dios nac luu, biet lo qui.

<sup>41</sup> Scaque grë pxoz rnabey, grë maistr ley, grë zha farisé ni grë zha ne nac zha non lo menquiiedz, rzhidznie zho me, rnee zho:

<sup>42</sup> —Stib miech scataa beenquiic me, stib miech scataa bla me, ¿pe nac dzigo rriee lod me gla me me? ¡Goon me name nac zhirey ne, quiet me i sca zho; zeena dziuunbey ne men rnabey nac me!

<sup>43</sup> ¡Conque tant rnalo me Dios, haxta rnee me Xpëed Dios nac me, guiaad-silaa Dios me i nazho!

<sup>44</sup> Ye ngbaan ne quiagza me lo cruz ga, mincoque rbidzgo zho lo me.

*Gut Jesús*

*(Mr. 15:33-41; Lc. 23:44-49; Jn. 19:28-30)*

<sup>45</sup> Zig groł dzew, tibaque zeen goc tib ncow dipse lo guidzliu, haxta las tres biala biini stib.

<sup>46</sup> Horco nguiedz zëeb tsi Jesús, rnee me:

—Elí, Elí. ¿Lama sabactani?



Diidz co nac zig nac ne rnee ne: Luu nac xDios naa, luu nac xDios naa. ¿Pe nacne psaan luu naa?

<sup>47</sup> Zha ne ndxie ga, zeene bin zho sca rbedz me, no zho rëb Lí, men ne biadteed xtiidz Dios padzeela, men co rbedz me.

<sup>48</sup> Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

<sup>49</sup> Laa zla zho rnee:  
—Psaan, nu dzian ne dien pe ziaad Lí guiaadlit Lí me i.

<sup>50</sup> Tibaque zeene pquiaa me stib redz nroob, znuse blozh me.

<sup>51</sup> Horne nolozh me ga, hor co briez nzoli lar nroob ne quia len yadoo, groltaa goca; psilo bni tib zhodox, grë quie masaque wbiła,

<sup>52</sup> nzian ro baan grë zha ne bnalo Dios mazd padzeela bzhial.

<sup>53</sup> Zeen gol dze ne brieaban me, ye zho laa zho brieaban, brie zho len baa, bzëeb zho lad guiedz; nzian miech ne gon zho.

<sup>54</sup> Grë menguiib ne quianap me ga, ni zha ne rnabey lo zho, zeene gon zho bni zho co, ni gon zho grë ncuaane goc ga, per nli bdzieb zho.

—iNe nlipagaa —rnee zho—, Xpëed Dios nac men qui!

<sup>55</sup> Nzianlaa men wnaa, zit zo zho rwi zho. Lëe grë men wnaa co güeynal zhits Jesús, been zho xyudar me dipse len dze ne pseed me miech, desde dze ne psilo me nëz Galilé.

<sup>56</sup> Lad co no Marí Magdal, Marí tsiel Zebedé, ni Marí ne nac xniaa Jacob gon José.

### *Bgueets Jesús*

(Mr. 15:42-47; Lc. 23:50-56; Jn. 19:38-42)

<sup>57-58</sup> Zhile sëeb ngbidza, zeene bdziñ tib mgui lë José lo Pilat, bnab me diidzbey tsielit me xcuerp Jesús lo cruz; tib zha ricwa, men guiedz Arimaté nac me, ye me zienal zhiwseed Jesús. Nacne pxeel Pilat diidz lo zha ne quianap Jesús ga, parne siguiel zho glit José me lo cruz.

<sup>59</sup> Dzigo güey José. Blozhse blit José me lo cruz, laa José neyle tib lë lar cub, pchel José me lar co,

<sup>60</sup> güeyxob José me tib len baa ne nacchen José ndieen tib cho quie gax ga; tib baa cuba. Blozhse bdzig José tib quie nroob bioog ro baa co, laa José zey.

<sup>61</sup> Laa Marí Magdal bii biaan ga, grop me stib Marí ne nacgrop me ga; zobse zho gax ro baa co.

<sup>62</sup> Biini liu co, pcaalsa grë pxoz rnabey, grë zho zha farisé, güey zho lo Pilat,

<sup>63</sup> rëb zho:  
—Gon luu dispensar, laa no zi-aadaque lo luu stib. Naraa rsoladz no, len dze ne bii mban men ntseeb ne sca biaadquidie miech ga, rëb me, zeene gac tson ngbidz guet me laa me grieaban.

<sup>64</sup> Gane ziaad no lo luu, bzhiguiel pxeel zha ne yquiaanap ro baan me haxta gac tson ngbidz co; sac nend tsie zha ne nac xpëedscuel me tsiebee zho me, lozh ga guiab zho laa me brieaban. Nanle luu ganle, tel gac min co, cho gnë peraa gzhixcuaa zho.

<sup>65</sup> Dzigo rëbchaa Pilat lo zho:  
—Telne sca racladz to, laa tib partid menguiib ndxie i. Goltsienie zho, golguiab lo zho yquiaanap zhow tel zha racladz to.

<sup>66</sup> Dzigo laa zho zie zienie zho grë menguiib co. Bdziñ zho bloo zho tib bey cho quie ne nioog ro baan Jesús ga, par glu tel cho zha ne tsiegaala, ni biaan grë menguiib co yquiaanapa.

## 28

### *BRIEEBAN JESUS*

(Mr. 16:1-8; Lc. 24:1-12; Jn. 20:1-10)

<sup>1</sup> Zna dze goc dze ne rdziiladz zho lo dzin ga, biini liu, dze ne rsilo zhmal, silgaw zie Marí Magdal grop me stib Marí co zieso zho ro baan Jesús.

<sup>2</sup> Lëëtaaque hor co bni tib zhodox, lo zho co biet tib xanj Dios gbaa bdoob me quie nroob ne nioog ro baa co, bdiix mew tib lad, bzobga me lada.

<sup>3</sup> Masaque rlu me zigne rlu belye, xab mew, nquitsbie rnaw, zig rlu za-atne ndxie guieg.

<sup>4</sup> Grë menguiib ne quianap ro baa ga, zeene gon zho anjl co, per nli

bdzieb zho, rzhidz zho. Lo dzeb co, pcowgazh zho, grëse zho biab liu.

<sup>5</sup> Zeene laa grop wnaa co bdziñ, rëbchaa anjl co lo zho:

—Gdziebde to. Nanle naa Jesús men ne pquiaa zho lo cruz ga, men co ziaadguib to.

<sup>6</sup> Per guienle me nu, jlaa me brieebanle zigne bneele me ga! Golwi ganle nu nac zaatne pxob zho me.

<sup>7</sup> Niinagazh goltsie goltsienie diidz lo xpëedscuel me, golguiab lo zho laa me brieebanle. Galilé me cuëz me zho, ga gan zho me. Laa to nanlew nasca.

<sup>8</sup> Lëëlëd brieegrop wnaa co ga, rias zho laa zho zienie diidz lo xpëedscuel me; lala rdzieb zho, ni lala rley zho.

<sup>9</sup> Laa zho zie, tibaque zeene gon zho laa Jesús zole lo zho, ine pquiaabdiuzh me zho. Horco wbig zho pquiitsgzhib zho lo me, bdeedz zho ni me.

<sup>10</sup> Dzigo rëbchaa me lo zho:

—Gdziebde to. Goltsie goltsienie diidz lo grë zha bets naa, golguiab lo zho tsie zho Galilé, ga gan zho naa.

<sup>11</sup> Horcoraa laa bla zhaguiib ne pquianap ro baan Jesús ga bdziñ lad guiedz. Güey zho lo grë pxoz rnabey, bzodiidz zho zha gon zho bzhal ro baa co.

<sup>12-13</sup> Dzigo pcaalsa grë pxoz co grë zho zha ne nac zha non lo menquiedz, dien zha gun zho. Nacne biaan zho diidz, mazd gdeed zho dimi lo grë menquiiib co, parne gneelid zho, sinque guiab zho, segur xpëedscuelaque me güeybee me len baa, per biend zhow sac nixguies zho. Nroob dimi bdeed zho lo grë menquiiib co,

<sup>14</sup> rëb zho:

—Peet tsienied guic to, niicle telne gon gobernadora na no guionee lo me, zeena peet gund me to.

<sup>15</sup> Dimi co pcaania zho, dzigo laa zho psilo pxoon diidz co zigne rëbse grë zha co lo zho. Grë zha Israel ne bina len dze co, masaque biladz zho nli sca goca, jni haxta lo nadze sca zienie guic zho!

<sup>16</sup> Zeene bdziñ dze ne gdieelo Jesús xpëedscuel me nëz Galilé, brieegza

tsiibtib zha ne bzo gaxpaa lo me ga, güey zho nëz co; bdziñ zho guic gui ne rëble me ga gdieelo me zho.

<sup>17</sup> Zeene gon zho me pquiitsgzhib zho liu.

Lo grë zha ne ndxie ga, no zho rienpaa lëe me ga, nogaa zha ne bii racchop guic.

<sup>18</sup> Dzigo wbig me lo zho, rëb me:

—Laa to gonle nasca naa rnabey. Grëse ncuaane no gbaaw, nogaa guidzliuw, ladznia naa psan Pxoz naaw.

<sup>19</sup> Niina nagon, laa naa rsan diidz lo to: goltsie dipse lo guidzliuw, goltsieseed miech gac zho zha ne sëeb xnëz naa, golchoobnis zho, golguiab lo zho lëe min co rnabey Pxoz naa, rnabey naa ne nac Xpëed me, ni rnabey-gaa Espíritu Sant.

<sup>20</sup> Golseed zho gban zho, grëse mine bnabey naa to gun to. Min co rsan naa diidz lo to gun to; ni gacnan to ganle, ib csaand naa to, gzataa dzew niicle haxta dze ne nitlo guidzliuw, naa gacnie to.

## XTIIDZ NDZON DIOS MINE PQUIAA MARCW

<sup>1</sup> Nu ganle laa naa csilo gzodiidz naa, mine been Jesús, Men ne bneele Dios cxeel me lo guidzliu.

<sup>2</sup> Lo guits ne pquiia Isá, tib men ne biadteed xtiidz Dios padzeela, lo co zhobnee ganle ible laa Dios no cxeel me. Rneew, glo cxeel me tib zha ne tedner, guiaadnie diidz. Znu zhobnee lo guits co:

Sxel naa tib zha ne tedner lo luu, zeena zha co gzhixcuaa nēz ne ted luu.

<sup>3</sup> Dan tso zho, zon miech zeene laa tsi zho zēeb gnee zho:

“Golzhixcuaa nēz ne ted men ne rnabey, golsaan grē guielntseeb ne run to.”

<sup>4</sup> Ni nligaa scase goca, zeene laa Juan Bautist biaad, dan bio me rchoobnis me miech; rnee me lo zho csaan zho xquielntseeb zho gbig zho lo Dios, ni chobnis zho, zeena csilaa Dios zho lo grēta xtol zho.

<sup>5</sup> Dzigo rriee miech grē guiedz ne ngab Judé, dib lad guiedz Jerusalén, riequiaadiag zho zhiwseed me; ni rxobdol zho grē xtol zho, dzigo rchoobnis me zho len guiubee Jordán.

<sup>6</sup> Guits lad camell niaa xab me, ncuaane rzhidoo len me guid niaaw ni niapse nguzhanch ni dzin dan row me.

<sup>7</sup> Zeene rseed me grē miech co, rnee me lo zho:

—Iraa ziaad men ne mazdraa non lo naa. Tel naa peet nond naa, tib guielnzaac nroob ga yгаа naa telne niaca mine grieelo maase lab me glit naa; per na ni min co rdzind naa.

<sup>8</sup> Laa naa rchoobnis to niina con nis; sangue me con Espiritu Sant cchoobnis me to.

*Brobnis Jesús*  
(Mt. 3:13-17; 4:1-17; Lc. 3:21-22; 4:1-15)

<sup>9</sup> Len ngbidz coquew, laa Jesús brieedz Nazaret xtan zha Galilé, güey me pchoobnis Juan me len guiubee Jordán.

<sup>10</sup> Laa me norieedze lo nis, zeene gon me laa zhan gbaa bzhial, laa men ne nac Espiritu Sant biet gbaa zig tib palom laa me ziad-zēeb guic me.

<sup>11</sup> Ni lēetaque zēeb tib tsi men co gbaa, rnee me:

—Xin, rleynie naa luu gon, nziuu luu lo naa.

<sup>12</sup> Zeene blozh brobnis me, dzigo güeynie Espiritu Sant me tib dan ngan, zaatne no grē ma ntseeb;

<sup>13</sup> bio me ga choo ngbidz. Ga no me güey Satanás (ma ne rnabey lo grēse mendox), gocladz ma niungüet ma me.

Bdedse ga, güey grē xanj Dios güeygan zho me.

<sup>14</sup> Len ngbidz co bnabey Herod bio Juan ladzguiib. Ladzguiible no Juan zeene brieedz Jesús güeyted me grē guiedz ne ngab Galilé güeyseed me miech Xtiidz Ndzon Dios,

<sup>15</sup> rnee me lo zho:

—Laa dze ne gnabey Dios ziaadgaxle, laaw bdzin dzele. ¡Golsaan grē xquielntseeb to, golnab perdon lo Dios; dib zdoo to golliladz Xtiidz me!

*Tap zha ne quia gooz mel*

(Mt. 4:18-22; Lc. 5:1-11)

<sup>16</sup> Tib dze zieded Jesús ro Nisdoo ne lē Galilé, gon me laa Simón grop Ndrés quia gooz mel lo nis co; sac ible dziin co nac xtsiin zho. Grop bets zho laa zho noron guix ne rgaa mel lo nis.

<sup>17</sup> Dzigo bredz me zho, rēb me lo zho:

—¡Goltē, goltēnal zhits naa! ¡Laa naa cxel to tsie to stib gooz, tsietop to grē miech ne sēeb xnēz Dios!

<sup>18</sup> Horcogazh psan zho guix ne rnaaz zho mel ga, laa zho zienal zhits me.

<sup>19</sup> Zhisaque bzē Jesús ro nis co, gon me laa Jacob ni Juan no tib len barcw noquiaabdie zho guix ne rnaaz zho mel, lēe grop xingan Zebedé ga;

<sup>20</sup> dzigo bredz me zho. Zigne bredz me zho, zoque Zebedé lo barcw ga

grë xmoz Zebedé, laa zho zienal zhits me.

*Tib mgui ne nosacsi mendox.*  
(Lc. 4:31-37)

<sup>21</sup> Laa zho bdziñ guiedz ne lë Capernaum. Zeene gol dze ne rdziiladz zho lo dziin nëz Israel, güey Jesús yadoo win ne zob lad guiedz co güeyseed me miech.

<sup>22</sup> Grë miech ne ndxie leñ yadoo ga, rzee zdoo zho ran zho zha rnee me, sac rlu men rnabey nac me; led yed me rseed zigne rseed grë zha ne nac maistr ley.

<sup>23</sup> Lad grë miech co no tib mgui ne nosacsi mendox, tibaque zeene nguiedz pcooptsie ma mgui,

<sup>24</sup> rnee ma:

—¿Pe gun luu no Jesús Nazaren? ¿Ziaad luu lëe par gnitlo luu no? Runbey naa luu, tib men peet xtold nac luu ni Dios pxeel luu.

<sup>25</sup> Dzigo goctox Jesús lo ma, rëb me:  
—¡Psioog ro luu! ¡Na zeena psaan men qui!

<sup>26</sup> Horco masaque beenxidz ma mgui co, ni rquiaadan ma redz laa ma psaan mgui.

<sup>27</sup> Grëse miech ne ndxie ga, bzee zdoo zho rnabdiidzlsa zho rnee zho:

—¿Bay cho nac men qui? ¡Wseed cub i gon ziaadnie me! ¡Rlu zha rnabey nac me, zha haxta mendox rdzieb zeene ractox me lo ma!

<sup>28</sup> Znuse brieets bliaal diidz zha beenguiac Jesús mgui co; grëse guiedz ne ngab Galilé gocnan miecha.

*Biac xniadzoop Simón Pedr*  
(Mt. 8:14-17; Lc. 4:38-41)

<sup>29</sup> Ga brieë Jesús güey me lidz Simón grop Ndrés gza me Jacob ni Juan.

<sup>30</sup> Bdziñ zho, lëëtaque laa xniadzoop Simón nix rlan xlëe, nacne rëb zhow lo me.

<sup>31</sup> Dzigo bded me zaatne nix zhuz co, bzhen me nia me, blische me me. Horcogazh laa zhixlëe me blëz, guche me ga psilo me beenlo ncuaane dow zho.

<sup>32</sup> Ziedzele dzew, laa ngbidz rzëëblew, zeene psilo grë miech co zo zo rdziñnie zho grë men rzacnë, grë

zha ne nosacsi mendox ne; bioogse ro yu co ndxie miech.

<sup>33</sup> Zootle zig grëse miech ne no lad guiedz co pcaalsa ga.

<sup>34</sup> Ndal grë men rzacnë co zhaase zhaase guielguidz ne rzac zho, per beenguiac Jesús zho; zha ne nosacsi mendox, benxoon me grë mendox ne nosacsi zho. Goctox me lo ma, ib bdeete me diidz nee ma cho nac me, sac runbey ma me.

*Pseed Jesús miech Galilé*  
(Lc. 4:42-44)

<sup>35</sup> Silgaw, scase bii ncow rnaw guche Jesús brieë me lad guiedz co, güey me zaatne guindraa miech, güeyzodiidznie me Dios.

<sup>36</sup> Zeene rnit me choot guien; dzigo brieë Simón ni zla zha ne nacgza Simón güeyguib zho me.

<sup>37</sup> Zeene bdziel me, rëbcha zho lo me laa grë miech co quiaguible me.

<sup>38</sup> Dzigo pquiab me rëb me lo zho:

—¡Sca ye! Per ib laa ne none gon guio grëraa guiedz ne ndxie dib gax nu, zeena ye grë guiedz qui gnee naa Xtiidz Dios lo miech; sac ible min co pxeel me naa zial naa lo guidzliu.

<sup>39</sup> Dzigo güey zho grëse guiedz ne ngab Galilé. Zaatne rdziñtaa zho, rie me grëse yadoo win ne zob lad guiedz rseed me grë miech co Xtiidz Dios, ni runxoon me grë mendox ne nosacsi miech.

*Biac tib mgui ne rlan lepr*  
(Mt. 8:1-4; Lc. 5:12-16)

<sup>40</sup> Tib vult, wbig tib mgui ne rlan guiedzdox ne lë lepr lo Jesús (masaque riaal dipse guid lad mgui), pquiitgzhil mgui lo me, rëb mgui:

—Tebaa siguieel luu gunguiac luu naa.

<sup>41</sup> Pquia zdoo Jesús mgui, pxobnia me guic mgui rëb me:

—Zunguiac naa luu. ¡Niinagazh laa luu guiaanmbe!

<sup>42</sup> Zigne sca bnee me laa mgui co biac, mbese biaan xcuerp mgui.

<sup>43</sup> Blozh ga bzonëz me mgui, ni pso me diidz lo mgui

<sup>44</sup> rëb me:



—Bina ganle, choot lo gzodiidzd luu gon zha biac luu. Bzë, güey lo pxoz, güey san gon ne rnabey xley Moisés gdeed luu; zeena gan zho ganle laa luu biacle.

<sup>45</sup> Ni zigne brieë mgui ga, psilo mgui grë lo miech bzodiidz mgui zha biac mgui. Grëse miech gocnaa, nacne brieelodraa nenlo ndziñ Jesús grë lad guiedz co. Mine been me, blëz me zaatne choot miech guiend; per niicle scaw, miech guizhiu ne rrieë grë guiedz co rdziñ lo me.

## 2

### *Biac tib men ne gutoo* (Mt. 9:1-8; Lc. 5:17-26)

<sup>1</sup> Goc bla dzew, laa Jesús biire bdziñ lad guiedz Capernaum stib. Zeene bin zho laa me bdziñ ro yu,

<sup>2</sup> miech guizhiu ne pcaalsa zaatne no me ga, haxta ro yu ndxie grë miech co; dzigo psilo me noseed me zho Xtiidz Dios.

<sup>3</sup> Laa grë miech co ndxie ga, zeene bdziñ tap zha bgui ney zho stib men bgui, zhoobse me lo yag, ib gacd së me sac dipse me gutoo.

<sup>4</sup> Ni ne scataa miech guizhiu ne ndxie, gacd ted zho nëz ro yu gdziñnie zho me lo Jesús, nacne biepaque zho guic yu. Pخال zho ngali zaatne zob Jesús, dzigo ga pteed zho men co dib yag ne zhoob me ga.

<sup>5</sup> Zeene gon Jesús ne nli dib zdo zho rliiladz zho me gunguiac men rzacnë co, dzigo rëbchaa me lo men co:

—Xin, niinagazh laa naa gun perdon grëse xtol luu.

<sup>6</sup> Blalaa zha ne nac maistr ley zob ga, zeene bin zho sca rëb me lo men rzacnë co, bzachaa zdo zho:

<sup>7</sup> “iLëda i gon squi rnee men qui! Quiaguitnie me Dios i squi rzë xtiidz me. iTibaque men ne run perdon xtol miech, ni lëë men co nac Dios!”

<sup>8</sup> Bienga Jesús sca rza zdo zho, dzigo rëbchaa me:

—¿Pe nacne rlëë to ron to mine rne naa?

<sup>9</sup> Parga nli, cholze zha ne zac guiab: “Laa naa gun perdon grëse xtol luu.”

<sup>10</sup> Per laa naa glu lo to ganle, naa ne nac naa Men ne pxeel Dios zial naa lo guidzliu, ible naa no gun miech perdon.

Dzigo bnee me lo men rzacnë co, rëb me:

<sup>11</sup> —iGuche i, bi yag ne bzhoob luu i, zeen bzë!

<sup>12</sup> Zigne sca bnee me laa mgui co bzoli, blis me yag co, grop lo grë miech co gon zho laa me brieë ga, laa me zey. Grëse zho rzee zdo zho, rlynie zho Dios rnee zho:

—iNasi laa ne nodziñ ncuanea gard dzian ne!

### *Bredz Jesús Leví* (Mt. 9:9-13; Lc. 5:27-32)

<sup>13</sup> Blozh ga, laa Jesús brieë ga laa me zie nëz ro nisdoo stib; nzian miech ne pcaalsa lo me ga, dzigo pseed me zho.

<sup>14</sup> Ro nis co ziezë me gon me Leví, xingan Alfë, zob Leví zaatne rietizh zho contribucion, dzigo bredz me Leví tsienal Leví zhits me. Guso Leví ga, laa Leví zienal.

<sup>15</sup> Bded ga, bredz Leví me güey me tib wagw lidz Leví. Grë zha ne nac recaudador, grë zha ne zëëb diidz nac zha yozh, tipse lo mezh bzobnie me zho grë xpëëdsuel me; sac ndal grë zha co zienal zhits me.

<sup>16</sup> Blalaa maistr ley ne nacgrë zha farisé, gon zho sca tipse noyownie Jesús grë zha co; bded ga, rëbchaa zho lo xpëëdsuel me:

—iMod sca na rownie xmaistr to grë zha ngoopdol, grë zha beed ne nac recaudador!

<sup>17</sup> Dzigo rëbchaa Jesús lo zho:

—Nanle to ganle, men ne run rmed, zaatne no zha ne rzacnë, ga rquiin zho, ¿niacxe squiin zho zaatne no zha ne ndip ndaan? Ni min co rac nina, tel naa zialguibd naa miech wen, sinque laa naa zialguib miech ngoopdol.

### *¿Pe nacne rcuand xpëëdsuel Jesús?* (Mt. 9:14-17; Lc. 5:33-39)

<sup>18</sup> Lëëtaaque dze co nocuan xpëëdsuel Juan Bautist, grë zho zha farisé. Dzigo bdziñ bla zha ne bnabdiidz lo Jesús, rëb zho:

—¿Pe nac waa ib rcuand xpëëdsuel luu? Zha grë xpëëdsuel Juan Bautist ni grë zha farisé, rcuan zho.

<sup>19</sup> Pquiab Jesús, rëb me:

—Zaatne nadien noyac tib guieltsieel, ¿pe niacxe lega csilo grë zha ne ndxie lo lni tso zho guielnë, ycuan zho ni ran zho laa mgui ne notsieelnia mban?

<sup>20</sup> Per zdziñ dze zeene laa mgui co gbiche; ni zeene laa dze co gdziñ, dzigosi nagon rieguañ tso zho guielnë, rieguañ ycuan zho.

<sup>21</sup> Ranle to ganle, zha ne rquiaabdie tib lë lar, rquiaad zho lar cub lad lar gox, sac zha ne sca gun paat yquiind wquiaabdie co. Zeene laa lar cub gbe, lëëque lëew gunnat zaatne nriez lar gox.

<sup>22</sup> Scaque tsod zha ne cotsow vin cub tib len guid ne padzeelale no-quiin, sac stiez vin cuba; dzigo niicle guid cow, niicle vingaaw laaw nitlo ga. Gacxe, tel vin cuba none len guid cubaque tsotsowa.

*Ptop xpëëdsuel Jesús mzion zhobx-til*  
(Mt. 12:1-8; Lc. 6:1-5)

<sup>23</sup> Tib dze ne rdziiladz zho lo dziin nëz Israel, bdednie Jesús xpëëdsuel me zaatne zëeb zhobxtil, dzigo zigse zieded zho pchoo zho palal mzion zhobxtil co.

<sup>24</sup> Gon zha farisew, dzigo rëbchaa zho:

—¡Lëda i gon noyun to! ¡Golguien ganle dze nda nac dze rii!

<sup>25</sup> Dzigo pquiab Jesús, rëb me:

—¿Pe gard glab to zaatne ziaad ganle zha been rey David tib dze zeene pcaabedz me grë me zha ne ziegza me, ni zienied zho pe gow zho?

<sup>26</sup> Rneew, bzëeb me len yadoo güeynab me quietxtil ne nac gon, downie me grë zha ne ziegza me ga, ni loxaque zha ne nacse pxoz row quietxtil co. Len iz co nac men ne lë Abiatar pxoz nroob.

<sup>27</sup> Golgacan sca ganle, biaand dze rii par csacsi miech xcuerp zho, sinque ne rleynie Dios miech gane psañ mew.

<sup>28</sup> Naa ne nac naa Men ne pxeel Dios zial naa lo guidzliu, naa rnabey dze rii, nanpaa naa pe nac mine nonguiel gac.

### 3

*Biac tib mgui ne mband tib nia*  
(Mt. 12:9-14; Lc. 6:6-11)

<sup>1</sup> Gol stib dze ne rdziiladz zho lo dziin, güey Jesús len yadoo win ne zob lad guiedz co. Lad grë miech ne no len yadoo co, no tib mgui ne mband tib nia.

<sup>2</sup> Nzian zha ne ndxie ga, quialeets zho Jesús dien pe zunguiac me nia mgui co dze ne rdziiladz zho lo dziin. Quiambëz zho dien pe gun me, par gdziel pe yquiaaqui zho me.

<sup>3</sup> Dzigo bredz me mgui co, bnabey me bzo mgui grołtaa lo grë zha ne ndxie ga;

<sup>4</sup> blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuaane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

Ni tib zho pquiabd.

<sup>5</sup> Dze bui me lo zho grëse zho, wbiñladz guic me, ni mban goc zdo me gon me scataa ntseeb zdo zho; dzigo rëb me lo mgui co:

—Bzigaa nia luu.

Zigne bzigaa mgui nia mgui, laaw biac.

<sup>6</sup> Grë zha farisé, ni grë zha ne nacie rey Herod, zigne brie zho ga laa zho psilo bnediidz dien zha gdeeda diidz gut zho Jesús.

<sup>7</sup> Len dze co, tib vuilt bdziñ Jesús ro nisdoo grë xpëëdsuel me. Miech guizhiu ne nal zhits zho, ga zie grë zha ne ziaad nëz Galilé, grë zha ne ziaad nëz Judé,

<sup>8</sup> grë zha Jerusalén, grë zha ne ziaad nëz Idumé, grë zha no dib nëz dan ro guiubee Jordán, grë zha ne no dib gax guiedz Tiro ni guiedz Sidón. Miech guizhiuw, sac ron zho grëtaa milagr ne run me.

<sup>9</sup> Dzigo bnabey Jesús xpëedscuel me, yguib zho tib len barcw zaatne gac so me zeena ctaagwd grë miech co me.

<sup>10</sup> Zëëble diidz ndal miech ziyunguiac me, dzigo grëse zha nerlan pe guielguidz, rbigbe zho dien zha grieelo maase lad xab me xen zho.

<sup>11</sup> Grë menox ne noguitnie miech, zeene ran ma me, runquitsgzhib ma zha ne noguitnie ma lo me ni rquiaadan ma redz rnee ma:

—¡Xpëed Dios nac luu!

<sup>12</sup> Per ractox me lo ma, rsaand me gnee ma parne xoobnen cho nac me.

*Ble Jesús gza tsiipchop xpëedscuel me*

(Mt. 10:1-4; Lc. 6:12-16)

<sup>13</sup> Blozh ga biepp me tib guic gui win zob ga, ga bredz me zha ne gocladzse me. Zeene pcaalsa zho grë zho,

<sup>14</sup> dzigo lad co ble me tsiipchop zha ne sënie me, zha ne cxeel me tsieseed miech Xtiidz Dios. Lëe zha co bleelë me poxtl,

<sup>15</sup> ni bdeed me poder lo zho gunxoon zho menox.

<sup>16-19</sup> Znu lë gza tsiipchop zha ne ble me ga:

Simón (lëe Simón co bleelë me Pedr), Jacob ni Juan (xingan Zebedé, zha ne bleelë me “Zhin Nguzi” “Boanerj”).

Ndrés,

Lip,

Bartol,

Matew,

Mazh,

Jacob (xingan Alfé),

Tadé,

Simón (zha ne nacgrë zha ne racladz cuee zha Roma xtan zho)

ni Judas Iscariot (zha ne güeyto me).

*Rëb zho menox nacie Jesús*

(Mt. 12:22-32, 46-50; Lc. 8:19-21; 11:14-23; 12:10)

<sup>20</sup> Wbire Jesús ga, laa me bdziñ ro yu grë me zho. Scasaque ndal miech ne pcaalsa ga stib, ni rdeetew diidz gownie me zho.

<sup>21</sup> Zeene bin menlidz mew, dzigo brie zho ziexi zho me, sac rëb zho bod rzhinle guic me.

<sup>22</sup> Haxta grë maistr ley, zha ne brie nëz Jerusalén bdziñ ga, rnee zho:

—Beelzebú, ma ne rnabey lo menox, ma co nacie me gane rrieelo runxoon me menox.

<sup>23</sup> Dzigo bredz me zho bzodiidz me tib cuent lo zho, rëb me:

—¿Pa nan to na grieelo lëeque menox gunxoon samenox ma?

<sup>24</sup> Tel tib guiedz nadien gac miech chop dii, csilo zho tillsa zho, ¿niacxe nitlod guiedz co?

<sup>25</sup> Tib diigaa miecha, tel csilo zho lëeque zha tilnie menlidz zho, ¿niacxe nitlod zho?

<sup>26</sup> Scaquegaa menox nagon, telne lëeque lëe ma tilnie samenox ma, ipe nale na bnitlo ma!

<sup>27</sup> Masaque nac menox zig tib zha ne no xfuers, zha ne gacladz cuee grë ncuaane no lidz zha co, none cxidoogazh zho zho.

<sup>28</sup> Gneli naa lo to ganle, grëse dol ne run miech, grë tel zha rguie zho, rdzibdee zho, bii zun Dios zho perdon min co;

<sup>29</sup> sangue zha ne gneenë Espíritu Sant, dol nroob ga run zho, gdziñdze ne gun Dios zho perdon.

<sup>30</sup> Sca rëb me lo zho, sac sca quianee zho rëb zho menox nacie me.

<sup>31</sup> Horco laa xniaa me ni zha bets me bdziñ, per leyse blëz zho; dzigo pxeel zho zha ne zietsedz me.

<sup>32</sup> Blalaa zha ne zob gaxpaa lo me, zha co been vis rëb zho:

—Laa xniaa luu gon, ni zha bets luu ziaadguib luu.

<sup>33</sup> Pquiab me rëb me:

—¿Xnia naa ye, bets naa ye?

<sup>34</sup> Dze bui me lo grë zha ne ndxie ga, dzigo rëbcha me:

—To gon nac xnia naa, to nac bets naa.

<sup>35</sup> Sac grëse zha ne run mine racladz Dios, lëe bets naa ga, lëe bzian naa ga, lëe xnia naa ga.

## 4

*Xcuent zha ne güey gon*  
(Mt. 13:1-23; Lc. 8:4-15)

<sup>1</sup> Dze coquew, laa Jesús psilo quiaseed miech zaatne nac ro Nisdoo Galilé ga. Miech guizhiu ne pcaalsa lo me, nacne güeytsep me tib len barcw ne zo ro nis co, ga bzob me laa grè miech co bre tib ro nis.

<sup>2</sup> Ndal grè ncuaane pseed me zho, per niapse con cuent rnee mew lo zho. Lëe tib cuent ne bzodiidz me ga nu, rëb me:

<sup>3</sup> —¡Golquiaadiaga ganle! Tib mgui name, brieë me güey me gon zhobxtil.

<sup>4</sup> Zeene laa me quialaal zhob co, mine bliaal gax ro nëz; znuse güey grè mguin güeytow maw.

<sup>5</sup> Laa mine bliaal zaatne nac lo quie, znuse znuse blana;

<sup>6</sup> per zeene laa lo ngbidz brieë, znusaque bgoola blozh ga bidzgaw; sac guienð nroob low.

<sup>7</sup> Laa mine bliaal zaatne nac len yag guiets, zeene laa grè yag guiets co broob znuse bnitlo yag guietsa, pasëw niac.

<sup>8</sup> Sangue grè mine bliaal zaatne nac lo liu naal, blana, brooba ni goca; lo tib tib zhob co no mzion co brieë galptsii zhob, now brieë tsongala, no-gaaw brieë haxta tib gayoow.

<sup>9</sup> Blozh ga, rëbcha me lo zho:

—Zha ne racladz guien mine rne naa, yquiaadiag zhow.

<sup>10</sup> Zeene laa grè miech co zey, laa gza tsiipchop xpëedscuel me, ni zla zha ne rzënie me, laa zho bnabdiidz lo me dien zha nac cuent co.

<sup>11</sup> Dzigo rëbcha me lo zho:

—Tel to, Dioszhal rlu lo to zha rnabey me, niicle ncuaane mazdraa ngeetsa; laa lo grëraa miech ne gard gbig lo me niapse con cuent rzodiidz naaw lo zho parne guien zhow.

<sup>12</sup> Per niicle scaw, nzhial diag zho ron zho, per peet riend zho; nzhial lo zho rwi zho, per peet rand zho; ib nëd zho gbig zho lo Dios, gnab zho gun me zho perdon.

<sup>13</sup> 'Nana to, telne biende to zha nac cuent co, ¿zha guien to grëraa mine gne naa dzigo? Golquiaadiaga ganle, znu gon naca:

<sup>14</sup> Mgui ne güeylaal zhob ga, rrieë-quia lëe zha ne rienee Xtiidz Dios lo

miech ga, laa zhobxtil co nac Xtiidz Dios.

<sup>15</sup> No miech nac zig nac ro nëz ne bliaal palal zhob co: rquiaadiag zho Xtiidz Dios, rlozh ga lëelëd rdzin mendox rquiil ma zho, rsaanga zhow.

<sup>16</sup> Nogaa zho nac zigne nac lo quie co: zeene rquiaadiag zho Xtiidz Dios, ine rley zho rcaania zhow,

<sup>17</sup> per led dib zdood zho rcaania zhow; gane zeene laa miech rsilo rlëe lo zho, laa miech rtsidil zho porne rililadz zhow, rsaanga zhow.

<sup>18</sup> Zzhisgaa zho nac zigne nac len yag guiets co: nli rquiaadiag zho Xtiidz Dios,

<sup>19</sup> per rsilo zho lel grè ncuaane no lo guidzliu rii mazdraa rionie guic zho, rquidie grè dimi zho, rzoobladz zho yquianie zho grëse ncuaane racladz zho. Grè ncuaan co rioxcora zho, laa ne tsonie Xtiidz Dios guic zho, min co rquiaqui ib rund zho mine rnabey me.

<sup>20</sup> Laa nogaa zho nac zigne nac liu naal co: rquiaadiag zho Xtiidz Dios, dib zdoo zho rililadz zhow, ni rban zhow zigne naca. Grè zha co, no zho nac zig mzion ne brieë galptsii zhob ga, no zho nac zig mine brieë tsongala, nogaa zho nac zig mine brieë tib gayoow ga.

*Xcuent biini ni midz moxtaz  
(Mt. 13:31-32, 34-35; Lc. 8:16-18;  
13:18-19)*

<sup>21</sup> Blozh ga, biire pcaalsa miech lo me, dzigo rëb me lo zho:

—¿Pa dien rquiin biini? ¿Pe rquiaguiw par tsolana tib len guin o soogaaw tib zhan lon? Led zeene rquiaguiw lëe, zaatne grieelo gziiniw ga rzoob zhow.

<sup>22</sup> Scaque nagon grëse ncuaane rac ngeetsa, grëse ncuaane rnee miech zhliana, ib none xoobnena.

<sup>23</sup> 'Telne racladz to guien to mine rne naa, golquiaadiaga;

<sup>24</sup> ni zigne ron tow scagaa goltsoxco golguna. Telne tsoxco to gun tow, scagaa zioguicraa tow.

<sup>25</sup> Sac zha ne tsoxcow, zdeedraa Dios guielbiini lo zho; sangue zha ne



tsoxcoda, haxta tel palalse guielbiini ne bdeed me lo zho stiche mew.

<sup>26</sup> Ni rëb me lo zho:

—Znu gon nac zha ne ngab lo Dios; nac zho zig bni ne ran miech.

<sup>27</sup> Zha ne rielaal bni co, liu rcow, liu riini, laa zho raaguies, laa zho riebe. Sca sca laa dze zie, laa bni co ratslo, laaw rlan, laaw rroob, per rien d zho zha nace laaw rroob.

<sup>28</sup> Zhal guidzliu rdeeda guielnzaac co, guizh nac zhob co zeene rlan, rac palal dzew laaw rlan mzion.

<sup>29</sup> Laa zeene laaw ral, dzigo laa zho rietiitsa, sac laa dze bdziñle ne laaw tsas.

<sup>30</sup> 'Zha ganle gni naa lo to zeena guien to zha nac xquielrnabey Dios? —rëb Jesús—. ¿Pa tib cuent ganle gzodiidz naa lo to zeena guien to zha naca?

<sup>31</sup> Naca gon zigne nac tib midz moxtaz ne ran miech dan rii. Midz moxtaz nac midz ne mazdraa win,

<sup>32</sup> ni tel gacbniw, rrooba, ni lëew rroobraa lo grë guizh ne ran zho ro yu, haxta grë mguin riezaa zhiptsieez ma low sacne ncala.

<sup>33</sup> Nzian grë cuent rii pquiin me par cseed me grë miech co, ni laa me bnee mine rgobey me guien zho.

<sup>34</sup> Niapse sca rseed me zho, laa zha ne nac xpëedscuel me, zeene zhasew rnee mew lo zho zigne naca.

### *Pcuëez Jesús tib medox*

*(Mt. 8:23-27; Lc. 8:22-25)*

<sup>35</sup> Zeene bdze dze co, rguetsle liuw rëbchaa me lo xpëedscuel me:

—Golgotssaa dieedquia ne stib nëz lo nis rii.

<sup>36</sup> Blozhse bnee me lo grë miech co, laa zho biepl en barcw ne zob me ga grë me zho, laa zho zie. Ye blalaa barcw ne zob lo nis co zienal.

<sup>37</sup> Laa zho zie, tibaque zeene laa tib medox psilo brie, masaque rliis me lo nis co; zeene riasoli low riechoona len barcw, laa barcw psilo noyodzële nis.

<sup>38</sup> Dzigo güey zho güeycuaan zho Jesús, sac lëëtaque laa me nixguies nëz zhan barcw ncoogse me tib lmad.

—¡Maestro! —rëb zho—. Bui ganle, ¿pe znuse csaan luu nitlo ne nu?

<sup>39</sup> Dzigo guche Jesús, bnee me lo me co, bnee me lo nis co, rëb me:

—¡Lëew ga na! ¡Golcuedze!

Zigne sca bnee me, laa me co blëz, niicle nis cow laaw bredze.

<sup>40</sup> Dzigo rëbchaa me lo zho:

—¿Pe nace squitaa rdzieb to? ¡Gardaque dzigo lëë gliladz to cho nac naa!

<sup>41</sup> Rien draa zho zha gun zho lo dzeb co, ni rnabdiidzlsa zho rnee zho:

—¿Bay cho nac me, zha nace haxta me, haxta nisdoo ron xtiidz me?

## 5

### *Men Gadar ne nosacsi mendox* *(Mt. 8:28-34; Lc. 8:26-39)*

<sup>1</sup> Bdziñ Jesús nëz dan ro nisdoo co gza xpëedscuel me, ga nac xtan zha Gadar.

<sup>2</sup> Laa me bieldze len barcw, zeene laa tib mguie ne nosacsi mendox bdziñ lo me. Len baa brie mguie co bdziñ me ga,

<sup>3-4</sup> sac len baa nac zaatne rbëz me. Miech ne lëbd zho low, nzian vuelt ziezooob zho caden nia me, ni me ne, per znuse rchug mew, rzhooŋga me. ¡Choot rlëbd lo me!

<sup>5</sup> Dze, guieel quianzë me grë dan co, rietso me grë len baa. Roptsiedan me, ni lëëque me rzhen quie rchug me guidlad me.

<sup>6</sup> Laa dze co, zitraa gon me Jesús, rias me bdziñ me pquiitgzhil me lo Jesús.

<sup>7-8</sup> Dzigo goctox Jesús lo mendox ne noguitnie me, rëb Jesús:

—¡Mendox, psaan men qui!

Horco pcooptsiedan mendox co mguie co, ni rnee ma lo Jesús:

—¿Pe gun luu naa Jesús? Runbey naa luu, Xpëed Dios ne no gbaa nac luu. ¡Ne nlipagaa been guielnzaac csacsid luu naa!

<sup>9</sup> Dzigo bnabdiidz Jesús lo ma dien cho lë ma. Pquiab ma rëb ma:

—Legion lë no, sac nzian nac no.

<sup>10</sup> Rnab grë mendox co lo Jesús, gzonëzd me ma zit.

<sup>11</sup> Gaxaque zhan gui co ndxie tib dzoon nguts noyow,

<sup>12</sup> dzigo bñab ma lo Jesús, rëb ma:  
—Bzhiguiel lose grë nguts qui bzonëz no.

<sup>13</sup> Bdeed Jesús diidz. Dzigo laa grë menox co psaan mgui co, laa ma zie bzëëb ma zdoo grë nguts ne ndxie ga; psilo grë nguts co rquiaa ma corr güeypix ma glaa tib ro yee ne quia ro nisdoo co, bliaal ma haxta lo nis. Ga biep ma nis, grëse ma gut. Rgaa ma zig chop mil.

<sup>14</sup> Zha ne quianap grë nguts co, gzase zho bzhoon güeyzodiidz zhow lad guiedz, ni grëraa yu ne zob gax ga. Brieë grë miech co, zieso zho.

<sup>15</sup> Zeene bdziñ zho, per nli bdzieb zho, sac gon zho laa mgui ne sca bdzi-itnie menox ga zobse lo Jesús, laa mgui nacwxable, rlu ndzinlile nac guic mgui.

<sup>16</sup> Psilo grë zha ne gon zha biac mgui co, ni zha goc grë nguts co, psilo zho rzodiidz zhow lo grë zha ne bdziñ ga.

<sup>17</sup> Min co bin grë zha co, mazd bñab zho lo Jesús siguiel me ghi me xtan zho.

<sup>18</sup> Zeene laa Jesús zie sëëb me len barcw, dzigo laa mgui co wbigaque lo me, nan mgui nziguiel me nienal mgui zhits me.

<sup>19</sup> Per bdeete me diidz, rëb me:  
—Wbire, güey güeyzodiidz lo grë menlidz luu ganle pa lotaa pquia zdoo Dios luu, zha nactaa milagr nroob ne been me beenguiac me luu.

<sup>20</sup> Dzigo wbire mgui. Güey mgui dib xtan zha Decápolis, güeyzodiidz mgui lo grë miech co zha beenguiac Jesús mgui. Grëse zha ne rona, rzee zdoo zho.

*Brieëban xpëdwnaa tib men lë Jair  
(Mt. 9:18-26; Lc. 8:40-56)*

<sup>21</sup> Zeene laa Jesús biire brieëquia stib nëz ro nisdoo co, miech guizhiu ne pcaalsa lo me ga.

<sup>22</sup> Ga zo me zeene laa tib men ne nacgrë zha ne rnabey yadoo lë Jair bdziñ. Zigne bdziñ me lo Jesús pqui-itsgzhib me,

<sup>23</sup> rëb me:

—Been tib guielnzaac gotsaa guio ne gunguiac luu xpëed naa. Laa win rlozhle; nanpaa naa telne cxobnia luu guic win, ziac win.

<sup>24</sup> Dzigo laa Jesús zie nëz lidz men co. Ndal miech ne zienal zhits me, haxta rtaagw zho me.

<sup>25</sup> Lad grë miech co zienal tib wnaa, gogle tsiipchop iz rlan me tib guielguidz, rzac me zigne rzac men wnaa gzob mëë, tibaque rlan mew ib rbëzda.

<sup>26</sup> Nzianle lo men ne run rmed ziye me, grëse ncuaane rap me bloozh me lo rmed; per laa ne cuëz guielguidz co, lel znu rzhizhooraaw.

<sup>27-28</sup> Ziyonle me grë milagr ne run Jesús. Bza zdoo me rëb me: “Totsaque ygaa maase lad lar ne mbix me xeen naa, ziacle naa.” Dzigo bded me lad grë miech co, wbig gax me nëz zhits Jesús, bzhen me lad lar ne mbix Jesús.

<sup>29</sup> Nligaa hor cogazh laa guielguidz co blëz, bien me laa me biac.

<sup>30</sup> Zeene bien Jesús ne laa me beenguiac wnaa co, dzigo ptsire lo me rwi me lo grë miech co, rëb me lo zho:

—¿Cho ga bzhen lad xab naa?

<sup>31</sup> Rëbchaa xpëëdscuel me:

—¿Zha nan luu glu dien cho bzhen lad xab luu, ni squitaa ndaagw ziaad luu lad grë miech qui?

<sup>32</sup> Per laa me rwi lo grë miech co dien chow.

<sup>33</sup> Nanpaa wnaa co ne me ga, rdzieb me, rzhidz me laa me wbig pqui-itsgzhib me lo Jesús bneeli me zha nacne sca been me.

<sup>34</sup> Dzigo rëbchaa Jesús lo me:

—Xin, laa luu biac sacne bliladz luu naa. Bzë na, peet tsieniedraa guic luu, laa guielguidz co bichele.

<sup>35</sup> Laa Jesús bii quianeeque, zeene laa bla zha ne ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëed luu gutle.

<sup>36</sup> Zeene gon Jesús sca rëb zha co, dzigo bnee me lo Jair rëb me:

—Peet tsienied guic luu. Dib zdoo luu bliladz naa.

<sup>37</sup> Psaandraa me cho grë miech co nienal zhits me, loxaque Pedr, Jacob ni Juan bets Jacob; zha cose zienie me.

<sup>38</sup> Zeene bdziñ zho lidz men co, tib ruid ne rac, nguiedz zëeb tsi zho roon zho no zho xquielnë mëed co.

<sup>39</sup> Dzigo bzëeb Jesús len yu, rëb me lo zho:

—¿Pe nacne squitaa roon to? Goonde to, gon led gute ndzooop win rii, nixguies ndzooop.

<sup>40</sup> Lel rzhidznie grë miech co me, bin zho sca rëb me. Dzigo bnabey me brieë zho ley grëse zho, loxaque pxoz mëed co, xniaa win ni gza tson xpëedscuel me zha ne nal zhits me ga bzëebnie me len yu ne nix win.

<sup>41</sup> Wbig me bzhen me nia win, rëb me lo win:

—¿Guche i na, ndzooop yeen! (Talita, cumi.)

<sup>42</sup> Zigne sca bnee me laa mëed co guche, laa win bzë. Tib mëed tsiip-chop iza. Grëse miech co per nli rzee zdoo zho.

<sup>43</sup> Dzigo pso me diidz lo zho choot lo gneed zhow; blozh ga bnabey me bdeed zho ncuaane dow mëed co.

## 6

### *Güey Jesús ladz me*

(Mt. 13:53-58; Lc. 4:16-30)

<sup>1</sup> Ga brieë Jesús grë xpëedscuel me, laa me bdziñ Nazaret zaatne nac ladz me.

<sup>2</sup> Laa zeene gol dze ne rdziiladz zho lo dziin, laa me bdziñ len yadoo, psilo me pseed me grë miech co. Per nli rzee zdoo zho ron zho grë mine rnee me, rnabdiidzlsa zho rnee zho:

—¿Pazhe waa squitaa pseed men qui? ¿Zha nac guielbiini ne squitaa rap me i, ne rnee miech ndal grë milagr ne run me?

<sup>3</sup> Tib ngurëyagse name nac me. Led lëë xingan Marí i, bets me name nac Jacob, nac José, nac Judas ni Simón, grë bzian mew, nu no zho grë zho.

Ib beencasd zho me.

<sup>4</sup> Zeene gon me sca rac zho, dzigo rëb me lo zho:

—Zha ne rteed xtiidz Dios, mazd wen rnee miech lo zho stib dan, stib guiedz, lëdle ladz zho, ni menlidz zho ni menladz zho nëd gunbey zho.

<sup>5</sup> Brieelod niun me nzian milagr ga, blase zha rzacnë pxobnia me guic, beenguiac me.

<sup>6</sup> Bzee zdoo me gon me scataa ndip zdoo zho, ib bliladz zho cho nac me.

Blozh ga mazd güey me grë guiedz ne ndxie gax ga, güeyseed me miech.

### *Pxeel Jesús xpëedscuel me tsieseed zho miech*

(Mt. 10:5-15; Lc. 9:1-6)

<sup>7</sup> Tib dze, bredz me gza tsiip-chop xpëedscuel me, bnabey me zho tsieseed zho miech. Pxeel me zho chopga chopga zho, ni bdeed me poder lo zho par guncxoon zho mendox.

<sup>8</sup> Pso me diidz lo zho güeyd zho pe yquiin zho nëz, lëë gdib tib lë yag ne gzoxca zho güey zho. Zig nac ncuaane gow zho, zig nac dimi, pe tib bziud-gaa, güeyd zhow.

<sup>9</sup> Lab zho, mine quiasë ni zho; xab zho, mine nacwse zho mincose tsienie zho.

<sup>10</sup> Ni rëb me lo zho:

—Guiedz ne gdziñ to, zha ne gneedz zaatne cuëz to, lidz zha co golcuëz haxta gdziñ dze ne gbi to guiedz co.

<sup>11</sup> Laa zaatne ne ib gneedzd zho pa cuëz to, niicle nëdgaa zho yquiaadiag zho mine gnee to, dzigo gollit grë yudie co ni to, golrieegazh ga, zeena guien zho ganle lëda ga been zho.

<sup>12</sup> Dzigo laa zho brieë, laa zho zie. Güey zho, güeynee zho lo grë miech csaan zho xquielntseeb zho, gbig zho lo Dios.

<sup>13</sup> Nzian zha ne nosacsi mendox, bencxoon zho mendox co; grë zha ne rzacnë, bdëeb zho nceit guic zho, beenguiac zho zho.

### *Gut Juan Bautist*

(Mt. 14:1-12; Lc. 9:7-9)

<sup>14</sup> Bin rey Herod rzeet zho Jesús, sac tel pa lotaaw zëeb diidz grëtaa milagr ne run me. Grë miech co, no zho rzac

brieeban Juan Bautist lëe me ga nac Jesús, gane run me grëtaa milagr co;

<sup>15</sup> nogaa zho rnee Líw, meñ ne biaad pteed Xtiidz Dios padzeela; zzhis-gaa zho rnee, no cho stib meñ ne ziaad noteed Xtiidz Diosa, zig biaad grë zha ne biaad padzeela.

<sup>16</sup> Zeene ron Herod sca rnee miech, dzigo rnee me:

—Nligaa Juan ga. Naa bnabey pchug zho yan me, per lëe me ga brieeban.

<sup>17-18</sup> Sca rnee Herod sac rsoladz me zha been me Juan. Me bnabey bgaa Juan bio Juan ladzguiib, loxaque ne rnee Juan lo me nonguielda ga lëeque Herodí ptsieelnia me; sac tsieelpaa bets me Lip nac Herodí.

<sup>19</sup> Blëenie wnaa ne nac Herodí ga Juan, rzac me tebaa zha gut me Juan; per rdeetew diidz,

<sup>20</sup> sac rdzieb Herod lega pe gun me Juan, rien me tib zha ne zienal mine nac diidzli, tib zha ne peet xtold nac Juan; dzigo ib rdeete me diidz pe gun wnaa co Juan. Niicle ne cadque zeene rnee Juan lo me, rio me zhgab rien me dien zha gun me, per rdziladz me rquiaadiag me grë mine rnee Juan.

<sup>21</sup> Laa tibtaa dze laa mine no guic Herodí ga goc. Dze ne bloozh Herod stib iz, bnabey Herod goc tib lni nroob, bredz me grë zha ne nacie me dziin, grë zha ne zo lo menGUIIB, ni grë zha non lo zha Galilé.

<sup>22-23</sup> Laa zho no mezh noyow zho, zeene bzëeb xindzoo Herodí psilo ndzoo biee ndzoo. Bdziladz Herod gon me zha biee ndzoo, grë zha ne zob lo mezh ga ne. Dzigo rëb Herod lo ndzoo, tel petaa gnab ndzoo zdeed mew; haxta brie ro me rëb me:

—Ncuaane gacladztaa luu gnab luu, niicle zig grol grë ncuaane rap naaw, znedz naaw.

<sup>24</sup> Rias ndzoo güeynabdiidz ndzoo lo xniaa ndzoo. Dzigo rëbcha me lo ndzoo:

—Bnab lo me gnabey me tsiechug zho guic Juan gneedz zhow lo luu.

<sup>25</sup> Bdziñ ndzoo lo Herod rëb ndzoo:

—Racladz naa xoob guic Juan Bautist tib len plat, gneedz luuw lo naa niinagazh.

<sup>26</sup> Zeene bin Herod sca rëb ndzoo, mbanse rac me; per rdeetraaw diidz niab me grieeloda, sac grëse zha ne zobnie me ga, bin zho rëb me zdeed me ncuaane gnabtaa ndzoo.

<sup>27</sup> Dzigo racse me pxeel me tib menGUIIB ne tsiechug guic Juan.

<sup>28</sup> Güey menGUIIB co len ladzguiib pchug zho guic Juan. Bdziñ zho, zhoobsew tib len plat bdeed zhow lo ndzoo, dzigo güey ndzoo güeydeed ndzoo lo xniaa ndzoo.

<sup>29</sup> Zeene bin xpëedscuel Juana, dzigo güey zho güeylis zho me ga güeyqueets zho me.

*Bguiaan Jesús gaay mil miech*

*(Mt. 14:13-21; Lc. 9:10-17; Jn. 6:1-14)*

<sup>30</sup> Zeene laa gza xpëedscuel Jesús bdziñ lo me stib, psilo zho bzodiidz zho lo me grëse tel zha güey zho, grëse tel zha güeyseed zho miech. Per miech guizhiu ne ndxie lo me, zha ne rbi, zha ne rdziñ; haxta ni riobd gow me grë xpëedscuel me. Dzigo rëb me lo zho:

<sup>31</sup> —Mazd golgotsaa guio ne tib zatne zitlaa lo grë miech rii, zeena grieelo gdziiladz to niip.

<sup>32</sup> Dzigo bzëeb me tib len barcw grë me zho, laa zho zie.

<sup>33</sup> Nzian zha ne gon zie me, beenbey zho ne mew. Dzigo ndal miech ne no grë guiedz gax co brie, rias zho zie zho glole zho bdziñ zaatne no gdziñ me.

<sup>34</sup> Zeene biet me len barcw, gon me laa grë miech guizhiu co ndxiele ga. Pquia zdoo me zho gon me scataa ndxie zho zootle grë mëcwxiiil yeen ne guiend xbaxtor, dzigo psilo me nzian grë ncuaane pseed me zho.

<sup>35-36</sup> Gol bdze dze co, wbig xpëedscuel me lo me rëb zho:

—Mazd gudz lo grë miech qui guey zho na, zeena guiob tsie zho grë guiedz ne ndxie dib gax i, tsiesi zho ncuaane gow zho; sac gon laa dze bdzele, ni choot miech guiend nu.

<sup>37</sup> Pquiab me rëb me lo zho:



—To go<sub>l</sub>deed ncu<sub>a</sub>ane gow zho.  
Rëb<sub>ch</sub>aa zho lo me:  
—¿Pe zhizhe dimi ne yqu<sub>i</sub>in gziuu  
guietxtil ne gow grë<sub>t</sub>aa miech qui?

<sup>38</sup> Dzigo b<sub>n</sub>abdiidz me lo zho, rëb  
me:

—¿Bla guietxtil ziaadnie to? ¡Go<sub>l</sub>wi  
dien!

Ze<sub>e</sub>ne biire zho güeyso zho, rëb<sub>ch</sub>aa  
zho lo me:

—Loxaque gaay guietxtil ziaad, ni  
ziaad chop me<sub>l</sub>.

<sup>39</sup> Dzigo b<sub>n</sub>abey me bzob grë miech  
co, wdzeepaaw bioogse lo guizh  
ngua ne zëëb ga ndxie zho. Tib  
dzoonga tib dzoonga zho bre,

<sup>40</sup> zaatne bre tib gayoo zho, zaatne  
breegaa gro<sub>l</sub> gayoo zho.

<sup>41</sup> Dzigo bzhe<sub>n</sub> me gza gaay gui-  
etxtil co, ni grop me<sub>l</sub> co, blis lo me  
bui me nëz gbaa, bdeed me xqu<sub>i</sub>zh lo  
Dios. Blozh ga, beengro<sub>l</sub> me guietx-  
til co, zigse rdeed mew lo xpëëds-  
cuel me, scase scase noguiiz zhow lo grë  
miech co. Scaque been<sub>n</sub> me grop me<sub>l</sub>  
co.

<sup>42</sup> Grëse miech co, dow zho haxta  
zaatne bieltaa zdoo zho.

<sup>43-44</sup> Miech tafa, zha bguise rgaa zig  
gaay mil; ni ze<sub>e</sub>ne blozh dow zho,  
scase ncu<sub>a</sub>ane nroob biaan<sub>n</sub>, biodzë  
tsiipchop chicuid bio grë guietxtil co,  
bio grë me<sub>l</sub> co.

### *Rzë Jesús lo nisdo*

(Mt. 14:22-27, 34-36; Jn. 6:16-21)

<sup>45</sup> Ze<sub>e</sub>ne blozh ga, b<sub>n</sub>abey Jesús  
xpëëds<sub>c</sub>uel me bzëëb zho le<sub>n</sub> barcw,  
ze<sub>e</sub>na zienerga zho tedquia zho stib  
nëz ro nis co, gdzi<sub>n</sub> zho guiedz ne lë  
Betsaid; laa me bi<sub>i</sub> blëz ga, nozonëz  
me grë miech co.

<sup>46</sup> Blozhse bzonëz me zho, dzigo  
güey me tib guic gui zob gax ga,  
güeyzodiidznie me Dios.

<sup>47</sup> Zig rguets liuw, laa barcw ne zie  
xpëëds<sub>c</sub>uel me ga no lo nis co. Laa me  
zo ga tipse me,

<sup>48</sup> ran<sub>n</sub> me rlu ib gacd csëëniob zhow,  
sac rriee me rtsire mew. Merle  
guimbe liuw, tibaque ze<sub>e</sub>ne gon<sub>n</sub> zho  
laa me bdzi<sub>n</sub> zaatne zie zho ga; tib lo  
nis co ziezë me, rac me zig nac ze<sub>e</sub>ne  
tibted me lo zho.

<sup>49</sup> Ze<sub>e</sub>ne gon<sub>n</sub> zho laa me<sub>n</sub> co sca  
ziaad-zë lo nis co, bdzieb zho, bropt-  
sie zho rnee zho:

—¡Tib ndziin i gon<sub>n</sub> ziaad i!

<sup>50</sup> Sac grëse zho ran<sub>l</sub>o zho laa me sca  
ziezë lo nis co. Dzigo b<sub>n</sub>ee me lo zho  
rëb me:

—¡Gdziebde to, naa zia<sub>l</sub> nu!

<sup>51</sup> Ze<sub>e</sub>ne laa me bie<sub>p</sub> le<sub>n</sub> barcw ne  
zie zho ga, laa me co blëz; dzigo maz-  
draa bzee zdoo zho.

<sup>52</sup> ¡Per ib riend zho cho nac me,  
niicle ne gon<sub>l</sub>e zho been<sub>n</sub> me milagr  
nroob co bguiaan<sub>n</sub> me miech guizhiu  
co!

<sup>53</sup> Ze<sub>e</sub>ne laa zho bdzi<sub>n</sub> stib nëz ro  
nis co, zaatne nac xta<sub>n</sub> zha Gene-  
saret, dzigo laa zho pxidoo xbarcw  
zho ro nis ga.

<sup>54</sup> Loxaque biet me le<sub>n</sub> barcw laa  
grë miech co been<sub>n</sub>beyle me.

<sup>55</sup> Rias zho güey zho grë guiedz co,  
güeynie zho diidz laa me bdzi<sub>n</sub> ga.  
Dzigo psilo grë miech co rxob zho  
zhimguidz zho lo yag, rdzi<sub>n</sub>nie zho  
zho lo me zaatne rontaa zho no me.

<sup>56</sup> Zaatne gdzi<sub>n</sub>taa me, niicle guiedz  
nrooba, niicle guiedz lasa, rbee grë  
miech co zhimguidz zho rienie zho  
zho zaatne nac le<sub>n</sub> guiedz; ga r<sub>n</sub>ab  
zho lo me siguiel<sub>l</sub> me maase ni lar ne  
mbixse me xen<sub>n</sub> grë me<sub>n</sub> rzac<sub>n</sub>ë co. Ni  
grëse zha ne rzhe<sub>n</sub> xab me, riac zho.

## 7

### *Ncu<sub>a</sub>ane runctal xtol<sub>l</sub> miech* (Mt. 15:1-20)

<sup>1</sup> Tib dze, bdzi<sub>n</sub> bla zha farisé, ni zla  
maistr ley ne ziaad nëz Jerusalén, lo  
Jesús.

<sup>2</sup> Dzigo gon<sub>n</sub> zho blalaa zha ne nac  
xpëëds<sub>c</sub>uel Jesús, ze<sub>e</sub>ne laa zho row  
rguiibd zho nia zho zigne nacpaa grë  
zhiwseed xme<sub>n</sub>gol zho.

<sup>3</sup> (Nac zha farisé, ni grësegaa zha  
Israel tel<sub>n</sub>e tsard nia zho zigne nac  
xcostumbr xme<sub>n</sub>gol zho, ible rowd  
zho; sac ziana<sub>l</sub>dox zho mi<sub>n</sub>e nac cos-  
tumbr.

<sup>4</sup> Ze<sub>e</sub>ne rbire zho lo lgui, ib no mod  
ne riar nia zho dzigora<sub>a</sub> rzob zho  
row zho. Nzian grë wseed co psan<sub>n</sub>  
xme<sub>n</sub>gol zho ziana<sub>l</sub> zho, zig nac zha

riar grë tas, grë cant, grë xtsiin rotie zho mine niaa guiib, ni grë lo bangw ne rzob zho row zho.)

<sup>5</sup> Dzigo rëb zho lo Jesús:

—¿Pe nacne zienald xpëedscuel luu mine blu xmengol ne? ¿Pe nacne squize nia beed zho i row zho?

<sup>6</sup> Pquiab Jesús rëb me lo zho:

—Nlipaa mine bnee Isá, men ne biaad pteed Xtiidz Dios, zeene znu pquiaa me:

Grë miech rii, rquiaalose zho runnon zho naa,

rond zho diidz gun zho mine rnabey naa.

<sup>7</sup> Paat rquiind riaad zho riaadgan zho naa;

sac niapse guicle zho riab grë wseed ne quialu zho lo miech.

<sup>8</sup> Sac tel to gon, nosaan to grë mine rnabey Dios, lel grë xcostumbr miech zienal to.

<sup>9</sup> Xcostumbr to nac mine mazdraa rioxco to, laa mine rnabey Dios quiasan to tib lad.

<sup>10</sup> Led znu gon rnee ley ne bdeed Dios lo Moisés: “Gon pxoz luu, gon xniaa luu”, ni no stib mine rnee: “Zha ne quie pxoz, quiegaa xniaa, ib none guet zho.”

<sup>11</sup> Laa to lel rnee to, zac gund miech xyudar xmengol zho, telne bloogonle zho pe nac ncuaane rieguial gdeed zho lo me.

<sup>12</sup> Tole rdeete diidz ga gun zho xyudar pxoz zho, xyudar xniaa zho.

<sup>13</sup> Tib ladle gon rsan to Xley Dios ga sca run to, lëepaaze grë costumbr ne biaannie to, ni quiasangaa to lo zha ne ziaadquia, min co noxcoraa to. Ni nzianraa grë falt ne squi quiayun to.

<sup>14</sup> Dzigo bnee me lo grëraa miech ne ndxie ga, rëb me lo zho:

—Golquiaadiag mine gni naa lo to nu, ni goltsoxco guien to zha naca.

<sup>15-16</sup> Golgacnan ganle: Grë ncuaane rdzin zdoe miech, led mincod runctal xtol zho; sinque grë ncuaane ntseeb ne rza zdoe zho, min co nac mine runctal xtol zho.

<sup>17</sup> Laa zeene laa me bdzin ro yu grë xpëedscuel me, dzigo bnabdiidz zho

lo me dien zha nac diidz ne sca rëb me lo grë miech co.

<sup>18</sup> Rëbchaa me lo zho:

—¿Pe niicle to riendaquew dzigo lëe? ¿Pe riende to, grë ncuaane row miech, led mincod runctal xtol zho?

<sup>19</sup> Sac grë ncuaane row zho rdzinda len zdoomban zho, zhaa zaatne rdzina. Grë guielwagw, len bziuud zdoose zho, len zhitripse zho rieteda, rlozh ga rriegaw xcuerp zho.

Ga blu me lo zho ganle, grëse ncuaane nac guielwagw lëda runctal xtol miech.

<sup>20</sup> Ni rëb me lo zho:

—Mine rza zdoomban miech, min co nac mine runctal xtol zho.

<sup>21</sup> Sac zdoomban zho rza grë ncuaane ntseeb ne run zho, zig nac: zeene rio zho grë zhgab yozh, zeene run zho grë guielyozh,

zeene rban zho, zeene rut zho samiech zho,

<sup>22</sup> zeene rionie zho zha ne nacd tsieeld zho,

zeene rzoobladz zho ncuaane rap stib miech,

zeene run zho grë guielntseeb,

zeene rquidie zho,

zeene rien zho run zho grë ncuaane ndzinlid,

zeene në rac zdoe zho ran zho cho zha ne stibnoded,

zeene rzhixcuaa zho diidzguizh,

zeene racniats zho,

zeene run zho grëraa ncuaane paat rquiind.

<sup>23</sup> Grëse ncuaane ntseeb rii, zdoomban miech rzaw, ni lëew nac mine runctal xtol zho.

*Biac xpëed tib wnaa zit*

*(Mt. 15:21-28)*

<sup>24</sup> Ga brie Jesús, laa me zie nëz Tiro. Zeene bdzin me nëz co ga bdziel tib yu ne blëz me, gocladz me choot niacnand ne laa me no ga; per brieeloda, znuse bien diidza.

<sup>25-26</sup> Zeene bin tib wnaa Sirofenis laa Jesús bdzin ga, dzigo güey me, sac noguitnie mendox tib xpëed me. Zigne bdzin me pquiitsgzhib me lo Jesús, rnab me tsiegunxoon Jesús mendox co. Tib wnaa zit nac wnaa co;

<sup>27</sup> dzigo rëbchaa Jesús lo me:

—Blëz niip dien. None glo mēēd gow, nonguiēda cuee ne quiet nia mēēd gdeed new lo mēcw.

<sup>28</sup> Pquiab wnaa co, rēb me:

—Nli scaw, zigne rnee luu i; per niicle mēcwa led rio ma zhan mezh rtop ma grē minē rrieengaa nia mēēd.

<sup>29</sup> Dzigo rēbchaa Jesús:

—¡Squiw nagon! Lēēgazha i rnee luu. Peet tsieniedraa guic luu naa sca; bzē, laa mēndox ne nosacsi xpēēd luu bichele.

<sup>30</sup> Laa wnaa co zey. Zeene bdzin me lidz me, gon me inē laa xpēēd me nixse lo lon, per laa mēndox co psaanle win.

### *Biac tib meṅ ne rcuaat*

<sup>31</sup> Ga brieē Jesús, güeyted me nēz Sidón. Sidón brieē me bdzin me ro Nisdoo Galilé stib, zaatne nac xtan zha Decápolis.

<sup>32</sup> Ga bdziṅnie zho tib mgui lo me, rcuaat mgui ni nca rnee mgui; bnab zho lo me cxobnia me guic mgui gunḡiac me mgui.

<sup>33</sup> Dzigo blee me mgui lad grē miech ne ndxie ga. Zitlaa güeynie me mgui, ga psēēb me mzhugnia me gropse leṅ diag mgui ni bdēēb me zhindzuc me lo ludz mgui.

<sup>34</sup> Blozh ga, blis lo me bui me nēz gbaa, bneeladz zdo me, dzigo rēb me:

—¡Bzhial! (¡Efata!)

<sup>35</sup> Zigne sca bnee me, laa diag mgui co bzhial, niicle ludz mguiw laaw wban, laa mgui psilo bneenal.

<sup>36</sup> Dzigo pso Jesús diidz lo grē miech co, choot lo gzodiidzd zho zha biac mgui co.

Per laa ne rso me diidz lo zho, dzigole nēzrii, nēzrec rzodiidz zhow;

<sup>37</sup> sac rzedox zdo zho gon zho minē been me ga.

—¡Ncuaaṅe gzee zdo ne i been men qui! —rnee zho—. Zha haxta nguaat, haxta ngop, runḡiac me.

## 8

### *Bguiaaṅ Jesús tap mil miech (Mt. 15:32-39)*

<sup>1</sup> Leṅ dze co, miech guizhiu ne biire pcaalsa lo Jesús stib. Zeene goc tson ngbidza, guiēndraa ncuaaṅe gow zho. Dzigo bredz me xpēēdscuel me, rēb me lo zho:

<sup>2</sup> —Rquia zdo naa grē miech rii, tsonle ngbidz ga rac blanso zho nu, ni na quianiedraa zho ncuaaṅe gow zho.

<sup>3</sup> Teṅne squise zho gzonēz naa zho, glēbd zho, scow zho nēz, sac no zho zit brieē zho ziaad zho nu.

<sup>4</sup> Pquiab zho rēb zho:

—¿Per pe yguiaaṅ ne zho? ¿Pa guioxi ne quietxtil ne gow grētaa miech qui dan rii, naca zaatne guiēnd miech?

<sup>5</sup> Dzigo bnabdiidz me lo zho, rēb me:

—¿Bla quietxtil ziaadnie to i?

—Gadzaquew —rēb zho.

<sup>6</sup> Dzigo bnabey me grēse miech co bzob zho liu. Blozh ga bzheṅ me gza quietxtil co, bdeed me xquizh lo Dios; blozhse bdeed me xquizh lo Dios, zigse noyungrol mew, scase scase rdeed mew lo xpēēdscuel me rguiiz zhow lo grē miech co.

<sup>7</sup> Zienie zho zla meṅ las; bzheṅ me gza meṅ co bdeed me xquizh lo Dios, blozh ga bnabeyaque me zho bdiiz zho ma.

<sup>8-9</sup> Grēse miech co, dow zho haxta zaatne bieltaa zho dzigo laa me bzonēz zho. Rгаа zho maase tap mil, ni zeene blozh dow zho bii bdop gadz chicuid minē biaan.

<sup>10</sup> Blozh ga, laa me bzēēb leṅ barcw grē xpēēdscuel me, laa zho zie nēz xtan zha Dalmanut.

### *Racladz zha farisé gaṅ zho milagr (Mt. 16:1-12; Lc. 12:54-56)*

<sup>11</sup> Blalaa zha farisé ne no nēz co, zeene bin zho laa me bdziṅ ladz zho, güey zho rzadraa ncuaaṅe rlisqui zho lo me. Rnab zho glu me cho nac me, rēb zho lo me:

—Racladz no dziaṅlo no gon luu tib milagr, teṅne nli gbaa ziaad luu.

<sup>12</sup> Zeene gon me sca rac zho, bio me guielnē; dzigo haxta bneeladz zdo me, rēb me lo zho:

—¿Zha rnaraa milagr ne racladz to gan to? Gneli naa lo to ganle, ni stib milagr gon gandraa to.

<sup>13</sup> Blozhse sca rëb me lo zho, ndxieque zho ga laa me bzëeb len barcw laa me zie stib nëz ro nis co.

<sup>14</sup> Zeene brieë zho ga, zoladzd xpëedscuel me ney zho ncuane niow zho, lëe gdib tib quietxtil zienie zho len barcw.

<sup>15</sup> Laa zho zie, tibaque zeene rëb me lo zho:

—Golguien gon, napaa noyac-wet to lo zhincobi zha farisé, lo zhincobigaa rey Herod.

<sup>16</sup> Zeene bin zho sca rëb me, bza zdoo zho rnee zho:

—Ne gon me nagon ziaadnied ne quietxtil gane squi rnee me.

<sup>17</sup> Bien me sca rnee zho, dzigo rëbcha me lo zho:

—¿Pe nacne rnee to ziaadniede to quietxtil? ¿Riende to lëe zha rne naa? Ndip nac zdoo to gane riende tow.

<sup>18</sup> ¿Pa rquiin lo to, pa rquiin diag to ne laaw zob?

<sup>19</sup> ¿Pe rsoladzde to zeene gaayaque quietxtil ni bgaaw bguian naa gaay mil miech? ¿Bla chicuid biodzë mine biaan hor co?

Pquiab zho rëb zho:

—Tsiipchopa.

<sup>20</sup> Dzigo rëbcha me:

—Zeene waa gadzaque quietxtil co, ni bguian naa tap mil miech, ¿bla chicuida biaan?

—Gadz chicuida —rëb zho.

<sup>21</sup> Dzigo rëb me lo zho:

—¿Pe niicle nana riendaque to pe rne naa?

### *Biac tib men ne rcow lo*

<sup>22</sup> Bdziñ Jesús guiedz ne lë Betsaid, ga güeynie zho tib mgui ne rcow lo lo me, bnab zho cxobnia me guic mgui gunguiac me mgui.

<sup>23</sup> Dzigo bzhen me nia mgui güeynie me mgui zaatne nacle ro guiedz co. Ga bdëeb me zhinzuc me len bziaalo mgui, ni pquiaania me zhits guidlo mgui; blozh ga bnabdiidz me lo mgui dien pe ranle mgui palal.

<sup>24</sup> Zeene laa mgui bui, rëbcha mgui:

—Ranle naa niina nagon laa miech ziezë; per masaque ran naa zho zig rlu grë yag.

<sup>25</sup> Dzigo biire pquiaania me zhits lo mgui. Zeene laa mgui bui stib, ndiple rwi mgui laa lo mgui biacle. Grëse ncuane ran mgui, niicle zitraaw niini ran mguiw.

<sup>26</sup> Dzigo bzonëz Jesús mgui nëz lidz mgui, pso me diidz lo mgui tib nëz guey mgui, choot lo tsiezodiidz mguiw lad guiedz.

### *Bnee Pedr cho nac Jesús*

*(Mt. 16:13-20; Lc. 9:18-21)*

<sup>27</sup> Blozhse ga, laa Jesús brieë ga grë xpëedscuel me laa zho zie nëz Cesarea de Filipino, zieted zho grë guiedz las ne ndxie nëz co. Laa zho no nëz, tibaque zeene bnabdiidz me rëb me lo zho:

—¿Cho dien ron to rnee miech nac naa?

<sup>28</sup> Pquiab zho, rëb zho:

—No zho rnee Juan Bautista, no zho rnee Líw, men ne biadteed xtiidz Dios padzeela; nogaa zho rnee no cho stib men ne ziadteed xtiidz Dios.

<sup>29</sup> Dzigo rëb me lo zho:

—¿To waa, cho rzac to nac naa?

Pquiab Pedr, rëb Pedr lo me:

—¿Luu nac Men ne zëeble diidz ga cxeel Dios guiaad lo guidzliu!

<sup>30</sup> Dzigo pso me diidz lo zho choot lo gneed zhow.

### *Bzeet Jesús zha gun miech me*

*(Mt. 16:21-28; Lc. 9:22-27)*

<sup>31</sup> Bded ga, psilo Jesús bzeet me lo grë xpëedscuel me zha csacsi miech me. Rëb me nroob grë ncuane cteed zho me; grë zha non lo menguiedz, grë pxoz nroob, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieëban.

<sup>32</sup> Grëse mine ted me, laaw nozodiidz me lo zho.

Gon Pedr sca rnee me, dzigo bredz Pedr me, blisqui Pedr lo me dien pe nacne rnee me laa me guet.

<sup>33</sup> Zeene gon me zha rzë xtiidz Pedr, zoque Pedr ga biecw me bui me lo grëraa xpëedscuel me, goctox me rëb me:



—¿Biche lo naa nu men̄dox! Zienied guic luu mine rnabey Dios, sinque laa guic luu zienie mine racladz luu.

<sup>34</sup> Dzigo blunia me lo grē miech ne ndxie ga, yquiaadiag zho mine gnee me; rēb me:

—Zha ne racladz sēēb xnēz naa, none cueeladz zho zho, none lēb zho guiaadnal zho mine rnabey naa, niicle tel̄ min̄ co yquiaaqui csacsi miech zho. Nodne yquia zdoos zho xquielmban zho.

<sup>35</sup> Sac zha ne yquia zdoos xquielmban, lel̄ znu nitlo zho; sangue zha ne sca cueeladz xquielmban porne rleyne zho naa, porne rleyne zho grē Diidz Ndzon rii, zha co ygaa tib guielmban ne mazdraa ndzon.

<sup>36</sup> Nana, tel̄ zha ne gun̄lo grēse ncuaane no lo guidzliu rii. ¿Pa yquiin grē ncuaan̄ co lo zho, tel̄ lēew yquiaaqui laa zho guey gabil?

<sup>37</sup> ¿Niacxe zrieelo gdziib zho dimi co laa zho len̄ gabil?

<sup>38</sup> Naa ne nac naa Men̄ ne pxeel Dios zial̄ naa lo guidzliu, zha ne ctoladz guiab zho lo grē miech ngoopdol̄ rii laa zho no xnēz naa, o ctoladzniegaa zho xtidz naa, scaque naa stoladznie naa zho gal̄ dze ne laa naa guial̄ stib. Dze ne guial̄nie naa grē anjl̄, ni glu naa grē guiel̄ndzon ne rap Dios.

## 9

<sup>1</sup> Ni rēb me lo grē miech co:

—Gneli naa lo to ganle, nzian grē zha ne ndxie nu niina ib tedsod gar-  
daque guet zho, bii zan̄ zho ganle  
zeene laa Dios glu ne nli men̄ rnabey  
nac me.

### *Bdzēēlo Jesús*

*(Mt. 17:1-13; Lc. 9:28-36)*

<sup>2</sup> Goca xoop ngbidz, brieē Jesús gza me Pedr, Jacob ni Juan, güey zho bzo-  
quia zho tib guic gui glaa.

Bdziñ zho glaa guic gui co, tibaque  
zeene gon̄ zho laa me bdzēēlo.

<sup>3</sup> Masaque rquiabni xab me,  
nquitsbie rnaw; ni tib miech grieelod  
scataa mbe quiib lar.

<sup>4</sup> Gonlo zho zeene laa Lí ni Moisés  
(grop zha ne biadteed xtiidz Dios glo)  
bdziñaque, laa zho nozodiidznie me.

<sup>5</sup> Dzigo rēbchaa Pedr lo me:

—Maestro, ¿ne nligaa wena guiaan  
ne nu! Laa no gzaa tson̄ yu yag xiid̄  
win nu tso to: tiba tso luu, tiba tso  
Moisés, stiba tso Lí.

<sup>6</sup> Rdzieb Pedr gza Pedr schop zha  
co, lo dzeb co niicle riendaque Pedr pe  
rnee Pedr.

<sup>7</sup> Tibaque znuse bdop tib xcow  
pquia ngali zaatne zo zho ga; dzigo  
bin zho zēēb tib tsi men̄ co lo xcow co,  
rnee me:

—Lēē xpēēd naa i gon̄, rleyne naa  
me. Golgon mine rnee me.

<sup>8</sup> Lēēlēd biecw lo zho rwi zho, choot  
gon̄draa zho, Jesússe zo lo zho ga.

<sup>9</sup> Blozhse ga, laa zho wbique ga.  
Laa zho ziezēēb dan noyet zho cho  
gui co, zeene rēb me lo zho:

—Mine gon̄ to gon̄, choot lo gneede  
tow. Golcuēz haxta gal̄ dze ne grie-  
eban Men̄ ne pxeel Dios.

<sup>10</sup> Nacne choot lo bneed zhow, per  
psilo zho gza tson̄ zho rnabdiidzlsa  
zho, zha mod grieeban tib zha ne  
gutle.

<sup>11</sup> Dzigo bñabdiidz zho lo me, rēb  
zho:

—¿Bay zha nacne rnee maistr ley,  
glo Lí no guiaad stib, dzigoraā guiaad  
Men̄ ne zēēble diidz ga cxeel Dios?

<sup>12-13</sup> Pquiab me rēb me lo zho:

—Nliw, ible nacle diidz ne glo Lí  
guiadseed miech gon̄ zho xtiidz Dios,  
per laa me biaadle; ni zigne bzeetse  
grē zha ne biadteed xtiidz Dios ted  
me, scase been̄ miech me. Scaque  
Men̄ ne cxeel Dios ga, rnee lo Xti-  
idz Dios nroob csacsi miech me, ible  
gan̄dzed zho me.

### *Biac tib niib ngop*

*(Mt. 17:14-21; Lc. 9:37-43)*

<sup>14</sup> Zeene bdziñ Jesús zaatne bñan̄  
grēraā xpēēdscuel me ga, gza me Pedr  
Jacob ni Juan; gon̄ zho miech guizhiu  
ne ndxie lo zho; blalaa zha ne nac  
maistr ley zo lo zho ga, nodil̄diidznie  
zho.

15 Grë miech co, zeene gon zho Jesús, rley zho, rias zho güeydzieelo zho me güeyquiaa bdiuzh zho me.

16 Dzigo bñabdiidz me rëb me:

—¿Pe nadien squitaa nodildiidz to?

17 Lad grë miech co pquiab tib zho, rëb:

—Maestro, lo luu zialnie naa tib xpëed naa gunguiac luu win; ib gacđ gnee win sac noguitnie mendox win.

18 Tel pataa zo win, zeene laa ma rzëeb zdoo win rron ma win liu; ga nix win rdzib mtsiin ro win, ni row lay win; nrooble noyo win lëbđraa win së win. Blansonie naa win nu, dzigo bñab naa lo xpëedscuel luu guncxoon zho mendox co, per brieelod zho.

19 Dzigo rëbchaa Jesús lo zho:

—¿Pe na squitaa miech nad nac to, ib rnalode to Dios! ¿Palal tiemp ne so naa gne naa lo to? ¿Ncuaane cxeđwđraa naa lo to squi nac to! ¿Goltenie mëedwin qui nu!

20 Güey zho güeynie zho mëedwin co lo me. Zigne gon mendox co me, psilo beencxidz ma win, znuse biab win liu, rtiibxto win ni rdzib mtsiin ro win.

21 Dzigo bñabdiidz me lo pxoz win, goc palal dze psilo sca rac win.

Rëbchaa pxoz win:

—Bii mëdyeen win psilo squi rac win.

22 Pe zhidaa vüelt zieron mendox qui win lo gui, zieron ma win lo nis ne, racladz ma gut ma win. Bzhiguiel telne zrieelo gunguiac luu xpëed naa, ¿pquia zdoo naa, been tib guielnaac beenguiac win!

23 Rëbchaa Jesús lo me:

—¿Zha rnee luu “telne zrieelow”? ¿Zha ne dib zdoo rnalo Dios, grëse ncuaane racladz zho, zaca!

24 Lëelëd pquiab pxoz mëed co, rëb me:

—Rnalo naa Dios, per bzhiguiel been xyudar naa, ¿dib zdoo naa gnalo naa me!

25 Zeene gon Jesús laa grë miech co rbigberaa, dzigo goctox me lo mendox ne noguitnie mëed co, rëb me:

—Mendox, luu gon psan ngop mëed rii, luu psan nguaat win. ¿Niinagazh

psaan win, ib gbiiredraa luu ygaal luu win!

26 Horco biire beencxidz ma mëed co stib, masaque roptsiedan ma laa psaan win, nixtaque win ga, zootle gutle win. Nzian grë miech co, tibaque nan zho gutle win.

27 Laa zeene bzhen Jesús nia win, blis me win ga, laa win bzoli.

28 Zeene bđzin Jesús len yu ne rbëz me grë xpëedscuel me, bñabdiidz zho lo me rëb zho:

—¿Bay pe nacne brieelod no ndziuncxoon no mendox co?

29 Dzigo rëbchaa me lo zho:

—Grë mendox ne sca nac, rquiuin dib zdoo ne gnab ne lo Dios dzigo zrieelo guncxoon ne ma.

### *Bzeet Jesús laa miech csacsi me*

*(Mt. 17:22-23; Lc. 9:43-45)*

30-31 Brie Jesús ga grë xpëedscuel me, laa zho wbire nëz xtan Galilé stib. Racladz me cho gacnan pa lo no me; sac len dze co nzian grë ncuaane noseed me zho. Haxta bzeet me zha csacsi miech me, rëb me:

—Naa ne nac naa Men ne pxeel Dios, ible ziaab naa ladznia miech, ni zut zho naa. Per zeene gac tson ngbidz gut naa, laa naa grieegan.

32 Per ib rienđ zho pe nacne sca rnee me, niicle gnabdiidzгаа zho rdzieb zho gnabdiidz zhow lo me.

### *¿Cho nonraa?*

*(Mt. 18:1-5; Lc. 9:46-50)*

33 Bđzin zho guiedz ne lë Capernaum; grëse zho laa zho ndxie len yu ne blëz zho, tibaque bñabdiidz Jesús lo zho, rëb me:

—Golnë dien, ¿pe scataa nodildiidz to zeene ziaad ne nëz?

34 Ni tib zho ib pquiabd, sac zeene ziaad zho nëz quianeelsa zho dien cho nac zha ne nonraa.

35 Dzigo bzob me, bredz me zho gza tsiipchop zho rëb me lo zho:

—Zha ne racladz gac zho zha non, none guiaanwin zho gac zho zig tib ngundziin lo samiech zho.

36 Dzigo bzo me tib mëedbgui win glowtaa lo zho; blozh ga bdeedz me win ni rëb me lo zho:

37 —Zha ne ngab xnëz naa, ni gleynie zho tib mēēdwin zig mēēdwin rii, guṅ naa cuent naa ga rleynie zho; ni zha ne sca rleynie naa, yele meṅ ne pxeel naa ga rleynie zho.

38 Blozh ga, rēbchaa Juan lo me:

—Maestro, bdzion no goṅ bzeet tib zha co lē luu zeene bencxoon zho menḁox; nacne nli blisqui now lo zho, sac goṅ, led yed zho nacgrē ne.

39 Dzigo pquiab me rēb me lo zho:

—¡Guṅscade to! Sac goṅ zha ne sca rzeet lē naa zeene ruṅ zho milagr, niacxe lēēque zha glēē lo naa.

40 Zha ne nacnie ne, glēēd zho lo ne.

41 'Golḁacnaṅ sca gaṅle, grēse zha ne gdeed maase tib zhigaque nis guie zha ne ngab lo naa, ib tedsod stsire Dios miṅe been zho ga.

42 Sangue zha ne yguib guṅctal zho xtol zho ne nac zho zig tib mēēdlas yeen; mazd lēētaa miṅe ted zha co sobdoo tib quie molin zhobxtil yquiaw yaṅ zho tsieron zho zho nisdo.

*Choot gdeete diidz guiab lo dol*  
(Mt. 18:6-9; Lc. 17:1-2)

43-44 'Zha ne rien nia zho nac miṅe rquiaqui ruṅctal zho xtol zho, mazd cchuggazh zho nia co zho. Peet nacd maase tibaque nia zho zob totsaque ygaa zho guielmban ndzon ne gdzind dze lozh, lēdle zob gropa ni laa zho guey gabıl, lo beldox ne gdzind dze guuu.

45-46 Telne rienḁaa zho ni zho nac miṅe rquiaqui ruṅctal zho xtol zho, mazd cchuggazh zho ni co zho. Peet nacd maase tibaque ni zho zob totsaque ygaa zho guielmban ndzon ne gdzind dze lozh, lēdle zob gropa ni laa zho guey gabıl, lo beldox ne gdzind dze guuu.

47 Tel tib logaa zho nac miṅe rquiaqui ruṅctal zho xtol zho, mazd cueegazh zho bziaalo co zho. Peet nacd maase tibaque bziaalo zho zob totsaque ygaa zho guielmban ndzon co, lēdle zob grop bziaalo zho ni laa zho guey gabıl.

48 Zaatne nac gabıl, ib gdzind dze ne guuu lo bel co; grē mziog ne ndxie ga, gdzind dze ne nitlo ma.

49 Grēse zha ne gdzin ga, masaque cuib gui lad zho zig rbib zed lad bēēl.

50 'Zig nac zed, rquiindoxa zeene nzhiw, per zeene nzhida, ¿pa dien yquiina? Scaquegaa to nagoṅ golḁac zig zed ne nzhi, zeena yquiin to lo guidzliu rii; niowse golḁannie samiech to, glēēlsade to.

## 10

*Zha ne rsēbtsieel*  
(Mt. 19:1-12; Lc. 16:18)

1 Brieē Jesús Capernaum güeyted me grē guiedz ne ndxie nēz xtan zha Judé, grē guiedz ne ndxie nēz dan ro guiubee Jordán. Miech guizhiu ne rcaalsa lo me, dzigo rsilo me rseed me zho zigne runtaque me.

2 Tib vuelt bdzin bla zha farisé go-cladz zho niuṅgüet zho me, par dien pe nxind me tib diidz; bnabdiidz zho rēb zho:

—Maestro, mgui ne racladz csēbtsieel, ¿pe gnē luu pe zrieelo csēbtsieel zho?

3 Pquiab me rēb me lo zho:

—¿Zha zho psan Moisés diidz lo to?

4 Pquiab zho rēb zho:

—Tel Moisésa, bdeed me diidz csēbtsieel zha ne racladz csēbtsieel, lēēraasi none yquia tib guits gdeed zho lo wnaa zaatne raquiet ne laa zho psaan wnaa.

5 Dzigo rēbchaa me lo zho:

—Ne squicxe waa miech nad nac to ib ronde to diidz, miṅ co nacne biaan ley co.

6 Per ib nodne csēbtsieel miech; sac goṅ, zeene psan Dios grētaa ncuaaṅe no, tib nēz miech bzaa me: tib mgui ni tib wnaa.

7-8 Gacxe waa, mgui ne rtsieelnia ib none greezhaa zho lo pxoz zho, lo xniaa zho, par gbannie zho wnaa ne nac tsieel zho; laa zho gactipse grop zho. Nacdreaa zho chop miech, sinque laa zho rac tibaque.

9 Dios nac meṅ ne psan ycatsieel miech, cho dzigo nac miech par quiits zho miṅe rnabey me.

10 Laa zeene bdzin me len yu ne rbëz zho, dzigo bñabdiidzaque xpëedscuel me min co lo me stib.

11 Dzigo rëbchaa me lo zho:

—Mgui ne rsëbtsieel ni rbannie zho stib wnaa, noguitnie zho wnaa ne gocpaa tsieel zho ga, ni dol ga run zho.

12 Niicle wnaagaaw, wnaa ne rsëbtsieel ni rbannie zho stib mgui, lëëque dolaque ga run zho.

*Beenlay Jesús mëédlas*

*(Mt. 19:13-15; Lc. 18:15-17)*

13 Tib vuelt nzian men ne bdzin bdzinne zho xpëédlas zho lo Jesús, par cxobnia me guic win gunlay me win. Grë zha ne nac xpëédscuel me, lel psilo zho ndox zho lo grë zha ne bdzinne grë mëédlas co.

14-15 Zeene gon me sca quiayun zho, wbinladz guic me, dzigo rëb me lo zho:

—Ctsirede to grë mëédlas yeen qui, golsaan guiaad win lo naa. Sac gon grë mëédlas yeen, ni zha ne nac zigne nac win, zha co nac zha ne sëëb ygab lo Dios.

16 Blozhse sca bnee me, dzigo psilo me bdeedz grë mëédlas co, ni pxobnia me guic win beenlay me win.

*Bzodiidznie tib zha ricw Jesús*

*(Mt. 19:16-30; Lc. 18:18-30)*

17 Laa Jesús nole nëz tsie me stib guiedz, zeene rias tib niib nguieg bdzin pquitsgzhìb lo me, rëb niib lo me:

—Nan naa luu nac tib men ne noseed miech, ni tib men wen nac luu; ÷bnë dien pe nac mine gun naa zeena ygaa naa guielmban ndzon ne gdzindraa dze lozh?

18 Rëbchaa Jesús lo niib:

—Rnee luu lëë tib men wen nac naa. ÷Nligaaw, Diosse nac men wen!

19 Nanle luu ganle zha nac Xley Dios, rneew:

Gute luu samiech luu,  
telne nole tsieel luu, tsonied luu zha  
ne led tsieeld luu,  
cuand luu samiech luu,  
yquiadiidzguizhd luu samiech luu,  
yquidieed luu samiech luu,  
gon pxoz luu, gon xniaa luu; bin mine  
rnabey me luu.

20 Dzigo pquiab niib rëb niib lo me:

—Maestro, grësew zigne bzeetse luuw i, ni tiba gard quits naa wlal ne nac naa zha nguieg.

21 Dze rwi Jesús lo niib, rleynie me niib.

—Stibaque mine rquiin gun luu —rëb me—, güey, güeyto grëse ncuaane quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne ygaa luu gbaa. Lozh ga, bleeladz xquielmban luu dënal zhits naa.

22 Zeene bin niib co sca rëb Jesús, biab guielnë niib, mbanse rac niib laa niib zey; sac ne nligaa nroob ncuaane quianie niib.

23 Dze rwi me gon me laa zha nguieg co zey, dzigo rëb me lo xpëédscuel me:

—÷Grë zha ne squi rapchen, rza-cxuu zho par sëëb zho xnëz Dios gnabey me zho!

24 Zeene bin zho sca rëb me, rzee zdo zho. Dzigo biire me bnee me rëb me lo zho:

—Xin, ÷ne nligaa tib miech ne ndziib rap chen, rzacxuu zho sëëb zho xnëz Dios gnabey Dios zho!

25 Mazd znuse rded tib camell guieer guzh, lëdle sëëb tib zha ricw xnëz Dios.

26 Zeene bin zho sca rëb me, mazdraa bzee zdo zho, rñabdiidzlsa zho rnee zho:

—Bay, ÷chose dzigo nac zha ne zrieelo sëëb xnëz Dios?

27 Dze rwi me lo zho, dzigo rëbchaa me:

—Par miech zootle tsod zha ne grieelo sëëb xnëz me. Sangue me, nan me no zho; sac tsod ncuaane grielod gun me.

28 Dzigo rëb Pedr lo me:

—Tel no, grëse ncuaane rdziaap no laa no psana, laa no ziaadnal zhits luu.

29 Pquiab me rëb me:

—Grëse zha ne psan lidz, psan zho bets zho, bzian zho, xniaa zho, pxoz zho, xpëéd zho, liun zho, porne rililadz zho naa ni rililadz zho Xtiidz Ndzon Dios;



<sup>30</sup> nli nroob guielnë gan zho, per gneli naa lo to ganle: grëse ncuaane sca psan zho ga, lo guielmban riique laa zho gbiire gana stib tib gayoogaw tib tiba; ni ib tedsod zgaa zho tib guielmban ndzon ne gdziñdraa dze lozh.

<sup>31</sup> 'Nli zig nac niina, no zha ne rzac zha non nac zho, per zeene gal dze co peet gacnond zho; laa zha ne rzac zho peet nond, gal dze co lalga gac zho grë zho.

*Biire bzeet Jesús laa miech csacsi me*

*(Mt. 20:17-28; Lc. 18:31-34)*

<sup>32</sup> Brieë Jesús ga laa me zie Jerusalén. Nzian grë zha ne zienal zhits me, nerse me lo zho laa zho zie. Grë zha ne nac xpëëdscuel mew, rzee zdo zho; laa grëraa miech co per nli rdzieb zho. Dzigo bredz me gza tsiipchop zha ne nac xpëëdscuel me ga, psilo me bzeet me grëse tel zha ziaadyob ted me, rëb me lo zho:

<sup>33</sup> —Bii zan to ganle, naa ne nac naa Men ne pxeel Dios, niina ne laa ne gdziñ Jerusalén ible zielo zho naa ladznia grë zha ne nac pxoz nroob ni grë zha ne rseed miech ley. Grë zha co gnab guet naa, ni san zho naa ladznia grë zha ne nacdreaa zha Israel.

<sup>34</sup> Xidznie zho naa, stsuc zho lo naa, zguin zho naa, ni haxta zut zho naa; per dze ne gac tson ngbidz gut naa laa naa grieëban.

<sup>35</sup> Dzigo wbig gax Jacob grop Juan (xingan Zebedé) lo me, rëb zho:

—Maestro, laa no gnab tib favor lo luu, per racladz no siguiel luu gun luuw.

<sup>36</sup> Dzigo rëb me:

—¿Pe favor ne racladz to gun naa lo to?

<sup>37</sup> Rëbchaa zho:

—Laa no racladz, siguiel luu zioob no cue luu gal dze ne laa luu nac rey rnabey luu, tib no nëz derech stib no nëz revés.

<sup>38</sup> Pquiab Jesús, rëb me lo zho:

—¿Ni to gon riend pe rnab to! ¿Pe zlëb to gan to grë guielnë ne gan naa, pe zlëb to ted to grë mine teed naa?

<sup>39</sup> Rëbchaa zho:

—¿Zlëëb no!

Dzigo rëbchaa me lo zho:

—Nli zan to guielnë ne gan naa, ni zded to mine teed naa;

<sup>40</sup> per ne gnedz naa diidz sob to cue naa nëz derech o nëz revésgaa, led naad raguial min co; laa lugar co biaanle par zha ne nole diidz ygaaw.

<sup>41</sup> Grëraa zha ne nac xpëëdscuel me, zha ne nacgza Jacob ga grop Juan, zeene bin zho zha rzë xtiidz Jacob grop Juan blëë zho lo zho.

<sup>42</sup> Dzigo bredz Jesús zho grëse zho, rëb me lo zho:

—Ran to ganle zha run grë zha ne rnabey grë guiedz ne ndxie lo guidzliu, ni grë zha ne nac zha non, masaque rnabey zho samiech zho zigne racladztaa zho.

<sup>43</sup> Sangue to gon, gunscade to. Lo gza to, zha ne racladz gac zho zha non lo to, laa ne glu zho zha non zho, none glo zho guiaanwin gac zho zig tib ngundziin lo to.

<sup>44</sup> Scaquegaa, zha ne racladz gnabey lo to, none glo cseed zho gun zho mine gnabey to zho.

<sup>45</sup> Golgan ganle, niicle naa ne nac naa Men ne pxeel Dios, ziald naa par gnabey naa miech, sinque laa naa zial par gac naa tib ngundziin lo zho, ni gded naa xquielmban naa zeena laa zho lo grëtaa ncuaane ngadoo zho. Ni nanpaa naa miech guizhiu ne laa.

*Biac tib men lë Bartimé*

*(Mt. 20:29-34; Lc. 18:35-43)*

<sup>46</sup> Sca no grë miech guizhiu co nëz, laa zho bdziñ guiedz Jericó. Laa zeene laa grë miech taf co zieriee ro guiedz co, laa tib mguie ciegw lë Bartimé zob ga rtop gon (xingan tib men lë Timew).

<sup>47</sup> Zeene bin Bartimé ye Jesús (Nazaren) ziaad ga, psilo me nguiedz rbedz me, rnee me:

—¿Jesús, men xtii rey David, pquia zdo naa!

<sup>48</sup> Nzian grë miech co ndox lo me nan zho guioog ro me, per dzigole mazdraa nguiedz roptsie me, rnee me:

—¿Jesús, pquia zdo naa!

<sup>49</sup> Dzigo p̄cuëēzni Jesús, bnabey Jesús güeytsedz zho me. Bdziñ zho lo me, rēb zho:

—¡Ligier guso i! Dē ganle laa me rbedz luu.

<sup>50</sup> Zeene bin mew, haxta squi bron me lar ne mbix me, guso me ga laa me bdziñ lo Jesús.

<sup>51</sup> Dzigo rēbchaa Jesús lo me:

—Bnē nadien, ¿pe racladz luu gun naa?

Pquiab me rēb me:

—Maestro, racladz naa guiac lo naa.

<sup>52</sup> Dzigo rēbchaa Jesús:

—¡Niinagazh laa lo luu gan! Laa luu biac, sacne dib zdoo luu bnalo luu naa. Ligier na bzē.

Horcogazha laa lo meñ co psilo bui, laa me zienal zhits Jesús.

## 11

### *Bdziñ Jesús Jerusalén*

(Mt. 21:1-11, 18-19; Lc. 19:28-40; Jn. 12:12-19)

<sup>1</sup> Zhile gdziñ zho Jerusalén, laa zho zie gax zaatne riaan guiedz Betfagé ni guiedz Betain, nēz dan squi riaan Gui Oliv, zeene bredz Jesús chop xpēēdscuel me

<sup>2</sup> rēb me lo zho:

—Goltsie guiedz win ne ndxie danse lo ne i. Zigne sēēb to lad guiedz, laa tib burr quiadoo ga, ni tib miech gard sob lad ma; dzigo golxadz ma, goltēnie ma nu.

<sup>3</sup> Tel cho gnabdiidz pe nacne noxadz to ma, dzigo golguiab: meñ ne rnabey ne meñ co rquiin ma, na zigne lozh xtsiñ ma guiaadsan no ma.

<sup>4</sup> Laa zho zie, nligaaw laa zho güeydziel burr co quiadoo ma tib ro nēz, gax tib ro yu.

<sup>5</sup> Blalaa zha ne zo ga, zeene gon zho laa zho noxadz ma, rēbchaa zho:

—¿Pe gun to burr qui dzigo na, ne noxadz to ma?

<sup>6</sup> Dzigo pquiab zho zigne rēbse Jesús lo zho ga, nacne bdeed meñ co diidz laa zho zienie ma.

<sup>7</sup> Bdziñnie zho ma lo Jesús lēēque lar ne rbix zho pxob zho lad ma, bzobga me ma.

<sup>8</sup> Nzian grē miech co zigse zie Jesús, scase scase ner zho rta zho lar ne rbix zho rded me, nogaa zho rchoo nia grē pe yag rdziñ zho zaatne rded me.

<sup>9</sup> Grēse zho, niicle zha ne ner lo mew, niicle zha ne nal zhits mew, rley zho nguiedz roptsie zho, rnee zho:

—¡Zha ndzontaa meñ qui pxeel Dios lo ne!

<sup>10</sup> ¡Zha wentaa ziaad me gac me zhirey ne! ¡Me gnabey zigne bnabey pxozgol ne rey David! ¡Zha ndzontaa Dios ne zob gbaa!

Sca nguiedz roptsie zho rleynie zho me, laa me bdziñ Jerusalén.

<sup>11</sup> Bdziñ me Jerusalén, güey me güeyso me len yadoo. Blozhse bui me dipse len yadoo, laa me brieaque ga laa me zie nēz Betain grē xpēēdscuel me, sac bdzele dzew.

<sup>12</sup> Biini liu, loxaque zieriee zho Betain laa me psilo rcaabedz.

<sup>13</sup> Zitlaa ziaad me gon me tib zhan yag guigw, nxii nac low zēēb zhiblaga; dzigo zie me zieso me dien pe gdziel tib guigw low gow me. Bdziñ me zaatne zoba, ni tib guigw guiend low loxaque zhiblagsew scataa zēēb, sac gardpaa gdziñ mēē ne rquia guigw.

<sup>14</sup> Dzigo rēb me lo yag guigw co:

—¡Squítta nagon guiaan luu! ¡Gdzindraa dze yquia nex lo luu gow miech!

Grēse xpēēdscuel me, bin zho sca bnee me lo yag co.

### *Blee Jesús miech len yadoo*

(Mt. 21:12-17, 20-22; Lc. 19:45-48; Jn. 2:13-22)

<sup>15</sup> Bdziñ zho Jerusalén, bzēēb me len yadoo. Psilo me blee me grēse miech ne quiayun lgui ga, zigtaa zha ne no wtow, zigtaa zha ne no wziw. Grē zha ne no wto palom, grē zha ne notsēē dimi, ptiixche me xmez h zho.

<sup>16</sup> Blozh ga, pso me diidz choot nodraa sēēbnie grē ncuaan co len yadoo,

<sup>17</sup> rēb me lo zho:

—Led znu gon rnee lo Xtiidz Dios: “Zaatne nac lidz naa nu, nu guiaad

grëse miech ne ndxie lo guidzliu sodi-idznie zho naa.” Laa to gon quiayun to lugar rii zig tib zhibliee ngbaan.

<sup>18</sup> Grë zha ne nac pxoz nroob ni grë zha ne rnabey lo maistr ley, bin zho sca rëb me, dzigo psilo zho rguib zho dien zha gdeeda diidz gut zho me. Per rdzieb zho lega gnaaz zho me, sac ndal miech ne rley rquiaadiag zhiwseed me.

<sup>19</sup> Zeene laa liu pcow, laa me wbique Jerusalén stib grë xpëedscuel me.

<sup>20</sup> Biini liu co, laa zho zieded zaatne zob yag guigw ne sca güeyguib me nex lo ga, gon zho laaw bidzle dib low.

<sup>21</sup> Dzigo beencsoladz Pedr mew, rëb Pedr:

—Maestro, bui ganle laa yag guigw ne bdzibdee luu ga bidzle.

<sup>22</sup> Pquiab me rëb me:

—Zha ne dib zdoo rnalo Dios,

<sup>23</sup> gneli naa lo to ganle: Niicle ncuaane mazdraa ngan gnab zho lo me, zun mew; lëëraasi none dib zdoo zho gliladz zho zac mine rnee zho, ni palal gacchopd guic zho.

<sup>24</sup> Golgona sca ganle, grëse ncuaane gnab to lo Dios, dib zdoo to golliladz ne zneedz mew, dzigo sca zac mine rnab to.

<sup>25</sup> Ni zeene gnab to lo Dios, golsoladz dien pe no cho rlëënie to, dzigo golgun zho perdon; zeena scagaa, Pxoz to men ne zob gbaa zun me to perdon tel pe nactaa xtol to.

<sup>26</sup> Sac telne gunde to samiech to perdon, dzigo niicle megaa, gund me to perdon.

### *Cho rnabey Jesús*

*(Mt. 21:23-27; Lc. 20:1-8)*

<sup>27</sup> Blozh ga, laa zho bdzinaque Jerusalén stib. Lëëtaaque laa Jesús quiawi dib len yadoo, zeene bdzin bla zha ne nac pxoz nroob, bla zha ne nac maistr ley ni zha ne nac men non lo menguedz,

<sup>28</sup> rëb zho lo me:

—¿Cho dien nac luu ne squitaa ziaadnabey luu len yadoo? ¿Cho rnabey luu?

<sup>29</sup> Pquiab me rëb me lo zho:

—Laa naa gun tib wnabdiidz lo to. Telne stsire to low, dzigo gni naa lo to ganle cho rnabey naa ne laa naa noyun grë ncuaane noyun naa.

<sup>30</sup> Golnë dien, ¿cho pxeel Juan biaad me pchoobnis me miech? ¿Pe Dios pxeel me, te miechsew ye?

<sup>31</sup> Psilo zho rnabdiidzlsa zho, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to mine bnee Juan?”

<sup>32</sup> Tel na dzieetsgaa ne: “Miechse pxeel Juan, grieequiadaque ne.”

Rdzieb zho niab zho miech pxeel Juan, sac grëse menguedz nan ne nli Dios pxeel Juan biadteed Juan xtiidz Dios lo miech.

<sup>33</sup> Dzigo mazd mine been zho, rëb zho:

—Ndiond no dien cho pxeel Juan.

Dzigo rëbchaa me lo zho:

—Niicle naagaa nagon, grielod gni naa lo to cho rnabey naa quiayun naa grë ncuaan rii.

## 12

### *Xcuent zha ne pquianap liu*

*(Mt. 21:33-46; Lc. 20:9-19)*

<sup>1</sup> Dzigo psilo Jesús bzodiidz me tib cuent, rëb me:

—Tib mgui name, nroob lbë uv beenbni me lo liun me. Psilo me ptse me igose liu co, bzaa me zaatne gzhii grë uv co, ni bzaa me tib yu glaa zaatne sob zha ne yquiaanapa. Blozh ga, blediin me liu co lo bla zha ne ran liu, dzigo laa me brieegaa, laa me zey zit.

<sup>2</sup> Zeene gol mëe ne ral uv, pxeel me tib xmoz me lo zha ne quianap liu co, parne gdeed zho uv ne rieguial me ycaa me.

<sup>3</sup> Per lel bnaaz zho moz co, bdiin zho zho; blozh ga, scase bzonëz zho zho.

<sup>4</sup> Dzigo biire men ne nacchen liu co pxeel me stib moz, scasaque been zho: gocntseeb zho lo moz co, pquiaago zho zho, bdiin zho zho, blë zho guic zho.

<sup>5</sup> Biireque me pxeel me stib zho, zha cole beet zho. Ni bii pxeel me

nzianraa zho, no zho psiwee zho, no-gaa zho beet zho.

<sup>6</sup> Tibaque zeene loxaque xinganse me riaan. Rleyniedox me xpëed me, per laa me pxeel me, bza guic me rëb me: “Ganse zho xpëed naaw, zon zho mine gnee me.”

<sup>7</sup> Zeene gon zho laa xpëed me bdziñ, rëbchaa zho: “iLëe zha qui nagon guiaan nie liu rii! iGolgotsaa dziuut ne zho zeene guiaana lo ne!”

<sup>8</sup> Dzigo bnaaz zho men co, beet zho me, güeyga zho güeyron zho me tib lad lo liu co.

<sup>9</sup> Sca nagon —rëb Jesús—, been zha ne quianap liu co. Golnëse nadien, ¿pe nac mine gun bizhuan liu co? Ib tedsod zeene laa me guiaad, znitlo me zha co; zhaale lo zha ne csañ me liun me.

<sup>10</sup> Golsoladz ganle znu rnee lo Xtiidz Dios:

Quie ne psëeb zha ne nozaa yu, ni nanð zho lëepaa quie co nac mine rnazdziits yu.

<sup>11</sup> iNcuane gzee zdoo new! Sac Dios bnabey sca goca.

<sup>12</sup> Zeene gon zho sca bnee me, go-cladz zho naazgazh zho me ga; sac bien zho mine run zho ga bzeet me. Per bnaazd zho me, sac rdzieb zho grë miech guizhiu ne ndxie ga, nacre zeyga zho.

*Pe nonguiel quizh miech contribu-cion*

(Mt. 22:15-22; Lc. 20:20-26)

<sup>13</sup> Zhisaque goca, laa zho pxeelaque zla zha farisé, ni zla zha ne nacie Herod, zie zho ziegungüet zho Jesús par dien zha cxin me tib diidz; zeena sca gdeeda diidz tsiezo zho me lo wx-tis.

<sup>14</sup> Bdziñ zho lo me, rëb zho:

—Maestro, ndion no niapse diidzli rnee luu, led lega gund luu mine rnee tib miech, sac tibeyse nac miech lo luu, ni laa luu zianal cseed zho mine nac diidzli zeena sëeb zho xnëz Dios. Min co nagon, nacre racladz no gnë luu lo no dien, ¿pe nonguiela ga rdeed no dimi ne razh lo rey te nonguiel da ye? ¿Pe zdizhraa no dimi co, te mazd dizhdraa now ye?

<sup>15</sup> Bienga Jesús racladz zho gungüet zho me, dzigo rëbchaa me lo zho:

—¿Pe nacre racladz to gungüet to naa? Golguiid tib xpes to nu ganle.

<sup>16</sup> Dzigo bdeed zho tib pes lo me. Blozh ga, rëbchaa me lo zho:

—Golnë lo naa dien, ¿cho nu quia lo pes rii? ¿Cho lë nu quia low?

Pquiab zho rëb zho:

—Lëe rey Roma i, lëe lë me i quia low.

<sup>17</sup> Dzigo rëb me lo zho:

—Mine nonguiel ycaa rey, goldeeda lo rey; scaquegaa mine nonguiel ycaa Dios, lo Dios goldeeda.

Zeene gon zho sca ptsire me lo xtiidz zho, rdziendraa zho zha gun zho.

*¿Pe nli zrieeban miech?*

(Mt. 22:23-33; Lc. 20:27-40)

<sup>18</sup> Bdziñaque zla zha saducé, rëb zho lo me:

<sup>19</sup> —Maestro, znu pquiaa Moisés lo libr ley ne psan Moisés lo no: tel glo mgui guet lo wnaa ne nac tsieel mgui ni gopd wnaa mëed, dzigo none betsaque zho ptsieelna wnaa co stib, zeena gap wnaa mëed ne guiaan xlu-gar xpëed zha ne gut ga.

<sup>20</sup> Bio tib dii zha co znu bzhaac, gadz bets nac zho. Ptsieelna zha ne nac zha gol, zeene laa zho gut, biaan xpëed zho.

<sup>21</sup> Dzigo ptsieelna stib bets zho wnaa co, blozh ga gutaque zha co, pasë zho nsañ mëed. Ptsieelnaque me stib zho, goc zho tson, niicle zha co psandaque mëed.

<sup>22</sup> Sca sca haxta bza gza gadzse zho ptsieelna me, per ziese zho ni tib zho psand mëed; tibaque zeene yeque me, laa me gut.

<sup>23</sup> Mine racladz no gacndion no, ¿chopaa dzigo gac tsieel wnaa co gal dze ne laa zho grieeban; sac gza gadzse zho ptsieelna me?

Sca bnabdiidz zho, sac nac zha saducé rliladz zho ne nli zdziñ dze grieeban zha ne ret.

<sup>24</sup> Dzigo pquiab Jesús rëb me lo zho:



—I nagon laa to rxin. Mine naca riende to zha nac Xtiidz Dios, nicle rliladzde to zrieelo me gun me ncuaan ro ne gard gan miech.

<sup>25</sup> Sac gon, zeene gal dze ne laa gre miech grieeban, niicle mguiw niicle wnaaw led yedraa hor co dien cho ctsieelnia zho; sac hor co laa zho gac zig nac gre anjl ne no gbaa.

<sup>26</sup> Stiba, ible nli zrieeban mengut. ¿Pe gard ganle glab to lo guits ne pquiaa Moisés, zaatne ziaad zeene bin Moisés tsi Dios tib lo yag zarz nguia ne noyazbel? Rëb Dios lo Moisés: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.”

<sup>27</sup> Niicle ne gutle gza zha co hor co, per zeene sca bnee Dios, gase rlu ne mban zho no zho lo me. Sac tel Dios, nacd me xDios mengut sinque xDios zha mban nac me. Ise nagon rlu, peet riende to gane squi rnee to.

*Xley Dios mine mazdraa non*  
(Mt. 22:34-40)

<sup>28</sup> Zeene sca nozodiidznie Jesús zha saducé co, gon tib maistr ley niapse diidzli ptsire me lo xtiidz zho. Dzigo wbig maistr ley co, bnabdiidz me lo Jesús, rëb me:

—Bzhiguel bnë lo naa dien, lo gre xley Dios, ¿pa min nac mine mazdraa non?

<sup>29</sup> Pquiab Jesús rëb me:

—Min rii nac mine mazdraa non, znu rneew: “Grëse to men Israel, golquiaadiaga ganle: men ne nac Dios ne rliladz ne, tibaque me ni me nac men ne rnabey ne.

<sup>30</sup> Dib zdoo to, dib xalm to, dib guielbiini ne no guic to, dipse xfuers to golleynie me.” Lëë tiba nu,

<sup>31</sup> laa stiba znu rnee: “Bleynie samiech luu zigne rleyne luu luu.” Tsodraa stib ley ne mazdraa non lo grop ley rii.

<sup>32</sup> Dzigo rëbcha maistr ley co lo Jesús:

—Diidzli rnee luu maestro, tibaque Dios no.

<sup>33</sup> Ni none dib zdoo ne, dib guielbiini ne no guic ne, dipse xfuers

ne gleyne ne me; ni gleyne ne samiech ne zigne rleyneque ne ne. Min co nac mine mazdraa non, lëdle gzëeg ne pe cos cogon ne lo me o dien peragaa gun ne.

<sup>34</sup> Zeene gon Jesús sca niini rzë xtiidz me, rëbcha Jesús lo me:

—Zhile runfalt sëeb luu xnëz Dios, gnabey me luu.

Blozh ga, grëse zha ne ndxie ga, ni stib zho biazhdraa zho pe nabdiidz zho lo me.

*¿Cho xpëed nac Crist?*

(Mt. 22:41-46; Lc. 20:41-44)

<sup>35</sup> Sca noseed Jesús miech len yadoo ga, zeene bnabdiidz me lo zho, rëb me:

—¿Bay zha nacne rnee gre maistr ley, lo xtii rey David ga grieequia Men ne nacle diidz ga cxeel Dios?

<sup>36</sup> Sac zeene bdeed Espiritu Sant guielbiini lo rey David, znu bnee David:

Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëë lo luu, csañ naa zho ladznia luu.”

<sup>37</sup> Gase nagon telne nli zha xtii David gac Men ne nole diidz cxeel Dios ga, ¿zha nac dzigo ne lëëque David rnee ne me rnabey David?

Grë miech guizhiu ne ndxie ga no quiaadiag zhiwseed me, per nli rley zho ron zho zha rnee me.

*Zha run gre maistr ley*

(Mt. 23:1-36; Lc. 11:37-54; 20:45-47)

<sup>38</sup> Laa me noseed gre miech co, zeene pso me diidz lo zho rëb me:

—Ible tsienalde to mine run maistr ley gon. Sac gre zha ne nac maistr ley, rdziladz zho racw zho lar nool haxta zhits ni zho rbiba, rdziladz zho ndooladz yquiaabdiuzh miech zho zeene gdzieel zho zho dib ro nëz.

<sup>39</sup> Zig nac len yadoow, zha nac zha ne rzob lo xcan zaatne rzob gre zha non, zeene tsiegaa zho tib lni lidz miech, lëëpaaze zha nac zha ne rzob groļ mezh zeene laa wagw gac.

<sup>40</sup> Ni rlozh ga, rio zho rla zho tel pe ncuaane rapse gre wnaa viud; ni

parne peet guiabd miech lo zho, xtse rzo zho rzadraa pe lay ne gool zho.

'Sca gon nac zho, per ib tedsod zeene laa grë miech ngoopdol quizh xfalt, zha nac zha ne mazdraa nroob caxtigw yгаа.

*Gon ne bdeed tib wnaa viud  
(Lc. 21:1-4)*

<sup>41</sup> Blozh ga, güey Jesús güeysob me gax zaatne zhoob grë alcanci. Dzese rwi me ran me zha riesan miech gon len grë alcanci co; ndal grë zha ricw rdzin, nroob dimi rсан zho.

<sup>42</sup> Tibaque zeene bdzin tib wnaa viud, tib men prob nac me, ye me laa me psan chop gaay win len alcanci co.

<sup>43</sup> Dzigo bredz Jesús xpëedscuel me, rëb me lo zho:

—Gneli naa lo to ganle, mazdraa gon nroob non gon ne bdeed wnaa viud qui, lëdle gon ne bdeed grëraa zha qui.

<sup>44</sup> Sac zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me mine rnalopaa me gziuu pe gow me, per laa me bloogona.

## 13

*¡Nsin golso!*

*(Mt. 24:1-28; Lc. 17:22-24; 21:5-24)*

<sup>1</sup> Laa Jesús zieriee len yadoo nroob co grë xpëedscuel me, zeene rëb tib zho lo me:

—Maestro, ¡bui ganle zha niaataa yadoo rii! ¡Zha rnataa grë quie ngol ne niaaw!

<sup>2</sup> Pquiab me rëb me lo zho:

—Nligaa lëe zha niaataaw. Per nicle squitaa gon ran tow niina, zdzin dze ne nitlow dib nacsew. Ni stib quie qui guiaandraa zigne squi zhobxcuaaw i.

<sup>3</sup> Brie me ga, laa me zie gza me zho. Bdzin zho cho Gui Oliv, ga bzob zho grë zho. Nieenpaa ro yadoo co zaatne zob zho ga; dzigo wbig Pedr, Jacob, Juan ni Ndrés lo me, gza tap zho bnabdiidz lo me rëb zho:

<sup>4</sup> —Bzhiguiel bnë lo no dien, ¿pa hor dzigo gac mine bzeet luu ga? ¿Zha nac señ ne tso zeene laaw csilo gac?

<sup>5</sup> Dzigo psilo me bnee me lo zho, rëb me:

—Nsin golso zeena choot yquidiede to.

<sup>6</sup> Sac nzian zha ne greequia gnë zho zha nac Men ne zëëble diidz cxeel Dios; ni nzian miech ne yquidie zho.

<sup>7</sup> 'Zeene gon to nëzrii nëzrec noyac dil, ib gdziebde to; sac ible none gac grë min co, ni lëdsew ga.

<sup>8</sup> Sac garaa csilo grë dillox, grë guiedz nroob laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho. Nëzrii nëzrec csilo gni grë zho-dox, nzian zaatne gan miech gbin. Ni lega loxaque mine rsilosew ga, sac nroobraa guielnë ne gan miech lozh ga.

<sup>9</sup> 'Zeene laa grë ncuaan rii rsilo noyac, ¡nsin golso! Sac hor co laa miech tsiezo to lo zha ne rnabey yadoo, ni lëëque len yadoo ga quin zho to; ziezo zho to lo grë zha non, lo grë zha rnabey, loxaque ne no to xnëz naa. Ga nagon gdeeda diidz gnee to Xtidz naa lo grë zha co,

<sup>10</sup> sac ib none brieets bliaallex lo grëse miech zeene gal dze ne laa guidzliu nitlo.

<sup>11</sup> Zeene tsiezo zho to lo wxtis, tso de to zhgab dien pe guiab to lo wxtis; sac Espiritu Sant nac men ne gacnieñ to, ni mine csiaab me guic to min co gnee to.

<sup>12</sup> Len dze co, zio zha ne lëëque zha tsielo bets zho ladznia zha ne gut zho; zio zha ne lëëque zha tsielo xpëed zho ladznia zha ne gut zho; scaquegaa mëëda, zio zha ne lëëque zha gut pxoz zho, lëëque zha gut xniaa zho.

<sup>13</sup> Ible gandzed miech to, grëse zho glëe lo to sacne riladz to naa; per scagaa, grëse zha ne dziits so haxta lozh grë guielnë co, ible scaania Dios zho.

<sup>14</sup> 'Zeene gan to laa ncuaane ziaad gnitlo zo zaatne rieguiald sow, zigne bzeet profet Daniel (zha ne glaba, none guien zho zha naca), hor co golguib dien zha xoon to. Zha ne no grëraa guiedz ne ngab Judé, none tsie zho dan, ga tsietsolan zho.

15 Zha ne no glaa guic yu, none lëelëd xoon zho, ib guiabd zho sëeb zho len yu tsiebee zho ncuaane nachen zho.

16 Zha ne zogaa dana, ib gund zho ne laa zho tsie ro lidz zho tsixi zho xab zho.

17 ¡Prob grë men wnaa ne lëëtaque len dze co zoney xpëed, men ne quianiegaa mëdyeen ne bii radz!

18 Golnab lo Dios gande to guielnë co len mëe ne rac nal, sac ne nligaa guielnë nrooba.

19 Wlal ne biaan guidzliu haxta lo nadze, gard gan miech tib guielnëdox sca, ni gdzindragaa dze ne gan zhow stib.

20 Telne csaan Dios nroob dze gac guielnë co, ni stib miech rii guiaandraa; per na por grë zha ne bzooblo me sëeb xnëz me, gdeete me diidz gaca nroob dze.

21 'Len dze co, tel cho zha gnë lo to: "Golwi ganle, lëe men rii nac Men ne nole diidz ga cxeel Dios", gnëgaa zho: "Golwi nec ganle, lëe me i", gliladzde tow.

22 Sac ndal grë zha ne greequia guiaadquidie miech, no zho gnë zha nac men co, nogaa zho gnë zha ziadteed Xtiidz Dios lo miech; ni zun zho grë milagr parne yquidie zho miech, parne yquidie zho haxta grë zha ne ngable lo Dios.

23 ¡Nsin sca golso! Ib cxende to, benque laa naa nilew lo to.

### *Ziaad Jesús stib*

*(Mt. 24:29-35, 42, 44; Lc. 21:25-36)*

24 'Zeene lozhse gan miech grë guielnëdox co, laa lo ngbidz ycow, gzi-inidraa mëe.

25 Grë mel ne ndziib gbaa, laa ma gliaal; grëraa ncuaane no gbaa, masaque nëzrii nëzrec gaca.

26 Horco bii zan zho ganle, zeene laa Men ne pxeel Dios ziad-zëeb glaa lo xcow con grë guielndzon con grë poder ne rap me.

27 Lozh ga laa me gnabey grë xanj me, tsie zho tsietop zho grëse zha ne ngab lo me, niicle zaatne mazdraa zit lo guidzliuw, mazdragaa zit gbaaw.

28 'Golzoob cuidad zha nac yag guigw. Led nanle to ganle, zeene laa grë zhicwa racnieen, ni rsilo rdzib zhiblaga, gase rlu ne laa mëe nëeg ziaadgaxle.

29 Scaquegaa nagon, zeene gan to laa grë mine rne naa lo to nu rsilo noyac, dzigo nanle to lëe dze co ziaadyoble.

30 Gneli naa lo to ganle, nzian miech ne mban niina bii zan zho zeene laa grë ncuaan co csilo gac; sac ible ncuaane gaca.

31 Zdzin dze nitlo gbaa, nitlo guidzliu, sangue mine rne naa lo to nu, nitloda, ible laaw none gac.

32 Lëëraasi choot nand dien pa dzew, dien pa horgaaw, per ni grë anjl ne no gbaa, per ni naa nanda; loxaque Pxoze naa nana.

33 Gacxe waa, nsin golso, golnab lo Dios; sac gon nande to dien pa hora.

34 'Nac cuent rii zig nac tib zha ne rrie zie tib guiedz zit. Zeene laa zho rrie, rсанse zho diidz dien pe gun tib tib moz ne guiaan ro lidz zho, ni rso zho diidz lo zha ne rquianap ro puert nsin so zho, ib gaguiesd zho.

35 Scadaa to nagon nsin golso, sac zig bizhuan yu co scaquegaa naa nande to pa hor guial naa, yase glanso naa tib bdze dze, tib grol guieel, wxingaa horne rcuedz gall, o ziaadyunmbegaa liu.

36 Nsin golso, zeena ine zobna to zeene laa naa glanso.

37 Mine rne naa lo to nu, laaw rne naa par grëse miech.

## 14

### *Bnediudz zho dien zha gnaaz zho Jesús*

*(Mt. 26:1-5; Lc. 22:1-2; Jn. 11:45-53)*

1 Schop ngbidz runfalt csilo lni Pascw, lni ne row zho guietxtil ne riotsd ncobi; grë pxoz nroob ni grë maistr ley, laa zho noguib dien zha ngueetsse gnaaz zho Jesús gut zho me,

2 rnee zho:

—Laa me no yгаа, per lëëraasi gnaazd ne me mer dze lni, sac miech

guizhiu ne ndxie lo lni dze co; zriee-  
quia nzian zha ne glisquiw.

*Pchoob tib wnaa nceit nex guic  
Jesús*

(Mt. 26:6-16; Lc. 22:3-6; Jn. 12:1-8)

<sup>3</sup> Leñ dze co, laa Jesús no guiedz  
Betain. Lëëtaaque laa me no mezh  
lidz Simón ne blan guiedz lepr, zeene  
bdziñ tib wnaa bdziñnie tiblo nceit  
nex, nosew tib leñ ncuaan win niaa  
niapse quie rbebni, tiblo nceit ni-  
azha. Dzigo blë wnaa co ncuaan win  
co, blozh ga pchoob me nceit co guic  
Jesús.

<sup>4</sup> Blalaa zha ne zobgrë Jesús ga,  
zeene gon zho sca been wnaa co, blëë  
zho, rëb zho:

—¿Pa rieguiala squi pxin zhlë wnaa  
qui nceit qui?

<sup>5</sup> Telne niaca mine ndow, nguizh-  
paa zhow tson gayoo pes plat, nquiin-  
paa dimi co ngaaza lo grë zha mban  
ne guiend pe yquiin.

Laa zho nolisquiw lo wnaa co,

<sup>6</sup> dzigo rëbchaa Jesús lo zho:

—Golsaan me. ¿Pe nacne rlisqui  
tow lo me? Led lega pxind mew, tib  
guielnaac nroob i been me lo naa.

<sup>7</sup> Telne nli rquia zdoo to zha ne  
guiend pe yquiin, zac ygad to lo zho  
stib dze, sac tibaque ran to zho;  
sangue naa zdziñ dze ne gbiche naa lo  
to, gandraa to naa.

<sup>8</sup> Laa wnaa qui been mine brieelo  
lo me, laa me pchoob nceit nex rii  
guic naa zeena nzhixcuaale xcuerp  
naa gal dze ne laa naa ygueets.

<sup>9</sup> Gneli naa lo to ganle, dipse lo  
guidzliu zaatne cseedtaa miech Xti-  
idz Dios, ible soladz zho wnaa rii, seet  
zho mine been me nu.

<sup>10</sup> Lo gza tsiipchop zha ne nac  
xpëëdscuel Jesús ga, brieë zha ne lë  
Judas Iscariot güeyzodiidznie Judas grë  
zha ne nac pxoz nroob, rëb Judas laa  
Judas gun me nregar.

<sup>11</sup> Zeene bin zhow, per nli rley zho  
ni rëb zho zdeed zho dimi lo Judas.  
Dzigo psilo Judas noguib Judas dien  
pa hor gdeeda diidz gun Judas me  
nregar.

*Dowxtseenie Jesús xpëëdscuel me*

(Mt. 26:17-29; Lc. 22:7-23; Jn. 13:21-30;

1 Co. 11:23-26)

<sup>12</sup> Mer dze ne rsilo lni Pascw, dze  
ne rowxtsee zho tib carner, ni rsilo  
zho row zho quietxtil ne rquiad ncobi  
lad, dze co bnabdiidz xpëëdscuel Jesús  
dien pa lo racladz me tsiegunlo zho  
ncuaane gowxtseenie me zho wdze  
co.

<sup>13</sup> Dzigo pxeel me chop zho  
Jerusalén, rëb me lo zho:

—Goltsie Jerusalén. Ga gan to  
tib mgui nzobyan tib re nis, dzigo  
goltsienal zhits me.

<sup>14</sup> Yu ne gan to sëëb me, golguiab  
lo bizhuan yu co: “Znu në maestro:  
¿Pa leñ yu me gneedz luu gac zaatne  
gowxtseenie me xpëëdscuel me wdze  
rii?”

<sup>15</sup> Dzigo ga glu me tib leñ yu nroob  
ne riaan glaa, nzhixcuaale lena,  
grële ncuaane yquiin no ga; dzigo ga  
golgunlo zhixtsee ne.

<sup>16</sup> Laa grop zha co brieë, laa zho  
zie. Bdziñ zho lad guiedz Jerusalén,  
nligaa laa zho bdziel yu co zigne rëbse  
me lo zho ga, dzigo psilo zho beenlo  
zho xtsee co.

<sup>17</sup> Bdze dzew, laa me bdziñ leñ yu  
co grë xpëëdscuel me.

<sup>18</sup> Laa me no mezh noyownie me  
zho, zeene rëb me lo zho:

—Laa naa gni lo to ganle, lëëque tib  
zha ne gon noyownie naa nu tsielo  
naa ladznia zha ne gut naa.

<sup>19</sup> Zeene bin zho sca rëb me, mban  
rac zho, dzigo psilo zho tibga tibga  
zho rnabdiidz lo me, rnee zho:

—¿Pe naaw?

<sup>20</sup> Pquiab me rëb me lo zho:

—Ladaque to no zho, zha ne nosëëb  
xcuun leñ xquien naa, lëë zho ga.

<sup>21</sup> Naa ne nac naa Men ne pxeel  
Dios, niina laa miech gut naa zigne  
raquietsew lo Xtiidz Dios; per, jprob-  
saxe zha ne tsielo naa ladznia zho!  
¿Mazd wen nie zho, ib niacd zho miech  
lo guidzliu!

<sup>22</sup> Laa zho noyow zeene bzhen  
Jesús tib quietxtil, bdeed me xquizh  
lo Dios, blozh ga beengrol mew dzigo  
bdiiz mew lo zho, ni rëb me:



—Golquiina, lëe xcuerp naa i gon.

<sup>23</sup> Ni bzhen me tib cop nroob vin, bdeed me xquizh lo Dios, blozhse bdeed me xquizh, dzigo bdeed me cop co lo zho, grëse zho go vin co.

<sup>24</sup> Ni rëb me lo zho:

—Lëe xchen naa i, miñe gzhiee par grëse miech ne sëeb xnëz Dios, sac lëe stib mod cub nu psan Dios parne sëeb miech xnëz me.

<sup>25</sup> Lëe lultm vuelt nu guie naa vin rii, sac zhaale stib vin cub ne guie naa zeene laa naa gdziñ zaatne rnabey Pxoze naa.

Dzigo psilo me biil me bla salm gza me zho.

### *Bzeet Jesús zha gon Pedr*

(Mt. 26:30-35; Lc. 22:31-34; Jn. 13:36-38) —Simón, ¿nixguies luu lëe? ¿Pe ni

<sup>26</sup> Blozhse biilnie me Dios grë me zho, dzigo laa me brieenie zho ga zienie me zho nëz Gui Oliv.

<sup>27</sup> —Ible saan to naa nawdze rii —rëb me lo zho—, sac scale ziaad lo Xtiidz Dios zaatne rnee: “Zdeed Dios diidz csiwee zho baxtor, lozh ga nëzrii nëzrec gliaal mëcwxiiil.”

<sup>28</sup> Sca gon zho naa, per zeene laa naa grieeban glole naa ga Galilé, ga cuëz naa to.

<sup>29</sup> Dzigo rëbchaa Pedr lo me:

—Niicle telne saan grë zha qui luu, sangue naa gon csaand naa luu.

<sup>30</sup> Pquiab me rëb me lo Pedr:

—Gneli naa lo luu ganle, guieel rigazh, gardle grop gall tsonle vuelt rëb luu runbeyd luu naa.

<sup>31</sup> Per tibaque nac xtiidz Pedr, rnee Pedr lo me:

—Niicle tel zaatne guet luu guet naa, per gunscad naa. ¿Pe nacne guiep naa runbeyd naa luu?

Scaque rnee grëraa zho.

### *Bzodiidznie Jesús Pxoze me Getsemani*

(Mt. 26:36-46; Lc. 22:39-46)

<sup>32</sup> Bdziñ Jesús zaatne lë Getsemani gza me zho, dzigo rëbchaa me lo zho:

—Nuse nagon golsob, laa naa ga gazodiidznie naa Pxoze naa.

<sup>33</sup> Horco psilo mban rac zdoo me, riabguieñe me, dzigo bredz me Pedr, Jacob ni Juan, bzënie me zho palal

<sup>34</sup> dzigo rëbchaa me lo zho:

—Mban rac zdoo naa, zootle zig zet naa lo guieñe rii. Nuse nagon golguiaan, per golsobna.

<sup>35</sup> Bzë me spalal, dzigo pquitsgzhib me haxta bdziñ lo me lo liu; psilo me bñab me lo Dios ne telne zrieelow mazd tete me grë guieñe ne no gan me,

<sup>36</sup> rëbchaa me:

—¡Papá, par luu grëse cos zrieelo gon luuw! ¡Bzhiguiel psilaa naa lo guieñe rii! Per telne grieeloda, miñe gnëtaa luu, sca gaca.

<sup>37</sup> Zeene biire me bdziñ me zaatne biaan gza tson zha co, gon me gzase zho nixguies; dzigo rëbchaa me lo Pedr:

—Simón, ¿nixguies luu lëe? ¿Pe ni palal blëebd luu nzobna luu?

<sup>38</sup> Golsobna, glnab lo Dios zeena yquild mendox to. Niicle ne squi lëbdraa xcuerp to sobna to, per glnab lo Dios, sac gon min co nac miñe racladz zhiespíritu to.

<sup>39</sup> Dzigo biire güey me stib, güeyzodiidznie me Dios; scaque miñe bñab me glo mincoque bñab me stib.

<sup>40</sup> Zeene bdziñ me lo zho, gon me laa zho bii nixguies. Ni rdziid zho pe guiab zho lo me.

<sup>41</sup> Laa zeene goc tson vuelt biire me güeynab me lo Dios, rëbchaa me lo zho:

—Lëew nagon, zacle na gaguies to, zacle gdziiladz to. Naa ne nac naa Men ne pxeel Dios, naataa laa hor bdziñ zeene laa grë miech ntseeb rii guiadnaaz naa.

<sup>42</sup> Golsieso, zeena zio ne; sac gon laa zha ne glu naa lo zho ziaadle nu.

### *Bnaaz zho Jesús*

(Mt. 26:47-56; Lc. 22:47-53; Jn. 18:2-11)

<sup>43</sup> Laa Jesús bii quianeeque, zeene laa Judas (tib zha ne nac xpëedscuel me) bdziñ, bdziñnie Judas tib dzoon zha ne pxeel grë pxoze ne rnabey, grë maistr ley ni grë zha non lo menquiedz Israel. No zho nzhen spad, nogaa zho nzhen yag.

<sup>44</sup> Biaanniele Judas zho diidz zha glu Judas cho nac Jesús, rëb Judas lo zho:

—Nanle to gon, zha ne gow naa bzhid cuas, lëe me ga; ligier golso golxen me, ib csaande to xoon me.

<sup>45</sup> Nligaaw, zigne bdziñ Judas bredz Judas Jesús; blozh ga dow Judas bzhid cuas me.

<sup>46</sup> Horco whig grë zha ne zienal zhits Judas ga bzhen zho me.

<sup>47</sup> Lo grë zha ne nacgza Jesús ga, hor co biasaque tib zho bdoob zho zhispad zho pchug zho tib diag xmoz men ne nac pxoz nroob.

<sup>48</sup> Dzigo rëbchaa Jesús lo grë miech co:

—¿Niacxe naa cho ngbaan, zha nac ne squitaa nzhen to spad, nzhen to yag ziadnaaz to naa?

<sup>49</sup> Blactaa dze name gon to noseed naa miech len yadoo, ¿pe nacne bnaazde to naa ga? Per ible laa grë ncuaan rii gon noyac zeena gac grë mine raquiet lo Xtiidz Dios.

<sup>50</sup> Grë zha ne nac xpëedscuel me ga, grëse zho bzhoon, tipse me psan zho ga.

<sup>51</sup> Tibaque mgui nguieg bii güeynal zhits me, tib lëse lar nquits mbix mgui; dzigo bnaaz zho mgui gocladz zho ye mgui nienie zho;

<sup>52</sup> per znuse brieë mgui len lar co, bzhoon mgui coletse mgui.

*Güeynie zho Jesús lo zhiwxtis zha Israel*

(Mt. 26:57-68; Lc. 22:54-55, 63-71; Jn. 18:12-14, 19-24)

<sup>53</sup> Ga brieenie zho Jesús bdziñnie zho me lidz men ne nac pxoz nroob. Grë pxoz rnabey, grë zha ne rnabey lo maistr ley ni grë zha non lo menguedz, laa zho pcaalsa ga.

<sup>54</sup> Ye Pedr, maase zit zit nal Pedr laa Pedr bdziñ xley men co. Bdziñ Pedr, güeysobga Pedr lo grë zha ne ndxienap, lëëtaque laa zho quiazdëe lo gui.

<sup>55</sup> Grë pxoz co, grë zha ne nac zhiwxtis zha Israel, laa zho ndxie nëz len yu co, quiaguib zho dien pe yquiaaqui zho gnab zho guet Jesús, quiaguib zho dien pe dol ne ycaadz zho me; per rdziel zho dien pew.

<sup>56</sup> Nzian zha ne pquidie rëb zho znu znu nac ncuaane noyun me, per

rrieequiad xtiidz zho; sac zhaase zhaase rnee zho.

<sup>57</sup> Tibaque zeene guso blalaa zho, bnexuu zho rëb zho:

<sup>58</sup> —Bdzion no gon rëb me laa me ctixche yadoo, lozh ga tsonaque ngbidz gzaalo me stiba; per led miechdraa nzaaw.

<sup>59</sup> Niicle scaw, rzëdaque xtiidz zho tipse.

<sup>60</sup> Dzigo hor co bzoli men ne nac pxoz nroob, bzo me glowtaa lo grë miech co, bnaabdiidz me lo Jesús rëb me:

—¿Pe nacne rquiabd luu? ¿Diidzli dzigo lëe nac grë mine rnee zho i!

<sup>61</sup> Dzese zo Jesús ib rquiabd me. Biireque men co bnaabdiidz me stib rëb me:

—¿Nligaa cho nac luu? Bnë tel nli Xpëed Dios nac luu, Men ne nacle diidz ga cxeel me lo guidzliu.

<sup>62</sup> Dzigo pquiab Jesús rëb me:

—Nliw, naa nac men co. Naa ne nac naa Men ne pxeel Dios, bii zan to ganle zeene laa naa zoob cue Dios nëz derech, ni zeene laa naa guieet gbaa zialzëeb naa lo xcow.

<sup>63</sup> Horco ptsiez pxoz nroob co xab me, sac blëe me bin me sca rëb Jesús.

—¿Pe mazdraa textigw ne racladz ne? —rëb me—,

<sup>64</sup> laa to binle ganle zha rzëtaa xtiidz me noguitnie me Dios. ¿Pe gnë to na zha gac me?

Grëse zho pquiab rëb zho, ib rieguiala guet me.

<sup>65</sup> Dzigo hor co blalaa zho laa zho psilo notsuc lo me. Pxidoo zho lo me ni rdeed puñet zho me, lozh ga rnee zho:

—Bnë dien, ¿cho ga bdiñ luu?

Ye grë zha ne quianap ga, rgap zho lo me.

*Rëb Pedr runbeyd Pedr Jesús*

(Mt. 26:69-75; Lc. 22:56-62; Jn. 18:15-18, 25-29)

<sup>66</sup> Laa Pedr bii zoque ley. Ga zo Pedr, zeene laa tib wnaa ne nac zhi-criad men rnabey co bdziñ;

<sup>67</sup> gon me laa Pedr zob gax lo gui nodzëe Pedr. Dze rwi me lo Pedr, tibaque zeene rëb me:

—¿Ye luu lëe rzënie Jesús, men Nazaret ne bdziñnie zho i?

<sup>68</sup> Per bneelid Pedr.

—Dieeñ pe rool luu —rëb Pedr—. Runbeyd naa meñ co.

Brieega Pedr zie Pedr nëz ro zawan, lëëtaque hor co pcuedz tib gall.

<sup>69</sup> Dzeque rwi wnaa co lo Pedr, dzigo rëbchaa me lo grë zha ne ndxie ga:

—¡Lëew, zha ne rzënie me nac mgui qui!

<sup>70</sup> Biire Pedr rëb Pedr runbeyd Pedr me. Wdzeepaa goca, biire zha ne ndxie ga rëb zho lo Pedr:

—Ne nligaa, ye luu rzënie meñ co. ¡Zha Galilé name nac luu!

<sup>71</sup> Dzigo psilo Pedr rzeet Pedr Dios rnee Pedr runbeyd Pedr Jesús, haxta rnee Pedr:

—¡Dios zobwi ganle, telne rned naa diidzli, maase cuibdee naa!

<sup>72</sup> Lëëtaaque hor co laa gall pcuedz stib. Dzigoraa psoladz Pedr xtiidz Jesús zeen rëb me lo Pedr: “Gardle grop gall, tsonle vuelte rëb luu runbeyd luu naa.” Dzigo mbanse rac Pedr, psilo Pedr biin Pedr guieñe co.

## 15

### *Güeynie zho Jesús lo Pilat*

(Mt. 27:1-2, 11-14; Lc. 23:1-5; Jn. 18:28-38)

<sup>1</sup> Ziadyiinile liuw, scase bii nchool rnaw, wbiire pcaalsa grë pxoz non grë zho zha ne rnabey lo maistr ley, grë zha non lo menquiedz ni grë zha ne nac zhiwxtis zho. Blozhse bneditidz zho, laa zho pxidoo Jesús güeyšan zho me lo Pilat meñ ne nac gobernador.

<sup>2</sup> Bdziñ me lo Pilat, bnabdiidz Pilat rëb Pilat lo me:

—¿Pe nli na luu nac zhirey zha Israel?

Pquiab me rëb me:

—Nliw.

<sup>3</sup> Tibaque quia grë zha ne nac pxoz non, rzadraa grë ncuaane rcaadz zho me.

<sup>4</sup> Nacne wbiire Pilat bnabdiidz Pilat lo me, rëb Pilat:

—¿Pe nacne rquiabd luu? Bui ganle zha nactaa grë ncuaane rcaadz dol zho luu.

<sup>5</sup> Bzee zdoo Pilat gon Pilat ible pquiabd me.

### *Bnab zho guet Jesús*

(Mt. 27:15-31; Lc. 23:13-25; Jn. 18:38-19:16)

<sup>6</sup> Gzobse lni Pascw rsilaa Pilat tib zha ne no ladzguiib, tel cho zha ne gnabtaa menquiedz laa.

<sup>7</sup> Len dze co no tib mgui lë Barrabás ladzguiib, ni zla zha ntseeb ne nacgza me, laa zho no ga sac nzian zha ne beet zho zeene gocntseeb zho lo gobiern.

<sup>8</sup> Nacne psilo grë miech co, rnab zho lo Pilat csilaa Pilat tib zha ne no ladzguiib zigne runtaque Pilat grëraa iz.

<sup>9</sup> Dzigo bnabdiidz Pilat lo zho, rëb Pilat:

—¿Cho racladz to csilaa naa? ¿Pe silaa naa meñ ne rnee zho zhirey to nu?

<sup>10</sup> Sca rëb Pilat lo zho, sac nanle me niapse por rlëe grë pxoz non co ran zho Jesús gane bnabey zho bgaa me güeyšan zho me ga.

<sup>11</sup> Per lel psilo grë miech co rnab zho csilaa Pilat Barrabás; ni lëëque grë pxoz co pquiil zho.

<sup>12</sup> Dzigo rëb Pilat lo zho:

—¿Zha dzigo racladz to gac men rnee zho zhirey to nu?

<sup>13</sup> Pquiab be grë miech co, roptsie zho rnee zho:

—¡Bnabey yquia me lo cruz!

<sup>14</sup> —¿Pe nac falt ne been me? —rëb Pilat—. ¿Pe nacne racladz to yquia me lo cruz?

Biire zho roptsie zho rnee zho:

—¡Bnabey yquia me lo cruz!

<sup>15</sup> Gon Pilat zha rac zho ni racladzaque me guianzuiuu me lo zho, nacne mazd bzoob me xtiidz zho, bnabey me blaa Barrabás; laa Jesús, blozhse bnabey me bdiñ zho Jesús laa me been Jesús ntregar lo grë menquuib ne tsiequiaa me lo cruz.

<sup>16</sup> Biire grë menquuib co bzëebnie zho Jesús nëz len yulow, ga pcaalsa grëraa menquuib ne nacgrë zho.

<sup>17</sup> Psilo zho rguitnie zho me, bgacw zho me tib lar morad zig rna lar ne racw grë rey, ni bzieecw zho bla lë yag guiets bzoob zhow guic me, zig rzob coron guic grë rey.

<sup>18</sup> Dzigo psilo zho nguiedz roptsie zho rnee zho:

—¡Golwi ganle zha ractaa zhirey zha Israel!

<sup>19</sup> Bzhen zho tib goobgui, rdeed zhow guic me, rtsuc zho lo me, rquiaalo zho rquiitsgzhib zho lo me zig rquiitsgzhib zho lo zha non.

*Güeyquiaa zho Jesús lo cruz*

(Mt. 27:32-44; Lc. 23:26-43; Jn. 19:17-27)

<sup>20</sup> Blozhse sca bdziitnie zho me, laa zho blee lar morad ne nacw me ga, biire zho bgacw zho me mine nac xab me; dzigo laa zho brieenie me ga zienie zho me zaatne yquia me lo cruz.

<sup>21</sup> Nëz zienie zho me, bdzieel zho tib mgui Ciren lë Simón (lëe pxoz Lejandr ga grop Ruf), znu ziaad me wbire me dan. Dzigo bnabey zho me bi me zhicruz Jesús.

<sup>22</sup> Zeene bdzinnie zho Jesús zaatne lë Gólgota (nac diidz co zig nac ne rnee ne “Gui Beerguic Ngutoo”);

<sup>23</sup> ga bdeed zho nziu notsa guizh rmed ne lë mirr, nan zho nie mew, per god mew.

<sup>24</sup> Dzigo laa zho pquiaa me lo cruz.

Blozhse pquiaa zho me lo cruz, bzhen zho tib xab me pchug zhow, biaan zho tib lëgaw tib tib zho, laa stiba bio zho rif.

<sup>25</sup> Zig hor wxeeren ga pquiaa zho me lo cruz.

<sup>26</sup> Glaa guic cruz ne pquiaa zho me ga, ga pquiaa zho bla lan diidz zaatne rnee pe nacne sca psacsi zho me, rneew: “LËË MEN RII QUIA NU, PORNE NAC ME ZHIREY ZHA ISRAEL.”

<sup>27</sup> Ye chop ngbaan pquiaagza zho me lo cruz, tibga zhicruz zho bzo tib nëz cho zhicruz me.

<sup>28</sup> [Ga briequia mine raquiet lo Xtiidz Dios, zaatne rnee: “Bloo zho me lad zha ntseeb.”]

<sup>29</sup> Grë miech ne rded zaatne quia me lo cruz ga, runguzee zho me,

rzhidznie zho me, haxta rdzi guic zho rnee zho lo me:

—¡Pe led rëb luu lëe, laa luu ntsil yadoo ni tsonaque ngbidz nzaalo luuw stib!

<sup>30</sup> Nana zho, ¡pe gacd lëeque luu bla luu lo caxtigw qui, biet lo cruz qui!

<sup>31</sup> Scasaque grë pxoz non ni grë maistr ley, rzhidznie zho me; rnee zho:

—Stib miech scataa beenguiac me, stib miech scataa bla me, pe nac dzigo rrieelod me gla me me.

<sup>32</sup> ¡Telne nli me nac Men ne zëëble diidz ga cxeel Dios, telne nli me nac zhirey ne, niinagazh guiet me lo cruz; zeena gliladz ne me!

Ye zha ne quiagza me lo cruz ga, rbidzgo zho lo me.

*Gut Jesús*

(Mt. 27:45-56; Lc. 23:44-49; Jn. 19:28-30)

<sup>33</sup> Gol groldzew, tibaque zeene goc tib ncw dipse lo guidzliu, haxta las tres biao biini stib.

<sup>34</sup> Horco nguiedz zëeb tsi Jesús, rnee me:

—¡Eloi, Eloi! ¿Lama sabactani?

(Diidz co nac zig nacne rnee ne: ¡Luuse name nac xDios naa! ¿Pe nacne psaan luu naa?)

<sup>35</sup> Grë zha ne ndxie ga, zeene bin zho sca rbedz me, no zho nan Lí, men ne biadteed xtiidz Dios padzeela, men co rbedz me.

<sup>36</sup> Dzigo rias tib zho güeygadz tib lë zhiil lo nziu bla, bzoob zhow tib guic goobgui pquiaa zhow ro me.

—¡Gotsaa csaan —rnee zho—, nu dzian ne dien pe ziaad Lí guiaadlit Lí me lo cruz!

<sup>37</sup> Tibaque zeene pquiaa me stib redz nroob, znuse blozh me.

<sup>38</sup> Lëëtaaque laa me nolozh, zeene briez nzoli lar nroob ne quia len yadoo, groltaa goca.

<sup>39</sup> Gax lo me ga zo men ne rnabey lo grë menguiib co, zeene gon men co zha gut me, rëbcha me:

—¡Ne nligaa, Xpëed Dios nac men qui!

<sup>40</sup> Ye blalaa men wnaa güeyso ga, zit zo zho rwi zho; lad co no Marí



Magdal, Salomé ni Marí ne nac xniaa Jacob niab grop José.

<sup>41</sup> Nzianlaa nac zho, lëë grë wnaa co been xyudar me len dze ne güeyted me dib xtan zha Galilé; ni zlagaa zha ne güeynal zhits me zeene bdziñ me Jerusalén.

### *Bgueets Jesús*

(Mt. 27:57-61; Lc. 23:50-56; Jn. 19:38-42)

<sup>42-43</sup> Lëëtaaque dze co nac vispr dze ne rdziiladz zho lo dziin. Zeene laa dze bdzepaa, dzigo güey José (men Arimaté) lo Pilat bnab me diidzbey tsiequeets me Jesús. Glo zoot me tsied me, per tibaque bloo me tib valor güey me; niicle ne tib zha non nac me lad zhiwxtis zha Israel, ye me quiambëz gdziñ dze ne gnabey Dios.

<sup>44</sup> Bzee zdoo Pilat zeene bin me laa Jesús gutle. Bnabey me gocredz zha ne rnabey lo menguiib ne quianap Jesús;

<sup>45</sup> haxta bdziñraa men co rëb nliw, dzigora a bdeed me diidz tsielit José Jesús lo cruz.

<sup>46</sup> Nacne güey José, güeyysi me tib lë lar nroob. Zeene blozh blit me Jesús lo cruz pchel me Jesús lar co, dzigo güeyxob me me tib len baa ne ndieen tib cho quie. Blozh ga, psodan me tib quie nroob psioog me ro baa co.

<sup>47</sup> Ga zo Marí Magdal ni Marí xniaa José, gon zho pa lo bgueets me.

## 16

### *BRIEBAN JESUS*

(Mt. 28:1-10, 16-20; Lc. 24:1-53; Jn. 20:1-23)

<sup>1</sup> Bdze dze dze ne rdziiladz zho lo dziin, güey Marí Magdal, Salomé, ni Marí xniaa Jacob güeyysi zho grë nceit nex ne tsietëëb zho lad xcuerp Jesús.

<sup>2</sup> Laa zeene biini liu, dze ne rzobni zhmal, silgaw loxaque ziaadlan ngbidza laa gza wnaa co brieë laa zho zie ro baan Jesús.

<sup>3</sup> Nëz no zho, rnabdiidzlsa zho dien zha gdiob quie nroob ne nioog ro baa, cho siguiel coba.

<sup>4</sup> Ni zeene bdziñ zho, gon zho laa quie co bdiooble.

<sup>5</sup> Laa zho bzëëb len baa, zeene gon zho nëz derech laa tib mgui nguieg zob ga, nacw me tib lar nool, dib nquitsbiese rna lar co. Bdzieb zho gon zho me;

<sup>6</sup> dzigo rëbchaa me lo zho:

—Gdziebde to. ¿Jesús lëë, men Nazaret ne pquiaa zho lo cruz, men co ziaadguib to? Guiendle me nu, ¡laa me brieëbanle! Golwi ganle nu nac zaatne pxob zho me.

<sup>7</sup> Goltsie, golguiab lo Pedr ni lo grëraa xpëëdscuel me tsie zho Galilé, ga tsiedzieel zho me zigne rëble me lo zho glo.

<sup>8</sup> Rias gza wnaa co laa zho brieë ga, masaque rzhidz zho rdzieb zho. Lo dzeb co ni par gnee zho gacd.

<sup>9</sup> [Dze ne rzobni zhmal ga, sil co brieëban Jesús, ni Marí Magdal nac zha ne glopaa gon me; lëë Marí co ga beenguiac me zeene benxoon me gadz mendox ne nosacsi Marí.

<sup>10</sup> Dzigo güey Marí güeynie Marí diidz lo grë zha ne bzënie me ga. Lëëtaaque laa zho ndxie mban rac zho, roon zho no zho xquielnë me.

<sup>11</sup> Niicle bin zho rëb Marí laa me brieëbanle, gonlo Marí me; per bliladzd zhow.

<sup>12</sup> Bded ga, brieëquia me lo schop xpëëdscuel me lëëtaaque no zho nëz zie zho dan.

<sup>13</sup> Dzigo güey zho güeynie zho diidz lo grëraa zha ne nacgza zho; per niicle xtiidz grop zha co bliladzd zho.

<sup>14</sup> Laa stibtaa vuilt, lëëtaaque ndziib zho lo mezh no zho wagw gza tsiiptib zho, tibaque zeene laa me brieëquia; dzigo goctox me lo zho sac gon me ib bliladzd zho xtiidz me; ni gon me scataa nad zdoo zho, sac niicle güey zha ne gon me güeynie zho diidz ne nli brieëban me, ni bliladzd zhow.

<sup>15</sup> Ni rëb me lo zho:

—Goltsie dipse lo guidzliu, goltsieseed miech Xtiidz Ndzon Dios.

<sup>16</sup> Grëse zha ne dib zdoo gliladza ni chobnis zho, scaania Dios zho; sangue zha ne gliladzda, laa zho bnitlole ga.

<sup>17-18</sup> Grë zha ne sca dib zdoo gliladz naa: znee zho stib diidz ne rneed

zho. Niicle xen zho grë meel ntseeb, concuaangaa miech zho, ib peet gacd zho. Ni zeene cxobnia zho guic grë men rzacnë, zunguiac zho zho; grë mendox ne noguitnie miech, zeene gzeet zho lë naa zunxooñ zho ma.

<sup>19</sup> Blozhse sca bnee me lo zho, laa me zey gbaa bzob me cue Dios nëz derech.

<sup>20</sup> Dzigo grëse xpëëdscuel me laa zho brieë, brieets bliaal zho zieseed zho miech Xtiidz Dios. Ni me nac men ne noyacniën zho run zho grë milagr nroob, zeena glu ne nli Xtiidz me nac mine noseed zho miech.]

## XTIIDZ NDZON DIOS MINE PQUIAA LUC

¡Diuzh Tiofl!

<sup>1</sup> Nanle luu ganle, nole bla zha ne bioxco pquiaa zho grë ncuane goc zeene biaad Jesús men ne pxeel Dios ga.

<sup>2</sup> Ncuane nlipaa goca, grë ncuane pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

<sup>3</sup> Yeque naa pquiaa naa wen wen bnabdiidz naa, bleeni naa diidz grëse dien zha psilo grë ncuaan co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnan luuw;

<sup>4</sup> zeeña lozh gacnan luu zha nac diidzli rii, wseed ne blu zho lo luu i.

<sup>5</sup> Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tsieel mew, zha xtii pxoz Aarón ziaad wnaa co, lë me Lisabet.

<sup>6</sup> Zigtaa Zacaríw, zigtaa Lisabeta, noxco me mine rnabey Dios, mban mew zigne naca, ni tib xley Dios rguitd me.

<sup>7</sup> Men gol-le nac me grop me, per ni tib mëed quianied me, sac niaad Lisabet gapd me mëed.

<sup>8</sup> Laa tib dzew bgaa grë zha ne nacgrë Zacarí gun zho dziin len yadoo.

<sup>9</sup> Nac xcostumbr grë zha ne nac pxoz, rio zho tib rif dien chopaa yгаа tsielaadz goxyaal len yadoo, dzigo bgaa Zacarí.

<sup>10</sup> Goxyaal co nolaadz me len yadoo, laa grë miech ne ndxie nëz ley nonabgaa lo Dios,

<sup>11</sup> tibaque zeene brieequia tib xanjl Dios bzo cue pcoog nëz derech, zaatne nozëeg me yaal ga.

<sup>12</sup> Zeene gon me anjl co bdzieb me, rdzieldraa me zha gun me lo dzeb co.

<sup>13</sup> Dzigo rëb anjl co lo me:

—¡Gdzieebd luu! Diidzse zialnie naa lo luu, gacnan luu ganle mine bnab luu lo Dios ga, pquiaadiag mew; gane niina laa tsieel luu gap tib mëedbgui. Zeene gal win, Juan cueelë to win.

<sup>14</sup> Tib guielbley nroob gac win lo to, niicle lo grëragaa miecha,

<sup>15</sup> sac tib men nziuu gac win lo Dios. Zeene gac win zha broob, ni tib ro nziuu guied win, per ni vin yquiaarod win; ansraa gal win, laa Espíritu Sant nacniele win.

<sup>16</sup> Win gac men ne co guic nzian grë zha Israel, gbiire gbig zho lo Dios, men ne rnabey zho.

<sup>17</sup> Zigne goc Lí, men ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmengol zho zha ne bleynie me; csaan zho grë xquielntseeb zho, gban zho zigne racladz me; zeeña niowse gac zho ycaania zho me.

<sup>18</sup> Pquiab Zacarí rëb Zacarí lo anjl co:

—¡Ncuane gacd i gon rnee luu! Zigtaa naaw, zigtaa tsieel naaw, mengol-le nac no.

<sup>19</sup> Rëbchaa anjl co:

—Bien ganle anjl Gabriel nu quinee lo luu, anjl ne tibaque zo lo Dios. Me pxeel naa zialnie naa diidz rii.

<sup>20</sup> Per ne squi rliladzd luuw, na laa luu guiaan ngop, haxta gal dze ne gac mine rne naa lo luu nu, dze co glan xtiidz luu stib.

<sup>21</sup> Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zaatne ziezëeg me yaal ga.

<sup>22</sup> Zeene brieeme me, gon zho gacdraa gnee me, dzigo bien zho no pe blu Dios lo me ga. Tel pe racladz me gnee me, niapse señ rlu me.

<sup>23</sup> Bzase dze ne been me dziin len yadoo, dzigo laa me zey lidz me.

<sup>24</sup> Goca bla ngbidz, laa mëed co pquialo zdoo tsieel me.

Dipse len gaay mëe bio zhuz co ro yu, ib bried me, rley me rnee me:

<sup>25</sup> —¿Zha wentaa Dios, bneedz me diidz bdziñ dze yquianie naa mëed rii, zeena gzhidzniedraa miech naa!

*Güeynie tib anjl diidz laa Jesús gac mëed*

<sup>26</sup> Goc xoop mëe zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé.

<sup>27</sup> Ga no tib ndzooop nguieg lë Marí, len dze co no xtiidz ndzooop co ctsieel-nia ndzooop tib zha xtii rey David, lë José.

<sup>28</sup> Bdziñ anjl co zaatne no ndzooop, pquiaabdiuzh me ndzooop, rëb me:

—¿Dichos luu gon, sac tib zha nziuu nac luu lo Dios! Me quianap luu.

<sup>29</sup> Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rze xtiidz me.

<sup>30</sup> Dzigo rëbchaa me lo Marí:

—¿Gdzieebd luu! Laa Dios gon bzooblo luu ygaa luu tib guieñzaac nroob.

<sup>31</sup> Zdoo luu yquiaalo tib mëedbgui, zeene laa win gal, JESUS cueelë luu win.

<sup>32</sup> Tib men nroob gac win, zien miech ganle Xpëed Dios ro ne no gbaa nac win; ni so me win gnabey win zig bnabey xmengol win David.

<sup>33</sup> Win gnabey lo grëse zha Israel, ni gdziñd dze ne lozh xquieñrnabey win.

<sup>34</sup> Pquiab Marí rëb Marí lo anjl co:

—¿Mëed ye? ¿Per zha grieelo gap naa mëed, ni tib naa zo nu?

<sup>35</sup> Rëbchaa anjl co:

—Niapse por poder ne rap Dios gac min co. Zeene laa Espíritu Sant guiaad gacnie luu, hor co laa poder co gacnie luu, laa mëed co yquiaalo zdoo luu; gacxe waa Xpëed Dios gunbey miech win, mine rnabey Dios min co gon win.

<sup>36</sup> Ye belyeen luu Lisabet, niina lo guieñgol-le laa tib mëed pquialo zdoo me; zëeb diidz ib grieelod gap me mëed, per na racle xoop mëe zoney me mëed,

<sup>37</sup> sac par Dios tsod ncuaane grieelod gac.

<sup>38</sup> Dzigo rëb Marí:

—Tel scaw, mine rnee luu i, maase gaca. Laa naa zo nu par gon naa mine gnabeytaa Dios naa.

Blozhse ga, laa anjl co zey.

*Güeygan Marí Lisabet*

<sup>39-40</sup> Goc bla dzew, briece Marí ga zie me ziegan me Lisabet tib guiedz win ne ndxie gui glaa ne nac xtan zha Judé.

<sup>41</sup> Bdziñ me, wbig me pquiaabdiuzh me Lisabet. Bdiuzh co bnee me, zeene biasoli xpëed Lisabet zdoo Lisabet; dzigo hor co bdeed Espíritu Sant guieñbiini lo Lisabet,

<sup>42</sup> nguiedz bnee Lisabet rëb me lo Marí:

—¿Dichos luu Marí bgaa luu guieñzaac qui! Sac gon, lo grëraa no nac no men wnaa, luu bzooblo Dios. Mëed ne zoney luu i, zha nziuu nac win lo me.

<sup>43</sup> ¿Ib guiaanladzd naa dze rii, znu binaad luu nac luu xniala men ne rnabey naa, biaadgan luu naa!

<sup>44</sup> Haxta mëed ne zoney naa nu, rley win biasoli win zdoo naa, zeene pquiaabdiuzh luu naa.

<sup>45</sup> ¿Dichos luu, bin luu mine në Dios, ni bliladz luu zun mew!

<sup>46</sup> Dzigo hor co bnee Marí rëb me:

¿Men nroob nac Dios! ¿Gdib zdoo naa roolnie naa me!

<sup>47-48</sup> Rleynie naa me nac me men ne psilaa naa,

sac gon niicle peet nond naa, tib nguñdziin winse nac naa lo me, per laa me bzooblo naa.

Grë miech, zigtaa len dze riiw, zigtaa len dze ne ziaadrugaaw,

ziab zho naa nac tib wnaa ne mazdraa dichos.

<sup>49</sup> Ne nligaa zha nactaa guieñzaac rii bneedz me lo naa.

Men ro, men nroob nac me, ¿guieñdraa cho zig me!

<sup>50</sup> Grëse miecha, zha ne rioxco rquiaadiag mine rnabey me, tibaque racnie me zho, ib rsaand me zho.

<sup>51</sup> ¿Golwi ganle zha nactaa grë ncuaane run me!



Grë ncuane no guic zha niats gun  
zho, bnitlo mew,

<sup>52</sup> ptiche me grë zha ne zob rnabey.

Laa grë zha ndooladz, zha ne rzac  
miech peet nond,

beenon me zho.

<sup>53</sup> Grë zha mban ne guiend pe yquuin,  
nroob guielnzaac ne bdeed me  
lo zho,

laa grë zha ne rapchen, scase bzonëz  
me zho.

<sup>54</sup> ꞑPe zhidaa ziyacnie me grë zha  
ne nac xtii Israel, menḡol ne  
goc zig tib ngundziin lo me ga!  
ꞑTibaque rlu me rleynie me zho!

<sup>55</sup> Ib biaanladzd me xtiidz me mine  
bnee me lo pxozgol ne Abra-  
ham,

zeene rëb me gdziḡd dze ne csaan  
me Abraham, ni grëraa zha ne  
grieequia lo xtii Abraham.

<sup>56</sup> Maase tson mëë biaan Marí ga  
blëz me lo Lisabet, dzigora wbi me  
ga bdziḡ me lidz me stib.

### *Gol xpëed Lisabet*

<sup>57</sup> Bdziḡ dzew, laa xpëed Lisabet  
bza mëë, laa me gop win.

<sup>58</sup> Grë zha ne no gax lidz me, grë  
zha ne nac menlidz me, zeene bin  
zho scataa pquia zdoo Dios me bdeed  
Dios mëed co lo me, rley zho güeygan  
zho me.

<sup>59</sup> Dze ne goc mëedbgui yeen co xon  
ngbidz, blalaa zha ne güeynal zhits  
pxoz win, zhits xniaa win güeynie  
zho win bio win bey ne rio xpëedbgui  
zha Israel, parne glu lo Dios ngab  
win. Tibaque nan zho Zacarí nrieelë  
win, zigne lëque pxoz win, haxta scale  
nonee zho lo win,

<sup>60</sup> per hor co rëb Lisabet, led scad  
gac lë win, Juan grieelë win.

<sup>61</sup> Dzigo pquiab zho rëb zho:  
—ꞑPe nace sca grieelë win? Ni tib  
menlidz to lëd Juan.

<sup>62</sup> Bnabdiidzaque zho lo pxoz win,  
blu zho seḡ lo me dien zha racladz me  
gac lë win.

<sup>63</sup> Dzigo bnab me bdeed zho tib lë  
lo zaatne yquiaa me; bzee zdoo zho  
zeene blozh pquiaa me gon zho rnee  
lo co: “Juan grieelë win.”

<sup>64</sup> Loxaque blozh dze sca pquiaa  
me, zeene laa me wbiire bnee stib,  
psilo me rdeed me xquizh lo Dios.

<sup>65</sup> Grë zha ne zo ga, zha ne runbey  
me, zeene gon zhow, per nli rzee zdoo  
zho.

(Nëzrii nëzrec bzhoon diidz laa  
mëed co gol, grëse guiedz ne ndxie  
gui glaa co gocnan miecha.

<sup>66</sup> Zha ne rona, rza zdoo zho rnee  
zho: “ꞑBay cho gac mëdyeen co?” Sac  
nligaa rlu nacie Dios win.)

<sup>67</sup> Horco bdeed Espíritu Sant  
guielbiini lo Zacarí, psilo me bnee me  
rëb me:

<sup>68</sup> ꞑXquizh xquielnzaac men nroob ne  
rnabey, men ne nac xDios ne  
nac ne zha Israel!

Sac gon laa me ziaad, ziaadgan me  
ne, ziadbee me ne lo xquielnë  
ne.

<sup>69</sup> Nasi laa me pxeel men nroob ne  
ziaadsilaa ne,

lëe men co ga no grieequia lo zha xtii  
David, men ne been xtsiin me  
ga.

<sup>70</sup> Padzeelale bzeet me cxeel me men  
co,

grë zha ne biaad pteed xtiidz me,  
bzeet zhow.

<sup>71</sup> Rëb zho, ib sxeel me men ne  
guaadsilaa ne ladznia zha ne  
nosacsi ne, zha ne rlëe lo ne.

<sup>72</sup> Sac ib gdziḡd dze csaan me grë  
zha xtii pxozgol ne, rquianëpaa  
zdoo me zho.

Ib guiaanladzd me mine rëb me lo  
Abraham,

<sup>73</sup> zeene rëb me laa me cxeel men ne  
csilaa ne,

<sup>74</sup> zeena dziodzebdraa ne lo zha ne  
rlëe lo ne, lo zha ne rsacsi ne;

sinque ine tibli gac ne dziuun ne mine  
rnabey me.

<sup>75</sup> Gzataa dze ne gneedz me guielmban  
lo ne,

ine mbe zdoo ne, dziuun ne mine  
rleynie me.

<sup>76</sup> Luu gon xin, bzooblo Dios ro ne zob  
gbaa, cteed xtiidz me lo miech,  
luu tedner tsienee luu lo zho, laa men  
co no guiaad.

77 Luu gnee lo grë zha Israel, guien zho ganle zha gun Dios zho pardon, parne ycaania me zho.

78 Ne nligaa rleyne me ne, rquia zdoo me ne,  
gane laa me cxeel Xpëed me, men co gac zig tib biini,

79 Biini co gziini lo grë zha ne mban lo guielcow,  
zeena biini co glu nëz lo ne, guio ne nëz ne peet zhgab, peet dzeb guien.

80 Zigse zie dzew, scase scase zieroob mëdyeen co, ni scaquegaa dib zdoo win rleyne win Dios. Zeene laa win broobpaa, dzigo güey win bio win tib dan zit, haxta bdziñ dze ne laa win psilo pseed miech laa win blulo lo zho.

## 2

### *Gol Jesús* (Mt. 1:18-25)

1 Lëëtaaque len dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnan me dien palal zho.

2 Lëë primer vult ga ptop zho lë miech, lëë iz co zob men ne lë Cirein zobnabey me guiedz Siria.

3 Bnabey August grëse miech zha ne no stib ladz ben, laa zho no tsie zaatne nacpaa ladz zho tsiedeed zho lë zho, parne ga ygab zho.

4 Miñ co nagon nacne brie José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmen gol me rey David.

5 Gard ctsieelniapaa me Marí, per nole xtiidz me grop me. Len dze co ziaadyobpaa gal xpëed Marí.

6-7 Bdziñ me Belén, bgaadraa me zaatne nrieelo mbëz me len yu, lega nac ti len lidz ma bdeed zho blëz me. Lëëtaaque bdziñ me ga, laa mëed co gol. Racse Marí pchel me win lar, bdiix me win tib len yag ne row ma guizh; lëë mëedglo ga lo me.

8 Guieel co, blalaa zha ne nac baxtor, laa zho ndxie quianap zho xpëcwxiil zho dan,

9 tibaque zeene briequia tib xanjl Dios lo zho, dipse zaatne ndxie zho ga biab tib biini nroob. Zeene gon zho anjl co, gon zho biini nroob co, per nli bdzieb zho.

10 Dzigo bnee anjl co, rëb me lo zho:  
—¡Gdziebde to! ¡Golgon diidz cub ne ganle zialnie naa lo to nu! ¡Tib guielbley nroob gac diidz rii lo grëse miech!

11 Men ne gon quiambëz to ga guiaad csilaa to, laa me blansole lo guidzliu. Me nac Men ne zëëble diidz ga cxeel Dios, me nac men ndzon ne rnabey. Belén, zaatne goc ladz rey David, ga gol me naguieel.

12 Goltsie, zaatne tsiedziel to tib mëedbgui yeen, nrielse win lar zhoob win len yag ne row ma guizh, lëë me ga.

13 Tibaque zeene gon zho laa stib dzoon anjl briequia gocgrë anjl ne quianee lo zho ga, psilo grë anjl co roolnie zho Dios, rnee zho:

14 ¡Haxta zaatne glaaraa gbaa, nozhoobnen ganle pa lotaa men nroob nac Dios!

¡Nasi, grëse miech zrieelo guiaanwen zho lo me; zdoo me rala laa me nobedz zho!

15 Zeene laa grë anjl co zey gbaa stib, psilo grë baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne mine biaadnie anjl co diidz lo ne nu!

16 Lëëled bio zho nëz laa zho zie. Bdziñ zho zaatne blëz José ga grop Marí, nligaa laa mëdyeen co nix ga, nixse win tib len yag ne row ma guizh.

17 Dzigo bzodiidz zho grëse zha rëb anjl co lo zho, zeene güeyne me diidz laa win gol.

18-19 Grë zha ne bina, per nli rzee zdoo zho; laa Marí nosew zdoo me, tibaque rsoladz mew.

20 Blozh ga, laa zho bio nëz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanjl me güeyne diidz lo zho, rley zho sac brieelo gon zho mëdyeen co.

21 Dze ne goc xon ngbidz gol win, dze co bio win bey ne rio xpëëdbgui zha Israel, par glu xnëz Dios ngab zho; dze coquew bleelë zho win JESUS, zigne rëb xanjl Dios zeene güeynie me diidz ne laa win gac mëed lo Marí.

### *Güeynie zho Jesús yadoo*

22-24 Nac ley ne psan Moisés lo zha Israel, wnaa ne sca rap mëëdbgui, zeene rac zho tap zhmaal, none tsienie zho chop ma cogon zho len yadoo; yase tsienie zho tib nëz coc, tib nëz gaa palom. Ni rnabeya: “Grëse mëëdbgui ne rac mëëdglo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mëdyeen co yadoo csañ me win ladznia Dios; lëe nëzle ga zienieque me gon ne no gdeed me ga.

25 Lëëtaaque dze ne bdzinnie zho win len yadoo, laa tib men lë Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espíritu Sant me. Quiambëz me gan me Men ne nole diidz ga cxeel Dios csilaa zha Israel,

26 sac rëble Espíritu Sant lo me ible laa me no gan men co.

27 Laa dze co, Espíritu Santaque psi-aab guic me zie me yadoo. Nacne lëëtaaque no me len yadoo, laa zho bdzinnie mëdyeen co ga, ziesañ zho win ladznia Dios zigne rnabey ley.

28 Dzigo me wbig bdeedz win, rdeed me xquizh lo Dios, rëb me:

29 Xquizh xquielnzaac luu Dios, mine në luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

30-31 ¡Men ne nacle diidz cxeel luu guiaadsilaa miech lo xtoł zho, grop lo naa laa naa ran me nina!

32 ¡Grëse miech ne ndxie lo guidzliu, me nac biini ne gziini lo zho!

¡Me csañziuu zha Israel, ne nac zho zha ne ngab lo luu!

33 Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdoo me.

34 Dzigo bnab Simeón lo Dios gac-nien Dios me gza me mëdyeen co. Blozh ga, rëbchaa Simeón lo xnial win:

—Tib guielbley nroob ne gac mëed rii lo zha Israel, por win ndal zho grie lo guielcow ne no zho, laa zho gbig lo Dios. Ni scagaa zriequia zha ne glëenie win, per lëëque zha csaci zho ga. Mban gac zdoo luu, nroob guielnë ne tso luu gan luu zha sac miech win.

35 Ga glu ganle zha nac zdoo tib tib miech.

36-37 Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, len dze co rac tapgal tap iz biaan me viud. Nguieg me ptsieelnia me, per loxaque gadz iz wbannie me tsieel me. Lëe pxoz me ga brieelë Fanuel, lëe zhey co ga nac zha xtii Aser. Tib men ne rteed xtiidz Dios lo miech nac me,

38 dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëe mëdyeen co ga nac men ne quiambëz zho ga guiaadsilaa zho.

39 Blozhse been José mine rnabey xley Dios grop me Marí, dzigo laa me wbi ga. Bdedraa ga, beyne me mëed co Nazaret, zaatne nac ladz me.

40 Ga broob win, zigse zierooob win scase scase rac macis win, scase riabiniraa win. Tibaque nacie Dios win.

### *Biaan Jesús len yadoo*

41-42 Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëëdbgui ne rap lalga iz, zrieelole tsie zho lo lni co.

43 Zeene laa lni co bded, laa me bio nëz grop me laa me wbi ga. Ib biend me biaan win Jerusalén,

<sup>44</sup> tibaque güeynie guic me lad grëraa miech ne wbiṛe lni, lad co zienal win. Laa me no nēz, zeene bdzetaa dzew, laa me psilo rguib win, bñabdiidz me lo grē zha lidz me, lo grē zha ne ruṅbey me,

<sup>45</sup> per ni tib zho choot rdeete win diidz. Nacne wbiṛeque me nēz Jerusalén stib, zieguib me win.

<sup>46</sup> Dze ne racle tson ngbidz blozh lniw, dzigora gūeydziel me win len yadoo, laa win zob lo grē zha ne nac maistr ley, noquiaadiag win grē zhiwseed zho ni nzian grē ncuaane rñabdiidz win lo zho.

<sup>47</sup> Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho.

<sup>48</sup> Zeene gon me laa win zob lad grē meṅ co, bzee zdoo me; dzigo rēbchaa xniaa win lo win:

—Xin, ¿pe nacne squi been luu? Pt-seeb luu no gon, quia no grop no pxoz luu noguib no luu.

<sup>49</sup> Pquiab win rēb win:

—Nguibde to naa. ¿Pe rande to ib none gun naa xtsiin pxoz naa?

<sup>50</sup> Ib biend me pe nacne sca rēb win.

<sup>51</sup> Dzigo laa win zienal zhits me, laa me zeynie win Nazaret; nose grē miṅ co zdoo xniaa win.

Tib mēed nguzobdiidz nac win, ron win xtiidz me.

<sup>52</sup> Zigse zie dzew, laa win riabiniraa, laa win noroobraa; rleynie Dios win, niiclegaa miecha rleynie zho win.

### 3

*Psilo Juan Bautist noseed me miech (Mt. 3:1-12; Mr. 1:1-8; Jn. 1:19-28)*

<sup>1-2</sup> Bdziṅ dzew, laa Juan psilo pseed miech. Lēē len iz co rac tsiin iz zob meṅ ne lē Tibēr nac me rey, rñabey me grē guiedz ne ngab lo zha Roma. Len dze co zob Pilat rñabey me grē guiedz ne ndxie nēz Judé, laa Herod zob rñabey grē guiedz ne ndxie nēz Galilé. Len dze coque zob bets Herod, meṅ ne lē Lip rñabey me grē guiedz ne ndxie nēz Ituré ni nēz Traconit; laa Lisian rñabey grē guiedz ne ndxie nēz Abilin. Zha ne nac zhipxoz nroob

zha Israel len dze co, nac Anás ni Caifás. Len dze copaa nagon güeynee Dios lo Juan (xpēed Zacarí) dan ngan ne no Juan ga.

<sup>3</sup> Nacne hor co psilo Juan güeyted me grē guiedz ne ndxie ro guiubee Jordán, rnee me lo grē miech co, csaan zho xquieṅntseeb zho gbig zho lo Dios ni chobnis zho, zeena csilaa Dios zho lo grē xtol zho.

<sup>4</sup> Ga brieequia mine bnee Isá, meṅ ne biaad pteed xtiidz Dios, zeene znu pquiaa me:

Bii zon miech gan le zeene laa tib tsi meṅ zēēb tib dan ngan, rnee me:

“Golzhixcuaa nēz ne ted meṅ ne rñabey,

golsaan grē guieṅntseeb ne ruṅ to.

<sup>5</sup> Zaatne nac len blē, golcodzēēw, grē gui glaa, grē gui las, golsiaablow.

Nēz ne niecw, nēz ne quiaya quiaguiet nac, golzhixcuaaw.

<sup>6</sup> Grēse miech, laa zho gan meṅ ne pxeel Dios ga ziaadsilaa zho.”

<sup>7</sup> Zeene ran Juan laa miech rdziṅ lo me cchoobnis me zho, rnee me lo zho:

—¡Miech ngoopdol, masaque nac to zig nac meel! Naṅ to na lēē, loxaque chobnis to laa to laale lo grē guieṅnēdox ne ziaadyob guiaad.

<sup>8</sup> Led scada gon, none ndzinli gban to zeena glu nlipaa psaan to xquieṅntseeb to. Ni gacniatsde to guiab to, loxaque por nacse to zha xtii Abraham, laa Dios csilaale to; sac gneli naa lo to gan le, telne gacladz Dios, haxta grē quie zac gnabey me tsaalow miech ne gac zha xtii Abraham.

<sup>9</sup> Naṅle to gan le, grē yag nex ne rquiad nex lo, zeene ran zho sca naca, rchug zhow, rzēēg zhow; scadaa nagon sac grē zha ne gband zigne racladz Dios, ib tedlaad zho lo gui; sac rrieequia laa me nzhenle xquiibag me, cchug me grē yag ne sca nac.

<sup>10</sup> Dzigo rñabdiidz zho lo Juan, pe no gun zho parne ygaad zho grē guieṅnē co.

<sup>11</sup> Dzigo rquiab me rnee me lo zho:



—Telne quianie to chop lar ne racw to, none gdeed to tiba lo zha ne guiend xab; telne quianiegaa to ncuaañe gow to, none gdeed to palala yquiin zha ne quianieda.

<sup>12</sup> Wbigaque bla recaudador ne zie chobnis, rnabdiidz zho dien pe gun zho.

<sup>13</sup> Pquiab Juan, rëb Juan lo zho:

—Cuandraa to samiech to, mine rieguialse zho quizh zho, min co glnab lo zho.

<sup>14</sup> Ye zla menguiib wbig, rnabdiidz zho rëb zho:

—¿Telzhe no waa, pe nac mine dziuun no?

Rquiab Juan rnee Juan lo zho:

—Ndzinli golgac, ib ctsebde to samiech to par dien pe gla to lo zho; zha ne peet xtold, ib yquiaaquide to zho ncuaañe beend zho. None sac zdoo to dimi ne quiayazh to.

<sup>15</sup> Nzian grë miech co quiambëznë zho gacnan zho dien pe lëele Men ne bzooblo Dios ga cxeel me nac Juan.

<sup>16</sup> Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espiritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguiald naa gac naa.

<sup>17</sup> Laa me guiaad zig tib zha ne rbeeguizh zhobxtil, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëeg grë paj ne guiadbee me ga, gdziind dze guiuuw.

<sup>18</sup> Sca rnee me lo zho, par guien zho zha nac Xtiidz Dios.

<sup>19</sup> Tib vuelt haxta lo rey Herod goc-tox me, sac lëëque Herodí, wnaa ne nac tsieel bets Herod nonie Herod; grë guielntseeb ne quiayun Herod, blisqui mew.

<sup>20</sup> Per laa ne nion Herod diidz, lel been me stib guielntseeb, bnabey me bgaa Juan bio Juan ladzguiib.

*Brobnis Jesús  
(Mt. 3:13-17; Mr. 1:9-11)*

<sup>21</sup> Len dze ne nochoobnis Juan miech ga, tib dzew laa Jesús bdziñ lo Juan ga, ye me bnab cchoobnis Juan me. Blozhse brobnis me, laa me quiazodiidznie Dios, tibaque zeeñe bzhial zhan gbaa,

<sup>22</sup> laa men ne nac Espiritu Sant biet, rlu me zig rlu tib palom, laa me bdziñ guic Jesús, hor co blu zëeb tib tsi men co nëz gbaa, rnee me:

—Xin, rleynie naa luu gon, nziuu luu lo naa.

*Xmengol Jesús  
(Mt. 1:1-17)*

<sup>23</sup> Galptsii iz rap Jesús, laa me psilo xtsiin me pseed me miech. Zha ne runbey me, rzoob zho xpëed José nac me,

<sup>24</sup> José co goc xpëed Elí,

Elí goc xpëed Matat,

Matat goc xpëed Leví,

Leví goc xpëed Melqui,

Melqui goc xpëed Jan,

Jan goc xpëed José,

<sup>25</sup> José goc xpëed Matatí,

Matatí goc xpëed Amós,

Amós goc xpëed Nahúm,

Nahúm goc xpëed Esli,

Esli goc xpëed Nagai,

<sup>26</sup> Nagai goc xpëed Maat,

Maat goc xpëed Matatí,

Matatí goc xpëed Semei,

Semei goc xpëed José,

José goc xpëed Judá,

<sup>27</sup> Judá goc xpëed Joan,

Joan goc xpëed Resa,

Resa goc xpëed Zorobabel

Zorobabel goc xpëed Salatiel,

Salatiel goc xpëed Neri,

<sup>28</sup> Neri goc xpëed Melqui,

Melqui goc xpëed Adi,

Adi goc xpëed Cosam,

Cosam goc xpëed Lmodam,

Lmodam goc xpëed Er,

<sup>29</sup> Er goc xpëed Josué,

Josué goc xpëed Liezer,

Liezer goc xpëed Jorim,

Jorim goc xpëed Matat,

<sup>30</sup> Matat goc xpëed Leví,

Leví goc xpëed Simeón,

Simeón goc xpëed Judá,

Judá goc xpëed José,  
 José goc xpëed Jonán,  
 Jonán goc xpëed Liaquim,  
<sup>31</sup> Liaquim goc xpëed Melé,  
 Melé goc xpëed Mainán,  
 Mainán goc xpëed Matata,  
 Matata goc xpëed Natán,  
<sup>32</sup> Natán goc xpëed David,  
 David goc xpëed Isaí,  
 Isaí goc xpëed Obed,  
 Obed goc xpëed Booz,  
 Booz goc xpëed Salmon,  
 Salmóngoc xpëed Naasón,  
<sup>33</sup> Naasón goc xpëed Minadab,  
 Minadab goc xpëed Aram,  
 Aram goc xpëed Srom,  
 Srom goc xpëed Far,  
 Far goc xpëed Judá  
<sup>34</sup> Judá goc xpëed Jacob,  
 Jacob goc xpëed Isaac,  
 Isaac goc xpëed Abraham,  
 Abraham goc xpëed Taré,  
 Taré goc xpëed Nacor,  
<sup>35</sup> Nacor goc xpëed Serug,  
 Serug goc xpëed Ragau,  
 Ragau goc xpëed Peleg,  
 Peleg goc xpëed Heber,  
 Heber goc xpëed Sala,  
<sup>36</sup> Sala goc xpëed Cainán,  
 Cainán goc xpëed Rfaxad,  
 Rfaxad goc xpëed Sem,  
 Sem goc xpëed Noé,  
 Noé goc xpëed Lamec,  
<sup>37</sup> Lamec goc xpëed Matusalén,  
 Matusalén goc xpëed Enoc,  
 Enoc goc xpëed Jared  
 Jared goc xpëed Mahalaleel,  
 Mahalaleel goc xpëed Cainán,  
<sup>38</sup> Cainán goc xpëed Enós,  
 Enós goc xpëed Set,  
 Set goc xpëed Adán.  
 Adán goc zig tib xpëed Dios.

#### 4

*Gocladz mēndox niungüet ma Jesús  
 (Mt. 4:1-17; Mr. 1:12-15)*

<sup>1</sup> Zeene blozh brobnis Jesús  
 guiubee Jordán ga, nacie Espíritu  
 Sant me, dzigo güeynie me Jesús  
 tib dan ngan, zaatne choot miech  
 guiend.

<sup>2</sup> Ga bio Jesús, ni tib lē peet dowd  
 me; gzase dze pquianal mēndox  
 niungüet ma me niun me mine  
 racladz ma. Zeene goc choo dze no  
 me ga, gon ma lēbdraa me rcaabedz  
 me,

<sup>3</sup> dzigo rēbchaa ma lo me:

—Telne nli Xpëed Dios nac luu, bn-  
 abey tsaalo grē quie rii ncuane gow  
 luu.

<sup>4</sup> Dzigo pquiab me rēb me lo ma:

—Znu zhobnee lo Xtiidz Dios:  
 “Niapse por xtiidz Dios mban  
 miech, yquiamband zho loxaque  
 guielwagwse.”

<sup>5</sup> Blozh ga güeynie ma me glaa tib  
 guic gui, ga znuse blu ma grēse guiedz  
 ne ndxie dib lo guidzliu lo me,

<sup>6</sup> rēb ma:

—Bui ganle, grēse guiedz ne gon ran  
 luu i, chen naaw, zrieelo gded naaw  
 lo zha ne racladztaa naa. Grēsew, dib  
 guielndaan ne no low, znedz naaw lo  
 luu

<sup>7</sup> telne squiitsgzhib luu lo naa,  
 gunnon luu naa.

<sup>8</sup> —¡Biche lo naa nu mēndox! —rēb  
 me lo ma—. Znu gon zhobnee lo Xti-  
 idz Dios: “Diosse nac men ne rnabey,  
 mese none gunnon luu, lo me rieguijal  
 yquiitsgzhib luu; ni mine rnabey me  
 min co none gun luu.”

<sup>9</sup> Blozh ga güeynieque ma me lad  
 guiedz Jerusalén, ga blep ma me za-  
 atne mazdraa glaa guic yadoo nroob  
 ne zob lad guiedz co, rēb ma lo me:

—Telne nli Xpëed Dios nac luu,  
 bringaa nu,

<sup>10</sup> benque led znu rnee lo Xtiidz me:  
 “Znabey Dios grē xanj me yquiaanap  
 luu,

<sup>11</sup> zgueedz zho luu, zeena ni tib quie  
 ycaand ni luu.”

<sup>12</sup> Dzigo rēb me lo ma:

—Psoladz ganle noque stib zaatne  
 znu rnee lo Xtiidz Dios: “Bien, Dios  
 nac men ne rnabey luu, nodne quit-  
 nie luu me gnab luu lo me gun me  
 ncuane nod gun me.”

<sup>13</sup> Gonse ma rdzielz zha gunüet ma  
 Jesús, dzigo biche ma lo me palal dze.

14 Blozhse ga, dzigo laa Jesús wbi ga bđziñ me nēz Galilé, scaque nacie Espíritu Sant me. Znuse beenbey miech me por grētaa ncuaañ ro ne ruñ me, grēse guiedz ne ndxie nēz co, rzeet zho me.

15 Zaatne rdziñtaa me, rie me xyadoo zho, rseed me zho Xtiidz Dios, rleynie zho me, rley zho ron zho grē miñe rnee me.

*Güey Jesús Nazaret*

(Mt. 13:53-58; Mr. 6:1-6)

16 Tib dzew, laa me bđziñ Nazaret, zaatne broob me. Goł dze ne rdziiladz zha Israel lo dziin, güey me xyadoo zho zig runaque me grēraa zaatne ziye me. Zeene goł horne rlab zho Xtiidz Dios, dzigo bded me,

17 bdeed zho miñe pquiaa Isá glab me. Pخال me low, lēetse zaatne znu rnee blab me:

18 ZhiEspíritu Dios nacie naa, ible Dios bzooblo naa, gnee naa Diidz Ndzon ne nac xtiidz me lo grēse zha ne rquiinnēw.

Laa me pxeel naa gne naa lo grē zha ne ngadoo lo ncuaañe nosacsi zho,

zeena guieñ zho zha griece zho lo grē ncuaañ co.

Laa me pxeel naa gziini naa lo grē zha ne no lo guiełcow,

grē zha ne rzac guiendraa zha griece zho lo zhizhgab zho, laa me pxeel naa, naa cuee zho lo zhgab co.

19 Laa naa zialnie diidz lo miech, gacnan zho pa lotaa noxco Dios gunlay me grēse zha ne gbig lo me.

20 Blozhse blab me lo co, ptibēd mew bdeed mew lo zha ne quianapa, dzigo laa me bzob. Grēse zha ne no leñ yadoo ga, dze rwi zho lo me,

21 dzigo bnee me lo zho, rēb me:  
—Grē diidz ne blozh blab naa lo to nu, leñ dze rii goñ laaw noyac cumplir.

22 Grēse zho rleynie zho me, rlozhd gzee zdo zho ron zho grētaa diidz ndzon ne rnee me. Rnabdiidzlsa zho rnee zho:

—¿Bay zha squitaa pseed meñ qui? ¡Led lēe xingan José i!

23 Dzigo rēb me lo zho:

—No tib diidz ne rnee: “Zha ne racnie stib miech, none guieñ zho glo menladz zho gacnie zho.” Rienpaa naa goñ, miñ co racladz to gnē to lo naa; quiambēz to gañ to grē milagr ne ziyon to beñ naa guiedz Capernaum.

24 ‘Gneli naa lo to ganle: Zha ne ri-aad rteed xtiidz Dios, ible znu randzed menladz zho zho; gane rrieelod pe guñ zho.

25-26 Gołsoladz ganle zeene biaad Lí, bio tib tiemp ne biabd guie tson iz grol, tib gbindox ne goñ miech Israel nu. Ndal wnaa viud ne nac menladz me mban bded zho, guieñd pe nquiin zho, per brieelod niun me xyudar zho; leł xyudar tib wnaa Sarept pxeel Dios me güeygun me, guiedz ne ndxie gax Sidón.

27 Scaque zeene biaad Liséw, ndal zha Israel rlan guiedzdox ne nac lepr, per ni tib zho beñguiacd me; leł tib zha Siria lē Naamán, meñ co beñguiac me.

28 Zeene goñ zho sca rnee me, blēe zho.

29 Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga,

30 zeene znuse bded me lad zho, ziega me.

*Biac tib mgui ne nosacsi menđox*

(Mr. 1:21-28)

31 Ga wbi Jesús, bđziñ me guiedz Capernaum stib, guiedz ne ndxie nēz Galilé. Gzobse dze ne rdziiladz grē miech co lo dziin, rie me xyadoo zho rieseed me zho.

32 Rzee zdo zho ron zho grē zhi-wseed me, grēse miñe rnee me, rlu zha rnabey nac me.

33 Tib vuelt, lad grē zha ne noseed me ga no tib mgui ne nosacsi menđox; roptsie menđox co rnee ma lo me:

34 —¡Psaan no! ¿Pe guñ luu no Jesús Nazaren? ¿Ziaad luu lēe par gnitlo luu no? ¡Runbey naa luu, luu nac meñ ndzon ne pxeel Dios!

35 Dzigo goctox me lo ma, rēb me:

—¡Psoog ro luu! ¡Na zeena psaan men qui!

Horco, squi ndxie grë miech co bron ma mgui co liu, mincose been ma, laa ma brie laa ma zie.

<sup>36</sup> Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men qui, zha nace haxta mendox rdzieb ma me, rzhoon ma zeene laa me ractox lo ma?

<sup>37</sup> Grëse guiedz ne ndxie gax ga, zigse zie dze rzhoon diidz scataa milagr ne run me.

*Biac xniadzoop Pedr*  
(Mt. 8:14-17; Mr. 1:29-39)

<sup>38</sup> Brie Jesú leñ yadoo, zie me nöz lidz Simón. Bdzin me lëëtaque laa xniadzoop Simón nix rlan xlëë, nzhoo rac me; dzigo wbig zha ne been vis laa zhuz co rzacné, bnab zho lo me gunguiac me me.

<sup>39</sup> Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, been lo me ncuane dow zho.

<sup>40</sup> Laa ngbidz rzëëblew, zeene bdzin grë miech co lo Jesús, bdzinnie zho grë zhimguidz zho. Zhaase zhaase guielguidz ne rzac tib tib mguidz co, per grëse zho zigne rxobnia me guic zho laa zho riac.

<sup>41</sup> Nzian zho beñcxoon me mendox ne nosacsi zho, zeene laa ma rrie, nguiedz roptsie ma rnee ma lo me:

—¡Rdziuunbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nan ma me nac Men ne nacle diidz ga cxeel Dios.

<sup>42</sup> Biini liu co, silgaw brie Jesú lad guiedz co güey me tib zaatne choot miech guien. Zeene bnit me lo grë miech co, brie zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me.

<sup>43</sup> Dzigo rëbchaa me lo zho:

—Grieeoda, ib none ga naa grëraa guiedz, gaseed naa miech gacnan zho zha racladz Dios gban zho; sac ible min co pxeel me naa zial naa.

<sup>44</sup> Nligaaw, grëse guiedz ne ndxie nöz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

## 5

*Nroobdox mel bgaa*  
(Mt. 4:18-22; Mr. 1:16-20)

<sup>1</sup> Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios.

<sup>2</sup> Gax ga zo chop barcw, blalaa ngooz mel biet leña, laa zho no lo nis ga noguub zho guix ne rnaaz zho mel.

<sup>3</sup> Nacne güey me biep me tib leñ barcw co, bnabey me Simón psëë Simóna bzëëba lo nis palal; sac lëë xbarcw Simón ga. Dzigo leñ co bzob me pseed me grë miech co.

<sup>4</sup> Zeene blozh bnee me lo zho, rëbchaa me lo Simón:

—Nana ganle zeeynie barcw rii guionie new zaatne quietlaa nis, zeena gron to guix ne rgaa mel i gnaaz to palal ma.

<sup>5</sup> Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no grona stib.

<sup>6</sup> Bron zho guix co lo nis, zeene laa zho cueew, ya zig zrieza, biodzëse leña no mel.

<sup>7</sup> Horco blunia zho lo grëraa zha ne nacgrë zho no stib leñ barcw co, parne tsie zho gun zho xyudar zho. Bdzin zha co gogza zho, gropse leñ barcw co pcodzë zho grë mel co; ya zig zdedquiew lo nis.

<sup>8</sup> Zeene gon Simón scataa mel taf ne bgaa, pquiitsgzhib me lo Jesús, rëb me:

—Bzhiguiel mazd psaan naa, tib miech ngoopdol nac naa, rdzieeld so luu lo naa nu.

<sup>9</sup> Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon zho ga.

<sup>10</sup> Scasaque rac Jacob ni Juan (xingan tib men lë Zebedé), zha ne nacgza Simón.



—Gdzieebd luu —rëb Jesús lo Simón—. Zigne squi gon rioxco luu rиаad luu gooz mel niina, desde nadze laa luu tsoxco gun luu stib gooz; laa naa cxel luu tsietop luu grë miech ne sëëb xnëz Dios.

<sup>11</sup> Zigne bdziñnie zho barcw co ro nis, bzo zhow ga, laa zho zienal zhits me.

*Biac tib zha ne rlan guiedz lepr  
(Mt. 8:1-4; Mr. 1:40-45)*

<sup>12</sup> Laa Jesús no tib guiedz co, tib dzew, bdziñ tib mgui ne rlan guiedzdox ne lë lepr lo me, pquiitsgzhib mgui haxta bdziñ lo mgui liu, rëb mgui lo me:

—Tebaa siguiel luu gunguiac luu naa.

<sup>13</sup> Dzigo pxobnia me guic mgui, rëb me:

—Zunguiac naa luu. ¡Niinagazh laa luu guiaanmbe!

Horcogazha laa mgui biaanmbe lo guiedz co.

<sup>14</sup> Dzigo pso Jesús diidz lo mgui, choot lo gzodiidz mgui zha biac mgui; ni rëb me lo mgui:

—Bzë, güey lo pxoz, güeyсан gon ne rnabey xley Moisés gdeed luu; zeena gan zho ganle laa luu biacle.

<sup>15</sup> Niicle sca nëd me gacnan miecha, per znuse znuse rliaal diidz grëtaa milagr ne run me; miech guizhiu ne rdziñ lo me, zha ne zie yquiaadiag zhiwseed me, zha ne zieegaa gunguiac me zho tel pe guielguidz ne rzac zho.

<sup>16</sup> Zhiga, zhiga rbiche me lo miech, rie me zaatne choot guiend riezodidznie me Pxoz me.

*Biac tib zha ne gutoo xcuerp  
(Mt. 9:1-8; Mr. 2:1-12)*

<sup>17</sup> Stib dzew, miech guizhiu ne ndxie lo Jesús noquiaadiag zho zhiwseed me. Nzian grë zha farisé, grë maistr ley, zha ne brieedib nëz Galilé, dib nëz Judé, zha ne brieegaa Jerusalén, ye zho laa zho no lad co noquiaadiag zho grë mine rnee me.

<sup>18</sup> Laa grë miech co ndxie ga, zeene bdziñ bla zha bgui, ney zho stib men bgui, zhoobse me lo yag, ib gacd së

me sac dipse me gutoo. Gocladz zho nzëëbnie zho melen yu ne no Jesús ga, ndzinnie zho me lo me.

<sup>19</sup> Per ib gocd nded zho lad grë miech co. Nacne biepaque zho guic yu, pxal zho tiblë guic co, ga pteed zho men rzacne co dib yag ne zhoob me ga, bdziñ me lo Jesús.

<sup>20</sup> Zeene gon Jesús ne nli dib zdoo zho rnalo zho me, me gunguiac men rzacne co, rëbchaa me lo men co:

—Peet tsienied guic luu, niinagazh laa naa gun perdon grëse xtol luu.

<sup>21</sup> Zeene bin grë zha farisé co, grë maistr ley co sca rëb me, rneechaa zho gza zho: “¿Cho dzigo rzac mgui qui nac me? ¡Falt i gon noyun me lo Dios! ¡Tibaque men ne run perdon xtol miech, ni lëë men co nac Dios!”

<sup>22</sup> Bienga Jesús sca quianee zho, dzigo rëbchaa me:

—¿Pe nacne rzac to laa naa quiayun falt?

<sup>23-24</sup> Nli cholze zac guiab laa zho gun perdon xtol miech, per grieelod gunguiac zho zho. Golwi ganle laa naa gunguiac mgui rii, zeena gacnan to naa ne nac naa Mgui ne pxeel Dios, ible rap naa poder par gun naa miech perdon.

Dzigo bnee me lo men rzacne co, rëb me:

—¡Niinagazh guche i, bi yag ne bzhoob luu i, zeen bzë!

<sup>25</sup> Zigne sca bnee me, laa mgui co bzoli, squi ndxie grë miech co laa me blis yag co, ine roolnie me Dios laa me zey.

<sup>26</sup> Psilo zho grëse zho, roolnie zho Dios; lala rzee zdoo zho, lala rdzieb zho, rnee zho:

—¡Nadzesi, laa ne bdzian ncuane gard dzian ne!

*Bredz Jesús Leví  
(Mt. 9:9-13; Mr. 2:13-17)*

<sup>27</sup> Blozh ga, laa Jesús brieed ga. Ro nëz zieded me gon me tib men lë Leví, zobse men co lo mezh ne rietizh zho dimi ne razh lo zha Roma, sac me rtop dimi co. Dzigo bredz Jesús me tsienal me zhits Jesús.

<sup>28</sup> Biaanaque xmezh me ga, guso me ga, laa me zienal.

<sup>29</sup> Bded ga, güeynie me Jesús tib wagw lidz me. Grë zha ne run dziin co, ni grëragaa zha ne bdziñ ga, tipse brenie Jesús zho grë xpëedscuel me.

<sup>30</sup> Blalaa zha farisé, ni zla maistr ley, rlëe zho gon zho sca zobnie Jesús grë zha co, bded ga rëbchaa zho lo xpëedscuel me:

—jLëda i gon run to! ¿Pe nacne sca tipse rownie to grë zha ngoopdol co, grë zha beed ne nac recaudador ga?

<sup>31</sup> Dzigo rëbchaa Jesús lo zho:

—Nanle to ganle, zha ne run rmed, zaatne no zha rzacne ga rquiin zho, ¿niacxe squiin zho zaatne no zha ne ndip ndaan?

<sup>32</sup> Scaque naa nagon, zialguibd naa zha wen, sinque laa naa zialguib grë zha ngoopdol, zeena gbig zho lo Dios.

*¿Pe nacne rcuand xpëedscuel Jesús?  
(Mt. 9:14-17; Mr. 2:18-22)*

<sup>33</sup> Bdziñaque bla zha ne bnabdiidz, rëb zho lo Jesús:

—¿Pe nac waa ib rcuand xpëedscuel luu, tibaque quiayow zho, tibaque quiaye zho? Zha xpëedscuel Juan, zha xpëedscuel farisé, rdziañ no tibaque nocuan zho, tibaque nonab zho lo Dios.

<sup>34</sup> Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuan grë zha ne ndxie lo lni, ni ran to laa mgui ne notsieelna zo lo zho?

<sup>35</sup> Per zdziñ dze zeene laa mgui co gbiche, ni zeene laa dze co gdziñ, dzigosi nagon riegual ycuan zho.

<sup>36</sup> Blozhse sca bnee me, rëbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lë lar ne yquiaabdie zho tib xab gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox.

<sup>37</sup> Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stsiez vin cuba; lozh ga zigtaa vina, zigtaa guid cow, laaw nitlo ga.

<sup>38</sup> Gacxe waa, tel vin cuba none len tib guid cubaque tsotsowa.

<sup>39</sup> 'Nac cuent rii zig rzac miech vin, zha ne bienle rie vin ne padzeelale notsow, rdziladzd zho guie zho vin cub; sac biaanle guic zho rnee miech: "Vin ne padzeela notsow, min co nizhraa rdioow."

## 6

*Dze ne rdziiladz zha Israel lo dziin  
(Mt. 12:1-8; Mr. 2:23-38)*

<sup>1</sup> Tib vult, lëetse dze ne rdziiladz zho lo dziina, bded Jesús zaatne zëeb zhobxtil grë xpëedscuel me; psilo zho pchoo zho mzion zhobxtil co, zigse runmbe zho zhob co, scase row zhow.

<sup>2</sup> Gon blalaa zha farisé sca no zho, dzigo rëbchaa zho:

—jLëda i gon noyun to! Golguien ganle dze nda nac dze rii.

<sup>3</sup> Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

<sup>4</sup> Rneew, bzëeb me len yadoo güeynab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

<sup>5</sup> Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia  
(Mt. 12:9-14; Mr. 3:1-6)*

<sup>6</sup> Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me.

<sup>7</sup> Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

<sup>8</sup> Bien Jesús sca no guic zho, dzigo bredz me mgui co, rnabey me bzo mgui groltaa lo grë zha ne ndxie ga;

<sup>9</sup> blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuaane yquiin, te nonguiela gun ne guielntseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

<sup>10</sup> Dze rwi me lo zho tib tib zho, dzigo rëbchaa me lo mgui co:

—¿Bzigaa nia luu!

Zigne bzigaa mgui co nia mgui, laaw biac.

<sup>11</sup> Zeene gon zho sca beenguiac me nia mgui, per nli rlëë zho, psilo zho quianediidz zho dien zha gun zho me.

*Bzo Jesús zha ne tsienee xtiidz me (Mt. 4:23-25; 10:1-4; Mr. 3:13-19)*

<sup>12</sup> Tib vuelt, güey Jesús tib guic gui, dipse guieel blëz me ga bzodiidznie me Dios.

<sup>13</sup> Biini liu co, bredz me grëse zha ne nac xpëedscuel me, dzigo lad co ble me tsiipchop zho, zha ne tsiepaa tsienee xtiidz me lo miech.

<sup>14-16</sup> Znu lë gza tsiipchop zha co:

Simón (zha ne bleelë me Pedr),

Ndrés (bets Pedr),

Juan,

Jacob,

Lip,

Bartol,

Matew,

Mazh,

Jacob (xingan Alfé),

Simón (zha ne no lad grë zha ne racladz cuee wxtis Roma Israel),

Judas (bets Jacob),

ni Judas Iscariot (zha ne güeyto me).

<sup>17</sup> Cho gui co biet me grë xpëedscuel me, bdziñ zho tib ro lets. Loxaque bdziñ zho ga, laa stib dzoon xpëedscuel me bdziñaque lo me ga; zhiits co nal stib dzoon miech, no zho racladz yquiaadiag zhiwseed me, nogaa zho zie ga par gunguiac me zho. Miech guizhiuw, zha ne ziaad nëz Judé, zha ne ziaad nëz Tiro, zha ne ziaad nëz Sidón, zha ne brieegaa Jerusalén.

<sup>18</sup> Nzian grë zha co nosacsi mendox, grëse zho beenguiac me zho.

<sup>19</sup> Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe guielguiidztaa rzac zho, runguiac me zho por grëtaa poder ne rap me.

*Cho nac zha ne wen zie*

*(Mt. 5:1-12, 38-48; 7:1-5, 12)*

<sup>20</sup> Dzigo dze bui Jesús lo grëse zha ne nac xpëedscuel me, rëb me lo zho:

—¿Wen zie zha ne rien none gbig zho lo Dios, sac ib dzin zho zaatne rnabey me!

<sup>21</sup> ¿Wen zie zho! Sac niicle telne noyan zho gbin, per me gdeed ncuaane yquiin zho; niicle tel no hor mban rac zho roon zho; per dzin dze ne gdeed me tib guielbley nroob lo zho.

<sup>22</sup> ¿Zig nac to, zeene csilo miech glëenie zho to, gunxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, ¿wen zie to ga!

<sup>23</sup> ¿Nley golco zdoo to dze co, nguieel golgac, sac gon tib guielnzaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

<sup>24</sup> ¿Sangue grë zha ne rzac grëse ncuaane rquiin zho quianie zho, ib rquiind zho gbig zho lo Dios, ¿probsaxe zho, sac lo guidzliu riise gac ncuaan co guielbley lo zho!

<sup>25</sup> ¿Probsaxe zho, sac niicle ne grëw quianie zho niina, per dzin dze gan zho ganle zha nac gbin; rlozhd gzhidz zho, rlozhd gley zho niina, per dzin dze laa zho gan ganle zha nac guielnë!

<sup>26</sup> ¿Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, ¿probsaxe to telne yguib to sca gleynie miech to!

<sup>27</sup> ¿Golquiaadiaga ganle: Zha ne rlëë lo to, golleynie zho, tel pe nac xliaadz zho golgacnie zho.

<sup>28</sup> Zeene rdzibdee zho to, gólnab lo Dios gunlay me zho; zeene rsacsigaa zho to, gólnab lo Dios yquia zdoo me zho.

29 Tel gneedz zho tib puñet lo to, gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho.

30 Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho.

31 None zaacse gac to lo miech, zeena scagaa zha, zaacse gac zho lo to.

32 'Sac gon, tel loxaque zha ne ndzieeldiidz to, zha cose rleynie to, jled ncuaan nroobd ga run to! Haxta gre zha ntseeb run min co.

33-34 Tel loxaque zha ne runsegaa favor lo to, lo zha cosegue run to favor; zeene runгаа to tib pexad, lo zha ne rgobeyse to zguizh lo to, lo zha cose runxtad to, jni lalnu peet nond ncuaane run to ga! Sac gon haxta gre zha ntseeb run min co.

35 'Golguien sca, none gleynie to zha ne rleë lo to, none gacnie to zho lo xliaadz zho. Zha ne guiaad tib pexad lo to, goldeed ncuaane rnab zho, ib guiabde to nend lega scase gun to favor co lo zho. Zha ne gun gre min rii, nroob guienzaac ne gdeed Dios lo zho, ni ga glu zho ganle nli xpëed me nac zho; sac gon tel me wen me lo grese miech, niicle zha ne run falt lo mew, niicle zha ne rien dgaa gdeed xquizh lo me, rsaand me zho.

36 Ndzinli sca golgac, zigne sca wen PxoZ to lo grese miech, scaque none wen gac to lo zho.

37 'Ib gunde to në gac zdoo to, zeene ran to ncuaane nonguield ne run stib miech, sac to tozhal gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon;

38 sac grese ncuaane run miech, mincoque rcaania zho. Grese ncuaane gun to, scaania tow, ni haxta ndziibraa mine ycaania to. Sac ncuaane gun to lo samiech to, mincoque gun Dios to.

39 Blozh sca bnee me, dzigo rebchaa me:

—Golwi ganle, zig nac zha ne rold lo, jniacxe zrieelo glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

40 'Gre zha ne nac mëedscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, dzin zho medid co.

41 'jLëda ga gon tso to lozhd gzee zdoo to dien cho pe run, ni nenda mazdraa mine run to!

42 'Pe ro to glisqui to mine run stib zho, ni tel mazdraa nac mine run to? jGolguien sca glude to ncuaane nacde to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

*Nex rlu zha nac tib tib yag*  
(Mt. 7:17-20, 24-27; 12:34-35)

43 'Tib tib yag rdeedsew xnexa. Grielod yquia nex ncuaan tib lo yag ne rdeed nex wen; grielodgaa yquia nex wen tib lo yag me rquia nex ncuaan.

44 Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsodgaa lbë zarz ne gdeed uv.

45 Scadaa nagon nac miech, zha ne wena, ncuaan wen run zho, diidz wen rnee zho, sac desde zdoo zho no guielwen co; laa zha ne ntseeb, niapse ncuaane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzë xtiidz tib miech, gase rlu zha nac zdoo zho.

46 'Griemelod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni run d zho mine rne naa.

47 'Zha ne rquiaadiag mine rne naa, ni rioxco zho rban zhow zigne naca,

48 rrieequia nac zho ga zig tib zha ndzielguic ne guiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda.



<sup>49</sup> Laa zha ne rquiaadiag xtidz naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeene biab guiedox, lo nis naal ne goclo bded zaatne zoba, znuse bix-chew, ni stib lëw biaand.

## 7

*Biac tib zha ne rquia dziin tib lo menquiib*

(Mt. 8:5-13)

<sup>1</sup> Zeene blozh bnee Jesús lo grë miech co, dzigo laa me wbi ga, bdzin me Capernaum.

<sup>2</sup> Lëëtaaque leñ dze co rzacnë tib zha ne run dziin lo tib men ne rnabey lo xmenquiib zha Roma, no guiedz co; nzhoo rac zho zootle laa zho guetle. Rleyniedox men co zho,

<sup>3</sup> zigne bin me laa Jesús bdzin, lëëléd pxeel me bla zha ne nac zha non lo menquiiedz Israel, güey zho güeynee zho lo Jesús siguiel Jesús tsiegunquiac Jesús zhingundziin me.

<sup>4</sup> Bdzin zho bnab zho lo Jesús siguiel me tsie me.

—Bzhiguiel been xyudar me —rëb zho—. Tib zha wen nac me,

<sup>5</sup> rleynie me menladz ne, haxta bzaa me tib xyadoo no lad guiedz nu.

<sup>6</sup> Dzigo zienal Jesús zhits zho. Zhile gdzin zho lidz men rnabey co, zeene bdzieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel mazd guiaate luu. Naraa rien naa choot nacd naa, par csodziin naa lo luu guiaad luu haxta ro lidz naa.

<sup>7</sup> Nligaa rien naa tib zha winse nac naa par gbig naa lo luu, gane niicle biald naa nialdzieel naa luu. Nanpaa naa, zaatne ziaad luu i, con tib lan xtiidz luu zac gnabey luu guiac zhingundziin naa.

<sup>8</sup> Sca rnee naa, sac tel naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Güey nu”, rie zho; zeene rnegaa naa: “Dë nu”, riaad zho;

zha ne nacгаа zhingundziin naaw, mine rnabeytaa naa zho, run zhow.

<sup>9</sup> Zeene bin Jesús sca rzë xtiidz men co, bzee zdoo me, ptsire lo me, rëb me lo grë zha ne zienal zhits me:

—Golwi ganle pa lotaa rnalo men qui Dios. Lo grë zha Israel gon, ni tib zho gard gan naa squitaa dib zdoo gnalo Dios.

<sup>10</sup> Grë zha ne güey mandad ga, zeene bdzin zho gon zho laa ngundziin co biacle.

*Rrieaban xpëed tib wnaa viud*

<sup>11</sup> Bded ga, güey Jesús tib guiedz lë Naín grë xpëedscuel me, miech guizhiu ne zienal zhits zho.

<sup>12</sup> Zeene bdzin zho gax ro guiedz co, lëëtaaque bdzieelo zho tib dzoon miech ziequeets xpëed tib wnaa viud; lëëse mëed ga lo wnaa co.

<sup>13</sup> Gon Jesús zha rac me, pquia zdoo Jesús me, wbig Jesús rëb Jesús lo me:

—jGoondraa luu!

<sup>14</sup> Dzigo bzhen Jesús yag ne zhoob ngutoo co. Zeene gon gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, jguche i!

<sup>15</sup> Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

<sup>16</sup> Zeene gon grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—jTib men nroob ne gon ziadteed xtiidz Dios i, ziaad lo ne! jLaa ne bdzian niina ganle, laa Dios ziaadgan ne, ziadbee me ne lo xquielnë ne!

<sup>17</sup> Gdipse nëz Judé, ni grëraa guiedz ne ndxie dib gax ga, gocnan miech milagr nroob ne been Jesús ga.

*Zha ne pxeel Juan Bautist*

(Mt. 11:2-19)

<sup>18</sup> Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho,

<sup>19</sup> zienabdiidz lo Jesús, dien pe me nac Men ne nole diidz ga cxeel Dios, te dzigoraа gdzin men co ye.

20 Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëele Men ne nacle diidz ga cxeel Dios i nac luu, te naraa guiaad me ye.

21 Lëëtaaque ndal miech ndxie lo me ga, quiayunguiac me grë men rzacnë. Nzian zho, tel pe guielguiidztaa rzac zho, no zho nosacsi menodox, no zho rold lo, grëse zho runguiac me zho.

22 Dzigo rëbchaa me lo zha ne pxeel Juan ga:

—Grëse mine bin to rne naa, grëgaa ncuaane gon to quiayun naa, goltsie golzodiidza lo Juan. Ran to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieaban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios;

23 ni golguiab lo me: dichos zha ne tiblrique riladz cho nac naa.

24 Zeene laa xpëëdsuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rëb to rlu me zig tib goobgui ne nëzrii nëzrec rey me,

25 te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho.

26 Nligaa cho güeynie guic to nac me, ¿te rëb to ye tib men ne noteed xtiidz Diosa?

'Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co.

27 Me ga raquiet lo Xtiidz Dios, zaatne znu rnee: “Sxel naa tib zha ne tednerga lo luu, zha co gzhixcuaa nëz ne ted luu.”

28 Ne nligaa lo grëse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne gon winraa zaatne rnabey Dios, nonraa zha co lo me.

29 Len dze ne nochoobnis Juan miech ga, ndal zha ne bin zhiwseed me, haxta grë zha ne rtop dimi ne razh lo zha Roma, bien zho nonguiela gun zho mine rnabey Dios, güey zho pchoobnis Juan zho.

30 Sangue grë maistr ley ni grë zha farisé, pe liaadz zho nion zho mine rnabey Dios, ib güeyd zho nchoobnis Juan zho.

31 Blozhse sca bnee me, rëbchaa me: —Nac grë miech rii, ib riend zho pepaa racladz zho. ¿Cho ganle run zigne run zho?

32 Lëë zho run mine run grë mëëdla ne rio wguut dib ro nëz. Niicle rool xcompañer win di nguieel, rieved win; niicle roolga zho di ngan, roond win.

33 Sac gon, ziaad Juan, ran zho rowd me grë ncuaane nac xquielwagw zho, niicle vina ried mew; dzigo rnee zho menodox nacie me.

34 Blozh ga, ziaad Mgui ne pxeel Dios, ran zho row me, rie me, laa zho rneeque lega rowcho me, lega riecho me vin; ib riend me cho rtsieelsa me, haxta grë zha yozh ne rtop dimi ne razh lo zha Roma, haxta grë zha ngoopdol rzënie me.

35 Sca rnee zho, sangue zha ne rgaa guielbiini ne rdeed Dios, riend zho cho nac zha ne ziaadgun xtsiin me.

### *Güey Jesús lidz tib zha farisé*

36 Tib dze bredz tib zha farisé Jesús güey me tib wagw lidz zho. Bdzin me, bded me bzob me lo mezh.

37 Lad guiedz co no tib wnaa ro nëz, bin me laa Jesús bdzin lidz zha farisé co, dzigo bi me tib bot nceit nex, tiblo nceit niazha, brie me zie me nëz lidz zha co.

38 Bdzin me ga, wbig me zaatne zob Jesús, psilo me roon me. Zig roon me, lëëque nis ne riet lo me ga, bdiib me ni Jesús, ni pcuidz mew con guits guic me. Dzigo ptsieelro mew, blozhse ga blee me nceit co bdëb mew.

39 Zeene gon zha farisé co sca been wnaa co, bza zdoo zho rëb zho: “Telne niaca mine nli men ne ziadteed xtiidz Dios nac men qui, niend me ganle tib

wnaa ngoopdol i, ndeete me diidz squitaa nguëëbnia zho zhits ni me.”

<sup>40-41</sup> Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediin dimi lo zho. Tib zho zëëb gaay mil pes plat, stib zho zëëb gaay gayoow.

<sup>42</sup> Gonse men co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo mine been men co?

<sup>43</sup> Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo mine been me.

—Scaw gon —rëb Jesús—.

<sup>44</sup> ¡Min copaa nagon squi rac wnaa prob qui! Gon ganle zeene bzëëb naa lidz luu, bneedzd luu nis niar ni naa; mazd me gon bdiib me ni naa, maase niicle con nis ne biin me bdiib mew, ni haxta pcuudiz mew con guits guic me.

<sup>45</sup> Zeene blanso naa per ni tib bzhid bneedzd luu nquiaabdiuzh luu naa, laa me gon wlal ne blanso me nu tibaque quiatsieelro me ni naa.

<sup>46</sup> Nac costumbr none nchoob luu nceit guic naa, per beend luuw; mazd mele gon biaad biadtëëb me nceit nex rii zhits ni naa.

<sup>47</sup> Laa me noyūn min rii, sacne nli-paa rzac zdoo me beñ naa me perdon grëtaa doldox ne nzëëb me. Zigne rneeqe ne ga, tel zha ne zhis xtoła, zhi rzac zdoo zho zeene laa zho rac perdon.

<sup>48</sup> Dzigo bnee Jesús lo wnaa co, rëb Jesús peet tsienied guic me, laa Jesús beenle perdon grëse xtol me.

<sup>49</sup> Zha ne zobgza Jesús lo mezh ga, zeene gon zho sca rëb Jesús psilo zho rnabdiidzlsa zho, rnee zho:

—¿Cho dzigo rzac mgui qui nac me? ¿Zha nacne guiab me laa me been perdon xtol wnaa qui?

<sup>50</sup> Horco biire Jesús bnee me lo wnaa co, rëb me:

—Laa naa psilaa luu lo xtol luu, sac dib zdoo luu bnalo luu naa. Bzë naa, peet tsieniedraa guic luu.

## 8

### *Güeyseed Jesús miech dipse Galilé*

<sup>1</sup> Bded ga, brie Jesús grë xpëëdscuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

<sup>2-3</sup> Ye blalaa men wnaa güeynal zhits zho, tel pe ncuane quianie grë men wnaa co, rdeed zhow run zho xyudar me; sac rzac zdoo zho beenguiac me zho. No zho beenguiac me lo guielguidz, nogaa zho beñcxoon me mendox ne nosacsi zho. Ga güeynal tib wnaa lë Mari Magdal (lëe wnaa co beñcxoon Jesús gadz mendox ne nosacsi me), ga güeynal stib men lë Zhuan (lëe tsiel Chuz ga, men ne quianap grë lo xtsiin rey Herod) ni stib men lë Susan.

### *Nac Xtiidz Dios zig zhobxtil*

*(Mt. 13:1-23; Mr. 4:1-20)*

<sup>4</sup> Tib dzew, miech guizhiu ne pcaalsa lo Jesús; nzian guiedz ne brie zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

<sup>5</sup> —Tib mgui name, brie zho güey zho gon zhobxtil. Zeene laa zho quialaal zhob co liu, now bliaal gax ro nëz, now bliaal lad quie, nogaaw bliaal len yag guiets. Mine bliaal ro nëz ga, zha ne bded bzëni zhow, blozh ga güeyaque grë mguin dow maw.

<sup>6</sup> Mine bliaal zaatne nac lad quie, blana per znuse bidza sac guieñd gop ga.

<sup>7</sup> Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa.

<sup>8</sup> Sangue mine bliaal zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguedz bnee me lo zho rëb me:

—jZha ne racladz guien mine rne naa, yquiaadiag zhow!

<sup>9</sup> Dzigo wbig grë zha ne nac xpëedscuel me, bnabdiidz zho lo me dien zha nac cuent co.

<sup>10</sup> Rëbchaa me lo zho:

—Tel to, Dioszhal rlu lo to ganle zha rnabey me, niicle ncuane mazdraa ngeetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguicd zho zha naca.

<sup>11</sup> 'Znu gon nac cuent co: Zhobxtil co nac Xtiidz Dios.

<sup>12</sup> Ro nëz ne sca bliaal zhob co, ga rlu ganle zha rzac zha ne rquiaadiag Xtiidz Dios, per znusaque rdzin mendox rquiil ma zho gliladzd zhow, zeena laad zho lo dol.

<sup>13</sup> Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli rliladz zhow palal dze, per zeene ran zho zha run miech zho, zha rnee miech lo zho, rsaanga zhow.

<sup>14</sup> Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedguxt xcuerp zho lo guidzliu rii, min co ronie guic zho; pa së zho gban zigne rnabey Dios.

<sup>15</sup> Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho rliladz zhow. Grëse ncuane run zho, ndzinli rrieequiaw; sac tiblrique rac zho.

### *Xcuent biini*

*(Mt. 12:46-50; Mr. 3:31-35; 4:21-25)*

<sup>16</sup> Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolan-gaa zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëeb len yu.

<sup>17</sup> Scaque nagon, grë ncuane rac ngeets, grë ncuane rnee miech zhlian, none xoobneña.

<sup>18</sup> 'Wen wen golquiaadiag mine rne naa, ni goltsoxcow. Sac zha ne tsoxcow, zdeedraa Dios guielbiini lo zho; sangue zha ne tsoxcoda, haxta tel palalse guielbiini ne rzac zho quianie zho, stiche mew.

<sup>19</sup> Dze co, scaque noseed me miech, zeene bdzin xniaa me ni zha bets me ziegan zho me. Per brieelod ndzin zho haxta lo me, sac miech guizhiu ne ndxie lo me ga.

<sup>20</sup> Dzigo rëb tib zho lo me:

—Laa xniaa luu gon, ni zha bets luu bdzin ley ziaadguib zho luu.

<sup>21</sup> Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lëe zha co nac xniaa naa, zha co nac bets naa, zha co nac bzian naa.

### *Pcuëz Jesús tib medox*

*(Mt. 8:23-27; Mr. 4:35-41)*

<sup>22</sup> Tib bdze dze, bzëebnie Jesús xpëedscuel me tib len barcw, rëb me lo zho, tedquia zho stib nëz ro nis co.

<sup>23</sup> Laa zho zie lo nis co zeene laa me gootguies. Tibaque zeene psilo brie tib medox, masaque riasoli lo nis co, zootle laa barcw ne no zho ga yguiitsle len nis.

<sup>24</sup> Zeene gon zho scataa ntseeb rac lo nis co, lëëlëd güey zho güeycuaan zho me.

—jMaestro! —rëb zho—. jBlee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co.

<sup>25</sup> Dzigo rëbchaa me lo zho:

—¿Pe nacne rdzieb to? ¿Niacxe rliladzde to Dios dib zdoo to?

Ne nligaa rdzieb zho, ni lala rzee zdoo zho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

### *Men Gadar ne nosacsi mendox*

*(Mt. 8:28-34; Mr. 5:1-20)*



26 Bdzin zho stib nēz ro nis co, ga nac xtan zha Gadar. Zo zho ga, nēz dan squi riaan xtan zha Galilé.

27 Laa Jesús bieldze len barcw, zeeṇe laa tib mgui ne no nēz co bdzin lo me. Mban rlu mgui co nosacsi mendox me, niicle xab me nacwdraa me; ib rbēzd me lidz me, niapse grē len xpaa ngutoo rio me.

28 Zeēṇe gon me Jesús, masaque roptsie me bdzin me pquiitgzhil me lo Jesús, zēēb tsi me rnee me:

—jPsaan naa Jesús! Nanpaa naa gon Xpēēd Dios nroob ne zob gbaa nac luu. jBzhiguiel csacsid luu naa!

29 Per mendox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied me, znuse rchug mew; dzigo rienie mendox co me rquianzē me grē dan ngan, zaatne choot miech guieṇd.

30 Dzigo bnabdiidz Jesús lo ma dien cho lē ma. Pquiab ma rēb ma:

—Legion lē no.

Sca rēb ma sac nzian nac ma no ma zdoo mgui co.

31 Ni bnab ma lo Jesús gzonēzd me ma lo ncowdoo ne noraa ma ne nacgrē ma.

32 Gaxaque ga ndxie tib dzoon nguts notop lag, bnab ma gdeed me diidzbey lose grē nguts co gdzin ma. Dzigo bdeed me diidz.

33 Horco laa grē mendox co psaan mgui co, güeysēēb ma zdoo grē nguts co. Psilo grē nguts co rquiaa ma corr, güeypix ma tib ro yeedox ne quia ro nis co, bliaaṇ ma haxta lo nis; grēse ma gut.

34 Grē zha ne quianap nguts co, bzhoon zho, rias zho güeyzodiidz zhow lad guiedz, ni grēraa yu ne zob gax ga.

35 Nacne brieē grē miech co ziewi zho. Zeēṇe bdzin zho, per nli bdzieb zho gon zha laa men co zob gax lo Jesús, laa me nacwxable, rlu niinile nac guic me.

36 Psilo grē zha ne gon zha biac me rzodiidz zhow lo grē zha ne bdzin ga.

37 Mazdraa bdzieb grē miech co bin zhow, dzigo mazd bnab zho lo Jesús siguiel me gbi me xtan zho.

38 Zeēṇe laa Jesús zie sēēb me len barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguiel Jesús nienal me, rēb Jesús lo me:

39 —jBiaan! Güey, güeyzodiidz lo grē menlidz luu ganle zha nactaa milagr ne beēṇ Dios beēṇguiac me luu.

Dzigo wbire men co. Güey me lad guiedz, grēse lo miech güeyzodiidz me zha nactaa guieṇzaac ne beēṇ Jesús ga, beēṇguiac Jesús me.

*Brieēban tib xpēdwnaa tib men lē Jair*

*(Mt. 9:18-26; Mr. 5:21-43)*

40 Zeēṇe laa Jesús biire bdzin stib nēz ro nis co, miech guizhiu ne quiambēz me ga, rley zho gon zho laa me bdzin.

41 Loxaque bdzin me, laa tib men ne rnabey yadoo lē Jair wbigle pquiitgzhil lo me. Rnab Jair siguiel me tsienal me lidz Jair tsiegunguiac me tib xpēdwnaa win Jair.

42 Nzhoo rac mēēd co, tib mēēd tsiipchop iza, ni lēēse mēēd ga lo me.

Dzigo laa Jesús zie nēz lidz men co. Miech guizhiu ne zienal zhits me, haxta rtaagw zho me.

43 Lad grē miech co zienal tib wnaa rzacnē, gogle tsiipchop iz rlan me tib guieṇguidz, rzac me zigne rzac grē men wnaa gzob mēē; tibaque rlan mew ib rbēzda. Grēle ncuaane rap me bloozh me lo grē men ne run rmed, per ni tib zho runguiacd me.

44 Laa me no lad co, tibaque wbig gax me nēz zhits Jesús, bzhen me ni lar ne mbix Jesús; hor cogazha laa me biac.

45 Bien Jesús sca bzhen wnaa co lad xab me, dzigo rēbchaa me:

—jCho ga bzhen lad xab naa?

Grēse zho rnee led zhada. Dzigo rēbchaa Pedr lo me:

—Maestro, wi ganle zha ndaagwtaa ziaad luu lad grē miech rii, haxta

rcheep zho luu, ¿zha nan luu choot xend lad xab luu?

<sup>46</sup> —Per no cho bzhen lad xab naa —rnee me—, sac bienpaa naa beenguac naa zho.

<sup>47</sup> Zeene gon wnaa co bien Jesús sca bzhen me lad xab me, rdzieb me laa me wbig pquiitsgzhib me lo Jesús. Squi ndxie grë miech co, bzodiidz me zha nacne sca been me, ni zha zigne bzhen me lad xab Jesús laa me biac.

<sup>48</sup> Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

<sup>49</sup> Laa Jesús bii quianeeque lo wnaa co, zeene laa tib zha ne nac mandad ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëed luu gutle.

<sup>50</sup> Zeene gon Jesús sca rëb zha co, rëbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpëed luu.

<sup>51</sup> Bdziñ zho lidz Jair, psaandraa Jesús nal grë miech co zhits me ndziñ zho zaatne nix mëed co. Loxaque Pedr, Jacob, ni Juan, pxoz win ni xniaa win bzëebnie me len yu ne nix win.

<sup>52</sup> Grë miech ne ndxie ga, roon zho no zho xquielnë win; dzigo rëbchaa Jesús lo zho:

—Goonde to; sac gon nixguiesse mëedwin rii, gute win.

<sup>53</sup> Psilo zho lel rhidznie zho me, sac nanpaa zho gutle win.

<sup>54</sup> Dzigo wbig me, bzhen me nia win, nguiedz bnee me lo win, rëb me:

—¡Guche i na, ndzooop yeen!

<sup>55</sup> Zigne sca bnee me, laa mëed co brieaban, laa win guche ga; dzigo bnabey me bguiaan zho win.

<sup>56</sup> Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidzd me zha brieaban win.

## 9

*Pxeel Jesús xpëedscuel me güeyseed zho miech*

(Mt. 10:5-15; 14:1-12; Mr. 6:7-29)

<sup>1-2</sup> Tib dze bredz Jesús gza tsiipchop xpëedscuel me, pxeel me zho tsienee zho lo miech gacnan zho zha racladz Dios gban zho; bdeed me poder lo zho gunxoon zho grë mendox ne nosacsi miech, ni gunguiac zho grë men rza-cnë.

<sup>3</sup> —Goltsie —rëb me lo zho—. Per ib güeyde to ncuaane yquiin to nëz. Zig nac dimi, zig nac ncuaane gow to, pe bziuud, pe baxtongaa, güeyde tow; xab tow, mine nacwse to mincose goltsienie.

<sup>4</sup> Guiedz ne gdziñ to, zha ne gneedz zaatne cuëz to, lidz zha co golcuëz, haxta gdziñ dze ne gbi to guiedz co.

<sup>5</sup> Per telne gdziñ to tib guiedz, nëd miech yquiaadiag zho mine zienee to, dzigo gollit grë yudie co ni to, golrieegazh ga, zeena guien zho ganle dol ga been zho lo Dios, nëd zho ycaania zho xtiidz me.

<sup>6</sup> Dzigo laa zho briea, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beenguac zho grë men rza-cnë.

<sup>7</sup> Bin rey Herod rzeet zho Jesús, sac tel pa lotaaw zëeb diidz grëtaa milagr ne run me. Grë miech co, no zho rzac Juan Bautist ga brieaban, lëe me ga nac Jesús;

<sup>8</sup> nogaa zho rnee bod Líw, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieaban me gane ziaad me stib.

<sup>9</sup> Zeene ron Herod rnee grë miech colëe Juan ga, rio me zhgab, rnee me:

—¿Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

*Bguiaan Jesús gaay mil miech*

(Mt. 14:13-21; Mr. 6:30-44; Jn. 6:1-14)

<sup>10</sup> Goc bla dzew, laa grë zha ne pxeel Jesús ga wbiere bdziñ lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

<sup>11</sup> Zeene bin grë miech co laa me brieë, dzigo brieenal zho me, bdzin zho lo me ga. Zeene gon me zho, rley me pcaania me zho, bnee me lo zho zha racladz Dios gban zho, ni beenguiac me grë zha ne rzacnë.

<sup>12</sup> Laa dze rdzelew, wbig gza tsiipchop xpëedscuel me rëb zho lo me, mazd gnee me lo grë miech co ghi zho ga; zeena guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

<sup>13</sup> Dzigo rëbchaa me lo zho:

—To goldeed ncuaane gow zho.

Pquiab zho rëb zho:

—Gaayaque quietxtil ni chop mel ziaadnie no nu, ipe rnase ncuaan co lo grëtaa miech qui! Niicle niaca mine gziuu ncuaane gow zho, pe zhidaa dimi yquiin, ¿pa guioxi now?

<sup>14-15</sup> Nligaa miech tafa, zig gaay mil rgaa loxaque zha bguise. Dzigo bnabey me zho güey zho, güeynee zho lo grë miech co sob zho, cue zho grol gayooga, grol gayooga zho tib lugar.

<sup>16</sup> Laa grë miech co bzob, dzigo bzhen Jesús gza gaay quietxtil co ni grop mel co, blis lo me nëz gbaa, bdeed me xquizh lo Dios. Blozhse ga, beengrol me gza quietxtil co, mel co ne, dzigo zigse rdeed mew lo xpëedscuel me, scase scase rguiz zhow lo grë miech co.

<sup>17</sup> Grëse zho dow haxta zaatne bieltaa zdo zho; ni zeene blozh dow zho, biodzë tsiipchop chicuid bio grë mine biaan.

*Bnee Pedr cho nac Jesús*

*(Mt. 16:13-19; Mr. 8:27-30)*

<sup>18</sup> Tib dze biche Jesús lo miech palal, güey me tib zaatne güeyzodiidznie me Dios; loxaque xpëedscuelse me güeynal zhits me. Ga bnabdiidz me lo zho rëb me:

—¿Cho dien ron to rnee miech nac naa?

<sup>19</sup> Pquiab zho rëb zho:

—No zho rnee Juan Bautista, nogaa zho rnee Líw (men ne biadteed Xtiidz Dios padzeela); nogaa grol zho rnee no cho stib men ne biadteed Xtiidz Dios padzeelaw, sinque brieëban me gane ziaad me stib.

<sup>20</sup> —¿To waa? —rëb me lo zho—. ¿Cho rzac to nac naa?

Horco pquiab Pedr, rëb Pedr lo me: —¿Luu nac Men ne zëëble diidz ga cxeel Dios!

<sup>21</sup> Dzigo pso me diidz lo zho choot lo gneed zhow.

*Bzeet Jesús zha gun miech me*

*(Mt. 16:21-28; Mr. 8:31-9:1)*

<sup>22</sup> Tib vuelt bzeet Jesús lo grë xpëedscuel me zha csacsi miech me. Rëb me, nroob grë ncuaane cteed zho me; grë zha non lo menguedz, grë pxoz rnabey, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieëban.

<sup>23</sup> Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, niicle tel min co yquiaaqui csacsi miech zho. Nodne yquia zdo zho xquielmban zho,

<sup>24</sup> sac zha ne yquia zdo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdzind dze lozh.

<sup>25</sup> Zha ne zienie guic loxaque gapchen, ¿pa dien yquiina lo zho, tel por lëew rsacsi zho zho, tel lëew yquiaaqui guey zho gabil?

<sup>26</sup> Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtiz naa; scaque naa stoladznie naa zho gal dze ne laa naa gual stib. Dze ne gualnie naa grë xanjl Pxo z naa, guallu naa guielndzon ne rap me.

<sup>27</sup> Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii

zan zho zeene laa Dios glu zha rnabey me.

*Bdzëëlo Jesús*

(Mt. 17:1-8; Mr. 9:2-8)

<sup>28</sup> Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

<sup>29</sup> Laa me nozodiidznie Dios, zeene laa me bdzëëlo. Masaque biinidoo ne rriee lo me, xab mew, nquitsbie rnaw, haxta rquiabniw.

<sup>30-31</sup> Tibaque brieequia Lí grop Moisés bdziñ lo me ga, psilo zho nozodiidznie zho me grë guielñe ne cteed miech me Jerusalén, zeene laa me gbi lo guidzliu. Masaque biinidoo ne riab, ncuaane gzee zdoo new.

<sup>32</sup> Laa zha ne zianañ zhits me, rcow zho mcaañ zob zho ga; per zeene biab biini nroob co, hor co bzhial lo zho gon zho zha rlu me gza me Lí ni Moisés.

<sup>33</sup> Laa grop men co ziebiche lo Jesús, zeene rëb Pedr lo me:

—Maestro, iwena gon tebaa gbiaaz ne nu! Na maase gzaa no tson yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr rienñaque dien pe nacne sca rnee Pedr.

<sup>34</sup> Laa Pedr bii quianeeque, zeene bre tib xcow zaatne zo zho ga; per nli bdzieb zho gon zho laa zho biaan len xcow co.

<sup>35</sup> Dzigo bin zho zëeb tib tsi men co lo xcow co, rnee me:

—Lëë Xpëed naa i gon, rleynie naa me. Golgon mine rnee me.

<sup>36</sup> Zeene blozh bin zho tsi men co, gon zho loxaque Jesússe zo ga.

Grëse mine gon zho ga, ib choot lo bneed zhow len dze co.

*Biac tib mëed ne nosacsi mendox*  
(Mt. 17:14-21; Mr. 9:14-29)

<sup>37</sup> Biini liu co, laa Jesús wbi guic gui co gza me zha ne güeynie me ga. Miech guizhiu ne güeydzieelo me.

<sup>38</sup> Lad grë miech co brieet tib mgui, wbig me lo Jesús rëb me:

—Maestro, bzhiguiel bui ganle zha rac xpëed naa. Tibaque mëedbgui rii nac mëed lo naa,

<sup>39</sup> ni na laa mendox nosacsi win. Zeene rdziñ ma rcoptsiedan ma win, rron ma win liu, ga nix win runcxidz ma win, ni masaque rdzib mtsiin ro win; nen rsaan ma win.

<sup>40</sup> Blansonie naa win nu, bnab naa lo xpëedscuel luu guncxoon zho mendox co, per brieelod zho.

<sup>41</sup> Dzigo rëbchaa Jesús:

—jPe nac squitaa miech ntseeb nac to, ib nëde to gnalo to Dios! ¿Pa lal dze ne so naa gne naa lo to? jNcuaane cxecwdraa naa lo to squitaa nac to! Dënie xpëed luu nu —rëb me lo men co.

<sup>42</sup> Zeene laa mëed co ziegax lo Jesús, hor co bron mendox co win liu, nix win ga masaque rzhidz win. Dzigo goctox Jesús lo ma, bencxoon me ma. Horcogazh biac mëed co, laa me bdeed win lo pxoz win.

<sup>43</sup> Grë miech ne ndxie ga, per nli rzee zdoo zho gon zho scataa nroob poder ne rap Dios.

Grëse miech ne ran grëtaa milagr ne run Jesús, rzee zdoo zho.

*Bzeet Jesús stib laa miech csacsi me*  
(Mt. 17:22-23; Mr. 9:30-32)

<sup>44</sup> Biire Jesús bzeet me lo xpëedscuel me zha gun miech me, rëb me:

—Wen wen golquiaadiag mine gni naa lo to nu ganle. Naa gon ne nac naa Mgui ne pxeel Dios, ible zielo zho naa ladznia miech.

<sup>45</sup> Per ib rienñ zho zha nacne sca rnee me, sac gard gdeed Dios didzbeey hor co guien zho zha naca; niicle par gnabdiidzga zho, rdzieb zho gnabdiidz zhow lo me.

*¿Cho nonraa?*

(Mt. 18:1-5; Mr. 9:33-40)

<sup>46</sup> Horco psilo zho noneelsa zho dien cho tib zho gac zha non.

<sup>47</sup> Bien Jesús sca no zho, dzigo bnee me lo zho, bredz me tib mëedbgui win,

<sup>48</sup> rëb me:

—Grë zha ne no xnëz naa, zha ne guncas tib mëedwin zig mëed rii, gleynie zho win, rrieequia naa ga rleynie zho. Ni zha ne gleynie naa, rrieequia men ne pxeelle naa ga



rleynie zho. Telne racladz to gacnan to dien cho nac zha non, gacnan to ganle, zha ne tsoxco gac zig tib ngundziin lo samiech, zha co nac zha non.

<sup>49</sup> Blozh ga, rëbchaa Juan lo me:

—Maestro, bdzion no tib zha co gon bzeet zho lë luu zeene beñcxoon zho mendox, nacre nli blisqui now lo zho, sac led yed zho nacgrë ne.

<sup>50</sup> Dzigo pquiab me, rëb me:

—¡Gũscade to! Sac gon zha ne racnie ne, grieelod lëëque zha glëënie ne.

*Ndox Jesús lo Juan grop Jacob  
(Mt. 8:19-22)*

<sup>51</sup> Len dze ne ziaadyob gbi Jesús lo guidzliu rii, len dze co bio me nëz laa me zie nëz Jerusalén. Tiblique bio guic me, ib pquiad zdo me, laa me zie.

<sup>52</sup> Zeene bdzin me xtan Samar, pxeel me bla zho bdedner zie zho tib guiedz win ne ndxie nëz co, par dien pa lo gdeed miech co cuëz me.

<sup>53</sup> Bdzin zho guiedz co, choot bzhiguiel ndeed zaatne mbëz me; sac bien zho nëz Jerusalén tsie me. Nac zha Samar, rlëënie zho zha Israel.

<sup>54</sup> Zeene bin Jacoba grop Jacob Juan, blëë guic zho, rëbchaa zho lo me:

—Maestro, ¡mazd tibaque gotsaa gnab ne gliaal gui lad grë miech rii, zeena nitlogazh zho!

<sup>55</sup> Biecwaque me, goctox me lo zho rëb me:

—Riende to lëë zhapaa nac men ne nacie to.

<sup>56</sup> Golguien ganle, naa ne nac naa Mgui ne pxeel Dios, ziald naa par gnitlo naa miech, sinque laa naa zial csilaa naa zho lo dol.

Ga brieë zho güey zho stib guiedz.

<sup>57</sup> Nëz zie zho, zeene wbig tib mgui co rëb me lo Jesús, laa me racladz tsienal me zhits Jesús, tel pa lotaa nac zaatne tsie Jesús.

<sup>58</sup> Dzigo pquiab Jesús rëb Jesús lo me:

—Gocnaa ganle, naa ne nac naa Mgui ne pxeel Dios, peet rapd naa nu, mazd zig nac grë mëz, grë mguin, rap ma zhibliee ma, rap ma zhiptsieez

ma; per naa per ni zaatne gaguies naa quianied naa.

<sup>59</sup> Laa zha ne bredz me tsienal zhits me, pquiab zho rëb zho:

—Sënal naa zhits luu, per bzhiguiel bneedz diidzbey cuëz naa, gangazh naa tsoliu pxoz naa.

<sup>60</sup> Rëbchaa me lo zho:

—Nzian grë zha gut no, psaan tsow tsie samengut zho tsiequeets zho. Sangue luu zhits naa dënal, zeena tsie luu tsienee luu lo miech, gacnan zho zha racladz Dios gban zho.

<sup>61</sup> Pquiab stib zho rëb lo me:

—Maase sënal naa zhits luu, per bneedz diidz ganiegazh naa diidz lo grë menlidz naa.

<sup>62</sup> Dzigo rëbchaa me:

—Zha ne xen nia rad ni csilo zho gwi zho nëz zhits zho, niacxe zrieelo ygan zho ngon. Scaque zha ne sëëb xnëz Dios, grieelod sëëb zho telne mazdraa rleynie zho grë ncuaan lo guidzliu rii.

## 10

*Güey tsongaltsii zha ne güeynee Xtiidz Dios*

*(Mt. 11:20-24)*

<sup>1</sup> Tib dze, ble Jesús stsongaltsii zha ne rquiaadiagle zhiwseed me, bnabey me tedner zho lo me tsie zho grë guiedz ne no ted me, pxeel me zho chopga chopga zho.

<sup>2</sup> —Golnab lo Dios —rëb me—, cxeelraa me zha ne gun xtsiin me. Sac ne nligaa ndaldoo miech ne quiambëz yquiaadiag Xtiidz me, zha ne gneelew lo zho rgaad.

<sup>3</sup> Goltsie sca, per nsin nsin golso. Golguien ganle rrieequia nac to zig cho mëcwxiiil yeen, ni laa naa rxel to zaatne no grë coyot dox.

<sup>4</sup> Peet güeyde to, güeyde to dimi, güeyde to ncuaane gow to, lab tow, miñe quiaase ni to miñcose goltsienie.

'Miech ne yquiaabdiuzh to nëz, sode to dieen zharaa yquiaabdiuzh to zho.

<sup>5</sup> Zeene yguib to zaatne cuëz to, yu ne gdziñtaa to, golnab gunlay Dios grë zha ne no yu co.

<sup>6</sup> Telne squiaadiag zho mine rnee to, zunlay me zho; telne nēdgaa zho yquiaadiag zhow, dzigo toque gunlay me.

<sup>7</sup> Zha ne gneedz zaatne cuēz to, lidzse zha co golcuēz, tsiede to stib yu stib yu; guielwagw ne gneedz zho lo to, ctoladzde to golgowa; sac gon zha ne run dziin, ib none ycaa zho mine non xtsiin zho.

<sup>8</sup> 'Guiedz ne yquiaadiag miech mine zienee to, zaacse golgac lo zho, tel pe guielwagw ne gneedz zho, golquiina;

<sup>9</sup> golgunguiac grē men rzacnē ne no ga. Golguiab lo zho, laa dze ne nolu Dios zha sēēb miech xnēz me, laa dze co bdziñle.

<sup>10</sup> Sangue guiedz ne siguiēd miech yquiaadiag zho mine zienee to, golree grē ro xnēz zho,

<sup>11</sup> ganlo zho glit to grē yudie co ni to, zeēna guien zho ganle nēz ne nitlo zho ga zie zho. Golguiab lo zho, zha bguiba, sac binpaa zho zha grielo sēēb zho xnēz Dios ni nēd zho gon zho diidz.

<sup>12</sup> Gacnan zho ganle, gal dze ne gun Dios xquielwxtis me, lēētaa gac guielnē ne tsieguial zha Sodom, mazdraa nac guielnē ne tsieguial zho.

<sup>13</sup> 'Scadaa nac zha Corazín ni zha Betsaid. ¡Probsaxe zho, sac gon gonpaa zho grē milagr ne run Dios, per ib psaand zho xquielntseeb zho! Tel niaca mine ngaa grē men Tiro, grē men Sidón, nian grē milagr ne gon zho, ib ndedsod mban niac grē zha co nio zho guielnē, zēēb nsaan zho xquielntseeb zho mbig zho lo Dios.

<sup>14</sup> Gacnan zho ganle, gal dze ne gun Dios guielwxtis, lēētaa caxtigw ne ygaa zha Tiro ni zha Sidón, mazdraa mine ygaa zho.

<sup>15</sup> Scaque zha Capernaum, masaque rzac zho niina zha nziuruaa lo Dios, per gacnan zho ganle haxta guiet len gabil ga guey zho.

<sup>16</sup> Blozhse sca bnee me, rēbchaa me lo zho:

—Grēse zha ne yquiaadiag mine gnee to, rrieequia naa ga rcaania zho. Zha ne nēdgaa ycaania to, rrieequia

naa ga nēd zho ycaania zho; ni zha ne nēd ycaania naa, rrieequia men ne pxeel naa ga nēd zho ycaania zho.

*Wbire tsongaltsii zha ne pxeel Jesús ga*

*(Mt. 11:25-27; 13:16-17)*

<sup>17</sup> Zeēne laa gza tsongaltsii zha co wbire, rley zho bdziñ zho lo Jesús. Rēb zho haxta grē mendox bdzieb ma zho, zeēne bzeet zho lē me.

<sup>18</sup> Dzigo pquiab me rēb me lo zho:

—Haxta ma ne rnabey lo ma, gonpaa naa gon bringaa ma, biab ma zig riabse tib belye.

<sup>19</sup> Laa naa bneedz poder qui lo to, parne gdeete to diidz gun ma mine racladz ma; grē meeldox, grē meegu ntseeb, niicle gzoobni to ma, peet gacde to.

<sup>20</sup> Nli laa to runcxoon mendox niina, per gleyde to por min co, sinque mazd golley porne laa lē to zhooble lo Dios, laa to ngable lo me.

<sup>21</sup> Horco biaad tib guielbley nroob zdoo Jesús, bnee me lo Dios, rēb me:

—Papá, luu nac men ne rnabey gbaa, luu nac men ne rnabey guidzliu, rnedz naa xquizh lo luu, sac grē mine noyun luu nu niina, bdeete luu diidz niacnan grē zha raca, sinque laaw blu luu lo grē zha ne nac zig grē mēēdlas. Sca quiayun luu, sac ib scale racladz luu gaca.

<sup>22</sup> Blozh ga rēb me lo grē miech ne ndxie lo me ga:

—Grēse ncuaane ran to quiayun naa, Dios men ne nac Pxoza naa, me bneedz poder rii lo naa; sac ib laa me bzo naa, naa guna. Xpēēd me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

<sup>23</sup> Dzigo rēbchaa me lo xpēēdscuel me:

—Dichos to bgaa to noyan to grē min rii.

<sup>24</sup> Sac gon blactaa zha ne biadteed xtiidz Dios padzeela, haxta grē zha ne bnabey len dze co, bzoobladz zho nian zho grē ncuaane noyan to,

bzoobladz zho nquiaadiag zho grē ncuaañe noquiaadiag to.

*Xcuent tib zha Samar*

<sup>25</sup> Tib dze wbig tib zha ne nac maistr ley lo Jesús, bnabdiidz zho lo me, rēb zho:

—Maestro, bnē lo naa dien, ¿pe nac mine gun naa parne grieelo yгаа naa guielmban ndzon ne gdziñd dze lozh?

<sup>26</sup> Pquiab Jesús rēb me:

—¿Zha dien zhobnee lo ley? ¿Pe rnabeya?

<sup>27</sup> Rēbchaa maistr ley co:

—Znu rneew: “Dib zdoo luu, dib nacse luu, dib guielbiini ne no guic luu, dipse xfuers luu, bleyne Dios; ni bleyne samiech luu, zigne rleyne luu luu.”

<sup>28</sup> —¡Min qui nagon bioxco gun luu —rēb Jesús—, zeena yгаа luu guielmban ndzon ne gdziñd dze lozh ga!

<sup>29</sup> Per par glud ne noxcd me gun me mine rnabey ley, dzigo pquiaalo me rēb me lo Jesús:

—¿Chopaa dzigo nac samiech naa, zha ne no gleyne naa?

<sup>30</sup> Dzigo bzodiidz Jesús tib cuent lo me, rēb Jesús:

—Tib meñ wladz name brie me Jerusalén zie me guiedz Jericó. Nēz zie me briequia ngbaan, bdiñ ngbaan me, mer niut ngbaan me; grēse ncuaañe ney me, haxta xab me blan ngbaan.

<sup>31</sup> Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad.

<sup>32</sup> Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho.

<sup>33</sup> Sca nix me ga, zeene laa tib zha Samar bdiñ. Zeene gon zho me, wbig gax zho lo me; pquia zdoo zho me gon zho zha rna me.

<sup>34</sup> Gagazh been zho me rmed, blee zho vin bdiib zho lo grē rid ne ney me, bdēeb zho nceita, pxidoo zhow. Blozhse ga, blis zho me bzoob zho me lad xcuy zho laa zho zienie me, haxta bdiñ zho me tib yu ne rbēz

miech ne zo nēz; ga blēznie zho me, pquianap zho me.

<sup>35</sup> Biini liu, zeene laa zho brie ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me meñ co, rēb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

<sup>36</sup> Blozhse bzodiidz me cuent co, rēbchaa me lo maistr ley co:

—Lo gza tson zha ne nadien bded zaatne nix meñ co, ¿cho tib zho bien samiech zho ga nac me?

<sup>37</sup> Pquiab maistr ley co rēb me:

—Zha ne bion bded gaw, sac zha co pquia zdoo me.

Dzigo rēbchaa Jesús lo me:

—Sca nagon none gun luu.

*Blēz Jesús lidz Mart ni Marí*

<sup>38</sup> Laa Jesús no nēz gza xpēedscuel me. Bdziñ me tib guiedz win, ga no tib wnaa lē Mart, dzigo meñ co bdeed zaatne blēz zho.

<sup>39-40</sup> Bdziñ zho lidz Mart, lēlēd bzēeb Mart ro tie. Zhixco ro tie no Mart, laa tib bel Mart lē Marí zob noquiaadiag grē zhiwseed Jesús. Gon Mart rgaadraa nia Mart, dzigo wbig Mart rēb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

<sup>41</sup> Pquiab Jesús rēb Jesús lo me:

—Aque luuw nli Mart, squitaa noxco luu dien zha gac xtsiñ ro tie luu.

<sup>42</sup> No tib ncuaañe mazdraa none tsoxco luu, ni lē min co nu gon noyun Marí; gane grieelod ycaa naa mine quiayun me.

## 11

*Zha none gzodiidznie ne Dios (Mt. 6:9-15; 7:7-11)*

<sup>1</sup> Tib vuelt, loxaque blozh bzodiidznie Jesús Dios, wbig tib xpēedscuel me rēb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpēedscuel me zha gzodiidznie zho Dios.

<sup>2</sup> Dzigo rëbchaa Jesús:  
—Zeene gzodiidznie to Dios,  
golguiab:

Dios, luu nac Pxoꝝ no, zob luu gbaa;  
luuse nac meṅ ne mazdraa ndzon.  
Luu nac meṅ ne gnabey no,  
miṅe gnabeytaa luu, zigne raca gbaa,  
scaque none gaca lo guidzliu nu.

<sup>3</sup> Beenṅ guieṅzaac bneedz ncuaane  
dioow no nadze.

<sup>4</sup> Bzhiguielṅ beenṅ no perdon grëse dolṅ  
ne ziodziuuṅ no lo luu,  
zigne rdziuuṅ no samiech no perdon  
grë falt ne ruṅ zho lo no.

Gdeete luu diidz yquiil meṅdox no,  
beenṅ guieṅzaac bla no lo ma.

<sup>5</sup> 'Sca nagonṅ gnee to —rëb Jesús—.  
Ncuaane gnab to lo me zneedz  
mew. Samiechse to name, gzoob ne  
wxina, lega nacle glanso tib zha ne  
ndzieeldiidz to ni guieṅd pe gdeed to  
gow zho. Dzigo tsie to lidz stib zha  
ne ndzieeldiidz to guiab to lo zho:  
“Bzhiguielṅ beenṅxtad tsonaque xcuuṅ  
luu lo naa.

<sup>6</sup> Lega nacle blanso tib zha ne  
ruṅbey naa, na guieṅd pe gded naa  
yquiin zho.”

<sup>7</sup> Segur znë zho: “Gunnete luu naa  
nu, dziitsle nioog ro lidz naa, nataa  
nixguies grë xpëed naa; grielod  
gache naa gnedz naa ncuaane  
racladz luu.”

<sup>8</sup> Per telṅe sonaad to ga, ganse zho  
tibaque quianee to, gnid naa zho  
tsieched zho gneedz zho ncuaane  
racladz to. Per gneedzd zhow porne  
ndzieeldiidz to zho, sinque laa zho  
gneedza porne gonṅ zho tibaque  
quianab tow.

<sup>9</sup> Scaque nagonṅ none guṅ to, zeene  
pe gnab to lo Dios. Ncuaane rquiin  
to, golnaba lo me, scagaa me zneedz  
mew. Golguiab telṅ pe racladz to, me  
nac meṅ ne gacnie to gdziel tow.  
Golcuedzlë me, scagaa me scaania me  
to.

<sup>10</sup> Sac grëse zha ne rbig lo me rnab  
zho ncuaane rquiin zho, rdeed mew.  
Zha ne rguib ncuaane racladz zho,  
racnie me zho rdziel zhow. Zha ne  
rbedzlë me, rcaania me zho.

<sup>11</sup> 'Golguienṅ ganle, zig nac to, zeene  
rnab xpëed to tib melṅ gow win, ṅniacxe  
ziazh to co to tib meelṅ nia win?

<sup>12</sup> Zeene rnabгаа win tib dzit, ṅni-  
acxe zgo to tib meegu nia win?

<sup>13</sup> Led rioxco to lëe niapse ncuaane  
wen rdeed to lo xpëed to, niicle ne  
miech ntseeb nac to. Telṅe sca rioxco  
to xpëed to, peleṅ Pxoꝝ to dzigo, meṅ  
ne zob gbaa, tsoxcd me to. Ib ted-  
sod grëse zha ne gnab lo me gdeed  
me ncuaane rquiin zho, zdeed mew;  
haxta zha ne gnab cxeelṅ me Espiritu  
Sant gacnie zho, zuṅ me miṅe gnab  
zho.

*Rëb zho meṅdox nacnie Jesús  
(Mt. 12:22-30, 43-45; Mr. 3:20-27)*

<sup>14</sup> Tib vuelṅt beṅcxooṅ Jesús meṅdox  
ne nosacsi tib mgui co. Ib gacd gnee  
mgui, sac psanṅ ngop ma mgui. Dzigo  
zigne beṅcxooṅ Jesús ma, laa mgui  
psilo bnee. Grë miech ne ndxie ga,  
bzee zdoo zho gonṅ zhow.

<sup>15</sup> Nogaa zho rnee, Beelzebú ma ne  
rnabey lo meṅdox, ma co nacnie me  
gane rrieelo ruṅcxooṅ me meṅdox.

<sup>16</sup> Brieequia spalal zho, rnab zho  
lo me guṅ me pe stib milagr, parne  
gliladz zho nli Dios pxeelṅ me.

<sup>17</sup> Bienṅ Jesús zha rza guic zha ne  
noneenë me ga, dzigo rëbchaa me lo  
zho:

—ṅNcuaane gacd gonṅ rnee to! Telṅ  
tib guiedz nadienṅ, csilo miech, lëeque  
zha tilṅie meṅladz zho, ṅniacxe nit-  
lod guiedz co? Tib diigaa miecha,  
telṅ lëeque zha tilṅie meṅlidz zho, led  
znuse lëe nitlo dii co.

<sup>18</sup> Scaque meṅdox nagonṅ, telṅe  
lëeque lëe ma guṅcxooṅ samēdōx ma,  
ipe nale na bnitlo ma! Laa naa rne  
miṅ rii lo to, porne rnee to ma ne  
rnabey lo meṅdox nacnie naa, gane  
rrieelo ruṅcxooṅ naa ma.

<sup>19</sup> Nana telṅe sca rzac to, ṅzha ne  
nacgrë to dzigo, cho nacnie zho ne ye  
zho ruṅcxooṅ ma? Gase naganle rlu  
dolṅdōx i quiayunṅ to squi rnee to.

<sup>20</sup> Sangue telṅ naa, Dios nacnie naa  
ruṅcxooṅ naa meṅdox, ni ga rlu ganle  
laa Dios pxeelle meṅ ne gnabey lo to.



21 'iMasaque nac mendox zig tib zha ne no xfuers! Tib zha ne no xfuers, tel tibaque ney zho xquiib zho, ¿cho dien lega sëeb lidz zho gla ncuaane quianie zho?

22 Per zeene rrieequia stib zha ne mazdraa no xfuers, zha cole rtiche zha co, runcxoon zho zho, riaanmie zho grë ncuaane gopchen zho.

23 Golgacnan sca ganle, zha ne rlëe lo naa, ga rlu nacnied zho naa; ni zha ne racnied naa lo xtsin naa, paat yquiind zho.

24 'Mendox ne rsacsi miech, zeene laa ma rsaan zho, rie ma rieuianzë ma dan zaatne choot miech guiend, rguib ma dien pa cuëz ma; ranse ma rdziel zaatne cuëz ma, rnee ma: "Mazd gbire naa guia naa lidz naa stib."

25 Dzigo rbire ma, zeene rdzin ma lo zha ne psacsi ma ga, masaque rzac ma zho zig rzac miech tib yu ne griin blioob, tib yu ne ine nzhixcuaa len.

26 Dzigo rie ma riexi ma zgadz samendox ma, ma ne mazdraa ntseeb, rdzin ma gza ma rzëeb ma zdoo zha co, rsilo ma rsacsi ma zho. ¡Horcole mazdraa mban run ma zho!

27 Sca quianee Jesús, zeene nguiedz bnee tib wnaa ne no lad grë miech ne ndxie lo me ga, rëb wnaa co:

—¡Dichos wnaa ne gop luu, wnaa ne bgadz luu!

28 Pquiab Jesús rëb me:

—¡Mazdraa dichos zha ne gon, yquiaadiag Xtiidz Dios ni tsoxco zho gban zhow zigne naca!

*Zha ne riladzd cho nac Jesús  
(Mt. 5:15; 6:22-23; 12:38-42;  
Mr. 8-12)*

29 Miech guizhiu ne quiadzinraa lo me ga, dzigo bnee me rëb me:

—Nadzpaan ntseeb zdoo to nac to miech ne mban len dze rii. Tibaque quia to racladz to gan to pe stib milagr, parne gliladz to Dios pxeel naa, ¿zha rnaraa milagr ne racladz to gan to? Gacnan to ganle, stibaque milagr gon gan to, tib miñe csoladz to zha goc Jonás.

30 Haxta dzigoraan nagon guien to nli Dios pxeel naa. Sac tel Jonás, zeene gocnan zha Nínive zha bzhaac me, dzigo bliladz zho nli Dios pxeel me.

31 Ni gacnan to ganle, zeene gal dze ne laa Dios gun xquielwxtis me, zieso wnaa ne goc rein nëz Sabá, steedquie me to. Sac gon pa lo ga brie me, bi-aad me biadquiaadiag me grë xtiidz Salomón; ni to, lo to nu zo men ne mazdraa non lo Salomón, ni nëd to gon to xtiidz me.

32 Scaque grë zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquielntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

33 'Tsod zha ne yquiaagui tib biini, lozh ga ctoos zho pe cos low, gzolangaa zhow zaatne ngueets. Sac biini ne rquia, glaa rzoba par gziiniw len yu, zeena guiab biini lo grëse zha ne sëeb len yu.

34 Rrieequia nac bziaalo miech zig nac tib biini. Telne niapse lo grë ncuaane ndzinli rwi zho, dzigo gdipse xcuerp zho no lo guielbiini. Laa telne loxaque lo grë ncuaane nonguieldgaa rwi zho, dzigo gdipse xcuerp zho no lo guielcow ga.

35 Golguien sca pa lo rwi to, napaa laa ne tso to lo biini, lel lo guielcow no to.

36 Sac gon, tel dipse xcuerp to no lo guielbiini, ni tib lëw nod lo ncow, zlupaa to; sac masaque nac to ga zig tib zha ne zo gax tib lo biini nroob.

*Güey Jesús lidz tib zha farisé  
(Mt. 23:1-36; Mr. 12:38-40; Lc. 20:45-47)*

37 Zeene blozhse bnee Jesús lo grë miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh,

38 psilo me dow me, per bdiibd me nia me zigne nacpaa xcostumbr grë zha Israel. Zeene gon zha farisé cow, rlozhd gzee zdoo zho;

39 dzigo rëbchaa me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nêz zhitsse mbe rna, laa nêz lena rnadraa di beed.

<sup>40</sup> ¡Nadzpaa ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdoo to gac to miech wen? Sac dib nace to psan me to.

<sup>41</sup> Laa ne squi no to noban to, mazd goldeed ncuaane nacchenpaa to lo grë zha ne guiend pe yquuin, zeena gac to miech ne nlipaa wen.

<sup>42</sup> ¡Probsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcod to gban to zigne rnabey Dios, ib rioxcod to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to.

<sup>43</sup> ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nêz.

<sup>44</sup> ¡Probsaxe to, lëëtaa rdzieel to grë to maistr ley! Masaque nac to zig nac grë baa ne rludraa pa nac. Tel baa cow, zeene rded zho zaatne niaaw, ib riend zho lad grë ncuaan noyodz ga, noded zho.

<sup>45</sup> Horco pquiab tib maistr ley, rëb zho lo me:

—Maestro, ¿ye no dzigo lëë rzoob luu squi nac?

<sup>46</sup> Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcod to siquier csilo to gun tow.

<sup>47</sup> ¡Probsaxe to! Paat rquiinda gon squi rio to, rlozhd dieen paraa rhixcuaa to ro xpaa grë zha ne biadteed xtiidz Dios padzeela.

<sup>48</sup> ¡Igal ntseeb to grë pxozgol to! Sac gon, zha beet grë zha co, laa to no rzhixcuaa to ro baa.

<sup>49</sup> Nanle Dios squitaa ntseeb zdoo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsie-neew lo zho, per nanle naa gandzed zho zho, haxta zut zho groi zho.”

<sup>50</sup> Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu,

<sup>51</sup> desde Abel haxta Zacari men ne beet pxozgol to len yadoo zaatne nac gax lo pcoog. ¡Ne nligaa grëse dol co gon, to quizha!

<sup>52</sup> ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nêde to gliladz tow, ni niicle nêëdgaa to gliladz zha ne racladz ycaaniaw.

<sup>53-54</sup> Blozhse ga, laa me brie ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuaane rnabdiidz zho lo me, rguib zho dien zha gunglëë zho me, par dien pe cxind me pe tib diidz, zeena min co yquiaaqui zho tsiezoob zho xdemand me.

## 12

### *Grë ncuaane rac ngueets zhliaan (Mt. 10:19-20, 28-33; 12:32)*

<sup>1</sup> Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëëdscuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho.

<sup>2</sup> Sac grëse ncuaane sca ngueets rac, grëse ncuaane rlud miech, zdziñ dze ne xoobneña.

<sup>3</sup> 'Zig nac grë ncuaane zhliaanse rnee to lo ncow niina, zdziñ dze ne gon miecha zobna ngbidz; grë ncuaane rnee to len yuse, zdziñ dze ne dib lad guiedz gacnan miecha.

<sup>4</sup> Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grieelodraa zho gun zho.

<sup>5</sup> Golguien, Dios nac men ne mazdraa nroob, mine rnabey me min co

none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonéz me zho néz len gabil.

<sup>6</sup> Nligaa gdiebde to miech, csaand Dios lega pe gac to. Golwi ganle, zig nac grè mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma.

<sup>7</sup> Pelel to dzigo csaan me, haxta guits guic tow, grèsew ngaba lo me. Gdiebde to sca, golguien ganle non-raa to lo tib dzoon mguin.

<sup>8</sup> Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grè xanjl Dios, nacie naa zho.

<sup>9</sup> Sangue zha ne ctoladznie naa lo miech, scaque naa ziep naa lo grè anjl co runbeyd naa zho.

<sup>10</sup> No zha ne rneenë naa, per zun Dios zho perdon dol co; sangue zha ntseeb ne gneenë Espíritu Sant, ib gundraa me zho perdon.

<sup>11</sup> Zeene tsiezo miech rii to lo grè zha ne rnabey xyadoo zho, tsiezogaa zho to lo grè zha ne nac wxtis, tsoe to zhgab dien pe gnee to;

<sup>12</sup> sac zeene sca tsiegala, Espíritu Sant csiaab guic to pe nac mine gnee to zho.

### *Zha ne loxaque rapchen*

<sup>13</sup> Horco wbig tib zha ne no lad grè miech co, rëb zho lo Jesús:

—Maestro, bzhiguiel bnee lo bets naa glè zho ncuane psan pxoz no, gneedz zho mine raguial naa yca naa.

<sup>14</sup> —Aque luuw nli —rëb Jesús—, ¿cho në lo luu laa naa noyun guielwxtis co? Ziald naa gon par quiiz naa ncuane rap miech.

<sup>15</sup> Dzigo bnee me lo grè miech co, rëb me:

—¿Golguien gon, gzoobladzde to demas gapchen to! Sac niicle ndziibbraa gapchen miech, grielod por grè ncuane co ndzon gac lo xquielmban zho.

<sup>16</sup> Znu gon bzhaac tib men ne nroob gopchen. Nat liu quianie me, zeene

rlaap me grè ncuane ran me, nroob ncuane rlis me low.

<sup>17</sup> Bdzin tib dze rgaadraa pa tsotsow grè ncuane co, dzigo bzob me dien zha gon me.

<sup>18</sup> Tibaque zeene rëb me: “Mine naca laa naa gon nroob grè yu qui, zeena zigtaa grè guielnzaac quiw, grèragaa ncuane rap naa, ga tsotsowa grèsew.

<sup>19</sup> ¿Pe zhidaa iz ne lëb grè ncuane co! Peet tsieniedraa guic naa, ine guxt sob naa, gow naa, guie naa ncuane gacladztaa naa.”

<sup>20</sup> Min co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa luu guet. ¿Zhaale zha ne guiaannie grètaa ncuane beenlo luu i!”

<sup>21</sup> Zeene blozh bzodiidz Jesús cuent co, rëbchaa me:

—Sca nagon rzac grè zha ne loxaque dien zha gapchen zho zienie guic zho. Ncuane cose rionie guic zho, ib rioxcod zho gon zho ncuane non néz lo Dios.

### *Rsaand Dios zha ne no xnéz me (Mt. 6:19-21, 25-34)*

<sup>22</sup> Blozh ga, rëbchaa me lo xpëedscuel me:

—Gacxe waa, gni naa lo to ganle: Tsoe to zhgab dien zha gban to lo guidzliu rii, pa griee pe gow to par gban to, pa gdzielgaa ncuane gdze xcuerp to.

<sup>23</sup> Mazd golconie guic to dien zha gac xquielmban to, dien pa tsiebannie to xcuerp to.

<sup>24</sup> Golwi lo grè nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuane row ma. ¿Tel to gon, mazdraa non to lo grè mguin co!

<sup>25</sup> Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow?

<sup>26</sup> Nanle to ganle led ncuane grielod ga. ¿Pe nac dzigo tant tso to zhgab ncuane mazdraa nroob?

27 Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëeb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow.

28 Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw tsecl, ni scataa niow rgacwxab Diosa; ¿pe lel to dzigo ygacwxabd me, niicle ne squi gard guien to dib zdo to gnalo to me?

29 "Tsodraa to zhgab sca, guiab to: "¿Pa griepe pe dioow ne, pa griepe pe dio ne?"

30 Grë miech ne runbeyd Dios, tibaque zhgab co rio zho. Sangue to, golsoladz ganle Pxoze to men ne zob gbaa, nanle me pe nac grë xliaadz to.

31 Me nac men ne gneedz ncuaane yquiiin to, per ib none glo tsoxco to gban to zigne rnabey me.

32 'Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley Pxoze to men ne zob gbaa, laa me rneedz grëse ncuaane rap me lo to.

33 Gacxe waa, laa ne tsonie guic to dien zha gacnroob ncuaane rap to, mine quianie to goltow, dzigo goldeed dimi co yquiiin zha ne rappaa liaadz; zeena sca nroobraa guienzaac ne ygaa to gbaa. Guienzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebгаа lo mxil.

34 'Sca golgun, sac gon guienzaac ne gunlo to, zaatne gunlo tow, ga gdzin to.

*¡Nsin golsol!*

(Mt. 5:25-26; 10:34-36; 16:1-4; 24:45-51; Mr. 8:11-13)

35 'Nsin sca golsol —rëb me lo zho—.

36 Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdzin me, rxal zho ro yu rzëeb me.

37 'Dichos zha ne nsin zo zeene laa men ne rnabey zho glanso. Ib tedsod,

steed me zho nëz len yu, soob me zho lo mezh, csilo me mezhaldz zho. ncuaane gow zho.

38 Nligaa dichos zha ne sca nsin so, horne glansotaa me; niicle tel wxina, ziadyiinigaa liuw.

39 Gogan ganle, tel niaca mine gagan miech laa ngbaan tsieban lidz zho guieel, per nand zho dien pa horpaaw, ¿niacxe zaaguies zho? Led sobna zho lëe, nsin nsin so zho parne csaand zho sëeb ngbaan lidz zho.

40 Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

41 Zeene blozh sca bnee me, rëbchaa Pedr lo me:

—Maestro, mine blozh bnee luu i, ¿pe par nose naca, te ye par grëraa miecha ye?

42 Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuaane gow zho.

43 'Dichos zho, telne ine niowse noyun zho dziin co zeene laa men ne rnabey zho glanso.

44 Zeene gan mew, ib tedsod so me zho, zha gnabey grëse ncuaane quianie me.

45 Per tel tsienie wguit guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho,

46 tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

47 'Sac gon zha ne sca nanle pe nac mine racladz men ne rnabey zho, ni tsoxcod zho gun zhow; ible nroob nac caxtigw ne ted zho.

48 Mazd lëetaa caxtigw ted zha ne peet nand, niicle gund zho mine rnabey me. Grëse zha ne nanle pe nac



mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

<sup>49</sup> 'Niina ne laa naa zial, rrieequia zialzobgui naa lo guidzliu. iNi zoot naa gon, tebaa ranle naa laaw quiayazbel! iTebaa psiaalle naa lo dziin ne zialgun naa!

<sup>50</sup> Per na naraa none teed naa tib guielne nroob, ni mbanse gon rac zdoo naa quiambez naa gdziin dze co.

<sup>51</sup> iMasaque nan to na lee, laa naa zial loxaque par cuiin wense miech? Leda gon, ye zial naa zialgunctil naa zho.

<sup>52</sup> Sac desde len dze rii, yu ne no gaay miech, laa zho ctsolsa. Tel seeb chop zho xnöz naa, laa stson zha ne guiaan ga, ctsidil zho; tel seebga tson zho, scaque grop zha ne guiaan ga, gandzed zho zho.

<sup>53</sup> Meed ne gan laa pxoz zho, laa xniaagaa zho bzöeb xnöz naa, gandzed zho pxoz zho, gandzed zho xniaa zho; scaquegaa zha ne quianie meeda, zeene gan zho laa xingan zho, laa xindzooogaa zho bzöeb xnöz naa, gandzed zho zho. Zha ne nac nguzhizha, zleenie xniaa tsieel zho zho; tel xniaagaa tsieel zhow, zleenie zho me.

<sup>54</sup> Blozhse sca bnee me, rebchaa me lo gre miech ne ndxie ga:

—iPe nlipaa rnee to riende to pe nac gre ncuane noyac len dze rii! Zha zeene ran to rquia xcow nez ne rzöeb ngbidz, znuse rien to laa guie guiab.

<sup>55</sup> Zeene rangaa to ziaad me nez ne rzö ngbidz len me na, nanle to laa neeg gac.

<sup>56</sup> iGuiewquiaalo i lo to gon! Zha zöeb dzigo runbey to gre sein ne rlu zhan gbaa, rlugaa lo guidzliu, laa gre mine quiayan to len dze rii riende to.

<sup>57</sup> iNone guien to tozhal cobey dien pe nac mine nonguiel gun to!

<sup>58</sup> Gzoob ne bdilnie to tib samiech to, laa to nole nez zie to lo wxtis grop to. None guien to, laga no to nez mazd golguiaan mpas, ledle tsiezo zho to lo

wxtis; sac tel laa to gdziin lo wxtis, ib znabey wxtis zha ne co to ladzguiib.

<sup>59</sup> Ni nanle to ganle, grieede to ga, haxtaque lozh quizh to tel palal gac mult ne gnab zho lo to.

## 13

### *Grese miech, ngoopdol nac zho*

<sup>1</sup> Len dze co, bdziin bla zho lo Jesus bzodiidz zho lo me zha bnabey Pilat gut bla zha Galile, leetse zeene no zho len yadoo noyut zho ma ne nogogon zho lo Dios.

<sup>2</sup> Dzigo rebchaa Jesus lo zho:

—Segur na lee, reb to mazdraa ngoopdol gre zha co lo greeraa zha ne no nez Galile, gane sca bdzieelo zho.

<sup>3</sup> iLeda gon! Zigtaa ngoopdol zha co, scaque to ngoopdol nac to; telne csaande to xquientseeb to gbig to lo Dios, ye to znitlo to.

<sup>4</sup> Scaque tsiimtson zha ne bgaadz yuglaa ne bixche Siloe, masaque reb to nagon mazdraa ngoopdol zho lo greeraa zha Jerusalen, gane sca gut zho.

<sup>5</sup> Per gacnan to ganle, ledla! iZig rne naa ga, ye to miech ngoopdol nac to, ni telne csaande to xquientseeb to gbig to lo Dios, ye to dzziin dze ne nitlo to!

<sup>6</sup> Dzigo bzodiidz me tib cuent lo zho, reb me:

—Tib men name, zob tib zhan yag guigw lo xcuaa me zaatne quianie me lbö uv. Cad rdziin me ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex,

<sup>7</sup> dzigo bnabey me zha ne quianap liu co cchuggazh zhow, reb me: “iPchuggazh yag yozh qui, zhlöse zoba i! Nale rac tson iz ziyal naa rguib naa nex low, ni peet nex rneedzda.”

<sup>8</sup> Dzigo pquiab zha ne quia dziin lo me ga, reb zho: “Psaan dien guiaana stibtaa iz rii, na laa naa gle zhana, na laa naa gdziin beeba.

<sup>9</sup> Telne yquiadaque nex low iz ne ziaad, maase cchug new dzigo.”

*Biac tib zhuz ne nosacsi mendox  
(Mt. 13:31-33; Mr. 4:30-32)*

<sup>10</sup> Tib dze ne rdziiladz zha Israel lo dziina, bdziñ Jesús leñ yadoo, psilo me noseed me miech.

<sup>11</sup> Lad grë zha ne noseed me ga, lad co no tib meñ wnaa nlengw nac zhits, gocle tsiimtson iz sca nosacsi men<sub>o</sub>dox me, ib gacd gacnli me.

<sup>12</sup> Zeene gon Jesús me, dzigo bredz me me, pxobnia me guic me, rëb me lo me:

—iNiinagazh gon, laa luu guiac!

<sup>13</sup> iHorcogazh laa zhits me ga gocnli, rley me, psilo me rdeed me xquizh lo Dios!

<sup>14</sup> Laa zha ne rnabey yadoo, zeene gon zho sca beenguiac Jesús me dze co, blëe zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho leñ dze ne rac dziin, ÿled tsod zho guiaad zho guiac zho dze nda rii!

<sup>15</sup> Dzigo pquiab Jesús rëb me:

—iNazdpaa ntseeb to! Rquiaalo to ib peet dziin runde to dze rii. ÿPezhe ga waa run to zeene rsilaa to xcon to, rsilaa to xpurr to dze rii rieguie to ma nis?

<sup>16</sup> Zha nac dzigo rzac to, nonguielda nu beñ naa beenguiac naa wnaa rii, dze rii. Golwi ganle zha xtii Abraham nac me, leñ tsiimtson iz goc sca nosacsi men<sub>o</sub>dox me.

<sup>17</sup> Zha ne rlëe ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

<sup>18</sup> Blozh ga, bnee me rëb me:

—ÿZha ganle racnroob lo xtsiin Dios lo guidzliu rii?

<sup>19</sup> Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

<sup>20</sup> 'Ziaadaque gon gaca, zig ncobi.

<sup>21</sup> Sac tel ncobiw, niipaquew rcots meñ wnaa tson lmud rin, ni dib nacse ncob co rzibe.

*Zha ne ycaania Dios  
(Mt. 7:13-14, 21-23)*

<sup>22</sup> Laa Jesús no nëz zie me nëz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina.

<sup>23</sup> Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rëb me:

<sup>24</sup> —Nligaa zhis zho, sac masaque naca zig tib puert niase. Gol<sub>t</sub>soxco sca niinasraa golsëeb xnëz me ycaania me to, sac dzin dze ne nzian zho gacladz sëeb, per grieelodraaw.

<sup>25</sup> Deque laa meñ ne rnabey csioog ro yu, telne biaan to nëz ley, niicle cuedzraa to me gnab to siguiel me cxal me ro yu sëeb to, per cxaldras mew. “Runbeyd naa to”, gnë me, “nand naa dien cho zha to.”

<sup>26</sup> Niicle guiab to runbey me to, bi-aadpaa me ladz to pseed me miech, haxta downie to me.

<sup>27</sup> “Laa naa nile”, gnë me, “runbeyd naa to. iGunneetraa to naa, ib rdzigu-iend naa grë miech yozh, miech ngoopdol ne nac to!”

<sup>28</sup> 'Mban gac to zeene gan to laa Abraham, laa Isaac, laa Jacob ni grëraa zha ne biadteed xtiidz Dios, laa me pcaania zho, laa to biaanse nëz ley. Nligaa mbandox gac to, zoon to, haxta zow lay to lo guielnë co.

<sup>29</sup> Ni mazdraaw gon, zeene gan to pa lo guidzliu briece grë miech ne bdziñ ga, ine zobnie me zho lo xmezhe me noyownie me zho.

<sup>30</sup> Grë zha ne rzac to niina peet nond, lëetse zha co yгаа guielnzaac co; laa grë zha ne rzac non zho niina, peet ygad zho.

*Bzeet Jesús zha nac zha Jerusalén  
(Mt. 23:37-39)*

<sup>31</sup> Dze coquew, bdziñ bla zha farisé rëb zho lo Jesús grieeniob me ga, sac laa Herod racladz gut me.

<sup>32</sup> Dzigo rëbchaa me lo zho:

—Goltsie golguiab lo mëz win co cxecw me spalal, nadzese ni gzhe gun<sub>g</sub>uiac naa miech nu, zigtaa zha ne rzacnëw, zigtagaa zha ne nosacsi men<sub>o</sub>doxa; gal widz guien<sub>o</sub>dle naa nu.

<sup>33</sup> iNligaa nadzesew ni gzhe, widz laa naa gdziñle Jerusalén zaatne za

naa! Sac ible Jerusalén, ga rut zho grëse zha ne riadteed xtiidz Dios lo miech.

<sup>34</sup> 'iAque tow men Jerusalén! ¿Pe nacie squitaa nac to, rut to zha ne ziadteed xtiidz Dios lo to, rgoquie to grë zha ne rxeeł me lo to? Blactaa gocladz naa niacnie naa to, nquianaap naa to zig run nguid rguuedz ma xpëed ma, per bzhiguiel de to.

<sup>35</sup> Gacnan to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: "iZha ndzontaa men qui pxeel Dios lo ne!"

## 14

### *Biac tib men ne rrie gu*

<sup>1-2</sup> Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziinaque tib men bgui, rzacne me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co.

<sup>3</sup> Dzigo rëbchaa Jesús lo zho, ni lo grë maistr ley ne ndxie ga:

—Golnë dien, ¿pe nonguiela gunguiac naa miech dze rii, te nonguiel da ye?

<sup>4</sup> Ni tib zho pquiabd. Horco pxobnia me guic mgui co, beenguiac me mgui. Blozhse bzonëz me mgui,

<sup>5</sup> rëbchaa me lo zho:

—¿Pe nli na peet dziin runde to dze rii? Tel zha tsietsobe tib xpëed to, tib xmagaa to tib len guiuu dze rii, ¿niacxe tsiebeegazhde to xpëed to, tsiebeegazhdga to xma to ga?

<sup>6</sup> Loxaque lo zho rac, ib bdziel zho pe nquiab zho.

<sup>7</sup> Grëraa miech ne nodziñ ga, no zho rguib zho dien zha ygaa zho zaatne nzhixcuaraa sob zho. Gon Jesús zha rac zho, dzigo bnee me lo zho, rëb me:

<sup>8</sup> —Golguien gon, zeene znu cuedz miech to, zig nac tsie to tib wagw zaatne noyac tib guieltsieel, ib gunde tsiesob to zaatne nzhixcuaraa. Sac gon, nenda glanso tib zha ne nonraa lo to,

<sup>9</sup> lozh ga, laa zha ne bredz to lo lni guiaadliso to ga, gnë zho: "Guso i dien sob men rii." Led tib guiel to ga par to, racse to laa to tsieso ga, tsiesob to zaatne rialle ro beel.

<sup>10</sup> Mazd ganle, zeene sca pa lo tsie to tib lo lni, ndooladz golgac, tib lad gol sob. Zha ne bredzle to lo lni, zeene gan zho laa to zob ga, ziaad zho ziaadxi zho to tsiesobnie zho to zaatne nzhixcuua. Zha ne zoble lo mezh ga, zeene gan zhow, zianziuu to lo zho.

<sup>11</sup> Golsoladz ganle: grë zha ne lëëque zha runnon zho, lel riaanwin zho; laa zha ne riaanwin, runnon miech zho.

<sup>12</sup> Blozh ga, rëbchaa me lo men ne nac lidz ga:

—Scaque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëga zha ne no gax lidz luu zha ne rapchense, zha cose cuedz luu; sac gon ib tedsod zbedzaque zho luu lo zhilni zho, stsire zho miñe been luu ga.

<sup>13</sup> Mazd bredz grëse miech, zig nac zha ne guiend pe yquiin, zig nac zha ne guiend tib nia, zha ne guiend tib ni, zha ne roldga lo;

<sup>14</sup> zeena gal dze ne grieaban grë zha ne bioxco wban zigne racladz Dios, ine gley luu ygaa luu guielnzaac ne tsieguial luu gneedz me lo luu.

<sup>15</sup> Lad zha ne zobgrë me lo mezh ga, pquiab tib zho rëb:

—iDichos grë zha ne sca ygaa tsiesob lo mezh, tsietownie zho Dios zaatne rnabey me!

<sup>16</sup> Pquiab Jesús rëb me:

—Tib men name, nzian zha ne bredz me tsie tib wagw lidz me.

<sup>17</sup> Zeene gol dze ne laa guielwagw co gac, pxeel me tib zhingundziin me ziexi grë zha co.

<sup>18</sup> Per pasë zho nie, zhaase zhaase ncuane pquiaqui zho. Tib zho rëb: "Grieelod së naa, sac laa naa pca tib lë liu, ni lëetse nadze no gaso naa low; bzhiguiel gudz lo me gun me naa dispensar."

19 Stib zho rëb: “Niina wriin pca naa gaay nêz ngon, laa naa no ganie ma dien zha run ma dziin, gudz lo me yquiambëzd me naa.”

20 Laa stib zho rëb: “Grieelod sê naa, sac niina wriin ptsieelna naa, bzhiguiel gudz lo me gacd guial naa.”

21 'Bdziin ngundziin co bzodiidz zho lo me zha rzê xtiidz grê zha co. Zeene bin mew, wbinladz guic me, bnabey me zho güey zho dib lad guiedz güeyxi zho grê zha ne guiend pe yquiin, grê zha ne guiend nia, zha ne guiend ni, zha ne rold lo, grêse zho bdziinnie zho ga.

22 Blozh ga, rëbchaa zho lo me: “Laa naa wbirele xmandad luu gon, per scase noraa zaatne cue miech.”

23 Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nêz rii, bloo guic zho guiaad zho; ib none tsodzëse miech lidz naa.

24 Sac grê zha ne bredz naa glo ga, ni lalnu racladzdraa naa ygaa zho guielwagw rii.”

*Zha ne racladz sëeb xnêz Jesús  
(Mt. 10:37-38)*

25 Laa Jesús no nêz zie me nêz Jerusalén, miech guizhiu ne nal zhits me. Tibaque ptsire lo me bui me lo grê miech co, rëb me lo zho:

26 —Lo grê to ne ziaadnal to zhits naa, gacnan to ganle zha ne racladz ygab xnêz naa, ib none gleynie zho mine rnabey naa. Sac zha ne mazdraa rleyne pxoz, mazdraa rleyne xniala, mazdragaa rleyne zho tsiel zho, xpëed zho, bets zho, bziangaa zho, xquielmban zhow, rquia zdo zhow, peet xtsiind grê zha co par sëeb zho xnêz naa.

27 Sac ni tib zha ne sca yquia zdo cueeladz zho zho guiaadnal zho zhits naa, grieelod ygab zho lo naa.

28 Antes ne yquiabladz to sëeb to xnêz naa, none wen wen sob to dien pe zlëb to ted to mine rieguial to. Zig nacse tib zha ne gzaa tib yu glaa ne gac chop tson xcuaa, led rzobgazh zho rbee zho cuent dien pe zgaa xtimi zho tsaalow.

29 Sac gon nenda loxaque cueeze zhow, ni lozh ga grieelod gzaalo zhow. Miech ne gana laa zho gzhidznie zho,

30 guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.”

31 Scaque rey ne no tilnie stib rey, led none sobgazh zho gan zho dien pe zlëeb tsii mil xmenguiib zho tsietilnie gal mil xmenguiib stib rey co.

32 Telne rgobey me lëbd me, laga bii zit ziaad stib rey co, rxeel me bla zha ne tsie tsienee dien zha gataa cuêz lo xtil zho.

33 'Scaque to nagon none glo gwi to pe nac grê ncuaane no csaan to, parne grieelo ygab to xnêz naa.

34 Sac gon zed ne nzhid, ðpa dien yquiina?

35 Per ni par gaca beeb peet xtsiinda; mine ractaaw, laaw rziaab. Zha ne no liaadz guien zho pe rnee naa, yquiaadiag zhow.

## 15

*Zha rzac Dios zha ne zozit lo me  
(Mt. 18:10-14)*

1 Zeene rseed Jesús miech, nzian grê zha ne rtop dimi ne razh lo zha Roma, ni grê zha ne rzoob miech nac zha yozh, ye zho rbig zho rquiaadiag zho zhiwseed me.

2 Nacne grê zha farisé ni grê maistr ley, rneenê zho me, rnee zho lëda ga run me sca rtsieelsa me grê zha co, rownie me zho.

3 Dzigo bnee me lo zho, rëb me:

4 —Togase nadien, gzoob ne quianie to tib gayoo mëcwxiiil, ni lega naclew rziaab tib ma, ðzha dien run to? Led rsan to ma ne ndxie lo to ga lëe, laa to rie rieguiib to ma ne bziaab ga, haxta rdziel to ma.

5 Zeene rdziel ma lo to, lo guielbley co haxta rxobyan to ma rdziinnie to ma ro yu.

6 Lëelëd rzodiidz tow lo zha ne ndzieeldiidz to, lo zha ne no gax lidz to, sac rley to laa xpëcwxiiil to brieequia.

7 Gni naa lo to ganle, scadaa nagon rzac Dios, tib guielbley nrooba lo me,



zeene ran me laa tib zha ngoopdol rsaan xquielntseeb, laa zho rbig lo me. Ne nligaa tib guielbley rac zha co lo me, lëdle zha ne rzac miech wenle nac zho lo me.

<sup>8</sup> 'Zig rzacгаа tib men wnaa, gzoob ne nzhen me tsii gayoo pes, ni lega naclew rsëeb me tib gayoow, ¿zha dien run me? Led hor cogazh lëe rquiaa me biini, rsilo me dzega dzega rloob me len lidz me haxta rdziel me dimi co.

<sup>9</sup> Zeene rdziel mew, rley me rzodiidz mew lo grë zha ne ndzieeldiidz me, lo grë zha ne no gax lidz me.

<sup>10</sup> Zig rne naa ga, scadaa nagon rzac grë xanj l Dios, tib guielbley nrooba lo zho zeene ran zho laa tib zha ngoopdol rsaan xquielntseeb, laa zho rbig lo Dios.

<sup>11</sup> Dzigo psilo Jesús bzodiidz me tib cuent lo zho, rëb me:

—Tib men name quianie me chop meëdbgui.

<sup>12</sup> Tib dze, rëb zha ne nac zha niab lo me: “Papá, tel pe nac ncuaane no gneedz luu lo no, bzhiguiel ninaga beengrola, zeena gneedz luu mine raguial naa.” Dzigo beengrol me ncuaane rap me, bdeed mew lo zho.

<sup>13</sup> 'Zhisaque goca, pto zha niab co grëse ncuaane bial zho, brie zho laa zho zie. Bdzin zho stib dan, ga been zho grë guielyozh ne gocladztaa zho, grëse xtimi zho pxin zho ga.

<sup>14</sup> Tibaque zeene laa xtimi zho blozh, mbanse rac zho guindraa pe gow zho, ni lëetaque len dze co laa tib gbin psiloque nëz co.

<sup>15</sup> Dzigo racse zho güeyguib zho dziin lad guiedz co, ga briequia tib men co bree zho, pxeel me zho quiaanap zho nguts.

<sup>16</sup> Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

<sup>17</sup> 'Sca no zho ga, tibaque zeene bial zho biini psoladz zho nzian zha ne quia dziin lo pxoz zho, grë ncuaane raclo row grë zha co, haxta riaana, ni laa zho sca noded ga; rëbchaa zho:

<sup>18</sup> “Mazd mine naca laa naa guia gdziin naa lo pxoz naa stib, guiep naa lo me gun me naa perdon grëtaa falt ne ben naa lo me, falt ne bengaa naa lo Dios.

<sup>19</sup> Maase sacdraa me naa zig xpëed me, siguiel me ycaania me naa gac naa zig tib zha ne quiaze dziin lo me.”

<sup>20</sup> Horco bio zho nëz laa zho zey nëz lidz pxoz zho. Zitaa ziaad zho laa me gonle zho, pquia zdo me zho gon me zha rac zho; rias me güeydzieelo me zho bnaaz me nia zho, bdeedz me zho.

<sup>21</sup> “Papá”, rëb zho lo me, “rien naa nroob falt ne ben naa lo Dios, bengaa naa lo luu. Rieguialdraa sac luu naa zig tib xpëed luu.”

<sup>22</sup> 'Ni blëzd me nlozh nee zho, lëelëd bredz me zha ne quia xtsiin me, rëb me: “¡Na goltënie tib nëz lar wen nu gacw xpëed naa! ¡Goltënie tib nil wen tso nia me, tib nëz guielguid cub yquia ni me!”

<sup>23</sup> Bnabey me zho güeyxi zho tib ngon ne mazdraa ndaan, beet zho, rëb me: “¡Ib none gac tib lni, none dioow ne, none dio ne!”

<sup>24</sup> ¡Sac gon gun naa cuent, brieaban xpëed rii naa! ¡Bnitle me ga, na laa me bdziel!” ¡Laa lni psilo!

<sup>25</sup> 'Lni co noyac, zeene laa stib xpëed me zha ne nac zha gol ga, wbire lo dziin dan. Bdzin zho gax ro yu, rlu rquia di, haxta wiee rlu noyac;

<sup>26</sup> dzigo bredz zho tib zha ne quia dziin lo pxoz zho ga, bnabdiidz zho dien pe lni ne noyac.

<sup>27</sup> Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon me mban zho laa zho blanso. Bnabey me gut tib ngon ne mazdraa ndaan.”

<sup>28</sup> Blëe zha gol co bin zhow, lo guielblëe co bzëebd zho ro yu. Nacne brie pxoz zho, bnee me lo zho sëeb zho ro yu.

<sup>29</sup> Dzigo rëbchaa zho lo me: “¡Lëdraaw i gon papá noyun luu! Bui ganle blactaa iz ne quiayun naa dziin lo luu, wlaataa gard quits naa tib xtiidz luu. Ni zha rna tib dze, siquier

tib chiv yeen ygad luu lo naa, gownie naa grë zha ne ndzieeldiidz naa.

<sup>30</sup> Cho dzigo nac zha qui, blozhse güeyloozh zho xtimi luu lo grëtaa guielyozh ne been zho, na no luu beet luu ngon ne mazdraa ndaan, noyuu luu zhilni zho.”

<sup>31</sup> Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaane quianie naa, luu guiaanniew.

<sup>32</sup> Per niina ne laa bets luu blanso, ib nonguiela znu dziuun ne tib lni gleynie ne me; sac gon bnit me, ni na laa me bdziel. iDziuun ne cuent brieaban me nu!”

## 16

### *Ligier miech par lo guielntseeb*

<sup>1</sup> Tib vuelt bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëtaa ncuaane rap me; tib dzew, lega nacle bded diag me zhliaan noxiu zha co xtimi me.

<sup>2</sup> Dzigo bredz me zho, rëb me lo zho: “Lëda i gon squi ruu luu, lega noxiu luu xtimi naa. Niinaga racladz naa guiaadnie luu cuent nu dien zha quiaayuu luu dziin; sac grieelodraa so luu lo grë ncuaane rap naa.”

<sup>3</sup> Wbire zho ga, rëb zho: “Zha na ganle guu naa, telne guiab ne ga naa dziin dan, lëbdraa naa guu naa dziin co; tel guiaabгаа ne na ga naa gatop naa gon, rtoladz naa gnab naa gon lo miech.”

<sup>4</sup> Tibaque zeene biab guic zho rëb zho: “iLaa naa bienle zha guu naa, zeena tso zha ne guu xyudar naa zeene laa naa grie lo xtsiin men rii!”

<sup>5</sup> Dzigo psilo zho bredz zho zha ne quia guielqui lo men ne quia zho xtsiin ga. Bdziu tib zha co bnabdiidz zho lo zho dien palal nzëeb zho lo me.

<sup>6</sup> Rëb zha co: “Tib gayoo tamb nceit nac mine nzëeb naa lo me.” Dzigo rëbchaa zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaa stiba, pquiaa lo co, groi tamba zëeb luu.”

<sup>7</sup> Bdziinaque stib zha co, bnabdiidz zho lo zho dien palal nac xquielqui zho lo men co. Zha co rëb zëeb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tap-galaaque saca zëeb luu.”

<sup>8</sup> Zeene bien men co zha noyuu zho, bzee zdo me gon me scataa ndzielguic zho. Ncuaane ntoladza, per grëse miech ne zienal ncuaan lo guidzliu rii, ndzielguic zho par guu zho grë guielntseeb. Par min co ndziibraa ndzielguic zho lo zha ne no xnëz Dios.

<sup>9</sup> Sangue to gzoobladzde to guu to min co, ncuaane rap to lo guidzliu rii, golquiina per par guu to xyudar samiech to. Zeene laa ncuaan co grë, nenda zacnie zho to, per mine mazdraa non Diossi ible zacnie me to, zneedz me tib lugar ndzon cuëz to, led yedraa ga pe nitlo.

<sup>10</sup> Zha ne ndzinli rundziin tel palal yeense ncuaane riaanne zho, scaque ndzinli gundziin zhow zeene guiaanne zho nrooba. Laa zha ne ndzinlid, mine guu zho zeene guiaanne zho ncuaan zhis, mincoque guu zho zeene guiaanne zho ncuaane nroob.

<sup>11</sup> Nana zha ne sca gacd ne ndzinlise gundziin zho ncuaane no lo guidzliu rii, i zha dzigo grieelo gundziin zho ncuaan ndzon ne gdeed Dios lo zho zaatne no me?

<sup>12</sup> Stiba, tel sca ndzinlide to lo chen ben, ipe naczhe ncuaane guu to tib ncuaane chenpaa to?

<sup>13</sup> Golgona ganle, grieelod gon gleynie to dimi ni gleynieque Dios. Ib none telne Dios rleynie to, me none gleynie to, togo dimigaaw, dimi golleynie.

<sup>14</sup> Grë zha ne nac farisé zeene gon zho sca rnee me, lel rzhidznie zho me, sac tel zhaw rleyniedox zho dimi.

<sup>15</sup> Dzigo rëbchaa me lo zho:

—Masaque rzac to nalëe nli miech wen nac to nëz lo Dios, sangue me gon, wen wen nan me zha nac zdo to. Nli miech ne ran to, zha wen rzoob zho

to; sangue Dios ni lalnu rzacd zdo me mine run to.

<sup>16</sup> 'Len dze ne gard guiaad Juan Bautist, niapse xley Moisés ni grē mine bnee zha ne biadteed xtiidz Dios, miñ co nac mine güeynal to. Per zeene psilo Juan pseed me miech, desde hor co laa miech quiayacnan stib mod ne grielo ygaa zho zaatne rnabey Dios; gane na nzian zha ne noxco ygaa lugar co.

<sup>17</sup> Per guiabde to togo nondraa ley, sac grēse mine zhobnee lo ley, jib laaw none gac! jZig nac guidzliu, zig nac gbaa zrieelo nitlow, sangue ley nitloda, tibaque naca!

<sup>18</sup> Gacxe waa, grē zha bgui ne rsēbtsieel niina ni rtsieelnia zho stib wnaa, zha ne rtsieelniagaa tib wnaa ne psēēbtsieel, dol ga quiayun zho; zigtaa dola padzeela, scaque niina dola.

### *Xcuent tib zha prob lē Lazh*

<sup>19</sup> 'Tib ricw name —rēb Jesús—, niapse grē lar niazh racw me, gzobse dze run me lni lidz me.

<sup>20</sup> Zaatne noque me ga, guiedz co no tib zha prob lē Lazh, lala prob me ni rlanaque me guiedz, gdipse lad me noyacnē guiedz co. Riese me riesob me ro lidz zha ricw co,

<sup>21</sup> rquiambēz me dien pe grielod gow me maase ncuaane rrieengaale lo xmezha men co; ga zob me haxta rdziñ grē mēcw rzēēludz ma lo guiedz ne rlan me ga.

<sup>22</sup> 'Bdziñ dzew laa Lazh gut, dzigo biet xanjl Dios beynie zho me lo Abraham, zaatne rdziñ grē zha wen. Goc palal dzew, laa men ricw co gutaque, blozhse pquianap zho me, laa zho güeyqueets me;

<sup>23</sup> zeene biala me biini laa me nole gabil. Lēbdraa me no me lo guielnē co, lega naclew blis lo me, zit squi gon me Abraham, laa Lazh zobnie Abraham ga.

<sup>24</sup> Horco bnaab me lo Abraham siguiel Abraham cxeel me Lazh, maase guic mzhugniasē Lazh yquiaa Lazh nis tsiegadz Lazh lo ludz me; sac lēbdraa me lo guidox ne no me ga.

<sup>25</sup> Dzigo rēbchaa Abraham lo me: “Xin, psoladz ganle zeene wban luu lo guidzliu, ncuaane gocladztaa luu pquianie luuw; laa Lazh mbanse bded me. Nagaa na, me nac men ne nogaa noyan guielbley, laa luu bgaa squi no luu lo guielnē qui.

<sup>26</sup> Stiba, zha ne no nēz rii gacd guiaad zho i, niicle zha ne nogaa iw, gacd guiaad zho nēz rii; sac no tib yeedox ne rtse.”

<sup>27</sup> “Bzhiguiel sca”, rēb men ricw co, “pxeel Lazh tsie me lidz pxoz naa,

<sup>28</sup> tsienie me diidz lo zgaay bets naa zha ne biaan, guiab me lo zho ib gund zho mine beñ naa, zeena guiaate zho nu ygaa zho lo guielnēdox rii.”

<sup>29</sup> Pquiabchaa Abraham, rēb Abraham: “Tel mincow, tsow glab zho lo grē ley ne psan Moisés, lo grē mine bnee grē zha ne güeyteed xtiidz Dios, benque lo co zhobnee zha no gban zho.”

<sup>30</sup> “Nliw”, rēb me, “per tel squi tib men ne gutle tsie tsienē lo zho, rien naa znuse csaan zho xquielntseeb zho gbig zho lo Dios.”

<sup>31</sup> Dzigo rēbchaa Abraham: “Telne rond zho mine rnabey grē ley ne psan Moisés, grē mine bnee zha ne güeyteed xtiidz Dios, scaque gond zho diidz niicle tsie tib zha ne brieabanle tsienē lo zho.”

## 17

### *Zha ne gunctal xtol stib zho (Mt. 18:6-7, 21-22; Mr. 9:42)*

<sup>1</sup> Tib vuelt rēb Jesús lo xpēēdscuel me:

—Nac lo guidzliu rii, ib gunfalte ncuaane rgogui miech gunctal zho xtol zho, jper probsaxe zha ne rquiiil samiech runctal zho xtol zho!

<sup>2</sup> Mazd zhi guielnēw lo zho ygadoo tib quie molin zhobxtil yan zho tsieron zho zho nisdoo, lēdle guielnēdox ne gan zho; sac gon dol nroob ga gun zho yquiiil zho zha ndooladz ne no xnēz naa.

<sup>3</sup> jGolguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon.

<sup>4</sup> Niicle telne nzian vuilt sca gun zho falt lo luu tib dze, been zho perdon zeene laa zho rbig rnab zho perdon lo luu.

<sup>5</sup> Stib dzew, rëb zha ne rzënie me lo me:

—Bneedz guielbiini lo no dib zdooraa no gnalo no Dios.

<sup>6</sup> Pquiab me rëb me:

—Tel niaca mine gzoob ne rnalole to Dios siquier lal tib midz moxtaz, niicle ncuaane mazdraa ngan gnab to lo me, zun mew.

<sup>7</sup> ¿Pe ran to ganle, zha nac zha ne run xtsiin ben? Zeene rbire zho dan, yase güey zho gon, güeygaa zho güeyquianap zho ma, pe liaadz men ne quia zho xtsiin ga, guiab me lo zho: “Na bded, bzob, zeena gowxtsee luu.”

<sup>8</sup> Mine run me, gloque rnabey me zho gunlo zho ncuaane gowxtsee me, gdziib zhow lo me; rlozhraa row me, dzigoraa rowxtsee zho.

<sup>9</sup> Niicle scataa ron zho mine rnabey me, ni rlozh ga, per ni xquizh rdeete me lo zho.

<sup>10</sup> Scaque to nagon, zeene lozh gun to grë dziin ne pso Dios to gun to, peet yquiambëzde to, golguien tib ngundziinse nac to, mine rieguial to ga, min co been to.

### *Biac tsii zha ne rlan guiedz lepr*

<sup>11</sup> Laa Jesús no nëz zie me nëz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé,

<sup>12</sup> zeene brieequia tsii zha ne rlan guiedz lepr. Zit zo zho,

<sup>13</sup> nguiedz rbedz zho me, rnab zho lo me yquia zdo me zho.

<sup>14</sup> Zeene gon me zho, rëbchaa me lo zho:

—¡Goltsie, goltsielulo lo pxoz, zeena gan zho ganle laa to biacle!

Dzigo laa zho zie. Nëz no zho laa zho biaanmbe lo guiedz co.

<sup>15-16</sup> Lo gza zho, hor co rias tib zho wbire, nguiedz rnee zho:

—¡Zha ndzontaa Dios! ¡Golwi ganle laa me beenguiacle naa!

Zigne bdzin zho lo Jesús, pquiits-gzhib zho lo me, haxta bdzin lo zho lo

liu, rdeed zho xquizh lo me. Tib zha Samara, zha zit nac zho.

<sup>17</sup> Dzigo rëbchaa Jesús:

—¿Yoraazhe grë zha co waa? Conque tsii zho name beenguiac naa.

<sup>18</sup> ¿Tibaque zha zit rii dzigo lëe rzac zdo mine been Dios lo zho?

<sup>19</sup> Dzigo bliso me zha co ga, rëb me lo zho:

—Porne dib zdo luu gon bnalo luu Dios, gane biac luu. Bzë, peet tsieniedraa guic luu.

### *Zeene gbiire guiaad Mgui ne pxeel Dios*

(Mt. 24:23-28, 36-41)

<sup>20</sup> Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnan to ganle, nacd min co ncuaane ganlopaa miech.

<sup>21</sup> Grieelod guiab zho laaw psilo nec, laaw psilolegaa nëz rii; sac gon tel niina laa me quianabeyle nu.

<sup>22</sup> Bded ga, rëbchaa me lo xpëedscuel me:

—Zdzin dze, gacladz to tebaa zha znu so naa lo to maase tibaque dze, per gacdraaw.

<sup>23</sup> Len dze co, zio zha ne gnë lo to: “Goltë ganle laa Mgui ne pxeel Dios bdzin nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho.

<sup>24</sup> Sac zeene gbiire guial naa, grëse miech gana. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëeb ngbidz, ¿niacxe gand grëse miecha?

<sup>25</sup> Per ansraa ne gac min co, ible nroob guielnë ne cteed miech rii naa, ni lalnu gandzed zho naa.

<sup>26-27</sup> Len dze ne guial naa ga, grë miech ne ndxie lo guidzliu gal hor co, zhaa grë ncuaane tsonie guic zho. Rsoladz to ganle zha rac miech len dze ne biaad Noé, lel lo grë zhilni zho no zho, zha ne notsieelna, zha ne nobediin xpëed, tibaque zeene biao zho biini laa guiedox co psilole. Laa Noé nole len barcw, laa zho biaan



grëse zho bñitlo lo nis co. Scadaa nagon no miech len dze ne guial naa.

<sup>28</sup> Zig racгаа miech Sodom len dze ne brie Lot ga. Scaque, loxaque ncuaan lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz.

<sup>29</sup> Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bñitlo lo guidox co.

<sup>30</sup> Scapaa nagon rac miech ne ndxie lo guidzliu len dze ne laa naa guial.

<sup>31</sup> 'Zha ne lëëtaque hor co no glaa guic yu, ib guiabd zho sëeb zho len yu tsiebee zho ncuaane no len lidz zho, zha ne quiagaa lo dziin dana, ib guiabd zho gbi zho guey zho ro yu.

<sup>32</sup> ¡Golsoladz ganle zha bzhaac wnaa ne goc tsieel Lot!

<sup>33</sup> Grëse miech, zha ne sca rquianë zdo grë ncuaane rap zho, ible zñitlo zho xquielmban zho; sangue zha ne rquiad zdo grë ncuaan co, haxta xquielmban zho rbeeladz zhow, nitlod zho.

<sup>34</sup> Gal hor co, zaatne tipse nixgues chop zho, tib zho sënal zhits naa, laa stib zho guiaan.

<sup>35-36</sup> Zaatne tipse quiayot chop wnaa, zaatne tipsegaa quia chop mgui lo dziin dana, tib zho sënal zhits naa, laa stib zho guiaan.

<sup>37</sup> Dzigo rëbcha xpëëdscuel me lo me:

—¿Pa lo dzigo gdziñ grë zha co?

Pquiab me rëb me:

—Horco bii zlu ganle paw. Zig nac grë pech, zaatne nix magut ga rdziñ ma.

## 18

### *Zha ne rnab lo Dios*

<sup>1-2</sup> Stib dzew, bzodiidz Jesús tib cuent lo xpëëdscuel me, par guien zho ib guiaan zdo zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdo me samiech me, per ni Dios rdziebd me.

<sup>3</sup> Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlë lo zhuz.

<sup>4-5</sup> Glo ib rquiaadiagd me mine rnab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuaane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guidgunneetraa me naa, mine naca mazd laa naa gun guielwxtis ne rnab me.”

<sup>6</sup> Blozhse bzodiidz Jesús cuent co, rëbcha me lo zho:

—Telne sca bdziñ dze ne pquiaadiag zha ntseeb co mine bnab wnaa viud co,

<sup>7</sup> ¿pe lel Dios dzigo yquiaadiagd xtiidz zha ne ngab lo me, tel tibaque gnab zho mine racladz zho?

<sup>8</sup> ¡Nligaa, ib tedsod zun me mine rnab zho! Per segur zhis zho quiambëz gac xquielwxtis me, zeene laa naa guial stib.

<sup>9</sup> Laa grë zha ne riats, zha ne rzac masaque zha wen nac zho nëz lo Dios, haxta rbix zdo zho ran zho grëraa miech, bnee Jesús lo zho, rëb me:

<sup>10</sup> —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma.

<sup>11</sup> Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nace zha ne zo i. Wlaltaa rund naa guielgbaan, rund naa guielntseeb, niicle rquiangoobd naa stib wnaa.

<sup>12</sup> Haxta chop vult rcuan naa tib len zhmal, grëse ncuaane run naa gan, run naaw tsii lal, rnedz naa tib lal mine rieguial luu.”

<sup>13</sup> Laa zha ne rtop dimi ne razh Roma ga, gaxaque ga zo zho, per nquiitsrunse zho liu. Mban rac zho, quiase nia zho zdo zho, rnee zho lo Dios: “¡Dios, rnab naa lo luu pquia zdo naa znutaa miech ngoopdol nac naa!”

14 'Gneli naa lo to ganle —rëb Jesús—, mazdraa gon wen biaan recaudador co lo Dios, lëdle zha farisé co. Sac zha ne lëëque zha runnon zho, racnond zho lo Dios, laa zha ne riaanwin, runnon me zho.

*Beenlay Jesús mëëdlas*  
(Mt. 19:13-15; Mr. 10:13-16)

15 Tib dze, nzian men ne bdzin lo Jesús, bdzinne zho xpëëdlas zho lo me, parne cxobnia me guic win gunlay me win. Grë zha ne nac xpëëdscuel me, lel psilo zho ndox zho lo grë zha ne bdzinne grë mëëdlas co.

16 Zeene gon me sca quiayun zho, dzigo bredz me zho, rëb me lo zho:

—¡Ctsirede to grë mëëdlas yeen qui! ¡Golsaan guiaad win lo naa! Sac gon grë mëëdlas yeen qui, ni zha ne nac zig nac win, zha co nac zha ne sëëb ygab lo Dios.

17 Nligaa zha ne gacndooladzd, zha ne gliladzd dib zdoo, zigne run grë mëëdlas, grieelod gdzin zho zaatne rnabey Dios.

*Ncuaane run dimi*  
(Mt. 19:16-30; Mr. 10:17-31)

18 Tib vuelt, wbig tib men ne nac zha non lo menguedz Israel, rëb me lo Jesús:

—Nan naa luu nac tib men ne noseed miech, ni tib men wen nac luu, ¿bnë lo naa dien, pe nac mine gun naa parne grieelo yгаа naa guielmban ndzon ne gdziñd dze lozh?

19 Pquiab Jesús rëb me:

—Rnee luu lëë tib miech wen nac naa. ¡Nligaaw, Diosse gon nac men wen!

20 Telne nli racladz luu yгаа luu guielmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsiæld luu, gute luu samiech luu, cuand luu samiech luu, yquiadiidzguizhd luu samiech luu. Gon pxoz luu, gon xniaa luu, cued luu xquielto me.

21 Dzigo rëbchaa men co:

—Maestro, grëse mine bzeet luu i, ni tiba gard quits naa wlal ne nac naa zha nguieg.

22 Horco rëb Jesús lo me:

—Stibaque mine rquiin gun luu. Güey, güeyto grëse ncuaane quianie luu, dzigo bdiiz dimi co lo grë zha mban ne guiend pe yquiin; sca nroobraa guielnzaac ne yгаа luu gbaa. Lozh ga, dë, dënal zhits naa.

23 Zeene bin men co sca rëb Jesús, mbanse rac me laa me zey; sac nroob ncuaane quianie me.

24 Dzigo rëbchaa Jesús lo xpëëdscuel me:

—¡Zha nganta lëë, rzac zha ne squi rapchen sëëb zho xnëz Dios gnabey me zho!

25 Mazd ngandse rded tib camell guieer guzh.

26 Grë zha ne ndxie ga, zeene bin zho sca rëb me, rneechaa zho:

—Telne scataa ngan sëëb miech xnëz Dios, ¿chomezhe dzigo waa nac zha ne zrieelo sëëb xnëz me?

27 Dzigo rëbchaa Jesús:

—Nligaa par miech, zootle tsod zha ne grieelo sëëb xnëz me; sangue me nan me no zho. Sac tel me, tsod ncuaane grieelod gun me.

28 Horco pquiab Pedr, rëb Pedr lo me:

—Tel no, grë ncuaane rdziaapse no psan now, laa no ziaadnal zhits luu.

29 Pquiab me rëb me:

—Golgacnana ganle, grëse zha ne psan lidz, psan zho tsiel zho, psan zho xpëëd zho, psan zho pxoz zho, psan zho xniaa zho, psan zho bets zho, bziangaa zho, porne bzëëb zho xnëz Dios,

30 na lo guielmban riique, mazdraa nroob mine gan zho, ni lozh ga ib tedsod zгаа zho guielmban ndzon ne gdziñdraa dze lozh.

*Bzeet Jesús stib zha csacsi miech me*

(Mt. 20:17-19; Mr. 10:32-34)

31 Ne sca no Jesús nëz zie me nëz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha gun miech me, rëb me:

—Grëse mine bzeetle zha ne biadteed xtiidz Dios padzeela teed naa, niina ne laa ne gdziñ Jerusalén, laaw gac cumplir.

<sup>32</sup> Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa,

<sup>33</sup> zguin zho naa, ni haxta zut zho naa. Per zeene gac tson ngbidza, zriebaan naa.

<sup>34</sup> Per ib biend zho dien zha nacne sca rnee me.

*Biac tib zha ne rold lo  
(Mt. 20:29-34; Mr. 10:46-52)*

<sup>35</sup> Laa Jesús bzëëb ro guiedz Jericó, miech guizhiu ne nal zhits me. Ro nêz co zob tib men ne rold lo, rnab me gon.

<sup>36</sup> Zeene bien me rlu nzian miech noded ga, dzigo bnabdiidz me dien pe nacne scataa ziaad grë miech co ga.

<sup>37</sup> Dzigo rëb zho lo me, Jesús, men Nazaret ziaad ga, zhits me ziaadnal grë miech co.

<sup>38</sup> Horco psilo me nguiedz rbedz me, rnee me:

—¡Jesús, men xti rey David, pquia zdo naa!

<sup>39</sup> Grë zha ne ner, psilo zho ndox zho lo me parne guioog ro me, per lel hor cole nguiedzraa rbedz me Jesús, rnab me yquia zdo Jesús me.

<sup>40</sup> Nacne zeene bdziñ Jesús gax zatne zob me, blëz Jesús, bnabey Jesús güeyxi zho me. Bdziñ me lo Jesús, rëbcha Jesús lo me:

<sup>41</sup> —¿Pe nadien gun luu naa?

Pquiab me rëb me:

—¡Racladz naa guiac lo naa!

<sup>42</sup> Dzigo rëbcha Jesús:

—¡Niinagazh gon laa luu gan stib! Laa luu biac, sacne dib zdo luu bnalo luu naa.

<sup>43</sup> Horcogazh laa men co psilo bui, ine rley me roolnie me Dios, laa me zienal zhits Jesús. Haxta grë miech ne zienal ga, zeene gon zhow, ye zho roolnie zho Dios.

## 19

*Güey Jesús lidz tib men lë Zaquew*

<sup>1-2</sup> Guiedz Jericó, ga no tib men ne rnabey lo grë zha ne rtop dimi ne razh lo rey Roma, lë me Zaquew. Zeene laa Jesús zieded lad guiedz co,

<sup>3</sup> brie me, ziewi me, sac racladz me gunbey me Jesús. Bdziñ me, pasëse me gan me Jesús, sac lala miech guizhiu ne nal zhits Jesús, ni lala ndopse me.

<sup>4</sup> Mine been me, rias me bdedner me güeytsep me tib lo yag guigw zob ro nêz co, par gdeeda diidza gan me Jesús, zeene laa Jesús ted ga.

<sup>5</sup> Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

<sup>6</sup> Rley Zaquew gon Zaquew sca rëb Jesús, lëëléd biet me lo yag co, laa me zienie Jesús nêz lidz me.

<sup>7</sup> Zeene gon grë miech cow, rlë zho, rnee zho:

—¡Pe lëëtaa lidz zha ngoopdol qui ziebëz me!

<sup>8</sup> Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnan luu gon, lo grë ncuaañ rap naa, laa naa gded grola ygaaz lo grë zha ne guiend pe yquiin, ni tel no-gaa zha ne ndziibraa mine beenquizh naa zho, naa maase ctsiree naa tap lal mine blan naa zho ga.

<sup>9</sup> Horco pquiab Jesús, rëb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xti Abraham nac me, per bzonziaab me

<sup>10</sup> ni naa ne nac naa Mgui ne pxeel Dios, ible laa naa zial zialsilaa naa grë zha ne zonziaab.

*Zha ne biaanñie dimi*

<sup>11</sup> Grë miech ne zienal zhits Jesús ga, rzac zho zigne laa me gdziñ Jerusalén, laa me sob gac me zhirey zho; nacne bzodiidz me tib cuent rii, rëb me lo zho:

<sup>12</sup> —Tib xpëed zha non name, no me tib guiedz win, nacle diidza laa me no tsie zaatne zob men nroob ne rnabey, parne gzo zho me gac me rey guiedz ne no me ga.

<sup>13</sup> Zeene laa dze co bdziñ, dzigo bredz me tsii zha ne quia xtsiñ me, nroob dimi ne psan me lo zho tib tib zho, parne guñdziin zhow, mientras gbire me.

<sup>14</sup> 'Nzianlaa zha ladz me, rlëe zho ran zho me, dzigo pxeel zho bla zha ne güey lo men ne rnabey ne zie me ga, güey nab zho gdeete men co dziin co lo me.

<sup>15</sup> Per niicle sca güey grë zha co, peet brieelod niun zho. Blozhse bzo rey co me, laa me bdziñ ladz me. Zeene bdziñ me, bredz me gza zha ne biaan nie xtimi me ga, par dien palal ziyaca.

<sup>16</sup> Bdziñ tib zho, rëb zho: "Laa xtimi luu nu gon, tsii lal mine psan luu ga naca niina."

<sup>17</sup> Rley me rëb me lo zho: "iZha squi nagon racladz naa! iWen brieequia xtsiñ luu! Niicle zhis ncuane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz."

<sup>18</sup> Bdziñ stib zho, rëb zho: "Laa xtimi luu nu gon, gaay lal mine psan luu lo naa ga naca niina."

<sup>19</sup> Scaque rley me. Bzo me zho gnabey zho gaay guiedz.

<sup>20-21</sup> Zeene bdziñtaa tib zho, rëb zho: "Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu."

<sup>22</sup> Blëe guic me, rëb me lo zho: "iBiche nu, paat rquiind naa miech yozh ne squi nac! Conque nanle luu zha nac naa,

<sup>23</sup> ipep nac dzigo waa bioxcod luu maase mbediñ luu dimi qui, ndzinaaaw palal ncaania naaw niina?"

<sup>24</sup> Dzigo rëbcha me lo grë zha ne ndxie ga: "Niinagazh golcob dimi qui nia zha qui, goldeeda lo zha ne ziaadnie tsii lala i."

<sup>25</sup> Pquiab zho rëb zho: "Per pe nacne zha coque ycaaniaw, ni nrooblew beenlo zho."

<sup>26</sup> "Ib sca no gaca", rëb me, "sac zha ne rien zha guñdziin zho ncuane

rcaania zho, nroobraa ncuane ycaania zho. Laa zha ne squi nac, haxta mine pcaaniale zho, zdiooba lo zho.

<sup>27</sup> Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho."

### *Bdziñ Jesús Jerusalén*

(Mt. 21:1-17; Mr. 11:1-11, 15-19; Jn. 2:13-22; 12:12-19)

<sup>28</sup> Blozhse bzodiidz Jesús cuent co lo zho, laa zho bio nëz stib, nerse me lo zho.

<sup>29</sup> Zeene bdziñ zho gax Gui Oliv, zaatne ndxie guiedz Betfagé ni guiedz Betain, pxeel me chop xpëedsuel me,

<sup>30</sup> rëb me lo zho:

—Goltsie guiedz win ne ndxie danse lo ne i. Ga gdziñ to zaatne quiadoo tib burr yeen ne choot gard sob lad, dzigo golxadz ma, goltënie ma nu.

<sup>31</sup> Tel cho gnabdiidz lo to pe nacne noxadz to ma, golguiab lo zho: men ne rnabey ne, men co rquiin ma.

<sup>32</sup> Laa zho zie. Bdziñ zho, zaatne quiadoo burr co,

<sup>33</sup> nligaa, lëetaque noxadz zho ma, zeene laa bizhuan ma bdziñ.

—iPe gun to xpurr naa? —rëb me lo zho—. iPe nacne noxadz to ma?

<sup>34</sup> Dzigo rëbcha zho:

—Men ne rnabey ne, men co rquiin ma.

<sup>35</sup> Bdziñnie zho ma lo Jesús, pxob zho lar ne rbix zho lad ma, bzob me ma.

<sup>36</sup> Zigse zie me, no grë miech guizhiu co rta zho xab zho ro nëz rded burr ne zob me ga.

<sup>37</sup> Grëse miech co, rley nie zho me. Laa zho xiuxto dze cho gui Oliv, zeene psilo zho nguiedz zëeb tsi zho, rley zho roolnie zho Dios, por grëtaa milagr ne zian zho run Jesús;

<sup>38</sup> rnee zho:

—iNasi laa Dios pxeel zhirey ne! iZha ndzontaa Dios! iHaxta gbaa noyac guiebley dze ri!

<sup>39</sup> Blalaa zha farisé ne zianal ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho.

<sup>40</sup> Dzigo rëbcha me:



—¡Zac guioog ro zho, per hor co dzigo laa grë quie rii csilo goolniew naa!

<sup>41</sup> Zeene bdziñ me zaatne nieenpaa Jerusalén, psilo biab guielñe me, biin me gon me guiedz co,

<sup>42</sup> rëb me:

—¡Prob to men Jerusalén! ¡Tebaa ye to nien niunbey to men ne needz guielbley rii lo to! Per na ib biende tow, masaque rzac to zig zha ne nioog lo.

<sup>43</sup> Na nagon laa dze co bdedle. Grë zha ne rlëe lo to, ible ziaad zho ziad-sioog corral zho to, ni tib nëz tedlaade to lo zho,

<sup>44</sup> haxta guiab to ladznia zho, grë xpëed to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtoł to.

<sup>45</sup> Bdziñ me Jerusalén, güey me yadoo, psilo me blee me grëse zha ne noyūñ lgui ga, rëb me lo zho:

<sup>46</sup> —Znu zhobnee lo Xtiidz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayūñ to lugar rii zig tib zhib-licee ngbaan.

<sup>47</sup> Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo mengüiedz, quiaguib zho dien zha gdeeda diidz gut zho me.

<sup>48</sup> Per rdzielz zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

## 20

### *Bnabdiidz zho cho nac Jesús*

(Mt. 21:23-27; Mr. 11:27-33)

<sup>1</sup> Len dze ne sca noseed me miech len yadoo, nonee me lo zho zha nac Xtiidz Dios, tib vuelt bdziñ bla zha ne nac pxoz ne rnabey, grë zho bla maistr ley ni zla men ne nac men non lo mengüiedz,

<sup>2</sup> rnabdiidz zho lo me dien cho nac me, cho rnabey me, zha nacne sca quiayūñ me.

<sup>3</sup> Dzigo rëbchaa me lo zho:

—Ye naa laa naa gun tib wnabdiidz lo to.

<sup>4</sup> Golñe dien cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

<sup>5</sup> Psilo zho rnabdiidzlsa zho dien zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnë: “¿Pex nac dzigo waa bliladzde to minë bnee Juan?”

<sup>6</sup> Tel na dzieetsgaa ne, miechse pxeel Juan, grieequiadaque ne; zgoquie mengüiedz ne, sac grëse zho riladz Dios pxeel Juan.

<sup>7</sup> Dzigo mazd lëe gdib minë been zho, rëb zho nanđ zho dien cho pxeel Juan.

<sup>8</sup> Nacne rëbchaa Jesús lo zho:

—Niicle naagaa nagon, grieelod gni naa lo to cho rnabey naa quiayūñ naa grë min rii.

### *Xcuent zha ne pqüianap liu*

(Mt. 21:33-46; 22:15-22; Mr. 12:1-17)

<sup>9</sup> Blozhse ga, biire psilo me noseed me grë miech co. Bzodiidz me tib cuent rii lo zho, rëb me:

—Tib men name, nroob lbë uv beenbni me lo liun me. Blozh ga blediñ me liu co lo bla zha ne ran liu, dzigo laa me brieegaa, zey me stib dan.

<sup>10</sup> Zeene gol mëe ne laa nex co gol, pxeel me tib zha ne quia xtsiñ me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiñ zho zho, blozh ga scase bzonëz zho zho.

<sup>11</sup> Wbiire pxeel me stib zho, scaque peet bdeete zho lo zho, lel ndox zho lo zho, bdiñ zho zho.

<sup>12</sup> Pxeelaque me stib zho, goc zho tson, scasaque been zho, haxta psi-wee zho zho.

<sup>13</sup> Quianie me tib mëed, rleynie me mëed co. Zeene gon me sca been zha co, rëbchaa me: “Minë naca laa naa cxel xpëed naa, zeene gan zho xpëed naaw, peet gund zho me, nend zon zho xtiidz me.”

<sup>14</sup> Pex guien zho cho nac xpëed me, zeene gon zho men co, rëb zho: “¡Lëe zha qui nagon quiaañnie liu

rii! ¿Golgotsaa dziuut ne zho, zeena guiaana lo ne!”

<sup>15</sup> Bnaaz zho xpëed me, güeynie zho me zaatne nac tib lad lo liu co, ga güeygut zho me.

¿Zha sca dien rzac to gun bizhuan liu co gza zha ntseeb co?

<sup>16</sup> Ib tedsod lëe, zeene gbire me, znitlogazh me zho. Lozhse ga, cuediinga me liun me lo zla zha ne gundziina.

Zeene bin zho sca rëb me, rneehaa zho:

—¿Ib lic Dios qui, dziuunscad no!

<sup>17</sup> Dze bui me lo zho, dzigo rëbchaa me:

—Per led znu lëe, zhobnee lo Xtiidz Dios: “Quie ne psëeb zha ne nozaa yu, ni nan zho lëepaa quie co nac mine rnazdziits yu.”

<sup>18</sup> Ni quie co gon, zha ne tsietsobe low, zac zho zig tib ncuaane rac tson tap lë; laa tel lëegaaw tsoe lad zho, zac zho zig tib ncuaane die die rac.

<sup>19</sup> Grë zha ne nac pxoz ne rnabey, ni grë maistr ley, hor co bien zho mine nac zho ga, bzeet me lo cuent co. ¿Gocladz zho gagazh naaz zho me! Per bzieb zho, niacntseeb grë miech ne ndxie ga.

<sup>20</sup> Dzigo mine been zho, pxeel zho bla zha ne zie ziegungüet me par cxin me tib diidz, dzigo min co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dien zha gzoobdiag zho xtiidz Dios,

<sup>21</sup> bdzin zho lo me, bnabdiidz zho rëb zho:

—Maestro, ndion no niapse diidzli zienal luu, ni scagaa zeene rseed luu miech, rguibd luu guianziuu luu lo zho, sinque niapse mine nac diidzli, mine rlu zha sëeb zho xnëz Dios, min co rnee luu lo zho.

<sup>22</sup> Gane niina, racladz no gnë luu dien pe nonguiela ga rdeed no dimi ne razh lo rey Roma, te nonguiel da ye.

<sup>23</sup> Bienga me racladz zho gungüet zho me, dzigo rëbchaa me lo zho:

<sup>24</sup> —¿Golneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—¿Cho nu? ¿Cho lë nu quia lo pes rii?

Pquiab zho rëb zho:

—Lëe rey Roma i, lëe lë me i quia lo qui.

<sup>25</sup> Dzigo rëb me lo zho:

—Mine rieguial sca ycaa rey Roma, goldeeda lo rey Roma; scaquegaa mine rieguial ycaa Dios, lo Dios goldeeda.

<sup>26</sup> Bzee zdoo zho gon zho sca ptsire me lo xtiidz zho. Mazd dzese bre zho, sac bdziel zho zha niungüet zho me; gocladz zho squi ndxie miech nxin me pe tib diidz, per brieelod niungüet zho me.

*¿Pe nli zrieeban miech?*

*(Mt. 22:23-33; Mr. 12:18-27)*

<sup>27</sup> Blozh ga, güeyaque zla zha saducé lo Jesús. Nac zha saducé riladzd zho zdzin dze grieeban miech; bdzin zho, rëb zho lo me:

<sup>28</sup> —Maestro, znu psan Moisés diidz: telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

<sup>29</sup> Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaand xpëed zho.

<sup>30</sup> Dzigo ptsieelnia wnaa co stib bets ngutoo co. Blozh ga, gutaque zha co, pa së zho nsañ mëed.

<sup>31</sup> Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me,

<sup>32</sup> tibaque zeene yeque me laa me gut.

<sup>33</sup> Mine racladz no gacndion no, ¿chopaa dzigo gac tsieel wnaa co, zeene laa zho grieeban, ne sca gza gadzse zho ptsieelnia me?

<sup>34</sup> Pquiab Jesús rëb me:

—Tiba, gacnan to ganle, lo guielmban riise rtsieelnia miech.

<sup>35</sup> Zeene grieeban zho, zig nac zha ne yгаа guielnzaac gdzin zho zaatne no Dios, led yedraa ga ctsieelnia zho.

<sup>36</sup> Sac laa zho mbanle ga, gdzindraa dze guet zho. Masaque laa zho gac zig nac grë xanj me, mëed gac zho lo me.

<sup>37</sup> Laa stiba, gacnan to ganle ible zrieeban grë menġut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban menġut. Rëb Dios lo me: “Naa nac Dios ne riladz Abraham, naa nac Dios ne riladz Isaac, naa nac Dios ne riladz Jacob.” Zeene sca rëb me, ga rlu ganle mban zha co.

<sup>38</sup> Sac tel me, nacd me xDios menġut, sinque xDios zha mban nac me. ¡Par me, grëse zha ne ngab lo me, zha mban nac zho!

<sup>39</sup> Blalaa maistr ley zo ga, gon zho sca rëb me lo zha co, dzigo rëbcha zho lo me:

—Maestro, nli squi naca zigne rnee luu i.

<sup>40</sup> Dzigotaa ni stib zho beendraa pe nabdiidz zho lo me.

*¿Cho xpëed nac Crist?  
(Mt. 22:41-46; 23:1-36; Mr. 12:35-40;  
Lc. 11:37-54)*

<sup>41</sup> Horco bnabdiidz Jesús lo zho, rëb me:

—¿Zha nac dien ne rnee zho tib xpëedaque rey David gac Men ne nacle diidz cxeel Dios ga?

<sup>42</sup> Led Davitaque name znu bnee tib lo salm ne pquiaa me:

<sup>43</sup> Bnee Dios lo men ne rnabey naa, rëb Dios lo me:

“Cue naa nëz derech, nu bzob, nieeda lozh gnaz naa grëse zha ne rlëe lo luu, csañ naa zho ladz-  
nia luu.”

<sup>44</sup> Gase ganle rlu, led scada; telne nli zha xtii David gac men co, ¿zha nac dzigo ne lëeque David rnee ne me rnabey David?

<sup>45</sup> Squi ndxie grë miech co noquiaa-diag zho, zeene bnee me lo xpëedscuel me, rëb me:

<sup>46</sup> —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoow, zha nac zha

ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob groļ mezh zeene laa wagw rac.

<sup>47</sup> Ni rlozh ga, rio zho rla zho tel pe ncuane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, ¡per ib tedsod nroob caxtigw ne yгаа zho!

## 21

*Gon ne bdeed tib wnaa viud  
(Mt. 24:1-2; Mr. 12:41-44; 13:1-2)*

<sup>1</sup> Laa Jesús no len yadoo ga noseed me miech. Ga no me, gon me zha rdzin grë zha ricw, nroob dimi rsañ zho len alcanci ne zob ga.

<sup>2</sup> Tibaque zeene bdzin tib wnaa viud, tib men proba, ye me laa me psañ chop gaay win len alcanci co.

<sup>3</sup> Zeene gon Jesús, rëbcha me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psañ grë zha qui.

<sup>4</sup> Sac tel zha, dimi ne rianle lo zho i rgogon zho; sañgue wnaa prob qui gon, centav yeen ne quianiese me, mine rnalopaa me gziuu pe yquini me, per laa me bloogona.

<sup>5</sup> Laa Jesús zieriee ga, zeene psilo bla zha ne nac xpëedscuel me, rlozhd gwi zho zha niaa yadoo co, rzee zdo zho ran zho grë quie ne niaaw, grë ncuane ngalguiee lena. Zeene gon mew, rëbcha me lo zho:

<sup>6</sup> —Niicle squitaa gon ran to niaaw niina, per dzin dze ne nitlow, dib nacsew. Ni stib quie qui guiaandraa zigne squi zhobxcuaaw i.

*¡Nsin golso!  
(Mt. 24:3-28; Mr. 13:3-23)*

<sup>7</sup> Bded ga, bnabdiidz zho lo me, rëb zho:

—Maestro, ¿poc dzigo gac mine bzeet luu ga? ¿Zha glu zeene laaw ziaadyob gac?

<sup>8</sup> Dzigo rëbcha me lo zho:

—Nsin golso, zeena choot yquidiede to. Sac nzian zha ne griequia, guiab zho laa dze co bdzinle, guiab

zho zha nac Men ne zëëble diidz ga cxeel Dios. jib gliladzde tow!

<sup>9</sup> Zeene gon to pa lo ndxiedil tib guiedz, pa lo noyacgaa grë dildox, ib gdiebde to. Ib none gac grë ncuaan co, per lega loxaque mine csilosew ga.

<sup>10</sup> 'Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho.

<sup>11</sup> Nëzrii nëzrec csilo gni grë zho-dox, nzian zaatne gan miech gbin, za-atne glaangaa zho grë guielguidzdox. Nzian grë ncuaane glu zhan gbaa, nzian grë ncuaan co, ncuaane ctseb miecha.

<sup>12</sup> Per ansraa gac grë ncuaan co, st-sidil miech to, squiana zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta ziezo zho to lo wxtis ne rnabey guiedz, loxaque porne nac to zha ne no xnëz naa.

<sup>13</sup> Ga nagon gdeeda diidz gnee to lo grë zha co, gacnan zho ganle cho nac naa.

<sup>14</sup> Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to;

<sup>15</sup> sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdziel zho pe ctsire zho lo to.

<sup>16</sup> 'Haxta pxoz to, xniaa to, bets to, grë menlidz to, grë zha ne ndzieeldidz to, stsidil zho to, lëëque zha tsielo to ladznia zha ne csacsi to. Lo grë to, zio zha ne haxta zet ladznia grë zha co.

<sup>17</sup> Grëse miech glëë gan to porne nac to zha ne no xnëz naa.

<sup>18</sup> Nli stiche zho xquielmban to lo guidzliu rii, per, jni tib guits guic to, grieelod zho gnitlo zho!

<sup>19</sup> Tiblique sca golgac, sozite to lo naa, zeena ygaa to guielmban ndzon ne gneedz Dios.

<sup>20</sup> 'Zeene gan to igose guiedz Jerusalén ndxienap menguiib, nanle to len dze co laaw nitlo.

<sup>21</sup> Grë zha ne no guiedz ne ngab Judé, none xoon zho tsie zho nëz yagui, ga tsietsolan zho. Zha ne

no Jerusalén nu, none grieeniob zho. Grëgaa zha ne quia dziin dana, ib guiabd zho gbire zho lad guiedz.

<sup>22</sup> Tib guielnedox ne csiaab Dios gan grë miech rii len dze co, ga gac grë mine raquiet lo Xtiidz me ted zho.

<sup>23</sup> jProb grë men wnaa ne lëetse len dze co zoney xpëed, men ne quianiegaa mëed ne bii radz! jMbandox ted miech, guielnedox ne csiaab Dios gan zho guiedz rii!

<sup>24</sup> Zutxuu miech zho, zha ne ted-laagaa lo guielgut zeyzhoo miech zho, zhaase zhaase dan ne gueynie zho zho. Horco laa grë zha zit co, sëeb gunchen Jerusalén; haxta gdziin dze ne gnabey Dios gree zho.

### *Ziaad Jesús stib*

*(Mt. 24:29-35, 42-44; Mr. 13:24-37)*

<sup>25</sup> 'Nzian grë ncuaane glu lo ngbidz, glu lo mëë, glu lo mel. Mbanse gac miech, zdiebdox zho zeene gon zho bidox ne tso tsasoli nisdoo.

<sup>26</sup> Nzian zha ne haxta scow zho lo dzeb, zeene laa zho gan grëtaa ncuaane noyac lo guidzliu len dze co. Grë ncuaane no zhan gbaa, nëzrii nëzrec gaca.

<sup>27</sup> Horco bii zan zho ganle zeene laa naa zialzëëb tib lo xcow con grë guielndzon, con grë poder ne rap naa.

<sup>28</sup> Zeene gan to laa grë ncuaan co rsilo noyac, nley golco zdoo to; jsac hor co laa Dios ycaania to!

<sup>29</sup> 'Golzoob cuidad ganle zha nac yag guigw, beelzegaa pe stib yag.

<sup>30</sup> Led ran to ganle, zeene laa grë zhicwa racnieen, laa zhiblaga rsilo rdzib, gase runbey to laa mëë nëëg ziaadgaxle.

<sup>31</sup> Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle.

<sup>32</sup> Gneli naa lo to ganle, nzian grë miech ne mban niina, bii zan zho zeene laa grë ncuaan co gac; sac ible ncuaane gaca.

<sup>33</sup> Zdziin dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac.



<sup>34-35</sup> iNsin sca golso, zaacse golgac! iAdelgal dze ne laa naa guial, lel lo gre ncuaa ne ndzinlid, lel lo guielgonziu, lel lo gre zhgab ne rac lo guidzliu rii no to, zigne gun greraa miech! Sac gon, lega naclew glanso naa.

<sup>36</sup> Nligaa nsin golso. Tibaque golnab lo Dios, gacni en me to peet gacde to lo gre guielne co, ine peet xtolde to zeene laa to gacredz lo naa.

<sup>37-38</sup> Gzase len dze co pseed me miech. Silgaw, miech guizhiu ne rdzin len yadoo, parne yquiaadiag zho zhiwseed me. Guidze sca rseed me zho, laa pcow liu rieb ez me cho Gui Oliv.

## 22

*Bnediidz zho dien zha gnaaz zho Jesus*

(Mt. 26:1-5, 14-16; Mr. 14:1-2, 10-11; Jn. 11:45-53)

<sup>1</sup> Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad.

<sup>2</sup> Gre zha ne nac pxoz rnabey ni gre maistr ley, len dze co laa zho no quiaguib zho dien zha gut zho Jesus. Noguib zho tib mod ne glisquid menguiedza; sac rdzieb zho gacntseeb menguiedz.

<sup>3</sup> Tib dzew, laa mendox bz eeb zdo Judas Iscariot, tib zha ne rz eniepa me ga,

<sup>4</sup> rias Judas gu ey Judas lo gre pxoz rnabey co, lo gre men ne zo lo zha ne rquianap yadoo, reb Judas zha csan Judas Jesus ladznia zho.

<sup>5</sup> Zeene bin zhow per nli rley zho, nacne biaan zho diidz quizh zho Judas.

<sup>6</sup> Dzigo desde hor co psilo Judas noguib Judas dien zha gdeeda diidz guiend miech csan Judas me ladznia zho.

*Dowxtseenie Jesus xpeedscuel me*

(Mt. 26:17-29, 31-35; Mr. 14:12-25, 27-31; Jn. 13:21-30, 36-38; 1Co. 11:23-26)

<sup>7</sup> Mer dze ne rsilo lni Pascwa, len dze ne sca row zho quietxtil ne

rquiad ncobi lad, ni rut zho carner yeen ne rowxtsee zho.

<sup>8</sup> Dze co bnabey Jesus Pedr grop Juan tsiegunlo zho xtsee ne gownie me zho wdze co.

<sup>9</sup> Dzigo bnabdiidz zho lo me, reb zho:

—iPa lo racladz luu guio no guidz-iuunlo now?

<sup>10</sup> Rebchaa me lo zho:

—Goltsie Jerusalen. Zeene seeb to lad guiedz, ga gan to tib mgui nzobyan tib re nis, goltsienal zhits me. Yu ne gan to seeb me,

<sup>11</sup> golguiab lo bizhuan yu co: “Znu ne Maestro, i pa len yu me gneedz luu gac zaatne gowxtseenie me xpeedscuel me wdze rii?”

<sup>12</sup> Ga glu me tib len yu nroob ne riaan glaa, nzhixcuaale lena, dzigo ga golgunlo zhixtsee ne.

<sup>13</sup> Dzigo laa zho zie. Gu ey zho zaatne pxeel me zho ga, ga beenlo zho xtsee co.

<sup>14</sup> Wdze co, zeene gol hor xtsee laa Jesus bded lo mezh gza me gza tsiipchop xpeedscuel me. Xtsee co no zho,

<sup>15</sup> zeene reb me lo zho:

—iBlactaa gon pquiamb ez naa gdzin dze rii, znu gowxtseenie naa to nawdze rii, ansraa csaci miech naa, gut zho naa!

<sup>16</sup> Lee lultm vult nu gon teed naa lni Pascw rii, haxta gdzin dze ne laa Dios csilo gnabey, dze ne glupaa ganle zha nac xtsee rii.

<sup>17</sup> Dzigo bzhen me tib cop nroob no vin, bdeed me xquizh lo Dios, blozh ga bdeed me cop co lo zho, reb me:

—Golquiin vin rii gza to.

<sup>18</sup> Gneli naa lo to ganle, lee lultm vult nu guie naa vin rii, haxta gdzin dze ne laa Dios csilo gnabey.

<sup>19</sup> Ni bzhen me quietxtil, bdeed me xquizh lo Dios, blozh ga beengrol mew bdiiz mew lo zho, reb me:

—Golquiina, rriequia gon lee xcuerp naa i, sac gon znu gun zho xcuerp naa parne csilaa naa to gre to. Zeene gdeedtaaw diidz, golgun min rii parne glu to ganle tibaque rsoladz to naa.

20 Blozhse dowxtseenie me zho, scaque bzhen me stib cop no vin, blozhse bdeed me xquizh, rëb me lo zho:

—Lëë stib trat cub nu gon riaan Dios grë me miech, rrieequia xchen naa nu nac vin rii, ren ne gzhiee xcuent to, ren ne tso firm trat co par glu nona.

21 Ni gacnan to ganle, lo mezhaque nu gon zob zha ne tsielo naa ladznia zha ne gut naa.

22 Naa ne nac naa Mgui ne pxeel Dios, nli, ible none guet naa, parne gac mine pxeel Dios naa zialgun naa, i per probsaxe zha ne tsielo naa ladznia zha co!

23 Horco psilo gza zha ne zobnie me ga, rnabdiidzlsa zho dien cho nac zha ne rzeet me ga;

24 haxta psilo zho nodildiidz zho dien cho gac zha ne gacnon lo zho.

25 Dzigo bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëë gdib rxecw zho, haxta rnee zho nroob quiaayun zha co xyudar guiedz.

26 Sangue to gon, zha ne gnabey lo to, none guien zho gac zho zig tib ngundziin lo to; zha ne racladzгаа gacnon, none guien zho guiaanwin zho.

27 Lo guidzliu rii, zha ne rnabey, rzobse zho, zha ne nac ngundziin, zha co rdziib ncuaane row zho. i Sangue lo ne, led scad naca! i Golwi ganle, tib ngundziin nac naa lo to!

28 Tose goc zha ne tibaque gocnie naa lo grëtaa mine bdeed naa len dze rii.

29 Gane niina, laa naa gneedz tib guienzaac nroob lo to yгаа to gdziin to zaatne bneedz Pxoza naa gnabey naa;

30 zeena ine znu tipse zioob ne lo xmezha naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

31 Horcoque bnee me lo Pedr rëb me:

—Bina ganle Pedr, racladz Satanäs gon ycuiib ma to, zigne run zho zhobxtil.

32 Per laa naa bnable lo Dios, gacnien me luu, csaand me sozitpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

33 Pquiab Pedr rëb Pedr:

—Niicxe peraa waa gac, csaand naa luu. Telne co zho luu ladzguiib, ye naa tso ga, i telne gutгаа zho luu, zaatne guet luu, ga guet naa!

34 —Bina ganle Pedr —rëb Jesús—. i Guieel riigazh gon, gardle ycuedz gall, tsonle vuelte rëb luu runbeyd luu naa!

35 Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuaane gow to, per ni lab to bide to. i Pe beenfalt ncuaane nquiin to hor co?

Pquiab zho rëb zho:

—Beenfaltedew.

36 Dzigo rëbchaa me:

—Horco nagon peet bide to, sangue niina zha ne quianie dimi, zha ne quianiegaa ncuaane gow zho, none güey zhow. Niina nagon none laa to yquiin spad. Zha ne quianieda, none maase tib xab zho cto zho, si zho tiba.

37 Sac nataa nagon, laa miech cteed naa mine zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

38 Pquiab zho rëb zho lo me:

—i Bui ganle laa chop spad nule!

Dzigo rëbchaa me:

—i Mazd peet gnedraa naa lo to!

*Bzodiidznie Jesús Pxoza me Getsemani*

(Mt. 26:36-46; Mr. 14:32-42)

39 Blozhse ga, laa me brieze zie me nëz Gui Oliv, zaatne rietaque me; zienalaaque gza xpëedscuel me zhits me.

40 Bdziin zho ga, rëbchaa me lo zho:

—Golnab lo Dios gacniē me to, zeēna yquuild mēdox to.

41 Bzē me spalal, bdziñ me zig zaatne riab tib quie ne rcheļ ne nia ne, dzigo ga pquuītsgzhib me, psilo me bñab me lo Dios,

42 rēb me:

—Papá, laa naa rnab lo luu, telne zala zdoo luu, psilaa naa lo grē guielnē rii. Per telne grieeloda, miñe gnētaa luu sca gaca.

43 Horco biet tib anjl gbaa bdziñ pchoobladz zdoo me.

44 Mban rac me laa me nozodidznie Pxoze me, per hor cole mazdraa rnab me lo Pxoze me; lo guielnē ro co haxta rzonis me, masaque zēbdzuuñ grē nis co lo me zootle ren.

45 Zeēne laa me guso ga, bdziñ me zaatne biaan xpēēdscuel me, gon me gzase zho laa zho nixguies. Ye zho mban rac zho, lo guielnē co bguudz zho mcaal.

46 Dzigo pcuaan me zho, rēb me lo zho:

—¿Nixguies to ye? Lēda i gon, įgolsobna! Golnab lo Dios, gacniē me to, zeēna yquuild mēdox to.

### *Bnaaz zho Jesús*

(Mt. 26:47-58, 67-75; Mr. 14:43-50, 53-54, 65-72; Jn. 18:2-18, 25-27)

47 Laa Jesús quianeeque, zeēne laa Judas bdziñ bdzinnie Judas tib dzoon miech. Zigne bdziñ Judas, wbig Judas lo me, dow Judas bzhid cuas me.

48 —įJudas! —rēb me—. ¿Con tib bzhid dzigo lēē glu luu naa lo grē zha qui?

49 Zeēne bien xpēēdscuel me, me zienaaz grē miech co, rēbchaa zho lo me:

—Maestro, ¿zha dziuun ne? ¿Pe zdeed spad no zho?

50 Znuse biet tib zho pcheļ zho tib nia spad, pchug zho diag tib xmoz meñ ne nac pxoze nroob.

51 Dzigo bñee Jesús lo zho rēb me:

—Golsaan zho, ndzinli golgac.

Horco wbig me bzheñ me diag zha co, beēnguiac mew, lēētse miñ derecha.

52 Lad grē miech co no ndal grē pxoze ne rnabey, grē zha ne zo lo zha ne rquianap yadoo, ni spalal meñ ne nac zha non lo mēnguiedz; dzigo bñee Jesús lo zho, rēb me:

—¿Pe nacne squitaa ziaad to, nzheñ to yag, nzheñ to spad ziadnaaz to naa? ¿Niacxe naa cho ngbaan?

53 Blactaa dze name gon to no naa leñ yadoo, ni bnaazde to naa ga. Per nole guic to nagon nawdze rii gnaaz to naa; grē miñe racladz to grē to mēdox, niina laaw gac.

54 Horco wbig be zho bnaaz zho me, laa zho zienie me nēz lidz meñ nac pxoze nroob.

55 Bdziñ zho lidz meñ co, bre zho xley me, bzēēg zho gui, laa zho no nodzēē zho. Ye Pedr maase zit zit naļ Pedr, laa Pedr bdziñ ga; laa Pedr wbig bzob lo zho ga.

56 Zeēne gon tib wnaa ne quia xtsiñ meñ co laa Pedr zob ga, dze rwi me, tibaque rēb me:

—įYe mgui qui gon rzēnie meñ ne blansonie to i!

57 —¿Naa ye? —rēb Pedr—, įper ni runbeyd naa meñ qui!

58 Wdzeepaaw, laa tib zha ne zo ga, masaque Pedr, rēb zho lo Pedr:

—¿Segur lēē ye luu nacie meñ ne bgaai?

Scasaque bneelid Pedr.

59 Wdzeelaaque goca, zeēñ laa stib zho brieequia, rēb zho:

—Lēē tib zha ne nacie meñ qui nu gon. įRlu zha galilé nac zho!

60 Pquiab Pedr, rēb Pedr:

—įRieñd naa gon, pe nacne squi rnee luu!

Gardle lozh griee diidz co ro Pedr, zeēne laa tib gall pcuedz.

61 Gall co nocuedz, zeēne ptsire lo Jesús, dze bui me lo Pedr; dzigoraap soladz Pedr zeēne rēb me lo Pedr: “įGuieel riigazh gon, gardle ycuedz gall, tsonle vuelte rēb luu runbeyd luu naa!”

62 Mbanse rac Pedr. Brieē Pedr ga, psilo Pedr biin Pedr guielnē co.

<sup>63</sup> Grë zha ne zopaa quianap Jesús, nzian grë ncuaane run zho me, psilo zho noyunguzee zho me.

<sup>64</sup> Pxidoo zho lo me, ni rguin zho me, rlozh ga, rnee zho:

—Luu ne nac luu men ne ziadteed xtiidz Dios, ¿bnë sca dieñ cho ga bdiñ luu?

<sup>65</sup> Nzian grë ncuaane rgoredz zho lo me.

*Güeynie zho Jesús lo zhiwxtis zho*  
(Mt. 26:59-66; Mr. 14:55-64;  
Jn. 18:19-24)

<sup>66</sup> Zeene biini liu, pcaalsa grë men ne nac zha non lo menguedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdziñ me ga, bnabdiidz zho lo me rëb zho:

<sup>67</sup> —Bnë lo no dieñ, ¿pe lëe Men ne nacle diidz cxeel Dios lo guidzliu ga i nac luu?

Pquiab me rëb me:

—Niicle telne gni naa lo to nli lëe men co nu nac naa, gliladzde tow,

<sup>68</sup> tel pe gnabdiidzga naa lo to, ctsirede to low; sac gliladzde to mine nac diidzli.

<sup>69</sup> Naa ne nac naa Mgui ne pxeel Dios, zhile laa dze gdziñ zeene laa naa sob cue Dios nëz derech, men nroob ne rrieelo run grëse ncuaane racladz me.

<sup>70</sup> Horco grëse zho pquiab, rëb zho lo me:

—¿Xpëed Dios dzigo lëe nac luu?

Dzigo rëbcha me:

—Tozhal name rnee, nli Xpëed me nac naa.

<sup>71</sup> Horco rëb zho:

—¿Pe mazdraa textigw ne racladz ne! ¿Laa ne bdzionle ganle mezhaz rnee Xpëed Dios nac me!

## 23

*Güeynie zho Jesús lo Pilat*  
(Mt. 27:1-2; 11-14; Mr. 15:1-5;  
Jn. 18:28-38)

<sup>1</sup> Horcogazh pcaanie zho Jesús nëz, bdziñnie zho me lo Pilat, men ne nac gobernador ne nzoob zha Roma ga.

<sup>2</sup> Ga psilo zho nzian grë ncuaane rquiaqui zho me, rëb zho:

—Laa no bnaaz men rii gon ziaadnie no me lo luu, sac bgaa me noquiil me menladz no gacntseeb zho. Rnee me lo zho nonguiel da gdeed zho dimi ne razh lo zhirey ne, men ne zob Roma; haxta rnee me mele nac rey ne gunbey zho, sac Dios pxeel me ziaad me.

<sup>3</sup> Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

<sup>4</sup> Dzigo rëbcha Pilat lo grë zha ne ne nac pxoz rnabey co, ni grë miech ne ziegrë zho ga:

—¿Ni tib dol rapd men rii!

<sup>5</sup> —¿Zha gapd me dol? —rëb zho—. Ni zaatne zieetaa me noquiil me miech gacntseeb zho lo zhirey ne. ¿Dible nëz Judé nu güeyted me; desde nëz Galilé brie me ziaad me haxta nu!

<sup>6</sup> Gon Pilat sca rëb zho, dzigo bnabdiidz me dieñ pe zha Galilé nac Jesús.

<sup>7</sup> Zeene gocnan me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëetaque len dze co laa Herod no Jerusalén ga.

<sup>8</sup> Rley Herod zeene gon Herod me, sac ziyon Herod grëtaa mine run me; quiambëz Herod gdziñ dze ganlo Herod me, ganlo Herod gun me pe tib milagr.

<sup>9</sup> Psilo Herod nzian grë ncuaane rnabdiidz Herod lo me, per ni tib lo wnabdiidz co ib ptsired me.

<sup>10</sup> Zeene gon Herod rquiabd me, ni gon Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw,

<sup>11</sup> nacle lel psilo Herod grë xmenquiib Herod rzhidznie zho me, runguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat.

<sup>12</sup> Glo ib rdzieeld xtiidz Herod grop Pilat, laa dze co laa zho psilo bneewen stib.



*Bnab zho guet Jesús*

(Mt. 27:15-26; Mr. 15:6-15; Jn. 18:39-19:16) (Mt. 27:32-44; Mr. 15:21-32; Jn. 19:17-27)

<sup>13</sup> Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menquiedz,

<sup>14</sup> rëb Pilat lo zho:

—Laa zho biad-zoob xdemand men rii lo naa nu, nac diidz noquuil me miech gacntseeb zho lo zhirey ne. Nacne pquiep naa me, ni blalagaa to gona; par naa peet dol rapd me.

<sup>15</sup> Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuaane guiab ne rieguial guet me.

<sup>16</sup> Mine gaca, laa naa gnabey ted me tib caxtigw, lozh ga dzigo laa naa csilaa me.

<sup>17</sup> Nac costumbr, gzobse lni Pascw rsilaa zho tib zha ne no xcuent lo wxtis.

<sup>18</sup> Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu men qui, bnabey guetgazh me! ¡Barrabás psilaa!

<sup>19</sup> Barrabás lë tib men co no ladzguiib len dze co, sac bgaa me zo me lo tib dii zha ne noyacntseeb lo rey len guiedz Jerusalén ga, ni zëëbaque me tib ngutoo.

<sup>20</sup> Bguib Pilat dien zha nrieelo nsilaa me Jesús,

<sup>21</sup> per psilo grë miech co nguiedz roptsie zho, rnee zho:

—¡None guetgazh men qui! ¡Lo cruz bnabey yquia me!

<sup>22</sup> —Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

<sup>23</sup> Psiloque grë miech co stib, nguiedzraa roptsie zho, rnab zho yquia Jesús lo cruz; haxta goc mine racladz zho.

<sup>24</sup> Racse Pilat, laa Pilat bdeed diidz.

<sup>25</sup> Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

*Güeyquiaa zho Jesús lo cruz*

(Mt. 27:32-44; Mr. 15:21-32; Jn. 19:17-27)

<sup>26</sup> Horco laa zho brieenie Jesús laa zho zienie me zaatne yquia me lo cruz. Nëz zienie zho me, bdzieel zho tib men Ciren lë Simón wbiere lo dziin dan, pcuëez zho men co, bnabey zho me bi me zhicruz Jesús; nalse me zhits Jesús, laa zho zienie Jesús.

<sup>27</sup> Miech guizhiu ne zie ga, ndal grë men wnaa psilo zho roon zho no zho xquielnë me,

<sup>28</sup> dzigo dze bui me lo zho, rëb me:

—Xin, nac to men Jerusalén rii, goonde to xquielnë naa. Mazd golgoon por grëtaa guielnë ne no gan to, por grëtaa guielnë ne no gan xpëed to;

<sup>29</sup> sac zeene gal dze co grë men wnaa ne quianie mëed, ziaab zho: “Mazd wenaque zie zha ne quianied mëed, zha ne nand zha radz mëed, zha ne niaadgaa gap mëed.”

<sup>30</sup> Horco grë miech, laa zho gnab tebaa zha pixche grë gui guiaan zho zhana.

<sup>31</sup> ¡Golwi ganle, telne znutaa mine nodeed naa nac naa zig tib yag nguia, pelel to dzigo ne nac to zig tib yag bidz!

<sup>32</sup> Ye schop zha ne nac ngbaan, zienie zho ga yquiaagza zho me lo cruz.

<sup>33</sup> Zeene bdzin zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nëz cue zhicruz me.

<sup>34</sup> Lo cruz co quia me, zeene nguiedz bnee me rëb me:

—¡Papá! Ncuaane quiayun grë miech rii nu, bzhiguiel gunquizhd luu zhow; sac riend zho pe run zho.

Gza menquuib ne bdzin ga yquiaanap me, hor co tib tib zho bzhense zho tib lë xab me, laa stiba bio zho rif.

<sup>35</sup> Ndal miech ne ndxie quiawi. Haxta grë zha ne nac wxtis zo ga, no zho rzhidznie zho me, rnee zho:

—Stib miech scataa beenguia me, stib miech scataa bla me. ¿Pe rac me na ne riete me i? ¡Guet me i zho, telne nli me nac Men ne zëëble diidz cxeel

Dios, tel<sub>ne</sub> nli Dios bzooblo me ziaad me!

<sup>36</sup> Wbig menguiib co rdeed zho nziu bla guie me, rzhidznie zho me, rnee zho:

<sup>37</sup> —;Zhirey zha Israel name nac luu! Psilaa luu lo guiel<sub>ne</sub> qui nazho.

<sup>38</sup> Glaa guic zhiczuz me quia cho-plan diidz ne pquiaa zho, rneew: “LÈÈ ZHIREY ZHA ISRAEL NU.”

<sup>39</sup> Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—;Led rëb luu lëë, luu nac Men ne zëëble diidz ga cxeel Dios! ;Blu nazho nli men co nac luu, psilaa ne lo guiel<sub>ne</sub> rii!

<sup>40</sup> Horco pquiab stib zha co, rëb zho lo zho:

—;Psoog ro luu! ;Pe niicle niina ne laa luu guetle ib rdzieebd luu Dios?

<sup>41</sup> Bien ganle, ;tel ne ible min rii riogual ne grop ne, nu nodizh ne grë guiel<sub>nt</sub>seeb ne bdziuu<sub>n</sub> ne; sangue men qui, peet dol rapd me!

<sup>42</sup> Dzigo rëb zho lo me:

—;Bzhiguel zeene guiaad luu gnabey luu, ib csand luu naa tib lad!

<sup>43</sup> Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquiel<sub>bley</sub> Pxoz naa.

*Gut Jesús*

(Mt. 27:45-56; Mr. 15:33-41; Jn. 19:28-30)

<sup>44-46</sup> Gol grol dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biala biini stib. Horco pquiaa Jesús tib redz nroob, rëb me:

—Papá, laa naa rsan zhiespíritu naa ladznia luu, luu pcaaniaw.

Diidz co brieer ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, grol<sub>taa</sub> goca.

<sup>47</sup> Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—;Ne nlipagaa tib men peet xtold goc men qui!

<sup>48</sup> Scaque grë miech ne goclo ga, zeene gon zho zha blozh me, bi-abguiel<sub>ne</sub> zho, mbanse rac zho laa zho wbi ga.

<sup>49</sup> Laa grë zha ne runbey me, zha ne gocnie me, zig nac grë men wnaa ne gocgrë zha ne brieenal zhits me zeene brieer me nëz Galilé, grë zho laa zho ndxiese tib lad rwi zho.

*Bgueets Jesús*

(Mt. 27:57-61; Mr. 15:42-47; Jn. 19:38-42)

<sup>50</sup> Lad grë zha ne nac zhiwxtis men Israel ga, no tib men guiedz Arimaté lë me José; lëë guiedz co ndxie xtan Judé. Tib miech wen nac me, noxco me mine rnabey Dios,

<sup>51</sup> ye me quiambëz gdzi<sub>n</sub> dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform mine bnabey zho.

<sup>52</sup> Nacne hor co güey me lo Pilat, bnab me diidzbey tsielit me xcuerp Jesús lo cruz.

<sup>53</sup> Dzigo güey me, blozhse blit me cuerp co lo cruz, pchel me me tib lo lar nroob, güey me güeyqueets me me tib len baa cub ndieen tib cho quie gax ga.

<sup>54</sup> Lëë bdze dze co no zho xco ne laa dze ne gdziiladz zho lo dziin sëëb.

<sup>55</sup> Grë men wnaa ne sca nacgza grë zha ne brieenal zhits me zeene brieer me nëz Galilé ga, ye zho güeynal bgueets me, gon zho pa lo bio me.

<sup>56</sup> Blozhse bgueets me, laa zho zey. Bdzi<sub>n</sub> zho bzhixcuaa zho, tiblo zënex ne tsietëëb zho lad xcuerp me; dzigo laa zho bdziiladz zigne rnabey ley no gun zho.

## 24

*BRIEBAN JESUS*

(Mt. 28:1-10; Mr. 16:1-8; Jn. 20:1-10)

<sup>1</sup> Laa zeene gol dze ne rzobni zhmal, silgaw laa gza men wnaa co brieer, bi zho grë zënex ne bzhixcuaa zho ga, laa zho zie ro baan Jesús.

<sup>2</sup> Bdzi<sub>n</sub> zho, gon zho laa quie ne bioog ro baan me ga bdiooble;

<sup>3</sup> bzëeb zho len baa gon zho, niicle xcuerp me guiendle ga.

<sup>4</sup> Laa zho zo ga, riend zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop men bgui zole lo zho ga, masaque riaazbel lad xab grop men co.

<sup>5</sup> Horco per nli bdzieb zho, lo dzeb co mine been zho laa zho pquiits-gzhib haxta bdziñ lo zho lo liu. Dzigo rëb grop men bgui co lo zho:

—¿Pe nacne ziaadguib to men mban zaatne rio mengut?

<sup>6</sup> ¡Laa me brieabanle! ¡Guiendle me nu! Golsoladz ganle zha në me lo to len dze ne no me nëz Galilé,

<sup>7</sup> në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieaban.”

<sup>8</sup> Dzigoraa psoladz zho, nligaa sca bnee me,

<sup>9</sup> hor co lëelëd güeynie zho diidz lo gza tsiiptib zha ne nac xpëedscuel me, ni lo grëraa zha ne nacgza zho ga.

<sup>10</sup> Nzianlaa nac men wnaa co, lad co no Mari Magdal, no Zhuan, ni Mari ne nac xniaa Jacob.

<sup>11</sup> Niicle bzodiidz zhow lo xpëedscuel me, per con rnee zho led ncuaan gacd ga, ni lalnu bliladz zhow.

<sup>12</sup> Tibaque zeene brie Pedr, rias Pedr laa Pedr zie nëz ro baa. Bdziñ Pedr bdiixlo Pedr len baa co, gon Pedr nligaa, ¡loxaque lar ne briel me zhoob leen co! Blozh ga, laa Pedr zeyaque, rzee zdoo Pedr gon Pedr nli guiendle xcuerp me ga.

*Gon zho Jesús nëz Maús  
(Mr. 16:12-13)*

<sup>13</sup> Dze co brie chop xpëedscuel me zie zho tib guiedz win lë Maús. Gax Jerusalén riaan guiedz win co, maase chop hor rzë zho rdziñ zho ga.

<sup>14</sup> Nëz no zho nozodiidz zho grë mine pteed miech Jesús ga,

<sup>15</sup> tibaque zeene bien zho laa zho bgaa tib lo men co, gocgza me zho laa

zho no nëz, per, ¡ib biend zho lëe Jesús ga!

<sup>16</sup> Ranlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuaane ptse lo zho.

<sup>17</sup> Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guielnë no to?

Dzigo bzodze zho. Mban rac zho, haxta lo zho rlu nroob guielnë no zho.

<sup>18</sup> Pquiab tib zha ne lë Cleof, rëb zho:

—¿Niacxe bind luu ganle zha nactaa ncuaane goc Jerusalén len dze rii? Grëse zha ne name güey Jerusalén, gocnaa.

<sup>19</sup> —Nligaa —rëb me—, ¿pe dien goc ga?

Rëbchaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nzian grë milagr nroob ne been me; miech guizhiu ne bley pquiaadiag zhiwseed me. Rlu tib men nziuu nac me lo Dios.

<sup>20</sup> Per lel brie grë pxoz rnabey, grë zho zha ne nac wxtis, bnaaz zho me, bnab zho gut me, pquiaa zho me lo cruz.

<sup>21</sup> Tibaque rdzieets no, me niac tib men ne nsilaa zha ladz ne ladznia zha Roma. Pasëse min co niac, nadzele rac tson ngbidz beet zho me.

<sup>22</sup> Per riend no dien zha nac cuent co, sac nasil güey blä men wnaa ne nacgrë no ro baan me,

<sup>23</sup> zeene wbire zho bzodiidz zho lo no në zho guiendle xcuerp me len baa, loxaque chop anjl briequia lo zho ga, rëb anjl co mban me.

<sup>24</sup> Blozh ga, güeyaque bla zha bgui ne nacgrë no, gon zho nligaa guiendle xcuerp me ga.

<sup>25</sup> Dzigo rëbchaa me lo zho:

—¡Nadzpaa ncow nac guic to, nadzpaa ndip nac zdoo to! ¿Rliladzde to grë mine dzigo lëe bzeet zho padzeela ted Men ne nole diidz ga cxeel Dios?

<sup>26</sup> Bzeetle zha co name ible no csacsi miech me, antes ne gbire me lo guielndzon ne no me.

<sup>27</sup> Dzigo psilo me bnee me lo zho pa lo zhobnee grë mine bded me ga, psilo me desde grë mine pquiaa Moisés, haxta grë mine pquiaa grëraa zha ne biadteed xtiidz Dios.

<sup>28</sup> Sca no zho nëz laa zho bdzin Maús. Bdzin zho ga, rac me zig nac zeene tib ted me,

<sup>29</sup> dzigo quia zho rnab zho lo me cuëz me ga, sac laa dze bdzele, zhile laa liu ycow. Nacne blëz me.

<sup>30</sup> Laa zho zob lo mezh gowxtsee zho, bzhen me guietxtil bdeed me xquizh lo Dios, blozh beengrol mew bdeed mew lo zho.

<sup>31</sup> Dzigoraa zig nac zeene bzhial lo zho, laa zho beenbey me. Per par nianraa zho me, znuse bnit me lo zho, gondraa zho me.

<sup>32</sup> Horco per nli rley zho rnee zho:

—Con razon zeene sca ziaadgza ne me nëz nonee me lo ne zha raquiet lo Xtiidz Dios, masaque tib guielbley nroob ne biaadnie xcodiidz me zdoo ne.

Sca rnee zho, sac bien zho bdzin tib guielbley nroob zdoo zho, zeene sca nonee me lo zho.

<sup>33</sup> Lëëldaque brieë zho ga, bio zho nëz wbyre zho Jerusalén stib. Bdzin zho lo gza tsiptib zha ne bzëniepaa me ga, ni grëraa zha ne nacgrë zho,

<sup>34</sup> rëbchaa zha co lo zho:

—¡Tebaa gan to ganle nli brieëban xmaistr ne! ¡Laa Pedr gonle me!

<sup>35</sup> Psiloque zho grop zho bzodiidz zho zha gon zho me no zho nëz, per haxta horne no zho xtsee, zeene laa me beengrol guietxtil dzigoraa beenbey zho me.

*Brieëquia Jesús lo grë xpëëdscuel me*  
(Mt. 28:16-20; Mr. 16:14-20;  
Jn. 20:19-23)

<sup>36</sup> Lëëtaaque sca nozodiidz zho, tibaque zeen gon zho laa Jesús zole lo zho ga, pquiaabdiuzh me zho, rëb me lo zho, peet tsieniedraa guic zho.

<sup>37</sup> Leļ rdzieb zho, haxta rzhidz zho lo dzeb co, sac rëb zho bod ndziin ga ran zho.

<sup>38</sup> Dzigo bnee me lo zho rëb me:

—¿Pe nacne rdzieb to? ¿Pe nacne riladzde to naa nu?

<sup>39</sup> Golwi len nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

<sup>40</sup> Sca quianee me, blu me nia me, blu me ni me lo zho, zaatne biaaz me clay.

<sup>41</sup> Per nli rley zho, rzee zdoo zho, per riladzdaque zho dien pe nlipaa lëë me ga. Gon me sca rac zho, nacne bnab me ncuaane gow me lo zho.

<sup>42</sup> Dzigo bdeed zho tib lë meļ bguiee lo me,

<sup>43</sup> bnaaz me meļ co, squi ndxie zho gon zho dow me ma.

<sup>44</sup> Dzigo rëb me lo zho:

—¿Pe ib rsoladzde to nile naa laa grë min rii no gac? Led ni naa lo to, grëse mine bzeet Moisés, grëse mine bzeet grë zha ne biadteed xtiidz Dios, mine raquietgaa lo Salm teed naa, ible laaw none gac.

<sup>45</sup> Psilo me clar nonee me lo zho, parne guienpaa zho zha zhobnee lo grë guits co,

<sup>46</sup> rëb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tson ngbidza, laa naa grieëban.

<sup>47</sup> Rneew, Jerusalén nu, nu csilo gacnan miech ible none csaan zho xquielntseeb zho, gnalo zho naa, parne gon Dios zho perdon.

<sup>48</sup> Ni to gon ganle grëse min co, goca.

<sup>49</sup> Na len dze ne ziaadaque nu, laa naa cxel Espiritu Sant gacniën to, sac ib scale nac xtiidz Pxoza naa. Per guiabde to niinaga grieë to tsienee to lo miech, Jerusalénse nu golcuëz, haxta nieeda yгаа to poder ne gneedz Espiritu Sant lo to.

<sup>50</sup> Zeene gol dze ne laa me guey gbaa, dzigo güey me güeynie me zho nëz Betain. Bdzin zho ga, blis me nia me, psilo me noyunlay me zho.

<sup>51</sup> Laa me quiayunlay zho, tibaque zeene laa me bias lo guidzliu, igonlo zho laa me bzoquia gbaa!

<sup>52</sup> Horco pquitsgzhil zho liu, beennon zho me, rnee zho grë diidz ndzon lo me; blozh ga ine rley zho



laa zho wbi ga, bdziṅ zho Jerusalén  
stib.

<sup>53</sup> Psilo zho gzataa dze rie zho  
yadoo roolnie zho Dios, rdeed zho  
xquizh lo me.

## XTIIDZ NDZON DIOS MINE PQUIAA JUAN

1-2 Jesús, men ne nac Diidz Ndzon, nole me zeene biala grëtaa ncuaane no; lo Dios no me ni Diosaque nac me. Notaque me, tibaque nac me: me ni Dios.

3 Me bzaa grëtaa ncuaane no, tsod ncuaane lega scase niaan; sac me bzaaw grësew.

4 Ladznia me no guielmban ne gdziind dze lozh, nac guielmban co zig tib biini ne rziini lo miech.

5 Me nac biini ne quiaziini zaatne nac lo guielcow, ni rrieelod guielcow ctsew lo biini co.

6-7 Bio tib mgui brieelë Juan, Dios pxeel Juan biadnee Juan lo miech cho nac Jesús, zeena grëse zho gliladz Jesús.

8 Led Juand nac biini, sinque loxaque biaad Juan biaadlu Juan Jesús, men ne nac biini co.

9 Bdziñ dzew laa Jesús biaad, ni niina me nac men ne noziini lo grëse miech, sac mepaa nac biini co.

10 Jesús nac biini, me nac Diidz Ndzon co. Me bzaa guidzliu, per zeene biaad me lo guidzliu ib biend miech cho nac me.

11 Per ni menladz me, niicle ne lopaa zho bdziñ me ib gondzed zho me; tib chop zha ne blëzlo me.

12 Ni grë zha ne sca bleynie me, grë zha ne dib zdoo gliladz cho nac me, grëse zha co laa me bzo zho gac zho xpëed Dios.

13 ¡Grëse zho, rrieequia gol zho stib! Per guiabd ne togo gol zho zigne ral grë miech guidzliu rii, sinque laa zho gol zigne racladz Dios; gane niina xpëed me nac zho.

14 Zeene bdziñ dze ne laa men ne nac Diidz Ndzon ga goc miech biaad me lo guidzliu, grop lo no bdzion no me, ni bzianie no me. Blu me pa lotaa nquialadz me miech, ni niapse diidzli bnee me. Bdzion no xquielndzon me

ne nac me tibpaa mëed lo Dios, men ne nac Pxoze ne.

15 Zeene bzeet Juan Bautist me lo miech, tib vuilt haxta blu Juan me lo zho, rëb Juan: “Lëe men rii ga gon rzet naa lo to zeene rne naa: Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

16 Nquialadzdox Jesús ne, grëse ne gzataa dze laa ne nogaa grëtaa guielnzaac ne rsiaab me.

17 Zeene psan Moisés ley, loxaque bnabeya ne; sangue niina ne laa Jesús biaad, laa me biaadnie mine nacpaa diidzli ni biaadlu me ganle pa lotaa nquialadz Dios miech.

18 Wlaltaa ib choot gard gan Dios; sangue niina ne laa Xpëed me Jesús biaad, men co biaadlu ganle zha nac Dios; sac zaatne no Dios gaque no me.

*Rnee Juan Bautist cho nac Jesús  
(Mt. 3:11-12; Mr. 1:7-8; Lc. 3:15-17)*

19 Tib dze pxeel grë zha ne nac zha non Jerusalén, bla zha ne nac pxoz ni zla zha ne rquianap yadoo, zienabdiidz zho lo Juan dien cho nac Juan.

Bdziñ zho bnabdiidz zho lo Juan.

20 Dzigo bneeli Juan lo zho, rëb Juan:

—Golgacnan ganle, led naad nac Men ne quiambëz to ga cxeel Dios.

21 —¿Chox nac luu waa? —rëb zho—. ¿Te luu ye nac Lí, men ne biadteed xtiidz Dios padzeela?

Pquiab Juan rëb Juan:

—Lëda, led Lid naa.

Biire zho bnabdiidz zho, rëb zho:

—¿Te luu ye nac men ne bzeet Dios padzeela cxeel me guiadteed xtiidz me?

Pquiab Juan rëb Juan:

—Zhaa men co, led naad nac men co.

22 —¿Cho dzigo nac luu? —rëb zho—. Bnë dien cho nac luu; sac gon ib none gdziñnie no tib xtiidz luu lo zha ne pxeel no.

23 Dzigo pquiab Juan, rëb Juan lo zho:

—Naa nac mgui ne bzeet Isá, men ne biadteed xtiidz Dios padzeela, zeene znu bnee me: “Zon to zëeb

tsi tib mgui dan rnee me lo miech: ¡Golgun nguudz zdoo to, sac gon ile ziaad men ne rnabey ne!”

<sup>24</sup> Horco laa zha ne pxeel zha farisé pquiab, rëb zho lo Juan:

<sup>25</sup> —Telne led luud nac Men ne zëëble diidz ga cxeel Dios, niicle led luud nac Lí, niicle nacdгаа luu cho stib zha ne pxeel Dios ziadteed xtiidz me, ¿zha nac dzigo ne nochoobnis luu miech?

<sup>26</sup> Pquiab Juan rëb Juan:

—Tel naa niab nis rchoobnis naa miech, per no tib men ne gard gunbey to.

<sup>27</sup> Tib men non nac me, per ni par gac naa tib ngundziin win ne glit lab me ni me raguiald naa; ni merle csilo gun me dziin ne pxeel Dios me gun me.

<sup>28</sup> Betain lë tib guiedz ne riaan gax ro guiubee Jordán, nëz ne rlan ngbidz; ga no Juan nochoobnis me miech zeene scataa pquiep zho me.

### *¿Cho nac Jesús?*

<sup>29</sup> Biet stib dzew, laa Jesús bdziñ zatne no Juan ga. Zeene gon Juan me, rëbchaa Juan lo grë miech ne ndxie ga:

—¡Golwi ganle, lëë men qui gon csilaa miech lo grëtaa xtol zho! ¡Me gac zig tib carner yeen ne guet tsogon lo Dios par guiaanmbe miech lo dol!

<sup>30</sup> Lëë men rii ga nagon rzet naa lo to zeene rne naa: “Iraa ziaad tib men ne mazdraa non lo naa, sac notaque me; nole me zeene blanso naa lo guidzliu.”

<sup>31</sup> Len dze co niicle naa runbeyd naa me; per laa naa nochoobnis miech sac ible laa naa zial par glu naa me lo grë zha Israel.

<sup>32</sup> Dzigo bzodiidz Juan lo zho, zha gonlo Juan biet Espiritu Sant gbaa, rlu me zigne rlu tib palom blëz me guic Jesús.

<sup>33</sup> —Ne nligaa runbeyd naa me —rëb Juan—. Per zeene pxeel Dios naa zialchobnis naa miech, hor co në me lo naa: “Zeene gan luu quiet Espiritu Sant gbaa cuëz me guic tib mgui ne nochoobnis luu, dzigo gocnan lëë men co nac men ne rxeel Espiritu Sant zdoo miech.”

<sup>34</sup> Gonlo naa blëz Espiritu Sant guic me; gane nanween naa ne nli Xpëed Dios nac me.

### *Zha ne glopaa goc xpëedscuel Jesús*

<sup>35</sup> Biini liu co, laa Juan zoque ga zonie me chop xpëedscuel me.

<sup>36</sup> Ga zo me, gon me laa Jesús zieded ga; dzigo rëbchaa me lo zho:

—¡Golwi ganle! ¡Lëë men qui gon nac Xcarner yeen Dios!

<sup>37</sup> Zigne bin zhow, laa zho zienal zhits Jesús.

<sup>38</sup> Zeene ptsire lo me, gon me laa zho nalle zhits me; dzigo rëbchaa me lo zho:

—¿Pe nac ziaadnal to zhits naa?

—Maestro —rëb zho—, laa no racladz gacndion no dien pa rbëz luu.

<sup>39</sup> Dzigo rëbchaa me lo zho:

—Na ganle guio ne, zeena gan to paw.

Nacne güeynal zho zhits me, gon zho pa lo no me; dzigo blëz zho lo me ga. Ga blozh ptse zho dze, sac ziedzele dze zie zho.

<sup>40</sup> Ndrës lë tib zha ne güeynal zhits me ga; lëë Ndrës co nac bets Simón Pedr.

<sup>41</sup> Dzigo zigne brieë Ndrës ga güey Ndrës güeyguib Ndrës Simón. Bdziñ Ndrës rëb Ndrës lo Simón:

—¡Nasi gon laa no bdzion Men ne nacle diidz ga cxeel Dios!

<sup>42</sup> Dzigo güeynie Ndrës Simón zatne no Jesús ga. Zeene gon Jesús Simón, rëbchaa me lo Simón:

—Bina ganle, nli Simón nac lë luu ni xingan Jonás nac luu, sangue niina laa luu grieelë Cef.

(Cef rnee zha Israel quie, laa xtiidz zha Gres rnee zhow Pedr.)

<sup>43</sup> Biet stib dze co, laa Jesús no nëz tsie me nëz Galilé. Laa me zierieë dze ga, zeene bdzieel me tib mgui lë Lip; dzigo rëbchaa me lo Lip:

—Dënal zhits naa.

<sup>44</sup> Zha Betsaid nac Lip, ni zha coque nac Ndrës grop Simón.

<sup>45</sup> Dzigo güey Lip güeyguib Lip Natanael; rëb Lip lo Natanael:

—¡Laa no bdzion Men ne nacle diidz ga cxeel Dios! Men ne rzeet Moisés lo libr ley ne psan me, men ne scataa

bzeet grë zha ne biadteed xtiidz Dios padzeela. ¡Laa no bdzion me, tib men Nazareta, lëe me ga nac Jesús, xingan José!

<sup>46</sup> Pquiab Natanael, rëb Natanael:

—¿Nazaret ye? ¡Gard grieequia tib zha non Nazaret!

—Gotsaa guio ne ganle —rëb Lip—, zeena ganzhal luu me.

Dzigo laa zho zie.

<sup>47</sup> Squi ziaad Natanael, zeene gon Jesús Natanael rëbchaa me:

—¡Golwi ganle, lëe zha qui gon nac merpaa zha Israel, sac mesi ib rquidied me!

<sup>48</sup> —¿Zha nacne runbey luu naa? —rëb Natanael.

Pquiab me rëb me:

—Glolle naa beenbey luu, dzigoraabredz Lip luu. Zeene zob luu tib zhan yag guigw, hor co gon naa luu.

<sup>49</sup> Rzee zdoo Natanael, rëb me lo Jesús:

—¡Nlique nagon luu nac Xpëed Dios! ¡Luu nac zhirey zha Israel!

<sup>50</sup> Dzigo rëbchaa Jesús lo Natanael:

—¿Pe ne binse luu ni naa gon naa zeene zob luu tib zhan yag guigw, pe miñcose laa luu bliladz cho nac naa? ¡Naraa ganle gan luu ncuaane mazdraa nroob!

<sup>51</sup> Ni rëb me lo grë zha ne ndxie ga:

—Gneli naa lo to: zanaque to ganle zeene laa zhan gbaa gzhal, zlupaa grë xanj! Dios, zha ne ziad-zëeb zha ne ziequia, quiayun zho dziin lo naa, nac naa Mgui ne pxeel me.

## 2

### *Güey Jesús tib lo guieltsieel*

<sup>1</sup> Goc tson ngbidza, bio tib guieltsieel guiedz Caná, xtan zha Galilé ga. Dzigo bredz zho xniaa Jesús lo lni co,

<sup>2</sup> ni bredz zho me; nacne bional no zhits me grëse no ne nac no xpëedscuel me.

<sup>3</sup> Laa lni noyac, tibaque zeene laa vin blozh. Dzigo güey xniaa Jesús rëb me lo Jesús:

—Laa xvin men rii blozh. ¡Guiendraa pe quiiz zho!

<sup>4</sup> Pquiab Jesús rëb me:

—¿Pe nacne rnee luuw lo naa? Gon ganle naraa gdziñ dze ne gacnan miech cho nac naa.

<sup>5</sup> Niicle sca rëb Jesús lo me, güey me lo zha ne quiaguiz vin ga rëb me lo zho:

—Miñe gnabeytaa me to, golguña.

<sup>6</sup> Lidz men co ga ndxie xoop guies ne niaa quie; zaatne rio nis ne rquiin zha Israel riar nia zho, zigne nac grë xcostumbr zho. Tib tib guies co, rio maase xoopga re nis lena.

<sup>7</sup> Dzigo bnabey Jesús zha ne rguiz vin ga pcodzëe zho nis len gza guies co.

<sup>8</sup> Blozhse guiel guiel pcodzëe zhow, rëbchaa me lo zho:

—Golcuee niip nis qui, goltsieniew lo men ne zo lo lni.

Zeene laa zho blee niip nis co tsienie zho, laaw nacle vin.

<sup>9</sup> Ni lalnu ib güeynied guic men co pa briece vin co (loxaque zha ne nacse ngundziin ga, zha ne blee nis ga, zha cose gon pa brieew), zeene pquiaaro mew, bredz me mgui ne notsieelna ga, rëb me:

<sup>10</sup> —¿Zha nan luu naraa cuee luu vin rii! Grëtaa zaatne znu rac lni, glo rgaaz vin niazh, zeene nrooblew noye zho, dzigo rgaaz vin ligase. Laa luu gon lel naraa bnabey luu briece vin niazh.

<sup>11</sup> Milagr ne been Jesús guiedz Caná ga, ga glopaa blu me lo miech ganle nli tib men nroob nac me. Grëse no ne nac no xpëedscuel me, zeene bdzion now, hor co bliladz no nli me nac Men ne zëeble diidz ga cxeel Dios.

<sup>12</sup> Zeene blozh guieltsieel co, laa no wbire guiedz Capernaum stib grë no me, xniaa me, ni zha bets me ne. Bdziñ no Capernaum, ga bliaaz no blalaa ngbidz.

*Blee Jesús grë zha ne noyun lgui len yadoo*

(Mt. 21:12-13; Mr. 11:15-18; Lc. 19:45-46)

<sup>13</sup> Len dze ne ziaadyob lni Pascw, lni nroob ne run zha Israel rsoladz zho zha psilaa Dios zho Egipt, len dze co briece Jesús zie me nëz Jerusalén.



<sup>14</sup> Bdzin me Jerusalén, güey me len yadoo nroob ne zob lad guiedz co. Zeene bzëeb me, gon me nzian miech ne ndxie ro yadoo co, zha ne no wto ngon, zha ne no wto mëcwxiil, zha ne no wto palom ne, haxta zha ne rtsëë dimi ndxie ga.

<sup>15</sup> Dzigo bzhixcuuaa me tib lë doo zig ríaa dooguid ne rcaa ma, bzhen me doo co beñcxoon me zho ga grë xma zho; blozh ga, ptiixche me xmezha zha ne notsëë dimi ga, nëzrii nëzrec blaal me xtimi zho.

<sup>16</sup> —¡Niinagazh golcuee grë ncuaan qui nu! —rëb me lo zha ne rto palom—. ¡Golguien ganle lidz Pxoza naa nu! ¡Nacda yu lgui parne tso to wto nu!

<sup>17</sup> Dzigo psoladz no zha ziaad lo Xtiidz Dios, zaatne rnee: “Rbiñladz guic naa, sac ne nligaa racladz naa yquiaanap naa lidz luu.”

<sup>18</sup> Blalaa zha non lo menquiedz Israel, zeene gon zho sca beñcxoon me grë miech co, wbig zho lo me rëb zho:

—¿Cho nac luu ne squitaa noyun luu grë ncuaan qui? ¡Been tib milagr, dzigo zliadz no men rnabey nac luu!

<sup>19</sup> —Telne racladz to milagr —rëb me—; goltzil yadoo rii, ni gni naa lo to ganle ngbidz tsona laa naa bzaalolew stib.

<sup>20</sup> Pquiab zho rëb zho:

—¡Ncuane gliladzdraa no rnee luu! ¡Len choopxopraa iz name bíaa yadoo rii! ¿Zhazhe gun luu, tsonaque ngbidz gzaa luuw stib?

<sup>21</sup> Per zeene sca bnee Jesús lo zho, xcuerp me ga nac yadoo ne bzeet me.

<sup>22</sup> Gane zeene brieaban me, hor co psoladz no zeene znu bnee me, dzigo bien no ne me ga bzeet me ni bien no ne me ga raquiet lo Xtiidz Dios zaatne scaque rnee.

<sup>23</sup> Len dze lni Pascw co, nzian miech zeene gon zho grëtaa milagr ne run me, bliladz zho ne nli me nac Men ne zëëble diidz ga cxeel Dios.

<sup>24</sup> Per ib pxend me lo zho, sacne nanwen me zha nac zho tib tib zho.

<sup>25</sup> Pquiind me chopaa niab lo me zha nac zho; sac nanwen me zha nac

tib tib miech ni nan me pe rza zdo zho.

### 3

#### *Jesús ni Nicodem*

<sup>1</sup> Ziecowle liuw, bdzin tib zha farisé lë Nicodem zaatne rbëz Jesús; tib zha non nac me lo menquiedz Israel. Bdzin me rëb me lo Jesús:

<sup>2</sup> —Maestro, ndion no ible Dios pxee l uuu ziadseed l uuu no. Grë milagr nroob ne run l uuu, ga rlu ne Dios nacie l uuu.

<sup>3</sup> —Gneli naa lo l uuu ganle Nicodem —rëb Jesús—, grëse miech, telne gald zho stib grieelod gdzin zho zaatne rnabey Dios.

<sup>4</sup> Pquiab Nicodem, rëb Nicodem:

—¿Gal zho stib ye? ¿Zha grieelo gal miech stib? Tib zha ne nacle mengol, ¿niacxe zrieelo sëeb zho zdo xniaa zho gbiire gal zho?

<sup>5</sup> Rëbchaa Jesús:

—Ible none gal miech, none gal zho zigne racladz Dios. Sac telne chobnisd zho ni ygaad zho Espiritu Sant, grieelod sëeb zho zaatne rnabey Dios.

<sup>6</sup> Grëse miech zeene ral zho glo, miechse nac zho; sangue zeene ral zho stib, Espiritu Santle nac men ne rnabey zho.

<sup>7</sup> Gacxe waa, gzeed zdo l uuu znu rne naa: “Grëse miech, ib none gal zho stib.”

<sup>8</sup> Nac cuent rii zig nac me ne rtopxcow, zeene rriee me, nëzrii nëz rec zie me, ron l uuu razh zhoob me; per rand l uuu dien pa nëz zie me dien pa nëz ziaadgaa me. Scaque nagon nac zha ne ral stib, grieelod guien miech zha rnabey Espiritu Sant lo xquielmban zho.

<sup>9</sup> —Riend naa zha rnee l uuu —rëb Nicodem—. ¡Riend naa dien zha grieelo gac grë mine rnee l uuu!

<sup>10</sup> Rëbchaa Jesús:

—¿Riend l uuu ye zha rne naa? ¡Men rseed miech name nac l uuu lo menquiedz Israel!

<sup>11</sup> Mine rne naa nu ncuaane rien naaw, ncuaane gon naaw, ni riende to zha naca.

<sup>12</sup> Telne riend luu zha nac grë mine rne naa nu zeene rzet naa ncuaane rac lo guidzliu, ¿zha dzigo guien luu mine gne naa telne gzet naa grë ncuaane rac gbaa?

<sup>13</sup> 'Wlaltaa gard tso tib zha ne soquia gbaa, per no tib men ne biet gbaa, men cosi soquia me gbaa, sac ga nac zaatne no me; ni lëe men co nu nac naa.

<sup>14</sup> Ni zigne pquianga Moisés tib meel brons tib guic yag zeene nonie me zha Israel dan zit co; scaque none yquianga naa tib lo yag,

<sup>15</sup> zeena grëse miech, zha ne gbig dib zdoo zho gnalo zho naa, zgaa zho tib guielmban ne gdziind dze lozh.

<sup>16</sup> Sac gon rleyniedox Dios grëse miech ne ndxie lo guidzliu; gane nicle tib naa nac mëed lo me per laa me pxeel naa lo guidzliu; zeena grëse zha ne gnalo naa, zgaa zho tib guielmban ne gdziind dze lozh; led yed zho nitlo.

<sup>17</sup> Laa Dios pxeel naa lo guidzliu par csilaa naa miech lo dol, ziald naa par gdziibdol naa miech.

<sup>18</sup> Sac grëse zha ne dib zdoo gnalo naa ne naa csilaa zho lo dol, nitlod zho. Sangue zha ne gnalo naa, laa zho bnitlole ga, sac gon Xpëed Dios nac naa ni bliladz zho naa.

<sup>19</sup> Laa zho bnitlole, sac gon biaad-paa biini lo guidzliu ni laa ne nleynie zho biini, lel guielcow bleynie zho, sac guielntseeb nac mine zienal zho.

<sup>20</sup> Grëse zha ne run guielntseeb, rlëe zho ran zho biini. Ib rbigd zho lo biini, sac racladz zho xobnen grë guielntseeb ne quiayun zho.

<sup>21</sup> Sangue zha ne run mine rnabey Dios, haxta rley zho rbig zho lo biini, zeena glu ganle zienal zho mine rnabey me.

### *Rzeet Juan Bautist Jesús stib*

<sup>22</sup> Ga brieet Jesús güeynie me no nëz xtan zha Judé. Xtselaa bliaaz no ga grë no me, rchoobnis me grë miech co.

<sup>23-24</sup> Len dze co gard guiab Juan Bautist ladzguib; dzigo ye me nochoobnis miech zaatne lë Enón gax Salim; sac ga no naal nis. Nzian

miech ne rdziñ lo me ga, rchoobnis me zho.

<sup>25</sup> Tib dzew, wbig tib zha Israel lo zla xpëedscuel Juan, psilo zho nodildiidz zho dien cho zhiwrobnis nonraa; pe zhiwrobnis Jesúsá, te zhiwrobnis Juana ye.

<sup>26</sup> Blozhse bdildiidz zho, wbig xpëedscuel Juan lo Juan, rëb zho:

—Maestro, men ne gon bzodidznie luu ro guiubee Jordán ga, men ne scataa bzeet luu lo miech, iye me laa me quiachobnis miech niina, ni ndal miech niapse lo me zie zho, ziaatraade zho nëz rii!

<sup>27</sup> Pquiab Juan rëb Juan:

—Ib Dios rdeed diidz zha gun miech tib tib xtsiñ me, gacd ne lega zhal zho gun zho pe cos.

<sup>28</sup> Mine pso Dios naa, laaw ben naa: laa naa biallu ganle cho nac Men ne zëeble diidz ga cxeel Dios. Ni bneeli naa lo to ganle led naad nac men co; laa naa zial loxaque par gzet naa me lo miech zeena gunbey zho me.

<sup>29</sup> Ible lo me none gdziñ miech. Nac me niina zig tib mgui ne notsieelnie: Mgui ne notsieelnie, led zha lëe rzobnie ndzoop ne notsieelnie zho! Ni grë zha ne ndzieeldiiz zho, rley zho ran zho laa xamigw zho notsieelnie, rley zho ron zho pe rnee xamigw zho. Scadaa nagon rzaac naa niina: rley naa ron naa grë ncuaane run me.

<sup>30</sup> Zigse zie dze, laa me gacnonraa; scagaa naa, zigse zie dze laa naa guiaanwinraa.

<sup>31</sup> 'Nëz gbaa ziaad me, min co ne mazdraa non me lo grë miech. Tel naa tib miech guidzliuse nac naa, ni ncuaane riense tib miech lo guidzliu min co rne naa;

<sup>32</sup> sangue me, niapse grë mine bin me, grë mine gon me min co rnee me lo miech; jni choot rliladzda!

<sup>33</sup> Zha ne rliladzse xtiidz me, rien zho ganle niapse diidzli rnee Dios.

<sup>34</sup> Xtiidz Dios rnee me lo miech; sac Espíritu Sant rdeed guielbiini lo me, ni Dios nac men ne pxeel me.

<sup>35</sup> Rleyniedox Dios me, nac me Xpëed Dios; gane grëta ncuaane no

gbaa, no lo guidzliu, ladznia me psan Diosa.

<sup>36</sup> Grëse zha ne gnalo me, laa zho bgaale tib guielmban ne ib gdziñd dze lozh; sangue zha ne gond xtiidz me, gdziñd zho gbaa, zaatne ygaa zho guielmban co. ¡Grëse zha co, ible zgaa zho guielñëdox ne csiaab Dios!

## 4

### *Tib wnaa Samar*

<sup>1</sup> Zeene bien Jesús laa zha farisé gocnanle ndalraa miech zianal zhiwseed me, ni ndalraa miech ne quia-choobnis me lo Juan

<sup>2</sup> (niicle ne led medpaa rchoobnis, sinque zha ne nac xpëëdscuel me zha co rchoobnis),

<sup>3</sup> nacne brieë me xtan zha Judé ga, wbire me nëz xtan men Galilé stib.

<sup>4</sup> Par gdziñ me Galilé, none ted me xtan men Samar.

<sup>5</sup> Xtan men Samar zieded me, zig grol dzew, laa me zie gax guiedz ne lë Sicar,

<sup>6</sup> dzigo güeyted me zaatne quia guiuu ne rnee zho “Zhibzie Jacob”; lo liu ne psan Jacob lo xpëëd me José padzeela. Rdzag me ziaad-zë me lo nëëg co, bdziñ me bzob me ro guiuu co;

<sup>7-8</sup> ga blëz me, laa no zio lad guiedz Sicar zioxi no ncuaane dioownie no me.

Ro guiuu co zob me bdziñ tib wnaa Samar ziexi nis ga; dzigo rëbchaa me lo wnaa co:

—Bzhiguiel bzoladz niip zhis luu guie naa.

<sup>9</sup> Bzee zdoo wnaa co gon me bnaab Jesús nis lo me, sac rlëëdox zha Judé ran zho zha Samar, per ni rneed zho lo zho.

—¡Ncuaane gliladzd naa! —rëb me—. ¡Ti zha Judé gnab nis lo ti zha Samar!

Dzigo rëbchaa Jesús:

<sup>10</sup> —Tel niaca mine guien luu ganle cho rnaab nis lo luu, ni guien luu zha nactaa ncuaane rzoladz Dios lo miech, haxta znab luu nis lo naa. Ni naasi gon, znedz naa nis ne rdeed guielmban.

<sup>11</sup> Pquiab wnaa co, rëb me:

—Per ni nzhend luu name pe cuee luu nis, ¿pa dzigo tsiebee luu nis ne rdeed guielmban ga? ¡Gon ganle, guietdox bzie rii!

<sup>12</sup> Stiba, ¿niacxe mazdraa dzigo nac luu que pxozgol ne Jacob, men ne psan bzie rii? Nu name go me nis grë xma me; niicle grë xpëëd mew, nuque go zho nis.

<sup>13</sup> —Grëse zha ne rie nis rii —rëb Jesús—, rbiire rnaab zhis zho;

<sup>14</sup> sangue nis ne rded naa, zha ne guiew gdziñdraa dze gnab zhis zho. Sac nis ne gded naa, masaque gdziba zdoo zho zig rdzib nis tib ro zhlian, ni nis co gdeed tib guielmban ne gdziñ dze lozh lo zho.

<sup>15</sup> Dzigo rëbchaa wnaa co lo Jesús:

—Bzhiguiel bneedz nis co guie naa, zeena gnabdraa zhis naa, zeena guialxidraa naa nis nu.

<sup>16</sup> —Güeygazh —rëb Jesús—, güeyxi tsieel luu, dzigo goltë grop to.

<sup>17</sup> —Guiend tsieel naa —rëb wnaa co—. Gard ctsieelnia naa.

—Nli rnee luu —rëb Jesús—;

<sup>18</sup> sac gaay mgui ne zibannie luu, ni tib zho ptsieelniad luu, niicle mgui ne nonie luu niinaw, ptsieelniadaque luu zho. ¡Nli mine rnee luu i!

<sup>19</sup> Zeene bin wnaa co sca rëb Jesús, rëbchaa me:

—Zootne tib zha ne ziadnee xtiidz Dios lo miech nac luu.

<sup>20</sup> Tel scaw, bzhiguiel bnë dien, ¿zha nacne rnee grë men Israel ne len yadoo nroob ne zobpaa Jerusalén, gapaa none tsiegan miech Dios? Sac no ne nac no men Samar, rnee no ne ib guic gui ne zob nu, ga none tsiegan miech Dios; sac grë xmenzol no ga güeygan zho Dios.

<sup>21-24</sup> Pquiab Jesús rëb me:

—Bina ganle, zdziñ dze zeene yquiindraa ne goon guic gui riipaa, o Jerusalénpagaa tsie to tsiegan to Dios men ne nac Pxoz ne. ¡Ni laa dze co ziaadgaxle! Gacdraaw ne dien pa lo tsie ne tsiegan ne Dios, sinque zha ne nlipaa racladz gleyne me, none dib zdoo zho gleyne zho me; zigne gdeedse Espíritu Sant guielbiini lo zho.

'Choot grielod gan Dios; gacxe waa zha ne gleyne me, none gleyne zho me zigne rdeed Espíritu Sant guielbiini lo zho; ni none dib zdoo zho gleyne zho me. Ni zha ne sca gleyne me, zha co rguib me. Tel to laa to rieganse Dios ni runbeyde to me; sangue no rdziuunbey no men ne riogan no, sac gon lo xti men Israel ziaad men ne guiaadsilaa miech lo dol.

<sup>25</sup> —Nenda —rëb wnaa co—, per nan naa ib ziaad Men ne zëëble diidz ga cxeel Dios, men ne lë Crist; ni zeene laa me guiaad, me gnë diidzli lo no.

<sup>26</sup> Pquiab Jesús, rëb me:

—iNaa gon nac men co! Lëe me nu nonee lo luu.

<sup>27</sup> Lëetaaque hor co grëse no ne nac no xpëedscuel me laa no bdzin. Bzee zdoo no bdzion no laa me nozodidznie wnaa co, per ni tib no bnabdidz lo me dien pe quianabdiidz me, dien pegaa quiazodidznie me wnaa co.

<sup>28</sup> Laa wnaa co, zoque xche me ga, rias me laa me zie nëz lad guiedz. Bdzin me, rëb me lo grë miech co:

<sup>29</sup> —iGoltë ganle gunbey to ti men co! iBzeet me grëse zha nac lo xquielmban naa! iBay pe lëdle Men ne nole diidz cxeel Dios ga?

<sup>30</sup> Horco brieë grë miech co lad guiedz, ziaad zho zaatne gon wnaa co Jesús.

<sup>31</sup> Laa no, quia no rdeed no ncuane gow me, per nëd me.

<sup>32</sup> —Gowd naa —rnee me—. No stib xquielwagw naa mine runbeyde to.

<sup>33</sup> Dzigo rnabdiidzlsa no, rnee no: —Bod no cho biaadnie pe dow me, lal ne bio ne lad guiedz.

<sup>34</sup> Nëchaa me lo no:

—Lëe xquielwagw naa nac ne gun naa mine rnabey Dios naa, ni csiaal naa dziin ne pxeel me naa zialgun naa.

<sup>35</sup> To lëe rnee to: “Len stapraa mëë csilo gac wlaap.” iPer golwi lo grëtaa miech qui ganle, nac zho niina zig grë guielgon ne golle gliap!

<sup>36</sup> Gacxe waa, ib none tsie to tsielaap to, tsietop to zho, zeena

ygaa zho tib guielmban ne gdzind dze lozh. Ni zigne razh zha ne rie wlaap, scaque zguizh Dios to tsietop to zho. iTi guielbley nrooba, zigtaa par zha ne rana, zigtagaa par zha ne rlaapa!

<sup>37</sup> Ible nli diidz ne znu rnee: “Zhaa zha ne rie gon, stible zha ne rie wlaap.”

<sup>38</sup> Zig nac niina, laa naa rxel to tsielaap to zaatne ni tib xtsiin to psëëbde to; zhaa zha ne güey gon, na tole tsie wlaap.

<sup>39</sup> Laga laa me sca quianee lo no, laa grë menladz wnaa co no nëz ziaad zho nëz lo no ga. Nzian grë miech co, zeene bin zho rëb wnaa co bzeet Jesús grë ncuane ziyun me, bliladz zho Jesús.

<sup>40</sup> Laa zeene blanso zho ga, bnab zho lo me cuëz me ladz zho zhis. Dzigo nacne blëz me lo zho chop ngbidz.

<sup>41</sup> Nzianraa grë miech co bliladz me, zeene bin zho grë zhiwseed me.

<sup>42</sup> —Nasi nagon laa no rliladz me —rnee zho lo wnaa co—, sac nozhal bdzion me, ni bdzion no grë mine rnee me. Nliw, ible me nac men ne ziaadsilaa grëse miech lo xtol zho.

### *Biac xpëed tib zha ne quia dziin lo rey*

<sup>43</sup> Zeene goc chop ngbidz co, laa no brieë ga gza no me, laa no bdzio nëz stib zio no nëz Galilé.

<sup>44</sup> Niicle ne bzeetle me: grëse zha ne ziadteed xtiidz Dios, ib ranzed miech zho zaatne nac ladz zho; per

<sup>45</sup> zeene bzëëb me grë guiedz ne ngab Galilé, wen pcaania grë miech co me. Nzian zho güey lni Pascw co Jerusalén, gon zho grëtaa milagr ne been me ga.

<sup>46</sup> Nëz no no bdzin no Caná, zaatne sca bzaalo me nis vin. Ga bdzieelo me tib zha Capernaum, tib zha ne rquia dziin lo rey; lëetaque len dze co rzacne xpëed me.

<sup>47</sup> Bin me laa Jesús brieë xtan men Judé, laa me no gdzin Galilé. Dzigo biad me biaddzieelo me Jesús ga, bnab me lo Jesús tsienal Jesús zhits me



Capernaum, tsiegun<sub>g</sub>uiac Jesús xpëed me; sac nz<sub>hoo</sub> rac win.

<sup>48</sup> Dzigo rëb<sub>chaa</sub> Jesús lo me:

—¿Pe haxta gan to dzigo gun naa milagr, dzigora<sub>a</sub> gliladz to naa?

<sup>49</sup> —Been<sub>n</sub> tib guie<sub>l</sub>n<sub>z</sub>aac gotsaa guio<sub>n</sub>io<sub>b</sub> ne —rëb<sub>n</sub> men<sub>n</sub> co—, nend znuse lozh xpëed naa.

<sup>50</sup> Rëb<sub>chaa</sub> Jesús:

—Bzë, tsod luu guie<sub>l</sub>në. ¡Laa xpëed luu biacle!

Dib zdo<sub>o</sub> men<sub>n</sub> co bliladz me xtiidz Jesús, laa me bi<sub>o</sub> nëz laa me zey.

<sup>51</sup> Zhilew gdzi<sub>n</sub> me lidz me, zeene b<sub>d</sub>zieelo me bla zha ne quia xtsi<sub>i</sub>n me, rëb zho laa xpëed me biacle.

<sup>52</sup> Dzigo b<sub>n</sub>abdiidz me lo zho, maase pa hor biac win. Rëb<sub>chaa</sub> zho:

—Nieeg, zig rwe ngbidza, tibaque znuse b<sub>r</sub>iee zhixlëe win.

<sup>53</sup> Dzigo psoladz me zig hor cotaque rëb Jesús lo me, laa xpëed me biacle. Dzigo dib zdo<sub>o</sub> me bliladz me Jesús, tsieel me, xpëed me, men<sub>n</sub>lidz me ne, grëse zho dib zdo<sub>o</sub> zho bliladz zho Jesús.

<sup>54</sup> Ga goc bro<sub>p</sub> milagr ne been<sub>n</sub> Jesús lo zha Galilé. Mi<sub>n</sub> co been<sub>n</sub> me zeene wbire me nëz Judé.

## 5

### *Biac tib men ne gacd grial*

<sup>1</sup> Goc palal dzew, laa stib lni nroob rac Jerusalén, dzigo n<sub>a</sub>cne güey Jesús Jerusalén stib.

<sup>2</sup> Ro guiedz Jerusalén, gax zaatne quia puert ne rded mëcwxii<sub>l</sub>, ga niaa tib pil nis rnee zho Betesd. Igo ro pil co niaa tib nsaap, rap nsaap co gaay arcw.

<sup>3</sup> Lo nsaap co, ga ndxie nzian men<sub>n</sub> rzacnë, no zho ro<sub>l</sub>d lo, no zho në ni, no zho ib gacd grial [grëse zho laa zho ndxie ga quiambëz zho gni lo nis ne no len<sub>n</sub> pil co,

<sup>4</sup> sac nac diidz poc poc riet tib xanj<sub>l</sub> Dios riesini lo nis co, dzigo zha ne znuse sëeb lo nis co, tel<sub>n</sub> pe guie<sub>l</sub>guiidz<sub>t</sub>aa rzac zho, riac zho].

<sup>5</sup> Ga nix tib m<sub>g</sub>ui, gocle gal<sub>p</sub>tsiipxon iz rzacnë me.

<sup>6</sup> Laa zeene gon<sub>n</sub> Jesús me, ni bin Jesús scataale nroob dze rzacnë me, rëb<sub>chaa</sub> Jesús lo me:

—¿Pe racladz luu guiaac luu?

<sup>7</sup> —Racladz naa —rëb<sub>n</sub> me—, per guie<sub>n</sub>d cho csëeb naa len<sub>n</sub> pil qui zeene laa lo nis rni. Zeene racladz naa sëeb naa, zhaale stib zha ne glo rzëeb.

<sup>8</sup> Dzigo rëb<sub>chaa</sub> Jesús lo me:

—¡Nasca zeena guche i! ¡Bzoli, bi yag ne bzhoob luu i, zeena bzë!

<sup>9</sup> Zigne sca rëb Jesús, laa men<sub>n</sub> co biac. Horcogazh blis me yag co, nzëni me laa me b<sub>r</sub>iee ga.

Ni ne dze co nac tib dze nda lo zha Israel,

<sup>10</sup> zeene gon<sub>n</sub> zho ney me yag ne bzhoob me, rëb<sub>chaa</sub> zho lo me:

—¿Pe rien<sub>n</sub>d luu nda nadze! ¡Lëda i gon<sub>n</sub> squi yquianlan<sub>n</sub> luu ncuaan<sub>n</sub> qui dze rii!

<sup>11</sup> Pquiab me rëb me:

—Men<sub>n</sub> ne beenguiac naa, mezhal në lo naa, güey naaw.

<sup>12</sup> —¿Cho men<sub>n</sub> sca në lo luu? —rëb zho.

<sup>13</sup> Niicle me rien<sub>n</sub>daque dien<sub>n</sub> chow, sac ndaldox miech ne ndxie ga; hor co laa Jesús bzëëble lad grë miech co.

<sup>14</sup> Haxta len<sub>n</sub> yadoora<sub>a</sub> b<sub>d</sub>zieel Jesús me, dzigo rëb<sub>chaa</sub> Jesús lo me:

—Nana gon<sub>n</sub> ne squi laa luu biacle, bien<sub>n</sub> gun<sub>t</sub>al<sub>d</sub>draa luu xto<sub>l</sub> luu. Sac tel<sub>n</sub>e gond luu diidz, nend dzigole glaan luu tib guie<sub>l</sub>guidz ne mazdraa ntseeb.

<sup>15</sup> Zeene laa me b<sub>r</sub>iee ga, güey me lo zha ne rnabey lo zha Israel ga, rëb me lo zho Jesús nac men<sub>n</sub> ne beenguiac me.

<sup>16</sup> Nacne psilo zho quianal<sub>n</sub> zho dien<sub>n</sub> zha gnaaz zho Jesús pe nacne run<sub>n</sub>guiac me miech dze nda.

<sup>17</sup> Blisqui zhow lo me, dzigo rëb<sub>chaa</sub> me:

—Tel<sub>n</sub> Pxoz naa gzataa dze quiayun<sub>n</sub> me dziin; ni mi<sub>n</sub>coque nac mi<sub>n</sub>e quiayun<sub>n</sub> naa.

<sup>18</sup> Zeene gon<sub>n</sub> zho sca rëb me, mazdraa blëe zho lo me rzac zho tebaa zha gutgazh zho me. Rlëe zho, sac zienal<sub>d</sub> me dien<sub>n</sub> pa dze nda; mazdraa zeene rëb me Dios nac Pxoz me, sac ga rlu me ne lalga nac me con Dios.

*Men<sub>n</sub> nroob nac Xpëed Dios*

19 Ni rëb me:

—Gneli naa lo to ganle: peet grieelod gun Xpëed Dios lega guicse me, sinque ncuaane ran me run Pxoze me, min co run me.

20 Nquialadzdox Dios me, grëtaa dziin ne run Dios rlu Diosa lo me; gane zun me milagr nroob ne mazdraa gzee zdoo to; ncuaane palalse i gon to niina ne biac men qui.

21 Sac telne gacladz me cueeban me tib mengut, zbeeban me zho, zigne rbeebanaque Pxoze me mengut.

22 Ni bzo Dios me, me gun guielwxtis,

23 zeena grëse miech guien ganle zigne nonaque Pxoze me, scaque men non nac me, ni sca none gunnon zho me. Sac tel zha ne gunnond me, yele Pxoze me ga (men ne pxeel me) runnond zho.

Ni rëb me:

24 —Gneli naa lo to ganle: Zha ne gliladz xtidz naa, ni gliladz zho men ne pxeel naa, laa zho bgaale tib guielmban ne gdziind dze lozh. Led yedraa zho ygaa guielnedox ne ygaa grëraa miech ntseeb; sac laa zho brieële lадznia guielgut ga, bdziin zho lo guielmban co.

25 Zdziin dze zeene ye grë mengut, zon zho xtiidz Xpëed Dios; ni grëse zha ne gzoobdiaga, zban zho. ¡Ni lëe dze co bdziin niina!

26 Sac gon, zigne rdeed Dios guielmban lo miech, scaque zrieelo gded naa guielmban lo miech.

27 Ni bzo me naa, naa gun guielwxtis, gded naa mine tsieguial tib tib miech.

28 ¡Gzeed zdoo to! Sac ne nligaa, zdziin dze, grëse mengut ne no len baa, laa zho grieeban

29 zeene gon zho tsi naa. Grëse zha ne ndzinli wban, hor co laa zho ygaa tib guielmban ndzon; sangue zha ne been guielntseeb, hor co laa zho guey lo guielnedox ne rieguial zho.

30 'Per grieelod gun naa guielwxtis naase, ib none gacnan Pxoze naaw. Grëse guielwxtis ne gun naa, laaw gun naa zigne gnabey Pxoze naa, laaw gun

naa zigne nonguieła, sac gon gun naa mine guiaabtaa guic naa, sinque laa naa gun mine racladz Pxoze naa.

31 'Telne niaca mine naase rne cho nac naa, zrieequia zha ne guiab niida.

32 Per na, no stib men ne rzeet naa lo miech; ni nan naa diidzli rnee me.

33 Haxta Juan Bautist, zeene pxeel to bla zha ne güeynabdiidz lo me, grëse mine rëb me lo zho ga, diidzliw.

34 Laa naa rzet min rii lo to, zeena gliladz to cho nac naa, zeena sca laa to lo xtol to; sac rquiindpaa dien cho miech guidzliu rii gnee cho nac naa.

35 Zeene biaad Juan, goc me zig tib biini bziini me lo to palal dze zeena gunbey to naa; ni bley to pquiaadiag to mine bnee me.

36 Nli bnee me cho nac naa; per grë milagr ne run naa min co quiaobenraa ganle cho nac naa. Pxoze naa rneedz diidz run naaw; ni ga rlu ganle ne me pxeel naa.

37 Haxta ye me mezhal quialu ganle cho nac naa, parga nli gard gan to me, niicle gard gon to tsi me.

38 Ronde to pe rnee me, sac rililadzde to naa; sac gon me pxeel naa zialne naa xtiidz me.

39 'Nli rioxco to rseed to grë guits ne ziaad Xtiidz me, sac rien to ga ziaad dien zha ygaa to guielmban ne gdziind dze lozh. Ni niicle ne lo co zhobnee ganle cho nac naa,

40 per nëde to gbig to lo naa, zeena ygaa to guielmban co.

41 Nëde to gunbey to naa, nëde to guien to cho nac naa, per peet nacd min co;

42 runbey naa to, ni lalnu rleyniede to Dios.

43 Sac gon, me pxeel naa zial naa lo to, ni rlëe to ran to naa; mazd zha ne lega ziaadse, zha cosi lëëlëd rcaania to zho.

44 ¡Min co gon, ib rililadzde to cho nac naa! Sac laa guic to zienie loxaque dien zha gunnon samiech to to, ib rguibde to zha gacnon to lo Dios.

45 Ni guiabde to togo naapaa gazo to lo Pxoze naa, glisqui naa grë ncuaane run to. Moisés gon nac men

ne glisquiw; sac ley ne psan me, mine rnalō to csilaa to lo xtol to, lëew glu ganle pe nac grëtaa ncuaane quiayun to.

<sup>46</sup> Sac gon, telne niaca mine nlipaa rliladz to grë mine pquiaa Moisés, zlliladz to dzigo cho nac naa; golgan ganle, lo grë guits ne pquiaa me, ga rzeet me naa.

<sup>47</sup> Rlu rliladzde to grë mine pquiaa Moisés ga, gane rliladzde to mine rne naa lo to.

## 6

### *Row gaay mil miech*

(Mt. 14:13-21; Mr. 6:30-44; Lc. 9:10-17)

<sup>1</sup> Bded ga, tib dzew brieë Jesús bdedquia me nëz dan ro Nisdoo Galilé (lëëque nisdoo co ga rnee zho Nisdoo Tiberias).

<sup>2</sup> Miech guizhiu ne brieenal zhits me, sac ziyan zho grëtaa milagr ne run me, runguiac me grë men rzacnë.

<sup>3-4</sup> Nzian zho nac zha ne zie lni Pascw, lni nroob ne rac Jerusalén gzobse iz.

Grëse no ne nac no xpëedscuel me, laa no nal zhits me. Zeene bdieedquia no ro nis co, dzigo bdzieep no tib cho gui win zob gax ga. Loxaque laa no bzioob ga grë no me,

<sup>5</sup> zeene bdzion no miech guizhiu ne ziaadquia cho gui co, laa zho glansole lo no ga. Dzigo rëbcha me lo Lip:

—Lip, ¿pa guioziu ne ncuaane gow grëtaa miech qui?

<sup>6</sup> Per lega scase rëb me lo Lip, par dien pe guiab Lip; sac nanle me pe nac ncuaane gun me.

<sup>7</sup> —iNe nligaa pe zhidaa zho! —rëb Lip—. Niicle telne niaca mine gziuu nzian gayoo quietxtil, ni ygaad ncuaan co yгаа zho tiblë wingaw tib tib zho.

<sup>8</sup> Dzigo pquiab Ndrés, bets Pedr, stib zha ne nacgza no; rëb Ndrés:

<sup>9</sup> —Nu zo tib mëëdbgui win ney gaay quietxtil cebad ni schop mel win. ¿Per pa yгаа ncuaan co lo grëtaa miech qui?

<sup>10</sup> —Golnee lo zho dien —në me lo no—. Golguiab lo zho sob zho.

Ndzon zëeb guizh nguia ga, dzigo laa grë miech guizhiu co bzob lo guizh nguia co (zig gaay mil rgaa loxaque zha bguise).

<sup>11</sup> Dzigo bnaaz me gza quietxtil co, bdeed me xquizh lo Dios. Blozhse ga, zigse rneedz mew lo no scase scase rguiz now lo grë miech co; scaque been me grop mel co. ¡Grëse miech co, dow zho zaatne bieltaa zho!

<sup>12</sup> Blozhse dow zho, nëchaa me lo no:

—¡Goltsietop grëse mine biaan i, zeena nitloda!

<sup>13</sup> Psilo no ptop no grë quietxtil ne biaan ga, zeene blozh bdopa, ilo gaay quietxtil cebad co, biodzë tsiipchop chicuid biow!

<sup>14</sup> Zeene gon grë miech co milagr ro ne been Jesús ga, rneechaa zho:

—iNe nlipagaa, lëe men qui ga quiambiaaz ne! ¡Me nac Men ne zëëble diidz ga cxeel Dios lo guidzliu guiadteed xtiidz me!

<sup>15</sup> Bienga Jesús racladz zho, zhoo tsienie zho me gac me zhirey zho, nacne bzoquia me guic gui win co, tipse me.

### *Rzë Jesús lo nis*

(Mt. 14:22-27; Mr. 6:45-52)

<sup>16</sup> Rguetsle liuw, bzhiuxto no dan bdziñ no ro nisdoo co; ga bliaaz no me.

<sup>17</sup> Bdzionse no choot rlansod ni laa liu rcowraa, dzigo mazd laa no bziaab len canó, laa no zio nëz Capernaum.

<sup>18</sup> Laa no zionie canó co lo nis, tibaque zeene psilo rrieë me, ntseeb riasoli lo nis co.

<sup>19</sup> Maase gaay kilómetro o xoop-gaaw goc zio no, tibaque zeene bdzion no laa me ziaad-zë lo nis co, gaxle lo no ga. Zeene bdzion no sca ziaad-zë me lo nis, bdzieeb no.

<sup>20</sup> Dzigo bnee me, në me lo no:

—¡Gdziebde to! ¡Naa zial nu!

<sup>21</sup> Dzigoraa rley no bdzion no laa me bzëeb len barcw; tibaque zeene bien no laa no brieequiale zaatne no gdziñ no ga.

22 Biini liu co, grë miech ne biaan stib nêz ro nis co, laa zho bdziñ zaatne nac ro nis ga, quiambêz zho gan zho me. Sac gon zho tibaque barcw zo ga, ni zeene wbii no ga, loxaque nose wbii.

23 Gax zaatne bguiaan me zho ga, ga bdziñ bla barcw ne ziaad nêz Tiberias;

24 dzigo gonse zho niicle me niicle no ne nac no xpëedscuel me, choot guiend ga, nacne bzëëbaque zho len barcw ne bdziñ ga ziaad zho nêz Capernaum.

*Jesús nac men ne rdeed guielmban*

25 Zeene blanso zho Capernaum, laa Jesús zole lo no ga; dzigo rëbchaa zho lo me:

—Maestro, ¿pa horzhe waa blanso luu nu?

26 Dzigo rëbchaa me:

—¿Naa lëë ziaadguib to? Per ziaate to porne rien to cho nac naa, sinque laa to ziaad porne gon to bnedz naa ncuaane pquiin to.

27 ¡Golguien, tsienied guic to loxaque ncuaane gowse to, sac znuse rnitlo grë ncuaan co! Sinque, goltsoxco golgun mine racladz Dios, zeena ygaa to tib guielmban ne ib gdziñd dze lozh. Ni naa ne nac naa Mgui ne pxeel me, naa gneedz guielmban co lo to; sac ible min co pxeel me naa.

28 Dzigo bnabdiidz zho lo me, rëb zho:

—¿Zha dzigo dziuun no mine racladz Dios? ¿Pe nac ncuaane dziuun no?

29 Pquiab me rëb me:

—Mine racladz Dios gun to: gliladz to cho nac men ne pxeel me.

30 —Telne scaw —rëb zho—, none dzianlo no gun luu nzian milagr, zeena gliladz no luu. ¡Nligaa peet milagr nroob gard dzian no gun luu!

31 Tel grë pxozgol ne, zeene wban zho grë dan bidz co padzeela, gzobse dze biet tiblo quietxtil zhan gbaa, dow zho; rnee lo Xtiidz Dios: “Moisés rdeed quietxtil co lo zho.”

32 Pquiab me rëb me:

—Golgacnan ganle led Moisés bdeed quietxtil co, sinque Pxoz naaw. Ni niina gon laa me quianeedz merpaa quietxtil gbaa lo to.

33 Sac gon, me pxeel men ne biet gbaa ziaddeed guielmban lo grë miech rii; men co nac quietxtil gbaa co.

34 —Been tib guielnzaac sca —rëb zho—, ¡gzataa dze bneedz quietxtil co dioow no!

35 Pquiab me rëb me:

—Naa gon nac quietxtil ne rdeed guielmban ga. Grëse zha ne gbig lo naa sëëb zho xnêz naa, gdziñdraa dze ne ycaabedz zho; grëse zha ne gliladz cho nac naa, gdziñdraa dze ne gnab zhis zho.

36 Laa to gon, zigne bnelegaa naa lo to ga, ¡niicle ran to naa, per rliladzde to cho nac naa!

37 Grëse zha ne rxeeł Pxoz naa, rlanso lo naa; ni tib zho ctsireed naa.

38 Sac gon, laa naa bieet gbaa zialgun naa mine racladz Pxoz naa (men ne pxeel naa); bieete naa par gun naa mine gacladztaa naa.

39 Ni mine racladz me, grëse zha ne bneedz me lo naa, ni tib zho nitlod, sinque cueeban naa zho gal dze ne laa guidzliu nitlo.

40 Sac racladz me: grëse zha ne gbig lo naa ni gliladz zho naa dib zdoo zho, grëse zho ygaa tib guielmban ne ib gdziñd dze lozh, ni cueeban naa zho gal dze ne nitlo guidzliu.

41 Dzigo psilo grë zha Israel rneenë zho me, loxaque ne rëb me, me nac quietxtil ne biet gbaa;

42 rnee zho:

—Men rii ga name rnee zho Jesús, me nac xingan José. Rdziuunbey ne xnial me, rdziuunbey ne pxoz me. ¿Zha nac dzigo ne rnee me gbaa biet me?

43 Dzigo rëbchaa me lo zho:

—Lëëwga na, golsioog ro to. Nodne squitaa gzee zdoo to min co.

44 Laa Pxoz naa pxeel naa zial naa lo guidzliu, per ni tib miech gon grieelod gbig lo naa telne niaca mine cuedzd me zho; ni zig rnele naa ga,



zha ne gbig, naa cueeban zho gal dze ne laa guidzliu nitlo.

<sup>45</sup> Znu rnee lo Xtiidz Dios, zaatne pquiaa grë zha ne biadteed xtiidz me padzeela, rneew: “Laa Dios cseed grëse miech.” Ni lëe miñ co rac niina; gacxe nagon waa, grëse zha ne rquiaadiag miñe rnee Pxoz naa ni rseed zhow, grëse zha co lo naa rlanso zho.

<sup>46</sup> Zha ne rlanso lo naa, guiabde to togo gonlo zho me; ni tib choot gard gan me, naase nac men ne ziyan me, sac zaatne no me ga brie naa zial naa lo to.

<sup>47</sup> Golliladz miñe gni naa lo to nu sca: ¡Grëse zha ne dib zdoo zho gliladz zho cho nac naa, zgaa zho tib guielmban ne gdzindraa dze lozh!

<sup>48</sup> Ne nligaa naa nac guietxtil ne rdeed guielmban ga.

<sup>49</sup> Grë pxozgol to, zeene sca bio zho grë dan bidz co, nli dow zho guietxtil ne biet gbaa ga, per bdeetew guielmban lo zho, sac grëse zho gut.

<sup>50</sup> Sangue guietxtil ne rne naa lo to, gbaa bieta ni grëse zha ne yquiina zgaa zho tib guielmban ne gdziñd dze lozh.

<sup>51</sup> Xcuerp naa nac guietxtil ne biet gbaa, miñe rdeed guielmban ga; grëse zha ne gow guietxtil co, zgaa zho tib guielmban ne gdziñd dze lozh. Lëew gded naa zeena grieelo yгаа grëse miech lo guidzliu rii stib guielmban.

<sup>52</sup> Psilo grë zha Israel co stib, quia-neelsa zho, rnee zho:

—¿Zha nacne squi rnee men qui? ¡Zootne rnee me none dioow ne xcuerp me!

<sup>53</sup> —Gneli naa lo to ganle —rëb me—, telne gowde to xcuerp Mgui ne pxeel Dios, ni guiede to xchen me, ygaade to stib guielmban co.

<sup>54</sup> Sangue zha ne gow xcuerp naa, ni guie zho xchen naa, ib zgaa zho guielmban ndzon ne gdziñd dze lozh ga, ni naa cueeban zho gal dze ne laa guidzliu nitlo;

<sup>55</sup> sac xcuerp naa nac miñe mazdraa rquiin gow miech, ni xchen naa nac miñe mazdraa rquiin guie zho.

<sup>56</sup> Grëse zha ne row xcuerp naa, ni rie zho xchen naa, mbannie zho naa, niiclegaa naaw mbannie naa zho.

<sup>57</sup> Men mban nac Pxoz naa, men ne pxeel naa, me nac men rneedz guielmban lo naa; ni scaquegaa zha ne gow xcuerp naa, naa gded guielmban lo zho.

<sup>58</sup> Naa nac guietxtil ne nlipaa biet gbaa. Grëse zha ne gow guietxtil rii, zgaa zho guielmban; led yed zho guet zig gut grë pxozgol to, zha ne sca dow guietxtil co.

<sup>59</sup> Lëe grë miñ rii bnee Jesús zeene pseed me miech len yadoo win ne zob Capernaum.

### *Diidz ne rdeed guielmban*

<sup>60</sup> Nzian grë zha ne rzënie Jesús, zeene bin zho grë miñe bnee me ga, rneechaa zho:

—Zha ngandoxtaa nac grë diidz ne rnee me i. ¡Cho gnë dien pe bnee me!

<sup>61</sup> Bien Jesús sca nonee zho, dzigo rëbchaa me lo zho:

—¿Pe rlëe guic to bin to miñe rne naa ga?

<sup>62</sup> ¿Pe guiabzhe to dzigo zeene gan to laa Mgui ne pxeel Dios soquia gbaa, gbiire guey me zaatne no me glo?

<sup>63</sup> Espíritu Sant rneedz guielmban lo to, telne guiend espíritu peet nond xcuerp to, sac bëelse naca. Ni grë diidz ne bne naa lo to, lëew nac Espíritu, ni lëew gneedz tib guielmban ne gdziñd dze lozh lo to;

<sup>64</sup> sinque to, bii no zla to rliladzd cho nac naa.

Sca rëb me sac desde psilo bzënie zho me, rienle me cho nac zha ne ib rliladzd me, ni cho nac zha ne tsieto me.

<sup>65</sup> —Runbey naa to —rëb me—, gane ni naa lo to ni tib miech grieelod gbig lo naa sëeb zho xnëz naa, telne niaca miñe cuedzd Pxoz naa zho.

<sup>66</sup> Nzian zha ne rzënie me, hor co laa zho bzoit lo me, bzëniedraa zho me.

<sup>67</sup> Dzigo bnee me lo no gza tsiipchop no ne nac no xpëedscuel me, në me:

—To waa, ¿pe led yede to racladz gbiche lo naa?

<sup>68</sup> Pquiab Simón Pedr, rëb Simón:

—¿Per cho lora nadien guio no? Luuse nac men ne rseed miech diidz ndzon ne rdeed guielmban ne gdziind dze lozh.

<sup>69</sup> Laa no bliladzle cho nac luu, laa no gocndionle ne luu nac Men Ndzon ne pxeel Dios.

<sup>70</sup> —Nliw —rëb me—, ni naa bzooblo to gza tsiipchop to, per na gon laa tib to bzëëble xnëz mendox.

<sup>71</sup> Zeene sca rëb me, lëele Judas ga bzeet me (zhin Simón Iscariot); sac ye Judas nacgza no lo tsiipchop no ne bzooblo me ga, ni Judas nac zha ne güeyto me.

## 7

### *Rliladzd menlidz Jesús cho nac me*

<sup>1</sup> Bded ga, loxaque grë guiedz ne ndxie xtan zha Galilé, gase rieted Jesús. Sac grë zha Israel ne no xtan zha Judé, zha ne rlëë lo me, racladz zho gut zho me.

<sup>2</sup> Laa zeene bdziñ dze ne run zha Israel lni ne rzhixcuua zho grë yu guizh, ni rbëz zho lena;

<sup>3</sup> rëbchaa zha bets me lo me:

—¿Pe nacne ib rried luu nu? Brie zho, güey dib xtan zha Judé, zeena ye grë zha ne racnie luu ga gan grëtaa ncuaañe run luu.

<sup>4</sup> Sac gon, zha ne racladz gunbeyraa miech zho, grë ncuaañe rac zho, rund zhow ngeets zhliaan zigne run luu. Rac luu name run luu grë milagr nroob, beena zaatne gan nzian miecha.

<sup>5-6</sup> Sca rnee zho lo me, sac niicle zha rliladzd cho nac me; dzigo rëbchaa me:

—Grieelod ga naa niina, sac gard gdziñ dze co; zhaa nac to, zac tsie to zeene gacladztaa to.

<sup>7</sup> Tel to, rlëënie miech to; sangue naa rlëënie zho naa, sac rne naa lo zho pe nac grë guielntseeb ne run zho.

<sup>8</sup> Goltsie, tedse lni rii dzigo ga naa; sac gard gdziñ dze ne glu cho nac naa.

<sup>9</sup> Dzigo laa me biaan ga.

<sup>10</sup> Per loxaque brie zho zie zho, yeque me brie zie me; lëëraasi ngeetsse bdziñ me.

<sup>11</sup> Grë zha Israel ne rlëë lo me, quiaguib zho me lo lni co.

—¿Bay yo men co? —rnee zho—. ¿Pe nacne ib choot gard dzian me?

<sup>12</sup> Grë zha ne ndxie lo lni, loxaque me rzeet zho. No zho rnee: “Tib miech wen nac me”; nogaa zho rnee: “Pe miech wen na zho gac me, loxaque noquidie me miech.”

<sup>13</sup> Per zhliaanse rzodiidz zho rzeet zho me, sac rdzieb zho grë zha Israel ne rlëë lo me.

<sup>14</sup> Goc chop tson ngbidz ne noyac lni, tibaque zeene laa me bzëëb len yadoo nroob ne zob lad guiedz ga, psilo me pseed me grë zha Israel ne no len yadoo ga.

<sup>15</sup> Zeene gon zho zha rseed me, rzee zdoo zho rnee zho:

—¿Zha nac squitaa rac men qui, ni laa me pseete me grë zhiwseed yadoo?

<sup>16</sup> Pquiab me rëb me:

—Led naad nobeebey grë mine quiaseed naa miech, sinque laa naa quiaseed zho mine rnabey men ne pxeel naa.

<sup>17</sup> Telne yquiabladz to gon to mine rnabey me, ga guien to dien pe nli xtiidz Dios rseed naa miech, te mine riab guic naaw ye.

<sup>18</sup> Sac grë zha ne rnee grë mine riab guicse zho, laa zho runa zeena gacnziuu zho lo miech; sangue zha ne rioxco glu ne non men ne pxeel zho, zha cosi niapse diidzli rnee zho, rund zho ne yquidie zho miech.

<sup>19</sup> Laa Moisés psan ley lo to, per, jni tib to gon zienald mine rnabeya! ¿Pe nac dzigo racladz to gut to naa?

<sup>20</sup> Pquiab be grë miech co, rëb zho:

—¿Mendzable i gon noguitnie guic luu! ¿Chozhe racladz gut luu?

<sup>21</sup> Rëbchaa me:

—Tib vuelt, loxaque gon to beenguiaac naa tib men rzacne dze ne rdziiladz to lo dziin, na grëga to squitaa rac lo naa.

<sup>22</sup> Ni to gon, no hor par gon to mine rnabey ley run to dziin dze co; zig nac zeene rio tib mēed bey (niicle ne rirole pxozgol to bey co, zeene laa ley biaan).

<sup>23</sup> ¡Gase na ganle golwi! Rquia to rgo to tib mēed bey haxta dze ne rdziiladz to lo dziin, loxaque par quiitsde to xley Moisés. ¿Pe nac dzigo ne rlēe to lo naa loxaque ne beenguiac naa tib miech dze co?

<sup>24</sup> Golguien ganle, nonguield ne lega gdziibdoḷ to tib miech. Goltsoxco goltsienal mine nac diidzli.

### ¿Cho nac Jesús?

<sup>25</sup> Blalaa men Jerusalén ndxie ga, dzigo psilo zho rnabdiidzlsa zho rnee zho:

—¿Pe led men riid ga zho scataa quiaguib zho gut zho?

<sup>26</sup> Pa zotaa me gon quianee me lo grē miech qui, ni choot peet rund me. ¿Pe goon bliladzle zhiwxtis ne naye ne me nac Men ne zēēble diidz ga guiaad lo guidzliu?

<sup>27</sup> Per gacda men qui. Tel men quiw, rdziuunbey ne me, ndion ne cho zha nac me; sangue Men ne zēēble diidz guiaad ga, zeene gal dze ne laa me guiaad, choot gacnand dien cho zha me.

<sup>28</sup> Bin Jesús sca nonee zho. Squi ndxie grē zha ne noquiaadiag zhiwseed me len yadoo ga, nguiedz bnee me rēbchaa me:

—Ah, conque runbey to naa dzigo, ¡nan to pa nēz zial naa! Per led zhaald naa gon zial naa, no tib men ne pxeel naa per runbeyde to me; men co nac men ne rnee niapse diidzli.

<sup>29</sup> Sangue naa runbey naa me, sac lo me brie naa, me pxeel naa zial naa lo to.

<sup>30</sup> Dzigo gocladz zho naaz zho me ga, per ni tib zho wbigd nzhen zho me; sac gard gal dze co.

<sup>31</sup> Grē zha ne ndxie ga, ndal zho bliladz me.

—Telne led med nac Crist —rnee zho—, niacxe zun me grētaa milagr nroob ne run me. ¡Tsodraa zha ne gon grētaa milagr ne run me!

<sup>32</sup> Bin zha farisé nozeet grē miech co Jesús, dzigo bnediidzaque zho grē zho pxoz ne rnabey, pxeel zho bla zhaguiib zie zienaaz me.

<sup>33</sup> Bdziñ grē zhaguiib co, rēbchaa me lo zho:

—¡Golxecw zniip! Zhile dze ne cuēz naa lo to; ib laa naa none gbiire guia naa lo men ne pxeel naa.

<sup>34</sup> Zguib to naa, per gdzieldraa to naa, ni grielod gdziñ to zaatne guia naa.

<sup>35</sup> Grē zha ne ndxie ga, zeene bin zho sca rēb me, rzee zdoo zho.

—¿Pa naczhe zaatne tsie me? —rnee zho—. ¿Zha nacne ib gdziel ne me? Nend grē zha ladz ne tsieeed me, grē zha ne no stib ladz ben.

<sup>36</sup> ¿Zha nacne rnee me, zguib ne me per gdziel me lo ne, niicle grielodgaa guio ne zaatne guey me?

### Nis ne rdeed guielmban

<sup>37</sup> Zeene gol dze ne laa lni co lozh (dze co nac dze ne mazdraa nroob), miech guizhiu ne ndxie; dzigo nguiedz bnee Jesús lo grē miech co, rēb me:

—Grēse zha ne racladz guiaanwen zdoo, rzac zho zig nac zeene rnab zhis zho, guiaad zho lo naa, naa gded nis ne guie zho.

<sup>38</sup> Sac grēse zha ne dib zdoo gliladz cho nac naa, rnee lo Xtiaz Dios, masaque rriequia tib nis ndzon ne gdzib zdoo zho, pale tib guiubee nroob; nis co gdeed tib guielmban cub lo zho.

<sup>39</sup> Sca bzeet Jesús Espíritu Sant. Ga bzeet me, grēse zha ne gliladz cho nac me zacnie Espíritu Sant zho. Gard guiaad Espíritu Sant len dze co, sac gard gbire Jesús lo guielndzon ne no me gbaa hor co.

<sup>40</sup> Blalaa zha ne ndxie ga, zeene bin zho sca bnee me, rneechaa zho:

—Ne nlipagaa, lēe men qui ga no guiaad antes ne glanso Men ne nacle diidz cxeel Dios ga.

<sup>41</sup> Rriequia zla zha ne rnee:

—¡Lēda! ¡Lēegazh me i! Men qui nac Men ne zēēble diidz ga cxeel Dios guiaad lo guidzliu.

Rquiab zla zha ne rnee:

—Men Galilé nac men qui. ¿Niacxe lo xtii grë zha co grieequia Men ne cxeel Dios ga?

<sup>42</sup> Pe led rnee lo Xtiidz Dios lo xtii rey David, ga grieequia me ni Belén ga gal me, zaatne gocaque ladz rey David.

<sup>43</sup> Zhaase zhaase rnee zho; leḷ psilo zho nodil diidz zho dien cho nac me.

<sup>44</sup> Brieequia bla zho gocladz naaz me, per ni tib zho wbigd nzhen zho me.

<sup>45</sup> Grë zhaguiib ne zienaaz me ga, scase zho laa zho bdziḷ. Zeene gon grë pxoz rnabey co, grë zha farisé co choot bdziḷnied zho, rëbchaa zho:

—¿Pe nac dzigo ne ziaadniede to me?

<sup>46</sup> Pquiab zho rëb zho:

—¡Waltaa gard dzian no tib men ne scataa ndzon rnee!

<sup>47</sup> Rëbchaa zha farisé:

—¡Pe nlipaa rnee to! ¿Yelaque to dzigo beengüet me?

<sup>48</sup> ¿Pe rwide to, niicle zhiwxtis new, niicle now, ni tib choot rliladz ne me nac Men ne zëeble diidz cxeel Dios ga?

<sup>49</sup> Grë zha nxen ne rliladz ne nli Dios pxeel me, ¡miech ndziibdeele nac zho, sac gon rienḷd zho zha rnee lo ley!

<sup>50</sup> Ga zob Nicodem, men ne güeyzodiidznie Jesús ga glo, ye me nacgza grë zha rnabey co, dzigo guso me bnee me lo zho, rëb me:

<sup>51</sup> —Golguien ganle nonguielḷda ne lega pe gnee ne. Sac gon, zig nac xley ne, rnabeya none gacndiongazh ne zha nac xtiidz tib miech, dien pe nac mine quiayun zho, dzigoraac gac guielwxtis.

<sup>52</sup> Pquiab zho rëb zho:

—¿Zootne ye luu lëe nacgza grë zha Galilé ne rleyne me? ¡Grë zha ne cxeel Dios, ni tib zho grieequiad Galilé! ¡Luuzhal bguiba lo grë guits ne ziaad Xtiidz Dios ganle, zeena gliladz luu!

<sup>53</sup> Blozh ga, grëse zho laa zho wbi, tib tib zho zeyse zho lidz zho.

<sup>1</sup> Ga briece Jesús güey me zaatne rnee zho Gui Oliv.

<sup>2</sup> Zeene biini liu co, silgaw laa me bdziḷ len yadoo co stib. Nzian miech ne goclo lo me ga, nacne bzob me psilo me pseed me zho.

<sup>3</sup> Laa me noseed grë miech co, zeene bdziḷ bla maistr ley, ni zla zha farisé, bdziḷnie zho tib wnaa ne nole tsieel ni bgaanie me stib mgui; dzigo bzo zho wnaa co glowtaa lo grë miech ne ndxie ga.

<sup>4</sup> —Maestro —rëb zho lo Jesús—, laa wnaa rii bgaa nonie me stib mgui.

<sup>5</sup> ¿Pe gnë luu dien zha gac me? Sac zig nac ley ne psan Moisés, rnabeya gdeedquie no grë wnaa ne squi nac, haxta guet zho.

<sup>6</sup> Sca rëb zho, sac laa zho quiaguib dien zha cxiḷ me tib diidz, zeena sca grieelo tsiezo zho me lo wxtis. Per zeene bin me sca rëb zho pquiit-srunga me liu, psilo me con mzhugnia me noquiaa me lo liu.

<sup>7</sup> Raḷ zho rquiabd me, wbiire zho bnabdiidz zho lo me stib; haxta blis lo me, rëb me lo zho:

—Peet nacda, goldeedquie me. ¡Lëeraasi, zha ne rien ni tib dolḷ rapd, zha co csilo gdeedquie me!

<sup>8</sup> Blozh ga biire pquiitsrun me, psilo me stib noquiaa me lo liu.

<sup>9</sup> Zeene bin zho sca rëb me, mazd mine been zho laa zho briece ga, sac bien zho miech ngoopdolḷ nac zho. Zha ne nacpaa zha gol lo zho bner, blozh ga zo zo briece zho grë zho; lox- aque wnaa cose biaan ga.

<sup>10</sup> Dzigo bzoli me, rëb me lo wnaa co:

—¿Yo grë zha ne scataa biaad-zo luu nu? ¿Ni tib zho lëe beenquizhd luu xtolḷ luu?

<sup>11</sup> —Ni tib zho —rëb wnaa co.

—Niicle naa —rëb Jesús—, gunquizhd naa luu xtolḷ luu. Bzë, per bien gbiiredraa luu gun luu grë ncuaane gunctal xtolḷ luu.

*Jesús nac zig tib biini*

<sup>12</sup> Bded ga, tib dze nonee Jesús lo grë zha ne noquiaadiag zhiwseed me, rëb me lo zho:

## 8

*Tib wnaa ro nëz*



—Nac naa zig nac tib biini ne rziini lo miech. Grëse zha ne gbig lo naa, led yed zho soriel ni lo ncow, sac naa gziini lo zho zeena yгаа zho tib guielmban ndzon.

<sup>13</sup> Zeene bin zha farisé sca rëb me, psilo zho nguiedz roptsie zho rnee zho:

—¿Cho gliladz xtiidz luu! ¿Lëëque luu rnee cho nac luu!

<sup>14</sup> Pquiab me rëb me:

—Niicle ne naaque rne dien cho nac naa, per diidzli nac mine rne naa. Rien naa pa nëz zial naa, pa nëzгаа za naa; sangue to gon peet riende to,

<sup>15</sup> gacxe waa, rcaadzdoł to naa ncuaane ni nacd naa; ncuaane rcaadzdoł to naa, niapse guic to riaba. Tel naa, zig nac niina noyund naa guielwxtis

<sup>16</sup> per zeene gdziñ dze co, tib tib miech mine been zho miñ co glu dien pe nac mine tsieguial zho; sac Pxož naa meñ ne nacie naa, me gnë zha gun naa guielwxtis.

<sup>17</sup> ¿Pe nacne riladzde to mine rne naa? Led rnee lo xley to zeene tipse rzë xtiidz chop miech, ga rlu ne diidzli rnee zho.

<sup>18</sup> Zig nac niina, naa nac tib zha ne rne cho nac naa, laa stib zho nac Pxož naa meñ ne pxeel naa; sac gon ye me rnee ganle cho nac naa.

<sup>19</sup> Pquiab zho rëb zho:

—¿Yo Pxož luu na? ¿Pa no me?

—Runbeyde to me —rëb Jesús—, sac niicle naa runbeyde to naa. Telne niaca mine runbey to naa, runbeyle to me na.

<sup>20</sup> Gax zaatne riesan miech gon len yadoo nroob ne zob lad guiedz Jerusalén, ga zob Jesús zeene sca rëb me; per choot bnaazd me, sac gard gal dze co.

### *Grieełod gdziñ to zaatne guia naa*

<sup>21</sup> Bded ga, biire Jesús rëb me:

—Laa naa guia nagon. Squiguib to naa, per lëëque lo xtol to i nitlo to, sac zaatne guia naa grieełod gdziñ to ga.

<sup>22</sup> Grë zha Israel ne ndxie lo me ga, rneehaa zho:

—¿Pe goon lëëque me naye gut me? Zha nacne squi rnee me goon grieełod gdziñ ne zaatne guey me.

<sup>23</sup> —Tel to —rëb me—, zha nëz lo guidzliu nac to; laa naa gon zha nëz gbaa nac naa. Men guidzliu rii nac to, sangue naa nacd naa zha guidzliu rii.

<sup>24</sup> Gane ni naa lo to lëëque lo xtol to i nitlo to. Ne nligaa, telne gliladzde to ne naa nac meñ ne nac naa, ible lëëque lo xtol to nitlo to.

<sup>25</sup> —¿Cho dzigo nac luu? —rëb zho.

Rëbchaa me:

—Blactaale rne naaw lo to. Haxta zeene psilo naa xtsiñ naa, laa naa rne lo to ganle cho nac naa.

<sup>26</sup> Ndal grë ncuaane zac glisqui naa lo to nu niina, ni ndal ncuaane racladz naa gne naa lo to, per laa naa noyund mine rnabeyse meñ ne pxeel naa; ni meñ co nac meñ ne rnee diidzli.

<sup>27</sup> Per ib riend zho ne Dios ga rzeet me lo zho.

<sup>28</sup> Dzigo bnee me lo zho stib, rëb me:

—Nieeda gal dze ne yquiaa to naa tib lo yag, dze co gunbey to ganle ne naa nac Mgui ne pxeel Dios ga, dze co guien to ganle led guicd naa riab grë mine quiayun naa; sinque mine pseed me naa, miñ co rne naa lo to.

<sup>29</sup> Dios pxeel naa ni tibaque nacie me naa, ib rsaand me naa, sac tibaque noxco naa run naa mine rdziladz me.

### *Zha ne nac xpëed Dios*

<sup>30</sup> Grë zha Israel ne ndxie ga, zeene bin zho sca rëb me, bliladz zho ne me nac meñ ne no cxeel Dios ga.

<sup>31</sup> Dzigo bnee me lo zho, rëb me:

—Telne racladz to gac to xpëedscuel naa, zha ne nlipaa ygab xnëz naa, none guiaadnal to grëse zhiwseed naa.

<sup>32</sup> Sac sca gunbey to mine nacpaa diidzli, ni lëew glu lo to zha laa to ne squi nac to zig tib ngundziin.

<sup>33</sup> Pquiab zho rëb zho:

—¿Ngundziin ye! ¿Tel no, zha xtiipaa Abraham nac no, wlałtaa gard gac no ngundziin lo miech! ¿Pe lo dzigo laa

no, ne rnee luu laa xtiidz luu csilaa no?

<sup>34</sup> Dzigo rëbchaa me:

—Golquiaadiaga ganle: zha ne tibaque noyuntal xtol, rrieequiacxe waa tib ngundziin nac zho lo dol ga, sac lëëlew rnabey zho.

<sup>35</sup> Ni zha ne nac ngundziin lëë, zig run miech nëz rii, grieelod xoon zho lo men ne rree zho; sangue zha ne nac mëëd, choot lo ngadood zho.

<sup>36</sup> Gacxe waa, tel csilaa Xpëëd Dios to, dzigosi choot lo ngadoodraa to.

<sup>37</sup> Nli lo xtii Abraham ziaad to; per laa to quia gon quiaguib to dien zha gut to naa, sac racladzde to yquiaadiag to zhiwseed naa.

<sup>38</sup> Laa naa rne grë mine blu Pxoza naa lo naa, zeene no naa lo me; sangue to gon, laa to zienal mine rnabey men ne nac pxoz to.

<sup>39</sup> Pquiab zho rëb zho:

—iNi Abraham gon nac pxoz no!

—iNlid ga nagon! —rëb me lo zho—. Telne niaca mine nli zhinpaa Abraham nac to, zun to grë mine been me.

<sup>40</sup> Per na gon lel racladz to gut to naa, loxaque ne rseed naa to mine nac diidzli, mine blu Dios lo naa. iTel Abraham led squid been Abraham!

<sup>41</sup> Ni lalnu zienalde to mine been Abraham, sinque laa to noyun mine run zha ne nlipaa nac pxoz to.

Pquiab zho rëb zho:

—iLed-xe mëëd ro nëzd no waa! Tibaque men ne nac pxoz no, ni lëë men co nac Dios.

<sup>42</sup> Dzigo rëbchaa me lo zho:

—Telne niaca mine nli zhin Dios nac to, nleynie to naa, sac gon lo me brie naa zial naa lo to nu. Led zhaald naa zial naa, me nac men ne pxeel naa.

<sup>43</sup> Ib riogicde to zha nac grë mine rne naa, ib riende tow, sacne ib nëde to yquiaadiag tow.

<sup>44</sup> Golgacnan sca ganle, lëë pxoz to ga gon nac mendox, lo ma ngab to, gacxe waa rdziladz to run to grë ncuane run ma. Tel mendox, haxta zeene biaan guidzliu tibaque nonitlo ma miech, ni ib rneed ma mine nac diidzli, sac ib nand ma zha nac diidzli.

Ible lëë xtsiin ma ga nac guielwquidie, gacxe waa ma nac pxoz zha ne rquidie.

<sup>45</sup> iMin co nagon, niicle diidzli nac grë mine rne naa lo to, per ib riladzde tow!

<sup>46</sup> Ni tib to choot grieelod gnë laa naa noquidie, sac niapse diidzli rne naa. iPe nac dzigo riladzde to mine rne naa?

<sup>47</sup> Grëse zha ne nlipaa ngab xnëz Dios, rley zho rquiaadiag zho xtiidz Dios; per to gon led xnëzd me ngab to, gacxe waa nëde to yquiaadiag tow.

<sup>48</sup> Horco pquiab zho rëb zho lo me:

—iPsioog ro luu men Samar ngoop-dol! iNlique mine rnee no ga nagon, ne mendox noguitnie luu!

<sup>49</sup> —Choot mendzab noguitnied naa —rëb Jesús—, sinque laa naa noxco xobnen ganle pa lotaa men nroob nac Pxoza naa; laa to gon lel rsanwin to naa.

<sup>50</sup> Noguibd naa dien zha guiaanon naa, per Dios gon racladz me ne sca gaca; ni mesi nan me pe run me.

<sup>51</sup> Gneli naa lo to ganle: iGrëse zha ne gzoob xtidz naa, gdzind dze ne guet zho!

<sup>52</sup> Pquiab zho rëb zho:

—iPer nlique nagon mendox noguitnie luu! Zig nac Abraham name gut me, grë zha ne biadteed xtiidz Dios ne, grëse zho gut zho. iZha nac dzigo rnee luu, zha ne gzoob xtiidz luu, gdzind dze guet zho?

<sup>53</sup> iPe mazdraa dzigo nac luu lo pxozgol ne Abraham, lo grëga zha ne biadteed xtiidz Dios ga? iCho rzac luu nac luu?

<sup>54</sup> Rëbchaa me:

—Telne lëëque naa noyunnon naa, nlid mine rne naa dzigo. Per na gon, Pxoza naa, men ne nac Dios ne rnee to riladz to, me rlu ganle ne nli men non nac naa.

<sup>55</sup> Tel naa runbey naa me, ni run naa mine rnabey me; sangue to gon, nlid runbey to me. Tel gni naa runbeyd naa me, yele naa ga dzigo noquidie zigne rquidie to.

<sup>56</sup> Pxoza to Abraham, bley me zeene gocnan me laa naa znu guial

lo guidzliu rii. Ni zeene bdeed Dios diidz gon me naa, mazdraa bley me.

<sup>57</sup> Zeene bin zho sca rëb me, rëbchaa zho:

—¿Gon luu Abraham ye? ¡Ni chooptsii iz name rapd luu! ¡Zha dzigo gon luu Abraham!

<sup>58</sup> —Gneli naa lo to ganle —rëb me—, notaque naa; nole naa zeene gol Abraham.

<sup>59</sup> Horco ptop zho quie laa zho gdeedquie me, per znuse bded me lad zho brie me len yadoo, gon draa zho me.

## 9

### *Biac tib mgui ne rold lo*

<sup>1</sup> Zieded Jesús tib lugar co, gon me tib mgui ne rcow lo, scale nac lo men co zeene gol me.

<sup>2</sup> Dzigo bnabdiidz xpëedscuel Jesús rëb zho:

—Maestro, ¿bay zha nacne squi golnie men qui guielñe qui? ¿Pe no pe xtol mew, te xtol xmen gol mew ye?

<sup>3</sup> —Lëda —rëb Jesús—, led por xtold zhow; sinque squi gol me, zeena zeene laa me guiac, ga gan miech ganle zha nactaa grë ncuaane run Dios.

<sup>4</sup> Zhile laa liu ycow. None dzioxco ne dziuun ne xtsiin men ne pxeel naa laga nasraa bii zob ngbidz, sac deque ycow liu choot grielodraa gun dziin.

<sup>5</sup> Laga bii no naa lo guidzliu rii, naa nac zig tib biini ne rziini lo grë miech rii.

<sup>6</sup> Blozhse sca bnee me, ptsuc me lo liu, bzhixcuaa me niip ben, dzigo bdëeb mew zhits guidlo mgui ne rcow lo ga;

<sup>7</sup> blozh ga, rëbchaa me:

—Güey na, güeytiib lo luu ro pil Siloé.

(Siloé nac zig nacne rnee ne Pxeel zho zho.)

Dzigo güey mgui co güeytiib me lo me, zeene laa me wbire laa me ranle.

<sup>8</sup> Grë zha ne no gax zaatne no me, ni grë zha ne runbey me; zeene gon zho me, rneechaa zho:

—¿Mgui rii ga lëe rzob gdib i rnab gon?

<sup>9</sup> No zho rnee mew, nogaa zho rnee led meda.

—Squidaa rlu me —rnee zho—, per led med i.

Nacne pquiab me mezhall rëb lo zho:

—Naaw, naa nac mgui co.

<sup>10</sup> Dzigo bnabdiidz zho zha biac lo me. Rëbchaa me:

<sup>11</sup> —Men ne rnee zho lë Jesús, men co bzhixcuaa niip ben dzigo bdëeb mew zhits guidlo naa, blozh ga pxeel me naa biatiib naa lo naa ro pil Siloé; zeene laa naa wbire laa lo naa biacle.

<sup>12</sup> —¿Yo men co niina na? —rëb zho.

—Dieenda —rëb me—, nan naa dien yo me.

<sup>13</sup> Dzigo güey zho güeynie zho me lo grë zha ne nac zha farisé;

<sup>14</sup> sac lëetse dze ne rdziiladz zho lo dziin, lëetse dze co sca beenguiac Jesús lo me.

<sup>15</sup> Grë zha farisé co, biire zho bnabdiidz zho lo me dien zha biac me; dzigo bzodiidz me lo zho zha bdëeb Jesús niip ben lo me, blozh ga güeytiib me lo me, zeene laa me wbire laaw biacle.

<sup>16</sup> Blalaa zha farisé ne ndxie ga, psilo zho rnee zho:

—Nlid ne Dios pxeel men co, gacxe waa niicle runbeydraa me pa dze nac dze nda.

Pquiab zla zho rnee:

—Tel cholze miech ngoopdol nac me, ¿niacxe zrieelo gun me grë milagr qui?

Zhaase zhaase rnee zho.

<sup>17</sup> Dzigo wbiire zho bnabdiidz zho lo me, rëb zho:

—Luu waa, ¿cho rzac luu nac men ne beenguiac lo luu ga?

Pquiab me rëb me:

—Ible Dios pxeel me. Tib men ne ziadteed xtiidz Dios lo miech nac me.

<sup>18</sup> Per ib rliladz grë zha wxtis co ne biac lo me, sac rliladz zho ne rold lo me glo; dzigo bnabey zho gocredz pxoz me, gocredz xniaa me.

<sup>19</sup> Bdzin grop men gol co, rëbchaa zho:

—¿Pe nli xpëed to nac men rii? ¿Pe nli na rold lo me zeene gol me? Tel nli

rold lo me, ¿zha biac lo me ne laa me ran niina?

<sup>20</sup> —Nli xpëed no nac me —rëb grop mengol co—. Ni nli rold lo me zeene gol me;

<sup>21</sup> per ndiond no dien zha biaca ne laa me ran niina, niicle ndiondgaa no dien pe no cho beenguiaca. Benque zha gol-le nac me, mazd lo me glnabdiidz, mezhal gnë dien zha biac lo me.

<sup>22-23</sup> Sca rëb grop mengol co, sac rdzieb zho grieë zho xyadoo zho. Biaanle grë zha rnabey co diidz: zha ne guiab Jesús nac Men ne zëëble diidz ga cxeel Dios lo guidzliu; csaandraa zho sëëb zho yadoo.

<sup>24</sup> Wbiire zho bredz zho men ne biac lo ga, rëb zho:

—Bieñ ganle Dios zobwi, bnë diidzli lo no; sac tel no ndion no cholze miech ngoopdol nac men co.

<sup>25</sup> —Dieenda —rëb me—. Nand naa dien pe miech ngoopdol nac me, te men wena ye. Per me gon beenguiac lo naa, sac rold lo naa glo.

<sup>26</sup> Dzigo biire zho bnaabdiidz zho stib dien zha beenguiac Jesús lo me.

<sup>27</sup> Pquiab me rëb me:

—Ledaaw nile naa lo to, per ib rliladzde tow. ¿Zha nac dzigo ne racladz to gonaque tow stib? ¿Te racladz to ye, ye to sëëb xnëz me?

<sup>28</sup> Dzigo psilo zho ndox zho lo me, rëb zho:

—Luuzhe tel xnëz me no luu, sangue tel no zhiwseed Moisés, min co zional no.

<sup>29</sup> Sac tel Moisés, ndion no nli Dios pxeel Moisés, per mgui co ni ndiond no dien pa brieë me.

<sup>30</sup> Pquiab me rëb me:

—iNcuaane gzeegaa zdoo ne i runbeydaque to cho nac me, ni ron to me beenguiac lo naa!

<sup>31</sup> Ndion ne ganle rquiaadiagd Dios xtiidz cholze miech ngoopdol, sinque laa me rquiaadiag xtiidz zha ne rien ne nli men nroob nac me, ni run zho mine rnabey me.

<sup>32</sup> Stiba, waltaa gard dzion ne cho zha beenguiac lo tib miech ne znu gol rold lo.

<sup>33</sup> Telne niaca mine nacnied Dios men co, nrieelod me niunguiac me lo naa.

<sup>34</sup> —iPsioog ro luu! —rëb zho lo me—. iB racladz no guiaad tib ngoopdol nu guiadseed no!

Horco wbig zho, blee zho me ga.

### *Zha ne rold lo*

<sup>35</sup> Bin Jesús sca blee zho me ga, dzigo zeene bdzieel Jesús me, rëbchaa Jesús lo me:

—¿Pe rliladz luu men ne nac Xpëed Dios?

<sup>36</sup> Pquiab me rëb me:

—Bzhiguiel bnë lo naa dien cho nac men co, zeena gliladz naa me.

<sup>37</sup> —Gonle luu me —rëb Jesús—. Naa gon nac men co, lëë me nu no-zodiidznie luu niina.

<sup>38</sup> Dzigo pquiitsgzhib me lo Jesús, ni rëb me:

—Dib zdoo naa rliladz naa ne nli Xpëed Dios nac luu.

<sup>39</sup> Blozh ga rëbchaa Jesús:

—Laa naa zial lo guidzliu rii, zeena glu dien cho rap dol, dien chogaa rapd dol; sac zha ne rzac miech peet riend, laa zho tsa biini; laa zha ne rzoob zho niini, laa xquielrien zho ycow, guiaan zho zig tib zha ne rold lo.

<sup>40</sup> Blalaa zha farisé zo ga, zeene bin zho sca rëb me, rëbchaa zho lo me:

—¿Rzë diidz qui na lëë ye lo no rold?

<sup>41</sup> Dzigo pquiab me rëb me lo zho:

—Tel niaca mine nlipaa zha ne rold lo nac to, grieelod gni naa rap to dol. Per na, ne masaque rzac to rolraa lo to, gane grëse ncuaane quiayun to xtol to noyaca, to zëëba.

## 10

### *Mëcwxiiil ni zha ne rquianap ma*

<sup>1</sup> Ni rëb Jesús:

—Golquiaadiaga ganle: grëse zha rded stib nëz zeene rzëëb zho len lidz mëcwxiiil, laa ne ted zho nëz ro puert, gase rlu ngbaan ga nac zho;

<sup>2</sup> sac tel men ne noyan maw, nëz ro puert nëz co rzëëb me.

<sup>3</sup> Zha ne rquianap ro lidz ma, ga rxal zho rded me; niicle magaaw, zeene ron ma tsi me, grëse ma rdzin



lo me; dzigo rbedz me ma, rneelë me ma tib tib ma, laa me rbee ma ga.

<sup>4</sup> Rlozhse rbee me grë ma ne nac xma me, laa me rner lo ma; grëse ma laa ma rnal zhits me sacne runbey ma tsi me.

<sup>5</sup> Rienald ma zhits stib miech, zeene ran ma zho znuse rzhoon ma; sac runbeyd ma tsi zho.

<sup>6</sup> Grë zha ne ndxie lo me ga, ib biend zho zha nac godiidz co;

<sup>7</sup> dzigo wbiire me bnee me lo zho, rëb me:

—Golquiaadiaga ganle: Naa gon nac zig ro Puert, zaatne rded mëcwxiiil ga.

<sup>8</sup> Grëse zha ne biaad glo rnee zho zha nac Men ne nacle diidz cxeel Dios ga, grëse zha co ngbaan ga nac zho, loxaque psacsi zho par grielo cuan zho; ni grëse mëcwxiiil ne nacpaa xpëcwxiiil naa, güeynaid ma zhits zho.

<sup>9</sup> Sangue naa, laa naa nile lo to ganle: Naa nac zig ro Puert, zaatne rded mëcwxiiil ga. Grëse zha ne gbig lo naa, zlaa zho, peet lo tsoxtseeb-draa zho; pale grë mëcwxiiil ne zozëeb zoriee ro lidz, ni rdziel ma guizh nguia, guizh ndzon row ma.

<sup>10</sup> Zha ne nac ngbaan, zeene riaad zho loxaque rban zho ni rut zho; sangue naa, laa naa zial zeena ygaa to tib guielmban ne mazdraa ndzon, tib guielmban ne gdzind dze lozh.

<sup>11</sup> 'Naa nac Baxtor ne nquialadz-paa xpëcwxiiil. Sac zha ne nquialadzpaa xpëcwxiiil, rquiad zdoo zho xquielmban zho, rsilaa zho ma lo guielxtseeb ne notaa ma.

<sup>12</sup> Per tel noyac-wree zha ne noyan ma, rquiad zdoo zho ma, zigne ran zho palo ziaad tib coyot ntseeb, ndxieque mëcwxiiil ga laa zho rzhoon; sac led chend zho ma, led zhad nac xbaxtor ma. Zeene rdzin coyot, nëzrii nëzrec rtsieets coyot ma, nogaa ma rgaa lo coyot.

<sup>13</sup> Rzhoon zho, sac dimise nonie guic zho, peet liaadz nod zho ma.

<sup>14-15</sup> Naa nac Baxtor ne nquialadz xpëcwxiiil. Zigne runbey Pxoza naa naa ni runbey naa me, sca runbey naa grëse xpëcwxiiil naa, niicle magaaw

runbey ma naa. Grëse ma, rleynie naa ma, laa naa rbeeladz xquielmban naa totsaque cuee naa ma lo guielxtseeb ne no ma.

<sup>16</sup> 'No spalal xpëcwxiiil naa, ma ne ngabd len corral rii; grëse ma co, ible zon ma tsi naa sac laa naa no gaxi ma, zeena tipse gac ma grë ma yquianaap naa ma.

<sup>17</sup> 'Men ne nac Pxoza naa, rleynie me naa sac laa naa rbeeladz xquielmban naa; per ible zriebaana naa.

<sup>18</sup> Naazhal rbeeladz xquielmban naa, choot grielod lega ctiche xquielmban naa. Rap naa poder gded naa xquielmban naa, ni rap naa poder gbire gban naa stib. Dios bneedz diidzbey co lo naa.

<sup>19</sup> Grë zha Israel ne ndxie ga, zeene bin zho sca rnee me, laa zho goc chop dii stib.

<sup>20</sup> No zho rnee:

—Yase mendox noguitnie guic men qui, o rzhinlegaa guic me. ¿Pe nacne rquiaadiag to xtiidz me?

<sup>21</sup> Rquiab stib zho rnee:

—Niini rzë xtiidz men qui, led squid rac zha ne noguitnie mendox. Stiba, ¿niacxe zrieelo mendox gunguiac ma tib lo zha ne rold lo?

### *Rnee Jesús Xpëed Dios nac me*

<sup>22</sup> Len mëe ne rac nala, len dze co noyac tib lni Jerusalén, lni ne run zho rsoladz zho dze ne gloopaa psilo quiaquiin yadoo. Ye Jesús bdzin Jerusalén len dze co.

<sup>23</sup> Laa me zieded tib len nsaap ne quia cho yadoo co, nsaap ne rnee zho zhiNsaap rey Salomón;

<sup>24</sup> zeene wbig bla zha ne rnabey Israel, bnaabdiidz zho lo me rëb zho:

—¿Poc dzigo gdzin dze ne gnë luu diidzli lo no? Telne nli luu nac Men ne zëëble diidz ga cxeel Dios guiaad lo guidzliu, niinagazh bnëw lo no.

<sup>25</sup> Pquiab Jesús rëb me:

—Blactaale zine naaw lo to, per rililadzde tow. Stiba, pe zhidaa milagr ne ziyan to run naa, gase rlu ganle cho nac naa; sac Dios men ne nac Pxoza naa, men co racnieñ naa run naaw.

<sup>26</sup> Ib rililadzde tow, sacne led yede to ngab lo naa.

<sup>27</sup> Tel zha ne ngab lo naaw, runbey zho naa; niicle naagaaw runbey naa zho, ni zhits naa rzēnal zho.

<sup>28</sup> Grēse zho, rded naa tib guielmban ne gdzind dze lozh lo zho, ni gdzind dze nitlo zho. Choot grieelod ctiche zho lo naa,

<sup>29</sup> sac men nroob nac Pxoꝝ naa men ne pxeel zho lo naa; choot grieelod cuee zho ladznia me.

<sup>30</sup> Ni tibaque nac no grop no me.

<sup>31</sup> Zeene bin grē zha rnabey co sca rēb me, psilo zho ptop zho quie nan zho ngoquie zho me.

<sup>32</sup> Dzigo rēbchaa me lo zho:

—Lo grētaa milagr ne quiayacnien Pxoꝝ naa naa quiayun naa lo to. Golnē dien, ¿pa min rlisqui to ne laa to racladz gneedzquie to naa?

<sup>33</sup> Pquiab zho rēb zho:

—¿Coquiedaxe no luu waa por grē milagr ne run luu, sinque laa no coquie luu por grē diidz ne rnee luu i, quiaguitnie luu Dios! ¿Tib miech beñse name nac luu, ni rnee luu laa luu nac Dios!

<sup>34</sup> Dzigo rēbchaa me lo zho:

—¿Lo xlibr ley to name zhobnee zha rzac Dios zha ne pcaania xtiidz me, rēb me dios nac zho!

<sup>35</sup> Ni ndion ne ganle, grēse miñe rnee lo Xtiidz Dios, diidzliw; gacxe waa tel sca rēb me lo zha ne pcaania xtiidz me ga,

<sup>36</sup> ¿niacxe rguitnie naa me ga, zeene rne naa Xpēed me nac naa, ni mezhah bzooblo naa pxeel me naa lo guidzliu rii?

<sup>37</sup> Telne rund naa milagr ne rlu Dios pxeel naa, ib gliladzde to naa.

<sup>38</sup> Per telne ran to rlu ne me nacie naa, maase gliladzde to naa totsaque golliladz ne me nacie naa; tsow guien to ganle ne tibaque nac no grop no me, zigtaa nacie me naa, scaque nacie naa me.

<sup>39</sup> Horco gocladz zho stib naaz zho me, per znuse brie me nia zho.

<sup>40</sup> Dzigo brie me ga güey me ro guiubee Jordán, zaatne bio Juan

pchoobnis Juan miech; ga blēz me palal dze.

<sup>41</sup> Nzian miech ne güey lo me ga, rnee zho:

—Nli beend Juan ni tib milagr nroob, per grēse miñe bnee me zeene bzeet me meñ rii, zigne bneese me laaw norieequia niina.

<sup>42</sup> Nzian grē miech ne güeyquiaadiag zhiwseed me ga, dib zdoo zho bliladz zho ne me nac Meñ ne zēeble diidz ga cxeel Dios.

## 11

### *Gut Lazh*

<sup>1</sup> Len dze co blanguidz tib mgui ne no guiedz Betain, lē Lazh; no chop bzian Lazh tib zho lē Mart stib zho lē Marí.

<sup>2</sup> (Lēe Marí rii pchoob tiblo nceit nex ni Jesús, ni pcuiidz mew con guitsguic me.)

<sup>3</sup> Dzigo pxeel grop wnaa co diidz lo Jesús, gacnan me laa Lazh rzacnē, sac nan zho rleyniedox me Lazh.

<sup>4</sup> Zeene blanso diidz, nēchaa me:

—Peet tsienied guic to, niicle tel blanguidz me per nacda par guet me, sinque par glu ganle pa lotaa men nroob nac Dios. Ga glu ganle pa lotaa men nroob nac Xpēed me.

<sup>5</sup> Zigtaa Maríw, zigtaa Marta, zigtagaa Lazha, nquialadz Jesús zho gza zho,

<sup>6</sup> per ib biobladz me; lel blēz me schop ngbidz zaatne no me ga.

<sup>7</sup> Dzigoraa nē me lo no:

—Laa ne guio nēz xtan men Judé stib.

<sup>8</sup> Dzigo rdzieets no:

—Maestro, ¿racladz luu tsie luu nēz co stib ye? Pense name goc bla ngbidz ga gocladz zho ngoquie zho luu ga.

<sup>9</sup> Nēchaa me:

—Tsiipchopraa hor name rziini ngbidz, ni laga niini rna zac tibliladz zia ne, noxtseebd ne lega pa griel ni ne;

<sup>10</sup> loxaque pcow liu, noxtseeb pa griel ni ne; sac ncow rna.

<sup>11</sup> Blozh ga nē me:

—Laa xamigw ne Lazh nixguiesle, per na laa ne guio zeena gabee naa zhimcaalo me.

12-13 Tibaque ndion no nli nixguies Lazh, dzigo rdzieets no lo me:

—Telne raaguiesle me, zac-wen me sca.

Ib biend no ne gutle Lazh, gane sca rnee me.

14 Dzigoraa clar bnee me lo no, nē me:

—Laa Lazh gutle.

15 Ni rley naa gon ne guiend naa ga dze co, zeena sca grieelo lozh gliladz to ganle cho nac naa. Golgotsaa guio ne nēz lo me ga niina sca.

16 Laa Mazh, zha ne rnee zho “Mēēdgrop”, zeene bin Mazh sca nē me, rneehaa Mazh lo no:

—Guiend rson, golgotsaa cchoob zdoo ne guional ne zhits me dien. Tel gut zho me, maase gut zho ne.

### *Jesús rbeeban ni me rdeed guielmban*

17-19 Gax Jerusalén riaan Betain. Zha ne rrie Jerusalem, maase grol hor run zho nēz rdziñ zho Betain. Nzian grē zha Jerusalén rdziñ riequiaabdiuzh zho Marí grop Mart, riechoobladz zho zdoo me lo xquielnē me ga.

Dze ne rac tap ngbidz bioliu Lazh, dzigoraa laa Jesús bdziñ.

20 Gon Mart pa lo ziaad Jesús, dzigo brie me biaad-xinēz me Jesús; laa Marí biaan ro yu.

21 —Jesús —rēb Mart—, telne niaca mine nu no luu segur niete bzian naa;

22 sac nan naa, grētaa ncuaane rnab luu lo Dios, run me mine rnab luu.

23 —Peet tsienied guic luu —rēb Jesús—, ible zrieeban bzian luu.

24 Pquiab Mart, rēb Mart:

—Nliw, nanopaa naa ible zrieeban me gal dze ne laa guidzliu rii nitlo, zeene grēse men gut, laa zho grieeban.

25 Dzigo rēb Jesús:

—Naa nac men ne rbeeban grē men gut, ni naa nac men ne rdeed guielmban lo grē miech. Grēse zha ne dib zdoo gliladz naa, niicle guet zho zig ret grēraa miech rii, zdziñ dze ne gban zho stib.

26 Sac grēse zha ne dib zdoo riladz naa, laa zho bgaale tib guielmban ndzon ga, guiaand zho ladznia guielgut. ¿Led riladz luu lēē Mart, ne sca gaca?

27 —Riladz naaw —rēb Mart—. Riladz naa ne luu nac men ne bzooblo Dios ga, luu nac Xpēēd Dios, Men ne zēēble diidz ga cxeel me guiaad lo guidzliu.

28 Blozhse ga, wbire Mart zie Mart zietsedz Mart Marí. Bdziñ Mart zhli-aanse bredz Mart Marí (sac nzian zha ne ndxie ga ziequiaabdiuzh Marí) rēb Mart:

—Niinapaale blanso Maestro, na laa me rbeedz luu.

29 Zigne bin Marí sca rēb Mart, brie nguzhooñ Marí laa Marí zie nēz co.

30 (Bdziñ Marí, laa Jesús bii zo za-atne güeydzieel Mart me ga; gase blēz me, bzēēbd me lad guiedz.)

31 Grē men Israel, zha ne ndxie lidz Marí ga ziechoobladz zdoo me, zeene gon zho sca lēēlēd brie me, nalaque zho zhits me; sac nan zho bod ro xpaabzian me ziegoon me.

32 Zigne bdziñ me zaatne zo Jesús ga, pquiitgzhib me lo Jesús.

—Jesús, luu ne nac luu men ne rnabey —rēb me—, telne niaca mine nu no luu zeene blanguidz bzian naa, niete me.

33 Psilo Marí roon Marí. Zeene gon Jesús, niicle Maríw, niicle grē zha Israel ne bdziñ ga, mban rac zho, grēse zho roon, dzigo ye me biab guielnē me.

34 Bnabdiidz me rēb me:

—¿Pa lo pqueets to me?

—Dē ganle —rēb zho—, zeena gan luu pa lo bgueets me.

35 Horco psilo Jesús biin me.

36 Grē zha Israel co, zeene gon zho roon me, rneehaa zho:

—¿Golwi ganle, blactaa nquialadz me Lazh!

37 Laa zla zho rnee:

—Led me name beenguiac lo mgui ne rold lo ga, ¿pe nrieelod zha niun me, zeena niete Lazh?

### *Brieeban Lazh*

38 Zeene laa Jesús bdziñ ro baan Lazh, biire biab guielnē me.

Zig nac tib bliee niaa baa co; rna tib quie nroob ntse zaatne rsëeb zho ngutoo;

<sup>39</sup> dzigo bnabey Jesús cob zho quie co.

Pquiab Mart, bzian ngutoo co rëb me:

—¡Mazd gdiobda! ¡Nadze rac tap ngbidz gut me, mbanle na rlaa me!

<sup>40</sup> Dzigo rëbchaa Jesús:

—Led laa naa nile lo luu, telne dib zdoo luu rliladz luu naa, bii zan luu ganle zha nactaa grë ncuaane ndzon ne run Dios.

<sup>41</sup> Zeene blozh bdob zho quie co, dzigo blis Jesús lo me nëz gbaa, ni rëb me:

—Dios, luu ne nac luu Pxoza naa, xquizh xquielnzaac luu sac rquiaadiag luu mine rne naa.

<sup>42</sup> Nan naa tibaque rquiaadiag luu mine rnee naa, per laa naa rzeta nina, zeena grëse miech ne ndxie nu gliladz zho ganle ne nli luu pxeel naa.

<sup>43</sup> Dzigo nguiedz bredz me, rëb me:

—¡Lazh, briei!

<sup>44</sup> Zigne sca bnee me, laa ngutoo co briei ga, scase nriei lar dib nia me, dib ni me ne, ni nioog stib le lar lo me. Dzigo rëb Jesús:

—¡Golxadz grë lar ne nriei me i, zeena guey me!

*Rguib zho dien zha yгаа Jesús*

*(Mt. 26:1-5; Mr. 14:1-2; Lc. 22:1-2)*

<sup>45</sup> Grë men Israel ne güeynal zhits Marí ga, zeene gon zho sca bleeban Jesús Lazh, nzian zho bliladz ne nli Dios pxeel me.

<sup>46</sup> Nogaa zho lei güey zho güeyzodiidz zho lo grë zha farisé zha bleeban me Lazh.

<sup>47</sup> Horco lëelëd pcaalsa grë pxoz ne rnabey, ni grë zha farisé, rëb zho:

—¿Pe gnë to dien zha gaca? ¿Zha dziuun ne mgui ne rnee zho Jesús ga, sac gon pe zhidaa milagr ne quiayun me?

<sup>48</sup> Telne squise csaan ne me, mbe grëse miech sëeb xnëz me; lozh ga, zeene gacnan men rnabey ne zob Romaw, laa me cxeel grë xmenguib me guiaadnitlo zho xyadoo ne, guiaadnitlo zho ladz ne.

<sup>49</sup> Dzigo pquiab Caifás, men ne nac pxoz nroob len iz co, rëb me lo zho:

—¡Ni lal nu lëe peet riende to!

<sup>50</sup> ¿Pe riende to mazd wena yгаа tib zha guet zho, zha quizh par gdib guiedz, lëdle grëse zha ladz ne nitlo?

<sup>51</sup> Zeene sca rëb Caifás men ne nac pxoz nroob ga, ga bzeet me ible no guet Jesús par csilaa me grëse miech lo dol; per led guicd me biaba, sinque Dios psiaaba guic me. Ga goquiet ne laa Jesús guet, par csilaa me grëse zha Israel,

<sup>52</sup> ni grëragaa zha ne no dipse lo guidzliu, zeena tipse gac grëse zha ne nac xpëed Dios.

<sup>53</sup> Dzigo grëse zha ne nac wxtis ga, laa zho biaan diidz ne ible no yгаа Jesús gut zho me.

<sup>54</sup> Nacne briedraa Jesús ne nenlo nian zho me; dzigo mazd laa me brieenie no xtan zha Judé, güeynie me no zaatne wzhi no miech, bdzin no tib guiedz win le Efraín, ga bliaaz no grë no me.

<sup>55</sup> Len ngbidz co, ziaadyob lni Pascw. Nzian grë miech ne no grë guiedzlas ne ndxie dib ga, laa zho rsilo quiariee zie zho nëz Jerusalén; sac ansraa csilo Pascw nzian zho rie yadoo run zho grëse mine rnabey ley par guiaanmbe zho lo xtol zho.

<sup>56</sup> Grëse zha ne rdzin, len yadoo no zho rnabdiidzlsa zho dien pe zdzin Jesús lo lni; sac grëse zho racladz gan me.

<sup>57</sup> Laa grë pxoz ne rnabey, ni grë zha farisé, laa zho bnabeyle, zha ne ganntaa Jesús, tsienie zho diidz parne tsie zha ne tsienaaaz me.

## 12

*Pchoob tib wnaa nceit nex guic Jesús*

*(Mt. 26:6-13; Mr. 14:3-9)*

<sup>1</sup> Sxoop ngbidz gdzin dze lni Pascwa, güey Jesús guiedz Betain, zaatne no Lazh, men ne bleeban me ga.

<sup>2</sup> Sac grëse menlidz Lazh, beenlo zho tib xtsee, gownie zho me.



Mezh no zho, laga laa Lazh zobnie me, laa Mart nodziib ncuaane gowxtsee zho lo mezh,

<sup>3</sup> tibaque zeene bzëeb Marí bzëebnie Marí tib lo nceit nex ne rriee guíee ne lë nard, tib lo nceit niazha, rgaaw maase grol boté. Zigne bdzin Marí bdëeb Marí nceit co ni Jesús, blozh ga con guitsguic Marí pcuiidz Marí ni me. Dipse len yu zëbxlaa nceit co.

<sup>4</sup> Laa Judas Iscariot, tib zha ne nacgza no (zha ne bded ga pto me) zeene gon Judas sca bdëeb Marí nceit co ni Jesús, rneechaa Judas:

<sup>5</sup> —Mazd tebaa zha ndo nceit qui. Nguizhpaa zhow maase tson gayoo pes plat, dzigo needz zho dimi co ngaaza lo grë zha mban ne guiend pe yquiin.

<sup>6</sup> Sca rnee Judas, per nlid ne rquia zdoo Judas zha ne guiend pe yquiin, sinque laa Judas rguib dien zha cuan Judas dimi co, sac Judas ngotsow bziuid ne no dimi; zigse raclo dimi len bziuid co, zhlianse rbee Judas dimi co.

<sup>7</sup> Dzigo rëbchaa Jesús:

—Psaan me. Ib laa me bdëeb nceit qui ni naa, zeena nzhixcuaale xcuerp naa gal dze ne laa naa ygueets.

<sup>8</sup> Telne racladz to gun to xyudar zha ne guiend pe yquiin, tibaque ranlsa to grë to zho, zac tsow ygad to lo zho; sangue naa dzin dze gandraa to naa.

<sup>9</sup> Ndal grë zha Israel, zeene bin zho laa Jesús no guiedz Betain, bio zho nëz güey zho lo me ga, ni güeyso zho lo Lazh, men ne bleeban me ga.

<sup>10</sup> Zeene gon grë pxoz rnabey cow, nacne bnediidzaque zho ye Lazh none gut zho;

<sup>11</sup> sac por Lazh, nzian grë zha non, laa zho rbig nëz lo Jesús, laa zho rliladz ne nli me nac Men ne zëeble diidz ga cxeel Dios.

### *Bzëeb Jesús Jerusalén*

(Mt. 21:1-11; Mr. 11:1-11; Lc. 19:28-40)

<sup>12</sup> Biini liu co, dipse lad guiedz Jerusalén zhoob diidz laa Jesús gdzin ga dze co. Grë miech guizhiu ne bdzin ga zie lni Pascw,

<sup>13</sup> psilo zho brie zho ziaad-xinë zho me; tib tib zho nzhense zho tib lë zin. Lo guielbley co, zeene gon zho me, psilo zho nguiedz roptsie zho, rnee zho:

—¡Zha men nroobtaa nac Dios! ¡Zha ndzontaa men rii pxeel Dios ziaad lo ne! ¡Lëe men rii gnabey Israel!

<sup>14</sup> Laa Jesús, zobse me lad tib burr yeen, zigne raquiet lo Xtiidz Dios zatne rnee:

<sup>15</sup> Grëse to men Israel, gdziebde to. ¡Golwi ganle, laa men ne rnabey ladz to ziaad i, zobse me lad tib burr yeen!

<sup>16</sup> Grëse no ne nac no xpëedscuel me, ni tib no biend hor co ne grë ncuaane noyac ga, raquietlew lo Xtiidz Dios; sinque haxta zeyle me gbaa, dzigora psoladz no nzian grë ncuaane raquiet lo Xtiidz Dios ga, gonlo no goca; ni bien no Jesús raquiet ga.

<sup>17</sup> Lad grë miech guizhiu co no nzian zha ne gon zha bleeban me Lazh, dzigo nguiedz rzodiidz zhow lo grë miech co.

<sup>18</sup> Ni nzian grë miech co, laa zho blanso ga ziaad-xinë zho me, sac bin zho zha been me milagr nroob co.

<sup>19</sup> Grë zha farisé, zeene gon zho grë miech guizhiu co, rneechaa zho:

—¡Pe zhidaa grë miech qui racnie men qui! ¡Peraa nadien dziuun ne!

### *Rguib bla zha Gres Jesús*

<sup>20</sup> Lad grë miech ne bdzin Jerusalén ga, ziegān Dios len ngbidz Pascw co, lad co no blalaa zha zit ne nacd zha Israel,

<sup>21</sup> dzigo bnee zho lo Lip (zha Bet-said nac Lip) rëb zho:

—Bzhiguiel bnë dien pa lo no Jesús, laa no racladz dzian no me.

<sup>22</sup> Dzigo güey Lip rëb Lipa lo Ndrés, blozh ga güey zho grop zho güeynie zho diidz lo Jesús.

<sup>23</sup> Dzigo rëbchaa me lo zho:

—Naa ne nac naa Mgui ne pxeel Dios, niinataa nagon laa dze bdzin zeene laa naa gbire guia gbaa stib.

<sup>24</sup> Golquiaadiaga ganle: Tib zhobxtil, telne tsoda liu tibaque zhob naca; per

zeene laa zhob co rio liu, nzian raca. Scaque naa nagon, none guet naa, none tsoliu naa, zeena gacnzian zha ne ygab xnëz naa.

<sup>25</sup> Sac zha ne rquia zdo xquielmban, znitlonie zhow; sangue zha ne cueeladz xquielmban, zha cosi zgaa zho tib guielmban ndzon ne ib gdzind dze lozh.

<sup>26</sup> Zha ne racladz sëëb xnëz naa, none gun zho mine rnabey naa; ni zaatne gdzin naa yeque zho no gdzin ga. Ni grëse zha ne sëëb xnëz naa ni gon zho xtidz naa, zunnon Pxoza naa zho.

<sup>27</sup> Mban rac zdo naa niina. Per lëda ga gun naa, telne guiep naa lo Pxoza naa csilaa me naa lo grëtaa guielnë ne no teed naa. ¡Sac par mincopaa zial naa lo guidzliu rii!

<sup>28</sup> 'Dios, luu ne nac luu Pxoza naa —rëb me—. Blu lo grë miech rii ganle ne men nroob nac luu.

Dzigo bin zho zëëb tib tsi men co gbaa, rëb me:

—Laaw blule naa, ni niina laa naa gbire gluw stib.

<sup>29</sup> Nzian grë miech ne ndxie ga, zeene bin zho tsi men co, bzhaac zho nguizi; zha ne bien led nguzida, rnee zho:

—Xanj Dios ga gon bnee lo me.

<sup>30</sup> Dzigo rëbcha me lo zho:

—Laa to bin ganle laa Pxoza naa bnee, ni por to gon bnee me, zeena gon to tsi me ni gliladz to ne me pxeel naa.

<sup>31</sup> Laa dze nagon bdzin zeene laa Dios gunquih naa xtol grëse miech guidzliu rii; lëe dze bdzin zeene laa mendox piche gnabeydraa ma lo guidzliu rii zigne rnabey ma niina.

<sup>32</sup> Sac zeene laa naa quia glaa lo cruz, ga cuedz naa grëse miech zeena sëëb zho xnëz naa.

<sup>33</sup> Ga bzeet me zha gut miech me.

<sup>34</sup> Grë miech ne ndxie ga, zeene bin zho sca rëb me, rëbcha zho:

—¿Guet luu ye? Lo Xtidz Dios name rnee, ib guete Men ne cxeel Dios ga. ¿Zha nac dzigo ne rnee luu laa luu guet? ¿Chopaa dzigo nac luu?

<sup>35</sup> Dzigo pquiab me rëb me lo zho:

—Naa nac zig tib biini ne noziini lo miech; ni ngabse dze ne cuëz naa lo to. Laga noziini naa lo to, golsëni zaatne riab biini zeena ygaade to guielcow; sac zha ne rzë lo ncow riend zho palo zie zho.

<sup>36</sup> Niina ne rdeeda diidz golliladz cho nac naa, zeena gac to zha ne nli-paa no lo biini.

Blozhse sca rëb me laa me biche ga, blulodraa me lo zho.

<sup>37</sup> Niicle gonlo zho nzian milagr ne been me, per ib rliladz zho ne nli Dios pxeel me.

<sup>38</sup> Ni ib scalegaa no gaca, sac ga brieequia mine bzeet Isá (tib men ne biadteed xtiidz Dios) zeene znu rëb me:

Dios, bui ganle ni tib choot nëd gliladz xtiidz luu, niicle ran zho grëtaa milagr ne run luu.

<sup>39</sup> Ni nligaa ib brieelod nliladz zho me; sac zeene pquiaa Isá, znu rëb me:

<sup>40</sup> Ncow psan Dios lo zho, ni beenndip me zdo zho;

zeena gand zho me, niicle guiendgaa zho zha gbig zho lo me csilaa me zho lo xtol zho.

<sup>41</sup> Zeene znu bnee Isá, ible Jesús ga bzeet me; sac gon me grëtaa guielndzon ne rap Jesús.

<sup>42</sup> Ndal zho sca ib bliladz me, per noquegaa zha ne bliladz me; zig nac grë zha ne rnabey lo zha Israel, ndal zho bliladz ne nli Dios pxeel me, per ib pxobnend zhow; sac rdzieb zho cuee zha farisé zho yadoo.

<sup>43</sup> ¡Ni stiba rdziladzraa zho guiaanon zho lo miech, laa ne guiaanon zho lo Dios!

<sup>44</sup> Len dze co, tib vult nguiedz bnee Jesús, rëb me:

—¿Grëse zha ne rliladz naa, ye Pxoza naa ga rliladz zho!

<sup>45</sup> ¡Ni zeene rwi zho lo naa, ye men ne pxeel naa ga ran zho!

<sup>46</sup> Naa nac zig tib biini ne rziini lo miech, ni grëse zha ne dib zdo gliladz cho nac naa, zriee zho lo guielcow ne no zho.

<sup>47</sup> Grëse zha ne gon Xtidz naa, ni gband zho zigne rnabeya, led naad

gunquizh zho dol co; sac ziald naa par gdziibdol naa miech, sinque laa naa zial par csilaa naa zho lo dol.

<sup>48</sup> Xtidz naa gac ley ne gunquizh zhow; zigtaa zhaw zigtagaa grè zha ne néd gunbey naa, grè zha ne néd yquiaadiag xtidz naa.

<sup>49</sup> Sac grèse ncuane pseed naa miech, led guicd naa biaba, sinque PxoZ naa men ne pxeel naa, men co rnabey naa pe nac mine cseed naa zho.

<sup>50</sup> Ni nanpaa naa, grèse diidz ne rnabey PxoZ naa naa rne naa, lèew rlu zha ygaa miech tib guielmban ndzon ne gdzind dze lozh; gacxe waa, grèse mine rnabey me gne naa, zigne racladz me scase rne naaw lo to.

## 13

### *Rguiib Jesús ni xpëedscuel me*

<sup>1</sup> Guieel ne rsilo lni Pascw; wdze co pcaalsanie Jesús no grèse no ne nac no xpëedscuel me, laa no nodiowxtsee. Rienle me ne gataa laa dze co bdziñ, zeene laa me gbi lo guidzliu rii gbire me lo PxoZ me stib. Grèse zha ne ngab lo me, rleyne me zho; ne nligaa rleyne me zho haxta bdeed me xquielmban me psilaa me zho.

<sup>2-4</sup> Rien me grètaa ncuane no, ladznia me psan PxoZ mew; lo PxoZ me brie me ziaad me lo guidzliu, ni lo PxoZ me gdziñ me niina ne laa me gbi lo guidzliu.

Laa no zioob no no mezh, tibaque zeene guso me blee me lar ne mbix me, bdziinlen me tib lè lar nool. Par hor co, laa mendox pquii-le Judas, zhin Simón Iscariot, parne tsieto Judas me.

<sup>5</sup> Dzigo blaas me nis tib len bandej laa me psilo noguiib me ni grè zha ne nacgza no, zigse rlozh rguiib me ni tib zho scase scase rcuiidz mew con lar ne ndxie len me ga.

<sup>6</sup> Zeene laa me zie quiib me ni Simón Pedr, rëbchaas Simón lo me:

—jLèda i gon! ¿Pe nacne lel luu quiib ni naa?

<sup>7</sup> Pquiab me rëb me:

—Grieelod guien luu niina, pe nacne quiib naa ni luu; haxta tedraa nu dzigo ganle guien luuw.

<sup>8</sup> —jNend scaw! —rëb Pedr—. jPer naasi gon gnedzd naa diidz quiib luu ni naa!

Dzigo rëbchaas me:

—Grieelod sca ygab luu xnëz naa, telne siguiel luu quiib naa ni luu.

<sup>9</sup> Horco pquiab Simón, rëb Simón:

—Bzhiguiel sca, niinagazh bdiib ni naa, per led loxaque nidse naa, sinque dib nia naa, dib guic naa bdiib.

<sup>10</sup> Dzigo rëbchaas me:

—Zha ne gozle, nise zho riar; sac mbele zho. Scaque to nagon, mbele to grè to. Grè to rne naa, niicle ne led gzadpaa to mbe.

<sup>11</sup> Sca rëb me, sac rienle me cho tsieto me.

<sup>12</sup> Blozhse bdiib me ni no, wbiire wbix me xab co me, bzob me lo mezh; dzigo nē me lo no:

—¿Pe bien to na pe nacne znu bdiib naa ni to?

<sup>13</sup> Golwi ganle: To lèe, Maestro rnee to lo naa, ni rnee to naa nac men rnabey; ni nonguiela gon, sac ne nligaa scaw.

<sup>14</sup> Golgan sca, niicle ne maistr naa, niicle ne naa nac men ne rnabey, per laa naa bdeed zig tib ngundziin win bdiib naa ni to. Nana sca, scaque golgac lo samiech to.

<sup>15</sup> Laa naa blule lo to zha gun to, nana sca goltsienal min co.

<sup>16</sup> Gneli naa lo to ganle, lo grè zha ne nac ngundziin, tsod zha ne nonraa lo zha ne rnabey zho; scaque grè zha ne rie mandad, tsod zha ne nonraa lo zha ne rxeel zho.

<sup>17</sup> Laa to nanlew nasca. Gacxe waa, telne tsienal to wseed rii, zaacse gac lo xquielmban to.

<sup>18</sup> 'Golquiaadiag ganle, grèse mine none naa nu, led par grède tow. Naa bzooblo to, nanween naa zha nac to tib tib to, ni nanween naa zha rnee lo Xtiidz Dios, rneew: “Lèeque tib zha ne rownie naa, griequia tsielo naa ladznia zha ne gut naa.”

<sup>19</sup> Laaw rnegazh naa lo to niina, zeena zeene gaca, gliladz to ganle ne nli naa nac men ne rne naa nac naa.

<sup>20</sup> Ni golgona ganle, grëse zha ne ycaania Espíritu Sant, men ne cxel naa, naale ga nocaania zho; ni zha ne rcaania naa, ye le men ne pxeel naa ga rcaania zho.

*Rëb Jesús ne Judas nac zha ne tsieto me*

(Mt. 26:20-25; Mr. 14:17-21; Lc. 22:21-23)

<sup>21</sup> Horco psilo rlupaa mban goc zdoo Jesús, dzigo bneeli me lo no në me:

—Gneli naa lo to ganle, lëëque tib to gon tsielo naa ladznia zha ne gut naa.

<sup>22</sup> Zeene bdzion no sca rnee me, psilo no rwilolsa no, rienđ no dien cho nac zha ne rzeet me ga.

<sup>23</sup> Cuepaa me, ga zoob naa (rleynie me naa niicle ne raguialđ naaw);

<sup>24</sup> dzigo blunia Pedr lo naa, gnabdiidz naa lo me dien cho nac zha ne rzeet me ga.

<sup>25</sup> Nacne wbig gax naa, bñabdiidz naa lo me.

<sup>26</sup> Dzigo nëchaa me:

—Laa naa cobie tib lë guietxtil, ni lo zha ne gan luu gded naa guietxtil co, lëë zho ga.

Dzigo bzhen me tib lë guietxtil, blozhse bloobie me guietxtil co, laa me bdeeda lo Judas.

<sup>27</sup> Zigne bnaaz Judas guietxtil co, laa menđox bzëëb zdoo Judas. Dzigo rëbchaa Jesús lo Judas:

—Mïne no guic luu gun luu, na zeen nawdzegazh beena.

<sup>28-30</sup> Zigne blozh dow Judas guietxtil co, lëëled brieë Judas ley; pcowle liuw.

Lo grë no ne zioobnie no me lo mezh ga, ni tib no biend pe nacne sca rëb me lo Judas. No zho nan bod no pe ncuane rquiu lo lni co, rxeel me Judas tsiesi Judas, o nogaa pa tsiesan Judas palal dimi lo grë zha ne guiend pe yquiu; sac Judas nac zha ne ngot-sow bziuud win ne no dimi.

<sup>31</sup> Gonse Jesús laa Judas brieë ley, dzigo nëchaa me lo no:

—Niina nagon bdziñ dze zeene glu ganle zha nroobtaa guielndzon ne rap Mgui ne pxeel Dios, ni ga glu ganle pa lotaa nac guielndzon ne rap Dios.

<sup>32</sup> Ni scaque Dios, zlu me ganle pa lotaa nac guielndzon ne rap Mgui ne pxeel me ga.

<sup>33</sup> Xin yeena, jzhile cuëz naa lo to nu! Squiaguib to naa, per zigne rep naa lo grë zha Israel co, laaw rneque naa lo to niina: Grieelod sēnal to zaatne ga naa.

<sup>34</sup> Gane laa naa rsan tib diidz cub rii, ni laa naa rnabey to gun tow: Tib tib to, golleynie zha ne nacgrë to, golgantsi zho. Zigne rleynie naa to, sca golleynie zho.

<sup>35</sup> Zeene gan miech, ne nligaa dib zdoo to rleynie to samiech to, dzigo zien zho xpëëdsuel naa nac to.

*Ible ziab Pedr runbeyd Pedr Jesús*  
(Mt. 26:31-35; Mr. 14:27-31; Lc. 22:31-34)

<sup>36</sup> Dzigo bñabdiidz Pedr lo Jesús, rëb Pedr:

—Maestro, ¿pa dzigo nac zaatne tsie luu?

Dzigo rëbchaa me:

—Zaatne ga naa, grieelod sēnal luu niinagazh; per ib laa luu no guiaadnal.

<sup>37</sup> Pquiab Pedr, rëb Pedr:

—¿Per pe nacne grieelod sēnal naa zhits luu niina? ¿Sēnal naa zhits luu gon, niicxe maase gut zho naa waa!

<sup>38</sup> Dzigo rëbchaa me:

—¿Goon csaand luu naa ye Pedr, niicle gut zho luu? Nlid ga gon. Gneli naa lo luu ganle, zeene laa gall ycuedz tsonle vuilt rëb luu runbeyd luu naa.

## 14

*Niapse por Jesús gdziñ miech lo Dios*

<sup>1</sup> Tsođe to zhgab, tsođe to guielnë. Tiblique golgun guic to, zigne dib zdoo to rililadz to Dios, scaque dib zdoo to golliladz cho nac naa.

<sup>2</sup> Golgona ganle: Zaatne nac lidz Pxoz naa, ndaldoo zaatne cuëz miech no ga, tel niaca mine guiend zaatne cuëz to, nile naaw lo to na. Gacxe



waa, niina laa naa ga, gazhixcuaa naa zaatne cuëz to ga.

<sup>3</sup> Ni zeene lozh gzhixcuaa naa zaatne cuëz to, hor co laa naa gbire guial stib, dzigosi laa to sēnal zhits naa; zeena tibaque zaatne gbiaaz ne.

<sup>4</sup> Laa to nanle nasca pa lo ga naa, ni nanlegaa to nēz ne.

<sup>5</sup> Pquiab Mazh rēb Mazh lo me:

—Maestro, pelel nēz na gacndion no, ni per ni zaatne tsie luu ndiond no.

<sup>6</sup> Dzigo rēbchaá Jesús:

—Naa nac nēz co, naa rseed miech mine nac diidzli, ni naa rded tib guielmban ndzon ne ib gdziñd dze lozh. Lo grēse miech, zha ne gliladz cho nac naa, zha co gdziñ lo Pxoza naa; guieñdraa stib mod ne gdziñ zho lo me.

<sup>7</sup> Telne runbey to naa, dzigo runbeya que to Pxoza naa. Ni runbeylegaa to me, sac tibaque ran to me.

<sup>8</sup> Dzigo rēbchaá Lip lo me:

—Bzhiguieñ mazd blu Pxoza luu lo no. Totsaque dzian no me, lēēlew ga dzigo.

<sup>9</sup> Pquiab Jesús, rēb me:

—Blactaale dze ga name Lip no naa lo to, ni gardaque ye gunbey luu naa. ¿Grēse zha ne ran naa, lēēque Pxoza naa ga ran zho! ¿Zha nac dzigo ne racladz luu glu naa me lo to?

<sup>10</sup> ¿Niacxe rliladz luu dzigo ne tibaque nac no grop no Pxoza naa? Grēse mine rseed naa to, led guicd naa riaba; grēse ncuaane run naa, me rnabeya, me runa sac tibaque nac no grop no me.

<sup>11</sup> Golliladz sca ne tibaque nac no grop no Pxoza naa. Telne goon rliladzdgaa tow zigne rnee naa lo to nu, siquier lo grē dziin ne nodziuun no, ga golgan ganle ne nli tibaque nac no grop no me.

<sup>12</sup> 'Ne nligaa, gneli naa lo to ganle: Grēse zha ne rliladz cho nac naa, ye zho zun zho grē milagr ne run naa, ni haxta nroobraa ncuaane gun zho; sac tel naa, laa naa no guia zaatne no Pxoza naa.

<sup>13</sup> Ncuaane gnabtaa to lo Pxoza naa, totsaque glu to ne nli rliladz to naa, zun naaw; zeena ga gan miech ganle me nac men ne mazdraa nroob, me nac men ne mazdraa non.

<sup>14</sup> Ne nligaa, telne rnalo to naa, ncuaane gnabtaa to zun naaw.

### *Sxeel Jesús Espiritu Sant*

<sup>15</sup> 'Telne nli rleynie to naa, golgun grē mine rnabey naa to sca.

<sup>16</sup> Scagaa naa, laa naa gnab lo Pxoza naa cxeel me tib men ne tibaque gacniēn to, tibaque cchoobladz zdoo to; ib gdziñd dze ne csaan me to. ¡Lēē men co ga nac Espiritu Sant, men ne rlu pa min nac diidzli; ni ible sxeel Pxoza naa me!

<sup>17</sup> Zha ne ngabd xnēz naa, grielod ycaania zho me, sac rand zho me niicle runbeyd zho me; sangue to, runbey to me sac me quianap to niina, ni zbēzga me zdoo to.

<sup>18</sup> 'Ib csaanladzd naa to, zbire naa guial naa lo to stib.

<sup>19</sup> Nli zhilew, zeene gandraa grē miech naa, sangue to gon bii zan to naa; sac zriebaan naa, ni scaquegaa to zga to tib guielmban ndzon ne gdziñd dze lozh.

<sup>20</sup> Gal dze co, zeene gan to laa naa grieban, ga gliladz to ganle ne nli tibaque nac no grop no Pxoza naa, zigne tibaque nacie naa to ni naciegaa to naa.

<sup>21</sup> Zha ne runbey zha nac grē mine rnabey naa, ni rban zhow zigne naca, ga rlu ne nli rleynie zho naa; ni zigne rleynie zho naa, scaque Pxoza naa zleynie me zho; niicle naagaaw zleynie naa zho, ni zlu naa lo zho ganle cho nac naa.

<sup>22</sup> Dzigo pquiab Judas (zhaa Judas Iscariot), rēb Judas lo me:

—¿Pe nac waa lose no glu luu cho nac luu? ¿Telzhe grēraa miech waa?

<sup>23</sup> Pquiab me rēb me:

—Zha ne run mine rnabey naa, lo zha co glu naa cho nac naa; sac rlu zho ne nli rleynie zho naa. Ni haxta ziaad no grop no Pxoza naa gbannie no zho; sac zigne rleynie zho naa, scaque zleynie me zho.

<sup>24</sup> Sangue zha ne rund mine rnabey naa, ¿zha dien glu naa lo zho cho nac naa? Sac rlu rley nied zho naa. Golsoladz ganle: grëse diidz ne ron to rne naa, led guicd naa riaba, xtiidz Pxoza naaw.

<sup>25</sup> Laa naa rne grë min rii, laga bii zo naa lo to nu,

<sup>26</sup> per zeene laa Pxoza naa cxeel Espíritu Sant men ne guiaad cchoobladz zdo to (men co guiaad xcuent naa), men co lozh cseed to, ni guncsoladz me to grëse mine bne naa lo to.

<sup>27</sup> 'Laa naa guia, per laa naa rsan tib guiebley zdo to, zeena zigne tibliladz rac zdo naa, scaque tibliladz gac zdo to. Sac guiebley ne rnedz naa lo to nu, nacda zig nac guiebley ne runbey grëraa miech guidzliu rii. Tsode to zhgab sca, niicle gdiebde to.

<sup>28</sup> Laa to binle ganle, laa naa no guia lo Pxoza naa per zbire naa guial naa lo to stib. Telne nli rley nie to naa ine nley golgac, niina ne ron to laa naa guia lo me, sac gon men nroobraa nac me lo naa.

<sup>29</sup> Laa naa rne grë min rii lo to niina, zeena zeene gaca, ga lozh guien to ganle cho nac naa.

<sup>30</sup> 'Led nroobdraa sodiidznie naa to, sac ile ziaad mendox, men ne rnabey lo guidzliu rii. Peet grielod gun mendox naa,

<sup>31</sup> per ible none gon naa xtiidz Pxoza naa men ne pxeel naa, zeena gan miech ganle ne nli rley nie naa me. ¡Golsieso nasca, zeena zio ne!

## 15

### *Jesús nac zig tib lbë uv*

<sup>1</sup> 'Naa nac zig tib zhan lbë uv, laa to nac zhicwa, laa Pxoza naa nac zig tib zha ne quianapa.

<sup>2</sup> Grëse zhicw lbë co mine rquiad nex lo, rchug mew; laa grë mine rquia nex lo, ine rsanmbe me low, rbelaan me low zeena yquiaraa nex low.

<sup>3</sup> 'Zig nac to gon, laa Dios psanmbele to sacne zienal to grë xtidz naa mine pseed naa to.

<sup>4</sup> Gbichede to lo naa sca, sinque tibaque golgacnie naa zigne nacnie naa to. Golgan ganle, zig nac tib zhicw lbë uv, peet nex grielod yquia low telne tibnëzle nixa; scaquegaa to nagon, grielod gun to grë ncuaane rdziladz naa, telne nacniede to naa.

<sup>5</sup> Golsoladz ganle: Naa nac zig nac lbë co, laa to nac zhicwa. Zha ne tibaque gacnie naa, grëse ncuaane gun zho zdziladz Diosa;

<sup>6</sup> sac tel piche zho lo naa, laa zho nacle zig tib zhicw lbë co mine nixle tib nëz, laaw nixle ga, ga gbidza; lozh ga laaw tsec.

<sup>7</sup> Telne tibaque gacnie to naa, ni tibaque tsoxco to grë mine pseed naa to, dzigosi ncuaane gacladztaa to golnaba, ni scagaa scaania tow.

<sup>8</sup> 'Gollu sca ne nli xpëedscuel naa nac to, golsannon Pxoza naa, niapse ncuaane rdziladz me min co golgun.

<sup>9</sup> 'Ne nligaa rley niedox naa to. Golwi ganle, zigne rley nie Pxoza naa naa, scaque rley nie naa to. Golguien sca tibaque golgun mine rnabey naa.

<sup>10</sup> Sac gon, zha ne gun mine rnabey naa, gzataa dze zley nie naa zho; sac sca rley nie Pxoza naa naa ne run naa mine rnabey me.

<sup>11</sup> Laa naa rzet min rii lo to, zeena guiaad tib guiebley zdo to. Ne nligaa, zeena guiaad tib guiebley nroob zdo to; ni naa gnedz guiebley co lo to.

<sup>12</sup> 'Laa naa rnabey to, laa naa rnab lo to: ¡Golley nie samiech to, zigne rley nie naa to! Tel naa, golguien ganle pa lotaa rley nie naa to,

<sup>13</sup> sac led lega gdeedse tib zha xquielmban zho par csilaa zho samiech zho, sinque ga rlu zho ganle pa lotaa rley nie zho zho.

<sup>14</sup> 'Ni to gon, telne gon to grë mine rne naa lo to, dzigosi nli rley nie to naa.

<sup>15</sup> Led yedraa niina nac to zig tib ngundziin, sac zha ne nac ngundziin nand zho pe run men ne rnabey zho. Ne nligaa rley nie naa to, sac grëse mine rnabey Pxoza naa, grëse zigne rnee me, laaw bzodiidzle naa lo to.

16 Golguien ganle, led tod gon bzooblo naa, sinque, jnaa bzooblo to! Ni laa naa bzooblo to zeena gun to niapse ncuaañe rdziladz Dios; dzigosi ncuaañe gnabtaa to lo Pxoza naa, ne nac to zha ne no xnëz naa, zneedz mew.

17 Laa naa rso diidz lo to: Golleynie samiech to.

18 Niicle rlëe zho ran zho to, golsoladz ganle, desde naa squi rlëe zho ran zho.

19 Rlëe zho ran zho to, sac laa naa bleele to lad zho, zianañdraa to ncuaañe rleynie zho; laa telne nagon bii nac to zigne nac zho, dzigosi zëeb gleynie zho to.

20 Golsoladz ganle, zeene znu ni naa lo to: jTsod ngundziin ne ndziibsráa non lo zha ne rnabey zho! Tel naa, pquianañ miech naa, ¿pe lel to dzigo gandze zho? Nana, zigne brieequia-gaa palal zha ne bliladz xtidz naa, scaque zrieequia zha ne yquiaadiag mine gnee to.

21 Ible squianañ miech to ne nac to zha ne ngab xnëz naa, sac runbeyd zho Dios men ne pxeel naa.

22 Tel niaca mine niald naa, niicle ned naa lo zho, zac guiab ne peet xtold zho, sac riend zho pe run zho. Per na gon, guiend pe yquiaaqui zho; sac bial naa bne naa lo zho.

23 Zha ne rlëe ran zho naa, yele Pxoza naa ga rlëenie zho.

24 Ne nligaa telne niaca mine niand zho grëtaa milagr nroob ne run naa, zac guiép naa peet xtold zho; per na gon, blactaa milagr ne gon zho ben naa, ni laa zho bii rlëe ran zho no grop no Pxoza naa.

25 I nagon norieequia mine raquiet lo Xtiidz Dios, zaatne znu rnee: "Peet guielntseeb quiayund naa lo zho, per rlëenie zho naa."

26 'Laa naa nile lo to ganle, ible sxel naa Espíritu Sant gacnie to, niapse diidzli rnee me. Lo Pxoza naa grieeme guiaad me, me cchoobladz zdoo to, ni me gneedz guielbiini lo to lozh guien to cho nac naa.

27 Ni scagaa to, ye to laa to none sodiidz lo grëraa miech gacnañ zho

cho nac naa; sac gon tibaque bzënie to naa desde ne psilo naa xtsin naa.

## 16

1 'Laa naa rne grë min rii lo to zeena peet tsienied guic to, tibaque dib zdoo to gnalo to naa.

2 Sac gon zunxoon zho to, zbee zho to yadoo; ni zdziñ dze haxta zut zho to, sac masaque sac zho lëe mine racladz Dios ga noyun zho.

3 Laa zho gun grë min co, sac niicle Pxoza naaw, niiclegaa naaw, runbeyd zho no.

4 'Laa naa rzodiidz grë min rii niina, zeena zeene gal dze ne laaw noyac, csoladz to ganle grësew bzodiidzle naaw lo to. Bzodiidzd naaw lo to glo, sacne hor co laa naa bii zo lo to.

5 Laa niina nagon laa naa gbiche lo to, laa naa gbire guia lo men ne pxeel naa, per ran naa ni tib to zienied guic gnabdiidz dien pa nac zaatne ga naa, dien pe nacgaa ne laa naa ga.

6 Lëe gdib mine run to, riab guielnë to ron to grë mine rne naa nu.

7 'Gneli naa lo to ganle: Mazd wen gon tsie to zeene laa naa guia lo men ne pxeel naa, sac telne cuëz naa nu, grieelod guiaad men ne guiadchoobladz zdoo to ga. Sangue telne guia naa, dzigo naazhal cxel me.

8 Ni zeene laa me guiaad, me gunquien miech ganle grëse zho zha ngoopdol nac zho, me gunquien zho zha laa zho lo dol co guiaanwen zho lo Dios, ni guien zho ne nli zdziñ tib dze zeene laa Dios gun xquielwxtis me.

9 ¿Pe nacne nac zho miech ngoopdol? Miech ngoopdol nac zho, sacne rililadz zho cho nac naa.

10 ¿Zha grieelo laa zho lo dol co guiaanwen zho lo Dios? Zrieelow, mincocxe waa nacne bial naa, ni na laa naa guia zaatne zob Pxoza naa, gandraa to naa.

11 ¿Zha rlu ne nli zun Dios guielwxtis? Nli zun mew, sac gon laa me bnabeyle zha nac grë guielnëdox ne ygaa mendox, men ne quianabey lo guidzliu rii.

12 'iNzianraa ncuaane racladz naa sodiidz naa lo to! Per rien naa grielod tso guic to zha naca niina.

13 Zeene guiaad Espiritu Sant, me gneedz guielbiini lo to guien to grëraa ncuaane no gacnan to, ni grëgaa ncuaane naraa gac. Niapse diidzli gnee me, sac led guicd me guiab grë mine gnee me, sinque mine nac xtiidz Pxoza naa, min co gnee me.

14 Ga glu me lo miech ganle ne nli men nroob, men non nac naa.

15 Rne naa ga glu me, sac grëtaa ncuaane rnabey Pxoza naa, yeque naa rnabeya.

16 Zhilew zeene laa naa gbiche lo to gandraa to naa; per gacdaquew xtse zeene laa to gbiirelaque gan naa stib.

17-18 Zeene bdzion no sca rnee me, blalaa no psilo no rnabdiidzlsa no rnee no:

—¿Bay zha nacne squi rnee me? ¿Zha nacne rnee me, zhilew dziandraa ne me, per gacdaquew xtse laa ne dzianlaque lo me stib? Ni rneeque me laa me guey lo Pxoza me.

19 Bien me racladz no gnabdiidz no lo me, dzigo në me lo no:

—¿Racladz to lëe gacnan to zha nacne znu rne naa?

20 Golquiaadiaga sca ganle: Zeene gdziin dze co, laga noyon to no to guielnë ne laa naa biche lo to, laa grëraa miech haxta zley zho ne laa naa wbiche lo zho. Nli nroob guielnë ne tso to, per zeene laa to gan naa stib, guielbley nroob ne tso to.

21 Nac cuent rii zig rzac tib men wnaa ne ral xpëed. Glo yoob ro, yoobdox ne rquia me, per deque laa mëed co ralse, ni rsoladzdraa me yoob co; sac mazdraa nroob nac guielbley ne rio me ran me laa xpëed me blanso lo guidzliu.

22 Scadaa nagon rzac to, nli mban rac to niina, per zeene laa to gan naa stib, dzigosi tib guielbley nroob ne tso to, ni choot grielod ctiche guielbley co lo to.

23 'Zeene gal dze co, yquiindraa to pe gnabdiidz to lo naa. Ncuaane gnabtaa to, lo Pxoza naa gnab tow, ni zneedz mew, sac xnëz naa ngab to.

24 Haxta lo nadze peet gard gnab to, niicle ne xnëz naa ngab to; laa niina laa naa rne lo to ncuaane rquini to glnaba lo me, ni ible zneedz mew gon. Nroob guielbley ne tso to hor co.

25 Nzian grë ncuaane zine naa lo to, rned naaw clar; per laa dze bdziin zeene grëse ncuaane gne naa, clar gne naaw lo to, zig nac zeene gzet naa Pxoza naa.

26 Ni zig nile naa ga, hor cosi ncuaane gnabtaa to lo me, zneedz mew, sac xnëz naa ngab to. Yquiindpaa gne naa lo me gneedz me ncuaane gnab to lo me,

27 sac ye me rleynie me to. Rleynie me to, sac gon rleynie to naa ni rliladz to ne nli lo me brie naa bial naa lo guidzliu.

28 Ni nligaa, lo me brie naa bial naa lo guidzliu; ni niina ne laa naa gbi, loque me gdziin naa.

29 Dzigo rdzieets no lo me:

—¿Nasi nagon rien no zha rnee luu! Sac clar rnee luu, rneedraa luu zigne rnee luu glo.

30 Nasi rien no grëse ncuaane nan luu, sac zig nac niina pquiindpaa nabdiidz no lo luu. Gacxe waa, nasi nagon rliladz no ne nli lo Dios brie luu.

31 Pquiab me, në me:

—¿Wen ga telne rliladz to niina cho nac naa!

32 Per lëe hor co nagon bdziin; ni niina, grëse to laa to csaan naa, tib tib to zhaase zhaase nëz ne xen to. Per guiaand naa loxaque naase, sac tibaque nacie Pxoza naa naa.

33 Grëse ncuaane bne naa lo to nu, laaw bne naa zeena peet tsienied guic to, benque nanle to ganle tibaque nacie naa to. Parga nli, laga no to lo guidzliu rii, nzian grë guielnë ne ted to, per gdziebde to; sac gon naa rnabey, ladznia naa no grëtaa ncuaane no lo guidzliu.

## 17

*Rnab Jesús gacniën Dios xpëedscuel me*

1 Blozhse sca në me lo no, blis lo me bui me nëz gbaa.



—Dios, luu ne nac luu Pxoꝛ naa —rëb me—, niina nagon laa dze co bdziñ. Blu ganle men nroob nac naa ne nac naa Xpëed luu, zeena ga glu naa lo miech ganle pa lotaa men nroob nac luu.

<sup>2</sup> Zigne psan luu grëse miech ladz-nia naa, ni gdeed naa tib guielmban ndzon ne gdziñd dze lozh lo grëse zha ne bneedz luu ngab xnëz naa; scaque niina blu ganle men nroob nac naa.

<sup>3</sup> Lëë guielmban co ygaa grëse zha ne gunbey luu, ne nli luuse nac Dios nguia mban, ni guien zho cho nac naa, ne pxeel luu naa bial naa lo guidzliu rii.

<sup>4</sup> Grëse ncuaane bnabey luu naa, laaw noyuu naa; ni ga rlu naa lo grë miech rii ganle pa lotaa men nroob nac luu.

<sup>5</sup> Scagaa luu ne nac luu Pxoꝛ naa, niina ne laa naa glanso lo luu, blu ganle men nroob nac naa; sac desde mazd glo zeene gard tsaa grëtaa ncuaane no, tibaque nac lo guielndzon ne bdzio ne haxta dze ne blanso naa lo guidzliu rii.

<sup>6</sup> Grëse zha ne ble luu lad grë miech rii bneedz luu lo naa, laa naa pseed zho gunbey zho luu; ni scagaa zha, bliladz zho xtiidz luu. Chen luu zho per laa luu bneedz zho lo naa.

<sup>7</sup> Zig nac niina, grëse ncuaane bneedz luu lo naa, nanle zho ne luu bneedza,

<sup>8</sup> sac pseed naa zho grëse wseed ne bneedz luu lo naa, ni bliladz zhow. Wen wen gocnan zho ne lo luu i brie naa zial naa lo guidzliu rii, ni rililadz zho ne luu pxeel naa.

<sup>9</sup> Laa naa rnab lo luu gacniën luu zho. Rnabd naa par grëse miech guidzliu rii, sinque laa naa rnab por grë zha ne bneedz luu lo naa; sac gon chen luu zho,

<sup>10</sup> ni zha glu ganle pa lotaa men nroob nac naa. Grëse zho chen luu zho; sac grëse ncuaane nacchen naa, chen luuw; ni grësegaa ncuaane nacchen luu, chen naaw.

<sup>11</sup> Rien naa, led nroobdraa cuëz naa lo guidzliu rii, laa naa gbile guial naa lo luu i; per zha, laa zho guiaanaque

nu. Gane niina, luu ne nac luu Pxoꝛ naa, luu ne nac luu tib men ne guien xtol, laa naa rnab lo luu: pquianap zho ne nac zho zha ne bneedz luu lo naa, zeena ni tib zho nitlod, sinque tibaque gac zho gza zho zigne tibaque nacne grop ne.

<sup>12</sup> Len dze ne blëz naa lo zho nu, zigne racladz luu sca pquianaap naa zho. Ni scagaa ni tib zho bnitlod; zha ne bnitlo ga, nole ne sca nitlo zho, zeena sca grieequia mine raquiet lo Xtiidz luu.

<sup>13</sup> Zhilew laa naa glanso zaatne no luu i; per len dze ne blëz naa lo zho nu, nzian grë ncuaane bne naa lo zho, zeena ye zho tso guielbley nroob ne no naa.

<sup>14</sup> Pseed naa zho mine nac xtiidz luu; per na rlëë grëraa miech ran zho zho, sacne zienaldraa zho grë ncuaane ndzinlid ne rac lo guidzliu rii. Nac zho zigne nac naa, rleynied naa grë ncuaan co.

<sup>15</sup> Per rnabd naa cuee luu zho lo guidzliu rii, sinque laa naa rnab csaand luu gun zho ncuaane racladz mendox.

<sup>16</sup> Sac niicle zhaw, niicle naaw, choot zionald grë ncuaane ndzinlid ne rac lo guidzliu rii.

<sup>17</sup> Bzhiguieñ sca bdeed guielbiini lo zho guien zho zha nac Xtiidz luu, sac Xtiidz luu nac diidzli; zeena dib zdoo zho tsoxco zho gban zho zigne rnabey luu.

<sup>18</sup> Sac gon, niina laa naa rxel zho lo grëraa miech guidzliu rii, zigne ne pxeelaque luu naa.

<sup>19</sup> Ni niina, dib zdoo naa laa naa gun mine rnabey luu, zeena ye zho guien zho none dib zdoo zho gun zho mine rnabey luu.

*Rnab Jesús por grë zha ne yabraa xnëz me*

<sup>20</sup> Laa naa rnab gacniën luu zho, ni gacniën luu zha ne naraa gliladz naa, zeene laa zho tsieseed zho;

<sup>21</sup> zeena tibaque gac zho, zigne tibaque nac ne grop ne. Ni scaquegaa gacnie zho ne, zeena gliladz grëraa miech ganle ne nli luu pxeel naa.

22 Laa naa psannon zho zigne psannonaque luu naa, ni tipse gac zho zigne tibaque nac ne grop ne.

23 Zigne nacie luu naa, scaque nacie naa zho. Bzhiguiel gocniēn zho, tibaque gac zho grēse zho, zeēna gan grēraa miech ganle ne nli luu pxeel naa, ni guien zho ganle zigne rleynie luu naa, scaque tibaque rleynie luu grēse zha ne ngab lo naa.

24 Papá, grēse zha ne bneedz luu lo naa nu, racladz naa ye zho guiaad zaatne glanso naa i, zeēna gan zho lo grētaa guielndzon ne no naa. Lo guielndzon ne bneedz luu lo naa, sac rleynietaque luu naa haxta zeēne gard tsaa guidzliu.

25 'Papá, luuse nac men ne rapd ni tib dol, niicle ne runbeyd grē miech rii luu, sanque naa runbey naa luu; ni scaquegaa grē zha ne bneedz luu lo naa nu, nanle zho ne luu pxeel naa.

26 Laa naa pseedle zho gocnan zho cho nac luu ni bii seedragaa naa zho, guien zho ganle pa lotaa rleynie luu naa; zeēna scaque guien zho gleynie zho samiech zho, ni gacie zho naa.

## 18

### *Bnaaz zho Jesús*

(Mt. 26:47-58; Mr. 14:43-50, 53-54; Lc. 22:47-54)

1 Zeēne blozh bnaab Jesús lo Dios, laa me brieenie no ga bdieedquia no nēz dan ro psē ne rnee zho Psē Cedrón. Ga no tib zaatne zēēb niapse yag nex, dzigo ga bliaaz no gza no me.

2 Judas zha ne pto me ga, wen wen runbey Judas lugar co, sac nzian vuelt ziyenie me no ga.

3 Dzigo zeēne laa Judas blanso ga, laa Judas blansoniele tib dzoon menquiib, ni zla zha ne rquianap yadoo; no guierbel nia zho blanso zho ga, zha ne nzhen yag, zha ne nzhenгаа spad. (Lēē grē zha co pxeel grē pxoz rnabey, ni grē zha farisé.)

4 Loxaque blanso zho, laa Jesús brieequiale, rēb me lo zho:

—¿Cho rguib to?

Sca rēb me sac rienle me pe nacne zie zho ga, nanle me pe nac grētaa ncuuaane ted me.

5 Pquiab zho, rēb zho:

—Men Nazaret ne lē Jesús, men co ziaadguib no.

Dzigo rēb me:

—Naa nac men co, tel me ziaadguib to.

6 Zeēne bin zho rēb me: “Naa nac men co”, wbire rzhitsaque zho, grēse zho biab liu. Ye Judas no lad co.

7 Wbiire Jesús bnaabdiidz me lo zho, rēb me:

—¿Cho zho rguib to?

Pquiab zho rēb zho:

—Men Nazaret ne lē Jesús, men co rguib no.

8 —Laa naa nile lo to —rēb me—. Naa nac men co. Telne naa ziaadguib to, golsaan sca guey grē zha ne zo lo naa nu.

9 Ga brieequia xtiidz me zeēne rēb me: “Lo grē zha ne bneedz luu lo naa, ni tib zho bnitlod.”

10 Laa Simón ney tib spad, hor co bdobaque Simón spad co psilaa me tib niaw, bliengaa me diag derech tib mgui lē Malcw. (Lēē mgui co quia xtsiin men ne nac pxoz nroob.)

11 Zeēne gon Jesús, rēbchaa me:

—¡Blootsow spad qui Pedr! ¡Bieñ ganle Pxoz naa rnabey znu teed naa! ¿Niacxe gond naa mine rnabey me naa dzigo?

12 Horco laa grē menquiib co, grē zho zha ne rnabey lo zho, ni grē zha ne rquianap yadoo ga, laa zho wbigbe bnaaz zho me. Blozhse bzobdoo zho me, laa zho zienie me.

13 Sca nzobdoo me, laa zho bdziñnie me lidz men ne lē Anás, pxozdzoop Caifás. Caifás nac pxoz nroob len iz co,

14 ni me ga rēb lo grē men non lo zha Israel, ne mazd wena tibaque zha ne yгаа guet, quizh zho par dib guiedz.

### *Rēb Pedr runbeyd Pedr Jesús*

(Mt. 26:69-70; Mr. 14:66-68; Lc. 22:55-57)

15 Zhiits co, ga nal no grop no Pedr. Ni ne runbey naa Caifás men ne nac

pxoz nroob ga, zeene bdziñ no ro lidz Anás, loxaque naa brieelo bzëeb nêz ley.

<sup>16</sup> Laa Pedr, zaatne nactaa ro yu par gdziñ zaatne nac ley, gataa biaan Pedr. Nacne brieque naa bnee naa lo wnaa ne zonap ro yu, dzigora a bdeed wnaa co diidz bzëeb Pedr.

<sup>17</sup> Dzigo rëbchaa me lo Pedr:

—¿Bod ye luu dzigo lëe nac xpëedscuel men ne bdziñnie zho i?

—Coo, led yed naa —rëb Pedr.

<sup>18</sup> Grë zha ne quia xtsiin men co ni grë menguiib ne ndxie ga, laa zho bzëegle gui. Grëse zho, laa zho ndxiedzëe lo gui ga, sac rac nal. Ye Pedr bdziñ lo zho ga nodzëe Pedr.

*Rquiep Anás Jesús*

(Mt. 26:59-66; Mr. 14:55-64; Lc. 22:66-71)

<sup>19</sup> Laa nêz len yu, laa Anás psilo noquiep Jesús dien yo grë xpëedscuel me, ni dien pe nac grë wseed ne nolu me lo miech.

<sup>20</sup> Dzigo pquiab Jesús, rëb me:

—Grëse miech, nanwen zho ganle pe nac zhiwseed naa. Sac zeene pseed naa zho, bend naa ne ngueets zhlian nseed naa zho; sinque zaatne rcaalsa nzian miech, ga bne naa lo zho. No hor pseed naa zho len grë yadoo win, nogaa hor pseed naa zho len yadoo nroob ne zob lad guiedz nu.

<sup>21</sup> Nana bod rieguialda ne lo naa rnabdiidz luu. Mazd lo grë zha co ganle bnabdiidz, zha bin grëtaa ncuaane bne naa.

<sup>22</sup> Loxaque blozh sca pquiab Jesús, zeene bias tib menguiib ne rquianap yadoo zo gax ga, bdap me lo Jesús.

—¡Bien ganle! —rëb me—. ¡Led squid gon none yquiab luu lo men ne nac pxoz nroob!

<sup>23</sup> Dzigo rëbchaa Jesús:

—Telne rzac luu ben naa falt, bnë dien pe nac diidz ne pxin naa. ¿Te wal rdziladz luu ye, rguin luu zha ne rnee diidzli?

<sup>24</sup> Blozh ga scaque nzobdoo Jesús pxeel Anás me lo Caifás, men ne nac pxoz nroob.

*Rnee Pedr stib runbeyd Pedr Jesús*

(Mt. 26:71-75; Mr. 14:69-72; Lc. 22:58-62)

<sup>25</sup> Horco laa Pedr bii zodzëeque lo gui nêz ley. Dzigo wbiire zho bnabdiidz zho lo Pedr, rëb zho:

—¿Bod xpëedscuel men ne blansonie zho i lëe nac luu?

Laane neeli Pedr, lel pquiab Pedr rëb Pedr:

—¡Lëda! ¡Zha gaczhe naa xpëedscuel men qui!

<sup>26</sup> Ye tib zhalidz Malcw, zha ne pchug Pedr diag ga, laa zho zodzëe lo gui ga, sac ye zho quia xtsiin pxoz nroob co; dzigo rëbchaa zho:

—Ni gon naa name, ye luu no lad zha ne zonie me len yag oliv ga.

<sup>27</sup> Wbiire Pedr rëb Pedr runbeyd Pedr me, ni lëetaque hor co laa tib gall pcuedz.

*Güeynie zho Jesús lo Pilat*

(Mt. 27:1-2, 11-14; Mr. 15:1-5; Lc. 23:1-5)

<sup>28</sup> Ziadyiinile liuw, zeene laa zho brieenie Jesús lidz Caifás, zienie zho me zaatne nac xyulow Pilat, men ne nac gobernador. Zeene bdziñ zho, ni tib zho bzëebd len yulow, sac racladz zho quiits zho mine rnabey xley lay zho; parne grieelo yquiin zho guielwagw ne row zho lni Pascw co.

<sup>29</sup> Nacne brie Pilat bnabdiidz Pilat lo zho, rëb Pilat:

—¿Pe nacne ziaadnie to men qui nu? ¿Pe rquiaqui to me?

<sup>30</sup> Pquiab zho, rëb zho:

—¡Por grëtaa guielntseeb ne noyun me, gane ziaadnie no me! ¡Telne niac me men ndzinli, niacxe lega guiaadzo no me lo luu!

<sup>31</sup> Dzigo rëbchaa Pilat:

—Golsënie me, tose golgunquish me mine been me; zigne nac xley to.

—Racladz no guetgazh me —rëb zho—. Ni nanle luu ganle, no ne nac no men Israel, grieelod ne nose gnabey guet tib miech.

<sup>32</sup> Ga briequia mine bnee Jesús, zeene bzeet me ible zut miech me.

<sup>33</sup> Dzigo bzëeb Pilat len yulow, bnabey me gocredz Jesús. Dzigo bnabdiidz me lo Jesús, rëb me:

—¿Pe nli luu nac zhirey men Israel?  
<sup>34</sup>—Ne squi rnee luu —rëb Jesús—.  
 ¿Pe guic luu biaba, te no cho nëw lo  
 luu ye?

<sup>35</sup> Pquiab Pilat, rëb Pilat:

—Nanle luu ganle led zha Israeld  
 naa. ¿Pe nac sca ne ziaadnie zho  
 luu nu? ¿Pe been luu? Sac gon zha  
 ladzaque luu grë zho zha ne rnabey  
 lo zhipxoz zho, zha biaadsan luu nu.

<sup>36</sup> Dzigo rëbchaa Jesús:

—Nli rey nac naa, per led lo guid-  
 zliu riida, telne niaca mine lo guidzliu  
 riiw, dzigosi grëse zha ne nacnie naa  
 niacntseeb zho, nsaand zho naaz zha  
 Israel naa. Per na, zhaa zaatne nac  
 naa rey.

<sup>37</sup> Pquiab Pilat, rëb Pilat:

—¿Rey luu dzigo lëë?

—Scaw gon —rëb Jesús—, nli rey  
 naa; zigne rnee luu i. Ible min co  
 nacne bial naa gol naa lo guidzliu rii,  
 ni bial naa bialseed naa miech gunbey  
 zho mine nac diidzli. Ni zha ne zienal  
 mine nac diidzli, zha co ngab lo naa.

<sup>38</sup> —¿Diidzli ye? —rëb Pilat.

### *Bnabey Pilat tsiegut zho Jesús*

(Mt. 27:15-31; Mr. 15:6-20; Lc. 23:13-25)

Zigne blozh sca rëb Pilat, brie Pilat  
 ga güeynee Pilat lo grë zha ne bdzinne  
 me ga, rëb Pilat lo zho:

—Ni tib dol gon rapd men rii.

<sup>39</sup> Per gzobse lni Pascw rii, rnab to  
 rlaa cholze tib zha ne no ladzguiib.  
 ¿Pe gnë to sca, mazd csilaa naa men  
 ne nac zhirey to nu?

<sup>40</sup> Pquiabbe zho, rëb zho:

—¿Csilaad luu me! ¡Mazd psilaa  
 Barrabás!

Ni laa Barrabás tib ngbaan nac  
 Barrabás.

## 19

<sup>1</sup> Zeene gon Pilat sca rac zho, dzigo  
 bnabey Pilat bla menguiib, bdeed  
 dooguid zho Jesús.

<sup>2</sup> Bzieecw zho bla lë yag guiets  
 bzoob zho guic me, ni bgacw zho me  
 tib lë lar nizhnie nlaan.

<sup>3</sup> Dzigo psilo zho runguzee zho me,  
 nguiedz roptsie zho rnee zho:

—¿Bley na ganle, laa luu nacle  
 zhirey zha Israel!

Ni rgap zho lo me.

<sup>4</sup> Wbiire Pilat briequia Pilat za-  
 atne ndxie grë miech co, rëb Pilat lo  
 zho:

—Golwi ganle laa naa cuee me, glu  
 naa me lo to, per gacnan to ganle  
 rieguald guet me; laa naa pquieple  
 me rlu ni tib guielntseeb beend me.

<sup>5</sup> Zeene laa Jesús briequia,  
 nzobguicse me coron yag guiets co,  
 ni nacw me lar nizhnie co.

—Golwi na ganle —rëb Pilat—, lëe  
 me nu.

<sup>6</sup> Grë pxoz ne rnabey, ni grë  
 menguiib ne rquianap yadoo, zeene  
 gon zho me, psilo zho nguiedz roptsie  
 zho rnee zho:

—¡None guet me! ¡Bnabey yquia me  
 lo cruz!

Dzigo rëbchaa Pilat:

—¿Goltsienie me sca! ¡To golquiaa me  
 lo cruz! Sangue naa, grieelod yquia  
 naa me lo cruz; sac laa naa gonle peet  
 guielntseeb beend me.

<sup>7</sup> Pquiab zho rëb zho:

—¡Rdziaap no xley no! Ni ley co  
 bnabey ib none guet me, sac rquidie  
 me rnee me laa me nac Xpëed Dios.

<sup>8</sup> Zeene bin Pilat sca rëb zho, maz-  
 draa bdzieb me.

<sup>9</sup> Dzigo bzëebnie me Jesús len yulow  
 stib, bnabdiidz me lo Jesús, rëb me:

—¿Bnë dien cho menpaa nac luu?  
 ¿Pa nac ladz luu?

Per ib pquiabd Jesús lo xtiidz Pilat.

<sup>10</sup> Dzigo rëb Pilat:

—¿Pe nacne rquiabd luu? ¿Gon  
 ganle naa rnabey, zrieelo csilaa naa  
 luu, o gnabeygaa naa yquiaa luu lo  
 cruz?

<sup>11</sup> Pquiab Jesús, rëb me:

—Nli luu nac zha rnabey niina,  
 per telne niaca mine needzd Dios  
 guielrnabey qui lo luu, grieelod ne luu  
 gnabey zha gac naa. Mincocxe waa,  
 zhi nac xtol luu, mazdraa nac xtol zha  
 ne biaadlo naa nia luu.

<sup>12</sup> Dzigo gocladz Pilat nsilaa me  
 Jesús, per bzhiguield grë zha ne  
 güeysan me ga.



—Telne laa luu csilaa mgui qui gon —rëb zho—, rrieequia dzigo ye luu rlëenie César. Sac gon, grëse zha ne racladz gac rey, lo César ga racndaan zho.

<sup>13</sup> Zeene bin Pilat sca rëb grë miech co, bnabey Pilat brieed Jesús nëz ley stib. Dzigo güeysob Pilat lo xcan ne zo ley co, zaatne rzob me run me guielwxtis. (Dipse ley co, niapse quie lag now; gane rnee zha Israela Gabata.)

<sup>14</sup> Lëe dze vispr lni Pascw co ga nagon, zig grolle dzew noyac grë min co. Dzigo rëb Pilat lo zho:

—Laa zhirey to nu gon. ¡Golsënie me!

<sup>15</sup> Psilo zho stib, nguiedz roptsie zho, rnee zho:

—¡Beetgash men qui! ¡Bnabey yquia me lo cruz!

Rëbchaa Pilat:

—Zhirey to nac me, ¿ni racladz to ye gnabey naa yquia me lo cruz?

Pquiabbe grë pxoz ne rnabey rëb zho:

—¡Tibaque men ne nac zhirey no, ni lëe men co nac César!

<sup>16</sup> Dzigotaa mazd laa Pilat bloo Jesús nia zha ne tsiequiaa me lo cruz.

### *Pquia Jesús lo cruz*

(Mt. 27:32-44; Mr. 15:21-32; Lc. 23:26-43)

<sup>17</sup> Zeene laa Jesús brieed ga, rna tib cruz nroob ney me; laa zho zienie me. Bdzinnee zho me ro guiedz, zaatne rnee zho “Gui Beerguic Ngutoo”;

<sup>18</sup> ga pquiaa zho me lo cruz. Ni pquiaa zho schop zha ntseeb, tibga zhiczuz zho bzo cue zhiczuz me.

<sup>19-20</sup> Bnabey Pilat pquia bla lan didz guic zhiczuz me, rneew: “LËË JESUS MEN NAZARET NU, MEN NE NAC ZHIREY ZHA ISRAEL.” Pquiaw xtiidz zha Israel, xtiidz zha Roma ni xtiidz zha Gres. Nzian zha Israel gon sca quia guic zhiczuz me, sac gaxpaa ro guiedz nac zaatne pquiaa zho me lo cruz ga.

<sup>21</sup> Nacne güey grë pxoz rnabey, güeylisqui zhow lo Pilat, rëb zho:

—¿Pe nacne pquiaa luu guic zhiczuz mgui co, ne me nac zhirey zha

Israel? Pe gacd nquiaa luu: “Rnee me, me nac zhirey zha Israel.”

<sup>22</sup> Pquiab Pilat rëb Pilat:

—Mïne pquia naa, laaw pquiale ga. Ni sca none guiaaana.

<sup>23</sup> Laa grë menquiib ne pquiaa Jesús lo cruz ga, zeene blozh pquiaa zho me lo cruz, bzhen zho xab me been zhow tap lë, tib lëgaw biaannie zho tib tib zho. Laa lar ne rbix me, tiblagaque naca, ndiibda;

<sup>24</sup> dzigo rëbchaa zho:

—Minritaa nagon dziuungrold ne. Mïne naca gotsaa dzio new rif, dzigo zha ne grieequia zha co guiaanniew.

Ga brieedia mine raquiet lo Xtiidz Dios, zaatne rnee: “Xab naa, mine racw naa nzian lë been zhow bgaaza lo zho; laa mine rbiix naa, bio zhow rif.” Ni scadaa been gza menquiib co.

<sup>25</sup> Gax zaatne zo zhiczuz Jesús ga, zo blalaa men wnaa. Ga zo xniaa Jesús, zo tib bel xniaa me, zo Marí tsieel Cleof, ni Marí Magdal.

<sup>26</sup> Gaxaque ga zo naa. Zeene gon Jesús xniaa me, ni gon me naa, rëbchaa me lo xniaa me:

—Been cuent nagon lëe xpëed luu i zo i.

<sup>27</sup> Laa lo naa në me:

—Been cuent lëe xniaa luu i gon. Bzhiguiel luu gan me.

Dzigo desde dze co, pcaania naa xniaa me biane naa me lidz naa, pteedlo naa me.

### *Gut Jesús*

(Mt. 27:45-56; Mr. 15:33-41; Lc. 23:44-49)

<sup>28</sup> Rienle Jesús ne gataa laa me psiaal dziin ne pxeel pxoz me me gun me, ni par grieequia grëse zigne rzeet lo Xtiidz Dios ted me, hor co bredz me rëb me:

—Rnab zhis naa.

<sup>29</sup> Gax lo grë menquiib ne quianap me ga, ga zo tib cant win no nziu bla. Zeene bin zho sca rëb me, rias tib zho bgadz zho tib lë zhiil lo nziu co, bzoob zhow guic tib goobgui nool güeyquiaa zhow ro me.

<sup>30</sup> Zeene bdzin nziu co ro me, pquiin me niipa, dzigo rëbchaa me:

—Lëew nagon, nataa laaw bza.

Zeene blozh sca bnee me, znuse pquianrun guic me; laa me blozh.

<sup>31</sup> Guini liu co nac tib dze ne mazdraa nda lo zha Israel. Nacne güey grë zha ne rnabey lo mengüedz güeynee zho lo Pilat, gnabey Pilat tsietiits zho gzhibni Jesús ni zha ne pquiagza me lo cruz ga, zeena guietgazh zho lo cruz dze co; sac racladzd zho scaque quia zho lo cruz zeene laa dze nda co gdzin.

<sup>32</sup> Dzigo pxeel Pilat bla mengüiib. Zeene bdzin zho, glose güeytiits zho ni tib zha ne quiagza Jesús lo cruz ga; blozh ga, güeytiitsaque zho ni stib zho.

<sup>33</sup> Zeene bdzin zho zaatne zo zhi-cruz Jesús, gon zho laa me gutle; nacne bdiitsd zho ni me.

<sup>34</sup> Horco wbig tib mengüiib co, bliz zho xlanz zho ro xcuxti me. Zeene bdoob zho lanz co, nis ne, ren ne brieega.

<sup>35</sup> Naazhal gon znu been zho me. Laaw rne naa lo to zigne gocsew. Golliladza, sac ne nligaa diidzliw.

<sup>36</sup> Ga brieequia mine raquiet lo Xti-idz Dios, zaatne rnee: “Ni tib dzit ne no me quiitsd zho.”

<sup>37</sup> Ni stib lugar, zaatne rnee: “Bii zanaque zho ganle cho nac men ne bliz lanz zho ga.”

### *Bgueets Jesús*

(Mt. 27:57-61; Mr. 15:42-47; Lc. 23:50-56)

<sup>38</sup> Laa José, tib men Arimaté, zeene bin me laa Jesús gutle, dzigo güey me lo Pilat güeynab me diidzbey par grielo tsielit me xcuerp Jesús lo cruz. Ye me xpëedscuel Jesús nac me, per pxobneñd me ne ye me nacgza Jesús; sacne rdzieb me grë men Israel ne rlëe lo Jesús. Dzigo bdeed Pilat diidzbey.

<sup>39</sup> Nicodem, men ne güeyzodiidznie Jesús ga tib pcow liu, ye me güeynal zhits José; güeynie me zig galptsiiptap kil tiblo zënex ne riana yaal ne lë mirr ni yaal ne lë áloe.

<sup>40</sup> Zeene blozh biet Jesús lo cruz, psilo zho bdëeb zho zënex co xcuerp me; blozh ga, pchel zho me tib lar

nquits; sac sca rqueets grë men Israel zhingutoo zho.

<sup>41</sup> Gax zaatne pquia Jesús lo cruz ga, niaa tib corral no niapse yag nex. Len corral co, ga ndieen tib baa tib cho quie, ni tib ngutoo gard ygueets len baa co;

<sup>42</sup> dzigo nacne gase güeyqueets zho me, sac zhile runfalt sëeb dze nda co, ni baa cose nac mine riana gax ga.

## 20

### *BRIEEBAN JESUS*

(Mt. 28:1-10; Mr. 16:1-8; Lc. 24:1-12)

<sup>1</sup> Gol dze ne rzobni zhmalá, silgaw, scase bii ncow rnaw, brie Marí Magdal zie me ro baan Jesús. Zeene bdzin me, gon me laa quie ne nioog ro baa co bdiooble, laaw zole tib nëz.

<sup>2</sup> Horco lëelëd wbire nguzhoon me, biaad me zaatne no no grop no Pedr, biaadnie me diidz lo no, në me laa zho güeybeele Jesús len baa, dieen palo güeysan zho me.

<sup>3</sup> Dzigo lëelëd, brie no grop no Pedr, zioso no ro baa.

<sup>4-5</sup> Zeene bdzin naa ro baa, blëz naa niip, dzigo bdiixlo naa len baa gon naa laa lar ne briel me zhoob ga; per bzëebd naa. Laa naa blozhdze bdiixlo len baa, zeene laa Pedr blanso.

<sup>6</sup> Zigne blanso Pedr bzëeb Pedr len baa, gon Pedr nligaa laa lar co zhoob ga,

<sup>7</sup> niicle lar ne briel guic mew, laaw zhoobaque ga; ndibëdsew, zhooba tib lad.

<sup>8</sup> Nacne bzëebaque naa. Zeene gon naa zha zhoob lar co, dzigora bililadz naa ne nli brieaban me.

<sup>9</sup> ¡Sac hor co, bii gard tsoguic naa zha rnee lo Xtiidz Dios; sac ga raquiet ne ible zrieaban me!

### *Gon Marí Magdal Jesús*

(Mr. 16:9-11)

<sup>10</sup> Ye Marí biire blanso ro baa ga stib. Zeene wbii no ga grop no Pedr, laa Marí bii zo ro baa ga.

<sup>11</sup> Ga name zo Marí roon me. Sca roon me, tibaque zeene bui me nëz len baa co,

<sup>12</sup> gon me laa chop anjl zob leen co. Dib nquitsbiese rna xab grop anjl co,

tib me zob nēz ne bzhoob guic Jesús, stib me zob nēz ne bio ni me;

<sup>13</sup> dzigo rēbchaa me lo Marí:

—¿Pe nacne roon luu?

—Roon naa —rēb Marí—, sac laa zho biadbee xcuerp Jesús nu, na dieen pa güeyšan zho me.

<sup>14</sup> Loxaque blozh sca bnee me, zeene ptsire lo me gon me laa tib men co zo gax zhits me. ¡Per ib beenbeyd me ne Jesús!

<sup>15</sup> —¿Pe nacne roon luu? —rēb Jesús—. ¿Cho rguib luu?

Leḷ güeynie guic Marí rēb me bod men ne rquianap gaw, dzigo rēbchaa me:

—Bzhiguel, telne luu biadbee me nu, bnē dien pa lo güeyšan luu me; zeena ga naa gaxi naa me.

<sup>16</sup> Horco bneelē Jesús Marí, bredz me me. Zeene bin Marí lē me, lēlēd biecw me; dzigora beenbey me Jesús.

—¡Maestro! —rēb me—. ¡Mod luu i!

Laa me zie gbig me lo Jesús.

<sup>17</sup> Dzigo rēbchaa Jesús:

—¡Xeenḍ luu naa! Sac gard guia naa lo Pxoḗ naa gbaa. Mine naca, güey güeynie diidz lo grē zha ne bzēnal zhits naa; gudz lo zho: Laa naa nole nēz guia naa lo men ne nac Pxoḗ ne, men ne nac Dios ne rdziuuḅey ne.

<sup>18</sup> Horco lēlēd wbi Marí ga, ziaadnie me diidz lo no. Blanso me bzodiidz me zha gon me Jesús, ni nē me lo no zigne rēbse Jesús lo me ga.

*Briequia Jesús lo xpēēdsuel me*  
(Mt. 28:16-20; Mr. 16:14-18;  
Lc. 24:36-49)

<sup>19</sup> Pcow liu dze dmingw co, grēse no ne nac no xpēēdsuel me laa no pcaalsa; loxaque Mazh runfalt. Dziits nquiaa no yag yu, sac rdzieeb no grē zha Israel ne rlēēnie me. Laa no ndxie ga, tibaque zeene briequia me bzo me glowtaa lo no; pquiaabdiuzh me no.

<sup>20</sup> Blozhse pquiaabdiuzh me no, dzigo blu me len nia me lo no, zaatne biaaz clav zeene pquia me lo cruz, ni blu me ro xcuxti me. ¡Grēse no per nli rley no zeene bdzion no ne nli mew!

<sup>21</sup> Blozh ga, nē me lo no:

—¡Laa naa rnedz tib guielbley zdoḗ to, zeena peet tsienied guic to! Zigne pxeel Pxoḗ naa naa bial naa, scagaa niina laa naa rxel to.

<sup>22</sup> Dzigo blub me lo no grēse no.

—Golcaania Espíritu Sant —nē me—.

<sup>23</sup> Ni zeene gon gon to tib miech perdon, scaque Dios zun me zho perdon; laa telne siguiēd zho gon to zho perdon, laa zho biaanle lo xtol zho ga.

### *Gon Mazh Jesús*

<sup>24-25</sup> Zeene bdzion no Mazh (Mazh ne rnee zhō “Mēēdgrop” ga), bzodiidz now lo Mazh, per bliladz Mazha, rnee Mazh:

—Rliladz naa mine rnee to i gon. Zliladz naaw, per haxta ganlo naa me, haxta gan naa len nia me zaatne biaaz clav, ni cteed-xug naa ga; ni csēēbnia naa ro xcuxti me zaatne biaaz lanz ga.

<sup>26</sup> Goc xon ngbidza, laa no pcaalsaque len yu co stib; hor cosi yele Mazh ndxiegrē no ga. Scaque dziits nsioog no ro yu, per tibaque zeene bdzion no laa Jesús bzēēb len yu ga stib, bzo me glowtaa lo no, pquiaabdiuzh me no. Blozhse pquiaabdiuzh me no,

<sup>27</sup> rēbchaa me lo Mazh:

—Wbig na Mazh, bui len nia naa, psēēb mzhugnia luu nu. Dien nia luu nu, psēēbnia ro xcuxti naa. Gacchopdraa guic luu, sinque bliladz ganle ne nli mban naa.

<sup>28</sup> Dzigora bliladz Mazh ne nli mban me.

—Nasi rliladz naa mban luu —rēb Mazh—. Luu nac men ne rnabey naa, luu nac xDios naa.

<sup>29</sup> Pquiab Jesús rēb me:

—Laa luu rliladz niina, lēēcxe laa luu gonle naa waa. ¡Dichos zha ne gliladz ne nli mban naa, niicle ranḍ zho naa!

### *¿Pe nacne pquia grē diidz rii?*

<sup>30</sup> Lo lal ne bzēnie Jesús no, ndaldoo milagr ne bdzion no been me, led grēda raquiet lo guits rii.

<sup>31</sup> Mine pquiase naa nu, laaw pquia naa zeena zeene glab tow, guien to ganle ni gliladz to: Jesús nac men ne biaadsilaa ne lo xtol ne, Dios bzooblo

me bīaad me, ni Xpēed Dios nac me; sac zha ne dib zdoo gliladz cho nac me, zгаа zho tib guielmban ndzon ne gdziṅd dze lozh.

## 21

### *Gon zho Jesús Galilé*

<sup>1</sup> Bded ga, wbiire brieequia Jesús lo no stib, zaatne nac ro nisdoo nroob ne rnee zho Tiberias.

<sup>2</sup> Tib bdze dzew, tipse ndxie no gza no Simón Pedr, Mazh, Natanael (men ne nac men Caná ga), bets naa Jacob ni schop zha ne nacgza no.

<sup>3</sup> Tibaque zeene në Pedr, laa Pedr tsie gooz meḷ. Dzigo rdzieets no:

—Yeque no sca zia guio ne.

Dzigo bziaab no tib len barcw win gza no, laa no zio.

Dipse guieel bdzionie no barcw co lo nis, per ni tib meḷ bgaad.

<sup>4</sup> Laa liu ziaadle lozh guini, zeene bdzion no laa tib men co zo ro nis, per ni tib no bdziuunbeyd me.

<sup>5</sup> Dzigo bnee men co lo no, në me:

—Yo to dien xin, ¿pe bгаа ma?

Pquiab no rdzieets no lo me:

—Choot ma bgaad.

<sup>6</sup> Dzigo nëchaa me:

—Golron guieḷ ne rgaa ma i nëz derech ganle, znaaz to ma.

Dzigo bron no guieḷ co nëz derech. Zeene laa no cueew lo nis, ib lēbd no glis now; ndaldoo meḷ ne biodzē lena.

<sup>7</sup> —¡Pedr! —rep naa—. ¡Bina ganle, xmaistr ne i gon!

Zeene bin Pedra, lēléd wbix Pedr xab Pedr, biab Pedr lo nis; psilo Pedr bzhoobnis Pedr brieequia Pedr ro nis.

<sup>8</sup> Laa no bīaan len barcw ga; nole bdzinniew zaatne nac ro nis. Maase tapgaltsii metr sca bdiobniu no guieḷ co lo nis.

<sup>9</sup> Zeene brieē no len barcw, bdzion no laa gui noyeclē, laa tib meḷ zhooble lo gui co, ye guietxtil ne.

<sup>10</sup> Dzigo në Jesús lo no:

—Goltēnie bla meḷ ne blozh bnaaz to i nu dien.

<sup>11</sup> Dzigo güey Pedr bieḷ me len barcw, güeyxadz me guieḷ ne no

meḷ ga; dzigo bdoobniu mew bdzinnie mew haxta zaatne nacpaa ro nis. Meḷ tafa, niapse ma mbeew, zeene bgab ma rgaa ma tib gayoo chooptsiiptson lo grē ma; niicle scataa nzian ma, per blēb guieḷ co, briezda.

<sup>12</sup> Blozh ga, bredz me no, në me:

—¡Goltē na, zeena gowxeren to!

Ni tib no bnabdiidzd lo me dien pe nli mew; sac, ¡rienpaa no ne nli mew!

<sup>13</sup> Dzigo wbig me bdiiz me guietxtil co lo no, bzheḷ me meḷ ne, bneedz me ma lo no.

<sup>14</sup> Ga bion vüelt brieequia me lo no wlal ne brieēban me.

### *Bzodiidznie Jesús Pedr*

<sup>15</sup> Blozhse bdiowxeren no, bredz Jesús Pedr, psilo zho bzē zho grop zho; dzigo rēb me lo Pedr:

—Simón (xingan Jonás), ¿pe nli dzigo rleynieraa luu naa que grē zha qui?

—Nquialadz naa luu —rēb Pedr—, ni nanlegaa luuw ganle.

—Pteedlo grē xpēcwxiil win naa sca —rēb me.

<sup>16</sup> Wbiire me, rēb me lo Pedr:

—Simón (xingan Jonás), ¿pe nlipaa dzigo rleynie luu naa?

—Nquialadz naa luu —rēb Pedr.

Dzigo rēb me:

—Pquianap xpēcwxiil naa sca.

<sup>17</sup> Wbiireque me stib rēb me lo Pedr:

—Simón (xingan Jonás), ¿pe nlipaa nquialadz luu naa?

Zeene bin Pedr sca rēb me, mban goc zdoo Pedr; sac gale rac tson vüelt zinabdiidz me lo Pedr, dzigo rēb Pedr:

—Luu nac men ne rnabey, luu nana grēsew, nan luu ganle nquialadz naa luu.

Dzigo rēb me:

—Telne nli nquialadz luu naa, yquiaanap luu xpēcwxiil naa sca.

<sup>18</sup> Zeene gon bii nguieg luu, led rso-ladz luu ganle luuzhal racw xab luu, rrieelo rie luu zaatne racladztaa luu; per zeene gon laa luu gac mengolraa, loxaque nia luu glis luu zhaale zha ne ygacwxab luu, ni zienie zho luu zaatne ni racladzd luu.



<sup>19</sup> Zeene znu rēb me lo Pedr, ga bzeet me zha nac guielgut ne ygaa Pedr, ni ga glu Pedr ganle pa lotaa meñ nroob nac Dios. Blozhse ga, rēbchaa me:

—¡Dēnal zhits naa!

<sup>20</sup> Dzigo nalaque naa zhits me grop me Pedr. Zeene ptsire lo Pedr, gon Pedr laa mēēdscuel ne scataa rleyne me ga, laa zho nal ga, zha ne zobpaa cue me ga lo xtsee co, zha ne wbigpaa bnaabdiidz lo me dien cho nac zha ne tsielo me ladznia zha ne gut me; dzigo rēbchaa Pedr lo me:

<sup>21</sup>—Telzhe zha rii waa, ¿pe nac miñe ted zho?

<sup>22</sup> Rēbchaa me:

—¿Pe nadien gun luu ne racladz luu gacnan luuw? Telne gacladz naa, zrieelo gnabey naa gban mgui haxta len dze ne guial naa stib. Led xcuenta luu ga. ¡Na zeen dēnal zhits naa!

<sup>23</sup> Zeene gocnan grēraa zha ne rililadz Jesús sca bnee me, grēse zho tibaque güeynie guic zho gdziñdraa dze guet naa. Per led scada, sinque znu naca, rēb me: ¡Pe gun Pedr! Telne gacladz me, zrieelo gnabey me gban naa haxta gal dze ne guiaad me stib.

<sup>24</sup> Grēse miñe pquia naa nu gon, grop lo naa gon naaw, grēse zha ne nacgrē no nanpaa zho ganle ne diidzli rne naa.

<sup>25</sup> Ndaldooraa grē ncuaane nroob ne been Jesús, tel niaca miñe yquiaw grēsew, ni ygaad dib lo guidzliu tsot-sow grē guits ne yquiaw ga.

## MINĒ BEEN ZHA NE PXEEL JESÚS BNEE XTIIDZ ME

¡Diuzh Tiofl!

<sup>1</sup> ¿Yose luu dien bets? Naa gon nac Luc, laa naa rxel stib guits rii lo luu. Mine pxel naa lo luu glo ga, lo co pquia naa grēse mine been Jesús, grēse wseed ne blu me lo miech zeene psilo me xtsiin me

<sup>2</sup> haxta gol dze ne psan me diidz pe nac ncuaane gun grē zha ne bzooblo me tsie tsienee Xtiidz me. Espiritu Sant bdeed guielbiini lo zho bien zho zha racladz me; lēē dze co ga zey me gbaa.

<sup>3</sup> Nli psacsi miech me, beet zho me, per brieegan me. Ni par glu ganle ne nli brieegan me, dipse len choo ngbidz brieequia me lo grē zha ne sca bzooblo me tsienee Xtiidz me. Gzataa zeene rriequia me lo zho, rnee me lo zho zha rnabey Dios.

<sup>4</sup> Tib vult ndxie zho grē zho me, dzigo pso me diidz lo zho ible grieed zho lad guiedz Jerusalén, haxta quiet Espiritu Sant gdeed guielbiini lo zho zigne nacle xtiidz PxoZ me; ni biire rēb me lo zho:

<sup>5</sup> —Gol soladz ganle laa naa nile lo to: nli laa Juan pchoobnis, per niab nisa; sanque to zgaa to guielbiini ne gneedz Espiritu Sant, rriequia Espiritu co chobnis to; ni zhile gdziñ dze ne laa miñ co gac.

<sup>6</sup> Len ngbidz ne sca nolulo me lo zho, tib vult bhabdiidz zho lo me, rēb zho:

—Ndion no men rnabey nac luu. ¿Pe niina na so luu gnabey luu, zeena cuee luu zha Israel ladznia zha Roma?

<sup>7</sup> Dzigo pquiab me rēb me lo zho:

—Dios, men ne nac PxoZ naa, ncuaane gun me riegualde to gacnan tow, mese nan dien pa dzew, dien pa horgaaw; sac mese nac men ne grieelo guna.

<sup>8</sup> Sinque to, zeene laa Espiritu Sant gneedz guielbiini lo to, hor co laa to ygaa poder ne rap me, laa to csilo gnee lo grē zha Jerusalén cho nac naa; tsie to dib xtan zha Judé, dib xtan zha Samar, ni lo grēragaa miech, tsienee tow.

<sup>9</sup> Blozhse sca bnee me lo zho, zowique zho lo me, dzega, dzega laa me bzoquia gbaa. Glaale ziequia me zeene znuse bdop tib xcow, laa me biongueetsse len xcow co, gondraa zho me.

<sup>10</sup> Laa zho bii quiawique zhan gbaa zaatne gon zho biongueets me ga, tibaque zeene bdziñ chop mgui zaatne zo zho ga, dib nquitsbiese rna xab grop mgui co;

<sup>11</sup> rēb me lo zho:

—¿Pe nacne squitaa quiawi to zhan gbaa? Zigne gon to i nagon zey me gbaa niina, squique quiet me gbaa gal dze ne laa me guiaad stib.

<sup>12</sup> Blozh ga dzigo laa zho wbi guic gui co (lēē Gui Oliv ga). Zhisaque bzē zho laa zho bdziñle Jerusalén, lalse ne rzē zho dze ne rdziiladz zho lo dziin.

<sup>13</sup> Bdziñ zho zaatne rbēz zho, biep zho len yu ne riaan glaa; sac len yu glaa co ga no zho. Ga rbēz Pedr, rbēz Ndrés, Jacob, Juan, Lip, Mazh, Bartol, Matew, ni Jacob ne nac xingan Alfé; Simón Zelot, ni Judas menlidz Jacob.

<sup>14</sup> Grēse zho tibaque rcaalsa zho rzodiidznie zho Dios grē zho zha bets Jesús, xniaa me Mari, ni grēraa men wnaa ne nacgrē zho.

*Bzo zha ne gun dziin ne psaan Judas*

<sup>15</sup> Tib dze pcaalsa maase tib gayoo gal zho, dzigo guso Pedr bnee me lo zho, rēb me:

<sup>16</sup> —Grēse to bets, grēse to bzian, golgacnan ganle, mine been Judas zeene sca güeyto me Jesús, nole ne sca gaca. Lo Xtiidz Dios zhobneew, lēē miñ co pquiaa rey David zeene psiaab Espiritu Santa guic me.

<sup>17</sup> Ye Judas gocgza no, ye me nac didz niun dziin ne nodziun no niina.

<sup>18</sup> Ni nligaa laa ne niun me dziin co, lel been me guielntseeb pto me Jesús,

ni blozh ga lëëque lo liu ne bziuu dimi ne bdiizh zho me ga, ga güeytsobe me bzob guic me lo liu, wbilgazh me, nëzrii nëzrec bliaal len me.

<sup>19</sup> Min co nacne zeene laa grë zha Jerusalén gocnaña, dzigo bleelë zho liu co “Liu Ren”.

<sup>20</sup> ‘Zigne rneque naa ga —rëb Pedr—, ible lo Xtiidz Dios sca zhobnee; ni lëë min co ga raquiet zaatne znu rnee:

Ible ziaandets lidz zho,  
ni stib choot gbandraa zaatne bio zho.

Ni rneequew:

Zhaale zha ne guiaanne dziin ne no niun zho.

<sup>21-22</sup> ‘Min co nagon, ible nonguiela so tib zha ne guiaan xlugar Judas, gacgza zho no guioxobneñ no ne nli brieaban Jesús. Nana sca, lo grë zha ne nacgrë no psilo bzianie no me zeene pchoobnis Juan me, haxta gol dze ne laa me zey gbaa, lad co golgotsaa cue ne tib zha ne so gacgza no.

<sup>23</sup> Dzigo ble zho tib men ne lë José Barsabás (lëëque me ga rnee zho Just), ni stib men ne lë Matí.

<sup>24</sup> Blozh ga, bnaab zho lo Dios, rëb zho:

—Dios, ndion no luu nac men ne rnabey no; ndion no luuse nac men ne runbey zdoo tib tib miech, gane niina laa no rnab lo luu, luu blu dien cho tib zha rii racladz luu so

<sup>25</sup> gun dziin ne psaan Judas; sac laa Judas zeyle zaatne rieguial Judas.

<sup>26</sup> Blozhse bnaab zho lo Dios, laa grop zha co bio rif. Nacne brieequia men ne lë Matí ga, dzigo dze cota laa me gogcza stsiiptib zha poxtl co.

## 2

### *Biaad Espíritu Sant*

<sup>1</sup> Zeene goc gadz zhmal gut Jesús, lëëtaque dze co run grë zha Israel lni ne rnee zho Pentecostés. Dze co grëse zha ne no xnëz Jesús, laa zho pcaalsa.

<sup>2</sup> Laa zho ndxie grë zho, tibaque zeene bio tib bi nroob zhan gbaa, zig nac zeene rrie tib medox, haxta len yu ne ndxie zho ga pquiab;

<sup>3</sup> ni brieequia nzian biini, rluw zig nac ludz miech, tibga tibga biini co blëz guic zho grëse zho.

<sup>4</sup> Horco grëse zho pcaania guielbiini ne bdeed Espíritu Sant, psilo zho rnee zho grë xtiidz stib miech mine rsiaabtaa me guic zho.

<sup>5</sup> Len dze co nziandoo grë zha Israel ne no stib ladz ben bdzin Jerusalén, grë zha ne bii zienal xley Dios.

<sup>6</sup> Laa zeene bio bi co, ye zho no lad grë miech guizhiu ne bdopbe zaatne zob yu co; tib tib zho zeene bin zho laa grë zha ne pcaania guielbiini co nonee xtiidz zho, per nli rzee zdoo zho.

<sup>7-8</sup> Rlozhd gwi zho rnee zho:

—¡Pe nli diidz rii! ¿Zha rrieelo rnee grë zha qui xtiidz ne, ni led zha Galilé nac zho? ¡Tib tib ne ndxie ne nu, zhaase zhaase diidz ne rnee ne!

<sup>9-10</sup> Nu ndxie grë men Part, men Media, men Elam, men Mesopotam, men Judé, men Capadós, men Pont, men Asia, men Frij, men Panfil, men Egipt, haxta grë men ne ziaad nëz África, delant guiedz Ciren; grë men Cret, men Arab, grë zha Israel ne ziaad nëz Roma, grë men Roma, zha ne zienal zhiwseed zha Israel.

<sup>11</sup> ‘Pe zhidaa ne —rnee zho—, ni diidz ne rneepaa ne tib tib ne laa ne nodzion rnee zha qui grëtaa milagrnroob ne run Dios.

<sup>12</sup> Grëse zho per nli rzee zdoo zho, rdzieldraa zho zha gun zho, rnabdiidzlsa zho rnee zho:

—¿Bay pe i? ¡Ncuaañe gard dzian ne!

<sup>13</sup> Laa nogaa zho rzhidznie, rnee zho:

—Rzudz grë zha qui, gane squi rzë xtiidz zho.

### *Bdeed Pedr tib lban*

<sup>14</sup> Dzigo bzoli Pedr gza me stsiiptib zha ne nac poxtl ga, psilo me nguiedz bnee me lo grë miech ne ndxie ga, rëb me lo zho:

—Grëse to, zigtaa zha Jerusaléna, zigtagaa zha ne blanso Jerusalén nuw, golgona ganle.

<sup>15</sup> No bla to quianee rëb to rzuudz no, per led rzuuzd no. Griinpaale name blan ngbidz, niicle niaca zha ne

riepaa nziu, niacxe goon nale laa zho gzudz.

<sup>16</sup> Led rzuudzd no, sinque niina nagon noyac grë mine bzeet Joel padzeela (tib men ne biadteed xtiidz Dios), zeene znu rëb me:

<sup>17</sup> Znu rnee Dios:

Zeene wzhile runfalt gal dze co, laa naa cxel zhiEspíritu naa zdoo grëse miech;

grë xingan zhow, grë xindzooop zhow, laa zho cteed xtidz naa,

grë zha nguieg, nzian grë ncuaane glulo lo zho,

grë mengol, nzian grë ncuaane glu mcaal lo me.

<sup>18</sup> Len dze co,

grëse zha ne nguzobdiidz lo naa, niicle mguiw, niicle wnaaw laa naa cxel zhiEspíritu naa zdoo zho, dzigo grëse zho cteed xtidz naa.

<sup>19</sup> Nzian grë ncuaane gzee zdoo to glu naa zhan gbaa,

scaque lo guidzliu, zan to ren, zan to bel, zan to grë goxdoo.

<sup>20</sup> Zeene zhile gdzin dze ne guiaad men ne rnabey ne,

laa lo ngbidz ycow, laa mëe gna nizhnie zig rna ren.

Dze ne guiaad me ga,

dze co gac tib dze ne mazdraa nroob, tib dze ne mazdraa ndzon.

<sup>21</sup> Grëse zha ne dib zdoo gnab lo Dios yquia zdoo me zho,

grëse zha co scaania me zho.

<sup>22</sup> 'Grëse to, golquiaadiaga sca ganle! Led nanwen to ganle Dios pxeel Jesús, men Nazaret ne biaad lo guidzliu rii, Dios bnabey been me grë milagr nroob, been me grë ncuaane bzee zdoo to; ga blu ganle ne nli Dios nacie me.

<sup>23</sup> Laa zeene laa Dios bdeed diidz biab me ladznia to (sac ible xtiidzle Dios naca, nanle me zha nac ne sca ted Jesús), laa to bnaaz me, bzobdoo to me, bnabey to gut me. Led to gon bloo me ladznia grë zha ntseeb ne sca psacsi me pquiaa zho me lo cruz.

<sup>24</sup> Per bleeban Dios me, psilaa Dios me ladznia guielgut; sac lëbd guielgut ne lëew gnabey lo me.

<sup>25</sup> 'Zeene bzeet David Jesús, znu rëb me:

Men ne rnabey naa, ran naa tibaque quianap me naa;

tibaque zo me cue naa nëz derech, ¿pe nac nadien ne lega pe gac naa?

<sup>26</sup> Gacxe waa, nley no zdoo naa, niicle ludz naaw, rleya roolnie naa me.

Ni gane tibliladz rac naa;

<sup>27</sup> sac nan naa niicle guet naa,

ib csaand me guiaan naa len baa,

ib gdeete me diidz xin xpëel naa.

Naa nac tib ngundziin lo me, ni rleynie me naa.

<sup>28</sup> Me blu lo naa zha grieelo ygaa naa guielmban,

ni tib guielbley nroob ne ygaa naa zeene laa naa gdzin lo me.

<sup>29</sup> 'Bets, bzian, to ne nac to menladz naa, golgona ganle: led mine bdeete pxozgol ne David bnee me nu; sac gon, zeene gut me güey zho güeyqueets zho me, ni haxta lo nadze laa xpa me bii niaa.

<sup>30</sup> Sinque mine bded Jesús ga bzeet me, sac gon tib zha ne biadteed xtidz Dios goc me. Gocnanle me ne lo xtii me grieequia Men ne nacle diidz ga cxeel Dios, ni men co sob gnabey zigne bnabey me; sac scale rëb Dios lo me, ni haxta bzeet Dios lë Dios parne glu ne yquidied me.

<sup>31</sup> Dzigo zig nac zeene ranle me grëtaa mine ted Jesús, nacie bzeet me ne ib zrieeban Jesús, rëb me guiaand xcuerp Jesús zaatne rbëz grëraa mengut, niicle xindgaaw.

<sup>32</sup> 'Jesús ga gon bzeet me, sac zig nac Jesús grop lo no bdion no bleeban Dios me,

<sup>33</sup> ni niina gbaa zob me cue Dios nëz derech, sac me nac men rnabey. Ni zigne nacle xtiidz Dios men ne nac Pxoz me, laa me pxeel Espiritu Sant lo no; ni niina grëse ncuaane noyan tow, grëse ncuaane noyongaa tow, xtsiin Espiritu Santow.

<sup>34</sup> Laa naa rbire rne lo to stib ganle, led mine bdeete David ga bzeet David; sac gon, zeene gut David güeysobd



David gbaa. Davitaque goc zha ne znu rëb:

Rëb Dios lo men ndzon ne rnabey naa:

“Cue naa nëz derech, nu bzob,

<sup>35</sup> nieeda lozh gnaz naa grëse zha ne rlëë lo luu, csañ naa zho ladz-nia luu.”

<sup>36</sup> Grëse to men wladz, golgona sca ganle: Jesús gon, men ne pquiaa to lo cruz ga, lëë men co nac men ne rnabey. Dios bzo me, ni Dios pxeel me biaad me lo guidzliu.

<sup>37</sup> Zeene bin grë miech ne ndxie ga sca bnee Pedr, biab guielnë zho, psilo zho rnabdiidz zho lo Pedr ni lo grëraa zha ne nacgza Pedr ga, rëb zho:

—Bets, nana, ÷pe nac ncuaane dzi-uun no?

<sup>38</sup> Dzigo rëb Pedr lo zho:

—Tib tib to, golsaan xquielntseeb to, golbig lo Dios, ni none chobnis to zeena guiaanmbe to lo xtol to; scagaa ible sxeel Dios Espiritu Sant gacnie to.

<sup>39</sup> Sac psanle Jesús diidz ne ible sxeel me Espiritu Sant gacnie grëse zha ne cuedz me sëëb xnëz me; zigtaa tow, zigtaa xpëed tow, zigtagaa grëraa menzita.

<sup>40</sup> Nzianraa grë ncuaane bzodiidz Pedr lo zho, ni pso me diidz lo zho csaan zho grëtaa guielntseeb ne run miech lo guidzliu rii.

<sup>41</sup> Lo grë zha ne bzoobdiag grë mine pseed me zho dze co, rgaa zho maase tson mil; blozh ga, grëse zho brobnis, laa zho gocgrë grë zha ne rliladzle Jesús ga.

### *Niowse mban zho*

<sup>42</sup> Grëse zha ne rliladz Jesús ga, dib zdoo zho zienal zho grë mine rseed grë zha poxtl co zho, tibaque rcaalsa zho rzodiidznie zho Dios, ni row zho guietxtil zigne psanse Jesús diidz gun zho.

<sup>43</sup> Grëraa zha ne zo stib lad, rdzieb zho; laa grë zha poxtl co, nzian grë milagr nroob ne run zho.

<sup>44-45</sup> Tipse rnee zho, rdeedlsa zho ncuaane rquiin zha ne nacgrë zho; zha ne quianie liu, tel pe grëragaa ncuaane quianie zho, haxta rto zhow,

dzigo rguiz zho dimi co lo grë zha ne guieñd pe yquiin.

<sup>46</sup> Gzataa dze rcaalsa zho len yadoo; rlozh ga, rcaalsaque zho lidz grë zha ne nacgrë zho row zho guietxtil zigne psan Jesús diidz ga; ine nley, ine ndooladz rbe zho grë zho rquiin zho guielwagw ne runlo zho,

<sup>47</sup> ni rley zho roolnie zho Dios. Grëse miecha, rley zho ran zho sca niowse mban zho; ni zigse zie dzew, scase scase laa Dios rbedzraa grë zha ne rzëëb xnëz Jesús, laa zho racnzian-raa.

## 3

### *Biac tib men ne në ni*

<sup>1</sup> Tib dze zig rbixwe ngbidza, brieed Pedr grop Juan zie zho yadoo nroob ne zob Jerusalén, sac lëë hor co nac horne rie zho yadoo riezodiidznie zho Dios.

<sup>2</sup> Gax ro yadoo co quia tib puert rnee zho Puert Ndzon, ga rzob tib zhey gol ib gacd së, sac nële ni me zeene gol me. Gzobse dze, rie zha ne riezooob me ga rnab me gon lo grë zha ne rzëëb yadoo.

<sup>3</sup> Laa dze co, zeene gon me laa Pedr grop Juan zieded ga ne laa zho sëëb yadoo, zëëb nia me rnab me gon lo zho.

<sup>4</sup> Dze rwi zho lo me, tibaque rëb Pedr:

—Lo no bui.

<sup>5</sup> Dzigo blis lo me bui me lo zho, nan me bod no pe dimi ne gdeed zho lo me.

<sup>6</sup> Wbiire bnee Pedr lo me, rëb Pedr:

—Quianied naa dimi ygad naa lo luu. Ncuaane grieelose gnedz naa, laaw gnedz naa niina, jniapse por Jesús (men Nazaret), laa naa rnab lo luu, niinagazh guso i zeen bzëni!

<sup>7</sup> Dzigo bzhen Pedr nia derech me bliso Pedr me, hor cogazh laa grop ni me ga bdaan,

<sup>8</sup> laa me psilo bzë. Rley me laa me bzëëb len yadoo gza me zho, lo guielbley co haxta rias me, ni roolnie me Dios.

<sup>9</sup> Grë miech ne no len yadoo, zeene gon zho laa me rzële, ni scataa rley me roolnie me Dios,

<sup>10</sup> bzee zdoo zho; sac runbey zho me, nanpaa zho rzëd me glo, tibaque ran zho me rzob me zaatne quia Puert Ndzon ga rnab me gon.

<sup>11</sup> Zeene laa Pedr grop Juan brieel len yadoo nroob co, yeque me nal zhits zho ib rsaand me zho, laa zho bdziñ stib nëz cho yadoo co zaatne quia tib nsaap nroob ne rnee zho zhiNsaap Salomón. Nalque grë miech co, rlozhd gwi zho, rlozhd gzee zdoo zho.

<sup>12</sup> Dzigo rëbchaa Pedr lo zho:

—¿Pe rac to? ¿Pe nacne squitaa rzee zdoo to, squitaa rwi to lo no, zig nac zeene no bdziuunguiac men rii, zig nac zeene por nguzobdiidz no lo Dios gane brieelo psëe no me?

<sup>13</sup> Golgacnan ganle led scada; sinque Dios men ne bliladz Abraham, men ne bliladz Isaac, men ne bliladz Jacob, men ne bliladz grëraa xmengol ne, men co blu lo to niina ne nli men nroob nac Xpëed me Jesús. Lëe Jesús co ga gon bnaaz to, bloo to me ladznia zhiwxtis ne, ni zeene gocladz Pilat nsilaa Pilat me, pe liaadz to ndeed to diidz.

<sup>14</sup> Bdeete to diidz nlaa men ne nac men ndzon, men ne peet xtold; lel bhab to blaa tib zha ntseeb ne nzëeb ngutoo.

<sup>15</sup> Laa me, pquia to haxta beet to me, ni me nac men ne rdeed guielmban. Per bleeban Dios me, ni mban me niina; sac grop lo no bdziñ no me.

<sup>16</sup> Ni niina men ne ran to biac nu, niapse por Jesús biac me; led runbeyle to me nanle to ganle rzëd me glo. Ne dib zdoo no riladz no Jesús, gane brieelo bhab no beenguiac Jesús me.

<sup>17</sup> Grëse to bets, ne nac to menladz naa, rgobey naa niicle to ni niiclegaa grë zha ne nac zhiwxtis ne, lega laa to bnabeyse bgaa Jesús beet to me, niicle to biendaque dien pe nacne sca been to.

<sup>18</sup> Laa Dios bneedz diidz been to grë guielntseeb co, sac sca goc grëse minë

bzeet grë zha ne biadteed xtiidz Dios padzeela, zeene bzeet zho zha nac grë guielnë ne ted Jesús, Men ne nacle diidz cxeel Dios guiaad lo guidzliu.

<sup>19</sup> Dol nroob ga gon been to, gacxe nana gon waa golsaan xquielntseeb to, golbig lo Dios; zeena csaambe me to lo xtol to. Me gneedz guielbley lo to stib,

<sup>20</sup> ni zbiire cxeel me Jesús lo to stib, guidaasilaa me to.

<sup>21</sup> Gbaa no me niina, ni ga cuëz me nieeda gal dze ne laa Dios blozh bnabey goc grëse ncuaane none gac, zigne bzeetse grë zha ne pxeel me padzeela, biadteed xtiidz me.

<sup>22</sup> Zig nac Moisés bzeet me laa Jesús guiaad, rëb me lo grë pxoz gol ne: “Dios men ne rnabey ne, ible znabey me ne lo xtii to grieequia tib men ne gac zig nac naa lo to niina. Zeene laa me guiaad, golgon xtiidz me;

<sup>23</sup> sac zha ne gond xtiidz me, ib tedsod znitlo zho.”

<sup>24</sup> Scaque Samuel, ni grëraa zha ne biadteed xtiidz me, grëse zho bzeetle zho grë ncuaane noyac len dze rii.

<sup>25</sup> Grëse to, xmengol to nac grë zha co, ye to ga rëb Dios gunlay me zeene znu biaan me diidz grop me Abraham, rëb me: “Niapse por tib men ne grieequia lo xtii luu, laa naa gunlay grëse miech ne ndxie gdibdoose lo guidzliu.”

<sup>26</sup> Ni niina ne laa Dios bleeban Jesús, gloque lo to pxeel me me, gunlay me to, zeena csaan to xquielntseeb to.

## 4

### *Güeyzo zho zho lo wxtis*

<sup>1</sup> Laa Pedr grop Juan bii noneeque lo grë miech co, zeene laa bla zha ne nac pxoz bdziñ ga, bdziñnie zho tib zha non ne quianap yadoo co ni zla zha ne nacgrë zha saducé.

<sup>2-3</sup> Zigne bdziñ zho bnaaz zho Pedr grop Juan, güeysëeb zho zho ladzguib; ni ne bdzele dzew, ga biaan zho dipse guieel co. Rlëe grë zha co, sacne laa Pedr grop Juan quianee lo grë miech co zha bleeban

Dios Jesús; ni rnee zho grëse mengut, scaque grieewan zho.

<sup>4</sup> Niicle ne scataa rlëë grë zha rnabey co, per nzian zha ne ndxie ga bliladz Jesús; zig gaay mil rgaa lox- aque zha bgui.

<sup>5</sup> Zeene biini liu co, grëse zha non, grëse zha ne rnabey lo menguedz, laa zho pcaalsa.

<sup>6</sup> Ga bdziñ Anás men ne nac pxoz nroob ne rnabey, ga bdziñ Caifás, bdziñ Juan, bdziñ Lejandr ni grë zha ne nac menlidz pxoz ne rnabey ga.

<sup>7</sup> Dzigo bnabey zho gocredz Pedr grop Juan, bzo zho zho glowtaa, bnabdiidz zho lo zho, rëb zho:

—Golnë nadien, ¿cho rnabey to, cho pxeel to ne squi no to?

<sup>8</sup> Horco laa Espíritu Sant bdeed guielbiini lo Pedr, pquiab Pedr rëb Pedr lo zho:

—Grëse to ne nac to zha ne rnabey lo menguedz, grëse to ne nac to zha gol ne non xtiidz.

<sup>9</sup> Telne mine rlisqui to nac ne dien zha bdziuun no men rii ne laa ni me biac,

<sup>10</sup> golsiguiel golquiaadiaga ganle, zeena gacnan tow ni gacnan grëragaa menguedza. Jesús gon, men Nazaret ne bnabey to gut lo cruz ga, men ne bleeban Dios ga, men co beenguiaac men rii; ni laa to rangaa me laa me zo lo ne nu.

<sup>11</sup> Lëë Jesús ga raquiet lo Xtiidz Dios zaatne znu rnee: “Quie ne psëëb zha ne nozaa yu, ni nand zho lëëpaa quie co nac mine rnazdziits yu.” Ni scapaa nagon bzhaac to me.

<sup>12</sup> Loxaque me zrieelo csilaa ne lo xtol ne, sac bzodraa Dios cho stib zha ne niaad lo guidzliu niaadsilaa miech.

<sup>13</sup> Zeene gon grë zha wxtis co, scataa peet dzeb nod lo Pedr grop Juan, bzee zdo zho; sac runbey zho Pedr, runbey zho Juan, nacd zho cho zha ne güeywseed nroob. Ga gon zho, pa lotaa guielbiini ne bgaa Pedr grop Juan ne bzënie zho Jesús.

<sup>14</sup> Peet brieelod nlisqui grë zha co, sac nligaa laa men ne biac ga zo lo zho ga.

<sup>15</sup> Dzigo mazd bnabey zho brieed Pedr ley grop me Juan; laa zho biaan bzodiidz zho dien zha gun zho zho,

<sup>16</sup> sac rien zho tib milagr nroob ga sca biac ni men co; niicle ne racladz zho yqueets zhow, per grële menguedz bina.

<sup>17</sup> Nacne biaan zho diidz, ctseb zho zho gbiiredraa zho cseed zho miech zhiwseed Jesús; zeena lozhd gacnan grëraa miech zha biac men co.

<sup>18</sup> Dzigo bredz zho Pedr stib, grop me Juan, goctox zho lo zho.

—Laa no rso diidz lo to gon —rëb zho—, gbiiredraa to cseed to miech zhiwseed men ne rnee to Jesús ga.

<sup>19</sup> Pquiab Pedr grop Juan, rëb zho:

—Zha dien rzac to, ¿pe nonguiela ga laa ne dziuun no mine rnabey Dios, lel mine rnee to i dziuun no?

<sup>20</sup> Grieelod gon dziuun no mine rnee to i, sac grëse ncuaane bdzion no, grëse ncuaane bdzion gaa no ib none gnee now, zeena gacnan grëse miecha.

<sup>21</sup> Dzigo wbiire grë zha rnabey co, ntseeb rac zho lo zho pso zho diidz csetraade zho miech; blozhse ga laa zho psilaa zho. Bdeetew diidz nsacsi zho zho, sac ndal miech ne rleyne Dios, rdeed zho xquizh lo me ne been me milagr

<sup>22</sup> beenguiaac me men co, ni choole iz rac sca gacd së me.

### *Bnab zho lo Dios*

<sup>23</sup> Zeene laa Pedr grop Juan bdziñ lo grë zha ne nacgrë zho, bzodiidz zho grëse tel zha rëb grë zha rnabey co, zha rëb pxoz non co.

<sup>24</sup> Grë zha ne nacgrë zho ga, zeene bin zhow grëse zho psilo zho bnab zho lo Dios, rëb zho:

—Dios, luu nac men ro ne rnabey grëta ncuaane no, luu bzaa gbaa, luu bzaa guidzliu, luu bzaa nisdoo, luu bzaa grëraa ncuaane no.

<sup>25</sup> Padzeela zeene bdeed Espíritu Sant guielbiini lo pxozgol no David, men ne been xtsiin luu hor co; znu bnee me:

¿Pe nacte squitaa rac grë miech ne nacd zha Israel rlëenie zho Dios?

Racladz zho gun zho ncuaañe ni grieelod lo zho.

26 Grëse zha non ne rnabey grë guiedz,

tipse rac zho laa zho racntseeb lo Dios rlëenie zho me,

ni rlëenie zho meñ ne bzooblo me pxeel me lo guidzliu.

27 'Ni nligaa na scase goca. Guiedz Jerusalén nu, nu biaad rey Herod, biaad Pons Pilat, pcaalsa zho grë zho menladz no ni grë menzit, tipse bnedidiz zho psacsi zho Jesús, meñ ndzon ne bzooblo luu pxeel luu biaadgun xtsiin luu lo guidzliu nu.

28 Grëse zigne psanle luu diidz, scase been zho.

29 Ni scaque niina, bui ganle zha racladz zho ctseb zho no parne peet gneedraa no; luu nac meñ ne gocniñ no ne nac no zha ne rdziuun xtsiin luu, zeena gdzieebd no cseed no miech xtiidz luu.

30 Laa no rnab lo luu, beenguiac grë meñ rzacnë, been grë milagr nroob, blu grë ncuaañe gzee zdoo miech; zeena gan zho ganle meñ nroob, meñ ndzon nac Xpëed luu Jesús.

31 Zeene blozh bzodiidznie zho Dios, masaque bzhidz zaatne ndxie zho ga; hor co grëse zho laa zho bgaaraa guielbiini ne bdeed Espíritu Sant lo zho; peet rdziebdraa zho laa zho zieseed miech Xtiidz Dios.

32 Len dze co, grëse zha ne rliladzle Jesús ga, tibaque nac zho, tibaque rnee zho, tibaque nac mine zienie guic zho. Nod zha ne guiab lose zho yquiin ncuaañe rap zho; sinque grëse ncuaañe quianie zho chen grë zho naca.

33 Grë zha poxtl co, zeene rseed zho miech zha brieaban Jesús, nzian zha ne rliladz me; rlupaa ne Dios nactie zho.

34-35 Ne nligaa tipse nac zho grë zho, nod zha ne guiab ne guiend pe yquiin, sac grëse zha ne quianie liu, zha ne quianie nzian yu, rto zhow

dzigo rdeed zho dimi co rguiz grë zha poxtla lo zha ne rquiina.

36 Sca been tib meñ ne nacgrë zho lë José. (Zha xtii Leví nac me, gol me tib lo guidzliu win ne no lo nisdoo lë Chipr; zha poxtl-le bleelë me Bernabé. Bernabé, nac zig nac ne rnee ne: Zha ne rchoobladz zdoo miech.)

37 Pto me tib lë liun me, dzigo bdeed me dimi co lo zha poxtl, bdiiz zhow.

## 5

### *Znu bzhaac Ananí grop Safir*

1-2 Tib mgui lë Ananí, laa tsieel me lë Safir; ye me pto tib lë liun me. Gonlo tsieel me, tel palal dimi ne bdo liu co, bzheñga me zhisa. Zeene laa me ziesan mine biaan ga, lo poxtl, rëb me lëe grë dimi ne bdo liun me ga.

3 Dzigo rëbchaa Pedr lo me:

—Ananí, ¿pe nacte bdeed luu diidz bzëeb mendox zdoo luu? Mendox i gon noquiil luu nan luu yquidiee luu Espíritu Sant, rnee luu lëe grë dimi ne bdo liun luu nu.

4 Bien ganle chen luu liu co. Dimi ne bdiizh zhow, chen luuw, niac niun luuw zigne niaccladztaa luu, ¿pe nac dzigo ne racladz luu yquidiee luu? Gon ganle led nod noquidiee luu, Dios i gocladz luu nquidiee luu.

5 Loxaque sca bin Ananí bnee Pedr, znuse biab Ananí liu, gagazh gut Ananí. Grëse miech ne bina, bdzieb zho.

6 Dzigo güey bla zha nguieg pchel zho ngutoo co lar, blis zho me ga laa zho ziequeets me.

7 Wdzeelaaque goca zeene laa tsieel me bdzin, ni lalnu güeynied guic me ne laa tsieel me gutle.

8 Bnabdiidzaque Pedr lo me, rëb Pedr:

—Bnë dien, ¿pe nli lëe grë dimi ne bdo liun to nu?

Pquiab wnaa co, rëb me:

—Nliw, lalgui pto now.

9 —¿Pa brieer pensar qui lo to grop tsieel to? —rëb Pedr—. Ne squi tipse bnee to nan to yquidie to Espíritu Sant; dol nroob i gon been to lo Dios.



Laa zha ne güeyqueets tsieel luu blan-sole ro yu nu, ni niina gon laa zho güeya que luu.

<sup>10</sup> Diidz co blozh brieer ro Pedr, znuse biab wnaa co liu, guchedraa me ga. Zeene laa gza zha nguieg co bzëeb len yu, laa me nixle ga; gon zho gutle me, dzigo blis zho me güey zho güeyqueets zho me cue xpa tsieel me.

<sup>11</sup> Grëse zha ne gon sca goc men co grop me, zha ne bingaaw, zigtaa zha ne riladz Jesús a zigtagaa grëraa miecha, per nli bdzieb zho.

<sup>12</sup> Grë zha poxtl co, tiba que rcaalsa zho tib lo nsaap ne quia cho yadoo ga rnee zho zhi Nsaap Salomón; nzian grë milagr ne rdeed Dios diidz run zho.

<sup>13</sup> Grëse miech ne rcaalsa ga, rleynie zho grë zha poxtl co, nzian zho riladz mine rseed zho, per rbigd zho gacgrë zho zho.

<sup>14</sup> Zigse zie dze, scase racndal-  
raa miech ne rzëeb xnëz Jesús, mguisa que wnaasa que laa zho riladz me dib zdo zho.

<sup>15</sup> Zhoob diidz scataa milagr ne run grë zha poxtl co. Dzigo psilo miech rbee zho grë men rzacné, rguix zho me ro nëz, no me zhoobse lo xlon me, no me zhoob lo yag ne ney zho me; rquiambëz zho maase zhimplëse Pedr guiab lad grë men co zeene laa Pedr ted.

<sup>16</sup> Haxta grë guiedz win ne ndxie gax Jerusalén ga, rrieer grë miech rdziñnie zho grë men rzacné, no grë men co noguitnie mendox; grëse zho runguiac zha poxtl co zho.

### *Bio grë zha poxtl ladzguiib*

<sup>17</sup> Zeene gon men ne nac pxoz nroob ne rnabey, ni grë zha saducé, scataa racnie miech grë zha poxtl co, per nli blëe zho,

<sup>18</sup> bnabey zho bgaa zho psëeb zho zho ladzguiib stib.

<sup>19</sup> Pcow liu co, guieela bdziñ tib xanj Dios pxal me ro ladzguiib, blee me zho ga; dzigo rëb me lo zho:

<sup>20</sup> —Goltsie len yadoo, grëse miech ne ndxie ga golnee lo zho, zeena gacnan zho zha yгаа zho guielmban ndzon ne nodeed Dios niina.

<sup>21</sup> Biinigazh liu, silgaw laa zho bdziñle len yadoo; psilo zho laa zho noseed grëse miech ne ndxie ga.

Laga laa zho noseed miech len yadoo, laa men ne nac pxoz nroob ga, grë me zha ne nacie me, bnabey zho ycaalsa zha ne nac wxtis ni grë zha non lo menguedz.

Zeene laa grë zha co pcaalsa, dzigo pxeel zho zha ne ziebee grë zha poxtl co ladzguiib.

<sup>22</sup> Bdziñ zho ro ladzguiib, ni tib choot guiend leen co; rzhitsaque wbire zho güeynie zho diidz,

<sup>23</sup> rëb zho:

—¡Choot guiend len ladzguiib! Dziits niooga bdziñ no, ga zo zha ne quianap; per zeene bzhiäl ro ladzguiib bziaab no, bdziñ no choot guiend leen co.

<sup>24</sup> Grë pxoz ne rnabey, ni men ne zo lo menguiib ne rquianap yadoo, zeene bin zhow, rdzieldraa zho zha gun zho.

<sup>25</sup> Lëëtaaque sca no zho, zeene bdziñ tib zho rëb:

—Zha ne gon bloo to ladzguiib ga, laa zho nolaque len yadoo noseed zho miech.

<sup>26</sup> Lëëlëd brieer men ne zo lo grë menguiib ne rquianap yadoo, brieer nie me bla xaguiib me, güey zho niapse wen diidz güeyxi zho zha poxtl co len yadoo; sac rdzieb zho ngoquie grë miech co zho.

<sup>27</sup> Zeene bdziñnie zho zho lo grë zha wxtis co, dzigo rëb men ne nac pxoz nroob ga lo zho:

<sup>28</sup> —¿Pe nacie ronde to diidz? Led pso no diidz lo to csetraade to miech zhiwseed mgui ne nac Jesús ga. Ni na gon dible lad guiedz nu nozhoobnen zhiwseed to i, haxta rcaadzdoj to no ne no bdziuut me.

<sup>29</sup> Dzigo pquiab Pedr rëb Pedr:

—Rdzion no mine rnabey samiech no, per glo none dziuun no mine rnabey Dios no.

<sup>30</sup> Men co bliladz grë pxozgol ne, ni men co gon bleeban Jesús, men ne sca psacsi to beet to lo cruz.

<sup>31</sup> Ni meque zeynie Jesús gbaa, bzoob me Jesús cue me nëz derech; sac Jesús nac men ne rnabey, men ne rsilaa miech lo dol. Ni Jesús gon, gdeed guielbiini lo grëse men Israel gbiire gbig zho lo Dios stib; zeena gunquizhd me zho xtol zho.

<sup>32</sup> 'Mine rnee no lo to nu diidzliw, nozhal bdziona, ni led loxaque nod-segaa; sinque ye Espiritu Sant men ne rxeel Dios racnie grë zha ne ron xtiidz me, ye men co quianee ganle ne nliw.

<sup>33</sup> Zeene bin zho sca rëb Pedr, blëeye zho, rzac zho tebaa gagazh gut zho gza zha poxtl co.

<sup>34</sup> Lad zha wxtis co no tib zha farisé lë Gamaliel, ye me rseed miech Xley Dios, tib zha non nac me lo menguedz; dzigo guso me bnabey me brie grë zha poxtl co nëz ley,

<sup>35</sup> bnee me lo grëraa zha ne ndxie ga, rëb me:

—Grëse to menguedz, laa naa rso diidz lo to, golcobey gon dien pe gun to zha qui. Golguien ganle, nonguielda ne lega mine gacladztaa to gun to zho.

<sup>36</sup> Golsoladz ganle, padzeela squi bio tib men ne brieelë Teudas, rëb me laa me niac tib zha ne nabey, ndal zha ne wbig lo me, goclo zho zig tap gayoo. Ni pasë me nabey, zeene laa me gut nëzrii nëzrec bliaal grë zha ne gocnie me ga.

<sup>37</sup> Laa len iz ne nodop lë miech, scaque brieequia tib men Galilé brieelë Judas. Ndal zha ne gocnie me, per zeene laa me gut scasaque nëzrii, nëzrec bliaal grë zha ne gocnie me; brieelodaque pe niun me.

<sup>38</sup> Gane nagon rne naa lo to, mazd peet gunde to zha qui, golsaan zho squise golsilaa zho. Tsow glu telne guicse miech biab wseed ne ziaadnie zho i, zdzin dze ne nitlow.

<sup>39</sup> Laa telne nligaa Dios rsiaab guic zho squi rseed zho miech, niacxe zlëb to gnitlo to wseed ne ziaadnie zho.

¡Telne guiab to gnitlo tow, nande to nend Dios ga tilnie to!

<sup>40</sup> Grëse zha wxtis co bzoobdiag zho xtiidz Gamaliel, bien zho ne scataa nonguiel gaca. Dzigo biire bredz zho grë zha poxtl co, bdiñ zho zho, ni biire pso zho diidz lo zho gbiiredraa zho cseed zho miech zhiwseed Jesús. Blozhse ga, dzigo laa zho psilaa zho.

<sup>41</sup> Zeene laa zho wbi ga, rley zho por grëtaa mine pteed grë zha non co zho loxaque ne rililadz zho Jesús.

<sup>42</sup> Ib psaand zho zhiwseed Jesús, gzobse dze rie zho yadoo ni rieque zho stib yu stib yu, rnee zho lo miech ne nli lëe Men ne zëëble diidz cxeel Dios lo guidzliu ga nac Jesús.

## 6

### *Bzo gadz zha ne gun xyudar poxtl*

<sup>1</sup> Ni ne len dze co quiayac nzianraa miech ne rzëeb xnëz Jesús, dzigo psilo grë zha Gres rlisqui zho, rnee zho rdioond grë wnaa viud ne nac zha ladz zho zaacse; zeene rgaaz ncuaane row zho, rgaad zho lal mine rga grë wnaa viud ne nac zha Israel.

<sup>2</sup> Dzigo nacte bredz gza tsiipchop poxtl co grëse zha ne nole xnëz Jesús ga, bnee zho lo zho rëb zho:

—Gacnan to ganle, grieelodraa ne noque so dzian no dien zha ygaaz ncuaane yquiin to, sac gon nonguielda csaan no mine nac xtsiin no, ib none guioseedraa no miech Xtiidz Dios.

<sup>3</sup> Min co nagon, mazd golzo gadz zha bgui ne gun dziin co, lëeraasi golguien cho gzo to; golguib zha ne ndzinli, zha ne nixbiini, zha ne nactie Espiritu Sant;

<sup>4</sup> zeena sca guiob lo no gzodiidznie no Dios, gnab no lo me, ni cseed no grëraa miech Xtiidz me.

<sup>5</sup> Grëse zho rëb, wen sca gaca. Horcogazh psilo zho ble zho zha ne so gun dziin co. Bzo zho tib men lë Lip, tib men lë Prócoro, tib men lë Nicanor, tib men lë Timon, tib men lë Parmen, tib men lë Xteb, rlupaa dib zdoo me rililadz me Dios ni nactie Espiritu Sant me; ni tib men Antioquí

lë Nic, mazd glo Nic goc tib zha ne bleyniedox grë zhiwseed zha Israel.

<sup>6</sup> Dzigo güeynie zho gza zha co lo zha ne nac poxtl. Blozhse bñab poxtl lo Dios gacniën me zho, dzigo pxobnia poxtl guic zho, bñab zho lo Dios gdeed me guielbiini lo zho.

<sup>7</sup> Zigse zie dze, laa Xtiidz Dios quia-gaazraa dib Jerusalén. Nzian grë zha ne rzëëb xnëz Jesús, haxta grë meñ ne nac pxoz, nzian zho laa zho bliladz me dib zdoo zho.

### *Bnaaz zho Xteb*

<sup>8</sup> Goc palal dzew, nzian grë milagrnroob ne run Xteb, sac tibaque sca dib zdoo me rliladz me Jesús, ni nacie Espíritu Sant me.

<sup>9</sup> Laa tib dze, brieequia bla zha ne rie tib xyadoo win zha Israel, lë “Esclavos Libertados” gocladz zho ndildiidznie zho Xteb. Brieequie zla zha Israel ne ziaad nëz Ciren, nëz Alejandri, nëz Cilis, ni nëz Asia, ye zho gogza zha co rlëë zho lo Xteb.

<sup>10</sup> Gonse zho rlëbd xtiidz zho lo Xteb, sac niapse Espíritu Sant rdeed guielbiini lo me, rien me pe rnee me lo zho;

<sup>11</sup> dzigo bdiizh zho bla zha ne ptsieets diidz, pquidie zho rëb zho bin zho laa Xteb noneenë Moisés ni rneenë me Dios.

<sup>12</sup> Zeene bin menguedza, blëë zho; nacie bnabeyaque zha ne rnabey lo menguedz bñaa Xteb güeyzo zho me lo wxtis.

<sup>13</sup> Ni güeynie zho bla zha ne lega bnexuu, rëb zho:

—Nliw, rtsidil mgui qui xyadoo ne, rtsidil me xley ne.

<sup>14</sup> Bdzionpaa no gon quianee me laa Jesús meñ Nazaret ne quiazeet zho dib i ctsil yadoo rii, ni ctsëë me ley ne psan Moisés lo xmenlog ne.

<sup>15</sup> Horco zeene laa grë zha wxtis co ni grëraa zha ne ndxie ga bui lo Xteb, gon zho tib biini nroob ne riab lo me, masaque rlu me zig rlu tib xanjl Dios.

## 7

<sup>1</sup> Dzigo bñabdiidz meñ ne nac pxoz nroob ga lo Xteb, rëb me:

—¿Bnë dien pe nli quiayun luu grë ncuane rnee zho i?

<sup>2</sup> —Grëse to ne nac to menladz naa —rëb Xteb—, laa naa rzaac to zig bets naa, zig pxozgaa naa. Golsiguiel golquiaadiag chop tson lan diidz ne gne naa lo to nu ganle: Padzeela, zeene bii no pxozgol ne Abraham dan ne lë Mesopotam, brieequia Dios ndzon ne no gbaa lo me, rëb Dios

<sup>3</sup> grieë me ga, csañ me grë menlidz me, tsie me nëz ne glutaa Dios lo me.

<sup>4</sup> 'Nacne brieë me xtan zha Caldé ga, bey me nëz Harán, ga wban me zhis. Laa zeene laa pxoz me gut, dzigo laa Dios biaadnie me nëz rii, zaatne mban ne nu niina.

<sup>5</sup> Niicle ne laa me blanso lo liu rii, ni tib lë win zaatne so ni me bdeete Dios lo me; per rëb Dios ib grë zha xpëed me guiaanniew. ¡Ni laa me quianied mëed len dze co!

<sup>6</sup> Rëbgazh Dios lo me, ib zieban grë zha xpëed me ga ladz ben dipse len tap gayoo iz, ga csacsi miech zho guncun zho zho dziin.

<sup>7</sup> “Per ib tedsod sacsi naa zha ne csacsi zho ga”, rëb Dios, “ni ga grieë zho glanso zho nu, nu goolnie zho naa.”

<sup>8</sup> 'Ni parne glu ib zac mine bnee Dios lo Abraham ga, dzigo psan me diidz grëse mëëdbgui ne grieequia lo xtii Abraham none tso tib bey lad zho. Min co nagon, zeene laa xpëed me Isaac goc xon ngbidz, laa me bloo Isaac bey co. Scaque been Isaac xpëed me Jacob, ni scaque been Jacob gza tsiipchop zha ne goc xpëed Jacob; lëë gza tsiipchop zha co nagon goc pxozgol ne.

<sup>9</sup> 'Ziese pxozgol ne ga, blëënie zho bets zho zha ne lë José, pto zho José lo meñ ne zie wto nëz Egipt. Ni ne nacie Dios José,

<sup>10</sup> psilaa me José lo grëtaa guielnë ne bded José, ni gacniën me José beenbey rey Egipt José. Ib psand me José, bdeed me guielbiini lo José. Zeene gon rey co scataa meñ nixbiini nac José, dzigo bnabey me bzo José goc me tib meñ non ne bnabey dipse

Egipt; haxta grē ncuaan non ne no lidz rey, me bnabeya.

<sup>11</sup> Lëëtaaque len iz ne nac me dziin, biaad tib gbin; dipse xtan zha Egipt, dipse xtan zha Canaán mban bded miech. Grē zha ne goc pxozgol ne ga, guiendraa pe gow zho.

<sup>12</sup> Laa zeene bin Jacob laa zhobx-til bii no Egipt, dzigo pxeel me zho güeyxi zho zhob ga.

<sup>13</sup> 'Zeene goc chop vuilt ziexi zho zhob Egipt, dzigora gocnañ zho bets zho ga rnabey Egipt; niiclegaa rey cow, hor coraa beenbey me bets José.

<sup>14</sup> Dzigo bnabey José güeyxi zho pxoz me Canaán, güeyxi zho tsiel zho, güeyxi zho xpëed zho. Lo grē zho rgaa zho tsongal tsiin, laa zho bdzin Egipt.

<sup>15-16</sup> 'Sca nacne laa Jacob bey Egipt. Ga gut me, dzigo güeyqueets zho me Siquem, tib len baa ne bzhii Abraham lo Hamor; scaque grē xpëed me zha ne goc pxozgol ne ga, ga gut zho.

<sup>17</sup> Grē zha ne brieequia lo xtii zha gol co, zha ne na guiab ne nac menladz ne, ndal iz ne bio zho Egipt ga, ni ndaldoo goc zho. Laa zeene ziaadyob cuee Dios zho ga zigne rëble me lo Abraham glo,

<sup>18</sup> laa men ne nac rey Egipt len dze co, psilo ptsidil zho; sac rsoladz-draa me grëtaa dziin ne been José lo menladz me.

<sup>19</sup> Psacsi me zho, been me zho zigne gocladztaa me, haxta bnabey me grëse mëëdbgui ne ral gandraa zho win parne guet win.

<sup>20</sup> 'Len dze copaa nagon gol Moisés, tib mëed niow nac win. Tson mëë bloolan xnial win win,

<sup>21</sup> laa zeene brieelodraa ngolan me win, dzigo güeysan me win tib ro guiubee Egipt, ga bdziel tib xindzoo rey win. Wnaa co gon win, biaan win lo me zig tib xpëed me;

<sup>22</sup> haxta bioxco me grëse wseed ne rac zha Egipt, pseed win. Zeene laa win broob, tib men nixbiini goc win, niicle ne gnee wina, niicle ncuaane gungaa wina.

<sup>23</sup> 'Choo iz rap Moisés, zeene biab guic me güeyted me lo menladz me.

<sup>24</sup> Dzigo gon me laa tib zha Egipt quiaguin tib zha Israel; nacne bzëëbaque me bla me zho, beet me zha Egipt co.

<sup>25</sup> 'Sca been Moisés, nan me nien grē zha Israel ne Dios bzo me gacnie me zho, csilaa Dios zho ladznia zha Egipt; per biend zho ne scaw.

<sup>26</sup> Biini liu co, gon me laa chop zha Israel nodil, zie me nla me lo xtil zho, bnee me lo zho nonguield ga til zho, guien zho ganle menladzaque zho.

<sup>27</sup> Dzigo biasaque tib zha ne no-quiaaw ga pcheep zho me, ntseeb rac zho rëb zho lo me: "¿Cho bzo luu guiaadnabey luu no, guiaadlisquigaa luu dien pe nodziun no?"

<sup>28</sup> ¿Te racladz luu ye gutaque luu no zigne beet luu zha Egipt co nieeg?"

<sup>29</sup> 'Zeene bin Moisés sca rëb zha co, hor co bzhooñ me bey me nëz xtan zha Madián. Nëz co ptsieelnia me, ga gop tsiel me chop mëëdbgui.

<sup>30</sup> 'Choo iz goc no me nëz xtan zha Madián, tib dze no me cho gui Sinaí, tibaque zeene gon me laa tib anjl zo groltaa tib lo yag zarz, masaque rso bel lo yag co.

<sup>31</sup> Bzee zdoo me, lëëtaaque laa me zie gbiggax me, zeene bin me tsi Dios rëb Dios lo me:

<sup>32</sup> "Naa nac Dios ne bliladz pxozgol luu Abraham, pxozgol luu Isaac, pxozgol luu Jacob."

'Zeene bin Moisés tsi Dios, per nli bdzieb me; lo dzeb co per ni blisdraa me lo me nwi me.

<sup>33</sup> Dzigo bnee Dios stib, rëb me lo me: "Blit lab luu, sac gax lo naa i zo luu.

<sup>34</sup> Laa dze nagon bdzin ne laa naa csilaa grē zha Israel ladznia zha Egipt; sac ran naa zha nactaa grē guielnë ne noded zho ga, ron naa blactaa roon zho nosacsi zha co zho. Ni luu bzooblo naa tsiebee zho ga."

<sup>35</sup> 'Dzigo laa Dios pxeel Moisés ziesilaa me zha Israel; niicle ne glo rëb zho lo me: "¿Cho bzo luu guiaadnabey luu



no, guiaadlisquigaa luu dien pe nodz-iuun no?" Per me bzo Dios bnabey lo zho, blee me zho Egipt.

<sup>36</sup> 'Nzian grē milagr, nzian grē ncuaane nroob ne gzee zdoo ne been Moisés blee me zho ga; zigtaa len guiedz Egiptow, zigtaa lo Nisdoo Nizhniew, zigtagaa grē dan bidz ne bio zho dipse len choo iz ne bzēnie me zho ga.

<sup>37</sup> 'Moisés ga bzeet lo pxozgol ne, ne laa Dios gnabey lo xtiique zho grieequia tib men ne cxeel me guiadteed xtiidz me, zigne pxeel me Moisés.

<sup>38</sup> 'Zeene nonie Moisés zho grē dan bidz co, Anjl ne bnee lo me guic gui Sinaí, me pteed xtiidz Anjl co lo zho; me pcaania ley ne biaan lo ne ga, diidz ne rap guielmban.

<sup>39</sup> Per ib bind zho xtiidz me, lel gocladz zho mbiire ney zho Egipt stib,

<sup>40</sup> bnabey zho Aarón rēb zho: "Bzaa tib mdio tedner lo no gacnieñ no laa no guioo Egipt stib; sac loxaque biadbee Moisés no ga, na choot nan dien yo Moisés."

<sup>41</sup> 'Dzigo bzaa zho tib ngon yeen goc zhimdio zho, haxta beet zho grē ma ne bloogon zho lo mdio co; bleynie zho ncuaane bzaania zho.

<sup>42</sup> Nacne wbiñladz Dios, psaan me zho; psilo zho bleynie zho grē ncuaane ran zho zhan gbaa. Been zho zigne bzeetse zha ne biadteed xtiidz me padzeela, zeene rēb zho:

Golsoladz ganle,  
laa ne nleynie to naa dipse len choo iz  
ne bio to grē dan bidz co,

laa ne niut ma ne ngogon to lo naa,

<sup>43</sup> lel grē mdio ne bzaa to, mdio co bleynie to, lo mdio co pquiits-gzhib to.

Mdio ne rnee to Moloc,  
zaatne zieetaa to tibaque ney to lidza,  
zhmel mdio ne rnee to Renfán, pa  
csaan to ma.

Mincoxe waa, laa naa cuee to ladz to,  
gzonēz naa to guey to grē dan ne ri-  
aan zitraa lo guiedz Babiloin.

<sup>44</sup> 'Len dze ne sca bio pxozgol ne grē dan bidz co, tib yu larse goc xyadoo zho, ga biotsow quie ne quia xley

Dios. Dioszhal blu lo Moisés zha tsaa yu co.

<sup>45</sup> Goc bla iza, zeene blozh bnitlo Dios grē guiedz ne brin nu glo, laa Josué blansonieque yu co. Haxta len dze ne goc David rey, bii lēew nac xyadoo zho.

<sup>46</sup> 'David goc tib rey ne gocnziuu lo Dios, bleynie Dios me, dzigo gocladz me nzaa me tib yadoo nroob zaatne mbēzlo zho Dios.

<sup>47</sup> Per brielod nzaa mew, Salomónraa goc rey ne bzaaw.

<sup>48</sup> Nli laa yadoo co biala, per tel Dios, men nroob nac me, led yed me cuēz len grē yu ne rzaa miech.

<sup>49</sup> Zigne zhobneeque lo Xtiidz me, zeene znu rēb me:

Gbaa nac zaatne zoob naa,  
laa lo guidzliu nac zaatne rzo ni naa.  
¿Zha nadien nac yu ne nan to gzaa to  
cuēz naa?

¿Pa nadien guiab to gzaa to zaatne  
gdziiladz naa?

<sup>50</sup> ¿Niacxe led naad bzaa gbaa?, ¿niacxe  
led naad bzaa guidzliu?

<sup>51</sup> 'Golgona sca ganle —rēb Xteb—, zigne beenaque grē pxozgol to ga padzeela, scadaaque gon quiayun to niina. Miech nad, miech ntseeb zdoo nac to; ib ronde to mine rnee Espíritu Sant.

<sup>52</sup> Tel pxozgol to, nēlte gonze zho grē zha ne pxeel Dios biadnee xtiidz me; haxta beet zho grē zha ne bzeet ne laa Dios cxeel tib men peet xtold ne bzooblo me guiaad lo guidzliu. Ni niina ne laa Dios pxeel men co, scasaque been to, ptsidil me, bnabey to bga me beet to me.

<sup>53</sup> Tibaque squi quia to quiaguiits to Xley Dios; xanjlpaa me biaadsana lo to, ni runde to mine rnabeya.

#### *Beet zho Xteb*

<sup>54</sup> Zeene bin zho sca rēb Xteb, blēeye zho haxta rowye ro zho rwi zho lo me.

<sup>55</sup> Laa me, ne nacie Espíritu Sant me, zeene blis lo me bui me nēz gbaa, gon me lo guelndzon ne no Dios, gonpaa me laa Jesús zo cue Dios nēz derech.

<sup>56</sup> Dzigo bnee me, rēb me:

—Ranpaa naa niina gon nzhialse gbaa, laa men ne pxeel Dios biaad lo guidzliu ga, laa me zo cue Dios.

<sup>57</sup> Mine been zho ptse zho diag zho, ni nguedz roptsie zho parne gondraa zho pe rnee me; laa zho wbigbe bnaaz zho me, güeynie zho me tib lad ro guiedz.

<sup>58</sup> Zha ne goc textigw ga, blee zho lar ne mbix zho, bdziin zhow tib lo mgui nguieg lë Saul, mgui co pquianapa; laa zho psilo bdeedquie me.

<sup>59</sup> Sca nodeedquie zho me, laa me rnab lo Dios rnee me:

—Jesús, luu ne nac luu men ne rnabey, luu pcaania zhiespíritu naa.

<sup>60</sup> Dzigo pquiitgzhid me, ni pquiaa me stib redz nroob bnab me lo Dios, rëb me:

—Dios, luu ne nac luu men ne rnabey, dol ne quiayun miech rii, laa naa rnab lo luu gunquizhd luu zhow.

Loxaque blozh sca bnee me, laa me gut. Ye mgui ne lë Saul ga, bdeed diidz sca beet zho me.

## 8

<sup>1-2</sup> Dzigo pcaalsase bla zha bgui ne noxco rleynie Dios, güey zho güeyqueets zho Xteb; mban rac zho, bio zho xquielnë me.

Len dze co, psilo zha ne sca rlëenie zha ne rliladz Jesús, ptsidil zho grëse zha ne rliladz me; dipse len guiedz Jerusalén pquianał zho zho. Grëse zho bzhoon, zha ne zie grëraa guiedz ne ndxie nëz Judé ga, zha ne zieegaa nëz Samar; loxaque zha ne nacse poxtl biaan Jerusalén.

<sup>3</sup> Ntseeb rac Saul, rzac me tebaa zha gnitlogazh me grëse zha ne rliladz Jesús. Stib yu stib yu zie me, riebezhoo me zho lidz zho, mgui wnaasaque rey me riesëeb me zho ladzguiib.

### *Bdzin Xtiidz Jesús nëz Samar*

<sup>4</sup> Laa grë zha ne bzhoon Jerusalén ga, zaatne zieetaa zho rnee zho Xtiidz Jesús lo miech.

<sup>5</sup> Zig nac Lip, zeene bdzin me tib guiedz nëz Samar, psilo me bnee me Xtiidz Jesús lo grë miech co.

<sup>6</sup> Ndal zho rquiaadiag mine rnee me, rzee zdoo zho ran zho grëtaa milagr ne run me.

<sup>7</sup> Ndal grë zha ne noguitnie mendox, riac zho, rquiaadan grë mendox co redz zeene laa ma rzhoon; grë zha ne gutoo, grë zha ne nde ni, runguiac me zho.

<sup>8</sup> Grëse miech ne no guiedz co, rley zho.

<sup>9-11</sup> Ga no tib men ne rool diidz dox, lë Simón. Ye me rzee zdoo miech grë ncuaane run me. Nzianle iz sca noquidie me zho, grëse menguedz runbey me, haxta niats rac me rnee me guien draa cho zig me. Grëse zho, haxta grë zha non rbig lo me, rzac zho lëe poder ne rap Dios ga nacie me.

<sup>12</sup> Laa zeene bnee Lip lo grë miech co gocnan zho diidz ndzon ne nac Xtiidz Dios, bin zho zha racladz Dios gban zho, bin zho cho nac Jesús; grëse zha ne bliladza, mgui wnaasaque, laa zho brobnis.

<sup>13</sup> Dzigo yeque men ne lë Simón ga bliladz Jesús, ye me laa me brobnis; zaatne zieetaa Lip nal me zhits Lip, rzee zdoo me ran me grëtaa milagr nroob ne run Dios.

<sup>14</sup> Grë zha poxtl ne no Jerusalén, zeene gocnan zho scataa ndal zha Samar nocaania zhiwseed Jesús, dzigo pxeel zho Pedr grop Juan zie nëz co.

<sup>15</sup> Laa zho zie gnab zho lo Dios yгаа grë zha ne bliladzle Jesús ga guielbiini chen Espíritu Sant;

<sup>16</sup> sac zeene bliladz zho Jesús, loxaque brobnisse zho, gard yгаа zho guielbiini co.

<sup>17</sup> Bdzin zho pxobnia zho guic grë men co, bnab zho lo Dios; dzigo grëse men co laa me bgaa guielbiini ne rdeed Espíritu Sant.

<sup>18</sup> Zeene gon men ne lë Simón ga, ne loxaque rxobniase zha poxtl co guic grë miech co laa zho rgaa guielbiini ne rdeed Espíritu Sant, dzigo laa me rdeed dimi,

<sup>19</sup> rëb me:

—Golneedz poder qui lo naa; zeena ye naa zha ne cxobniataa naa guic

yгаа zho guielbiini ne rdeed Espíritu Sant.

<sup>20</sup> Pquiab Pedr rëb Pedr lo me:

—¡Bieñ ganle pe rnee luu! ¿Pa bin luu ye xpoder Dios zac si miech? ¡Tebaa niinagazh nitlo luu grë xtimi luu i!

<sup>21</sup> Ni lalnu rieguaald luu gun luu dziin rii, ni gdziñdгаа dze gun luuw; sac mbed zdo luu, zienied guic luu gun luu miñe rnabey Dios.

<sup>22</sup> Blee zhgab yozh qui guic luu, bnab lo Dios zeena togo squia zdo me luu, gunquizhd me luu doł ne squi bza zdo luu i;

<sup>23</sup> sac rlu niapse guielntseeb nonie guic luu, ni lëëque luu gon nosacsi luu ne squitaa noyunctal luu xtol luu.

<sup>24</sup> Pquiabse me rëb me:

—Golgun guielnzaac, gołnab lo Dios yquia zdo me naa, zeena ygaad naa grë guielnëdox ne rnee to i.

<sup>25</sup> Blozhse bzodiidznie Juan grë miech co grop me Pedr, blozhse pseed zho zho Xtiidz Dios, laa zho wbire zey zho Jerusalén stib. Guiedz ne rdedtaa zho dib xtan zha Samar ga, rnee zho Xtiidz Dios lo grë miech co.

### *Bzodiidznie Lip tib meñ Etiopí*

<sup>26</sup> Laa Lip no Samar ga, tib dze briequia tib xanjł Dios lo Lip, rëb me tsie Lip nëz ne rrie Jerusalén zie nëz Gaza.

<sup>27</sup> Dzigo güey Lip nëz co. Tib dan ngana, lëëtaque laa tib meñ ne nac dziin lo rein ne lë Candás zie ga, dziin nroob nac me lo rein co, sac me ngot-sow grëtaa dimi ne no Etiopí.

<sup>28</sup> Zobse me tib leñ carret nroob zie me ga; znu wbirele me Jerusalén güeygan me Dios. Laa me zob leñ co quialab me lo Xtiidz Dios miñe pquiaa Isá, meñ ne biadteed xtiidz Dios padzeela.

<sup>29</sup> Dzigo bnabey Espíritu Sant Lip tsie Lip yгаа carret co lo Lip.

<sup>30</sup> Zeene bgaa carret co lo Lip, bin Lip pa lo nolab meñ co; nacne rëbchaa Lip lo me:

—¿Pe rien luu cho raquiet zaatne nolab luu i?

<sup>31</sup> —Riend naaw —rëb me—, rquiin tib zha ne gnë lo naa dien zha naca.

Dzigo bredz me Lip bieñ Lip leñ carret co, güeysob Lip cue me.

<sup>32</sup> Znu rnee zaatne nolab me ga: Zigne racse mëcwxiił yeen zeene rnaaz zho ma rut zho ma, scadaa ndooladz goc me, peet beend me zeene laa zho zienie me.

Ni zigne roptsied ma zeene rtsiib zho ma, scaque ni tib diidz ptsired me lo zho.

<sup>33</sup> Niicle ne gon zho scataa ndooladz me, per psacsi zho me.

¡Pa lotaa bdziñ guielntseeb ne been grë menladz me!

Sac gon, ptiche zho xquielmban me lo guidzliu.

<sup>34</sup> Dzigo rëbchaa meñ co lo Lip:

—Bzhiguieł bnë lo naa dien, cho nu znu rzeet Isá lo rii. ¿Pe me bded miñ rii, te stib zhow ye?

<sup>35</sup> Dzigo rëb Lip lo me Jesús raquiet ga, ni bnee Lip grëraa miñe nac zhi-wseed Jesús.

<sup>36</sup> Laa zho no nëz, tibaque zeene bdziñ zho tib lugar co no nis; rëbchaa me lo Lip:

—¡Bui ganle laa nis no nu! Mazd bzhiguieł pchoobnizgash naa.

<sup>37</sup> [—Zaca —rëb Lip—, totsaque dib zdo luu rliladz luu Jesús.

—Rliladz naa me —rëb meñ co—, rliladz naa ne nli Xpëed Dios nac me.]

<sup>38</sup> Dzigo bnabey me blëz carret co ga. Biet me leñ co grop me Lip bzëëb zho lo nis co, ga pchoobnis Lip me.

<sup>39</sup> Blozhse ga, laa Espíritu Sant blis Lip gon draa me Lip; per rley me laa me bio nëz stib, laa me zie.

<sup>40</sup> Zeene laa Lip briequia, laa Lip nole guiedz ne lë Azot. Ga psilo me zigse zie me, guiedz ne rdedtaa me rnee me Xtiidz Dios lo grë miech co. Sca bio me nëz, haxta bdziñ me guiedz Cesarea.

## 9

*Gon Saul Jesús*

<sup>1</sup> Laa mgui ne lë Saul ga, per nli ntseeb rac me, tibaque ne laa guic me zienie gut me grëse zha ne rililadz Jesús. Güey me lo meñ ne nac pxoz nroob,

<sup>2</sup> bdeed pxoz co ti xtiidz me guey lo grë zha ne zo lo xyadoo zho nëz Damasc, parne gacnie zho Saul gnaaz zho grëse zha ne rililadz Jesús; zha ne ygaataa niicle mguiw niicle wnaaw, gzobdoo zho zho tsiesañ zho ladzguib Jerusalén.

<sup>3</sup> Laa Saul bio nëz, laa Saul zie. Zhile gdziñ me guiedz Damasc, tibaque zeene briequia ti biinidoo zhan gbaa biab zaatne zie me ga. Groltaa lo biinidoo co biaan me, biabgazh me liu.

<sup>4</sup> Liu nix me, bin me zëeb ti tsi meñ co rnee lo me:

—Saul, Saul, ¿pe nacne quianañ luu naa?

<sup>5</sup> —Been guieñzaac —rëb me—, bnë dien cho luu.

Dzigo pquiab meñ co, rëb me:

—Naa nac Jesús meñ ne squi quiat-sidil luu. [Lëëque luu gon nosacsi luu i, rzac luu zigne rzac ngon ne rcaanni, ni lëëque lo guib lots ne rtseb zho ma riecaanni ma.

<sup>6</sup> Rdzieb Saul, rzhidz me lo dzeb co rëb me:

—Bzhiguiel bnë dien, ¿pe racladz luu gun naa niina?]

Rëbcha Jesús lo me:

—Guche i, güey Damasc, ga gnë zho ganle pe nac mine no gun luu.

<sup>7</sup> Zha ne ziegza Saul ga per nli bdzieb zho, haxta ni gacdraa gnee zho; loxaque tsi meñ co ron zho zëeb, per choot ran zho.

<sup>8</sup> Laa Saul guche ga. Zeene laa me pxal lo me gwi me randraa me, ¡laa lo me pcowle! Zha ne ziegzale me ga bzhen nia me bdziñ me Damasc.

<sup>9</sup> Tson dze sca brieelod nian me, gzase dze co dowd me, niicle peet god me.

<sup>10</sup> Guiedz Damasc ga, ga no ti mgui ne rililadz Jesús lë Ananí; dzigo gon me Jesús, bredz Jesús me. Pquiab me,

<sup>11</sup> dzigo rëbcha Jesús lo me:

—Güey nëz ne lë Derech, zaatne nac lidz ti mgui lë Judas; ga bnabdiidz meñ Tars ne lë Saul. Zeene quiazodidznie me naa,

<sup>12</sup> blu naa lo me laa tib zha lë Ananí bdziñ rxobnia guic me, zeena gbiire gan me stib.

<sup>13</sup> Pquiab Ananí rëb Ananí:

—¿Saul ye? Ziyon naa name zha nac grëtaa ncuaane noyun me Jerusalén, notsidil me grë zha ne rililadz luu.

<sup>14</sup> Haxta pxoz nroob ne rnabey bdeed diidzbey gnaaz me grëse zha ne no nëz rii.

<sup>15</sup> —Güey —rëb Jesús lo Ananí—, sac laa naa bzooblöle me, ib me tsie grë guiedz zit tsieseed me miech xtiz naa, me gneew lo grë zha rnabey, ni lo grëgaa zha Israel.

<sup>16</sup> Na naa glu lo me ganle zha nac grë guieñne ne gan me, zeene laa me quiaayunle xtsiñ naa.

<sup>17</sup> Dzigoraa güey Ananí zaatne no Saul ga. Bdziñ me, pxobnia me guic Saul, rëb me lo Saul:

—Saul, bina ganle bets, laa Jesús gon, meñ ne rnabey, meñ ne briequia lo luu zeene ziaad luu nëz ga, laa me pxeel naa zial naa nu; zeena gnab naa lo me gunguiac me bziaalo luu, ni ycaania luu guieñbiini ne rneedz Espíritu Sant.

<sup>18</sup> Zigne sca bnee Ananí, laa lo Saul biacgazh; lega zigne nac xmed mel nac grë ncuaan co brie lo me. Horcogazh laa me brobnis.

<sup>19</sup> Blozh ga laa me dow stib, zhiga zhiga laa me wbire pcaa fuerz.

Goc bla dze no Saul lo grë zha ne rililadz Jesús Damasc ga, dzigo brie me

<sup>20</sup> güey me grë yadoo win ne no ga, rnee me lo grë miech co cho nac Jesús, rnee me lo zho ne nli Xpëed Dios nac Jesús.

<sup>21</sup> Rzee zdoo grëse miech co ran zho sca rnee me, rneehaa zho:

—¿Led lëe meñ qui ga name scataa ntseeb rac Jerusalén, notsidil me grë zha ne rililadz Jesús? Conque nac diidz miñ co ziaad me nu, ziadnaaz



me zho tsiesan me zho lo grë pxoz ne rnabey.

<sup>22</sup> Per zigse zie dze, mazdraa rac Saul tibaque ne rnee me lo grë miech co, lëe men ne zëeble diidz cxeel Dios lo guidzliu ga, nac Jesús. Grë zha Israel ne no ga, riendraa zho dien pe gliladz zho.

<sup>23</sup> Goc bla dze no me ga, laa grë zha Israel ne no ga blëe lo me; bnediidz zho rëb zho laa zho gut me.

<sup>24</sup> Dze guieel riesobnap zho gzaase zaatne rap biedz nroob ne ndze igo guiedz co nëz, riequiambëz zho ted me, gut zho me. Per gocnan mew,

<sup>25</sup> nacne goḷ ti pcow liu pcaalsa grë zha ne bliladz miṇe bnee me, bloo zho me ti len chicuid nroob, bzoob zho doow dzigo blit zho me cho biedz nroob ne sca ndze igo guiedz co. Sca bdeeda diidz brie me ga.

### *Bdziṇ Saul Jerusalén*

<sup>26</sup> Zeene bdziṇ Saul Jerusalén go-cladz me ndziṇ me lo grë zha ne rliladz Jesús ga, per leḷ bdzieb zho zeene goṇ zho me, sac rliladz zho ne nli yele me bzëeb xnëz Jesús.

<sup>27</sup> Dzigo güeynie Bernabé me lo grë zha ne nac poxtl, bzodiidz Bernabé lo zho zha goṇ me Jesús zeene no me nëz zie me Damasc, zha rëb Jesús lo me; ni zha bdziebd me bnee me lo grë miech cho nac Jesús, len dze ne blëz me Damasc.

<sup>28</sup> Dzigoraa pcaania zho me. Laa zho gocgza me, zaatne zietaa zho zieseed zho miech, ib rdziebd me rnee me cho nac Jesús.

<sup>29</sup> Brieequia bla zha Israel ne rnee xtiidz zha Gres bdildiidznie zho me. Zhisaque goca, laa zho gocladz niut zho me.

<sup>30</sup> Zeene gocnan grë zha ne rliladz Jesús gaw, dzigo güeyan zho me guiedz Cesarea; ga brie me laa me zie nëz Tars, zaatne nac ladz me.

<sup>31</sup> Len dze co, grë miech ne no xnëz Jesús, zigtaa zha ne no Judé, zha ne no Galilé, zha ne nogaa Samar, nguieel rac zho peet lo guieḷxtseeb nodraa zho; zigse zie dze riogucraa

zho zha nac Xtiidz Dios. Grëse zho ri-oxco zho mban zho zigne rnabey me, tibaque nacnie Espíritu Sant zho. Ni scagaa, zigse zie dze ndal grë miech ne rzëebraa rcaania Xtiidz Dios.

### *Rieted Pedr lo grë zha ne rliladz Jesús*

<sup>32</sup> Len ngbidz coque, zie ziaad Pedr rieted me lo grëse zha ne rliladz Jesús. Nacne güeyted me lo grë zha ne no Lida.

<sup>33</sup> Guiedz co, beenbey me ti mgui lë Ené, gogle xon iz nix mgui co, ib gacd së me sac dipse me gutoo.

<sup>34</sup> Dzigo rëbchaa Pedr lo me:

—jEné, niinagazh goṇ laa Jesús gunguiaac luu! Na zeen guche i blis xta luu.

Zigne sca bnee Pedr laa men co biac, laa me guche ga.

<sup>35</sup> Grëse men Lida, grëse men Sarón zeene goṇ zho sca biac men co, grëse zho bliladz Jesús.

<sup>36</sup> Gaxaque Lida riaan ti guiedz lë Jop. Jop ga no ti wnaa ne rliladz Jesús, lë Tabit (laa xtiidz zha Gres rnee zho me Dorc). Nquialadz me miech, grë zha ne guiend pe yquiin, ruṇ me xyudar zho.

<sup>37</sup> Lega nacle blanguidz me, laa me gut.

Zha ne rliladz Jesús ga, laa zho noxco dien zha ygueets me. Bgaz zho me, blozhse ga güeyxob zho me sti len yu ne riaan nëz glaa. Xco co no zho,

<sup>38</sup> zeene bin zho laa Pedr no Lida. Pxeelaque zho chop zha bgui zienie diidz lo Pedr tsieniob Pedr Jop.

<sup>39</sup> Zigne bdziṇnie zha co diidz, zienalgazh Pedr zhits zho. Bdziṇ zho lidz men co, zolinëz güeynie zho Pedr zaatne zhoob me. Nzian grë wnaa viud ndxie ga, wbigbe zho lo Pedr, roon zho rlu zho grë lar ne bdib me.

<sup>40</sup> Dzigo bnabey Pedr brie zho ley grëse zho, laa me biaan ga, pquiitsgzh me bnab me lo Dios. Blozhse ga wbig me lo ngutoo co, bnee me lo me rëb me:

—Guche i, Tabit.

Zigne sca rëb Pedr laa lo ngutoo co bzhiäl, zeene goṇ me laa Pedr zo ga, laa me bzobli.

<sup>41</sup> Bzhen Pedr nia me, bliso Pedr me, dzigo bredz Pedr grë zha ne rliladz Jesús ga, ni grë wnaa viud co; gon zho laa me brieabanle.

<sup>42</sup> Dipse lad guiedz co bzhoob diidz sca brieaban wnaa co; grë zha ne bina, ndal zho bliladz Jesús dib zdoo zho.

<sup>43</sup> Nzianlaa dze biaan Pedr ga, blëz me lidz Simón ti men ne rcuudz grë guid ma.

## 10

### *Güeyzodiidznie Pedr Cornel*

<sup>1</sup> Guiedz Cesarea, ga no ti men lë Cornel, rnabey me lo ti partid menquiib lë partid Italian.

<sup>2</sup> Zigtaa mew, zigtaa grë menlidz mew, dib zdoo zho rliladz zho Dios, noxco zho mban zho zigne racladz Dios. Tibaque nonab zho lo Dios, ni nroob ncuaane rgad zho lo grë zha ne guiend pe yquiin.

<sup>3</sup> Tib dze, bdzele dzew tibaque zeene gon me laa ti xanj Dios bdzin zaatne zo me, bredzlë anjl co me.

<sup>4</sup> Dze rwi me lo anjl co, rdzieb me laa me pquiab. Dzigo rëbchaa anjl co lo me:

—Gocnan ganle grëse mine rnab luu lo Dios ron mew, ni ran me grëtaa yudar ne squi quiayun luu lo grë zha ne guiend pe yquiin.

<sup>5</sup> Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr.

<sup>6</sup> Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguiib zho me.

<sup>7</sup> Zeene laa anjl co zey, dzigo bredz me chop zha ne quia dziin lidz me, ni bredz me ti zhaguiib ne nacgrë zhaguiib ne zopaa gax lo me; dib zdoo zhaguiib co rliladz zho Dios.

<sup>8</sup> Blozhse bzodiidz me lo gza zha co zha bzhaac me, dzigo laa me pxeel zho ziexi zho Pedr Jop.

<sup>9-10</sup> Biini liu, zig rwe ngbidza gaxle Jop zie zho. Lëëtaaque hor co laa Pedr biepe nëz glaa guic yu ne rbëz me ga. Rcaabedz me, dzigo laga noyacro

ncuaane gon me laa me biepe guic yu co ziezodiidznie me Dios.

<sup>11</sup> Dios nozodiidznie me, tibaque zeene gon me laa ti lar nroob ziadzëeb zhan gbaa, nzhidoo gzatap nëza laaw bdzin lo me.

<sup>12</sup> Grë lose ma no lo lar co, ga no ma ne rzë gza tap ni, no grë ma ne rzë zigne rzë meel, ni no grë ma ne rsiibe.

<sup>13</sup> Horco bin me ti tsi men co, rëb lo me:

—Pedr, ma ne racladztaa luu gon zac gut luu ma.

<sup>14</sup> Pquiab me rëb me:

—jMin cogaa nagon grieelod! Wlaltaa gard gon naa grë ma beed qui.

<sup>15</sup> Rëbchaa men co lo Pedr:

—Grë ncuaane beenlayle Dios, nodne gnee luuw ncuaan beed.

<sup>16</sup> Blulo lar co tib, bluloquew stib, laa zeene biontaa gon mew dzigo laaw biire bzoquia nëz gbaa.

<sup>17</sup> Lëëtaaque laa Pedr no zhgab dien pe nacne sca gon me lar co, laa zha ne pxeel Cornel ga bdzin ro yu ne rbëz me ga,

<sup>18</sup> rnabdiidz zho me.

<sup>19</sup> Zhgab co no Pedr, zeene rëb Espiritu Sant lo Pedr:

—Laa tson zha bgui gon ziaadguib luu.

<sup>20</sup> Biet, bnee lo zho. Ib peet tsienied guic luu güeynal zhits zho, sac naa bnabey ziaad-xi zho luu.

<sup>21</sup> Dzigo laa Pedr biet ga, bdzin me lo zha ne pxeel Cornel ga, rëb me lo zho:

—Naa nac Simón Pedr. ¿Pe nac mandad ne ziaad to?

<sup>22</sup> Pquiab zho rëb zho:

—Laa no ziaad xmandad Cornel, ti men ne rnabey lo menquiib Cesarea. Laa me pxeel no ziaad-xi no luu, sac ti xanj Dios rëb lo me cxeel me zha ne guiaad-xi luu tsie luu lidz me, tsiene luu lo me. Ti miech wen nac me, dib zdoo me rliladz me Dios, grëse zha Israel rleynie zho me.

<sup>23</sup> Dzigo bredz Pedr zho bded zho nëz len yu; ga biaan zho wdze co. Biiniraa liu zienie zho me, ye palal zha Jop, zha ne rliladz Jesús zienal zhits me.

<sup>24</sup> Dze ne rac chop ngbidz brieë zho Jop, laa zho bdziñ Cesarea. Laa Cornel bredzle grë menlidz me, grë zha ne ndzieeldiidz me; ndal nac zha ne ndxienie me lidz me, quiambëz me Pedr.

<sup>25</sup> Zeene laa Pedr bdziñ, brieë me güeydzieelo me Pedr, pquitsgzhìb me lo Pedr nañ me niuñ me Pedr zigne riegañ me Dios.

<sup>26</sup> Dzigo bliso Pedr me, rëb Pedr lo me:

—¡Guso i, nodne yquitsgzhìb luu lo naa! Bien ganle samiechaque luu nac naa.

<sup>27</sup> Dzigo laa menguiib co guso ga. Nozodiidz zho laa zho bzëëb leñ yu. Zeene bdziñ zho zaatne ndxie grë miech co,

<sup>28</sup> psilo Pedr bnee me lo zho, rëb me:

—Nanle to ganle zha Israel naa, ni ib lo xley no rnabey nodne ziaab no lidz grë zha zit, per ni ctsieelsad no zho; per laa niina laa Dios blu lo naa, grëse miech ne beenlayle me nod pe nacne gbix zdoo naa gañ naa zho.

<sup>29</sup> Gacxe waa, zigne gocnañ naa laa to rbedz naa, zialnalgazh naa zhits zha ne pxeel to. Nana sca, gólnë dien pe nacne bredz to naa.

<sup>30</sup> Dzigo bzodiidz Cornel zha bzhaac me, rëb me:

—Nadze rac tap ngbidz ga, zig znaw gon, no naa lidz naa nu nocuan naa, ni nonab naa lo Dios. Tibaque zeene gon naa laa ti mgui zole lo naa, masaque riaazbel xab me,

<sup>31</sup> në me: “Gocnañ ganle grëse miñe rnab luu lo Dios ron mew, ni rañ me grëtaa yudar ne squi quiayun luu lo grë zha ne guiend pe yquiin.

<sup>32</sup> Gacxe waa, laa naa zialnie diidz lo luu: pxeel bla zha ne tsie guiedz Jop tsiexi zho ti men ne lë Simón Pedr. Gax zaatne nac ro nisdoo, ga no ti men lëque Simón, rcuudz me grë guid ma; lidz men co ga rbëz me; ga tsieguib zho me.”

<sup>33</sup> Sca nagon në men co lo naa, nacne bnabey naa biaad-xi zho luu; ni xquizhgaa luu ne laa luu ziaad. Dios zobwi ganle, grëse no laa no

ndxie nu par yquiaadiag no miñe bnabey me luu gnë luu lo no.

<sup>34</sup> Dzigo rëbchaa Pedr:

—¡Naraa rien naa, led yed Dios cue miech dien cho nac zha Israel, cho nacgaa zha zit!

<sup>35</sup> Sinque grëse miech lo guidzliu, tel pa guiedztaa nac zho, rcaania me zho totsaque ron zho miñe rnabey me, ni rioxco zho zaacse rban zho.

<sup>36-37</sup> Rgobey naa ziyonle to Diidz Ndzon ne pxeel Dios lo menladz naa niina wriin. Lo Diidz Ndzon co rnee, ne zac guiaanwen miech lo Dios, totsaque gliladz zho cho nac Jesús, men ne zëëble diidz ga cxeel me (ni Jesús gon bzaa grëtaa ncuaane no). Zig nac dib Judé, desde ne psilo Juan pseed me miech Galilé, laa zho gocnaña.

<sup>38</sup> Ni nanaxe to ganle, bdeed Dios poder lo Jesús, pxeel me Espíritu Sant gocnie Jesús. Zaatne bdedtaa Jesús, pquia zdoo me miech, grë zha ne nosacsi mendox psilaa me zho ladz-nia ma; sacne nli Dios nacnie me.

<sup>39</sup> No ne nac no zha ne bzianie me, grop lo no bdziañ no grëtaa milagr ne been me, zigtaa Jerusaléna zigtagaa dib Judéw. Jerusalénpaa ga beet zho me pquiaa zho me lo cruz,

<sup>40</sup> per zeene goc tson ngbidza laa Dios bleeban me, ni bneedz Dios diidz biire bdziañ no me.

<sup>41</sup> Led grëdraa miech gon me, loxaque nose bdziañ me; sac ib Dios bzooblo no dziañ no grë dziin ne been me. Haxta bdioownie no me, bdionie no me,

<sup>42</sup> ni pxeel me no gnee no lo miech gacnañ zho ganle laa Dios bzo me, me gun guielwxtis gal dze ne laa Dios cuedz grëse miech, zigtaa zha guta zigtagaa zha mbana.

<sup>43</sup> Me ga bzeet grë zha ne biadteed Xtiidz Dios lo miech padzeela, zeene rnee zho: “Grëse zha ne gliladz cho nac me, silaa Dios zho lo dol.”

<sup>44</sup> Laa Pedr bii quianeeque, zeene laa grë zha ne noquiaadiag ga bgaa guielbiini ne bdeed Espíritu Sant lo zho.

45-46 Grë zha Israel ne ziegza Pedr ga, zeene gon zho laa grë zha co psilo quianee stib diidz, ni rdeed zho xquizh lo Dios, bzee zdoo zho gon zho ye grë menzit rgaa guielbiini ne rdeed Espiritu Sant.

47 Dzigo rëbchaa Pedr:

—¿Peraa nadien gbiaaz ne, ne cchoobnisgazhd ne zha rii? Laa ne bdzianle ganle zigne rdeed Espiritu Sant guielbiini lo zha Israel, scaque bdeed me guielbiini lo zho.

48 Dzigo bnabey Pedr brobnis zho, laa zho bzëeb xnëz Jesús.

Blozh ga bnee Cornel lo Pedr cuëz me ga ti bla dze.

## 11

### *Bzodiidz Pedr zha güey me lidz Cornel*

1 Grë zha poxtl ne no Jerusalén, ni grëraa zha ne rliladzle Jesús zha ne no Judé, bin zho sca bliladz gza menzit co Xtiidz Dios.

2 Dzigo zeene laa Pedr bdzin Jerusalén güey bla zho güeytildiidznie zho Pedr,

3 blisqui zho lo Pedr pe nacne güey Pedr lidz menzit, pe nacne güeytownie Pedr zho.

4 Dzigo psilo Pedr bzodiidz me lo zho zha nacne güey me lidz men co, rëb me:

5 —Guiedz Jop no naa, tib dze lëëtaque nozodiidznie naa Dios, tibaque zeene gon naa laa ti lar nroob ziad-zëeb zhan gbaa, nzhidoo gzatap squina laaw ziaad nëz lo naa.

6 Zeene bdixlo naa bui naa dien pe quia lo lar co, gon naa niapse ma no lo co, grë ma ntseeb, grë ma ne rzë gzatap ni, grë ma ne rzë zig rzë meel, ni grë ma ne rsiibe.

7 Lo grë ma co nowi naa, zeene bin naa ti tsi men co, në lo naa: “Pedr, ma ne racladztaa luu gow luu, zac gut luu ma.”

8 Dzigo pquiab naa rep naa: “Min cogaa nagon grieelod, wlaltaa gard gow naa grë ma beed qui.”

9 Nëchaa me lo naa: “Grë ncuaane beenlayle Dios, nodne gnee luuw ncuaan beed.”

10 'Tson vuilt sca gon naa lar co. Blulow tib, bluloquew stib, zeene biontaa gon naaw dzigo laaw biire zey gbaa.

11 'Loxaque blozh gon naa lar co, laa tson zha bgui blanso ro lidz men ne blëz naa ga, pxeel men Cesarea co zho ziaadguib zho naa.

12 Ni laa Espiritu Sant bneequa lo naa, no ganal naa zhits zho, niicle ne zhazit nac zho; nacne bianaal naa. Ye gza xoop zha ne zialnie naa nu bzë bio no.

13 'Bdzin no lidz men co, psilo me bzodiidz me lo no zha bzhaac me, në me len yu no me, zeene gon me ti xanjl Dios, rëb anjl co lo me cxeel me bla zha ne tsie Jop tsiexi zho naa

14 zeena gane naa lo me zha grieelo csilaa Dios me lo dol grë menlidz me.

15 'Laa naa psilo quiane lo me grë menlidz me, zeene grëse zho laa zho pcaania Espiritu Sant, ni bgaa zho grë guielbiini ne rdeed me zigne bgaaque new.

16 Ga nagon psoladz naa xtiidz Jesús men ne rnabey ne, zeene znu në me lo ne: “Nli nisse pchoobnis Juan miech, sangue to zgaa to guielbiini ne rneedz Espiritu Sant.”

17 Sca nagon pcaania zho Espiritu Sant, laa zho bgaa guielbiini ne rdeed me zigne bgaaque new. ¿Cho nac naa nadien ne glisqui naa mine run Dios?

18 Zeene blozh bin zho grë mine bnee Pedr ga, peet rëbdraa zho. Psilo zho rleyne zho Dios, rdeed zho xquizh lo me; sac hor coraa bien zho ye grë menzit zrieelo gbig zho lo Dios, gdeed me ti guielmban ndzon ne gdziind dze lozh lo zho.

### *Bliladz zha Antioquí Xtiidz Dios*

19 Zeene sca pquianaal zho grë zha ne rliladz Jesús len dze ne beet zho Xteb ga, nëzrii nëzrec bliaal zho. No zho bdzin haxta Fenicia, no zho bdzin Chipr, nogaa zho bdzin nëz Antioquí. Zaatne bdziintaa zho bnee zho cho nac Jesús, per loxaque lo grë menladz zho bnee zhow.

20 Niicle ne scaw, lëëque grë zha Israel ne no Chipr, zha ne no Ciren,



zeene laa zho bliladz Jesús güey zho guiedz Antioquí, bnee zho lo grë zha zit co cho nac Jesús.

<sup>21</sup> Ni ne nacie Dios zho, ndal grë miech co bzëëb xnëz Jesús.

<sup>22</sup> Grë zha ne no Jerusalén, zeene gocnan zhow pxeelaque zho Bernabé güey Antioquí.

<sup>23</sup> Zeene bdziñ Bernabé Antioquí, rley me gon me scataa quiayunlay Dios grë miech co; dzigo pso me diidz lo zho ib csaand zho zhiwseed Jesús.

<sup>24</sup> Ti men dib zdoo rliladz Dios nac Bernabé, nacie Espíritu Sant me, ti miech wen nac me; gane zeene laa me bdziñ ga nzianraa zha ne bliladz Jesús.

<sup>25</sup> Goc palal dzew, dzigo güey Bernabé guiedz Tars güeyxi me Saul, bdziñnie me Saul Antioquí.

<sup>26</sup> Dipse ti len iz blëz zho ga grop zho, blozh pseed zho grë zha ne bliladz Jesús. Ga gloopaa psilo ne laa grë zha ne rliladz Jesús brieelë CRISTIAN.

<sup>27</sup> Len iz co blalaa zha ne noteed xtiidz Dios no Jerusalén. Dzigo brieë zho ga güey zho Antioquí.

<sup>28</sup> Lad co no tib men lë Agab, psiaab Espíritu Sant guic me bnee me laa ti gbin dox gan miech nëz Israel. (Ni nligaa scase goca, lëë gbin co biaad len iz ne zobnabey men ne lë Claud.)

<sup>29</sup> Grë zha ne rliladz Jesús Antioquí, zeene bin zho sca rëb Agab, nacie bnediiz zho grë zho, tel palalaa ncuaane rgaa lo zho tib tib zho gdeed zhow gaclo ti gon cxeel zho lo zha Judé.

<sup>30</sup> Dzigo ptop zho gon co, zeene laaw goclo, pxeel zho Bernabé grop Saul güeyšana lo grë zha rnabey ne zo lo zha ne rliladz Jesús nëz Judé.

## 12

### *Bio Pedr ladzguiib*

<sup>1</sup> Len dze co psilo rey Herod notsidil me grë zha ne rliladz Jesús.

<sup>2</sup> Bnabey me bgaa Jacob bets Juan, beet zho Jacob lo spad.

<sup>3</sup> Zeene gon Herod rley grë zha ne rnabey lo menquiedz Israel ran zho

zha rsacsi me grë zha ne no xnëz Jesús ga, dzigo bnabeyaque me bgaa Pedr bio Pedr ladzguiib; lëëtaque len dze co noyac lni Pascw.

<sup>4</sup> Laa Pedr no ladzguiib, bnabey me bzo xon nëz menquib quianap Pedr. Quiambëz me tedse lni co, laa me cuee Pedr gan grë menquiedz zha csacsi me Pedr.

<sup>5</sup> Grë zha ne rliladz Jesús, zeene gocnan zho scataa ndxienap menquib Pedr no Pedr ladzguiib, psilo zho tibaque quianab zho lo Dios gacniën me Pedr.

<sup>6</sup> Nacle diidz pa dze cuee Herod Pedr. Wdze ne guiini liu co, laa Pedr nixguiesse len ladzguiib; tib ga caden zob ti nia me, tibga menquib tib nëz cue me, ni zhaaque zo zla zha ne quianap ro ladzguiib.

<sup>7</sup> Tibaque zeene biab ti biinidoo len ladzguiib, laa ti xanj Dios bdziñ ga. Bdziñ me, pcaannia me cue Pedr, pcuaan me Pedr, rëb me:

—¡Na zeen guche i!

Zigne sca bnee anjl co, lega zhal caden ne zob nia Pedr ga bzhiala brieew nia Pedr;

<sup>8</sup> dzigo rëbchaa anjl co lo Pedr:

—¡Pxidoo len luu, pquiaa lab luu ni luu!

Blozhse pxidoo Pedr len Pedr, ni pquia lab Pedr; rëbchaa anjl co:

—¡Wbix xab luu na, zeen dënal zhits naa!

<sup>9</sup> Nalse Pedr zhits anjl co laa Pedr brieë ga. Riend Pedr ne nli nosilaa anjl co Pedr, masaque rzac me nonixquieel mew.

<sup>10</sup> Bded zho chop len yu zaatne ndxie menquib ne quianap, laa zho bdziñ zaatne quia puert guiib ne rrieë ro nëz. Zigne bdziñ zho, zhal puert co bzhiala; laa zho brieë. Bzënie anjl co Pedr spalal, zeene gol zho zaatne rdedlsa nëz co, dzigo laa anjl co psan Pedr ga.

<sup>11</sup> Dzigoraa bien Pedr led nonixquieeld Pedr, nli Dios pxeel xanj me güeysilaa Pedr ladznia Herod, zeena gleyd zha Israel nian zho grë guieinë ne nded Pedr.

12 Dzigo laa Pedr zie n̄z lidz Marí, xniaa Juan Marcw; l̄ëtaque hor co nzian zho ndxie ga quianab zho lo Dios.

13 Zeene bdziñ Pedr pcaannia Pedr ro yu. Brie ti ndzooop ne quia dziin ga l̄ë Rode, zieso ndzooop dien chow.

14 Zeene beenbey ndzooop co tsi Pedr, rley ndzooop. Lo guielbley co niicle pxaldaque ndzooop ro yu, rias ndzooop zienie ndzooop diidz lo gr̄e zha ne ndxie ga; r̄ëb ndzooop laa Pedr bdziñ ro yu ga.

15 Per bliladz zhow.

—iDieñ pe rool̄ luu! —r̄ëb zho—.  
iNcuaañe gliladz ne rnee luu!

—iCoo, nli l̄ëë mew! —rnee ndzooop—, laa me zo ga.

—iLed meda, —rnee zho—, bod anjl ne quianap mew!

16 Sca no zho, laa Pedr bii nocaannia ro yu. Zeene güey zho pxal zho ro yu, bzee zdoo zho gon̄ zho nli Pedra, laa Pedr zo ga.

17 Dzigo blunia Pedr lo zho gnee nguiedzd zho; laa zho bzëëbnie Pedr len̄ yu. Ga psilo Pedr bzodiidz Pedr lo zho zha güeybee xanj̄l Dios Pedr len̄ ladzguiib; ni pso Pedr diidz lo zho sodiidz zhow lo Jacob, ni lo gr̄eraa zha ne nacgr̄e zho. Blozhse ga, laa Pedr brie ga.

18 Zeene biini liu, gr̄e menguiib ne pquianap Pedr len̄ ladzguiib ga, rdzieldraa zho zha gun̄ zho; sac ib biend zho dien yo Pedr.

19 Zeene laa Herod pxeel̄ zha ne ziebee Pedr ladzguiib, pa s̄ele Pedr. Dzigo güey zho güeynie zho diidz lo Herod; nacne bnabey Herod gocredz gr̄e zha ne pquianap Pedr ga, pquiep Herod zho; blozhse ga, bnabey Herod gut zho gzase zho. Bded ga, laa Herod brie Judé zey me Cesarea.

### *Dow mziog Herod*

20 Len̄ dze co, pcaalsa menguiedz Tir ni menguiedz Sidón güeynee zho lo Herod; sacne rl̄ëënie Herod zho. L̄ëëque ti men̄ ne nac dziin lo Herod l̄ë Blast güeynie zho bnee lo Herod, bnab zho til̄niedraa me zho, niicle zhagaaw laa zho gbig lo me; sac gr̄ese ncuaañe

rquiin zho, gr̄e guiedz ne rnabey me ga rrieew.

21 Dzigo bzo Herod ti dze ne tsie zho tsiezodiidznie zho me. Zeene goł̄ dze co, got me lar niazh ne racw rey; bdziñ me bzob me lo zhixcan me, psilo me bnee me lo gr̄e miech co.

22 Goc palo quanee me, psilo zho rleynie zho me, nguiedz roptsie zho rnee zho:

—iLed miechdraa i gon̄! iTi diosle i nac men̄ qui quanee lo ne!

23 Laa me bii quaneeque, zeene biet tib xanj̄l Dios bdiñ me, psilo dow mziog me, gagazh gut me. Sca gut me, sac beenbeyd me ne Dios nac men̄ ne non, men̄ ne rnabey.

24 Laa Xtiidz Dios, zigse zie dze laaw quiagaazraa lo miech; ndal zha cub ne nozëëb xn̄z me.

25 Jerusalén ga no Bernabé grop Saul len̄ dze co; zeene bial̄se xtsiin̄ zho, laa zho brieque ga laa zho zie n̄z Antioquí zienie zho Juan Marcw.

## 13

1 Lo gr̄e zha ne riladz Jesús Antioquí, nzian zha ne noteed Xtiidz Dios, nzian zha ne rseed miech Xtiidz Dios no lo zho. Lad gr̄e zha co no Bernabé, no ti m̄gui l̄ë Simón ne rnee zho “Men̄ Yaas”, no ti men̄ Ciren l̄ë Lus, gaque no Saul, ni ti men̄ l̄ë Manaén, bets pchoob Herod.

2 Laa ti dze l̄ëtaque ndxie zho noyool̄nie zho Dios ni nocuan zho, zeene laa Esp̄ritu Sant bnee lo zho, r̄ëb me:

—Goł̄cueextso Bernabé i grop Saul, zeena csilo zho lo dziin ne gded naa gun̄ zho.

3 Blozhse pcuan zho, blozhse bzodiidznie zho Dios, dzigo pxobnia zho guic Bernabé grop Saul, bnab zho lo Dios gacniñ me zho; bnee zho lo zho, laa zho zie.

### *Güey Saul Chipr grop me Bernabé*

4 Ga brie Bernabé grop Saul zienie Esp̄ritu Sant zho bdziñ zho guiedz Seleucia, Seleucia bzëëb zho barcw laa zho zie n̄z Chipr (ti guidzliu win ne no lo nisdoo).

<sup>5</sup> Ye Juan Marcw zienie zho gun xyudar zho.

Bdziñ zho ro guidzliu win co zatne ndxie guiedz Salamin, biet zho barcw güey zho grë leñ xyadoo men Israel ne no ga, güeyseed zho miech Xtiidz Dios.

<sup>6</sup> Ga brieë zho güeyted zho dipse lo guidzliu co bdziñ zho guiedz Pafos; guiedz ne bdedtaa zho bnee zho Xtiidz Dios lo miech. Pafos, ga beenbey zho ti men Israel lë Barjesús (laa xtiidz zha Gres rnee zho me Elim). Rquidie me rnee me xtiidz Dios noteed me lo miech, per diidz dox rool me.

<sup>7</sup> Guiedz co ga no ti men lë Sergio Paul, men co zob rnabey guidzliu co; dzigo lo men co ga no Barjesús. Ti men nixbiini nac men ne lë Sergio ga, no me liaadz gacnan me zha nac Xtiidz Dios; dzigo bnabey me gocredz Bernabé grop Saul.

<sup>8</sup> Zeene bdziñ zho psilo Barjesús quiaguib me dien pe yquiaaqui yquiaadiagd men rnabey co Xtiidz Dios.

<sup>9</sup> Dzigo buitipaque Pabl lo Barjesús (Pabl nac sti lë Saul), ni ne nacie Espíritu Sant Pabl

<sup>10</sup> rëb Pabl lo me:

—¡Biche nu zhin mendox! Zhin mendox gon nac luu, squitaa noquidiee luu miech, notsidil luu diidzli. ¿Zha rna dze ne csaan luu mine nac luu i, squi notsidil luu Xtiidz Dios?

<sup>11</sup> Gon ganle, ¡laa Dios csiaabzi luu, niinagazh laa lo luu ycow, ni spalal xbiini ngbidz gandraa luu!

Zigne sca rëb Pabl laa lo men co pcow, nëzrii nëzrec zie me racladz me dien cho gnaaz nia me.

<sup>12</sup> Zeene gon men rnabey co sca pcow lo Barjesús, hor co bliladz me Xtiidz Dios, bzee zdoo me gon me scataa poder ne ziaadnie zhiwseed Dios.

### *Bdziñ zho guiedz Antioquí*

<sup>13</sup> Bded ga, laa Pabl gza Bernabé ni Juan bzëëb barcw stib, laa zho zie nëz xtan zha Panfil. Bdziñ zho guiedz Perg laa zho brieë leñ barcw,

ga ptso Juan lo zho, laa Juan zey nëz Jerusalén;

<sup>14</sup> laa zho bio nëz zie zho nëz xtan zha Pisid, bdziñ zho sti guiedz lë Antioquí.

Zeene gol dze ne rdziiladz miech lo dziin, güey zho xyadoo zha Israel.

<sup>15</sup> Blozhse bded zha ne blab lo guits ne pquiaa Moisés, ni blab zho miñe pquiaa grëraa zha ne biadteed xtiidz Dios padzeela, dzigo laa men ne rnabey yadoo co bnee lo Pabl grop Bernabé, rëb me lo zho:

—Telne racladz to gnee to chop lan xtiidz to, zac gnee tow niina.

<sup>16</sup> Dzigo guso Pabl, blunia me lo grë zha ne ndxie ga cuedze zho, rëb me lo zho:

—Grëse to ne ndxie to nu, zigtaa tow ne nac to menladz naa, zigtaa togaaw ne nac to zha stib guiedz zha ne noxco gban zigne rnabey Dios; golquiaadiag chop lan xtidz naa ganle gne naa lo to:

<sup>17</sup> 'Dios ne riladz no nac no men Israel, ib me bzooblo grë pxozgol no laa zho bgab lo me. Me gocniën zho zeene bio zho ladz men Egipt, ni me güeysilaa zho ga, blu me ganle ne nli men nroob nac me.

<sup>18</sup> Dipse leñ choo iz ne bio zho grë dan bidz ne bded zho ga, pxcw me grëtaa xquieIntseeb zho.

<sup>19</sup> Blozh ga, bnitlo me gadz guiedz nroob ne ndxie xtan zha Canaán, bdeed me liu co lo zho.

<sup>20</sup> Ni dipse leñ tap gayoo groł iz, me bzooblo grë zha ne bzo bnabey lo zho; lëë lultm zha ne bzo me ga bnabey lo zho goc profet Samuel.

<sup>21</sup> Blozh ga, laa zho bnab so ti rey gnabey lo zho, nacie bzo me Saúl, bzob Saúl choo iz goc me zhirey zho. Lëë pxoz Saúl ga brieelë Cis, men ne ziaad lo xtii pxozgol no Benjamín.

<sup>22</sup> Zeene laa Dios ptiche dziin co lo Saúl, dzigo bzo me David goc rey. Lëë David ga rzeet Dios zaatne znu rnee: “Rleynie naa xingan Isaí zha ne lë David, laa naa gonle ib zun David miñe gnabey naa.”

23 Ni lo xtii David co nagon brieewa quia Jesús, men ne pxeel Dios lo guidzliu biaadsilaa miech lo dol, zigne psanle me diidz lo xmenkol no padzeela.

24 'Len dze ne merle xoobnen cho nac Jesús, len dze co bnee Juan Bautist lo grë men Israel: csaan zho xquielntseeb zho gnab zho perdon lo Dios, zeena chobnis zho.

25 Laa zeene zhile gdziñ dze ne gut zho Juan, dzigo bnee me lo miech rëb me: "Golganan ganle, led naad nac men ne quiambëz to ga cxeel Dios. Merle gunbey to me, ti men non nac me, per ni par gac naa ti ngundziin win ne glit lab me ni me raguald naa."

26 'Golganan sca ganle bets: zigtaa tow ne ziaad to lo xtii Abraham, zigtagaa tow ne nac to miech stib guiedz zha ne riladzle Dios, ib laa Dios pxeel Jesús csilaa me ne lo xtol ne grëse ne.

27 Grë zha Jerusalén ni grë zha ne rnabey lo zho, ib biend zho cho nac Jesús, niicle ne scataa gzobse dze ne rdziiladz zho lo dziin, rlab zho lo grë guits ne pquiaa zha ne biadteed xtiidz Dios padzeela; haxta bnab zho gut me zigne bneese grë zha co.

28 Niicle ne gon zho peet xtold me, niicle ne brieequiad dol ne pquiaqui zho me, per bguib zho bdeeda diidz bnabey Pilat gut me.

29 'Blozhse psacsi zho me, pteed zho me grëse zigne bzeetle grë zha ne biadteed xtiidz Dios ga, dzigo güey zha ne blit me lo cruz, güeyqueets zho me.

30 Per bleeban Dios me.

31 Grë zha ne güeynal zhits me zeene brieewa me Galilé bdziñ me Jerusalén, nzian zho gon me; ni niina grëse zho laa zho quianee lo miech ganle cho nac me.

32 'Scaquegaa no grop no Bernabé, laa no ziaadnie diidz lo to gacnan to ganle niina ne laa Dios bleeban Jesús, laa me been mine bnee me lo pxozgol ne padzeela.

33 Lëë Jesús ga raquiet lo Salm brop, zaatne rnee: "Xpëed naa nac luu. Desde nadze laa zho gunbey ne Xpëed naa nac luu."

34 Ni bzeetle Dios ne laa me cueeban Jesús, bzeetle Dios xind xcuerp me len baa; min co ga raquiet lo Xtiidz me, zaatne rnee: "Zunlay naa luu, zigne bneese naa lo David gun naa."

35 Laa stib lo Salm ne pquiaa David rnee: "Gdeete luu diidz xin xcuerp naa len baa."

36 Rlu led Davite raquiet ga, sac zeene bza dze ne goc me dziin lo menladz me laa me gut, ni zaatne pqueets zho me, ga bnitlo xcuerp me.

37 Led meda, zhaa men ne raquiet ga; gacxe na rneew waa peet gacd xcuerp men co, zbeeban Dios me.

38-39 'iGrëse to bets, golganan sca ganle! Jesús nac men ne rsilaa miech lo dol! Zha ne gliladztaa me dib zdo zho, tel pe nactaa grë xtol zho, sanmbe me zho. Mine wlaltaa brieelod ngaa to, niicle ne zienal to xley Moisés; sac niicle gun tow grëse zigne naca, csanmbeda to lo dol.

40 'iGolguien sca gacnroladzde to! Zeena ygaade to mine bzeet zha ne biadteed xtiidz Dios padzeela, zeene znu bnee zho:

41 Grëse to ne rzhidznie to mine nac diidzli,

bii zan to ganle laa naa gun ti milagrnroob ne gzee zdo to;

per znitlo to, sac gliladzde tow niicle guiaad zha ne gzodiidza lo to.

42 Blozh bnee Pabl; laa zeene laa Pabl griee ga grop Pabl Bernabé bnab grë miech co lo zho, siguiel zho guiet sti zmal co biire tsie zho tsieeed zho zho.

43 Zeene brieewa zho len yadoo co, nzian grë zha Israel, nzian grë zha stib guiedz zha ne riladzle Dios zienal zhits zho. Nëz no zho bnee zho lo grë miech co tiblrique tso guic zho tsienal zho zhiwseed Dios, guien zho ganle pa lotaa noxco me zho.

44 Biet sti zmal co, miech guizhiu ne goclo len yadoo co, zootle zig grëse miech guiedz co pcaalsa ga ziequiaadiag zho Xtiidz Dios.

45 Zha ne rnabey lo grë zha Israel ne no ga, zeene gon zho scataa ndal miech ne goclo ga, blëe zho lo Pabl,



ndox zho lo me, rëb zho led diidzlid nac mine rseed me.

<sup>46</sup> Niicle Pabla, niicle Bernabéw bdziebd zho, dzigole bnee zho lo zho rëb zho:

—Nli to glo rieguial yquiaadiag Xtiidz Dios ne nac to zha Israel. Per ne squi run to guielntseeb nëde to ycaania tow par yгаа to guielmban ndzon ne rneedz Dios; na laa no guioseed grë zhazit.

<sup>47</sup> Ni scaleгаа rnabey Dios gaca, sac znu rnee me:

Laa naa bzole luu tsienee luu Xtiidz naa lo grë menzit,

luu gac zig ti biini ne gziini lo grë miech ne ndxie lo guidzliu; zeena guien zho zha laa zho lo dol.

<sup>48</sup> Grë zha ne nac zhazit, zeene bin zho sca rëb Pabl, per nli rley zho, rdeed zho xquizh lo Dios scataa ndzon nac Xtiidz me. Grëse zha ne nole yгаа guielmban ndzon ne gdeed Dios ga, grëse zho dze cogazh laa zho bliladz Jesús.

<sup>49</sup> Dipse dan co, gocnañ miech Xtiidz Dios.

<sup>50</sup> Grë zha Israel ne rlëe lo Pabl ga, psilo zho pquuil zho grë men wnaa ne nac diidz noxco Xtiidz Dios, ni güey zho güeynee zho lo grë zha ne nac men non lad guiedz co; zeena ctsidil zho Pabl grop Bernabé, guñcxoon zho zho dan co.

<sup>51</sup> Zeene bin Pabla grop Bernabé, par glu ne nonguield sca been zha co zho, beenmbe zho grë yudie co ni zho laa zho brieeg ga, laa zho zie nëz Icon.

<sup>52</sup> Grë zha ne bliladz Jesús ga, nguieel rac zho, rdeed Espíritu Sant guielbiini lo zho.

## 14

### *Bdziñ Pabl Icon grop me Bernabé*

<sup>1</sup> Zeene bdziñ Pabl Icon grop me Bernabé, güey zho tib xyadoo zha Israel zob lad guiedz co, bnee zho Xtiidz Dios lo grë zha ne pcaalsa ga. Zigtaa zha Israela, zigtagaa zha lad guiedz cow, nzian zho bliladza.

<sup>2</sup> Laa grë zha Israel ne bliladzda, psilo zho bloo zho diidz lo grëraa

miech guiedz co glëenie zho Pabl grop Bernabé.

<sup>3</sup> Niicle sca been grë zha co per wbid zho, bii blëz zho ga, peet dzeb nod lo zho rie zho rienee zho Xtiidz Dios lo miech; scagaa Dios, nzian grë milagr ne bdeed me diidz run zho par glu ne nli Xtiidz me nonee zho.

<sup>4</sup> Dzigo grë miech ne no lad guiedz co goc zho chop dii, grol zho racnie grë zha Israel ne rlëe ga, zgrol zho racnie grop zha poxtl co.

<sup>5</sup> Zha ne rlëe ga, zigtaa zha Israela zigtagaa zha guiedz cow, bnedidz zho grë zho wxtis laa zho tsie tsiedeedquie zho Pabl grop Bernabé.

<sup>6-7</sup> Zeene bin Pabla grop Bernabé, mazd laa zho brieeg ga, laa zho zie nëz xtan zha Licaon. (Güey zho Listr, güey zho Derb ni grëraa guiedz ne ndxie gax ga; güeynee zho lo grë miech co zha nac Xtiidz Dios.)

<sup>8</sup> Guiedz Listr ga gon zho ti mgui në ni, waltaa lo xquielmban me ib gard së me; sac scale në ni me zeene gol me.

<sup>9</sup> Zeene gon Pabl dze zob me rquiaadiag me mine nonee Pabl lo grë miech co, dzigo dzeque bui Pabl lo me, gon Pabl dib zdo me rliladz me nli zrieelo guñguiac Dios me;

<sup>10</sup> dzigo nguiedz bnee Pabl lo me, rëb Pabl:

—jBeenli ni luu, zeena bzoli!

Zigne sca bnee Pabl, znuse guso nguzhoon me, bzoli me laa me psilo bzë.

<sup>11</sup> Zeene gon grë miech co sca biac me, psilo zho con xtiidz zho nguiedz rnee zho:

—jDiosle i gon, nasi zig rlu miech rlu me laa me biet gbaa ziaadgañ me ne!

<sup>12</sup> jMasaque rzac zho lë xdios zho ga! Rnee zho Bernabé nac dios Júpiter, laa Pabl nac dios Mercur, sac Pabl nac zha ne ndziibraa rnee.

<sup>13</sup> Ro guiedz co ga zob xyadoo zhimdio zho Júpiter, dzigo brieeg pxoz ne no yadoo co grë me miech lad guiedz, zienie zho ngon, zienie zho guiee, nañ zho gut zho ngon co cogon zho ma lo Pabl grop Bernabé.

<sup>14</sup> Zeene bien Pabla grop Bernabé wbinladz guic zho. Ptsiez zho xab zho, bzëëb zho lad grë miech co, nguiedz rnee zho lo zho:

<sup>15</sup> —¡Ndzinli golgac! ¿Pe nacne squi rac to? ¡Golgan ganle miech guidzliuque nac no, tibaque nac ne grë ne! Laa no ziaad lo to ziadseed no to wseed cub ne nac Xtiidz Dios, zeena guien to csaan to grë ncuaane paat rquiind ne run to i, gbiire gbig to lo Dios men ne nlipaa mban. Me bzaa gbaa, me psan guidzliu, me psan nisdoo, grëse ncuaane no gbaaw, ncuaane no lo guidzliuw, ncuaane no lo nisdoo, me bzaaw grësew.

<sup>16</sup> Niicle ne glo bdeed me diidz been miech grë ncuaane gocladztaa zho,

<sup>17</sup> per psaanladzd me zho. Gocnie me zho zigne racnieque me ne niina, rsiaab me nisguie rac xcuaa ne, rneedz me ncuaane rdioow ne gzataa dze, rneedz me guiebley lo ne.

<sup>18</sup> Niicle sca rnee grop zha poxtl co, nen bin grë miech co diidz beete zho ngon co ngogon zho ma lo zho.

<sup>19</sup> Len dze co, blalaa zha Israel ne ziaad nëz Antioquí ni nëz Icon bdzin Listr ga. Psilo zho bloo zho diidz lo grë miech co gocntseeb zho lo Pabl; güey grë miech co bdeedquie zho Pabl.

Masaque bzhaac zho gutle Pabl, bdoobniu zho me güeyron zho me tiblاد ro guiedz.

<sup>20</sup> Grë zha guiedz co zha ne rliladzle Jesús, zeene bin zhow, güey zho zaatne nix me ga. Lëëtaaque ndxie zho lo me, zeene laa me guche; ga guche me laa zho zeynie me nëz len guiedz. Biini liu, pcaa me nëz grop me Bernabé laa zho zie nëz Derb.

<sup>21</sup> Bdzin zho Derb, psilo zho bnee zho Xtiidz Dios lo grë miech co; ndal grë zha ne bliladza. Blozh ga, laa zho wbi ga biire güeyted zho nëz Listr, güeyted zho Icon, ni güeyted zho Antioquí,

<sup>22</sup> güeynee zho lo grë zha ne rliladz Jesús ga, pchoobladz zho zdoo zho, pso zho diidz lo zho, niicle nroob guieñe ne noded zho per

none tibaque gac guic zho tsienal zho Xtiidz Dios; sac ible sca nzian ncuaane ted zho laga gdzin dze ne gdzin zho zaatne rnabey Dios.

<sup>23</sup> Tib tib guiedz co, bzose zho grë zha ne so gnabey lo grë zha ne rliladz Jesús ga; rlozhse rcuan zho grë zho zho ni rzodiidznie zho Dios, dzigo laa zho rsan zha co ladznia me yquianap me zho.

*Bdzin Pabl grop Bernabé nëz Siria stib*

<sup>24</sup> Nëz no Pabl grop Bernabé bded zho dib xtan zha Pisid, bzëëb zho xtan zha Panfil, bdzin zho guiedz Perg.

<sup>25</sup> Blozhse bnee zho Xtiidz Dios lo grë miech co, dzigo laa zho brieeg ga, bdzin zho guiedz Atalia.

<sup>26</sup> Atalia ga bzëëb zho barcw bdzin zho sti guiedz ne lë Antioquí, gataa laa zho psiaal viaj co. Guiedz coque ga brieeg zho grop zho güey zho grë guiedz co güeynee zho Xtiidz Dios lo miech; zeene sca bnab grë zha ne rliladzle Jesús ga lo Dios gacnie me zho tsiegun zho xtsiin me.

<sup>27</sup> Zigne bdzin zho Antioquí ga, bnabey zho pcaalsa grëse zha ne rliladz Jesús, bzodiidz zho lo grë miech co grëse zha gocnie Dios zho güeygun zho xtsiin me, ni zha rquia zdoo Dios zha ne nacd zha Israel rbedz me zho ye zho rzëëb xnëz me.

<sup>28</sup> Xtselaa bio Pabl ga grop me Bernabé, blëz zho lo grë zha ne rliladz Jesús ga.

## 15

### *Pcaalsa zho Jerusalén*

<sup>1</sup> Ga no Pabl grop Bernabé zeene bdzin bla zha ne ziaad nëz Judé, psilo zho noseed zho grë zha ne rliladzle Jesús ga, rnee zho lo zho ib none tso zho bey zigne rnabey xley Moisés, niicle ne rliladzle zho Jesús; zeena sca csilaa Dios zho lo xtol zho.

<sup>2</sup> Zeene gon Pabl sca noseed zha co miech, nacne bdidiidznieque Pabl zho grop Pabl Bernabé. Dzigo mazd bnediiz grë zha ne rliladz Jesús ga, bzo zho zla zha ne gacgza Pabl grop

Bernabé tsie zho Jerusalén tsienabdi-idz zho lo zha poxtl ni lo grè zha ne rnabey lo zha ne no ga, dien pe guiab zho.

<sup>3</sup> Nacne brieë zho zie zho. Nèz no zho bded zho xtan zha Fenicia, xtan zha Samar; zaatne notaa zha ne rliladz Jesús, rzodiidz zho lo zho grèse zha nobedz Dios grè zha ne nacdraa zha Israel, rsaan zho grè zhiwseed xmengol zho laa zho rliladz Jesús. Rley grè miech co ron zhow. Sca bio zho nèz, laa zho bdziñ Jerusalén.

<sup>4</sup> Zeene bdziñ zho Jerusalén, pcaalsa grè zha poxtl, grè zha ne rliladz Jesús ga, ni grè zha ne rnabey lo zho. Dzigo ga bzodiidz Pabl grop Bernabé grèse zha gocnie Dios zho, zeene güeyted zho grè dan co güeynee zho Xtiidz me lo miech.

<sup>5</sup> Miñ co quianee zho zeene guso bla zha ne glo goc farisé rëb zho, grè zha ne nacd zha Israel zeene laa zho rliladz Jesús ib none tso zho bey, ni none gun zho grèse miñe rnabey Xley Moisés.

<sup>6</sup> Dzigo nacne bnabey grè zha poxtl co ni grè zha rnabey co, ycaalsa zho stib dien zhapaa gaca, pe nonguiela tso grè zha zit bey co.

<sup>7</sup> Zeene pcaalsa zho, goc pa lo quianee zho zeene guso Pedr rëb Pedr lo zho:

—Grèse to bets, golquiaadiag miñe gne naa lo to nu ganle. Led rsoladz to, zeene griinpaa psilo quiagaaz Xtiidz Jesús lo miech, ible Dios bzooblo naa pxeel me naa gaseed naa grè zha ne nacdraa zha Israel gliladz zho me.

<sup>8</sup> Ni megaa ne runbey me zdoo tib tib miech, laa me blu ganle, niicle ne zha zit nac zho laa me pcaania zho; pxeel me Espíritu Sant nacie zho, zigne pxeelaque Espíritu Sant nacie ne.

<sup>9</sup> Gotsaa gwi ne ganle, led yed Dios rbe dien cho nac zha Israel cho nac-gaa zha zit; zigtaa zhaw, zigtagaa new, laa me pcaania ne porne dib zdoo ne bliladz ne me.

<sup>10</sup> ¿Zha nac dzigo ne racladz to gnabey to grè zha co gun zho grè miñe nac xley ne? ¿Pe niacxe rienraa

ne lo Dios dzigo? ¿Niicxe ne name, niicxe xmengol ne brieelod niuna zigne naca!

<sup>11</sup> Golguien ganle, zigtaa zhaw zigtagaa new laa me csilaa ne lo dol grè ne, per nacda por ncuaane rdziuun ne; sinque laa me csilaa ne porne nqualadz me ne.

<sup>12</sup> Zeene blozh sca bnee Pedr, dzese biac zho grè zho; dzigo laa Pabl grop Bernabé psilo bzodiidz grètaa milagr ne blu Dios lo grè menzit zaatne güeynee zho Xtiidz me lo grè miech co.

<sup>13</sup> Blozhse bnee grop zha co, laa Jacob gusoque rëb me:

—Grèse to bets, golquiaadiaggaa chop lan xtidz naa naganle gne naa lo to.

<sup>14</sup> Laa Pedr bzodiidzle lo ne ganle zha psilo bredz Dios grè zha zit, bzooblo me zho ye zho gac zha ne sëeb xnèz me.

<sup>15</sup> Ga nagon goca zigne zhobneese lo Xtiidz me, miñe pquiaa grè zha ne pxeel me padzeela, rneew:

<sup>16</sup> Tedse nu ganle, laa naa cuedz grèse miech ne ygab lo naa; grè zha xtii David zha ne bzozit, laa zho gbig stib.

<sup>17</sup> Horco grèse zha zit, laa zho gon ganle cho nac naa, zeena grieelo sëeb zho xnèz naa.

<sup>18</sup> Znu nac xtiidz Dios, ni padzeelale bzeet me ne laa me gun miñ co.

<sup>19</sup> 'Miñ co nagon grè zha zit ne rliladzle Jesús, ib nonguielda ga gnabey ne zho gun zho miñe nac xley ne.

<sup>20</sup> Sinque mazd yquia tib diidz cxeeel ne lo zho gon zho, grè ma ne rut miech rgogon zho lo grè zhimdio zho, ib gowd zho bëel co; grè ma ne rxieed ren zeene ret ma, gowd zho ma; ni niicle grèragaa ma ne gut zho, ib gowd zho xchen ma. Grè zha bgui, nodne tsonie zho wnaa ne nacd tseeel zho; niicle wnaagaaw, nodne tsonie zho mgui ne nacd tseeel zho.

<sup>21</sup> Niicle mazd padzeelaw, tibaque quiayon miech gun zho miñ co; sac desde hor co tib tib guiedz bzose Moisés tib zha ne gneew lo miech len

xyadoo zho, dze ne rdziiladz zho lo dziin.

<sup>22</sup> Blozhse ga, dzigo biaan zho diidz so chop zha ne tsie Antioquí tsienal zhits Pabl grop Bernabé, tsiesan zho ti diidz ne guey lo zha co. Nacne bzo zho Judas xingan Barsabás, ni bzo zho Silas; grop zha co, zha rien nac zho lo grëraa zha ne rliladz Jesús ga.

<sup>23</sup> Pquia ti guits güey zho, rnee lo guits co:

“Zigne nose no Jerusalén nu, zigtaa zha ne nac poxtla, zha ne rnabeya ni grëraa zha ne rliladz Jesús nuw, grë no laa no rquiaabdiuzh to grëse to bets ne nac to zha ne no guiedz Antioquí, ni grëraa guiedz ne ndxie nëz Siria i, ni nëz Cilis.

<sup>24</sup> Niina ne gocndion no laa bla zha ne nacgrë no nu biaad lo to i, biaad-cots zho guic to dien peraa no gun to. Gacnan to ganle led nod pxeel zho,

<sup>25-27</sup> gane niina bzodiidz no grë no bzo no Judas ni Silas ziaadnal zhits Pabl grop Bernabé, laa zho ziaad i ziaadgan zho to. Zha nziuu nac Pabl grop Bernabé lo no, sac gon rbeeladz zho xquielmban zho quiaayun zho xtsiin Jesús.

<sup>28</sup> 'Lo godiidz ne bdziun no, laa no bdzianle nonguielda ne dien peraa gnabey no to gun to, ni niiclegaa Espíritu Sant scaque rnee me. Rquind ne peraa gun to, lëëlew ga totsaque tsoxco to

<sup>29</sup> gowde to xpëel grë ma ne rgogon miech lo grë zhimdio zho; grë ma ne rxieed ren zeene ret ma, gowde to ma; ni niicle gowdgaa to xchen grë ma ne gut to. Grë zha bgui, nodne tsonie zho wnaa ne nacd tsieel zho; niiclegaa wnaaw, nodne tsonie zho mgui ne nacd tsieel zho. Min rii nagon nac mine no tsoxco to.

'Guiaanne Dios to sca.”

<sup>30</sup> Gza tap zha co laa zho brie Jerusalén, laa zho zie nëz Antioquí. Zeene bdzin zho ga, bnabey zho pcaalsa grëse zha ne rliladz Jesús, dzigo bdeed zho guits co lo zho.

<sup>31</sup> Zeene gocnan grë zha co zha rnee low, rley zho sacne pchooblada zdoo zho.

<sup>32</sup> Blozhse ga, psilo Judas grop Silas pseed zho grë miech co Xtiidz Dios, zeena dib zdooraa zho gnalo zho Dios; sac bdeed me guielbiini lo Judas grop Silas rteed zho xtiidz me lo miech.

<sup>33</sup> Xtselaa blëz Silas ga grop Judas, laa zeene gol dze ne laa zho grieegbiire zho nëz Jerusalén stib, ine güeyzonëz grë zha co zho, rdeed zho xquizh lo zho.

<sup>34</sup> [Laa zho nole nëz, tibaque zeene rëb Silas laa Silas guiaanaque ga spalal dze.]

<sup>35</sup> Laa Pabl grop Bernabé ible laa zho biaan ga been zho xyudar grë zha ne noseedle miech ga.

### *Ptso Pabl grop Bernabé*

<sup>36</sup> Goc palal dze no Pabl guiedz Antioquí ga grop me Bernabé, zeene rëb me lo Bernabé laa zho gbiire tsie grë guiedz ne güeynee zho Xtiidz Dios lo miech ga, par gacnan zho dien yo grë zha co.

<sup>37</sup> Dzigo gocladz Bernabé ye Juan Marcw nienie zho;

<sup>38</sup> per bzhiguield Pabl, sac zeene güeynie zho Juan glo, psanaque Juan zho guiedz Panfil, laa Juan biire zey Jerusalén, güeynal Juan nlozh nsiaal zho lo dziin co.

<sup>39</sup> Min co pquiaqui bneelsa Bernabé grop Pabl, nrooblaa güey lo xtiidz zho; nacne gataa laa zho ptso. Pcaa Bernabé nëz grop Bernabé Juan bzëeb zho barcw zie zho nëz lo guidzliu win ne no lo nisdoo lë Chipr;

<sup>40</sup> laa Pabl goc grop Silas. Blozhse bnab grë zha co lo Dios gacnie me Pabl grop Silas, laa zho brie ga

<sup>41</sup> güeyted zho grë guiedz ne ndxie nëz xtan zha Siria, grë guiedz ne ndxie nëz Cilis, güeynee zho lo grë miech ne rliladz Jesús nëz co, güeychoobladz zho zdoo zho.

## 16

### *Beenbey Pabl Timoté*



1 Len dze co güey Pabl grop Silas güeyted zho Derb ni güeyted zho Listr. Listr ga beenbey zho tib zha nguieg ne riladzaque Jesús lë Timoté, ti men Israel ne riladzle Jesús nac xniaa me, laa pxoz me nac men Gres.

2 Grëse zha Listr, zha Icon, zha ne riladz Jesús tibaque rzeet zho Timoté rnee zho ti miech ndzinli nac me, nacne bnee Pabl lo me tsienal me zhits Pabl.

3 Ni ne nod me bey ne rio zha Israel sac led zha Israeld nac pxoz me, dzigo bloo Pabl me bey co, zeena tsod pe glisqui grë zha Israel ne no nëz co.

4 Laa me zienal zhits Pabl. Guiedz ne rdedtaa zho rnee zho lo grë zha ne riladz Jesús ga, tsoxco zho gun zho grë mine pso zha poxtl ga diidz, grë zho zha rnabey ne no Jerusalén.

5 Zeene ron grë zha cow, dib zdooraa zho rnalo zho Dios, zigse zie dze racnzianraa zha ne riladz Jesús.

6 Blozh ga, tibbdeed zho xtan zha Frij ni xtan zha Galás, sac bdeete Espíritu Sant diidz nienee zho Xtiidz Dios lo miech grë guiedz ne ndxie nëz Asia ga.

7 Zeene bdzin zho zaatne rsilo xtan zha Misia gocladz zho nie zho nëz xtan zha Bitin, scaque bdeete Espíritu Sant diidz nie zho nëz co.

8 Dzigo tibbdeed zho dib xtan Misia bdzin zho ti guiedz ne ndxie ro nis-doo lë Troas.

9 Guieel co blulo ti mgui Macedon lo Pabl, rnab me gun Pabl guielnaac tsie Pabl nëz co, tsiegun Pabl xyudar grë miech co.

10 Nacne hor cogazh bzhixcuaa no, sac bien no ible Dios racladz guio no nëz co guionee no Xtiidz me lo miech.

11 Dzigo brie no ga bziaab no ti len barcw bdzin no ti lo guidzliu win ne no lo nisdoo lë Samotras. Biini liu brie no ga bdzin no Neápolis, ga bliaaz no wdze co.

12 Biini sti liu co brie no Neápolis bziani no bdzin no Filip. Lëe guiedz co riaan zaatne rsilo xtan zha Macedon, niapse men Roma no ga; nzian-laa ngbidz bliaaz no ga.

13 Laa tib dze ne rdziiladz miech lo dziin, brie no bio no tib lad ro guiedz co, gax ti ro guiubee, zaatne bdzion no rcaalsa zha ne rienab lo Dios. Bdzin no nzianlaa men wnaa ndxie ga, dzigo psilo no bnee no lo zho cho nac Jesús.

14 Lad co no ti wnaa Tiatir lë Lidia, rto me grë lar nizhnie nlaan mine nac lar niazh; ye me dib zdoo me riladz me Dios. Laa me noquiaadiag mine nonee Pabl ga, zeene psiaab Dios guic me bliladz mew.

15 Dzigo hor cogazh brobnis me grë menlidz me; blozh ga, bredz me no guiobiaaz no lidz me, nëchaa me lo no:

—Telne rzac to nli dib zdoo naa rleynie naa Dios, goltë sca cuëz to lidz naa.

Rzoobguic me lo no, nacne biobi-aazaque no lidz me.

### *Bio Pabl ladzguiib grop Silas*

16 Tib dze, lëetaque zio no zaatne riezodiidznie no Dios, bdzieelo no ti ndzooop nguieg noguitnie mendox. Zëeb diidz grëse tel pe rnabdiidz miech lo ndzooop, rnee mendox cow; nroob dimi ne riab nia zha ne rnabey ndzooop.

17 Nal ndzooop zhits no, nguiedz roptsie ndzooop rnee ndzooop:

—jXtsiin Dios ndzon ne zob gbaa gon noyun gza mgui rii! jLaa zho ziadseed to zeena gacnan to zha csilaa Dios to lo xtol to!

18 Nzian dze zaatne rdzieeltaa no ndzooop tibaque sca rnee ndzooop. Zeene bieedtaa guic Pabl, biireque me bnee me lo mendox ne noguitnie ndzooop ga, rëb me:

—Jesús nacie naa, ni laa naa rnabey luu gon niinagazh psaan ndzooop qui.

Zigne sca rëb Pabl laa mendox co bzhoon.

19 Gza zha ne rnabey ndzooop ga, zeene gon zho rundraa ndzooop guielnsin co gdziniaa ndzooop dimi, bnaazaque zho Pabl grop Silas güeyzo zho zho lo wxtis, rëb zho:

20-21 —jGolwi ganle pe nac ncuaane noyun grop zha Israel rii lad

guiedz nu! ¡Nogodiḽ zho miech, laa zho quiaseed miech ncuaaṇe nonguielḽdraa dziuun ne nac ne zha Roma!

<sup>22</sup> Pcaalsa grēse miech co, grēse zho ntseeb rac zho lo Pabl grop Silas. Dzigo bnabey wxtis co brieē xab zho grop zho bdeed bar zho zho, nroob bdiṇ zho zho.

<sup>23</sup> Blozhse bdiṇ zho zho laa zho psēēb zho ladzguiib, bnabey zho men ne quianap ladzguiib ga tibaque yquianap me zho, sac telḽ laa zho xoon me tsietizha.

<sup>24</sup> Zeene bin men co sca rēb zho, güeyaque me güeysēēb me zho stib leṇa miṇe riaaṇ caaṇraa, ga psēēb me ni zho lad chop lē yag nroob.

<sup>25</sup> Wdze co, zig groḽ guieela laa Pabl grop Silas bii noyoolṇie Dios, ni rnab zho lo me gacniēn me zho. Grēse zha ne no ladzguiib ga, ron zho sca no Pabl grop Silas.

<sup>26</sup> Tibaque zeene bni ti zhodox, psiniw dib nacse ladzguiib co, grēse ro ladzguiib co bzhiāl, guiib ne no nia grē zha ne no ga, wbiḽa.

<sup>27</sup> Lēēlēd brieē mcaallo men ne quianap ga, zeene gon me grēse ro ladzguiib co zonial, masaque güeynie guic me bzhoonle grē zha ne no ga, bdobaque me spad ne ney me laa me zie gut me me.

<sup>28</sup> Horco broptsie Pabl lo me, rēb Pabl:

—¡Gute luu luu! ¡Grē no ndxie no, choot bzhioonḽ!

<sup>29</sup> Lēēlēd bnab me biini, bzēēb nguzhoon me leṇ ladzguiib, masaque rzhidz me dzeb pquiiṽsgzhib me lo Pabl grop Silas.

<sup>30</sup> Blee me zho ga, rēb me lo zho:

—Golṇē lo naa, ¿pe nac miṇe guṇ naa zeēṇa csilaa Dios naa lo grēṽaa xtoḽ naa?

<sup>31</sup> —Dib zdoo luu bliladz Jesús, men rnabey ne pxeel Dios lo guidzliu —rēb zho—, dzigo silaa me luu lo dol, silaa me menlidz luu ne.

<sup>32</sup> Dzigo güeynie me zho lidz me, bnee zho Xtiidz Dios lo me grē menlidz me.

<sup>33</sup> Guieel co no me bdiib me zhits zho, zaatne brēē bar ne bloobar zho zho; blozhse ga, laa me brobnis grē menlidz me.

<sup>34</sup> Bnabey me goclo ti guielwagw downie me zho, rley me, niicle grēgaa menlidz mew rley zho ne laa zho bliladz Jesús.

<sup>35</sup> Biini liu, pxeel wxtis zha ne güeynie diidz lo me cuee me Pabl ladzguiib grop Pabl Silas.

<sup>36</sup> Dzigo güey me güeynee me lo Pabl rēb me:

—Laa wxtis pxeel diidz cuee naa to ladzguiib; zacle nasca griee to, peet tsieniedraa guic to.

<sup>37</sup> Dzigo rēbchaa Pabl lo zha ne bdziṽnie diidz ga:

—¡Zha ndzielguictaa zhiwxtis to gon! Squi ndxie menguedz bdiṇ zho no, ni gardle gacnaṇ zho dien pe nli no pe falt ne rdziaap no. Bnabey zho bio no ladzguiib, ni zha Roma nac no; nana racladz zho zhliaanse griee no. ¡Lēda ga gon! ¡Golṽsie golguiab lo zho, lēēzhal zho guiaad guiadbee zho no nu!

<sup>38</sup> Dzigo güey zha co güeynie zho diidz lo wxtis. Zeene bin wxtis zha Roma nac Pabl, bdziēb zho;

<sup>39</sup> lēēlēd güey zho ro ladzguiib güeynab zho dispensar lo Pabl grop Silas. Blee zho zho ladzguiib, ni bnab zho lo zho siguiel zho mazd gbi zho guiedz co.

<sup>40</sup> Ga brieē zho güey zho lidz wnaa ne lē Lidia ga, bnee zho lo grē zha ne pcaalsa ga, zha ne rililadz Jesús, pso zho diidz lo zho tiblrique gac zho tsienal zho xtiidz me. Blozhse ga, dzigo laa zho brieē guiedz co.

## 17

### *Güey Pabl Tesalónica grop me Silas*

<sup>1</sup> Brieē Pabl guiedz Filip grop me Silas, güey zho güeyted zho guiedz Anfípolis ni guiedz Apolonia, bdziṽ zho guiedz Tesalónica. Lad guiedz co zob ti xyadoo zha Israel,

<sup>2</sup> dzigo güey Pabl güeynee me Xtiidz Dios lo grē zha ne rcaalsa ga, zigne

runaque me grëraa guiedz ne zieded me.

Blëz zho ga tson zhmał, gzobse dze ne rdziiladz miech lo dziin güey Pabl güeyzodiidznie Pabl grë zha co,

<sup>3</sup> bzeet me lo zho grë zaatne raquiet grëtaa ncuaane ted meñ ne cxeel Dios lo guidzliu ga, ni zha grieeban me; ni blu me lo zho gacnañ zho ganle lëe meñ co ga nac Jesús.

<sup>4-5</sup> Ndal zha ne pquiaadiag xcodiidz Pabl, bien zho ne nli sca naca, laa zho bliladz Jesús, ndal zho nac zha nëz Gres, zha ne noxcole miñe rnabey Dios, ye blalaa meñ wnaa ne nac meñ non lad guiedz co. Laa zha Israel ne rnabey yadoo co, zeene gon zho scataa ndal zha ne bliladz Jesús, blëe zho; güey zho güeytop zho grë zha yozh ne quianzë lad guiedz co, ti ruid ne been zho lad guiedz. Güey zho güeysëeb zho lidz Jasón nañ zho niebee zho Pabl ga grop Silas, ngo zho zho ladznie grë miech co.

<sup>6</sup> Zeene gon zho bgaad grop zha co lo zho, bnaaunque zho Jasón ni zla zha ne rliladz Jesús, bdoobniu zho zho bdziñnie zho zho lo wxtis, roptsie zho rnee zho:

—¡Golgan ganle laa zha ne sca quianzë nocots guic grë miech, laa zho blansole nu!

<sup>7</sup> Ni Jasónpaa rdeed zaatne rbëz zho. Racladzdraa zho gun zho miñe rnabey rey César, sac rnee zho no sti zhirey zho lë Jesús.

<sup>8</sup> Grë zha wxtis co ni grë menquiedz ne pcaalsa ga, zeene bin zho sca rnee grë zha co, rienndraa zho zha gun zho.

<sup>9</sup> Miñe been zho beenquizh zho Jasón ti mult gza Jasón zla zha co, dzigo laa zho wbi ga.

<sup>10</sup> Pcow liu co, wxiña laa grë zha ne rliladz Jesús ga bleese Pabl ga grop me Silas, pxeel zho zho nëz Beré. Zigne bdziñ zho Beré, gloque ti xyadoo zha Israel güey zho.

<sup>11-12</sup> Grë zha Israel ne no Beré ga, rley zho rquiaadiag zho miñe rnee Pabl grop Silas, gzobse dze rlab zho lo Xtiidz Dios rwi zho dien pe nli miñe rnee zho ga. Ndal zha Israel

co bliladz Jesús, ndal zha Gres ne, zigtaa mguiw zigtaa wnaaw; blalaa meñ wnaa co zha non nac zho guiedz co. Tibliladz nac grë miech co, gocntseebd zho zigne gocntseeb zha Tesalónica.

<sup>13</sup> Laa zeene gocnañ zha Israel ne no Tesalónica laa Pabl nolaque guiedz Beré, güeyaque zho güeyquiil zho grë miech co glëenie zho Pabl.

<sup>14-15</sup> Dzigo lëelëd brieë bla zha ne rliladz Jesús ga, zienie zho Pabl nëz ro nis; laa Silas grop Timoté biaan ga. Güey zha co güeysan zho Pabl guiedz Aten; laa zeene laa zho wbi, pxeel Pabl diidz lo Silas grop Timoté tsieniob zho Aten.

### *Len dze ne no Pabl Aten*

<sup>16</sup> Laga quiambëz Pabl gdziñ Silas grop Timoté güey me güeyted me lad guiedz co, wbinladz guic me gon me led zhid grë mdio ne riegañ grë miech co.

<sup>17</sup> Nacne bioxco me bnee me Xtiidz Dios lo zho, güey me xyadoo grë zha Israel ne no ga, bzodiidznie me zho grë zho zha guiedz co zha ne rliladzle Dios. Gzobse dze rie me len guiedz rienee me lo grë miech ne rdziñ ga.

<sup>18</sup> Tib dze bdzieelo me bla zha rac ne zienal zhiwseed ti meñ lë Epicur, ni zla zha ne zienal wseed ne rnee zho estoic; psilo me bzeet me Jesús lo zho, bnee me zha brieëban Jesús. Zeene bin zho zha rnee me, no bla zho rzhidznie me, rnee zho:

—¡Dieen pe riab guic meñ qui rnee me, ziaadquidie me miech!

Zlagaa zho rnee, nend cho zhiwseed sti Dios ne rliladz miech stib dan zienie Pabl, gane sca rnee Pabl;

<sup>19</sup> dzigo rëb zho lo Pabl:

—Bzhiguiel mazd, së luu guio ne lozh sodiizd luu lo no dien zha nac wseed ne ziaadnie luu,

<sup>20</sup> sac waltaa gard dzion no grë ncuaane rnee luu i.

<sup>21</sup> No zho liaadz gacnañ zho pe rnee Pabl, sac sca nac grë zha Aten, niiclegaa grë zha ne quiadzin ga, rdziladz zho rded-dze zho rzodiidz zho dien zha nac grë diidz cub ne griiñ ron zho.

<sup>22</sup> Bdziñ zho ti guic gui win ne rnee zho Areópago, bzo Pabl glowtaa zaatne rcaalsa zho ga, bnee me lo zho rëb me:

—Grëse to ne nac to meñ Aten, ran naa ne nligaa rioxco to rleyne to grë meñ ne rzac to nac Dios;

<sup>23</sup> sac leñ dze rii biateed naa zaatne zob grë xdios to, haxta no zaatne niaa ti lo pcoog quia chop lan diidz ne znu rnee: “MIN RII NIAA PAR DIOS NE RDZIUUNBEYD NE.” Golgacnañ sca ganle, Dios ne runbeyde to ga, runbey naa me ni lëë zhiwseed me none naa lo miech leñ dze rii.

<sup>24</sup> 'Dios co bzaa guidzliu, me bzaa grëtaa ncuaane no lo guidzliu; gacd ne guiab miech zha gzaa ti zaatne cuëz me, sac meñ nroob meñ rnabey nac me, me rnabey gbaa, me rnabey guidzliu.

<sup>25</sup> Niicle rquiindgaa me dien zha yquianap zho me, sac grëse ne ne nac ne miech, me rneedz guielmban lo ne, me rneedz grëtaa ncuaane rquii ne.

<sup>26</sup> Lo tib nëzaque miech ne bzaa me ga, bnabey me brieequia grëse dii miech ne ndxie lo guidzliu niina, bdeedse me zaatne biaan tib tib dii co ni dien palal dze ne gban zho zaatne biaan zho.

<sup>27</sup> Laa me psañ zho parne yguib zho me, tsoxco zho guien zho ganle zha nac me haxta gdziel me lo zho. Ni led zite ga zo me lo ne grë ne,

<sup>28</sup> sac gon, niapse por xpoder me laa xcuerp ne niaa zigne naca, laa ne mban, laa ne rriel. Lëew ga bnee bla menladz to, zha rac ne znu rëb: “Xtii Dios nac ne.”

<sup>29</sup> 'Gase na ganle gotsaa gwi ne, conque xtii Dios name nac ne, pe nac dzigo gliladz ne lëë Dios ga nac grë cho mdio or, cho mdio plat, cho mdio quie ne riab guic miech rzaa zho;

<sup>30</sup> ni ib sca rliladz miech. Laa Dios gop zho paciens hor co sac runbeyd zho me; sanque niina laa me quiabedz zho, laa me rnab lo zho csaan zho grë ncuaane bliladz zho ga gbig zho lo me, mese gleynie zho;

<sup>31</sup> sac laa me bzole tib dze ne gacredz grëse miech lo me yгаа zho

mine tsieguial zho tib tib zho, tel zha wban zho. Ni laa me blule ganle cho nac meñ ne gun guielwxtis co, lëë meñ co ga gon bleeban me.

<sup>32</sup> Zeene bin zho bzeet Pabl no ti meñ ne brieeban, nzian zho rzhidznie Pabl, zla zho rëb:

—Na dien pa sti dze lozh yquiaadiag no mine rnee luu i.

<sup>33</sup> Gataa pcuëz zho lo xcodiidz Pabl, laa Pabl wbi lo zho ga.

<sup>34</sup> Brieequia blalaa zha Aten bliladz Jesús, lëë tib zho ga nac mgui ne lë Nich (meñ ne nacgrë zha ne nac wxtis) ni ti wnaa lë Dámaris.

## 18

### *Güey Pabl guiedz Corint*

<sup>1</sup> Brie Pabl Aten bdziñ me guiedz Corint.

<sup>2</sup> Ga beenbey me ti meñ Pont lë Aquil, ti zha xtii zha Israel nac Aquil. Roma no me glo, wriin bdziñ me Corint ga grop tsieel me; sac bnabey rey Claud brie grëse zha Israel ne no Roma.

<sup>3</sup> Dzigo güey Pabl blëz Pabl lo zho ga, sac ye zho rzhixcuaa grë lar nroob ne rquia ncal, tipse pquia zho dziin ga gza zho.

<sup>4</sup> Gzobse dze ne rdziiladz miech lo dziin rie Pabl xyadoo grë zha Israel ne no ga, riezodiidznie me grë zha ne rcaalsa ga; zigtaa zha Israela, zigtagaa zha guiedz cow rnee me lo zho tso guic zho gliladz zho Jesús.

<sup>5</sup> Zeene laa Silas grop Timoté bdziñ Corint, dzigo laa Pabl psilo gzobse dze güey me güeynee me Xtiidz Dios lo grë zha Israel ne no ga, rnee me lo zho cho nac Jesús.

<sup>6</sup> Laa zeene gontaa me rond zho diidz, lel ntseeb rac zho lo me haxta rneenë zho Jesús, dzigo bdzib me xab me lo zho, rëb me:

—jLaa naa bial bialne naa lo to per pquiaadiagde to mine rne naa; xtolle to nasca tel laa to nitlo! Gbiiredraa naa gne naa Xtiidz Dios lo to, na laa naa csilo ganew lo grë zha ne nacd zha Israel.

<sup>7</sup> Dzigo laa Pabl psilo güey lidz ti meñ ne no gaxaque zaatne zob yadoo



co lë me Just, dib zdoo me rliladz me Dios.

<sup>8</sup> Len dze co ndal zha Corint bliladz Jesús zeene bin zho miñe rnee Pabl, haxta ti men ne rnabey xyadoo zha Israel lë Crisp, grë menlidz me bliladz Jesús, dzigo grëse zho laa zho brobnis.

<sup>9</sup> Ti wdze blulo Dios lo Pabl, rëb me lo Pabl:

—jGdziebd luu! jib ycuëezd luu lo dziin ne noyuu luu i, bnee xtidz naa lo grë miech qui! Ndal grë miech rii no sëëb xnëz naa.

<sup>10</sup> Peet tsienied guic luu, choot grielod lega pe guñ luu sac naa quianaap luu.

<sup>11</sup> Nacne blëz Pabl ga stib iz grol, pseed me grë miech co Xtiidz Dios.

<sup>12</sup> Laa zeene bzob men ne lë Galión zobnabey me xtan Acay, grë zha Israel ne no Corint ga bnediidz zho grë zho bnaaz zho Pabl güeyzo zho me lo Galión

<sup>13</sup> rëb zho:

—Laa no ziaadnie mgui rii lo luu, sac laa me quiaguiits xley no, quiago me guic miech tsiegan zho Dios sti mod miñe ni nacdrea ley.

<sup>14</sup> Laa Pabl zie gnee, zeene pquiab Galión rëb me lo grë zha co:

—Telne niaca miñe no pe ti falt, pe ti guielntseeb ne quiayuu me, dzigosi naa raguial guñ guielwxtis.

<sup>15</sup> Per telne laa to ziaadnie me nu porne rdziladzde to miñe quiaseed me miech, rdziladzde to tel cho rzeet me, sac led scad nac xley to, tsow golgan dien pe guñ to. Nodaque xtil to guic naa.

<sup>16</sup> Bleega Galión zho nëz ley.

<sup>17</sup> Dzigo bnaaz zha guiedz co ti men lë Sóstenes, men ne rnabey xyadoo zha Israel ga; gonlo Galión bdiñ zho me, per peet rëbd Galión.

### *Biire bdziñ Pabl guiedz Antioquí*

<sup>18</sup> Goc spalal dze no Pabl Corint ga, dzigo bnee me lo grë zha ne rliladz Jesús ga laa me gbi; ye Aquil ni Priscil wnaa ne nac tsieel Aquil nole guic tsienal zhits me.

Nacne zeene laa me brieë, ye zho bzëëbgza me barcw, laa zho zie nëz Cencré. Lëëtaaque len dze co noxco

Pabl guñ me tel pe nac ncuane rëb me lo Dios guñ me, dzigo zeene bdziñ zho Cencré bnabey me liu liu ptsiib guic me.

<sup>19</sup> Cencré bzëëb zho barcw stib, zie zho nëz Efés. Bdziñ zho Efés, güey Pabl xyadoo grë zha Israel ne no ga güeynee me Xtiidz Dios lo zho.

<sup>20</sup> Dzigo bnab zho mbëz me lo zho ga ti blalaa dze, per brieelod mbëz me

<sup>21</sup> sac laa guic me no gdziñniob me Jerusalén ygaa me lni ne ziaadyob len dze co, rëb me:

—Na telne zneedz Dios diidz, bii zialteedaque naa dien yo to.

Gataa biaan Aquil grop Priscil, laa me bzëëb barcw stib zie me nëz Cesarea.

<sup>22</sup> Cesarea brieë me barcw, laa me zie nëz Jerusalén. Bdziñ me güeyquiaabdiuzh me grë zha ne rliladz Jesús ga; biireraa me ga bdziñ me Antioquí.

<sup>23</sup> Goc palal dze no me Antioquí, laa me brieëque ga güeyted me grë guiedz ne ndxie dib xtan zha Frij, dib xtan zha Galás, güeynee me lo grë zha ne rliladz Jesús ga dib zdoo zho gleynie zho Dios.

<sup>24</sup> Len dze co bdziñ ti men xtii zha Israel guiedz Efés, ti men Alejandriw lë me Apol. Ti zha rac nac me, rien me zha gnee me Xtiidz Dios lo miech.

<sup>25-26</sup> Güey me xyadoo zha Israel ne no ga, nguieel rac me, peet dzeb guien lo me psilo me nonee me lo zho grëse miñe bnee Juan Bautist zeene bzeet Juan Jesús; sac loxaque miñ co bin me zeene gocnan me cho nac Jesús.

Lad co co no Aquil ni Priscil, zeene gon zho zha rnee me, dzigo blozhse ga, bredz zho me blozh bnee zho lo me zharaa nac zhiwseed Jesús.

<sup>27</sup> Grë zha ne rliladz Jesús ga, zeene gocnan zho laa guic me no tsie me nëz Gres, dzigo ye zho rëb wen tsie me, pquiaa zho ti cart pxeel zho lo zha ne no nëz co zaacse ycaania zho me. Zeene bdziñ me nëz co, pseed me grë zha co. Rley zho blozh gocnan zho cho nac Jesús;

<sup>28</sup> sac squi ndxie miech rsioog me ro grë zha Israel, rnee me lo zho lëèle meñ ne quiambëz zho cxeel Dios ga nac Jesús, ni rlu me lo zho pa lo zhobneew lo Xtiidz Dios.

## 19

### *Biire güey Pabl Efés*

<sup>1</sup> Len dze ne no Apol Corint, laa Pabl bdziñ Efés. Blozhse güeyted Pabl grë guiedz ne ndxie nëz xtan zha Galás, laa me bdziñ ga. Ga bdzieel me blalaa zha ne rliladz Jesús,

<sup>2</sup> dzigo bnabdiidz me lo zho, rëb me:

—¿Pe bгаа to guielbiini ne rneedz Espíritu Sant, zeene bliladz to Jesús?

Pquiab zho rëb zho:

—¿Guielbiini ye? Gard gon dzion no rdeed Espíritu Sant guielbiini.

Dzigo rëbchaa Pabl:

<sup>3</sup> —¿Pezhe waa pseed to zeene brobnis to?

—Zhiwseedse Juan Bautist gocndion no —rëb zho.

<sup>4</sup> Dzigo bnee Pabl lo zho zha nac wrobnis ne biaadnie Juan. Rëb me lo zho nace wrobnis co par glu miech ne laa zho csaan guielntseeb, laa zho sëeb xnëz Dios; per grëse zha ne bгаа wrobnis co ib none gliladz zho Jesús, meñ ne bzeet Juan ga zeene rëb Juan ile ziaad me.

<sup>5</sup> Min co bin zho nace brobnis zho stib zigne psan Jesús diidz.

<sup>6</sup> Zeene laa Pabl pxobnia guic zho bnab me gdeed Espíritu Sant guielbiini lo zho, hor co psilo zho nzian lo diidz ne rnee zho; ni bnee zho tel pe nac mine racladz Dios gacnan miech.

<sup>7</sup> Lo gza zho rгаа zho tsiipchop, niapse zha bguiw.

<sup>8</sup> Tson mëe blëz Pabl ga, tibaque rie me xyadoo grë zha Israel ne no ga, ible rdziebd me rnee me lo zho zha nac Xtiidz Dios, ni rguib me rgo me guic zho gliladz zho cho nac Jesús.

<sup>9</sup> Per zeene gon me no palal zho ib rond diidz, lel psilo zho squi ndxie miech rneenë zho Jesús, nace bleextsoque me grë zha ne rliladzle Jesús, güeynie me zho zaatne nac

xyuscuel ti men lë Tiran; ga rcaalsa zho gzobse dze rieseed me zho.

<sup>10</sup> Dipse len chop iz blëz me ga pseed me grë zha co; nace grëse miech ne no dib nëz Asia ga, zigtaa zha Israela zigtagaa grëraa miech cow, bin zho zha nac Xtiidz Dios.

<sup>11</sup> Bdeed Dios diidz been me grë milagr nroob ne rzee zdoo miech;

<sup>12</sup> sac haxta lar ne rzëse nia me, lar ne rbixse me rzhoob lad meñ ne rzacnë laa zho riac, niicle grëгаа menox ne noguitnie miecha, rzhoon ma.

<sup>13-14</sup> Ga quianzë gadz xpëed ti zhipxoz zha Israel lë Escev, stib guiedz stib guiedz rie zho rieguncxoon zho menox ne noguitnie miech. Ti vuelt, nan zho na ye zho cuedz lë Jesús gacniën me zho guncxoon zho menox; bdziñ zho zaatne guncxoon zho ma, rëb zho:

—¿Zig zobwi Jesús ne rzeet Pabl, laa no rnabey to golrieegazh i niina!

<sup>15</sup> Pquiabaque ma rëb ma lo zho:

—Wen wen runbey naa Jesús ni nangaa naa cho nac Pabl, sangue to gon ni lalnu runbeyd naa to.

<sup>16</sup> Znuse bias meñ ne noguitnie menox co, bnaaz me gza zha co bdiñ me zho. Ib blëbd zho lo me, masaque dib brëe rna zho, ni xab zho nacw-draa, laa zho bzhoon.

<sup>17</sup> Grë miech ne no Efés, zigtaa zha Israela, zigtagaa grë zha guiedz cow, zeene bin zhow per nli bdzieb zho; grëse zho bien zho ne nli meñ non, meñ rnabey nac Jesús.

<sup>18</sup> Haxta ye grë zha ne rliladzle Jesús, hor co laa zho bleero pe nac grë ncuanea ndzinlid ne bliladz zho glo.

<sup>19</sup> Nzian zha ne biil diidz dox güeyxi zho grë xquits zho, squi ndxie miech laa zho bzëega grësew. Zeene biobey palal gocnon grëtaa guits co, biirew zig chooptsii mil pes plat.

<sup>20</sup> Ga blu poder ne nacie Xtiidz Dios, sac grë zha ne bina bdzëe lo xquielmban zho.

<sup>21</sup> Bded ga, biab guic Pabl tsieted me nëz xtan zha Macedon, xtan zha Gres, gbiire me ga laa me

tsie Jerusalén stib; haxta rnee me Jerusalén griee me tsie me Roma.

<sup>22</sup> Nacne ptedner me Timoté grop Rast (zha ne noyux xyudar me len dze co) zie zho nëz Macedon, laa me bii biaan nëz Asia ga.

### *Gocntseeb zha Efés*

<sup>23</sup> Len dze co briequia palal zha Efés ptsidil zho zha ne rliladz Xtiidz Dios.

<sup>24</sup> Guiedz co no ti men ne rundziin guiib plat lë Demetr, rzaa me grë yadoo yeen zig niaada xyadoo xnaxnash zho Dian; nroob dimi ne rial me grë me zha ne runnie me dziin co;

<sup>25</sup> bnabey me pcaalsa grë zha ne quia dziin lo me, ni grëragaa zha ne runaque dziin co, rëb me lo zho:

<sup>26</sup> —Rien naa ziyonle to, ziyangaa to ganle laa mguine rnee zho Pabl quianzë lad guiedz nu, rnee me nlid Dios ga nac grë mdio ne rzaa miech. Pe zhidaale miech quialiladz zhiwseed me nu; ni led loxaque nudsegaa, dible Asia quialiladz miecha. ¿Pe gnë to zha dziuun ne?

<sup>27</sup> Golguien ganle noxtseeb guiabdraa xtsiin ne, ni nanwen to ganle lëe xtimi ne nu. Ni tebaa mincosegaaw, mine mazdraa noxtseeb nend grëse miech csaanladz xyadoo nazhnash Dian, nend grëse miech ne rleynie me dib Asia, diibgaa lo guidzliuw con guiaanladz zho me.

<sup>28</sup> Zeene gon grë zha co sca rëb Demetr, rlëe zho, roptsie zho rgo zho xviv Dian.

<sup>29</sup> Wdzeepaaw grëse menguiedz laa zho pcaalsa, güey zho bnaaz zho Gay ni Aristarco chop zha Macedon ne rzënie Pabl, bdoobniu zho zho bdziinne zho zho ro yulow.

<sup>30</sup> Nacne gocladz Pabl nie me nie-nee me lo grë miech co, per psaand grë zha ne rliladz Jesús ga.

<sup>31</sup> Haxta bla zha wxtis ne ndzieeldidz Pabl, pxeel zho diidz lo me tsied me.

<sup>32</sup> Zhaase zhaase rnee grë miech co ndxie zho ro yulow ga, no zho haxta ni rien pe nacne zie zho ga.

<sup>33</sup> Blalaa zha Israel, zeene gon zho scataa rac grë miech co, bdoob zho zhiw ti men lë Lejandr gocladz zho nee me chop lan xtiidz zho. Laa men co blis nia me parne cuedze zho gnee me;

<sup>34</sup> zeene gon zho zha Israel nac me, psilo zho stib grëse zho nguiedz roptsie zho, rgo zho xviv Dian rnee zho:

—¡Men ndzondoo nac Dian! ¡Men ndzon nac xnaxnash ne!

Zig chop hor bre zho ga sca roptsie zho.

<sup>35</sup> Dzigo brie men ne zobnabey ga, blunia me lo zho cuedze zho; zeene laa zho bredze, psilo me bnee me lo zho rëb me:

—Golgona ganle, grëse miech lo guidzliu nan zho guiedz rii zob nazhnash Dian, nan wen zho gbaa biet me zob me nu;

<sup>36</sup> tsod zha ne guiab led scada. ¿Pe nac nadien ne squitaa rac to? Golguien ganle nonguielda i squi lëëled dieen pe rzhixcuaa to.

<sup>37</sup> Golwi ganle, laa to ziaad-zo grop zha rii nu, ¿pe nadien been zho? Nacd zho cho zha ne quiaguitnie yadoo, cho zha ne nozhidzniegaa xnaxnash ne.

<sup>38</sup> Nana, telne racladz Demetr pe glisqui me grë me zha ne rquianie me dziin, gacxe na no yulow waa. Niac niaad zho niaadnab zho guielwxtis, ni zogaa zha ne yquiaadiaga. ¡Ga glisqui zho pe run tib, pe rungaa stib!

<sup>39</sup> Laa telne noragaa pe racladz zho glisqui zho, dzigo niac niacredz grëse zha ne nac wxtis, zha ngobey dien zha niaca.

<sup>40</sup> Sac gon ne squi been to nadze, noxtseeb glisqui zha Romaw lo ne; ni pe nadien dzieets ne telne laa zho glisquiw.

<sup>41</sup> Blozhse sca bnee me laa me wbi lo zho ga, niicle zhagaaw laa zho zey.

## 20

### *Güey Pabl nëz Macedon ni nëz Gres*

<sup>1</sup> Zeene laa ruid co blëz, dzigo bredz Pabl grëse zha ne rliladz Jesús, bnee me lo zho zaacse gac zho. Blozhse

bnee me lo zho, laa me brieë ga zie me nêz xtan zha Macedon;

<sup>2</sup> güeynee me lo grë zha ne rliladz Jesús nêz co, pso me diidz lo zho zacse gac zho. Nêz co brieë me bdziñ me nêz Gres. Ga blëz me tsoñ mëë.

<sup>3</sup> Laa zeeñe laa me gbi ga tsie me nêz Siria, laa me ziele sëëb me barcw zeeñe gocnañ me laa zha Israel ne no ga bnediidz pa tsietin zho me, nacne güeydaque me barcw, mazd bio me nêz güeyted me nêz Macedon.

<sup>4</sup> Blalaa zha ne bzënañ biogza no me, bzë ti meñ Beré lë Sópater xingan ti meñ lë Pirr; bzë chop zha Tesalónica, Aristarco ni Segund; ti zha Derb lë Gay, Timoté, ni schop zha nêz Asia, Tíquico ni Trófimo.

<sup>5</sup> Goñ no Filip laa zho bner, per bianañ no diidz Troas cuëz zho no;

<sup>6</sup> laa no bliaaz ga, ga bdieed no lni Pascw. Zeene bded lni co laa no bziaab barcw, laa no brieë ga. Goc gaay ngbidz no no lo nis laa no bdziñ lo zho Troas, dzigo bliaaz no Troas ga gadz ngbidz.

<sup>7</sup> Zeene goñ dze dmingw, bio no yu ne rcaalsa zha ne rliladz Jesús ga. Ti yu tsoñ xcuaaw, laa no pcaalsa par dziuun no xtsee ne psañ Jesús diidz ga guñ grë zha ne rliladz me. Laa no ndxie grë no, dzigo psilo Pabl pseed me no; nzian ncuaane nonee me lo zho sac guini liu co laa me grieë ga; goñ goñ guieela rsiaaldaque me.

<sup>8-9</sup> Nzian nac biini ne noquia leñ yu co; zaatne nac ro ventan ga zob ti niib lë Tic. Wdzeelaaw rsiaaldaque Pabl, tibaque bzheñ mcaal niib co, wbix niib ga biab niib nêz ley; ni glaaw, leñ yu ne riaan glaaraa ga ndxie no. Zeene güeylis zho niib laa niib gutle.

<sup>10</sup> Biet Pabl, bdziñ me lo niib bdeedz me niib.

—¡Gdziebde to! —rëb me—. ¡Zrieëban niib!

¡Ni nligaaw brieëban niib!

<sup>11-12</sup> Grëse zho per nli rley zho. Blozh ga bdzieep no glaa stib bdziñ no leñ yu co, dzigoraa bdiiz Pabl guietxtil pquiin no. Blozhse bdziuun no xtsee co, laa Pabl psilo bnee lo zho stib, quianeeque Pabl laa liu biini.

### *Bdziñ Pabl Milet*

<sup>13</sup> Lban co psiaal Pabl, laa me wbi ga laa me zie nêz Ason nzëni me; laa no bziaab barcw bdieednieer no lo me. Bdziñ no Ason ga bliaaz no me zigne bianañ no diidz.

<sup>14</sup> Zeene blanso me lo no, laa no bziaab barcw gza no me bdziñ no guiedz Mitilen.

<sup>15</sup> Biini liu brieë no Mitilen, bdieed no gax Quío, bietraa stib dze co bdziñ no Samos, ga bliaaz no; bzia no lo nis co zig sti dze dzigoraa bdziñ no Milet.

<sup>16</sup> Biotieete no Efés, sac laa guic Pabl no gdziñniob me Jerusalén, zeeña yгаа me lni Pentecostés.

<sup>17</sup> Nacne zigne bdziñ no Milet pxeel me diidz Efés bredz me grë zha ne zo lo zha ne rliladz Jesús ga.

<sup>18</sup> Zeene blanso zho, bnee me lo zho rëb me:

—Wen wen runbey to naa, nanle to ganle zha noxco naa noyuñ naa xtsiñ Jesús meñ ne rnabey ne. Wlal ne psilo ziyal naa nêz Asia nu,

<sup>19</sup> blactaa biin naa lo grë mine bdeed naa, blactaa lo guiełxtseeb ne ziyo naa, tibaque quianañ grë zha Israel quin zho naa.

<sup>20</sup> Per goñ to ganle, tibaque bioxco naa bialseed naa to mine nac diidzli, zigtaa pseed naa to zaatne rcaalsa tow, zigtagaa pseed naa to stib yu stib yu.

<sup>21</sup> Grëse miecha, tibaque mine pseed naa zho, mine bne naa lo zha Israel mincoque bne naa lo miech stib guiedz; grëse zho bnee naa lo zho none csaan zho xquiełntseeb zho dib zdoo zho gnalo zho Jesús, zeeña gbigo zho lo Dios.

<sup>22</sup> Scaque niina ne laa Espíritu Sant rnabey ga naa Jerusalén, nanñ naa dien peraa nac ncuaane gdieelo naa ga;

<sup>23</sup> per nanpaa naa ible zgo zho naa ladzguiib, ible sacsi zho naa, sac guiedz ne gdziñntaa naa min co rnee Espíritu Sant teed naa.

<sup>24</sup> Lo guiełxtseeb co no naa per rquiad zdoo naa xquiełmban naa; mine nziuuraa lo naa laga gdeeda didz ib laa naa no gne lo miech pa lotaa



rleynie Dios zho, zeena ine gley naa csiaal naa dziin ne bzo Jesús naa nu quiayun naa.

<sup>25</sup> Rien naa lo grè to ne nac to zha ne bialseed naa gocnan to zha nac xnèz Dios, gandraa to lo naa lo guidzliu rii.

<sup>26-27</sup> Laa naa pseedle to grèse mine nac Xtiidz Dios, ib peet pqueetsd naa lo to; gacxe waa, tel cho tib to nitlo, led xtoldraa naa ga.

<sup>28</sup> Golguien sca, igolquianap to, ni scagaa golquianap grè zha ne zo to lo! igolwi ganle xnèz Dios no zho, haxta lo cruz gut Xpèed me bdiizh me xtol zho! Ni stiba, jib Espíritu Sant bzo to yquianap to zho zigne rquianap baxtor xpècwxiiil zho!

<sup>29</sup> 'jNsin golso! Sac rienle naa zeene laa naa gbiche lo to, ib zrieequia grè zha ne guiaad guiaadquidie to, zguib zho zha gnitlo zho to zigne run grè coyot mëcwxiiil.

<sup>30</sup> Haxta lad to, zrieequia bla zha ntseeb ne ctsèe Xtiidz Dios, squiil zho to tsienal to zhiwseed zho.

<sup>31</sup> Gacxe waa laa naa rne lo to, jnsin golso! Golsoladz ganle tsonraa iz, dze guieel pseed naa to, blactaa biin naa pso naa diidz lo to tib tib to zaacse gac to.

<sup>32</sup> Dios nac men ne gacnien to, laa naa rsan to ladznia me grèse to; Xtiidz Ndzon me mine rnee ganle zha nquialadztaa me to, lèew lozh quix biini to dib zdoo to gnalo to me, zeena yгаа to zaatne gneedz me cuèz to grè to zha ne noraa xnèz me.

<sup>33</sup> 'Wlaltaa ib rzobladd naa dimi, ib rzobladd naa lar, guiep naa tebaa zha yquianie naa grè ncuaan co.

<sup>34</sup> Len dze ne blèz naa lo to, gon to ganle niapse nia naa bdziniaa naa ncuaane pquiin naa, ncuaane pquiin-gaa grè zha ne bzènie naa.

<sup>35</sup> Ga blu naa lo to ganle, ib none dziuun ne dziin zeena grieelo dziuun ne xyudar zha ne guien pe yquiin. Ib rianladz naa xtiidz Jesús men ne rnabey ne, zeene znu bnee me: "Mazdraa nroob guielbley ne rgaa zha ne rgad, lèdle zha ne rad."

<sup>36</sup> Zeene blozh bnee Pabl lo zho, laa me pquiitsgzhib ga grè me zho bzodiidznie zho Dios.

<sup>37</sup> Blozhse ga, tibga tibga zho wbig bnee zho lo me, bnaaz zho nia me, bdeedz zho me.

<sup>38</sup> Mban rac zho psilo zho roon zho, rsoladz zho rëb me gandraa zho lo me. Blozh ga, güey zho güeyzonèz zho me zaatne sèeb me barcw.

## 21

### *Biire güey Pabl Jerusalén*

<sup>1</sup> Blozhse bzhieen no nia grè zha Efés co, laa no bziaab barcw, laa no zio bdzin no ti lo guidzliu win ne no lo nisdoo co lè Cos. Biini liu brie no ga bdzin no lo sti guidzliu win co lè Rodas. Rodas brie no bdzin no guiedz Pátara.

<sup>2</sup> Guiedz Pátara, ga bziaab no ti barcw ne zie nèz xtan zha Fenicia.

<sup>3</sup> Zeene zieded barcw co ngali zaatne riaan guidzliu win ne lè Chipr, bui no nèz revés rlupaa guidzliu co. Laa no zio haxta bdzin no guiedz Tir, xtan zha Siria, ga blèz barcw co biet grè yo ne neya.

<sup>4</sup> Zigne bdzin no ga bdzieet no barcw bziaab no lad guiedz co, biodziel no grè zha ne rliladz Jesús ga; bliaazaque no lo zho ga ti zhmal. Dzigo psiaab Espíritu Sant guic zho rnee zho lo Pabl, tebaa siguiel me mazd tsied me Jerusalén.

<sup>5</sup> Zeene laa no brie ga, grèse zha ne rliladz Jesús grè tsieel zho grè xpèed zho biaad-zonèz zho no ro nis co; dzigo lo yuzh co ga pquiitsgzhib no grè no, bziodiidznie no Dios.

<sup>6</sup> Blozhse bzhieen no nia zho, laa zho wbi ga.

<sup>7</sup> Brie no Tir bdzin no guiedz Tolemaid, ga bio no bioquiaabdiuzh no grè zha ne rliladz Jesús ga, bliaaz no lo zho tib dze.

<sup>8</sup> Biini liu brie no ga bdzin no guiedz Cesarea, ga biobiaaz no lidz ti men ne noneeque Xtiidz Dios lo miech, lè Lip. Lè Lip co ga gocgza sxoop zha ne bzo been xyudar zha poxtl.

<sup>9</sup> Quianie me tap ndzooop ne gard ctsieelnia, gzase zho bdeed Dios guielbiini lo zho rnee zho tel pe nac miñe racladz Dios gacnañ miech.

<sup>10</sup> Nzianle dze goc no no lidz Lip, zeene blanso ti men ne ziaad nēz Judé lē Agab, biadquiaabdiuzh me no. (Ye me rnee tel pe nac miñe racladz Dios gacnañ miech.)

<sup>11</sup> Zigne blanso me lo no ga, bzhen me lar ne rbe len Pabl, pxidoo mew nia me ni pxidoo mew ni me, nē me:

—Znu gon rnee Espíritu Sant gzobdoo zha Israel bizhuan lar rii, co zho me ladznia zha Roma zeene laa me gdziñ Jerusalén.

<sup>12</sup> Grē zha ne rliladz Jesús ga, zeene bin zho sca rēb men co, rnab zho lo Pabl tsied me Jerusalén, yeque no sca rnee lo me. Mban rac no rdzioon no.

<sup>13</sup> Pquiaaque me nē me lo no:

—¿Pe nac dzigo roon to? Tel naa laa naa bleeladzle naa maase gzobdoo zho naa Jerusalén, niicxe haxta gut zho naa waa porne rleyne naa Jesús. ¡Loxaque rsiaab guielnē to naa i gon squi rac to!

<sup>14</sup> Bdziañse no nlid yquiaadiag me xtiidz no, dzigo mazd psaan no, rdzieets no:

—Golgotsaa csaan ne, Diostaa nan dien zha gaca.

<sup>15</sup> Bdedse ga bhixcuaa no laa no brie ga, laa no zio nēz Jerusalén;

<sup>16</sup> blalaa zha ne rliladz Jesús Cesarea ga bzēnal zhits no, bzēnie zho ti men Chipr lē Mnasón. Izle rliladz me Jesús, lidz me biobiaaz no zeene bdziñ no Jerusalén.

<sup>17</sup> Grē zha ne rliladz Jesús Jerusalén, rley zho zeene gon zho laa no bdziñ, blēzlo zho no.

<sup>18</sup> Biini liu co güeynie Pabl no lidz Jacob bioquiaabdiuzh no me, lēetaque laa grē zha rnabey ne zo lo grē zha ne rliladz Jesús Jerusalén ga, ndxie ga.

<sup>19</sup> Blozhse pquiaabdiuzh Pabl grē zha co, dzigo psilo me bzodiidz me lo zho grēse zha gocniñ Dios me güeyseed me grē miech stib guiedz.

<sup>20</sup> Zeene bin zhow per nli rley zho, rdeed zho xquizh lo Dios; dzigo rēbchaa zho lo me:

—Bets, ye zha Israel gon ndaldoo zho zililadz Jesús; per racladz zho tibaque tsienal zho miñe rnabey Xley Moisés.

<sup>21</sup> Grē zha ne no nu bin zho laa luu güeyseed grē men wladz ne no guiedz zit, nac diidz blu luu lo zho tsienal draa zho Xley Moisés, codraa zho xpēed zho bey, niicle tsienal draa zho grē zhiwseed xmengol ne.

<sup>22</sup> ¿Zha ganle dziuun ne? Sac zeene gon zho laa luu blanso, ible ziaadguib zho luu.

<sup>23</sup> No tap bets ne nu ziaadyoble gon zho miñe bnee zho lo Dios; miñe gaca güey

<sup>24</sup> güeynie zho yadoo, golgun grē miñe rnabey ley, bdiizh ctsiib guic to gza to; zeena ga gan grē zha rii ganle nlid grē miñe rnee miech luu ga.

<sup>25</sup> Sangue grē miech stib guiedz zha ne rliladz Jesús, laa no pxeelle diidz lo zho zigne bzodiidz ne nu: grē ma ne rut miech rgogon zho lo zhimdio zho, gowd zho bēel co; grē ma ne rxieed ren zeene ret ma, gowd zho ma; ni niicle grēgaa ma ne gut zho, ib gowd zho xchen ma; grē zha bgui, nodne tsonie zho wnaa ne nacd tsiel zho; niicle wnaagaaw, nodne tsonie zho mgui ne nacd tsiel zho.

### *Bnaaz zho Pabl*

<sup>26</sup> Laa Pabl zienie gza zha co. Biini liu güey me gza me zho güeygun zho miñe rnabey ley; blozh ga güey zho yadoo güeynie zho diidz pa dze gza miñe quiayun zho ga, zeena gal dze co laa zho tsienie gon ne gdeed zho tib tib zho.

<sup>27</sup> Laa zeene merle gza gadz ngbidz ne quiayun me miñe rnabey ley ga gza me zha co, lega naclew gon bla zha Israel ne ziaad nēz Asia laa me no len yadoo. Nacne wbig zho

<sup>28</sup> bzhen zho zhicw me, roptsie zho rnee zho:

—¡Grēse to menguedz! ¡Golgun xyudar no gnaaz ne men rii! Sac lēe me ga quianzē quiaseed me zha wladz glēenie zho ladz zho, rnee me lo zho

gundraa zho grë mine rnabey ley, gap-draa zho respet yadoo rii; haxta grë zha zit zizëëbnie me nu. ¡Noguitniele me lugar nda rii!

<sup>29</sup> Sca rnee zho, sac gon zho Pabl len guiedz Jerusalén ga ziegrop me ti zha Efés lë Tróximo, dzigo rzac zho güeynie me zha co len yadoo.

<sup>30</sup> Pe ga bin grë menquiedz, grëse zho bdziñ wbigbe zho lo Pabl bdoobniu zho me blee zho me len yadoo, zigne blee zho me ga lëäläd psioog zho ro yadoo; psilo zho noguin zho me, nan zho gut zho me.

<sup>31</sup> Zeene gocnan men ne rnabey lo menguiib ne ndxie ga laa ruid co noyac,

<sup>32</sup> lëäläd brieenie me grë xmenguiib me ni grëraa zha ne rnabey lo zho. Zeene gon grë zha ne noguin Pabl ga, laa grë menguiib co bdziñ, dzigoraa blöz bdiñ zho me.

<sup>33</sup> Dzigo wbig men rnabey co, bnabey me grë zhaguiib co bzoob zho Pabl chop caden. Bnabdiidz me lo grë miech co dien cho nac Pabl, pe quiaayun me ne scataa rlëenie zho me.

<sup>34</sup> Psilo zho nguiedz roptsie zho, zhaase zhaase ncuaane rcaadzol zho me. Gonse men rnabey co rlud dien pepaa rliquis zho, nacne bnabey me grë menguiib co ziesan zho Pabl yu ne rbëzpaazho.

<sup>35</sup> Laa grë menguiib co csilo soquianie Pabl lo scaler ne rdziñ ro yu co, gataa mazd bzoobyan zho me, sac ntseeb rac grë miech co;

<sup>36</sup> nalbe zho, roptsie zho rnee zho:  
—¡Golnitlogazh men qui! ¡Niinagazh golgut me!

<sup>37</sup> Laa grë menguiib co csëëble me len yu co, zeene bnee me lo men rnabey co, rëb me:

—¿Pe zrieelo gne naa ti xtidz naa lo luu?

Dzigo rëb men rnabey co:

—¿Mod rac luu rnee luu xtiidz zha Gres?

<sup>38</sup> ¿Led luud ga dzigo nac ti zha Egipt ne psilo racntseeb lo gobiern len dze rii? Nac diidz, tap mil zha ntseeb nacie zho, laa zho ziese nëz dan.

<sup>39</sup> —Led naada —rëb Pabl— men Israel nac naa. Guiedz Tars gol naa, lëe guiedz co nac mine nroobraa lo grë guiedz ne ngab Cilis. Na laa naa rnab lo luu, been guielnzaac bneedz diidz gne naa chop lan xtidz naa lo grë miech qui.

<sup>40</sup> —Zaca —rëb men co.

Lo scaler co zo Pabl blunia me lo grë miech co cuedze zho. Zeene laa zho biacdze, dzigo psilo me bnee me xtiitsë me grë me zho, rëb me:

## 22

<sup>1</sup> —Grëse to men wladz, laa naa rzaac to zig ti bets naa zig pxozgaa naa, golquiaadiag mine gne naa nu ganle zeena gacnan to quiaayun naa mine rquiaqui to naa.

<sup>2</sup> Zeene gon zho xtiidz zho rnee me, grëse zho dzese bre zho; dzigo rëb me:

<sup>3</sup> —Men Israel nac naa, guiedz Tars xtan Cilis ga gol naa, per Jerusalén nu broob naa, nu bio naa wseed, maistr Gamaliel goc men ne pseed naa. Pseed me naa grëse zigne nac xley xmengol ne, grëse zigne nac zhiwseed zho; pseed me naa tibaque noxco naa runnon naa lë Dios zigne noxcoque tow.

<sup>4</sup> Mine been to nu nadze, ye naa blactaa squi ben naa ptsidil naa grë zha ne riladz Jesús, pquianañ naa ygaa zho guet zho; mgui wnaasaque razobdoo naa zho lidz zho rasan naa zho ladzguiib.

<sup>5</sup> Men ne nac pxoz nroob ni grë mengol ne goc wxtis guiedz rii len iz co, zha co nanpaa ganle nli sca ben naa; sac zha bneedz ti xtiidz zho bi naa ndziñnie naa lo zha ne rnabey xyadoo grë men wladz ne no Damasc, zeena niacnie zho naa nianaz naa grëraa zha ne no ga riladz Jesús, nialnie naa zho Jerusalén nu nded zho caxtigw.

<sup>6</sup> Min copaa nagon brie naa nu za naa nëz co. Zhile gdziñ naa Damasc, zig rwe ngbidza tibaque zeene ziaad ti biinidoo nëz zhan gbaa biab lo naa.

<sup>7</sup> Biabgazh naa liu, ga nix naa bin naa ti tsi men co rnee me lo naa:

“Saul, Saul, ¿pe nacne quiana<sub>l</sub> luu naa?”

<sup>8</sup> “¡Been<sub>l</sub> guie<sub>l</sub> Inzaac bnë dien cho luu!”, rep naa. Dzigo në men co lo naa: “Naa nac Jesús men Nazaret ne squi quiatsidil<sub>l</sub> luu.”

<sup>9</sup> Grë zha ne zanie naa ga, bdzieb zho gon zho biini co, per biend zho pe rnee men co lo naa.

<sup>10</sup> Dzigo rep naa lo me: “Bzhiguie<sub>l</sub> bnë dien, ¿pe racladz luu gun naa niina?” Nëchaa me: “Guche i, güey Damasc ga gnë zho ganle pe nac mine no gun luu.”

<sup>11</sup> Dzigo bzhen zha ne zanie naa ga nia naa, bdziñnie zho naa Damasc; sac lo biinidoo co pcow lo naa.

<sup>12</sup> Ga no ti mgui lë Ananí, zëeb diidz rioxco me grë mine rnabey ley, grëse men wladz ne no ga nanpaa zho ti men wen nac me;

<sup>13</sup> dzigo biaad me zaatne blëz naa ga, në me lo naa: “Saul, niinagazh gon bets laa luu gbiire gwi stib.” Zigne sca bnee me laa lo naa biac, gongazh naa me.

<sup>14</sup> Dzigo nëchaa me lo naa: “Dios men ne bliladz grë pxozgol ne, ib men co bzooblo luu gacnan luu pe nac mine racladz me gac, me bzooblo luu gunbey luu men ne nacle diidz ga cxeel me lo guidzliu, ni gon luu tsi men co.

<sup>15</sup> Ib laa me bzo luu tsienee luu lo miech mine bzhaac luu ga, mine bin luu ga.

<sup>16</sup> Guso i sca, zeena chobnisgazh luu. Dib zdoo luu bredz Jesús, bnab lo me csañmbe me luu lo xtol luu.”

<sup>17</sup> Zeene laa naa blanso Jerusalén nu, tib dze lëëtaque no naa yadoo no-zodiidznie naa Dios,

<sup>18</sup> tibaque blulo me lo naa në me: “Na zeena biobladz brieer Jerusalén nu, sac ib gliladz grë miech rii mine gnee luu zeene gnee luu xtidz naa lo zho.”

<sup>19</sup> “Per runbey zho naa waa”, rep naa lo me, “nanpaa zho scataa ra naa grë yadoo raxizhoo naa grë miech ne rliladz luu, rnabey naa rguin zho zho ni rio zho ladzguuib,

<sup>20</sup> niicle zeene beet zho Xteb men ne bnee xtiidz luu ga, ye naa bded diidz beet zho me, haxta pquianaap naa xab grë zha ne bdeedquie me.”

<sup>21</sup> Dzigo në me lo naa: “Na zeena pcaaniob nëz brieer nu, sac gon laa naa cxel luu stib dan tsienee luu xtidz naa lo grë menzit.”

<sup>22</sup> Zeene bin zho sca rëb me bdeetraa zho diidz nee me, psilo zho nguiedz roptsie rnee zho:

—¡Ib riegua<sub>l</sub> draa gban men qui! ¡Golnitlogazh me!

<sup>23</sup> Nguiedz zëeb tsi zho, ib rioogd ro zho, masaque rdzib zho xab zho ni rchoon zho yudie laglaa.

<sup>24</sup> Dzigo psëeb men rnabey co Pabl len yu co, ni bnabey me grë menguib co quin zho Pabl, zeena cueero Pabl dien pe nac ncuaane been Pabl, zha nac ne scataa rac grë miech co lo Pabl.

<sup>25</sup> Laa zho blozhle pxidoo me, laa zho csilo quin me, zeene rëb me lo sti zha ne rnabey lo grë zhaguiib co:

—¿Pe nonguiela dzigo ne lega quin to ti zha Roma, ni gardle gac guie<sub>l</sub> wxtis dien pe nlipaa no xfalt zho?

<sup>26</sup> Zeene bin zha co sca rëb Pabl, lëëlëd güeynie zho diidz lo men ne rnabey zho ga, rëb zho:

—¿Zha gon gun luu? Sac zha Roma me nac mgui co.

<sup>27</sup> Dzigo güey men rnabey co rëb me lo Pabl:

—Bneeli lo naa, ¿dien pe nli na men Roma nac luu?

—Nliw —rëb Pabl—, zha Roma nac naa.

<sup>28</sup> Rzedz yan men rnabey co rëb me: —¡Naasi zha Roma nac naa, ni nroob dimi bdizh naa bgab naa lo zha Roma!

Dzigo rëbchaa Pabl:

—Sangue naa, desde gol naa bgab naa lo zha Roma.

<sup>29</sup> Grë zhaguiib ne bzo nguin Pabl ga parne cueero me, lëëlëd wbiche zho lo me, niicle men rnabey cow bdzieb me zeene gon me nli zha Roma nac Pabl, sac nrooble nac falt ne niun me ga lega nabey me nguin zho ti zha Roma.

*Bnee Pabl lo wxtis Israel*



<sup>30</sup> Zeene biini liu, bnabey men rnabey co pcaalsa grë zhipxoz non zha Israel ni grë men ne nac zhiwxtis zho, sac racladz me gacnan me dien pepaa nac ncuaane rquiaqui rlëenie grë miech co Pabl. Dzigo pxadz me Pabl, blee me Pabl bzo me Pabl lo zho.

## 23

<sup>1</sup> Dze bui Pabl lo grë zha wxtis co, dzigo psilo Pabl bnee me rëb me lo zho:

—Laa naa rneli lo to nu ganle, mbe zdoo naa, Dios zobwi ganle zanał naa ncuaane rdziguind me.

<sup>2</sup> Zeene gon Ananí (men ne nac pxoz nroob) sca rëb Pabl, bnabey me zha ne zo gax lo Pabl, rëb me:

—¡Golcap ro zha qui!

<sup>3</sup> Dzigo rëbchaa Pabl lo me:

—¡Tebaa squique cap Dios ro luu! ¡Nac luu gon zig ti lidz nguts loxaque nëz zhitssew stib rna! ¿Pa rquiin ne laa luu zob i? Led luu zo par cobey luu tel no pa ti ley ne zaguits naa, na lel luule noguiitsa bnabey luu bdiñ zho naa.

<sup>4-5</sup> Pquiabbe zha ne ndxie ga rëb zho:

—¡Bien ganle lo pxoz nroob i, lo men ne quiayun xtsiin Dios i no-quiabro luu!

—Golgun dispensar —rëb Pabl—. Nand naa lëe pxoz nroob i, tel nica mine nan naaw ne scad naa; sac zhobnee lo Xtiidz Dios: “Gneenëd luu zha ne rnabey ladz luu.”

<sup>6</sup> Zeene bien Pabl grol zha wxtis co zianał zhiwseed zha saducé, zgrol zho zianał zhiwseed zha farisé, dzigo psilo me nguiedz bnee me rëb me lo zho:

—¡Grëse to bets, golgona ganle, zha farisé nac naa, niiclegaa pxoz naaw farisé goc me! ¡Ni porne riladzpaa naa gon zrieeban zha ne ret, min co gane znu zo naa lo to nu!

<sup>7</sup> Zeene sca rëb Pabl, psilo zho bdiłdiidz zho. Goc zho chop dii,

<sup>8</sup> rriee zha saducé rnee nlid grieeban zha ne ret, nlid no anjl, nlid no espíritu; laa zha fariségaa na rnee zrieeban miech, no anjl ni no espíritu.

<sup>9</sup> Nguiedz zëeb tsi zho noneelsa zho, dzigo gusoque bla maistr ley ne nacgrë zha farisé, rëb zho:

—Laa ne bdzianle ganle, ¡ni ti falt rapd mgui qui! ¿Pe nadien dziuun ne? Nend ti espíritu ga, ti xanjlgaa Dios ga sca bnee lo me.

<sup>10</sup> Zeene gon men ne rnabey lo menquiib ga, laa lo xtil zho noyac nroobraa, bdzieb me rëb me nend znuse gzhiih zho Pabl; bnabeyaue me gocredz menquiib güeyxi zho Pabl biire güeysan zho me len yu ne rbëz zho ga.

<sup>11</sup> Gol guieel co, blulo Dios lo Pabl rëb me:

—Gdzieebd luu, zigne bnee luu xtidz naa lo miech Jerusalén nu, scaque none tsienee luuw lo grë zha ne no Roma.

### *Gocladz zho niut zho Pabl*

<sup>12-13</sup> Zeene biini liu, ndziibsrää choo zha Israel bnediidz rëb zho gowd zho, ni tib ro peet guied zho haxta gut zho Pabl; telne gund zho mine rnee zho maase csiaabzi Dios zho.

<sup>14</sup> Dzigo güey zho lo pxoz ne rnabey, lo grë zha ne nac zha non lo menquiiedz, bzodiidz zho mine no guic zho ga, ni rëb zho:

<sup>15</sup> —Nana gon, golnab lo men ne rnabey lo menquiib cxeel me Pabl lo to gzhe, golquiaalo noraa pe lozh yquiep to Pabl; laa no nsinle zioambiaaz. Zeene laa zho tednie Pabl, ga dziuut no Pabl.

<sup>16</sup> Dieen zha bin ti xingan bzian Pabla, nacne lëelëd güey win yu ne rbëz menquiib ga güeynie win diidz lo Pabl.

<sup>17</sup> Dzigo bredz Pabl ti zha ne rnabey lo menquiib co, rëb Pabl lo zho:

—Bzhiguiel güeynie mëed rii lo men ne rnabey to, sac laa win no tsienie ti diidz lo me.

<sup>18</sup> Bzhen men rnabey co nia mëed co, güeynie me win lo men nroob ne rnabey zho, rëb me:

—Laa naa zialnie mëed rii nu me, dien pe nac diidz ne ziaadnie win lo luu; Pabl ne no ladzguiib ga bnab lo naa guialnie naa win.

<sup>19</sup> Dzigo bzhēn men rñabey co nia win, güeynie me win stib nēz, bnabdiidz me lo win dien pe nac diidz ne zienie win lo me.

<sup>20</sup> Dzigo rēbchaa win:

—Laa zha Israel gon bñediidz gnab zho cxeel luu pxey naa Pabl lo zhiwxtis zho gzhe, yquiaalo zho gnē zho noraa pe yquiep zho me.

<sup>21</sup> Bzhiguiel gliladz luu xtiidz zho, sac ndziibsrāa choo zha ne nacgrē zho rēb zho laa zho tsiesoblan nēz gutgazh zho me zeene laa me ted. Biaan zho diidz grē zho, gowd zho, ni tib rō peet guied zho haxta gut zho me; haxta rēb zho tel laa zho gund min co maase gdzibdee Dios zho. Ible zun zhow, loxaque quiambēzse zho dien pe guiab luu.

<sup>22</sup> Blozhse ga dzigo bzonēz me win, ni pso me diidz lo win choot lo gneed win ne laa win güeynie diidz lo me.

### *Güey Pabl lo gobernador Wech*

<sup>23</sup> Lēelēd bredz men rñabey co chop zha ne zo lo men GUIIB, rēb me:

—Laa zhaguiib gon none greee naguiel tsie zho Cesarea, na zeen golzo zha ne tsie; none tsie chop gayoo zha ne sēni, tsongal tsii zha ne sob guay, schop gayoo zha ne güey lanz. Naguielgazh, zig rlozh xtsee none greee zho nu;

<sup>24</sup> sac laa zho none tsiesan Pabl Cesarea. Ni golcoxab ti guay ne sob Pabl, sac none ndip ndaan me gdziinne to me lo gobernador Wech Cesarea.

<sup>25-26</sup> Dzigo pquiaa me ti guits ne güey zho gdziinne zho lo gobernador, rñeew:

“¡Diuzh Gobernador Wech!

’Naa nac Claud Lisias, laa naa rxel guits rii lo luu gzodiidz naa ganle zha nacne bnabey naa ziaadsan zho men qui zaatne zob luu i.

<sup>27</sup> ’Zha Israel bnaaz me gocladz zho niut zho me, laa zeene gocnan naa zha Roma nac me nacne pxeelaque naa zhaguiib güeyla me lo zho.

<sup>28</sup> Gocladz naa niacnan naa dien zha nacne rlēenie zho me, dzigo bianie naa me lo zhiwxtis zho.

<sup>29</sup> Ga gon naa led ncuaane rñad rlēenie zho me; tel zha nac xley zho ncuaan co rlsru zho; nacda ncuaane guiab ne rieguial guet me, tsoyugaa me ladzguiib.

<sup>30</sup> Zeene gocnan naa laa palal zho bñediidz gut zho me, nacne bnabeyaque naa ziaadsan grē men GUIIB qui me lo luu i. Niiclegaa zha ne rlēenie mew, laa naa rep lo zho guiaad zho lo luu i, zeena i gnē zho dien zha nacne rlēenie zho me.

’Lēed bii gdzieel ne sca dien.”

<sup>31</sup> Zeene laa liu pcow, zig rlozh xtseew laa grē men GUIIB co pcaanie Pabl nēz; dib guieel bio zho nēz bdziinne zho me guiedz Antípatris.

<sup>32</sup> Biini liu, loxaque zha ne zob guay ga pcaa nēz zienie zho me Cesarea, laa grēraa men GUIIB co wbire bdziin Jerusalén stib.

<sup>33</sup> Zeene bdziin zho Cesarea, bdeed zho guits ne zienie zho ga lo men ne nac gobernador, dzigo laa zho psan Pabl ga.

<sup>34</sup> Blozhse blab me lo guits co, dzigo bnabdiidz me lo Pabl dien pa guiedz gol Pabl. Dzigo rēbchaa Pabl lo me, zha Cilis nac Pabl.

<sup>35</sup> —Nasca —rēb me—, zeene laa zha ne rlēenie luu glanso nu, dzigo yquiaadiag naa dien zhapaa nac xtil to.

Dzigo bnabey me, pquianap men GUIIB Pabl zaatne nac len xyulow Herod.

## 24

### *Gocredz Pabl lo gobernador Wech*

<sup>1</sup> Zeene goc gaay ngbidza, laa Ananí men ne rñabey lo pxoz bdziin ga, gza me blalaa zha ne nac zha non lo men GUIEDZ Israel, zienie zho ti licenciad lē Tértulo; grē zho laa zho zie zienie zho diidz lo gobernador pe nacne rdilnie zho Pabl.

<sup>2</sup> Dzigo bnabey gobernador gocredz Pabl. Zeene laa Pabl bdziin, psilo licenciad co bzeet me grē ncuaane rquiaqui zho Pabl, rēb me:

—Xquizhdoo luu gon gobernador, ne squitaa ndzielguic luu rien luu zha gnabey luu, gane zaacse mban

menladz no niina, blactaa ncuaane yquiiin lo no noyun luu.

<sup>3</sup> Rzac zdoo now, tel pa lotaa zo no rsoladz no luu nac luu men ne rnabey no.

<sup>4</sup> Nli nonguielda dziunneed no luu, per been ti guielnzaac pquiaadiag ganle pe nac ncuaane rlisqui no quiayun mgui ne zo lo ne nu.

<sup>5</sup> 'Masaque nac me lo no zig nac ti guielguidz dox ne rded, grese guiedz quianze me noyunguet me menladz no gacndaan zho lo men ne rnabey no. Lee me ga zo lo gre zha ne rnee zho nazaren.

<sup>6</sup> Zeene bgaa me, leetaque laa me no len yadoo ro ne zob Jerusalen quiayunguzee me xyadoo no. Nacne gocladz no gagazh nguizh me falt co zigne rnabey xley no;

<sup>7</sup> per biaad Lisias gre xmenguiib me ntseeb rac zho biaadla zho me lo no.

<sup>8</sup> Na nagon zac luuzhal yquiep me, zeena gan luu ganle nli quiayun me gre mine rnee no nu.

<sup>9</sup> Gre zha Israel ne zienal ga, pquiabbe zho reb zho nli quiayun me gre min co.

<sup>10</sup> Dzigo blunia men ne nac gobernador ga lo Pabl gnee Pabl; nacne psilo Pabl bnee me reb me:

—Nanle naa ziele iz zob luu nu rquiaadiag luu gre ncuaane rac xtan no nu, gane rley naa zial naa lo luu par yquiaadiaggaa luu ganle zha nac xtidz naa.

<sup>11</sup> 'Na rac tsiipchop ngbidz ga bdzin naa Jerusalen, biagan naa Dios len yadoo nroob ne zob ga (niicle tel nica mine grieedidz ganle).

<sup>12</sup> Laa naa bia Jerusalen biagan naa Dios, choot biatilnied naa ga; niicle len greeraga yadoo wina, ro nezgaaw, waltaa noquiild naa miech cho lo gactseeb zho.

<sup>13</sup> Grese mine rquiaqui gre zha qui naa grieelod glu zho nliw, sac led ncuaane goda.

<sup>14</sup> 'Mine nac diidzli, niina wriin psan Dios ti Wseed Cub dien zha guiaanwen miech lo me, zha qui rzac led zhiwseete Diosa, sangue naa dib zdoo naa zanal naaw, dib zdoo naa

quiayun naa dziin lo Dios men ne bliladz pxozgol no; ni scaquegaa, noxco naa grese mine nac ley. Rliladz naa grese mine bnee gre zha ne biadteed xtiidz me.

<sup>15</sup> Rliladz naa zdzin dze ne cueeban Dios grese miech, zigtaa zha wena zigtagaa zha ntseeba, ni haxta zha ye zho rliladz min co.

<sup>16</sup> Ni min copaa nagon gane tibaque noxco naa guiaanmbe zdoo naa, guntaldraa naa xtol naa zigtaa lo Diosa zigtagaa lo samiech naaw.

<sup>17</sup> 'Nod naa Jerusalen tibaque, blale iz goc no naa ladz menzit; dze ne bdzin naa Jerusalen ga, laa naa bia porne zasan ti gon lo menladz naa ni zanie naa ti gon ne gded naa lo Dios.

<sup>18</sup> Min co nagon nacne no naa len yadoo zeene gon gre zha qui naa. Blozhle ben naa gre mine rnabey xley no rdziuun no zeene sca riosan no gon, zeene laa bla zha Israel ne no nez Asia blanso lo naa ga; per choot miech taf ndxienied naa ga, niicle choot noquiildgaa naa.

<sup>19</sup> Zha co nagon riegual niaad nu, nlisqui zho tel pe ncuaane rzac zho nonguield noyun naa ga.

<sup>20</sup> Zha ne ndxieggaa nu niina, zac gne zho telne brieequia falt ne rquiaqui zho naa zeene gocredz naa lo wxtis Jerusalen.

<sup>21</sup> Te goon falt ga naye ben naa, lee gdib nguiedz bne naa lo zho rep naa: "Laa naa racredz lo to, zig nac zeene falt ga rap naa loxaque ne rliladz naa dzin dze ne grieeban miech." Scase nagon naca.

<sup>22</sup> Nanle gobernador co led ncuaane gund zha ne rliladz Jesus ga rquiaqui zho Pabl, dzigo bnee me lo zho cuetz zho nieeda gdzin Lisias, dzigo dien zhapaa guiaan xtil zho.

<sup>23</sup> Bnabey me zha ne zo lo menguiib yquianap zho Pabl, ni pso me diidz zaacse gac zho lo Pabl, gdeed zho diidz ted gre zha ne ndzieeldidz Pabl tsiegan zho Pabl.

<sup>24</sup> Goc blalaa ngbidza, bnabey gobernador co gocredz Pabl lo me grop tsiel me Drusil, ti wnaa Israel.

Laa me bredz Pabl, sac racladz me yquiaadiag me dien zha nac zhiwseed Jesús.

<sup>25</sup> Zeene bzeettaa Pabl, zha nac guielwxtis, zha none tsoxco miech gund zho mine riaabtaa guic zho, ni zha gdziñ dze ne gun Dios guielwxtis, dzigotaa laa me bdzieb, rëbchaa me lo Pabl:

—¡Lëëlewga na nadien! Na zeene guioba, dzigo naazhal cuedz luu guiaad luu zodiidz ne stib.

<sup>26</sup> Zhiga zhiga rbedz me Pabl, sac quiambëz me dien pe gdziibd Pabl dimi csilaa me Pabl.

<sup>27</sup> Zeene goc chop iz sca no Pabl ladzguiib ga, laa Wech brieeguielgobrador, bzëëb ti men lë Pons Fest. Niicle brieeguiel Wech per psilaad me Pabl, sac racladz me dien zha guiannziiuraa me lo grë zha Israel.

## 25

### *Güeyzo zho Pabl lo gobernador Fest*

<sup>1</sup> Zeene goc tson ngbidz bdziñ Fest Cesarea pcaania me guielgobrador, laa me brieegüey me Jerusalén.

<sup>2</sup> Grë zha pxoz non ni grë zha ne rnabey lo menguedz Israel, zeene bin zho laa Fest bdziñ Jerusalén lëëled güey zho lo me güeyxob zho xdemand Pabl; ni

<sup>3</sup> bñab zho lo me cxeel me Pabl Jerusalén. Laa zho rnab min co sac laa zho bñediidzle, nëz tsiesoblan zho, yquiambëz zho ted Pabl gut zho Pabl.

<sup>4-5</sup> Per bdeete Fest diidz, rëb me laa Pabl nole ladzguiib ga, tel zha ne zrieelo tsie, ga glisqui zho tel pe nac falt ne rquiaqui zho Pabl; benque zlase dze laa me ghiire guey nëz co dzigo zac tsienal zho zhits me.

<sup>6</sup> Ndziibsräa ti zhmäl blëz me Jerusalén ga, dzigo laa me biire zey Cesarea. Zna dze bdziñ me biinigazh liu co güey me yulow, bnabey me gocredz Pabl.

<sup>7</sup> Laa grë zha Israel ndxiele ga, wbig zho lo Pabl ndäl grë falt nroob ne rcaadzdoł zho me, per loxaque didzsew, guiend zha glu zho ne nlipaa goca.

<sup>8</sup> Dzigo pquiaab Pabl rëb Pabl:

—Grëtaa mine rquiaqui zho naa i, ni tiba nlid. Wlaltaa gard quits naa xley no, gard quitnie naa xyadoo no, niicle gardgaa gacntseeb naa lo zhiwxtis zha Roma.

<sup>9</sup> —¿Pe racladzdga luu tsie luu Jerusalén? —rëb Fest—. Ga ghiire yquiaadiag naa xtil to i zeena glu dien chopaa rap doł.

Sca rëb me, sac racladz me dien zha guiannziiuu me lo grë zha Israel.

<sup>10</sup> Dzigo rëbchaa Pabl:

—¡Gad naa! ¡Nod pe nac ga naa ga, to rieguiäl gun guielwxtis ri! Benque nan wen luu ganle peet falt nzeëbd naa lo zha Israel.

<sup>11</sup> Tel niaca mine nli ziyun naa pe guielntseeb ne raguial naa guet naa, maase guet naa. Per na nãpaa naa ni ti ncuane rquiaqui zho naa i nlid, ¿pe nac dzigo cho co naa ladznia zho gut zho naa? Laa naa racladz, mazd gołneedz diidz tibaque ga naa lo zhiwxtis nroob ne, men ne zob Roma.

<sup>12</sup> Dzigo bzodiidz Fest grë me men rac ne nacnie me dziin; blozhse ga rëbchaa me lo Pabl:

—Guiend rson sca. ¡Tel lo César racladz luu tsie luu, na maase tsie luu!

### *Gocredz Pabl lo Agrip*

<sup>13</sup> Zeene goc bla zhmalä, laa rey Agrip grop wnaa ne lë Berenis bdziñ Cesarea ga güeyquiaabdiuzh me Fest.

<sup>14</sup> Nzianlaa ngbidz blëz me ga, dzigo bzodiidz Fest lo me laa Pabl sca no ladzguiib ga, rëb Fest:

—Len dze ne bii nac Wech dziin biab ti mgui ladzguiib nu,

<sup>15</sup> laa len dze ne bia naa Jerusalén biaad grë zhipxoz non zha Israel, grë zha non ne rnabey lo zho, biaad-xob zho xdemand me lo naa ga, rnab zho lo naa gnabey naa guet me.

<sup>16</sup> Dzigo rep naa lo zho led scad run zha Roma guielwxtis, ib none gacredz me gnee me chop lan xtiidz me lo grë zha ne rzoob xdemand me, ga glu telne nli mine rquiaqui zho me togo nlidgaaw;



<sup>17</sup> nacne biaad zho nu. Zna dze blanso zho, biinigazh liu co bnabey naa gocredz me.

<sup>18</sup> Tibaque ni naa bod no pe ti falt nroob ne rquiaqui zho me, per zeene biaad zho yulow gon naa

<sup>19</sup> lëe gdib tel zha nac grë ncuaane riladz zho min co rlisqui zho, ni rlisqui zho pe nacne zienal me zhiwseed ti mgui lë Jesús, gutle men co ni laa me rnee mban me.

<sup>20</sup> 'Zeeene gon naa grë ncuaan co rquiaqui zho me nli rienđ naa zha gun naa, dzigo rep naa lo me, telne racladzga me zac tsie me Jerusalén ga dien zha guiaan lo xtil zho.

<sup>21</sup> Per bnëd me, lel bñab me tsie me lo César; gane niina laa me bii no i, nieeda gne naa lo César dien pa hor grieelo cxel naa me nëz co.

<sup>22</sup> Dzigo rëb rey Agrip:

—Racladz naa gon tebaa zha yquiaadiag naa dien zha nac xtiidz mgui co.

—Na zho ganle —rëb Fest—, gzhegazh gnabey naa gacredz me.

<sup>23</sup> Biini liu, ti lni nroob ne rac laa Agrip ni Berenis bdziñ len yu ne rac guielwxtis ga, grë zha non ne rnabey lo menguiib, grë zha non lo menguiiedz, nal zho zhits me. Dzigo bnabey Fest gocredz Pabl, zeene laa Pabl bdziñ

<sup>24</sup> laa Fest psilo bnee, rëb me:

—Niina ne laa luu ziaad nu rey Agrip, scagaa to ne nac to men ne ndxiegrë ne nu nadze, golwi ganle lëe men rii nagon rlëeniedox zha Israel, racladz zho guet me; zigtaa Jerusaléna zigtagaa nuw ziyaadnab zho lo naa gnabey naa guet me.

<sup>25</sup> Sañgue naa gonle naa rapd me falt, par guiab ne rieguial guet me; per laa me bñab tsie me lo César, na laa naa no cxel me nëz co.

<sup>26</sup> 'Nli rienđ naa dien pe nac diidz ne cxel naa lo César, ne squi lega ncuaane nliđ rquiaqui zho me. Min co nagon bnabey naa gocredz me lo to nu, ni laga laa luu ziaadgaa nu rey Agrip, bzhiguiel pquiaadiag ganle zha rzë xtiidz me; zeena togo zdiel

naa pe nac diidz ne cxel naa gal dze ne laa me tsie nëz co.

<sup>27</sup> ;Sac nonguield ga gun naa telne sobdoo me cxel naa me, ni tel cxelđ naa diidz dien pe nac xfalt me!

## 26

### *Bnee Pabl lo Agrip*

<sup>1</sup> Dzigo rëb rey Agrip lo Pabl, mezhal gnee dien zha naca. Nacne blis nia Pabl psilo Pabl bnee Pabl rëb Pabl:

<sup>2</sup> —Rley naa gon rey Agrip ne laa naa zial lo luu nadze, zeena gzodiidz naa lo luu gacnan luu ganle nliđ grë ncuaane rquiaqui grë menladz naa naa.

<sup>3</sup> Rley naa sac nan naa nanpaa luu zha nac grë xcostumbr no, grë ncuaane riladz no. ;Rnab naa lo luu sca, guieete luu yquiaadiag luu grë mine gne naa!

<sup>4</sup> 'Grëse zha Israel nan wen zho ganle zha mban naa, sac mëedlas naa bdziñ naa Jerusalén, ga broob naa.

<sup>5</sup> Nanpaa zho zha farisé goc naa, ni zha farisé nac zha ne rioxcoraa run grëse mine riladz zha Israel.

<sup>6</sup> Per mazd gon, laa zho rlëe lo naa porne dib zdoo naa riladz naa laa Dios beenle mine psan me diidz lo grë pxozgol no.

<sup>7</sup> Grëse zha Israel, zigne ziaad zho lo gza tsiipchop dii ne psan xmengol no, grëse zho dze guieel bii quiambëz zho gac min co. ;Masaque rzac zho dol ga quiayun naa riladz naa laaw gocle!

<sup>8</sup> Haxta to, zeene rzet naa zrieeban miech, rzhidz to ron tow, ;pe rzac to naa grieelod Dios gun me min co?

<sup>9</sup> 'Glo nli ptsidil naa grë zha ne riladz Jesús men Nazaret, masaque rzaac naa lëew ga quiayun naa.

<sup>10</sup> Pe zhidaa zha ne blo naa ladzguiib Jerusalén, haxta grë pxoz non bneedz diidz ben naa grë min co; ni zeene rnabey zho ret grë zha co, ye naa rded diidz ret zho.

<sup>11</sup> Nzian grë yadoo win bia naa, biasacsi naa zho haxta gneenë zho Jesús. Blëeniedox naa zho, haxta grë guiedz zit bia naa biaguib naa zho.

12 'Min copaa nagon brie naa za naa guiedz Damasc, masaque grë pxoz rnabey bneedz ti xtiidz zho bi naa laa naa za.

13 Tel gan luu ganle rey Agrip zha bzhaac naa: Zig rwe ngbidza, tibaque zeene ziaad ti biinidoo nëz zhan gbaa biab lo naa, ni lo grë zha ne zanie naa ga, nroobraa nac biini co lo xbiini ngbidz.

14 Grëse no biab liu, dzigo bin naa ti tsi men co rnee me xtiidz no, bredz me naa në me: "Saul, Saul, ÷pe nacne quianal luu naa? Lëëque luu gon nosacsiluu i, rzac luu zigne rzac ngon ne rcaanni, ni lëëque lo guiib lots ne rtseb zho ma riecaanni ma."

15 Dzigo rep naa: "Been guielnzaac bnë dien cho luu." Nëchaa men co: "Naa nac Jesús, men ne squi quiatidil luu.

16 ¡Na zeena guche i, bzoli! Laa naa bredz luu zeena gun luu xtsin naa, tsiezodiidz luu lo miech mine blozh bzhaac luu nu, ni grëragaa mine naraa gan luu.

17 Peet tsienied guic luu, naa yquianaap luu, niicle zhaladz luuw niiclegaa zha zita peet grieelod gun zho luu. Sac laa naa cxel luu grë guiedz zit

18 tsienee luu lo miech gacnan zho mine nacpaa diidzli, zeena grie zho lo ncow gbig zho nëz lo biini, grie zho ladznia mendox ygab zho lo Dios. Dib zdoo zho gliladz zho naa zeena gun Dios zho perdon, ni ygaa zho zaatne gdziñ grëse zha ne mbe zdoo."

19 'Min co nagon rey Agrip nacne bioxco naa ben naa mine në men co lo naa ga.

20 Glose Damasc psilo naa bne naa lo miech, ga brie naa bdziñ naa Jerusalén, bia naa dib Judé ni grë guiedz zit, bne naa lo miech csaan zho grë xquielntseeb zho gbig zho lo Dios.

21 'Min co nagon nacne rlëënie zha Israel naa, biadnaaz zho naa len yadoo ro ne zob Jerusalén, gocladz zho niutgazh zho naa.

22 Gocniën Dios naa, gane laa naa bii zo nu quiane naa Xtiidz me zigtaa

lo grë zha wina zigtagaa lo grë zha nona. Noseete naa miech stib wseed, sinque laa naa rne mine bzeetaque Moisés ni grëragaa zha ne biadteed xtiidz Dios padzeela.

23 Tel zha, bzeetle zho ib sacsi miech men ne cxeel Dios ga, ni me gac men ne glopaa grieeban, me gac zig ti biini ne gziini lo grëse miech, zigtaa zha Israela zigtagaa grë menzita.

24 Tibaque nguiedz bnee Fest rëb me lo Pabl:

—¡Bod rzhinle guic luu gon Pabl! ¡Ne tibaque nagon rio luu wseed gane squi riots xtiidz luu!

25 —Coo, gobernador Fest —rëb Pabl—, led rzhind guic naa. Niapse mine nac diidzli min co none naa,

26 laa rey Agrip zob i, me nan ganle nli grë mine rne naa nu. Tibliladz naa none naaw lo me, sac nanopaa naa nan me nli mine rnee naa, nacda ncuaane goc ngueets zhliaan.

27 ¿Led nli lëë rey Agrip riladz luu mine bzeet grë zha ne biadteed xtiidz Dios padzeela? Nanpaa naa riladz luuw.

28 Pquiab rey Agrip, rëb me lo Pabl:

—¡Zlalaque nu gon laa luu cole guic naa ye naa sëëb xnëz Jesús!

29 Dzigo rëbchaa Pabl:

—¡Nend zhilew o nroobraaaw, per rnab naa lo Dios led loxaque luudse sëëb xnëz me, sinque ye grëraa zha ne noquiaadiag mine none naa nu niina; zeena ygaa to mine bgaa naa nu, per led znud sob caden rii nia to!

30 Gataa laa Agrip guso, gusoque Fest, gusoque Berenis ni grëraa zha ne zobnie zho, laa zho brie ga.

31 Grëse zho rnee peet xtold Pabl, rapd me falt ne guiab ne rieguial guet me, rieguialgaa tso me ladzguiib.

32 —Niacpaa nsilaa ne me —rnee Agrip lo Fest—, telne nabd me tsiepaa me lo César.

## 27

### *Pxeel zho Pabl nëz Roma*

1 Bdziñ dzew, laa Fest bnabey tsie Pabl nëz Roma, dzigo laa zho psan Pabl ladznia ti men ne rnabey lo

men<sub>g</sub>uiib lē Jul, gza Pabl zlalaa zha ne no ladzguiib ga. Lēē Jul co rnabey lo tib dii men<sub>g</sub>uiib ne rnee zho “Augusto César”.

<sup>2</sup> Ye no zional zhits Pabl grop no Aristarco, laa no bziaab ti xbarcw zha Adramit zie grē guiedz ne ndxie ro nis nēz Asia, laa no pcaa nēz laa no zio.

<sup>3</sup> Biini liu co laa no bdziñ guiedz Sidón. Zeene bdziñ no ga, wen goc Jul lo Pabl bdeed me diidz güey Pabl güeyquiaabdiuzh Pabl grē zha ne runbey Pabl ga, grēse zho rleynie zho me blēzlo zho me.

<sup>4</sup> Ga brieē no bdieed no tib ro guidzliu win ne lē Chipr, psaac guidzliu co palal, sac psilo rrieē me rtsire me barcw ne zio no ga.

<sup>5</sup> Laa no zio, bdieed no gax ro guidzliu ne nac xtan zha Cilis ni xtan zha Panfil, bdziñ no ti guiedz ne ndxie xtan Licia lē Mira;

<sup>6</sup> ga bdzieet no barcw ne zio no ga. Lēētaaque noguib Jul sti barcw ne guio no, laa ti xbarcw zha Alejandri no grieē ga tsie nēz Italia, dzigo bziaab no barcw co laa no zio stib.

<sup>7</sup> Tsow ga zie barcw co, nzian dze goca, nen dzigoraā bdziñ no gax guiedz Gnid; ib rbēzdaque me, nacne bguib zho dien pa nēz zhi rcaan me, dzigo güeynie zho barcw co nēz Cret. Tib ro guidzliu win co zio no bdieed no Salmon;

<sup>8</sup> nen bdziñ no zaatne rnee zho Buenos Puertos, gaxle ga riaan ti guiedz lē Lasé.

<sup>9</sup> Nrooble dze goc no no lo nis, len dze co laa mēē naļ psilole ni zēēb diidz gacd sē barcw len mēē co, nacne bnee Pabl lo grē zha ne zienie no ga,

<sup>10</sup> rēb me lo zho:

—Golgona ganle, telne laa ne grieē nu len dze rii, rgobey naa ib znitlonie ne barcw rii lo nis.

<sup>11</sup> Laa ne niacnie Jul Pabl niac miñe rēb Pabl ga, leļ mazdraa bliladz me xtiidz zha ne rsēē barcw ni men ne nac bizhuana.

<sup>12</sup> Stiba, zaatne nac Buenos Puertos ga rapda zaatne zaacse cuēz miech len mēē naļ, nacne nzian zho rēb

mazd gdziñ guiedz Fenice, ga zac gbi-aaz no gdipse len mēē naļ. Ro guidzliu win co riaan Fenice, nligaa zhi rcaan me ga.

<sup>13</sup> Zeene laa ti me win ne znu ziaadquia psilo brieē lo nis co, zootle na nli grieedraa me. Nacne lēēlēd bnabey zho bziaab no barcw, blisglaa zho lar nroob ne rcaan me rzēw, laa no zio, gax gax ro guidzliu co zienie zhow.

<sup>14</sup> Zhisaque goca zeene laa ti me dox ne rnee zho Nordest psilo brieē, laa me co psilo rtsire barcw.

<sup>15</sup> Niicle racladz zho tsienie zhow nēz ne no guio no ga, per rsaand me; gonse zho led ncuaane gacda, mazd psaan zho zienie mew nēz ne racladzaa me.

<sup>16</sup> Scale zienie me barcw ne no no ga, biotieed no gax ro guidzliu win ne lē Clauda, ga nē nē brieelo blis zho grē canó win ne naļ zhits barcw ga bzēēba nēz len barcw;

<sup>17</sup> dzigo blibdoo zho barcw co zeena gbilda, ni blit zho lar nroob ne rcaan me rzēw, sac rdzieb zho rēb zho telne scaquia lar co nend tsieniezhoo mew nēz ro nis, pa tsiesobnagwa lo yuzh.

<sup>18</sup> Zeene biini sti liu co mazdraa rrieē me, ni guiexoo ne ziaadnie me, nacne blee zho grē yo ne no len barcw blaal zhow lo nis.

<sup>19</sup> Goc bion ngbidz scataa zo guie dox co, bnabeyaque zho blee no grēse ncuaane runxtsiñ zho len barcw blaal now lo nis.

<sup>20</sup> Goc bla ngbidza rbēzdaque guie dox co, rludraa lo mel per ni lo ngbidz rludraa, dzigotaa rdzieets no nlidraa griequiaa no.

<sup>21</sup> Niicle wagw choot rsoladzdraa, dzigo bnee Pabl lo grē zha ne ziogrē no ga, rēb me:

—Tebaa nion to xtidz naa nagon nzhiguiel to nrieed ne Cret, zeena ndzieelod ne grē ncuaane nodzian ne nu, niicle nlaaldgaa ne grē yo co lo nis.

<sup>22</sup> Per laa ne znule bzhiaac zha dziuunraa ne. ¡Gdziebde to! ¡Peet gacd ne! Niicle nitlo barcw rii, per choot peet gacd.

<sup>23</sup> Led nanle to ganle, xnëz Dios no naa ni xtsiin me noyuu naa, nieewdze pxeel me ti xanj me

<sup>24</sup> nê lo naa: “Gdziebd luu gon Pabl, peet gacd luu, sac ib none laa luu gdziñ lo rey ne zob Roma. Niicle grë zha ne ziadgrëe luu len barcw i peet gacd zho, sac bin me mine r nab luu.”

<sup>25</sup> Gane rne naa lo to peet tsienied guic to, nanle naa csaand Dios ne, ible zac mine nê anjl co lo naa.

<sup>26</sup> Ib tedsod, no pa ti lo guidzliu win ne no lo nis rii tsiezo me rii ne.

<sup>27</sup> Zeene goc tsiida ngbidz sca nëzrii nëzrec zienie me no, laa no no lo Nisdoo Adriático. Wdze co, zig grol guieela, bien grë zha ne rsëe barcw ga gaxle ti ro guidzliu ga nonie barcw no;

<sup>28</sup> dzigo ptiix zho dien palal quiet nis ga, gon zho loxaque gal yas guieta. Bzë zho spalal biire ptiix zhow stib, gale guieta loxaque tsiptib yas.

<sup>29</sup> Gataa laa zho bdzieb rëb zho nend pa tsiecaan barcw lo quie, dzigo psilëe zho lo doo ne zob gza tap guiib cruz nroob ne quia nëz zhits barcw, bron zho gza guiib co lo nis, zeena tsowga së barcw; rzac zho tebaa laa liu biinile.

<sup>30</sup> Grë zha ne run dziin len barcw, gocladz zho nzhoon zho, psilo zho noxadz zho grë canó win ne ney barcw, rquiaalo zho zig nac zeene guiib cruz nroob ne ney barcw nëz quia w quialit zho csëeb zho len nis.

<sup>31</sup> Zeene gon Pabla, rëbcha me lo Jul ni lo grë xmenGUIIB Jul:

—iLaa grë zha rii gon racladz xoon! Csaande to, sac telne laa zho xoon nlidraa grieequia to lo nis rii.

<sup>32</sup> Dzigo pchug grë menGUIIB co doo ne zob grë canó win co, bron zhow lo nis.

<sup>33-34</sup> Silgaw, bii ncow rnaw laa Pabl bnee lo zho gow zho, rëb Pabl:

—iNone gow to! Golwi ganle nale gac tsiin ngbidz ga ni ti lë peet gard gow to, ni squique raguiesde to zacse. Peet tsienied guic to, ni tib to peet gacd.

<sup>35</sup> Blozhse sca bnee Pabl lo zho, bzhen Pabl ti quietxtil, squi ndxie zho

grë zho bdeed me xquizh lo Dios, dzigo beengrol me quietxtil co laa me psilo wagw.

<sup>36</sup> Dzigoraa peet güeyniedraa guic zho, ye zho laa zho psilo dow.

<sup>37</sup> Lo grë no zig zio no len barcw co rgaa no chop gayoo tsongaltsiimtib.

<sup>38</sup> Blozhse bdioow no, dzigo laa zho blee grë zhobxtil ne zie len barcw ga blaal zhow lo nis, zeena gnitnë barcw spalal.

<sup>39</sup> Zeene laa liu blozh biini, gon grë zha ne rsëe barcw ga laa ti lë ro guidzliu rlu gax ga, per riend zho dien paw. Natlaa nac ro guidzliu co, rlu zac gdziñ barcwa, nacne rëb zho dien pe grieelod gdzinnie zho barcw ga.

<sup>40</sup> Dzigo pchug zho doo ne zob guiib cruz nroob ne no len nis ga, biance guiib co ga. Psilëe zho doo ne naaz yag nlag ne rchug nis rzë barcw, ni blisglaa zho lar nroob ne rcaan me rzëw; zeena csëe mew gdziña gax ro guidzliu co.

<sup>41</sup> Per ziese zho, lëetse lo yuzh ne zobli len nis co güeytsiba, loxaque güeysëebguica ga laa nëz zhitsa psilo nobilaque, sac grëse nis ne rias riecaan choo co.

<sup>42</sup> Dzigotaa laa grë menGUIIB co gocladz niut grë zha ne zie ga guey ladzGUIIB, rëb zho nend znuse xoon nis zho xoon zho.

<sup>43</sup> Per bdeete men ne rnabey lo zho diidz, sac racladz me gut zho Pabl. Mazd bnabey me zha ne rac rzhoobnis, zac ner zho xoobnis zho grieequia zho ro nis co;

<sup>44</sup> laa grë zha ne gacd xoobnis, zac maase grë yag biats ne nobil barcw xoobnisnie zho. Sca bdeeda diidz brieequia no ro nis grëse no.

## 28

### *Blëz zho Malt*

<sup>1</sup> Zeene bdziñ no ga, dzigoraa gondion no lëe guidzliu win ne lë Malt ga.

<sup>2</sup> Grë miech ne no ga pquiadox zdoo zho no, bzëeg zho gui bredz zho no bdzëe no, sac lala rac nal ni scataque bgaa no guie.



<sup>3</sup> Ye Pabl güey güeytop chop lë yag ne cuib lo gui. Lëëtaaque laa me nodziiba lo gui, tibaque bias ti meel ne zizhoon lo zhindzëë gui co, pquiaalay ma nia me, quiataque ma ga.

<sup>4</sup> Grë miech ne no ga, zeene gon zhow rneechaa zho:

—jIse nagon rlu, nzëëb men qui ngutoo! Niicle blaa me lo nisdoo, per no guielwxtis ne quiianab guet me.

<sup>5</sup> Znuse bdzib Pabl nia me bron me meel co lo gui.

<sup>6</sup> Grëse zho rwi quiambëz zho dien pa hor sigui me, te tibaque tsope me liu ye guet me. Wdzeelaaw peet racd me. Laa zeene gon zho peet racd me, dzigo psilo zho rnee zho no cho ti dios nac me.

<sup>7</sup> Gaxaque ga quia tib lë liun men ne rnabey lo guidzliu win co lë Publ, dzigo bneedz me zaatne bliaaz no ga tson ngbidz ni bneedz me ncuaane bdiow no.

<sup>8</sup> Lëëtaaque len dze co laa pxoz me nix rlan xlëë ni yoobchen. Dzigo güeynee Pabl lo me, bnab Pabl lo Dios guiac me; blozhse bnab Pabl lo Dios, pxobnia Pabl guic me, laa me biac.

<sup>9</sup> Zeene bin grë miech cow, zha ne rzacnëtaa riaadnie zho zho lo Pabl, runguiac Pabl zho.

<sup>10</sup> Dzigo rleynie zho no, nroob grë ncuaane bgad zho lo no. Zeene gol dze ne laa no wbii ga, scasaque nroob ncuaane yquii no nëz bneedz zho.

<sup>11</sup> Tson mëë bliaaz no lo guidzliu co, dzigo laa no brieë ga bziaab no ti len xbarcw zha Alejandrí, ti barcw ne blëz ga dipse len mëë nal co. Guic barcw co quia chop mdio, mdio ne rnee zho Cástor ni mdio ne rnee zho Pólux.

<sup>12</sup> Bdzin no guiedz Siracús, ga bli-aaz no tson ngbidz.

<sup>13</sup> Siracús brieë no, gax gax ro guidzliu zio no bdzin no guiedz Regio; biini liu ine zhoob ti me ne ziaadquia lo nis co, dzigo laa no brieë Regio laa no zio. Biiniraa sti liu bdzin no guiedz Puteoli,

<sup>14</sup> ga bdzin no lo blalaa zha ne riladz Jesús. Bnab zho lo no gbiaaz

no, nacne bliaazaque no lo zho ga ti zhmal. Garaa brieë no bdzin no Roma.

<sup>15</sup> Grë zha ne riladzle Jesús Roma, zeene bin zho laa no gdzin ga, brieë zho bиаad-xinëz zho no. Zhis zho biaddzieel no zaatne lë Foro de Apio, szhis zho bиаad zaatne lë Tres Tabernas. Zeene gon Pabl scataa bиаad-xinëz zho no, rley me rdeed me xquizh lo Dios.

### *Bdzin Pabl Roma*

<sup>16</sup> Zeene bdzin no lad guiedz Roma, bdeed zho diidz Pablzhal bguib ti yu ne blëz me grop me menquib ne quiianap me, blood zho me ladzguib.

<sup>17</sup> Goc tson ngbidz bdzin no ga, dzigo bredz Pabl grë zha ne nac zha non lo zha Israel ne no ga. Blozhse pcaalsa zho, rëbchaa me lo zho:

—Laa naa bredz to nu gon bets, gacnan to ganle laa grë zha ladz ne bnaaz naa Jerusalén, güeyzo zho naa lo zhiwxtis zha Roma rnab zho guet naa, per gneli naa lo to ganle, peet bend naa lo zho, ni ti zhiwseed xmenqol ne bditsd naa.

<sup>18</sup> Niicle wxtisgaaw, blozhse pquiep zho naa gon zho raapd naa falt, nacd naa zha ne rieguial guet; dzigo gocladz zho nsilaa zho naa.

<sup>19</sup> Per zeene gon naa nëd menladz ne csilaa zho naa, nacne bnabaque naa ziaadnie zho naa lo César nu. Min co nagon nacne zial naa nu, ziald naa cto naa menladz ne o cteedquiegaa naa zho.

<sup>20</sup> Wen ne laa naa beenbey to nagon, ni beenbeygaa to naa; gacnan to sca ganle laa caden rii zob nia naa, per nacda por pe falt ne rap naa, sinque laaw zob nia naa porne riladz naa laa Dios pxeelle men ne quiambëz menladz ne ga.

<sup>21</sup> Dzigo pquiab zho rëb zho lo Pabl: —jWlaltaa, ni ti guits ib gard cxeel menladz ne lo no zaatne gzeet zho luu! Niiclegaa grë zha wladz ne zilanso nuw, rneed zho laa luu noyun pe guielntseeb.

<sup>22</sup> Per na laga laa luu ziaad nu, siguie l luu sodiidz luu lo no dien zhapaa

nac wseed ne rliladz luu i, sac blac-  
taa zidzion no, zaatne notaa zha ne  
rliladza rlëenie miech zho.

<sup>23</sup> Dzigo pso zho ti dze ne tsie zho.

Zeene gol dze co, nzian zho pcaalsa  
zaatne rbëz Pabl ga. Dzigo psilo Pabl  
bzodiidz me lo zho zhapaa racladz  
Dios gban miech, ni rnee me lo zho  
gliladz zho lëele men ne nac diidz  
cxeel Dios ga nac Jesús; blu me lo zho  
grëse zaatne zhobneew, zigtaa lo grë  
mine pquiaa Moisésa, zigtagaa lo grë  
mine pquiaa grëraa zha ne biadteed  
xtiidz Diosa. Dipse dze sca bzodi-  
idznie me zho grë min co.

<sup>24</sup> Brieequia bla zha ne bliladz grë  
mine bnee me ga, ni scaquegaa brie-  
quia zha ne bliladzda.

<sup>25</sup> Grë zha ne riold zdo me rnee  
me ga, laa zho psilo noriee, nacne rëb  
me:

—Ib lëepaa mine nac to i ga nagon  
bzeet Espíritu Sant, zeene psiaab me  
guic profet Isá znu rëb Isá

<sup>26</sup> lo grë xmen gol to:

Niicle peraa gon to, niicle peraa gan  
to,

per peet guiende to;

<sup>27</sup> sac goctseeb zdo to.

Zob diag to, ni peet ronde to;

zob lo to, ni peet rande to.

Ncow nac guic to,

gane peet ronde to, peet rande to;

niicle rioxcodgaa to gbig to lo naa  
zeena csilaa naa to lo xtol to.

<sup>28</sup> Golgacnan sca ganle, min co gane  
laa Xtiidz Dios quiagaaz lo grë miech  
stib guiedz, ni zhasi gon noliladz  
zhow.

<sup>29</sup> [Zeene gon zho sca rëb Pabl maz-  
draa blëe zho, nodildiidzlsa zho laa  
zho zey.]

<sup>30</sup> Dipse len chop iz blëz Pabl ga, ga  
bree me ti len yu ne bio me. Ga rdzin  
grë miech ne zienee lo me,

<sup>31</sup> zha ne zietaa, rnee me lo zho  
zhapaa racladz Dios gban miech, ni  
rnee me lo zho gliladz zho cho nac  
Jesús. Dipse len dze co, ib biod zha  
ne ntsidil pe nacne sca noseed me  
miech.

## GUITS NE PXEEL PABL LO ZHA ROMA

¡Diuzh to grëse to!

<sup>1</sup> Naa nac Pabl, naa nac tib ngundziin win quiayun naa xtsiin Jesús. Dios bredz naa pxeel me naa none naa Xtiidz Ndzon me lo miech.

<sup>2</sup> Padzeelale bnee Dios ne laa me cxeel Diidz Ndzon rii lo ne, lëew ga bzeet grë zha ne biaad padzeela biadteed xtiidz me lo miech, lëew ga raquiet lo guits ne zhobnee Xtiidz me.

<sup>3</sup> Lëew ga rnee ganle cho nac Jesús (men ne briequia lo xtii rey David ne laa me goc miech lo guidzliu;

<sup>4</sup> sangue Espíritu Sant, pxobnen me ganle Xpëed Dios nac me; miñ co gane brieaban me).

<sup>5</sup> Zeene biaad Jesús, ga pxobnen me ganle tibaque noxco Dios ne; ni niina Diosaque bzooblo naa rxeel me naa none naa Xtiidz me lo grëse miech, zeena gliladz zho me, gon zho diidz gban zho zigne rnabey me.

<sup>6</sup> Zig nac to, glo lo guielcow ga ngab to; sangue niina laa me bredz to laa to ngab xnëz Jesús.

<sup>7</sup> Laa naa rxel guits rii lo to, grëse to ne no to guiedz Roma i. Golgacnan ganle rleyne Dios to, gane laa me bredz to ygab to lo me, gban to zigne no gban zha ne ngab lo me. Me ne nac me Pxoz ne, ni Jesús men ne rnabey, tibaque noxco me to, me nac men ne gacnen to zeena peet zhgab ctsebde to.

<sup>8-9</sup> Nanle to nasca ganle xtsiin Dios quiayun naa, dib zdoo naa quiaseed naa miech Diidz Ndzon ne nac zhiwseed Xpëed me.

Nu ne laa naa rsilo rne lo to, gloque rded naa xquizh lo Dios ni lo Jesús por mine quiayun to grëse to, sac gon tel pa lotaa zëeb diidz ne nlipaa dib zdoo to rliladz to me. Me zobwi, me nan ganle zeene rnabtaa naa lo me, ib riaanladzd naa to, tibaque rnab naa lo me gacnen me to;

<sup>10</sup> ni tibaque rnab naa telne zneedz me diidz gdziñ tib dze ne grieelo guial naa i guialgan naa to.

<sup>11</sup> Ne nlipaa rquiabladz naa ganlo naa to, guialzhaal naa gnedz naa rson lo to guien to zha ycaaniaraa to guielbiini ne rneedz Espíritu Sant; zeena tiblique gac guic to dziitsraa so to.

<sup>12</sup> Ni scagaa tipse gac ne ziodiidz ne zha nac Xtiidz Ndzon Dios, mine rliladz ne; zeena tipse gac ne sodziits ne low.

<sup>13</sup> Bets, bzian, tel gan to ganle blac-taa vult ziyacladz naa guial naa i guialgan naa to, per haxta lo nadze gon rrieeelodaque guial naa. Ib laa guic naa no guial naa lo to i, zeena gacndalraa miech ne sëeb gliladz Xtiidz Dios, zigne ziyacndal zho grëraa zaatne ziyateed naa.

<sup>14</sup> Sac ible naa raguial cseed miech Xtiidz Dios, grëse zho niicle zha nona, niicle zha mbana; niicle zha raca, ni niicle grëga zha ne peet rienða.

<sup>15</sup> Miñcocxe waa, tibaque laa naa racladz ye nëz qui guial naa guialne naa Xtiidz Ndzon Dios lo to, ne nac to zha ne no guiedz Roma i.

### *Poder ne rap Xtiidz Ndzon Dios*

<sup>16</sup> Tel naa, ib rtoladzd naa gne naa Diidz Ndzon rii lo miech, sac ncuaan ro ne run Dios zeene rquiaadiag miecha. ¡Grëse miech ne gliladza, ib zlaa zho lo xtol zho! Laa guielnzaac co no niina par grëse miech. Glose lo zha Israel bdzina, laa niina laaw quiazin lo grëraa miech, zeena grëse zho gbige sëeb xnëz Dios.

<sup>17</sup> Sac gon, lëe Diidz Ndzon rii rlu zha rbiire rcaania Dios miech, rsanmbe me zho lo dol rbiire riaanwen zho lo me: totsaque nli dib zdoo zho gliladz zho mine nac Xtiidz me. Sca zhobnee lo Xtiidz me, zaatne rnee: “Zha ne biaanwenle lo Dios, ib zrieelo gbannie zho me, sacne dib zdoo zho rliladz zho mine nac Xtiidz me.”

### *Xtol miech*

<sup>18</sup> Ndionle ne ganle no guielnë ro ne csiaab Dios yгаа grëse miech ntseeb, miech ne nëd gac-wen, ni desde gbaa

cxeeł me guiełnē ne yгаа zho; sac por xquiełntseeb zho rsaand zho gacnan grēraa miech miñe nac diidzli.

<sup>19</sup> Grē zha ntseeb, nanle zho zha nac Dios, sac mezhal blu lo miech zha grieelo gunbey zho me.

<sup>20</sup> Niicle ne grielod ganlo ne Dios, per de lo grētaa ncuaane bzaa me, grētaa ncuaane run me, gase rlu ganle cho nac me. ¡Gase rlu ne nli me nac Dios, ni gdziñd dze ne lozh xpoderm!

Gacxe waa grē zha ntseeb, ib tedlaad zho lo guiełnē ne csiaab me ga;

<sup>21</sup> sac gon niicle nanpaa zho me nac Dios, ni ib rond zho xtiidz me. Nēd zho gunbey zho me zigne rieguała, niicle xquizh nanđ zho gdeed zho lo me. Laa ne rzac zho na rien zho pe run zho, leł pcow xquiełrien zho; rzac zho na lēew ga, gun zho ncuaane guiaabtaa guic zho.

<sup>22</sup> Niicle ne rzac zho zharien zharac nac zho, per zha nac miech ne quialoozhraa lo xquiełnxen;

<sup>23</sup> sac gon laa ne gunbey zho guiełndzon ne rap men ne nacpaa Dios nguiamban, leł rsilo zho rzaa zho grē mdio ne niaa zigne rlu samiech guidzliu zho, grē mdio ne niaa zigne rlu grē ma ne rsiibe, grē ma ne rzē tap ni, grē ma ne rzēleñ lo liu; leł grē ncuaan co ziegañ zho laa ne gleynie zho men ne nacpaa Dios.

<sup>24</sup> Miñcocxe nagon waa, rsaanladz Dios zho laa zho zienal grē ncuaane ndzinlid ne rzoobladztaa zho. Grē ncuaane ntoladzdox ne run zho, lēēque zha runguzee zho rguitnie zho xcuerp zho.

<sup>25</sup> Sac laa ne gleynie zho diidzli miñe rnabey Dios, leł miñe rnee zha ne rquidie rleynie zho; leł grē ncuaane bzaale Dios, ncuaane psanle me, ncuaan co ziegañ zho, lo grē ncuaan co ziequitsgzhib zho; laa ne yquitsgzhib zho, gleynie zho men ne nac Dios mban, men ndzon ne psan grētaa ncuaane no. ¡Diosse rieguał gunnon miech, men co rieguał tibaque goolnie zho! Sca rieguała.

<sup>26</sup> Ne sca nagon nac zho, gane psaan Dios zho laa zho run grē

guiełyozh, ncuaane ngubeeguiełto ne rieguałdraa gun miech. Grē wnaa laa ne gdeed zho diidz gnee tsieel zho lo zho, leł lēēque sawnaa zho rquiangob zho, laa zho zienal grēraa guiełyozh;

<sup>27</sup> grēгаа mgui, laa ne gnee zho lo wnaa ne nac tsieel zho zigne biaan no gaca, leł lēēque sabgui zho rzoobladz zho. Ncuaane mbixladz run zho, rquiangob zho lēēque sabgui zho; ni ne sca run zho grē ncuaan co, lēē miñe rdziniaa zho nac grē guiełguidz yozh ne riaan lad zho; ndzinlidraa rac zho.

<sup>28</sup> Scataale nac zho, ni bii rzoli-aadz zho gbig zho lo Dios, gane niicle megaa rlozh rsaanladz me zho, laa zho biaan lo grē zhgab yozh ne no guic zho, no zdoo zho, miñ co ne scataa nac zho.

<sup>29</sup> Nroobdoo nac xtol zho, sac: rsacsixuu zho samiech zho, rzoobladz zho ncuaane quianied zho, racntseeb zho lo samiech zho, nē rac zdoo zho ran zho stib noded samiech zho, rut zho samiech zho, rtsidil zho samiech zho, rquidie zho samiech zho, rquiadiidzguizh zho samiech zho, miech yozh nac zho,

<sup>30</sup> rneenē zho samiech zho, rquiabro zho lo samiech zho, racniats zho lo samiech zho, rlu zho ncuaane rapd zho, ncuaane nacd zho;

rlēēnie zho Dios, rio zho rbeebeey zho grē guiełntseeb, rond zho xtiidz pxoz zho, rond zho xtiidz xniaa zho,

<sup>31</sup> racladzd zho gon zho diidz, rund zho miñe rnee zho, rleynied zho samiech zho, rund zho samiech zho perdon, rquiad zdoo zho samiech zho.

<sup>32</sup> Niicle ne nanpaa zho zha rnabey Dios none gban miech, niicle ne nanpaa zho grēse zha ne run guiełntseeb, ib tedsod znitlo zho; ni laa zho bii quiayuna, ni haxta rley zho ran zho cho grēraa zha ne run grē miñe run zho.



## 2

*Xquielwxtis Dios*

<sup>1</sup> Ib tedsod no to gnë: “¡Zha ntseeb-taa miech ne sca run!” ¡Per gni naa lo to ganle, zigtaa zhaw, zigtaa tow, lalga ntseeb to grë to! Sac ye to gon run grë guielntseeb co, gacxe waa, zha ne rzac rieguial zha co ygaa zho guielnë ne csiaab Dios, ye zho rieguial min co.

<sup>2</sup> Ndion ne ganle Diossi zeene laa me gun guielwxtis, grëse zha ne sca zienal guielntseeb, ib tedsod zunquizh me zhow.

<sup>3</sup> Zha ne sca rlozhd gzee zdoop pe quiayun stib zho, haxta rlisqui zho mine quiayun zha co, ni yeque zho quiayuna; masaque nan zho nagon zdedlaa zho zeene laa Dios guiaadgun xquielwxtis me, masaque nan zho zha cose nitlo, laa zho tedlaa.

<sup>4</sup> None guien zho ganle pa lotaa nquialadz Dios zho, pa lotaa noyap me zho paciens noxecw me grëtaa ncuaane run zho; sac laa me quiambëz csaan zho xquielntseeb zho, yguudz zdoop zho gban zho zigne rnabey me.

<sup>5</sup> Telne tibaque squi ndip gac zdoop zho, gond zho mine rnabey me; gacnan zho ganle, quiayunloraa zho grë guielnëdox ne ygaa zho gal dze ne laa me gun guielwxtis. Ni xquielwxtissi me, zigne rieguial gaca sca gun mew.

<sup>6</sup> Gal dze co, laa me gdeed mine rieguial ygaa tib tib miech tel zha wban zho.

<sup>7</sup> Grëse zha ne güeynal beennon zho lë me, pxobnen zho xquielndzon me, güeynal d zho grë ncuaane rnitlo, lo zha co gdeed me tib guielmban ne gdziñd dze lozh.

<sup>8</sup> Sangue grë zha ne güeynal lox- aque grë zhixco zho, güeynal zho grë guielntseeb, laa ne nienal zho mine nac diidzli; zha co ygaa grëse zhian ne csiaab me.

<sup>9</sup> Ga nagon, grëse zha ne run guielntseeb, zigtaa zha Israela, zigtagaa zha stib guiedza, ible zгаа zho tib guielnëdox;

<sup>10</sup> sangue grë zha ne rban zaacse, zigtaa zha Israela, zigtagaa zha stib guiedza, ible zгаа zho lo xquielndzon me, zunnon me zho. Ni led yedraa ga pe zhgab ctseb zho.

<sup>11-15</sup> Grëse zha ne gunctal xtol, tel chotaa nac zho zunquizh Dios zhow; sac tel me, led yed me cue. Zig nac grë zha ne beenbeyd xley me, zunquizh me zho grë xtol zho; sac niicle ne gocnandpaa zho zha naca, per len zdoop zho, guic zho, nanpaa zho pa min nac guielntseeb, pa mingaa nac guielwen. Rrieequiacxe waa runbeyle zho xley Dios ga. Scaquegaa zha Israela, ne nac zho zha ne runbeypaa xley Dios, zunquizhaque me zho grë xtol zho; sac niicle ne runbeypaa zho xley me, per tel lozh ga mband zhow. Nanpaa zho pa min wen, ni tel lozh ga rond zho diidz gun zhow; sac gon, led-xe por ne gacnandse ne ley waa laa Dios ycaaniale ne, sinque none gban new.

<sup>16</sup> Zdziñ tib dze, zeene laa Dios cxeel Jesús, gunquizh me miech grëse dol ne been zho tib tib zho, niicle mine mazdraa rzac zho ngueets zhliaan been zho; sac sca rnabey Dios gaca, ni min co noseed naa miech.

*Zha Israel ni xley Moisés*

<sup>17</sup> To ne nac to zha Israel, rzac to zienalpaa to xley Moisés, niats rac to, rzac to tose non lo Dios.

<sup>18</sup> Nanwen to zha racladz Dios gban to, nanpaa to pa min wen sac pseed to xley me.

<sup>19</sup> Min co masaque rzac to to cseed zha ne no lo ncow, grë zha ngoopdol.

<sup>20</sup> Masaque rzac to to rienraa zha cseed to grë zha ne peet gacd, to rienraa zha quixbiini to grë zha ne peet riend; sac rzac to ne nan to ley, tose nac zha ne ndziibbraa nixbiini, tose nan mine nacpaa diidzli.

<sup>21</sup> Nana, tel scataa rien to zha cseed to stib miech, ¿pe nac dzigo rwide to mine run to?

Conque to name rnee lo miech cuand zho, ni rlozh ga toque quiaban.

<sup>22</sup> Rseed to miech rnee to, tib zha ne nole tsieel, nodne yquiangob zho stib zha ne led tsieeld zho; ni rlozh ga

toque noyūn miñ co. Rnee to, rdzigu-  
iende to grē mdio, ni rio to rieben to  
yadoo ne zob grē mdio co.

<sup>23</sup> Rlozhd gacniats to rzac to  
quiayunnon to lē Dios ne nan to ley,  
ni nande to gon, lel quiaguitnie to lē  
me ga, sac mbande to zigne nac ley.

<sup>24</sup> Mine noyūnpaa to i ga gon raquiet  
lo Xtiidz Dios, zaatne rnee: “Por xtol  
to, grē zha zit laa zho rneenē Dios.”

<sup>25</sup> Tel to, rzac to porne nacse to  
zha Israel non to lo Dios, per ne  
squi mbande to zigne nac xley me,  
nacaque to zigne nac grē zha zit ne  
runbeyda.

<sup>26</sup> Nana, zha zit ne rioxco rban  
zigne nac xley me, ¿niacxe rieguiald  
dzigo guianzuiuu zho lo Dios?  
Sanzuiuu me zho gon.

<sup>27</sup> Golgacnan sca ganle, glole zha zit  
co gon guianzuiuu lo Dios, lēdle to ne  
nanpaa to zha racladz Dios gban to,  
nanpaa to mine psan Dios diidz yгаа  
to, ni rbande to zigne rnabey me.

<sup>28</sup> Golgacnan sca ganle, led porne  
nacde to zhin zha Israel, porne bio  
to xbey zho, laa to nziuule lo Dios.

<sup>29</sup> Led scada gon, sinque zha ne nli  
dib zdoo rioxco mine rnabey Dios,  
zha co nziuu lo me. Sac tel Dios,  
rwidaxe me waa dien cho pe bey ne  
no, sinque laa me rcaania zha ne  
nlipaa dib zdoo, dib guic, rban zigne  
racladz me. Grēse zha ne znu nac,  
nziuu zho lo Dios, niicle telne rzac to  
peet nond zho.

### 3

<sup>1</sup> Nana, ¿pa lugar nadien ne ri-  
aannon zha Israel lo grēraa zha stib  
guiedz? ¿Pa rquiin ne scataa rio zho  
bey? Zootle lēē lalaquew tel niaca  
mine niacd zho zha Israel.

<sup>2</sup> Per led scada, no pe nacne non  
zho. Sac gon, ible lo zho psan Dios  
xtiidz me mazd padzeela.

<sup>3</sup> Nli ndal zho rond xtiidz me, per  
led miñcod ctsēē me xtiidz me, mine  
bneelee me lo zho.

<sup>4</sup> Niicxe tel zharaa quiayunctal  
miech xtol zho, sangue Dios ctsēēd  
me xtiidz me. Zigne zhobneeque

lo Xtiidz me, zaatne rnee: “Mine  
rnee Dios, diidzli naca; niicle zha ne  
gacladz, guiend pe ncuaane glisqui  
zho lo me.”

<sup>5</sup> Sca nac Dios, gacxe waa rnee  
me grēse zha ne runctal xtol, rieguial  
yгаа zho guielnē ne cxeel me. Ga  
nagon, rlu ne mine nac diidzli, miñ co  
run me. Nana, ¿pe ziab ne nonguiel  
mine run me ga?

<sup>6</sup> Mine nonguiel ga gon run me, sac  
tel gdziguien me grē zha ne runctal  
xtol, ¿zha nac zhe guielwxtis ne dzigo  
gun me?

<sup>7</sup> Nana, nogaa zho gnē, ¿per pe  
nacne glisqui Dios dol ne rdziuuñ ne,  
ni tel por lēēw rlu ne diidzli nac mine  
run me?

<sup>8</sup> Per telne sca naca, rrieequia dzigo  
ib none gunctal ne xtol ne parne  
yquiaraa zdoo me ne. Ni nzian zha ne  
nobee xquielto naa, rnee zho ib miñ  
co noseed naa miech. Ni zha ne sca  
rnee, ib tedlaad zho lo guielnēdox ne  
rieguial zho.

#### *Grēse miech, ngoopdol nac zho*

<sup>9</sup> Nana, ¿pe zdieets ne dzigo ne nac  
ne zha Israel, nziuuraa ne lo grēraa  
miech stib guiedz? ¡Led scada gon!  
Niina blozh bzeet naa lo to, grēse ne  
ngoopdol nac ne, zigtaa zha Israela,  
zigtagaa zha stib guiedza.

<sup>10</sup> Zigne zhobneeque lo Xtiidz Dios,  
zaatne rnee:

¡Guiend miech ne zienalpaa mine  
racladz Dios!

¡Ni tib zho guiend!

<sup>11</sup> Guiend zha ne niini guic;  
guiend zha ne tsoxco yguib xnēz Dios.

<sup>12</sup> Grēse zho laa zho zie nēz ne nitlo  
zho;

niapse guielntseeb zienal zho.

¡Guiend zha ne zienal mine racladz  
Dios!

¡Ni tib zho guiend!

<sup>13</sup> Ro zhow,  
masaque been cuent naca zig nac len  
grē baa ne noyodz ngutoo;  
niapse diidz ne rquidie zho zhoob lo  
ludz zho.

Grē diidz ne rnee zho,  
masaque naca zig nac xvenen grē  
meel dox;

14 niapse grē diidz dox, niapse grē diidznē rrieche ro zho.

15 Ni zhow, masaque zombēzlew dien pa tsiegut zho samiech zho;

16 loxaque guiēlnē, loxaque guiēlzi rsañ zho zaatne rded zho.

17 Ib nand zho ne zaacse gbannie zho samiech zho;

18 per ni Dios rdziebdraa zho.

19 Gacxe waa nroob nac guiēlnēdox ne yгаа grē zha ne runbey ley ni mband zho zigne naca, lel run zho grētaa guiēlntseeb zig nac grē mine goquiet nu. Ni niicle grēraa miech ne runbeyd ley, scaque ngoopdol nac zho, ni ro zho guiēnd pe guiab zho lo Dios.

20 Golgan sca ganle, grieelod guiaanmbe ne lo Dios, niicle paraa yquia ne gun ne mine rnee ley; sinque par guiēn ne ganle ne ngoopdol nac ne, gane biaan ley.

*Silaa Dios miech zeene gnalo zho me*

21 Saṅgue niina, tib ladle biaan ley, laa Dios bneedz stib mod ne guiaanwen ne lo me. Ni lo grēque guits ne ziaad ley, lo grē guits ne pqiiaa zha ne biadteed Xtiidz Dios padzeela, ga raquieta.

22 Grēse miech tel chotaa nac zho, tel petaa been zho, ib ziaanwen zho lo Dios totsaque dib zdoo zho gnalo zho Jesús, dib zdoo zho gliladz zho me. Zha ne gliladztaa me, sac led yed Dios rbe.

23 Zigne rne naa ga, grēse ne miech ngoopdol nac ne lo Dios, ni palal rdzieeld gdziñ ne lo xquielndzon me.

24 Per niina laa me blu ganle pa lotaa noxco me ne, gola zdoo me pxeel me Jesús bdiizh grēse xtol ne, laa ne biaanwen lo me.

25 Laa me been miñ co parne glu run me guiēlwxtis, sac niicle bdizhd ne xtol ne, per pxeel me tib men ne bzhiie xchen bdiizha xcuent ne, lēe men co nac Jesús; gane niina grēse zha ne gnalo men co, zun me zho perdon grētaa dol ne pxcw me been zho.

26 Ni tib dol rapd me, ni scaque grē zha ne dib zdoo gnalo Jesús, sanmbe me zho lo xtol zho.

27 Sca nagon psilaa Dios ne lo dol. ¿Cho nadien gacniats ga? Ni tib choot gacd gacniats, sac led por mine bdziund new, sinque por grētaa mine bded Jesús.

28 Gocndion ne sca ganle: Niapse por dib zdoo miech gliladz zho Jesús, laa Dios ycaania zho; nacda por tso zho gun zho mine rnabey ley.

29 Nana, ¿pe zha Israelse sca ycaania me? ¡Lēda gon! Grēse miech, sca ycaania me zho.

30 Sac gon tibeyse ran Dios ne grēse ne; zigtaa zha Israela, zigtagaa zha stib guiedza, sanmbe me ne lo grē xtol ne, totsaque dib zdoo ne gnalo ne Jesús.

31 Nana, ne znu rcaania Dios ne, no zho sac rquiindraa ley. ¿Zha yquiindzhew? Niinale ne znu dib zdoo ne rililadz ne Jesús, rienraa ne pa rquiina.

## 4

*Dib zdoo Abraham bnalo me Dios*

1 Zig nac pxozgoldoo ne Abraham, ¿pe been me ne laa Dios pcaania me?

2 ¿Pe por guiēlwen ne been mew? ¡Lēda! Telne scaw, nrieelo niacniats me (niicle ne nēz lo Dios ni palal rieguiald niacniats me).

3 Sac gon rnee lo Xtiidz Dios, ne dib zdoo me bliladz me Dios gane pcaania Dios me zig tib zha ne peet xtold.

4 Zig nac tib zha ne run dziin, dimi ne razh zho ible rieguiāl zhow, rate zhow ga.

5 Saṅgue Dios zdoo me ral rcaania me miech, zha ne dib zdoo rnalo me, nacda por pe guiēlwen ne gun zho par guiab ne laa zho rieguiāla.

6 Ye rey David bzeet guiēlbley ro ne rgaa zha ne sca rcaania Dios,

7 rēb David:

¡Wen zie zha ne run Dios perdon! Niicle nroob guiēlntseeb ne been zho; tel pe nactaa xtol zho, glisquidraa mew.

<sup>8</sup> ¡Wen zie zho sac gunquizhdraa me zho grë xtol zho!

<sup>9</sup> Nana, ¿pe loxaque grë zha ne nose bey zrieelo ygaa guielbley co, te ye grë zha ne noda ye? Nacda por bey, laa ne blozh bzeet ganle niapse ne dib zdo Abraham bnalo me Dios, miñ co ne pcaania Dios me zig tib zha ne peet xtold;

<sup>10</sup> sac gon gard pe bey ne tso me zeene pcaania Dios me.

<sup>11</sup> Pcaaniale Dios me dzigora bio me bey. Lega laa me biose bey co, zeena glu ne laa Dios pcaaniale me porne dib zdo me bnalo me Dios. Mincocxe waa, Abraham nac dad lo grëse zha ne nod bey, ni dib zdo zho rnalo zho Dios; ni scagaa Dios, rcaania me zho zig tib zha ne peet xtold.

<sup>12</sup> Ni meque nac dad lo grë zha ne no bey ni dib zdo zho rnalo zho Dios, zigne bnalo me Dios zeene gard tso me bey co.

### *Zha goc miñe bnee Dios lo Abraham*

<sup>13</sup> Psanle Dios diidz lo Abraham ne me guiaañnie guidzliu, grë me zha ne grieequiaraa lo xtii me; guiabd ne togo porne been me miñe nac xley zha Israela, sinque ne dib zdo me bnalo me Dios.

<sup>14</sup> Nana, tel niaca zha ne gunse miñe nac ley, zha cose ygaa miñ co, rriequia dzigo zhlëse ga bnalo Abraham Dios, niicle diidz ne psan Dios lo me ga, nondaquew.

<sup>15</sup> Sac nac ley gon, zha ne gunda zigne naca, laa Dios csiaabzi zho; laa zaatne guiendgaa ley, gacd guiab zho cho noguiitsa.

<sup>16</sup> Ne scacxe waa nac ley, gane ni ina lëese miñe no gun ne nac dib zdo ne gnalo ne Dios par ygaa ne miñ psanle me diidz ga. Grëse ne ygaa miñ co, per nacdraaw dien cho zienal ley, cho zienaldgaaw, sac miñe nonraa, dib zdo ne gnalo ne Dios zigne bnalo Abraham me. Mincocxe waa, rriequia Abraham nac pxoz ne grëse ne,

<sup>17</sup> zigne rëb Dios lo Abraham: “Laa naa bzo luu, luu gac dad lo nzian dii

miech.” ¡Lëe Dios co nagon bliladz Abraham, me rbeeban grë mengut, ni niicle haxta grë ncuaane guiend, saa mew!

<sup>18</sup> Ndaldox rëb Dios gac lo xtii Abraham, ni bliladz Abraham miñe rëb Dios ga. Niicle ne zootle led ncuaane gacda, per me dib zdo me bliladz me ne zaca, ni scagaa bdziñ dze ne laaw goc.

<sup>19</sup> Tibaque bnalo me Dios, niicle ne lala ziele xtse me (zig tib gayoole iz me), ni lala tsieel me Sar, nacd me wnaa ne gap mëed.

<sup>20</sup> Ib goc chopd guic me niab me bod nlid niac miñe bnee Dios ga, sinque dzigole dib zdooraa me bnalo me Dios; haxta rdeed me xquizh lo Dios,

<sup>21</sup> sac nanpaa me men nroob nac Dios zun me miñe psan me diidz ga.

<sup>22</sup> Ne sca nagon dib zdo me rnalo me Dios, gane pcaania Dios me zig tib zha ne peet xtold.

<sup>23</sup> Zhobnee lo Xtii Dios sca pcaania me Abraham, ni laaw zhobnee zeena gacndion ne

<sup>24</sup> ye ne scaania me ne zig tib zha ne peet xtold, totsaque dib zdo ne gnalo ne Jesús, men ndzon ne rnabey ne;

<sup>25</sup> men ne gut ga bdiizh me xtol ne, men ne brieaban ga, par glu me nli psanmbe me ne nëz lo Dios.

## 5

### *Jesús rsanmbe miech lo dol*

<sup>1</sup> Nasi laa ne nacle zig zha ne peet xtold, laa ne biaanwenle lo Dios porne dib zdo ne rnalo ne Jesús, men ndzon ne rnabey ne.

<sup>2</sup> Sac por grëtaa miñe bded Jesús, laa ne bgaa guielnzaac rii nacie me ne, ni ib csaand ne me. Tib guielbley nrooba lo ne, sac ndionpaa ne ib zgaa ne lo guielndzon ne no me.

<sup>3</sup> Ni scaquegaa nagon none gley ne zeene pe guielnë ne nodzian ne; sac ndion ne ganle, ga cseed ne lëb ne dziits so ne lo miñe rliladz ne.

<sup>4</sup> Ni zeene sca dziits so ne, zliladzraa ne dib zdo ne; ni zeene



dib zdoo ne riladz ne, zacnanpaa ne ib zgaa ne mine riladz ne.

<sup>5</sup> Ni ndionpaa ne zgaa new, sac blu Dios rleyne me ne, pxeel me Espíritu Sant nacie ne.

<sup>6</sup> Lëëtaaque zeene rdziendraa miech zha gun zho par guiaanmbe zho lo dol, hor co laa Dios pxeel Jesús, biaad me gut me bdiizh me xtol ne nac ne miech ngoopdol.

<sup>7</sup> Ndion ne ganle, niicle tib miech ne peet xtolda, tib miech ne mazdraa wena, led lega grieequiad tib zha ne cueeladz xquielmban guet por zha.

<sup>8</sup> Sangue Dios gon, niicle ne miech ngoopdol nac ne, blu me ganle pa lotaa nquialadz me ne, pxeel me Xpëed me Jesús, men co bleeladz xquielmban gut me xcuent ne.

<sup>9-10</sup> Gotsaa gwi ne ganle, zha nactaa guielnë ne bded Jesús psanmbe me ne lo xtol ne, psanwen me ne lo Dios; ni scaque nagon, ible me csilaa ne lo grëtaa guielnëdox ne csiaab Dios ygaa grë miech ntseeb. Ne nligaa, csaand me dzian ne guielnë co; sac gon, tel scataa mine been me por ne zeene nac ne tib miech ngoopdol, zeene scataa ntseeb goc ne blëënie ne Dios, ¿pe lel na dzigo ne laa ne biaanwenle lo Dios, laa ne biaanle zig tib zha ne peet xtold?

<sup>11</sup> Gacxe waa, niina ne psanwen Jesús ne lo Dios, none ine gley ne ne laa ne ngable lo Dios.

### *Zha nacne biaan dol*

<sup>12</sup> Znu gon nacne laa dol biaan: por mine been Adán bind me xtiidz Dios, min co nac ne biana. Ni por lëew pquiaqui laa guielgut biaanque, blozh ga grëse miech laa zho ret, sac grëse zho, tsod zha ne gunctald xtol.

<sup>13</sup> Desde hor co biaan runctal miech xtol zho. Grëse miech ne bre lo guidzliu, desde Adán haxta len dze ne laa Moisés pcaania ley, beenctal zho xtol zho, niicle ne guienpaa tib ley hor co nlu ne dola.

<sup>14</sup> Gacxe waa ye zho, grëse zho gut; niicle ne bdiitsd zho merpaa xtiidz Dios zigne been Adán.

<sup>15</sup> Nli tib guielnë ga psan Adán, per niinagaa mazdraa nroob guielnzaac ne rneedz Dios lo ne. Por falt ne been Adán, biaan grëse ne ne nac ne miech laa ne no guet; per niina ne biaad stib men ne beend ni tib falt, por min co laa Dios rquia zdoo ne grëse ne, laa me rneedz tib guielmban ndzon lo ne; lëe men co nac Jesús.

<sup>16</sup> Tibaque nac dol co been Adán, per grëse miech biabzi; sangue Jesús zeene laa me biaad, grëse ne ne nac ne miech psilaa me ne lo grëtaa xtol ne, psanwen me ne lo Dios.

<sup>17</sup> Dol ne beense Adán ga, min co pquiaqui grëse ne ne nac ne miech, laa ne biaan lадznia guielgut; sangue niina ne biaad Jesús, zrieelo ygaa ne tib guielmban ndzon. Guielmban ne ral zdoo Dios gdeed me lo grëse zha ne gbig lo me gun me zho perdon.

<sup>18</sup> Sca nagon naca: por falt ne been Adán ga, grëse ne ne nac ne miech laa ne biabzi, per zeene laa Jesús biaan, pquia zdoo me ne masaque me bdiizh grëse caxtigw ne riogual ne ga, laa me psanwen ne lo Dios parne grieelo ygaa ne tib guielmban ndzon.

<sup>19</sup> Golgan ganle, porne bdiits Adán xtiidz Dios, grëse ne ne nac miech laa ne goc zha ngoopdol; per scagaa, por bzoob Jesús grëse xtiidz Dios, zha ne gacladztaa, zrieelo guiaanwen zho lo me.

<sup>20</sup> Ible laa ley biaan, par glu ganle pa lotaa nac grë falt ne noyun miech lo Dios. Per niicle scataa nac grë dol co, per blu Dios ganle mazdraa rquia zdoo me miech.

<sup>21</sup> Masaque bnabey dol miech, pxeela zho nëz ne nitlo zho; sangue zeene laa Jesús biaad, psanwen me ne lo Dios, gane niina zha ne gnalotaa Jesús zgaa zho tib guielmban ndzon.

## 6

### *Zha ne mbanniele Jesús*

<sup>1</sup> Laa ne bdzianle ganle zha noxco-taa Dios ne. Nana, ¿pe zdieets ne dziunctalraa ne xtol ne zeena tsoxcoraa me ne?

<sup>2</sup> ¡Lëdraaw ga gon! Nodraa ne dzi-uun ne dol, sac gon, laa ne nacle niina zig tib zha ne gutle nëz lo dol.

<sup>3</sup> Golgan ganle, zeene laa ne bziaab xnëz Jesús ni brobnis ne, rriequia gut ne ga zigne gut me.

<sup>4</sup> Zeene brobnis ne rriequia bioliu ne ga, zigne bioliu Jesús. Ni zigne brieaban Jesús (por poder ndzon ne rap Dios), scaque ne rriequia brieaban ne, stible guielmban ne rdziaap ne.

<sup>5</sup> Ni zigne sca rriequia gut ne zeene gut Jesús, scaquegaa ndionpaa ne zbeeban me ne zigne brieaban me.

<sup>6</sup> Ndion ne ganle, miech ne goc ne glo zeene scataa bional ne guielntseeb, rriequia ye miech co pquianie me lo cruz. Ga bnitlo mine goc ne ga, zeena ygadoodraa ne lo dol;

<sup>7</sup> sac gon, deque bnitlo grë mine goc ne glo, grielodraa gnabey dol ne.

<sup>8</sup> Nana, telne scale gutnie ne Jesús, ndionpaa ne ib zbannie ne me.

<sup>9</sup> Ndion ne ganle brieaban Jesús, ni gdzindraa dze guet me. Grielodraa pe gun guielgut me.

<sup>10</sup> Tibaque vult gut me bdiizh me xtol grëse miech, sangue niina mban me ni Dios mbannie me.

<sup>11</sup> Scagaa to nasca, golguien ganle laa to gutle lo dol, nodraa gnabey dol to stib, sinque laa to mbanle niina par gun to mine rnabey Dios. Golguien ganle, Jesúsle nacie to.

<sup>12</sup> Nana sca, gdeetraa to diidz gnabey dol xcuerp ben to i, tso to gun to grë ncuaane ndzinlid ne racladz xcuerp to.

<sup>13</sup> Ib gdeete to diidz guiab to lo dol stib, gun to grë guielntseeb; sinque golsan to ladznia Dios, ine golgun grë mine racladz me. Golguien ganle, laa to gutle lo grë dol, Diosle mbannie to niina;

<sup>14</sup> zeena scagaa gnabeydraa dol lo to, zigne beena to zeene scataa bioxco to mine rnabey ley. Sac gon rnabeydraa ley to niina, laa Dios blule ganle pa lotaa nquialadz me to biaadsilaa me to.

Nli nquialadz Dios ne, rnabeydraa ley ne.

<sup>15</sup> Per nana, ¿pe ne rnabeydraa ley ne, pe ne nquialadz Dios ne dzieets ne dziuun ne grëtaa ncuaane gunctal xtol ne? ¡Lëda ga gon!

<sup>16</sup> Nanle to ganle, tib zha ne nanle cho lo yquia zho dziin, lo zha co ngadoo zho ni mine rnee zha co none gun zho. Zig nac zha ne ngadoo lo dol, niapse dol run zho ni mine tsieguial zho laa zho nitlo; sangue zha ne run mine rnabey Dios, scaania Dios zho zig tib zha ne peet xtol.

<sup>17</sup> Nli glo lo dol ngadoo to, per xquizh Dios zeene laa zho biadseed to Xtiidz me gocnan to zha laa to lo dol, laa to bliladza ni noxco to mban tow niina.

<sup>18</sup> Ni zeene laa to brieeladznia dol, laa to bgab lo Dios; zeena mine rnabeyle me mincole gun to.

<sup>19</sup> Znu bzet naa grë min rii lo to, zeena guien to zha naca.

Nana sca, zigne scataa bio to ladznia dol been to grëtaa guelyozh, grëtaa guielntseeb, scagaa niina golsan to ladznia Dios, golban zigne rnabey me, zeena lozh guiaanmbe to zigne racladz me.

<sup>20</sup> Zeene scataa ngadoo to lo dol, ib wbande to zigne rnabey me.

<sup>21</sup> ¿Pe nadien needz dol lo to? Lëe gdib mine ngaa to laa to nitlo. Zig nac niina, haxta rtoladz to zeene rsoladz to grë ncuaane been to hor co.

<sup>22</sup> Sangue niina, ne laa to brieeladznia dol laa to ngab lo Dios, ible ziaanmbe to zigne racladz me ni zgaa to tib guielmban ne gdzind dze lozh.

<sup>23</sup> Sac gon, zha ne runctal xtol, lëe gdib mine tsieguial zho laa zho nitlo; sangue zha ne gbig lo Jesús, mine ral zdoo Dios ygad me lo zho nac tib guielmban ne gdzindraa dze lozh.

## 7

<sup>1</sup> Bets, bzian, to ne nac to zha ne runbey Xley Dios, nanwen to ganle, zeene zombanse miech dzigo rrieelo rnabey ley co zho.

<sup>2</sup> Zig nac tib mgui ne rtsieelnia, rnabey ley ne mguise gbannie wnaa ne nac tsieel mgui. Per tel gzoob ne glo mgui guet, dzigo gacdraa gnabey ley

ne mguipaa gbannie wnaa co; telne gacladz zho ctsieelnia zho stib mgui, zaca.

<sup>3</sup> Nli nonguielda ga gun wnaa ctsieelnia zho stib mgui laga bii zomban tsieel zho; laa zeene gutle tsieel zho, led dol draaw yguib zho stib zha ne ctsieelnia zho.

<sup>4</sup> Bets, bzian, scadaa nagon bzhaac to. Zeene sca gut Jesús, rrieequia ye to gut ga gane niina ngadoodraa to lo ley, niicle lëegaaw grieelod gnabeya to. Jesús, men ne brieeban ga, mele nac tsieel cub to niina. Niinasi, zrieelole gban to zigne racladz Dios;

<sup>5</sup> sac glo (zeene scataa bdziuuntal ne xtol ne, bdziuun ne grëtaa ncuaane nonguieldraa niicle ne ndionpaa ne pe nac mine zhobnee lo ley no dziuun ne), niapse grë ncuaane nxeel ne zatne nitlo ne, ncuaan co bdziuun ne.

<sup>6</sup> Blactaa bgadoo ne lo ley, sangue niina rrieequia gutle ne nëz lo ley, laa ne mbanle zigne rnabey Espiritu Sant.

#### *Rca dol gac mine rnabey ley*

<sup>7</sup> Nana, ¿pe zdzieets ne dzigo por leypaa rdziuuntal ne xtol ne? ¡Coo, led scada! Tel naa gon, ib niacnand naa pe nac dol telne guiend ley. Niacnand naa ne dol ga gzoobladz ne chen ben, telne niacnand naa ne rnee lo ley: “Gzoobladz luu chen ben.”

<sup>8</sup> Zeene gocnan naa zha nac ley, dzigora a bien naa niapse dol nac mine noyun naa; sac zeene guiend ley, rlud pe nac dol.

<sup>9</sup> Glo zeene riend naa zhapaa nac ley, tibaque rzaac naa ib peet dol rapd naa; per zeene gocnan naa zha nac ley, bien naa ne ib raguial naa nitlo naa, sac dol quiayun naa.

<sup>10</sup> Nli laa ley biaan zeena guien ne zha grieelo ygaa ne guielmban, per lel bluw ne raguial naa nitlo naa sac ngoopdol nac naa.

<sup>11</sup> Ne nligaa bdziitnie dol naa, mine rsopaa ley diidz nod gun miech mincopaa ben naa; ni blozh ga, lëeque ley blu ne ib raguial naa nitlo naa.

<sup>12</sup> Niicle ne scaw, per Dios psana ni rquiin grë mine zhobnee low.

<sup>13</sup> Nana dzieets ne: conque telne wen nac ley, ¿zha nac dzigo ne lëepaaw rlu ne rioguial ne guet ne? ¡Coo, led scada! Sinque znu naca: dol pteedquie ne lадznia guielgut. Ga rlu ganle zha nactaa dol, sac gon lëeque ley pquiin dol pteedquiew ne lo guielgut. Ga blu ley ganle zha ntseebtaa nac dol.

<sup>14</sup> Gotsaa gwi ne ganle wen ley, led leyd rxin sinque ne rxin; sacne rrieequia ngadoo xcuerp ne lo dol.

<sup>15</sup> Tel naa, riend naa pe nacne znu rac naa, niicle ne racladzpaa naa gun naa ncuaane nonguiel per nëda, lel ncuaane rzoobladz naa min co run naa.

<sup>16</sup> Grë ncuaane run naa, now rienpaa naa nonguielda; haxta guic naa, zdoo naa, rien naa wen ley sinque naa quiaguits mine rnabeya.

<sup>17</sup> Nana, niicle ne rien naa scaw per gacd pe gun naa, sac ngadoo xcuerp naa lo dol, masaque dol rcheep naa run naa ncuaane ndzinlid.

<sup>18</sup> Rien naa miech ngoopdol nac naa, ni palal ncuaane ndzinli gacd gun naa; niicle ne racladz naa gacwen naa, per rrieeloda.

<sup>19</sup> Zeene racladz naa gun naa ncuaane rquiin, per rrieelod gun naaw; laa zeene ni naa gundraa naa ncuaane ndzinlid, lel mincole run naa.

<sup>20</sup> Ni ne znu lel grë ncuaane racladz naa, min co run naa, gase rlu ne led naadse quiayun grë ncuaan co; sinque dol quianabey xcuerp naa run naaw.

<sup>21</sup> Rien naa niicle ne racladzpaa naa gun naa ncuaane wen, per lel guielntseeb run naa.

<sup>22</sup> Zdoo naa, guic naa, rleynie naa Xley Dios, racladz naa gban naa zigne rnabey me;

<sup>23</sup> per dzigo rtse dol lo naa, rrieelod gun naa ncuaane nonguiel. Masaque dol rnabey xcuerp naa, racladz naa gun naa ncuaane rnabey Dios; sac ngadoo xcuerp naa lo dol.

<sup>24</sup> ¡Probsaxe naa, znutaa nac xcuerp ngoopdol naa nu! ¿Cho samiech ne dien grieelo csilaa naa low; sac

ncuaane gnitlo naa min co mazdraa rdziladza?

<sup>25</sup> ¡Xquizh Dios pxeel me Jesús bi-aadsilaa me ne lo dol!

¡Jesús nac men ne psilaa naa!

(Znu nagon rzac naa: rien naa nonguiel gun naa mine nac Xley Dios, per xcuerp naa lel laaw zienal mine rnabey dol.)

## 8

### *None gban miech zigne racladz Espíritu Sant*

<sup>1</sup> Laa ne gocndion nasca ganle, zha ne ngab lo Jesús ndziibdol draa zho,

<sup>2</sup> sac zha ne ngab xnéz me, laa Espíritu Sant psilaale zho lo dol, laa me psilaale zho ladznia guielgut, laa me bdeedle tib guielmban cub lo zho.

<sup>3</sup> Wlaltaa ib brieelod ley nsilaaw ne lo dol, gane mazd laa Dios pxeel Xpëed me biaadsilaa ne. Brieelod ley, sac grëse miech laa ne tsienal zho mine rnabey ley, mazdraa zienal zho ncuaane runctal xtol zho. Gane zeene pxeel Dios Xpëed me, goc me miech (lëeraasi ni tib dol beend me), men co gut bdiizh grëse xtol ne, dzigo ga laa me psilaa ne ladznia dol.

<sup>4</sup> Gacxe waa, niinasi zrieelo dziuun ne grë mine rnabey ley, per none gdeed ne diidz guional ne mine rnabey Espíritu Sant, ni lalnu gdeete ne diidz gac mine racladz xcuerp ne nu.

<sup>5</sup> Grëse zha ne mban zigne racladz xcuerp ngoopdol zho, loxaque grë min co rioxco zho; laa zha ne mban zigne racladz Espíritu Sant, mine rnabey Espíritu Sant rioxco zho.

<sup>6</sup> Zha ne sca rioxco loxaque mine racladz xcuerp ngoopdol zho, nöz ne nitlo zho ga zie zho; sangue zha ne rioxco mine racladz Espíritu Sant, laa zho zie nöz ne ygaa zho tib guielmban; peet dzeb, peet zhgab ctsebdraa zho.

<sup>7</sup> Ni stiba, zha ne rioxco loxaque mine racladz xcuerp ngoopdol zho, rlëenie zho Dios ga, sac nöd zho gban zho zigne rnabey xley me; ni niicle gacladzga zho, grieelod zho.

<sup>8</sup> Mincoxe waa, ib rzacd zdoo Dios grë ncuaane run zho.

<sup>9</sup> Sangue to, mbandraa to zigne racladz xcuerp to, sinque laa to mban zigne racladz Espíritu Sant. Sca mban to, sac Espíritu Sant nacie to. Nanle to ganle zha ne nacie Espíritu Sant, nliid xnéz Jesús no zho.

<sup>10</sup> Ni to ne nac to zha ne nole xnéz Jesús, ible zgaa to tib guielmban ndzon, sac laa Dios psilaale to lo dol. Nli zig nac xcuerp to, ncuaane nitlo naca, sac por dol biaan sca no gaca; sangue zhiespírituw, nitloda.

<sup>11</sup> Dios bleeban Jesús, ni scagaa telne nli nacie to zhiEspíritu me, meque cueeban to.

<sup>12</sup> Bets, bzian, nodne dziuun ne ncuaane racladz xcuerp ngoopdol ne, zig nac zeene pe nzëeb ne low.

<sup>13</sup> Sac telne grë ncuaan co tsienal to, ible znitlo to; sangue telne gnab to gacnie Espíritu Sant to csaan tow, dzigo ible zgaa to tib guielmban.

<sup>14</sup> Sac grëse zha ne zienal zigne racladz zhiEspíritu Dios, ga rlu ne nli-paa xpëed Dios nac zho.

<sup>15</sup> Golguien ganle, laa Dios bneedz zhiEspíritu me lo to, sac xpëedle me nac to niina. Tsode to sca gdiebd to me, zig nac zeene cho tib ngundziin win nac to lo me. Xpëed me nac ne, gacxe waa zac tibliladz gnee ne lo me guiab ne: “¡Papá yeen!”

<sup>16</sup> Ni Espíritu coque runquien ne ne nli xpëed me nac ne.

<sup>17</sup> Nana ne laa ne nacle xpëed Dios, scagaa dzigo ye ne ible zgaa ne grëtaa ncuaane bdeed me lo Jesús.

Nli zgaa ne lo grë guielndzon ne no Jesús ga, per scagaa none dzian ne grë guielnë niina ne laa ne ngab lo me.

### *Guielndzon ne naraa guiaad*

<sup>18</sup> Guielnë ne dzian ne lo guidzliu rii, loxaque ne ngab ne lo Jesús, led ncuaane rnad ga; mazdraa nroobdo nac lo guielndzon ne naraa dzian ne.

<sup>19</sup> Zig nac grëtaa ncuaane bzaa Dios, masaque quiambëznëw gdziin dze zeene laa grë zha ne nac xpëed Dios ygaa lo guielndzon co;

<sup>20-21</sup> sac gon, gal dze co laa guidzliu guiaanmbe lo grëtaa ncuaan paat



rquiind, lo grëtaa guielntseeb ne no low niina. Dios bdeed diidz biaan grë ncuiaan co low, per zeene gal dze co, zeene laa grë zha ne nac xpëed Dios laa lo grëtaa guielntseeb, yew laaw laa.

<sup>22</sup> Laga quiambëz grë ncuiaan co gdziñ dze co, masaque mban raca, rzaca zig rzac tib meñ wnaa ne quiayal xpëed.

<sup>23</sup> Ni ndion ne ganle, haxta ne, ne nac ne zha ne nacie Espíritu Sant (zeena glu ne ible zгаа ne grëtaa ncuaañe gneedz me), mban rac ne quiambiaaz ne gdziñ dze co, zeene laa Dios ctsëë xcuerp rii ne ni ycaania me ne zig xpëedpaa me.

<sup>24</sup> Ndion ne ible zbee Dios ne lo grëtaa ncuaañe rac lo guidzliu rii, per nana laa ne quiambiaaz dzianpaa ne gaca. Tib ncuaañe lëë ranle ne noyac, nod pe nacie yquiambëzraa new,

<sup>25</sup> per zeene quiambëz ne tib ncuaañe naraa gac, dzigo nodne guieed ne, sinque ine tiblique gac ne yquiambëz new.

<sup>26</sup> Ni scagaa zeene lëbdraa ne, rienndraa ne zha gun ne, Espíritu Sant nac meñ ne gacnieñ ne. Zig nac zeene gzodiidznie ne Dios, tel nesew nand ne zhapaa nonguiel gnee ne lo Dios, dzigo Espíritu Sant runcnee ne grë diidz ne riennd ne zha nac.

<sup>27</sup> Ni Dios ne nac me meñ ne nanpaa pe rza zdoo miech, rien me pe rnee Espíritu Sant, sac miñe racladz Dios gac miñ co rnab me.

### *Tsod ncuaañe yquiaaqui csaanladz Jesús ne*

<sup>28</sup> Ndion ne ganle, zha ne nli dib zdoo rleynie Dios, zha ne rioxco gac grë miñe racladz me, grëse ncuaañe rded zho, led lega rdete zhow, sinque no zaatne rquiina lo zho.

<sup>29</sup> Ni ndion ne ganle, zha ne nanle me ygab xnëz me, desde mazd glow, pso me zho gac zho zig nac Xpëed me Jesús. Lo grë zha ne nac xpëed me, Jesús nac meñ nroob.

<sup>30</sup> Ni grë zha co, laa me quiabedz zho, quiasilaa me zho lo dol, laa zho

noyaanwen lo me; zeena ygaa zho lo guielndzon ne no me.

<sup>31</sup> ¡Zha nactaa ncuaañe lëë run Dios! Nana, tel scataa racnie Dios ne, ¿cho nadien grieelo lega pe gun ne?

<sup>32</sup> Golgotsaa gwi ne ganle, haxta xpëed me bdeed me gut xcuent ne, grëse ne ne nac ne miech. Nana, ¿pe lel grë pe stib cos dzigo yquia zdoo me gneedz me lo ne?

<sup>33</sup> Ible Dios bzooblo ne, gacxe waa, ¡choot rieguaald glisqui gnë lëda nodziun ne! Sac gon, Dioszhal psanmbe ne lo dol.

<sup>34</sup> ¡Choot rieguaald ycaadzol ne! Sac gon laa Jesús gutle bdiizh me xtol ne; per brieaban me, ni na laa me zob cue Dios zaatne rieguaal me nac me meñ non. Ga no me quianab me lo Dios por ne.

<sup>35</sup> ¡Tibaque rleynie Jesús ne! Zeene nodzian ne guielnë, zeene mban rac ne, zeene rtsidil miech ne, ib guiabd ne togo bod rleynied me ne. Niicle zeene guieñdgaa pe gow ne, guieñd pe gacwxab ne, o noxtseebgaa ne guet ne, ib guiabd ne togo psaanladz me ne. ¡Tibaque rleynie me ne!

<sup>36</sup> Ni zig nac xcuent guielgut, laaw raquetaque lo Xtiidz Dios, zaatne rnee:

Grëse no ne nac no zha ne ngab lo luu, tibaque noxtseeb no lo guielgut; masaque rzac miech no zig rzac zho grë mëcwxiil ne golle guet.

<sup>37</sup> Niicxe peraa waa dieed ne, zdziun ne gan low ni palal csañwinda ne, sac Jesús nacie ne; ni rleyniedox Jesús ne.

<sup>38</sup> Nanween naa tsod ncuaañe yquiaaqui csaanladz Dios ne:

per ni guielgut,  
per ni guielmban,  
per ni anjl,  
per ni mendox,

per ni grë ncuaañe noyac niina, grëgaa ncuaañe naraa gaca.

<sup>39</sup> Niicle grë ncuaañe no glaa zhan gbaaw,  
niicle grë ncuaañe no guietraa zhan guidzliuw,  
niicle grëragaa ncuaañe bzaa Diosa.

¡Ni tiba ycada, sac tibaque rleyne Dios ne! Ni laaw blule me ganle, zeene pxeel me Jesús (men ne rnabey ne), men ne gut bdiizh grëse xtoꞤ ne.

## 9

### *Ible Dios bzooblo zha Israel*

<sup>1-3</sup> Bets, bzian, ¡blactaa racladz naa guien grëraa zha Israel cho nac Jesús! Rquianë zdoo naa zho nac zho menladz naa, tibaque mban rac zdoo naa rsoladz naa zho. Haxta Jesús, haxta Espíritu Sant nan ganle rquiad zdoo naa naa niicle maase gdzibdee miech naa, maase nitlo naa guia naa zaatne gandraa naa Dios, telne niaca por miñ co laa zho guien zha gbig zho lo Dios.

<sup>4</sup> Blactaa quiayacniën Dios zho, ni rond zho xtiidz me. Bzooblo me zho gac zho zha ne ygab lo me, haxta bzënie me zho, gon zho ganle men ndzon nac me; biaan zho diidz grë zho me zha mod gunlay me zho. Psañ me ley lo zho zeena guien zho zha gban zho, ni psañ me diidz lo zho zha gleyne zho me. Nzian grë ncuaane bnee me gdeed me lo zho.

<sup>5</sup> Lëë pxozgoldoo zho ga goc Abraham, goc Isaac, goc Jacob, ni lo dii co ga brieequia zha ne bded zig menlidz Jesús. Me nac Dios, me rnabey grëtaa ncuaane no, ni me rieguial gacnon gzataa dze. Ible sca rieguiala.

<sup>6</sup> Nana, no zho guiab godcaque grë mine bnee Dios ga ygaa zha Israel. Per led scada. Sinqe lëë miñ co rgaa zha ne nlipaa rnaló Dios, sac zha co nac zha ne nlipaa nac zha Israel.

<sup>7</sup> Nacda ne loxaque ziaad zho lo xtii Abraham, laa zho nacle merpaa zha Israel; sac gon, niicle ne nzian mëed pquianie Abraham, per rëb Dios loxaque Isaac gac cuent zig xpëed Abraham.

<sup>8</sup> Gase naganle rlu, zig nac niina, grë zha ne ziaad lo xtii Abraham, led grëd zho ngab lo Dios; sinque zha ne bzooblolé me zigne bzooblo me Isaac, zha co ngab lo me.

<sup>9</sup> Sac zig nac Isaac, ible Dios bnee lo Abraham grop Sar, ne laa Isaac gac mëed lo zho.

<sup>10-11</sup> Ni scasaque xpëed Isaac. Bdzin dze, zeene laa Isaac ptsieelnia wnaa ne lë Rebec, dzigo gop Rebec tibnëz mëedbgui.

<sup>12</sup> Bii zoney Rebec grop mëdyeen co, laa Dios bzooblolé win ne brieelë Jacob rëb me, ne ible Jacob gac zha non lo Esaú, win ne glo gal.

<sup>13-15</sup> Laaw zhobneeque lo Xtiidz Dios, zaatne znu rëb me: “Ible Jacob bzooblo naa beenlay naa, bzoblod naa Esaú.” Gard gal grop mëed co, per ni gard gacnan win zha nac guielntseeb, zha nacgaa guielwen, laa me bzooblolé tib win. Ga nagon, blu Dios ne mese nac men ne rieguial rzooblo tel cho zha ne ygab lo me, nacda por pe ncuaane noyun zho.

Nana, ¿pe zdieets ne guielntseeb ga sca run Dios? ¡Led guielntseebda! Tib vuelt rëb me lo Moisés: “Zha ne gacladz naa yquia zdoo naa, squia zdoo naa zho.”

<sup>16</sup> Ga nagon, zha ne runlay me, nacda porne zha rquiaguiba, o riox-cogaa zho ygaa zhow; sinque laa zho rgaaw, porne me rquia zdoo zho.

<sup>17</sup> Gotsaa gwi ne ganle zha beenndip me zdoo rey Egipt. Lo Xtiidz me zhobnee zeene rëb me lo rey co: “Ible laa naa bzo luu nac luu rey, luu yguib glu naa poder ne rap naa, zeena dib lo guidzliu guien miech ganle naa nac Dios.”

<sup>18</sup> Ga nagon rlu, zha ne gacladz me yquia zdoo me, rquia zdoo me zho; ni scagaa, zha ne gacladz me gunndip me zdoo, runndip me zdoo zho.

<sup>19</sup> Nana, no zho gnë: “Telne scaw, ¿pe nac dzigo rlisqui Dios mine run miech, tel mezhäl rnabey zha nac zho tib tib zho?”

<sup>20</sup> Per nana, ¿cho nac ne par glisqui ne mine run Dios? Zig nac tib guies ben, niacxe zlisquiw lo men ne bzaaw, guiaba: “¿Pe nacte znu bzaa luu naa?”

<sup>21</sup> Led zha ne run dziin co, zrieelo gzaa zho tib guies zigne gacladztaa zho; tib lë ben ne xen zho, zac gzaa

zhow tib guies niow, o gzaagaa zhow tib guies beelze.

<sup>22</sup> Scaquegaa nagon rzac Dios miech. Grë zha ne psanle me nitlo, ible rap me derech csiaabzhian me zho, glu me poder ne rap me; per laa me bii quaiyap zho paciens nieeda gdziñ dze co.

<sup>23-24</sup> Grëgaa zha ne bzooblo me ygaa lo guielndzon ne no me, zigtaa new ne nac ne zha Israel, zigtagaa zha stib guiedza; ible rap me derech bzooblo me ne, sac rquia zdoo me ne.

<sup>25</sup> Golsoladz ganle zha bzeet Osé, men ne biadteed xtiidz Dios padzeela. Bzeet me ible zbedz Dios grë zha ne nacd zha Israel ygab zho lo me, zeena gleynie me zho niicle ne rleynied me zho glo.

<sup>26</sup> Laa stib lugar bzeet Osé, zha bnee Dios lo zho, rëb me: “Ngabde to lo naa, per zdziñ dze ne laa to gac xpëed naa, ne nac naa Dios nguiamban.”

<sup>27</sup> Laa Isá stib men ne biadteed xtiidz Dios padzeela, zeene bzeet me zha Israel rëb me: “Niicle ne ndaldoo nac zha Israel pale yuzh ne ndxie ro nisdoo, per zhis zho gac zha ne ycaania Dios;

<sup>28</sup> sac ziaadyoble gun Dios xquielwxtis me lo guidzliu, zigne bneele me.”

<sup>29</sup> Min co ga bzeet Isá mazd glo, rëb me: “Telne niaca mine yquiad zdoo Dios zha Israel, znitlo me zho grëse zho zigne bnitlo me zha Sodom ni zha Gomorr.”

*Zha ne nacd zha Israel laa zho wbig lo Dios*

<sup>30</sup> Nana guiab ne: ¿Zha nac dzigo ne rcaania Dios zha zit? Laa me rcaania zho niina sac dib zdoo zho rnalo zho me, niicle ne waltaa ib bioxcod zho dien zha nsilaa me zho lo dol.

<sup>31</sup> Laa zha Israel, niicle ne rioxco zho run zho grë mine rnabey ley parne csilaa me zho, per ib laad zho lo dol sca.

<sup>32</sup> Laad zho, sac zienied guic zho gnalo zho Dios, rzac zho por grë ncuaane gunse zho laa zho laa lo dol. Min cocxe waa, zeene laa Jesús biaad,

bzhaac zho me zig tib quie ne rriel ni ne riab ne liu.

<sup>33</sup> Lëe min co ga zhobnee lo Xtiidz Dios, zaatne rnee: Sxel naa tib men lo zha Israel, me gac zig tib quie ne griel ni zho; sangue zha ne dib zdoo gnalo me, tsod dze ne tso zho guielnë, guiab zho pe nacne bnalo zho me.

## 10

<sup>1</sup> Bets, bzian, ne nlipaa rzaac naa tebaa zha laa grëse zha Israel lo dol, tibaque rnab naa lo Dios guien zho gbig zho lo me, zeena laa zho lo grë xtol zho.

<sup>2</sup> Parga nli ran naa noxco zho gbig zho lo me; per rund zho mine no gun zho.

<sup>3</sup> Ib riend zho zdoo Dios ral rsilaa me miech lo dol, laa zho rzac por mine gun zho laa me csilaa zho. Ib nëd zho gun zho mine racladz Dios.

<sup>4</sup> Sac gon, laa Dios racladz Jesús gnalo zho zeena guiaanbe zho lo grëse xtol zho; sac Jesússe nac men ne brieelo been grëse mine rnabey ley.

<sup>5</sup> Bzeet Moisés rëb me, zha ne gnalo ley ne lëew csilaa zho, none gun zho grëse mine rnabeya;

<sup>6</sup> sangue zha ne gnalo Jesús ne me csilaa zho, nacda dien peraa gun zho. Nacda ncuaane tso zho guiab zho, tebaa zha tsie zho lo me gbaa, gnab zho csilaa me zho (ncuaane gacda ga, dzigo rriequia racladz zho quiet me ga stib);

<sup>7</sup> o guiaabgaa zho tsie zho zaatne noliu grë ngutoo, tsienab zho lo me csilaa me zho (ncuaane gacdaque ga, ni stiba led gad no me, laa me brieebanle).

<sup>8</sup> Rquiind paraa tsieguib zho csilaa me zho, zig rzac zho zdoo zho, zig rzac zho ro zho, sca gax lo zho zo me quiambëz me csilaa me zho. Min co nac mine noseed no miech, rnee no lo zho;

<sup>9</sup> Zha ne cueero guiab zho Jesús nac men ne rnabey lo xquielmban zho, ni dib zdoo zho gliladz zho nli bleeban Dios me, dzigo silaa me zho lo grë xtol zho.

<sup>10</sup> Sac none dib zdoo ne gliladz ne, dzigo sanmbe Dios ne lo dol; ni none cueero ne pe nac mine riladz ne, dzigo scaania me ne.

<sup>11</sup> Rnee lo Xtiidz me: “Zha ne dib zdoo gliladz Jesús, quitnied me zho.”

<sup>12</sup> Grëse miech, niicle zha Israela, niiclegaa zha stib guiedza ible sca ycaania me zho, sac led yed me rbe; me rnabey zho grëse zho, ni grëtaa ncuaane rap me, zdeed mew lo zha ne gnaba lo me.

<sup>13</sup> Rnee lo Xtiidz me: “Grëse zha ne gnab lo Dios csilaa me zho lo dol, ible silaa me zho.”

<sup>14-15</sup> Nana, no zho gnë: ¿Per zha gnab zho lo me, ni runbeyd zho me? Nli gunbeyd zho me, tel niaca mine gard cho cxeel zha ne tsienee Xtiidz me lo zho, parne gon zho cho nac me. Ni min co rzeet Isá, zeene rëb me: “¿Zha wentaa ziaad zha ne ziaadnie Xtiidz Ndzon Dios!”

<sup>16</sup> Rgaaz Xtiidz Dios, per led grëd zho rzoobdiaga, zig rbiireque Isá, rnee me: “Dios, bui ganle choot nëd gliladz Xtiidz luu, mine rne naa.”

<sup>17</sup> Sac gon, parne dib zdoo ne gnalo ne Dios, ib none yquiaadiag ne Xtiidz me ganle cho nac Jesús.

<sup>18</sup> Zig nac zha Israel, ¿niacxe gard gon zho Xtiidz Dios? ¿Binle zhow! Blactaa zha ne ziyadnee Xtiidz me, haxta zaatne mazdraa zita, laa miech quiaayacnan Xtiidz me.

<sup>19</sup> No hor rne naa: ¿Pe ib riend zha Israel, telne gbigd zho lo me csilaa me zho, laa me csilaa miech stib guiedz? ¿Per riendle zhow! Sac bzeetle Moisésa padzeela, zeene rëb Dios laa me ycaania miech stib guiedz, zha ne ib peet riend; zeena tednë zdoo zha Israel, togo ziaa zho biini.

<sup>20</sup> Mincoque ga pquiaa Isá, zeene rëb Dios:

Grë miech ne ni zienied guic yguib zho naa, laa zho beenbey naa.

<sup>21</sup> Laa zha Israel, blactaa bzëeb nia naa lo zho ni naa niacnie naa zho,

per pa nion zho xtidz naa, lel gocntseeb zho lo naa.

## 11

### *Zha Israel ne wbig lo Dios*

<sup>1</sup> Per guiabd ne togo psaanladzle Dios zha Israel. Golgan ganle, zha Israelacxe waa nac naa, zha xtii Benjamín, zha xtii Abraham nac naa;

<sup>2</sup> dzigo led psaanladzd Dios zho (nac zho zha ne padzeelale bzooblo me ygab lo me).

Golsoladz ganle, zha rëb Dios lo Lí, men ne biadteed xtiidz Dios padzeela, zeene bzodiidznie Lí Dios

<sup>3</sup> grëtaa ncuaane noyun zha Israel, ptsil zho zaatne riegan grë miech me, beet zho grë zha ne pxeel me noteed xtiidz me, ni laa zho quiana laque gut zho Lí. Rzac Lí guien draa zha ne ron xtiidz me,

<sup>4</sup> dzigo hor co rëb me lo Lí: “Led tibd luu riaan, no zgadz mil zha ne gard yquitsgzhil lo Baal, naa bzooblo zho ygab zho lo naa.”

<sup>5</sup> Scaquegaa niina nagon led grëd zha Israel psaanladz Dios, no palal zha ne pquia zdoo me ble me zho ygab zho lo me.

<sup>6</sup> Rne naa pquia zdoo me zho, sac guiabd ne togo por demas wen zho gane ble me zho; sac gon, tel por wen zhow, nlid dzigo ne rquia zdoo me zho.

<sup>7</sup> Znu nagon naca: Zha Israel ne bzooblome, zha cose guiaanwen lo me. Laa los demas zho, lel lozh gandip zdoo zho,

<sup>8</sup> zigne zhobneeque lo Xtiidz me, zaatne rnee: “Beenndip Dios zdoo zho, riend zho zha gbig zho lo me; niicle ne zob lo zho, per rac zho zig rac zha ne rand; niicle zob diag zho, per rac zho zig rac zha ne peet rond. Ni scataque nac zho haxta lo nadze.”

<sup>9</sup> Mincoque bzeet rey David, zeene rëb me:

Lëëque grë zhilni zho, lëëque grë ncuaane row zho, gac zig len doo ne, len guix ne tsietsobe zho;

zeena ygaa zho guielnë ne rieguial zho.

<sup>10</sup> Guiaan zho zig tib zha ne rold lo,



guiaan zho zig tib zha ne blozh blengw zhits.

*Psilaa Dios zha ne nacd zha Israel*

<sup>11</sup> Grë zha Israel ne sca gocndip zdo, guiabde to togo laa zho bnitlole ga. ¡Lëda! Sinque laa me bdeed diidz sca goc zho, zeena gbig grë zha stib guiedz lo me csilaa me zho lo xtol zho; ni tednëgaa zdo zho gan zho laa me rcaania zha stib guiedz.

<sup>12</sup> Nana, telne scataa guielnzaac ne bgaa miech stib guiedz ne znu racndip zdo zha Israel, ¿pe lelgue dzigo zeene laa zho gbiire guiaanwen lo Dios stib? ¡Zha naczhe grëraa guielnzaac ne ygaa miech!

<sup>13</sup> To ne nac to miech stib guiedz, led nanle to ganle, ible Dios bzo naa none naa Xtiidz me lo to. Scagaa naa, dib zdo naa rioxco naa run naaw,

<sup>14</sup> zeena togo soobladz palal zha ladz naa ye zho squi gbig lo Dios csilaa me zho lo xtol zho.

<sup>15</sup> ¡Que talzhe ndzona zeene laa zho gbiire gbig lo Dios stib! Nli laa Dios psaan zho, laa grëgaa miech stib guiedz laa zho biaanwen lo me. Gacxe waa, ¡tib guielbley nrooba zeene laa me ycaania zha Israel stib! Sac gon, rrieequia grieeban zho ga.

<sup>16</sup> Zigne pcaania Dios xmengol zha Israel bgab zho lo me, scaquegaa scaania me xpëed zho; sac gon, zig nac tib zhan yag, zeene ndaan low mine naaza len liu, ndaanaque zhicwa. Scaque nagon, zeene bzooblo Dios xmengol zha Israel, yele zho ga bzooblo me.

Nana, gzoob ne nac zha Israel zig tib zhan yag oliv: low nac xmengol zho, laa zho nac zhicwa.

<sup>17</sup> Bdziñ dze brug palal zhicwa, dzigo ga bguiid zhicw yag oliv dan; lëe yag oliv dan co nac to ne nac to miech stib guiedz. Sca nac ne laa Dios pcaania to zigne pcaania me xmengol zha Israel; ye to laa to nogaa guielnzaac co.

<sup>18</sup> Lëëraasi, guiabde to togo nonraa to lo zha ne nac zhicwa mine brug ga. Golguien ganle, por lo yag ndaan zhicwa.

<sup>19</sup> Nana, nend guiab to: “Per riogual now, gacxe waa no biaan xlugar zhicwa, mine brug ga.”

<sup>20</sup> ¡Golgap cuidad gon! Nli lëe biche zho, laa to biaan xlugar zho, porne bnëd zho nalo zho Dios zigne bien to rnalo to me; per golguien gacniatsde to.

<sup>21</sup> Golgan ganle, niicxe zha name zhicwpaa yag co nac zho ni ptiche me zho, ¡pelel to dzigo!

<sup>22</sup> Golwi ganle zha wentaa Dios, per scagaa rdziladzd me gats xtiidz me. Mincoxe waa gondzed me grë zha co, laa to gon wen goc me lo to. Lëëraasi none gon to mine rnabey me, sac gon telne gonde tow, scaque gandzed me to.

<sup>23</sup> Nana, zig nac zha Israel ga, telne gbiire gbig zho lo me, ible squiid me zho lo yag co stib. ¡Golgan ganle men nroob nac Dios!

<sup>24</sup> Niicxe to na, nac to zig yag oliv dan, pquia zdo me to pquid me to zhicw yag oliv wen co, ¡pelel zha Israel dzigo yquiad zdo me, gbiire yquid me zho lo yag ne nacpaa zho!

*Scaania Dios zha Israel ne bzozit lo me ga*

<sup>25</sup> Bets, bzian, laa naa gni lo to ganle zha nac mine no guic Dios gun me. Niicle ne rienð miecha niina, per racladz naa gacnan tow, zeena gacniatsde to ne squi bzooblo me to: Nli ndal zha Israel racndip zdo zozit zho lo me niina, per zeene laa grë miech stib guiedz blozh wbig lo me,

<sup>26</sup> hor co grëse zho, laa zho gbiire gbig lo me stib ycaania me zho. Zigne bzeetle zha ne biadteed xtiidz me, zeene rëb zho:

Guiedz Sión, ga grieen men ne cuee zha Israel lo xquientseeb zho.

<sup>27</sup> Dzigo laa Dios csilaa zho lo grëtaa xtol zho, zigne psanle me diidz lo zho.

<sup>28</sup> Len dze rii rlëe zha Israel ron zho none gnalo zho Jesús, par laa zho lo dol. Znu rac zho zeena gdeeda diidz gbig to lo Dios, nac to zha stib guiedz; sangue Dios rleyne me zho, sac scale rëb me lo grë pxozgol zho.

29 Me bzooblo zho, dzigo ible scaania me zho; sac gon, led yed me ctsë xtiidz.

30-31 Glo to nac zha ne ib bind xtiidz Dios, laa niinagaa na zha Israel nêd gon xtiidz me. Per zigne rquia zdoo me to niina, scaquegaa zdziñ dze ne yquia zdoo me zho.

32 Grëse miech, zigtaa zha Israela, zigtagaa tow ne nac to miech stib guiedza, laa Dios bneedz diidz sca gocntseeb to lo me, zeena grieelo glu me ganle ne lalga rquia zdoo me ne.

33 ¡Gotsaa gwi ganle zha men nroobtaa nac Dios! ¡Pa lotaa rac me, pa lotaa rien me! ¡Pa lotaa rioxco me miech! ¿Cho grieelo guien pe nac mine no guic me gun me, pe nacgaa gun mew?

34 Zigne zhobneeque lo Xtiidz me, zaatne rnee: “¡Choot nañd pe no guic Dios gun me! ¡Choot grieelod guiab lo me, znu znu been!

35 Wlaltaa choot gard pe gdeed lo Dios, par guiab ne laa Dios zëëb.”

36 ¡Peet gon nzëëbd Dios lo miech! Sac grëtaa ncuaane no, me psana, me naaza, ni me rnabeya.

¡Mese nac men ndzon, tibaque got-saa dziuunnon ne me! Sca rieguiala.

## 12

### *Golban zigne rdziladz Dios*

1 Bets, bzian, laa to gocnanle ganle pa lotaa nquialadz Dios to. Nana sca, dib nase to golsan to lадznia me, gac to zig tib gon mbe, tib gon ne gley me ycaania me. Sca glu to ne nli rleynie to me.

2 Ib tsienaldraa to grë ncuaane ndzinlid ne noyac lo guidzliu rii, grëse zhgab ne paat rquiind, golcueew guic to; zeena gban to zigne racladz me, ni guien to ganle zha wentaaw zeene zienal ne mine rnabey me.

3 Ne znu nac naa zha ne pquia zdoo Dios noyun naa dziin rii, nligaa laa naa rso diidz lo to, ndzinli golgac, ib glude to ncuaane ni nade to, sinque golguien cho nac to, zha rnalo to Dios.

4-5 Golgan ganle zha niaa xcuerp ne: nzian lë niaaw, ni tib tiba nose zaatne

rquiina; scaque nagon nac grë zha ne ngab lo Jesús, nzian nac ne, per tib tib ne nose zaatne rquiin ne, tsod zha ne yquiind. Grëse ne none gnalolsa ne grë zha ne nacgrë ne.

6 Tib tib ne bneedzse Dios guielbiini lo ne, par grieelo dziuun ne dziin ne pso me ne dziuun ne lo me. Gacxe waa,

zha ne pso me cteed xtiidz me, none gnee zhow zigne csiaab mew guic zho;

7 zha ne pso me gun ncuaane yquiin lo grëraa miech, none gun zhow.

Zha ne pso me cseed miech, none min co gun zho;

8 zha ne pso me gdeedlban miech, none lban gdeed zho.

Zha ne pso me ygad, none dib zdoo zho ygad zho;

zha ne pso me so gnabey, none ndzinlise gnabey zho;

zha ne pso me cchoobladz zdoo zha ne mban noded, none nley gac zho tsienee zho lo miech.

9 Dib zdoo to golleynie samiech to. Gandzede to grë ncuaane ntseeb, niapse ncuaane rquiin goltsienal.

10 Ine niowse golleynie grë zha ne nacgrë to, gacnguizhde to, quitniede to zho.

11 Nguieel golgac, gacmbechde to, dib zdoo to goltsoxco golgun mine nac xtsiin Dios.

12 Nley golgac lo guielmban rii, golsoladz ganle zha nactaa grë ncuaane no gneedz Dios lo to; golxecw lo grë guielnë ne gan to; tibaque golzodiidznie Dios.

13 Goltsoxco xliaadz grë zha ne nacgrë to ngab to lo Dios; zaacse golcuëzlo zha ne ziaadted lidz to.

14 Grë zha ne rtsidil to, laa ne gdzibdee to zho, golnab gunlay Dios zho.

15 Zha ne no guielbley, golgacnie zho lo xquielbley zho; zha ne nogaa guielnë, golgacnie zho lo xquielnë zho.

16 Gacniatsde to. Grë zha ne rzac miech peet nond, goltsieelsa zho; guiabde to to nac zha ne racraa. Niowse golbannie zha ne nacgrë to.

17 Zha ne csacsi to, gunde to ne yeque to csacsi zho. Goltsoxco wen golgac lo grëse miech.

18 Tilniede to samiech to, goltsoxco tibaque wen golbannie zho.

19 Golguien, zha ne csacsi to, ib guiabde to ne tozhal ctsire guielnë co, sinque golsana lадznia Dios, metaa nan zha gun me xquielwxtis me; zigne ziaad lo Xtiidz me zeene rëb me: "Naa raguial gun guielwxtis, naa gunquizh miech tel pe nac dol ne zëeb zho."

20 Gacxe waa, zha ne rlëe lo luu, zeene gan luu mban rac zho rcaabedz zho, mazd bdeed ncuaane gow zho; gangaa luu mban rac zho rnab zhis zho, bdeed ncuaane guie zho. Sac zeene sca gun luu, stoladz zho csoladz zho mine been zho luu; rrieequia gui ga cuib guic zho."

21 Golguien sca, niapse guielwen goltsenal, zeena sca ycuëez to lo guielntseeb. Gdeete to diidz ne ye to gun guielntseeb.

## 13

### *Golgon mine rnabey wxtis*

1 Grëse to none gon to xtiidz zha ne nacpaa wxtis. Sac grëse zha ne nac wxtis, ible Dios rdeed diidz ne laa zho rac dziin co.

2 Gacxe waa, zha ne racndaan lo wxtis, rrieequia ye lo Dios ga racndaan zho; ni zha ne racndaan, lëeque zha rguib ted zho caxtigw ga.

3 Golgan ganle, ible laa wxtis zo, par zha cobey caxtigw ne tsieguial zha ntseeb. Telne racladzde to sca tsoxtseeb to lo wxtis, zaacse golgac; scagaa zha, tsod pe nacne ygaal zho to.

4 Dios psan rzo zho ni zha rteedlo to, ni scagaa, telne pe guielntseeb ne gun to, zhaque gnabey pe caxtigw ne yga to; sac gon, ible laa Dios bzo zho gun zho guielwxtis.

5 Gacxe waa, ib none gon to mine rnabey zho, zeena tsoxtseebde to lo zho, ni scagaa niicle nëz lo Diosa in tiblise no guic to.

6 Scaque dimi ne no gdeed to lo zho, goldeeda; sac rquiuin dimi co parne

grieelo gun zho tel pe nac dziin ne no gun zho.

7 Golguien sca, dimi ne no gdeed to lo zho, goldeeda; mine rnabey zho to gun to, golguna. Golleynie zho, quitniede to zho, golguien zha non nac zho.

### *Golleynie samiech to*

8 Grë ncuaane riegual to gun to, golgungazha zeena bdedgaw; sangue samiech to, none tibaque gleyne to zho. Zha ne rleynie samiech, grële mine zhobnee lo Xley Dios ga quiayun zho.

9 Sac telne rleynie to samiech to zigne rleynie to to, nod pe nacne csacsi to zho; guiab to:

laa to yquidie zho,

laa to gut zho,

laa to cuan zho,

laa to tsonie tsieel zho,

gzoobladzga to grë ncuaane quianie zho.

Gacxe waa, zha ne rleynie samiech zigne rleynie zho zho, grële mine zhobnee lo Xley Dios ga quiayun zho.

10 Zha ne rleynie samiech, rsacsidraa zho zho; ni min co rnabey Dios. Gacxe waa, grëse ne none gleyne ne samiech ne.

11 Ib none gban ne zigne racladz Dios, golle na tsaa ne biini; sac gon, laa dze ne ycaania Dios ne bii ziaadgaxraa, lëdle zeene psilo rnalo ne me.

12 Dziuun ne cuent laa guieel lozhle ted, laa biini ne guini liu dze ndzon co ziaadle; gacxe waa, ni lalnu guionald ne mine racladz mendox, sinque mine racladz Dios, min co golgotsaa dziuun ne.

13 None ndzinli gban ne:

dziuund ne guielgonziu,

dziuund ne grë lni yozh,

yquiangobd ne zha ne led tsieeld ne,

dziuund ne grë guielyozh ne racladz xcuerp ne,

dilnied ne samiech,

glëenied ne zho zeene stib noded zho.

14 Golgotsaa gnab ne lo Jesús sca, zig zie dze lozh csanmbe me xquielrien ne, csanmbe me zdoo ne, gac ne zigne racladz me. Dziuundraa ne grë

ncuaane ndzinlid ne racladz xcuerp ne.

## 14

*Gzeed zdoo to mine run zha ne nacgrë to*

<sup>1</sup> Golcaania zha ne gard tsoguicpaa zha nac Xtiidz Dios. Telne no palal mine rililadz to zhaa rzac zho, glisquide tow lo zho.

<sup>2</sup> Gzoob ne, no to rzac peet nacda gow to grë lose guielwagw, laa zha ne na gard tsoguicpaa Xtiidz Dios, rzac-gaa wena telne scuaan guizhyese gow zho;

<sup>3</sup> ga nagon, ni stib ni stib nod pe nacne glisqui dien cho pe row, dien cho pe rowdga; sac gon grëse to, Dios bzooblo to ngab to lo me.

<sup>4</sup> Nana zig nac zho, lo Dios ngab zho, led lode tow; ¿cho nac to dzigo tso to glisqui to dien pe run zho? Dios nac men ne nan telne lëew o lëdgaaw ga quiayun zho; men nroob nac Dios, me gdeed guielbiini lo zho guien zho gban zho zigne racladz me.

<sup>5</sup> Scaque, no zho zienal dien pa dzepaa none gleyne zho Dios, nogaa zho rnee zac tel pa dzetaa gleyne zho me. Per peet nacd ga, zac tib tib zho gunse zho mine rzac zho rdziladz me.

<sup>6</sup> Tel pa dzetaa wena, totsaque run zhow par gunnon zho me. Scaquegaa guielwagw, wena zha ne gow grëlosew; niicle zha ne ncueegaa ncuaane gow, wenaquew, totsaque run zhow par glu zho ne rleyne zho me, ni rdeed zho xquizh lo me.

<sup>7-8</sup> Sca nagon naca, per led min cod dzieets ne dziuun ne mine gacladztaane. Grëse ne ne nac ne zha ne ngab lo Dios, laa ne mban par dziuun ne mine rnabey Jesús, ni zeene guetgaa ne, lo me none gdziñ ne. Gacxe waa, niicle niina ne zomban new, niicle zeene gutlegaa new, lадznia me no ne.

<sup>9</sup> Sac gon, tel Jesús gut me ni brieeban me; gacxe waa, me rnabey ne grëse ne, zigtaa zha mbana zigtagaa zha guta.

<sup>10</sup> Jesús rnabey ne tib tib ne. Gacxe waa, nonguielda glisqui to lo zha ne

rund mine run to; nonguielda por mincose sac to zho zig zha ne peet nond, tso to gneedraa to lo zho. Ni stiba, gal dze ne laa Dios gun guielwxtis, grëse ne laa ne none gacredz lo me.

<sup>11</sup> Zigne raquietaque lo Xtiidz me, zaatne rnee me:

Naa nac Dios mban, gneli naa lo to ganle:

grëse miech, ible squitsgzhib zho lo naa,

cueero zho ne nli naa nac Dios.

<sup>12</sup> Sca nagon gaca, tib tib ne ib laa ne no cueero lo me tel zha wban ne.

*Csande to zdoo zha ne nacgrë to*

<sup>13</sup> Nana sca, zha ne sca rund grë mine run to, ible glisquidraa tow lo zho. Golguien, gunde to ncuaane rgobey to yquiaaqui gunctal zho xtol zho, o csaangaa zho Xtiidz Dios.

<sup>14</sup> Tel naa, nannpaa naa led dolđa gow ne grë lose guielwagw; sac niicle Jesús scaque nac xtiidz me. Sangue zha ne rzac dolđa, mazd gowd zhow; sac tel laa zho gowa, xtol zho ga gunctal zho.

<sup>15</sup> Zig rne naa ga led dolđa, per telne xtsiinpaa row to tib ncuaane rquiaaqui rсан to zdoo stib zho, ga rlu to ne rleyniede to zho. ¿Golguien sca, gowde to ncuaane yquiaaqui sozit zho lo Dios! Sac gon, blactaa guielne ne bded Jesús psilaa me zho.

<sup>16</sup> Ib gunde to grë ncuaane yquiaaqui gneenë miech to, niicle ne nannpaa to led dolđa.

<sup>17</sup> Zha ne ngab lo Dios, mine none tsienie guic zho nac ne ndzinli gban zho, tilnied zho samiech zho, ine nley gac zho (min co nac mine rdeed Espíritu Sant); led tsod zho dien pe zac gow zho, pe zac guie zho, pegaa gacda.

<sup>18</sup> Sca rdziladz Jesús, ni zha ne sca gban, zleyne Dios zho, niiclegaa grë miecha zleyne zho zho.

<sup>19</sup> Goltsoxco sca, gunde to ncuaane codil to grë zha ne nacgrë to; zeena tipse gac to lozh tsoguic to zha racladz Dios gban to.



<sup>20</sup> Ib gunde to, ne por tib guielwagw codil to grë zha ne ngable lo Dios. Zig rnele naa ga, grëlose guielwagw mbew, peet nacda gow new; sinque mine nonguielda, nacne gow ne mine nanpaa ne yquiaaqui csañ ne zdoostib zho.

<sup>21</sup> Mincocxe waa, mazd gowde to pe scuaan bëel, guiede to nziu, telne min co yquiaaqui gunctal to xtol zho; ni tel pe grëraa ncuaane nan to tsod zdoozho, gunde tow.

<sup>22</sup> Niicle ncuaane nanpaa to dolda gun tow, niiclegaa nëz lo Diosa led dolda; per mazd gunde tow zeene zo zha ne rzac dola. ¡Wen zie zha ne sca niicle nanpaa zho dold nac mine gun zho, per rund zhow, parne gunctald zho xtol zho!

<sup>23</sup> Sangue zha ne racchop guic riend zho dien pe zow zho tib guielwagw, ni lozh ga row zhow, runctal zho xtol zho ga; sac beend zho mine rzac zho rdziladz Dios. Grëse ncuaane rzactaa zho wend ni gun zhow, xtol zho ga gunctal zho.

## 15

### *Golgacnie zha ne nacgrë to*

<sup>1-2</sup> Golguien sca, to ne nac to zha ne dziitsle zo lo Xtiidz Dios, golgacnie grë zha ne gard sodziits lo Xtiidz me. Golgun ncuaane tso zdoozho, ncuaane yquiin lo zho, zeena lozh guien zho zha gnalo zho Dios; led tsode to gun to ncuaane yquiinse lo to.

<sup>3</sup> Golgan ganle, niicle Jesús a bguibd me niac ncuaane nquiin lo me. Zigne raquietaque lo Xtiidz Dios, zaatne rnee: “Grëtaa diidznë ne rnee zha ne rlëe lo Dios, grësew pcon zho me.”

<sup>4</sup> Grëse mine raquiet lo Xtiidz Dios, padzeela pquiaw; ni ib laaw pquia zeena gacndion ne zha no gban ne. Lëew rnee none nley gac ne, lëew rnee guieete ne yquiambiaaz ne ygaa ne grë mine bzeetle Dios.

<sup>5</sup> Dios men ne rneedz guielbley co, men ne racniën ne guieete ne, me gacniën to niowse gbannie to grë zha

ne nacgrë to. Golleynie zho zigne rleynie Jesús to,

<sup>6</sup> zeena grëse ne tipse gac ne dzioolnie ne Dios, PxoZ Jesús, men ndzon ne rnabey ne.

### *Grëse miech noyon Xtiidz Ndzon Jesús*

<sup>7</sup> Golguien sca, grëse zha ne nacgrë to, golcaania zho zigne pcaania Jesús to. Sca golgun, zeena xoobnenraa lë Dios.

<sup>8</sup> Golsoladz ganle, zeene biaad Jesús nroob ncuaane been me lo zha Israel, me biaadgun grëtaa mine bzeetle Dios padzeela. Ga blu Jesús grëse mine rnee Dios, ib run mew.

<sup>9</sup> Ni golsoladz ganle, ye grë miech stib guiedz biaadsilaa me, gane niina grëse zho roolnie Dios, ne scataa pquia zdoozho. Min co raquiet lo Xtiidz me, zaatne rnee:

Zoolnie naa luu,  
ni zlu naa lo grë zha stib guiedz ne men non nac luu.

<sup>10</sup> Stib lugar rnee:

To ne nac to miech stib guiedz,  
¡ine nley golgac grë to zha Israel!

<sup>11</sup> Ni no stib zaatne rnee:

Grëse to ne nac to miech stib guiedz,  
¡golleynie Dios! ¡Golsa nziuu lë me!

<sup>12</sup> Mincoque ga bzeet Isá, zeene znu pquiaa me:

Zrieequia tib men lo xtii Isái;  
men co gnabey lo grëse miech stib guiedz,  
ni me gnalo zho grëse zho.

<sup>13</sup> Mincocxe waa, to ne nac to miech stib guiedz, rnab naa lo Dios (men ne psanle diidz pe nac grë ncuaane ygaa ne ga) gneedz me guielbley lo to, gacnie me to peet zhgab ctsebe to niina ne laa to rliladzle me. Rnab naa lo me, gacniën Espíritu Sant to ine gley to yquiambëz to gac grë mine psanle me diidz ga.

<sup>14</sup> Bets, bzian, nanle naa zha wen nac to, nacde to zha ne csañ zdoostib zho; rienle to zha racladz Dios gban to, rienle to zha cso to diidz lo grë zha ne nacgrë to;

<sup>15</sup> per lo guits rii gon nzian ncuaane rso naa diidz lo to. Guiabde to togo

ndox naa lo to, sinque laaw ben naa zeena guiaanladzde tow.

<sup>16</sup> Ne nquialadz Dios naa, laa me bzooblo naa noyun naa xtsiin Jesús, none naa Xtiidz Ndzon me lo grë miech stib guiedz, zeena csanmbe Espíritu Sant zho; lozh ga gded naa zho lo Dios zig tib gon ne gley me ycaania me.

<sup>17</sup> Gacxe waa, tel niina rley naa sac noyacnien Jesús naa noyun naa dziin ne pso Dios naa.

<sup>18</sup> Me noyacnien naa none naa Xtiidz me lo grë zha stib guiedz, zeena gban zho zigne racladz me. Ni laa zho nobig lo me, sac ran zho grëse mine rne naa mban naaw zigne naca,

<sup>19</sup> ni ran zho zha racnien Espíritu Sant naa run naa grë milagr, grë ncuaane rzee zdoo zho. Sca nagon none naa Xtiidz Jesús lo zho, brie naa Jerusalén briequia naa haxta nëz xtan zha Ilir. Guiabde to togo rtix naa diidz.

<sup>20</sup> Ni laa naa noxco za naa zaatne waltaa gard gon zho cho nac Jesús, zeena gasëëbd naa zaatne ziyele zha ne güeynee Xtiidz me.

<sup>21</sup> Laa naa zana zigne zhobnee lo Xtiidz Dios, zaatne rnee: “Grë zha ne waltaa gard gon cho nac me, zeene gan zho grëtaa ncuaane run me, laa zho gunbey me.”

### *Racladz Pabl tsie Pabl Roma*

<sup>22</sup> Nzian vuelte gocladz naa nialgan naa to, per ib bdeetew diidz, sac laa naa bia grë dan co biaseed naa miech.

<sup>23</sup> Izle ga na tibaque sca no guic naa, laa niina ne laa naa psiaal lo xtsin naa, nataa nagon ible zial naa.

<sup>24</sup> Laa naa no ga Spañ, dzigo lëe nëzle ga teed naa Roma i guialgan naa to. Tib guielbleya lo naa guialquiabdiuzh naa to, dzigo lozh ga siguiel to gun to xyudar naa grieelo ga naa nëz Spañ.

<sup>25</sup> Laa niina, laa naa no ga Jerusalén gasan naa tib gon lo grë zha bets, zha bzian ne no ga;

<sup>26</sup> sac grë zha bets, zha bzian, ne no nëz Macedon, ni nëz Acay, laa zho

bnediudz beenlo zho palal dimi cxeel zho yquiin grë zha prob ne no nëz co.

<sup>27</sup> Niapse zdoo zho gol ptop zho gon co, sac rzac zdoo zho grëtaa mine been zha Jerusalén lo zho; sac gon, zha co güeynee Xtiidz Ndzon Jesús lo zho. Laa niina, laa zho rxee palal ncuaane rgaa lo zho yquiin zha Jerusalén.

<sup>28</sup> Zigne lozh nagon gasan naa gon co Jerusalén, dzigo laa naa teed guialgan naa to i zigne nile naa ga.

<sup>29</sup> Rien naa nroob guielnzaac ne gneedz Dios lo to zeene laa naa guial.

<sup>30</sup> Bets, bzian, golguien ganle Jesús rnabey ne grë ne; ni rleyne ne zha ne nacgrë ne, sac Espíritu Sant nacie ne. Gane niina, laa naa rnab lo to, golgotsaa gnab ne lo Dios gacnien me naa;

<sup>31</sup> golnab lo me, csilaa me naa ladz- nia grë zha Israel ne gard guien cho nac Jesús. Golanab lo me, ine gley grë zha bets ne, zha bzian ne, ycaania zho gon ne gasan naa lo zho nu;

<sup>32</sup> zeena ine nley no zdoo naa glanso naa lo to, ine gdziiladz naa len dze ne cuëz naa lo to i. Sca nagon no guic naa, totsaque gneedz Dios diidz gaca.

<sup>33</sup> Ni me ne nac me men ne rbee miech lo grëse zhgab, lo grëse guielxtseeb, me gacnien to. Sca gaca.

## 16

### *Bdiuzh*

<sup>1</sup> Bets, bzian, len dze rii laa Feb, tib wnaa ne run xtsiin Dios guiedz Cencre, laa me guiaad nëz lo to i.

<sup>2</sup> Laa naa rso diidz lo to, zeene glanso me i niowse golcaania me, golcaania me zigne riegual ycaania ne zha ne ngab lo Dios. Golsiguiel goldeed grë ncuaane yquiin me; sac gon, tel me ndal grë zha ne ziyacnie me lo xliaadz zho, haxta naa blactaa ziyacnie me naa.

<sup>3</sup> Ni rnab naa lo to, golsiguiel goldeed zhibdiuzh naa lo grë zha qui.

Goldeed tib zhibdiuzh naa lo Aquil i, grop tsieel me Priscil. Blactaa ziyacnie zho naa zidziun no xtsiin Jesús,

<sup>4</sup> haxta bdedlaa zho niet zho psilaa zho naa lo guielgut. Rzadox zdoonaa mine been zho ga, niicle grëragaa zha zit ne nacgrë new, rzac zdoon zhow.

<sup>5</sup> Ni scagaa, grë zha ne rcaalsa lidz zho riegoalnie Dios, goldeed zhibdiuzh naa lo zho. Goldeed zhibdiuzh naa lo Epenet, rley naa rsoladz naa me; lëë me nac zha Asia ne glopaa bzëëb xnëz Jesús.

<sup>6</sup> Goldeed zhibdiuzh naa lo Marí, blactaa noyun me xtsiin Jesús lo to.

<sup>7</sup> Goldeed zhibdiuzh naa lo Andrónic, lo Junias, grop menladz naa zha ne no i; gzapaa no zho bdzioladzguiib. Glo zho bliladz Jesús lo naa, zha nziuu nac zho lo grë zha ne pxeel Dios nonee Xtiidz me.

<sup>8</sup> Goldeed zhibdiuzh naa lo Ampliat, lëë stib zha ne rdzieel xtidz naa ga;

<sup>9</sup> lo Urban, rsoladz naa me, tipse bdziuun no xtsiin Jesús grop no; lo Staquis, stib zha ne nziuu lo naa, goldeed zhibdiuzh naa lo zho;

<sup>10</sup> lo Apel, ye me blactaa ncuaane bded me blu me ganle ne nli dib zdoon me rnalo me Jesús; lo grë zha ne no lidz Ristob ne.

<sup>11</sup> Goldeed zhibdiuzh naa lo Herodion, ye me menladz naa nac me; lo grë zha ne no lidz Narcis, zha ne rliladzle Jesús;

<sup>12</sup> lo Trifen, lo Trifós, ni lo Pérsida, gza men wnaa rii blactaa noyun zho xtsiin Jesús.

<sup>13</sup> Goldeed zhibdiuzh naa lo Ruf, zëëb xtiidz me lo grë zha ne nacgrë ne; goldeed zhibdiuzh naa lo xniaa me ne, run naa cuent lëë stib xnia naa ga, blactaa pteedlo me naa.

<sup>14</sup> Goldeed zhibdiuzh naa lo Asítric, lo Flegon, lo Hermes, lo Patrob, lo Hermas ni lo grëragaa zha bets ne nacgrë zho.

<sup>15</sup> Goldeed zhibdiuzh naa lo Filólogo, lo Jul, lo Nerew grop bzian me, lo Olimp ni lo grëraa zha bets ne nacgrë zho.

<sup>16</sup> Grëse to bets, grëse to bzian, golcaania zhibdiuzh naa. Grëse zha ne rliladz Jesús nëz rii, laa zho rxeel bdiuzh lo to.

<sup>17</sup> Nu ne laa naa csiaalle lo guits rii, laa naa rso diidz lo to, nsin golso lo grë zha ne ziaad loxaque dien zha codil zho to, dien zha gungüet zho to, rlu zho mine ni nacdraa Xtiidz Jesús; yquiaadiagde to zhiwseed zho.

<sup>18</sup> Grë zha co, led xtsiindraa Jesús ga run zho, sinque laa zho noxco ncuaane gdeed guxt xcuerp zho. Diidz nex, diidz ndooladz rnee zho; grë miech ne beelze pe rliladz, znuse rquidie zho zho.

<sup>19</sup> Sangue to, zëëb diidz ne ibrsaande to mine nac Xtiidz Dios, zienal to mine rnabey me.

Rley naa ron naa squitaa nguzobdiidz to. Racladz naa tibaque squiniini gac to, zeena guien to niapse ncuaane yquin gun to, ni lalnu tsoode to lo guientseeb.

<sup>20</sup> Scagaa Dios men ne rtiche grëse zhgab, grëse dzeb, merle quixdze me Satanás, zeena peet grielodraa gun ma. Jesús, men ndzon ne rnabey ne, me gacnien to.

<sup>21</sup> Golcaania zhibdiuzh Timoté, men ne quianie naa xtsiin Jesús, laa me rxeel bdiuzh lo to; scaque zha ladz naa Lus, Jasón ni Sosípater, laa zho rxeel bdiuzh lo to.

<sup>22</sup> (Naa nac Ters, naa noquia guits rii, ye naa laa naa rxeel zhibdiuzh naa lo to i. Rleynie naa to, sac ye to ngab lo Jesús.

<sup>23</sup> Golcaania zhibdiuzh Gay, men ne rbëz naa lidz, laa me rxeel bdiuzh lo to. Lidz me nu rcaalsa grë zha ne rliladz Jesús nëz rii. Ye Rast, men ne nac wxtis quianap xtimi guiedz rii, ni bets ne Cuart, laa zho rxeel bdiuzh lo to.

<sup>24</sup> Jesús men ne rnabey ne, me gacnien to grëse to. Sca gaca.)

<sup>25</sup> Laa naa rsan to ladznia Dios, me gacnien to lozh sodziits to lo Xtiidz me, mine none naa lo miech. Haxta zeene gard tsaa guidzliu, znu no guic Dios csilaa me grë miech lo xtol zho, per choot gocnanda, naraa laaw bzhoobnen.

<sup>26</sup> Laa niina, nzian zaatne nogaaaz Xtiidz me, zeena grëse zho guien Jesús

none gnalo zho, ni mine rnabey me min co no gun zho. Grë zha ne biadteed xtiidz Dios padzeela, bzeetle zho ne znu gaca, ni ible Dios rnabey ne znu gaca.

<sup>27</sup> ¡Mese nac Dios, mese nac men ne nlipaa rien! ¡Tibaque sca golgotsaa dziuunnon ne me, grëse ne ne nac ne zha ne ngab lo Jesús! Sca rieguala.

Pabl



## GUITS NE GLO PXEEL PABL LO ZHA CORINT

¡Diuzh to grëse to! <sup>1</sup> Naa nac Pabl, ible Dios bzooblo naa znu quiayun naa xtsiin Jesús. Grop no bets ne Sóstenes rquiaa guits rii rxeel no lo to.

<sup>2</sup> Laaw ziaad lo to i, grëse to ne nac to zha ne ngable xnëz Dios no to guiedz Corint i, nac to zha ne bredz Dios ngab lo me, psanmbe me to zeene laa to bliladz Jesús; zigne psanmbeque me grëse miech ne no dib lo guidzliu, zha ne bliladz Jesús, men ne rnabey ne grëse ne.

<sup>3</sup> Dios men ne nac Pxoze ne, ni Jesús men ne rnabey ne, me gacniën to, me glu lo to ganle pa lotaa noxco me to; zeena peet tsienied guic to.

<sup>4</sup> Gzataa zeene rzodiidznie naa Dios, rded naa xquizh lo me por grëtaa ncuane zineedz me lo to, niina ne laa to rliladz Jesús.

<sup>5</sup> Sac gon porne rliladz to Jesús, blactaa ziyunlay me lo xquielmban to, noyacniën me to quiayoguicraa to zha nac zhiwseed me, rien to zha gnee tow lo miech.

<sup>6</sup> Rlu zianal to mine nac Xtiidz Jesús, zigne binse tow,

<sup>7</sup> gacxe waa bneedz Dios grëtaa guielbiini lo to, zeena guien to zha gban to, laga quiambëz to gdzin dze ne guiaad Jesús men ne rnabey ne.

<sup>8</sup> Ni Dios nac men ne gacniën to tiblize gac to lo Xtiidz Jesús, zeena ni tib falt rapde to gal dze co.

<sup>9</sup> Sca nac xtiidz me, ni mesi gon ctsëed me mine rnee me, ible laa me bredz to gacnie to Xpëed me Jesús, men ndzon ne rnabey ne.

<sup>10</sup> Gacxe waa bets, bzian, laa naa rso diidz lo to niowse golgac, tsodildraa to. Ine tipse golgac grë to, tel pe nac dziin ne gun to, tel pe rzac to, tipse golnee. Ne nligaa golgona, zig nac zeene Jesús zhal noso diidz rii lo to.

<sup>11</sup> Sac gon në tib zhalidz Cloé lo naa nodillsa to i;

<sup>12</sup> no to dien cho xnëz ngab to. No to rnee: “Xnëz Pabl no naa”; riasaque zha ne rnee xnëz Apol no zho, rrieequiagaa zha ne rnee xnëz Pedr no zho; haxta no zho rzac zhase nac zha ne nlipaa no xnëz Jesús.

<sup>13</sup> Ne squi rac to, ¿pe rzac to dzigo squi nzian lë nac Jesús? Zha ne rnee xnëz Pabl no zho, ¿pe niacxe naa pquia lo cruz gozh xtol zho?, ¿te brobnis zho ye par ygab zho lo naa?

<sup>14</sup> ¡Xquizh Dios led naad pchoobnis to grë to, lëese chop zha ne pchoobnis naa nac Crisp ni Gay!

<sup>15</sup> Zeena tsod pe nacne guiab to xnëz naa ngab to, sac naa pchoobnis to.

<sup>16</sup> Ah, ni naaque gon pchoobnis grë menlidz Stef. Bod lëese zha ne pchoobnis naa ga,

<sup>17</sup> sac gon pxeeldaxe Jesús naa waa cchoobnis naa miech, sinque laa me pxeel naa cseed naa zho gacnan zho zha grieelo laa zho lo dol. Haxta bod ligase bzhaac to mine bialne naa lo to, sac ib zanaal naa pe guielrac, pe diidz ngan ne gne naa; sac nacda gleynie miech zha rnee naa, sinque gliladz zho cho nac Jesús, pe nacne gut me lo cruz.

### *Diosse nac men ne rien*

<sup>18</sup> Min co nagon noxco naa, maase niicle no grë zha ne rzac ncuane paat rquiind ga been Jesús gut me lo cruz, per lëe zha co nole nëz ne nitlo zho; sangue ne ne nac ne zha ne psilaale me lo dol, ndion ne ganle ga blu pa lotaa nac poder ne rap Dios.

<sup>19</sup> Noyaca zigne zhobneeque lo Xtiidz Dios, zeene rëb me:

Znitlo naa grë guielrac ne rzac zho csilaa zho,

niicle rzac zho mazdraa zhooba guic zho,

ni lalnu yquiinda.

<sup>20</sup> Ni nligaaw, grë zha rac, grë zha rien, grë zha ne rzob dien cho nroobraa rac, ib blud grë zhiwseed zho ga lo zho zha csilaa Dios zho, chogaa nac

Dios. Ga blu Dios ganle lega nacse grë guielrac ne no lo guidzliu rii.

<sup>21</sup> ¡Diosse nac men ne rien! Bien me grieelod gunbey miech me por xquielrac zho, nacne bnabey me zha ne dib zdoo gliladz xtiidz me, zha co csilaa me; niicle ne rzhidznie miecha, rzac zho ncuane paat rquiinda.

<sup>22</sup> Zig nac grë zha Israel, grë zha Gres ncuane paat rquiinda rzac zho. Grë zha Israel, racladz zho ganlo zho grë milagr nroob par glu ne diidzliw; laa zha Gres na zienalgaa gaca zigne nac zhiwseed zho, sac laa zho zienalgauelrac ne no lo guidzliu rii.

<sup>23</sup> Gacxe waa zeene rnee no lo zho Jesús men ne pquia lo cruz, men cose csilaa miech, rlëe zha Israel ron zhow; laa zha Gres, rzhidznie.

<sup>24</sup> Sangue ne, ne nac ne zha ne bredzle Dios bzëeb xnëz me, zigtaa zha Israela, zigtagaa grëraa miecha, ndion ne ganle Jesús nac men ne biaadlu pa lotaa nac poder ne rap Dios, me biaadlu pa lotaa nac xquielrac Dios.

<sup>25</sup> Mine rzac miech paat rquiind ga been Dios, ni nanð zho ndziibguicraa nac min co lo grë xquielrac zho; zha ne rzacgaa cholze cho men nsis ga sca gut lo cruz, ni nanð zho lëe men co mazdraa ndip lo grëse miech guidzliu.

<sup>26</sup> Bets, bzian, golgan ganle lo grë to ne nac to zha ne ngab xnëz Dios, led grëde to nac zha rien nëz lo miech, led grëde to nac zha non, zha ne ziaadgaa lo grë dii ne nziuu lo zho.

<sup>27</sup> Per ib laa Dios nobedz grë zha ne rzac miech peet rienð, grë zha ne rzac zho nac zha nsis, parne gunctoladz me grë zha ne rzac zho nac zha rac, zha non.

<sup>28</sup> Laa me nobedz grë zha ne sca rzac miech paat rquiin, zha ne rzac zho peet nond, parne guioog ro grë zha ne rzac zho nac zha non, zha nziuu.

<sup>29</sup> Ga rlu me ganle ni tib choot grieelod gacniats lo me.

<sup>30</sup> Golwi ganle, niapse por me laa ne nacie Jesús, grë guielrac, grë guielrien ne rdziaap ne, Jesús

bneedza, ni Jesús nac men ne psilaa ne lo grëtaa xtol ne, men ne psanmbe ne laa ne bziaab xnëz Dios. Dios bnabey sca goca.

<sup>31</sup> Gacxe waa choot grieelod gacniats, zigne ziaadaque lo Xtiidz me zaatne rnee: “Zha ne racladz gacniats, mazd gunnon zho Dios por grëtaa ncuane run me.”

## 2

### *Xtiidz Jesús bnee Pabl*

<sup>1</sup> Gacxe waa tel naa, golsoladz ganle bets, bzian, len dze ne bialseed naa to Xtiidz Dios, bned naa dien pe diidz nroob, dien pe diidz ndzielguic lo to.

<sup>2</sup> Bend naa dien peraa nseed naa to, sinque mine nac zhiwseed Jesús min co bialne naa, zeena gacnan to cho nac me ni pe nac ne pquia me lo cruz.

<sup>3</sup> Lega gzhe gzhe rac naa, haxta rzhidz naa, rdzieeb naa no naa lo to.

<sup>4</sup> Zeene laa naa psilo bne Xtiidz Dios lo to i, gon to ganle ib bned naa zigne rnee grë zha ne nac zha rac lo guidzliu rii; per blu Espiritu Sant ganle nacda beelze pe wseed, ni blu ganle pa lotaa poder ne rap Dios.

<sup>5</sup> Sca bne naa lo to, sac laa naa racladz zha ne gbig sëeb xnëz Dios, me gnalo zho, gnalod zho grë mine nac xquielrac miech.

<sup>6</sup> Parga nli no zaatne rnee no grë diidz nroob, diidz ndzielguic, per laa min co rnee no lo grë zha ne rienraa zha nac Xtiidz Dios, ni nacdgaaw zigne nac grë xtiidz ndzielguic grëraa miech, grë diidz ne rleyne grë zha rnabey ne no lo guidzliu rii; sac zigtaa zhaw, zigtagaa zhiwseed zhow, ncuane tibrded naca.

<sup>7</sup> Grë diidz ne rnee no, ndzielguic naca, sac zhiwseed Diosa, lëe xquielrac me ga. Ndzielguica, sac ga rlu me zha no guic me csilaa me miech gdziñ zho lo guielndzon ne no me; gocnanð miecha padzeela, per nolew zeene bzaa me guidzliu.

<sup>8</sup> Grë miech ne no len dze rii, rioguidz zho zha nac xquielrac Dios; sac telne nioguidz zhow nabeyd zho nquia men ndzon ne nac Jesús ga lo cruz.

<sup>9</sup> Zigne zhubneeque lo Xtiidz Dios, zaatne rnee:

Ncuaane waltaa gard guien miech, nac grë mine quianiele Dios gdeed me lo grë zha ne nlipaa gbig lo me gleynie zho me.

Ncuaane choot gard gana, ncuaane choot gard gona.

<sup>10</sup> Sangue no laa no ndionlew, sac pxeel me zhiEspiritu me blu lo no zha naca, men co nan grëse mine no guic me.

<sup>11</sup> Zig nase tib miech, grielod gacnanpaa ne dien pe nac mine no guic zho, pe nacgaa mine rza zdo zho, loxaque zhiespirituse zho nana; scaque Dios, loxaque zhiEspiritu me nan grëse mine no guic me gun me.

<sup>12</sup> Ni tel no, Espiritu co nacie no (nacie no espiritu ne quianzë lo guidzliu rii), ni ible laa Dios pxeel me lo no zeena gacndion no zha nactaa grë ncuaane nole guic Dios gneedz me lo ne.

<sup>13</sup> Zeene rzeet no grë guienzaac co, laa no rneew zigne rneedz zhiEspiritu me guielbiini lo no, rneed now zigne riab guic grë zha rac ne no lo guidzliu rii. Laa no rnee grë min co zigne rlu zhiEspiritu mew, ni ible laaw nac par grë zha ne rioguicle zha racladz Espiritu co.

<sup>14</sup> Grë zha ne nacie zhiEspiritu Dios, cholze miech nac zho, grielod tsoguic zho zha nac grë mine rlu Espiritu co lo no. Rzac zho ncuaane paat rquiind naca, sac grielod guien zhow ne zhase.

<sup>15</sup> Sangue zha ne rioguicle zha racladz Espiritu co, rien zho pe nac mine rlu me.

<sup>16</sup> Ni nligaa zha guien zhow, zigne zhubneeque lo Xtiidz Dios, zaatne rnee: "Choot grielod gacnan pe nac mine no guic Dios gun me, choot grielod glu lo me pe nac mine no gun me." Per no, ndion now, sac grë ncuaane nan Jesús, bneedz me diidz lo no ye no gocndiona.

### 3

#### *Gnalod zho samiech zho*

<sup>1</sup> Bets, bzian, ne nligaa gard grielo gne naa lo to zigne rne naa lo grë zha ne rioguicle zha nac mine racladz zhiEspiritu Dios, sinque tibaque laa naa rne lo to zigne rne naa lo grëraa miech guidzliu, sac rriequia bii mëdyeen nac to lo zhiwseed Jesús.

<sup>2</sup> Niapse ncuaane ligase ziseed naa to, laa ne cseed naa to ncuaane ndzielguic. Rriequia nidzse nonedz naa quiaye to, laa ne gow to grë ncuaane row zha gol. Haxta niina-gaa gard tsoguic to zha nac grë mine ndzielguic,

<sup>3</sup> sacne laa to bii zienal mine run miech guidzliu, laa ne gun to mine racladz Dios. Golguien ganle zha rac to, no to rlozhd glëëlsa to, rlozhd tillsa to. ¡Led squid gon no gac zha ne nole xnëz Dios!

<sup>4</sup> Pe i na rrie bla to rnee: "Tel no xnëz Pabl no no", rriequegaa zla zha ne rnee: "Tel no xnëz Apol no no." Gase rlu ganle zienalde to mine racladz Dios, sinque laa to zienal mine no guic to.

<sup>5</sup> Nana, ¿cho nac Pabl, chogaa nac Apol parne no yquiaaqui tsodil to? Nli no biadseed to Xtiidz Dios, per tib ngundziin winse nac no lo me, bdzi-uun no mine rnabey me no.

<sup>6</sup> Nac cuent rii zig nac tib guielgon, naa blo bni liu, laa Apol bgaala; per Dios nac men ne bnabey blana ni me pchooba.

<sup>7</sup> Golwi sca ganle Diosse nac men non, sac me pchoob bni co, tel no peet ncuaane nroob bdziuund no, lëe gdib tib bloo bni liu, stib bgaala.

<sup>8</sup> Zigtaa zha ne bloo bni liuw, zig-tagaa zha ne bgaala, lal nac zho grop zho; ni Diosse nac men ne gdeed mine riegual zho tib tib zho por dziin ne been zho.

<sup>9</sup> Tib ngundziin winse nac no lo Dios grop no Apol; laa to nac zig tib lë liu ne quiayan Dios, zig tib yu ne quiaza-gaa me.

<sup>10</sup> Pa lotaa wen Dios, sac bzooblo me naa naa psilo yu co, ni blu me lo naa zhapaa none tsaaw. Nli naa bgaa blee xcimienta, per niina zhaale zha

ne nosoquiaw. Tib tib zha ne nosoquia yu co, none guien zho zaacse gzhixcuua zhow, tsienal zho zigne nacse xcimienta ga,

<sup>11</sup> sac gon nod pe nacne csëeb zho stib cimient, tibaque cimient no, lëe cimient co nac Jesús.

<sup>12</sup> ¡Laa cimient co nole! Nana no zho gzaa yu co niapse guiib or, niapse guiib plat, no zho gzaaw grë quie niazh, no zho gzaaw yag, nogaa zho gzaaw grë pe guizh, pe yag xiidgaa.

<sup>13</sup> Zeene gdziñ dze ne laa Jesús gun guielwxtis, ga glu dien zha nac xtsiin zho; sac gal dze co grësew laaw none ted lo gui, ga glu dien pa min lëbraa.

<sup>14</sup> Zha ne pquuin ncuaane rlëb lo gui, ib tedsod zгаа zho mine rieguial zho gdeed Dios lo zho;

<sup>15</sup> laa zha ne pquingaa grë ncuaane znuse rec, mbe scase nitlo xtsiin zho. Peet ycaaniad zho, haxta zha pense tel zha laa zho lo gui co, zigne rzac zha ne rec lidz.

<sup>16</sup> Golgacnan ganle xyadoo Dios gon nac to, sacne zdoo to rbëz zhiEspiritu me.

<sup>17</sup> Tel xyadoo Dios, tib yadoo mbe, tib yadoo nda naca; gacxe waa, zha ne gnitlow ib tedsod znitlo Dios zho.

<sup>18</sup> Golguien sca zaacse golgac, tel no zha ne rzac nroob rac zho wseed lo guidzliu rii, gnalod zho min co; nend lel lo co no zho, ygaad zho mine nac-paa guielrac, guielrac ne rneedz Dios.

<sup>19</sup> Sac gon grë guielrac ne no lo guidzliu rii, ncuaane beelze naca nëz lo Dios. Zigne raquetaque lo Xtiidz me zaatne rnee: “Grë zha rac ne no lo guidzliu rii, lëëque lo grë guielrac ne zienal zho, ga rlu Dios ganle paat rquiinda.”

<sup>20</sup> No stib zaatne rnee: “Nanle Dios grë zhgab ne nonie guic grë zha rac, ncuaane paat rquiinda.”

<sup>21</sup> Tso de to sca lozhd gacniats to dien cho xnëz miech guidzliu rii no to, golguien ganle grëtaa ncuaane no, laa Dios psana par yquiina lo to.

<sup>22</sup> Zig nac guidzliu, guielmban, guielgut, ladznia to now, niicle ncuaane no niinaw, ncuaane nara-

gaa ziaada, chen tow; haxta Pabl, Apol, Pedr, ib laa no zo nu par dziuun no xyudar to.

<sup>23</sup> Grëse to tibaque xnëz men ne no to, lëe men co nac Jesús, men ne pxeel Dios.

## 4

### *Zha rzac zha ne rienee xtiidz Dios*

<sup>1</sup> Golguien sca tib moz winse nac no lo Jesús, laa me bzoo no noseed no miech xtiidz me mine gocnand miech padzeela.

<sup>2</sup> Ni zha ne gon znu run tib dziin, ible none nguzobdiidz gac zho lo men ne rnabey zho.

<sup>3</sup> Gacxe waa tel zha rzac to naa, tel zha rzacгаа grëraa miech naa, peet zienied guic naa. Haxta ni mine rzaac naa nac naa, peet nonda, rieguiald guiep naa znutaa znutaa nac mine noyun naa.

<sup>4</sup> Nli peet dzeb nonied guic naa guiep naa nend cho pe glisqui lo naa, per led mincod gni naa ni tib dol rapdraa naa; loxaque Dios nan zha nac naa, me gneedz mine gaguial naa.

<sup>5</sup> Gacxe waa, gunde to ne glole to guiab dien cho nac zha ne wenraa; sac min co gun men ne rnabey ne gal dze ne laa me guiaad. Gal dze co, me cxobnen ganle zhapaa nac ne tib tib ne, haxta grë mine rza guic ne, mine no zdoo ne, laaw glu me; grë no ne nodziuun no xtsiin me, dze co laa me gneedz mine rioguialpaa no tib tib no.

<sup>6</sup> Bets, bzian, niina ne nozet naa no lo to nu grop no Apol, quiayun nond naa naa, niicle nosanwindgaa naa me. Ga sca ganle golwi, zeena cseed to gban to zigne nac Xtiidz Dios, tso de to lozhd dien cho non, chogaa nond.

<sup>7</sup> Stiba, ¿cho nadien në lo to ne gunnon to to? Grë ncuaane rap to, grë ncuaane rac to, ¿niacxe led Diosd bneedza lo to? Dios name bneedza lo to, ¿pe nac dzigo no to rlozhd gacniats to zig nac zeene por xquielliger to bgaa tow?

<sup>8</sup> Niats rac to, masaque rzac to grële zhiwseed Dios nan to, gaxle zo to lo me, haxta rzac to tole nac zha rnabey,



paat rquiindraa no. Wenzhe tebaa nligaa zha rnabeyle nac to, zeena haxta ye no zley no.

<sup>9</sup> No hor rzaac naa, diunavez win psan Dios no ne nac no zha ne nonee xtiidz me, loxaque lo no rwi miech, rwi grë anjl dien zha rac no; zig run miech rieso zho lo zha ne rnabey zho ret.

<sup>10</sup> Ne znu quiadziuuñ no xtsiin Jesús, masaque zha yozh nac no lo miech, laa to gon xquizh me zha rien nac to lo zho. Zha nsis, zha zozhidzle rzoob zho no, laa to zha ndaan, zha ndip nac to. Masaque zha nziuu nac to lo zho, laa no rzac zho ni gand zho lo no.

<sup>11</sup> Haxta lo nadze blactaa zaatne retgbin no, zaatne retnis no, per ni lidz no, per ni lar ne dziaacw no guiend, rdib rdzaag no rdziuuñ no dziin rdziniaa no ncuaane rquiin no.

<sup>12</sup> Ni rlozh ga rrieeque miech rsacsi zho no. Rrieequia zha ne rdzibdee no, per rdziuuñ no gdzibdeeeque no zho, sinque mazd rnab no lo Dios gunlay me zho; zha ne rtsidil no, rdziuuñcasd no zho.

<sup>13</sup> Rrieequia zha ne në rnee lo no, per no, diidz wen rtsire no lo zho. Masaque rzac miech no, zig rzac zho grë ncuaane paat rquiindraa, zig rzac zho grë ncuaane nole lo guizh.

<sup>14</sup> Laa naa rzet grë min rii lo to, per nacda par gunctoladz naa to, sinque laa naa rzeta zeena guien to zaacse gac to, golguien ganle rleyne naa to, rzaac naa to zig tib xpëed naa.

<sup>15</sup> Niicle niaca mine ndal zha ne guiadseed to i, niicxe guiaad nzian mil zho waa, per led grëd zho tsoxcoopaa to zig rioxco tib dad xpëed zho. Zigne rne naa ga, xpëed naa nac to, rrieequia pxoz to nac naa, sac gon naa glo bialne xtiidz Dios lo to, laa to bzëeb xnëz Jesús.

<sup>16</sup> Goltsoxco sca, golban zigne mban naa.

<sup>17</sup> Ni ible mincopaa gon laa naa rxel Timoté ziaad lo to i, lëe stib xpëed naa i, ne nligaa rleyne naa me, tib zha nguzobdiidz nac me lo men ne rnabey me. Laa me ziaad i, me

gzodiidz lo to ganle zigne rseed naa miech grëse zaatne ziyateed naa, scagaa noxco naa mban naaw.

<sup>18</sup> Rien naa no bla niats ne nac to i, rzac nlidraa guial naa lo to i stib.

<sup>19</sup> Gacnan zho ganle, gneedzse Dios diidz, ible laa naa none guialniob, dzigo bii zdian ne dien pe nli na nacie zho xpoder Dios, te loxaque rnee zho ye.

<sup>20</sup> Sac gon zha ne ngab xnëz Dios, grë mine rnee zho none glu nacie zho xpoder me, nacda loxaque diidzse.

<sup>21</sup> ¿To nadien zha racladz to? ¿Pe rdziladz to guial naa guialgactox naa lo to i, te mazd wen ye niapse diidz ndooladz, diidz nex guialne naa lo to?

## 5

### *Zha ne runctal xtol*

<sup>1</sup> Zëeb diidz gon, lad to i no tib zha bgui ne quiayun tib dol nroob; per ni grëraa miech ne gard gliladz Xtiidz Dios run min co. Bin naa lëeque xniaa pchoob zho quiangob zho.

<sup>2</sup> ¡Yo na ne rzac to grële zhiwseed Dios nan to, gaxle zo to lo me! ¡Laa ne ctoladz to, laa ne tso to guielnë, cuee to zha qui lad to, lel no to rlozhd gacniats to!

<sup>3</sup> Niicle ne zozhaald naa lo to i, per zeene bin naaw tibaque nonie guic naa zha gaca. Nu laa naa gni lo to ganle zha riegual gac zha co:

<sup>4</sup> Grë to ne nac to zha ne ngab lo Jesús, rnab naa lo to ycaalsa to zigne rnabey me. Ndionle ne ganle zeene laa to ycaalsa, ga zo Jesús lo to, scagaa naa, golgun cuent lo to i zo naa.

<sup>5</sup> Squi ndxie to grë to, golzonëz zha co, golcueegazh zho lo to i, tsie zho tsietsobe zho ladznia mendox, ga tednë xcuerp zho guien zho ganle pe noyun zho; nan new togo zzhixcuaa zho stib, zeena ycaania Jesús zho gal dze ne laa me gbiire guiaad.

<sup>6</sup> ¡Xlëse gon squitaa racniats to rzac to zha mbe nac to, ni randze to zha ne quiayun doldox qui! ¡Pe riende to telne glisquide to mine quiayun zho,

ib tedsod zrieequiaraa zha ne squi gunctal xtol!

<sup>7</sup> Zha ne squi nac, masaque nac zho zig nac grē guielguidzdox ne znuse rded; golcueegazh zho sca, zeena ine mbe gac to nēz lo Dios, tete to guielguidz qui. Golguien ganle laa Jesús psanmbele ne, mincopaa gut me, goc me gon nēz lo Dios zig carner yeen ne rgogon zho lo me lni Pascw.

<sup>8</sup> Golgotsaa gban ne zigne racladz Dios, grēse tel zha wban ne glo, grēse guielyozh, grēse guielntseeb ne bdz-iuun ne, none csaan new grēsew. Ndzinli sca golgac, goltsienal mine nac diidzli; none mbe gac to nēz lo Dios, zig guietxtil ne notsd ncobi.

<sup>9</sup> Lo stib guits ne pxel naa lo to ga, laa naa psole diidz lo to ganle ctsieel-sade to grē miech yozh ne ndzinlid mban.

<sup>10</sup> Zeene sca pso naa diidz lo to, guiabde to togo naca parne ctsieel-sadraa to grē zha ne gard gliladz Xti-idz Dios, zha ne rquiangob zha ne led tsieeld, grē zha ne zienal loxaque gunlo dimi, grē zha ne run guielgbaan, grēgaa zha ne rnalo grē mdio. Led zha coda, sac laga mban ne lo guidzliu rii, ible zanlsa ne grē ne zho.

<sup>11</sup> Sinque zha ne bzet naa ga ctsieelsade to, nac zha ne nacle diidz xnēz Dios no zho, ni noque zho quiayunctal zho xtol zho, no zho rquiangob zha ne led tsieeld zho, no zho zienal loxaque gunlo dimi, zhiga zhiga laa ne gleyne zho Dios lel zhaa ncuane rleynieraa zho, no zho rquiadiidzguizh samiech, no zho rzudz, nogaa zho run guielgbaan. Ne nligaa zha ne sca nac, per ni tib guielwagw gowniede to zho.

<sup>12</sup> Tel grēraa zha ne gard gliladz Xtiidz Diosa, led ned riogual glisqui mine quiayun zho, Dios nac men ne gunquizh zhow.

<sup>13</sup> Sangue zha ne nacgrē ne, zeene noyun zho tib ncuane ndzinlid, ib riogual glisqui new lo zho. Gacxe nana sca, zha ne squi quiayunctal xtol i, golcueegazh zho lad to, ni spalal gandzedraa to zho.

## 6

### Zha none gac guielwxtis

<sup>1</sup> Laa to gocnanle ganle, to riogual glisqui tel pe nac ncuane nonguield run zha ne nacgrē to. Lēda i gon run to, zeene pe tib dil rap to, lēēlēd zie to lo wxtis laa ne gbig to lo zha ne nacgrē to, zha csiooglo lo xtil to.

<sup>2</sup> ¿Niacxe nande to zha ne ngab xnēz Dios, zha co cobey zha nac xtol grēraa miech zeene gal dze ne laa Dios gnabeya? ¿Pe nac dzigo grieelod tose csiooglo lo tel pe dil win ne rap to?

<sup>3</sup> Haxta grē anjl name, ne gon cobey pe nac grē mine quiayun zho. Gacxe waa, grē dil ne rac lo guielmban rii, ne riogual cobey zha guiooglo low.

<sup>4</sup> Sca gon gun to, led node to, rnadse pew laa to ziele lo wxtis.

<sup>5</sup> ¿Pe ni tib lē guielto guien lo to? Lo grē to, ¿niacxe goon guien zha ne grielo gnee lo to, cuēz lo xtil to?

<sup>6</sup> Nazdpaa rdziladz to dil, ¿pe i na lēēque zha ne nacgrē to quiadilnie to, ni rlozh ga zieque to zienie to xtil to lo zha ne riladzd Dios?

<sup>7</sup> Pe riende to tib guieltodoxle i squi no to lēēque to quiadilisa. Mazd golxecw tel cho pe run to.

<sup>8</sup> Mazdraa gon mbana squi no to rsacsi to miech, ni haxta zha ne nacgrē to rsacsi to.

<sup>9</sup> Nanle to ganle zha ne squi run guielntseeb, grieelod gdzin zho zaatne rnabey Dios. Tsieniewguite guic to sca. Golsoladz ganle grēse zha ne run guielyozh:

zig nac zha ne rquiangob zha ne led tsieeld zho,

zig nac zha ne rquiangob zha ne nole tsieel,

zig nac zha ne nac mrazh,

zig nac zha ne rnalo grē mdio laa ne gnalo zho Dios,

ni tib zho grieelod gdzin zaatne rnabey Dios.

<sup>10</sup> Scaque:

zha ne nac ngbaan,

zha ne zienie guic loxaque dien zha gunlo dimi,

zha ne nac ngonziu,

zha ne rzhixcuaa diidzguizh,

zha ne rungüet miech par cuan zho zho;

ni tib zho ygaad guielnzaac co.

<sup>11</sup> Blalaa to bio lo grë dol co glo, sangue niina miech mbele nac to nëz lo Dios, laa Jesús ni Espíritu Sant psanle to zig tib zha ne peet xtold, laa me psanwenle to nëz lo Dios.

### *Gunctald zho xtol zho*

<sup>12</sup> Nli ndal ncuaane zac gun ne, gunctalda xtol ne, niicle choot rcadgaaw, per led grëda rquiin. Tel naa, niicle no ncuaane zrieelo gun naa, per rund naaw; sac racladz naa guien naaw, lozh ga lëew gnabey naa.

<sup>13</sup> Zëeb diidz rnee zho: “Laa guielwagw biaan par gow miecha, scagaa zdoo zho laaw biaan par tsodzëw guielwagw.” Nli scaw, per guiabd ne togo por min co lega gowcho ne. Pa rquiin ne lega tedso gow ne, sac gon zigtaa zdoo new, zigtagaa guielwagwa, zdziñ dze ne gnitlo Diosa. Guielwagw ga na, sangue grë guielyozh nerun miech rquiangob zho zha ne led tsiæld zho, biaan ne par dziuun ne min co, sinque laa ne biaan par gban ne zigne rdziladz Dios, sac me rnabey ne.

<sup>14</sup> Tel new nitlod ne, sac gon zigne bleeban Dios Jesús con poder ne rap me, scaque zbeeban me ne zeene laa dze co gdziñ.

<sup>15</sup> Golgacnan ganle, rrieequia lëe tiblë xcuerp Jesús nu gon nac ne tib tib ne. Nana, ¿pe nonguiela ga dzigo gdzieel tib lë xcuerp me ga xcuerp tib wnaa ro nëz? ¡Nonguielda gon!

<sup>16</sup> Sac gon zha ne raanie tib wnaa ro nëz, rrieequia tibaque rac zho ga grop zho wnaa co. Rnee lo Xtiidz Dios, par me: “Zeene laa mgui rac-grop tib wnaa, tibaque miech rac zho ga grop zho.”

<sup>17</sup> Scagaa zha ne rzëeb xnëz Jesús, tibaque rac zho grop zho me, zhiEspíritu me racnie zho.

<sup>18</sup> Gacxe waa, gunde to guielyozh yquiangob to zha ne led tsiælde to. Lo grë dol ne no, min riise nac mine xcuerppaa miech rguitnie zho. Sac

gon zha ne run guielyozh co, masaque rsanbeed zho zho ga.

<sup>19</sup> Golguien ganle, zha ne nole xnëz Dios, masaque zha nac zig tib yadoo zaatne rbëz Espíritu Sant, Espíritu ne rdeed Dios rbannie zho. Led nedraa rnabey xcuerp ne,

<sup>20</sup> Diosle rnabeya, sac gon bzhiile me ne ni nroob gocnon ne lo me. Gacxe waa, zigtaa xcuerp new, zigtaa xpensar new, gotsaa yquiin new par cxobnen ne ganle pa lotaa men nroob nac me.

## 7

### *Rtsire Pabl lo zhiwnabdiidz zho*

<sup>1</sup> Lo guits ne pxeel to lo naa, nzian ncuaane rnabdiidz to, nu ganle laa naa ctsire lo wnabdiidz co: nli wena, telne niaca mine grieelow ctsieelniad ne.

<sup>2</sup> Per parne tsod pe yquiaaqui cho gun guielyozh, tsonie zho zha ne led tsiæld zho, mazd wena zigtaa mguiw, zigtaa wnaaw ctsieelnia zho, tib tib zho gbanniese zho tsiel zho zigne rieguiala.

<sup>3</sup> Zha ne ptsieelniale, zig nac mgui none gnee zho lo tsiel zho zeene racladz me, scaquegaa wnaa zeene racladz tsiel zho gnee lo zho none siguiel zho.

<sup>4</sup> Sac gon wnaa ne rtsieelnia, led zhadraa rnabey xcuerp zho, sinque tsiel-le zho rnabeya; scaquegaa mgui zeene laa zho rtsieelnia, tsiel-le zho rnabey xcuerp zho.

<sup>5</sup> Golguien sca, niicle mguiw niicle wnaaw nodne yca zho xcuerp zho lo tsiel zho. Laa telne rzacgaa zho none yquiind zho tsiel zho tib blalaa dze, sac rquiabladz zho gzodiidznie zho Dios, wena totsaque guiaan zhow didz grop zho. Per zigne ted ga, gbi-ireque gnee zho lo tsiel zho, sac gon zha ne grieelod cxecw, nend ccheep mendox zho gon zho guielyozh.

<sup>6</sup> Ne znu rne naa lo to, guiabde to nagon togo rne naa nopaa ctsieelnia to.

<sup>7</sup> Tel naa, rzac naa wena tebaa grëse to znu ctsieelniad, zigne nac naa; per na ncuaane gacd ga, sacne zhaase

zhaase nac ne tib tib ne. No zho pso Dios ctsieelnia, nogaa zho pso me ctsieelniad, per rley zho mban zho zigne nac zho.

<sup>8</sup> Zig nac grë zha ne bii tib, grëgaa zha ne gutle tsieel, wena tebaa grieelo scase guiaan zho,

<sup>9</sup> per telne rien zho lëbd xcuerp zho, dzigo mazd ctsieelnia zho. Mazd wena ctsieelnia zho, lëdle so zho tib zho ni tel rec rdzu zho.

<sup>10</sup> Saŋgue zha ne ptsieelniale, laa naa rso diidz lo zho csaand zho tsieel zho, ni nacda xtudz naa, sinque ible sca rnabey Dios.

<sup>11</sup> Laa tel zha ne guiaabgaa csaan zho tsieel zho, zaca, per lëeraasi grieelodraa gbiire ctsieelnia zho, mazd mine naca telne zrieelow ycatsieel zho stib, o guiaangaa zho tipse zho.

<sup>12</sup> Nu na ganle laa naa gnegaa chop lan xtudz naa lo zha ne led yed tsieel rliladz Xtiidz Dios; tib diidzse naca gni naaw, nacda mine rnabeypaa Dios. Zha bgui ne mbannie tib wnaa ne rliladz Xtiidz Dios, per telne rio guic wnaa gbannie wnaa zho, nodne csaan zho wnaa.

<sup>13</sup> Scaquegaa wnaa ne mbannie tib mgui ne rliladz Xtiidz Dios, nod csaan zho mgui co telne riopaa guic mgui gbannie mgui zho.

<sup>14</sup> Zigtaa mguiw, zigtagaa wnaaw, zha ne sca mbannie tib zha ne rliladzle xtiidz Dios, ye zho runlay Dios ga, nenda haxta zio dze ne ye zho gliladz xtiidz me. Sac telne ctso zho, laa ne gbigraa xpëed zho lo Dios, lel znu sozit mëed.

<sup>15</sup> Nana, telne zhalgaa zha ne rliladz Xtiidz Dios ga, rnab csaanlsa zho, peet nacda maase ctso zho, nod pe nacne gzoobguicpaa tsieel zho lo zho cuëz zho. Sac gon zha ne rliladzle Xtiidz Dios, laa me bredz zho parne zaacse gban zho, bredzd me zho par tsodil zho;

<sup>16</sup> stiba, nan zho dien pe zdziñ dze ne gliladz tsieel zho Xtiidz Dios.

<sup>17</sup> Mine naca tib tib to gołtsoxco gun to mine rdziladz Dios. Zigtaa zha ne pso me ctsieelnia, zigtagaa zha ne pso

me scase guiaan, sca none gac to; sca-gaa zha ne ncaatsieel-le zeene rliladz zho xtiidz me, none sca guiaan zho niicle telne rliladz tsieel zho xtiidz me. Grëse zha ne ngab lo me, diidz rii rso naa lo zho.

<sup>18</sup> Zig nac grë zha ne nole bey xcuerp zeene laa zho rzëeb xnëz me, sca no zho bey co gund zho ne yqueets zhow. Zha ne na nodgaa bey co zeene rzëeb zho xnëz me, scaque nod pe nacne tsopaa zho bey co.

<sup>19</sup> Mine mazdraa non lo me, gban zho zigne rdziladz me, guien draa ne dien cho no bey, chogaa noda.

<sup>20</sup> Zigne rneque naa ga, grëse zha ne rzëeb xnëz Dios, tel zha nac zho zeene laa me bredz zho, scase none guiaan zho.

<sup>21</sup> Zig nac zha ne nac ngundziin lo ben, peet tsienied guic zho guiab zho dien zha grieë zho ladznia zha ne rnabey zho; per telne gdeeda diidz, zac tsoxco zho dien zha grieë zho lo zha co.

<sup>22</sup> Zha ne sca nac ngundziin lo ben zeene bzëeb zho xnëz Dios, guien zho ganle rriequia zonlaale zho, sac gon laa Jesús psilaale zho lo grëtaa dol ne bio zho. Zha ne nacdgaa ngundziin lo ben zeene bzëeb zho xnëz Dios, guien zho ganle tib ngundziinle nac zho lo Jesús niina, me rnabey zho.

<sup>23</sup> Golguien ganle, grëse to laa Dios bzhiile to ni nroob gocnon to, gacxe waa mele rnabey to; ni togaa, lo me none gon to dziin, gdeete to diidz lega gnabey miech to.

<sup>24</sup> Sca nasca gon bets gaca, tib tib to zigne nacse to zeene bzëeb to xnëz Dios scase no gban to, ine gleynie to me.

<sup>25</sup> Stib wnabdiidz ne run to ga dien zha gac zha ne gard ctsieelnia, gneli naa lo to ganle, guien tib xley Dios mine gnabeypaa dien zha gac zho. Per gołquiaadiag mine gne naa nu ganle zha rzaac naa, nanle to ganle, zha ne znu rquia zdoo Dios rbedz me, mine rquiin min co rnee zho.

<sup>26</sup> Grë ne ne nac ne zha ne rliladz Xtiidz Dios len dze rii, nligaa ngan nac lo xquielmban ne, gane zoot naa



wena zha ne sca gard ctsieelnia, maase guiaantib zho.

<sup>27</sup> Zha bgui ne na ptsieelnialejaa, grieelod gni naa guiaantib zho; sca mbannie zho tsiel zho; per tel zha ne gard ctsieelniaw, mazd sobd guic zho ctsieelnia zho.

<sup>28</sup> Zha ne racladzpagaa ctsieelnia, zigtaa mguiw zigtaa wnaaw, led dold ga gun zho telne laa zho ctsieelnia; per gacnan zho ganle, zeene laa zho pcatsieel-le, ib tedsod nroob guielne ne gan zho por gre mine noyac len dze rii.

<sup>29</sup> Mine none guien to: zhisle nac dze ne so ne lo guidzliu rii, led nroob nac ngbidz ne grieelo dziuun ne xtsiin Dios; gacxe waa, zha ne nole tsiel, mazd sac zho zho zig tib zha ne guiend tsiel.

<sup>30</sup> Zha ne quianie dimiw, zha ne no guielbleya, zha ne nogaa guielne, gdeete zho diidz yca gre ncuaan co lo zho par gun zho xtsiin me.

<sup>31</sup> Zha ne bienle runfalte gretaa ncuaane rquiuin zho, gdeete zho diidz ctse gre ncuaan co lo zho, sac zigtaa guidzliuw, zigtaa gre ncuaane no low, zdziin dze ne nitlow.

<sup>32</sup> Mine racladz naa peet zhgab ctsed lo to. Golwi ganle, zha bgui ne tib, tiblique zienie guic zho run zho mine rdziladz Dios, mine nac xtsiin me.

<sup>33</sup> Laa zha ne no tsiel, grieelodraa sca gac zho, sac laa guic zho zienie zha gbannie zho tsiel zho, zha grieelo gun zho mine rdziladz me, min co rionieraa guic zho.

<sup>34</sup> Scaque gre men wnaa, zha ne tib, rioxcoraa zho run zho mine rdziladz Dios, dib nase zho rbeeladz zho zho lo xtsiin me. Laa zha ne ptsieelniale, xco ne dien zha gbannie zho tsiel zho, dien zha grieelo gun zho mine rdziladz tsiel zho, xco co rioraa zho.

<sup>35</sup> Laa naa rne min rii lo to, per guiabde to togo rca naa ctsieelnia to, sinque laaw rne naa parne guien to zha gun to, zeena grieelo zaacse gac to gun to mine rnabey Dios.

<sup>36</sup> Zha ne quianie wnaa nguieg, telne rzac zho nonguielda ga scase

ted lo xquielnguieg xpëed zho, sinque none ctsieelnia zho, peet nacda, led dold ga ctsieelnia zho.

<sup>37</sup> Laa telne rzacjaa zho, wenraaw ctsieelniad xpëdwnaa zho, ible scale pquiablaz zho guiaan mëed, wenaque ga telne sca rzac zho.

<sup>38</sup> Wen ga gun zha ne sca gdeed diidz ctsieelnia xpëdwnaa, per mazdraa wen ga gun zha ne rzac mazd ctsieelniad xpëed.

<sup>39</sup> Nana, wnaa ne retjaa tsiel, nli zeene mban tsiel zho rnabey ley ne tsielse zho gbannie zho; per zeene laa tsiel zho ret, zac ctsieelnia zho tel cho stib mgui ne racladz zho, totsaque zha ne noque xnëz Diosa.

<sup>40</sup> Per tel naa, rzac naa mazdraa wen gban zho telne tsodraa guic zho ctsieelnia zho stib; sca nagon rzaac naa wena, ni led xtiidzse naaw sac rien naa led tibd naa, Espiritu Sant nacie naa.

## 8

### *Bëel ne rgogon zho lo mdio*

<sup>1</sup> Stib wnabdiidz ne run to ga, dien zha nac guielwagw ne rgogon zho lo gre mdio, pe zrieelo gdioowa, te grieeloda ye. Zootle na grele to nan min co; per no hor zeene squi rzac ne grelew nan ne, lel racniats ne, laa ne gacndooladz ne gnee ne lo gre zha ne nacgre ne dien zha gun zho parne tsoguicraa zho Xtiidz Dios.

<sup>2</sup> Zha ne rzac grelew rac zho, ga rlu zho ganle peet riend zho.

<sup>3</sup> Tel Dios runbey me tib tib miech, nanpaa me cho nac zha ne rleyne me.

<sup>4</sup> Zhapaa dzigo gaca, ¿pe wena dioow ne xpëel gre ma ne rgogon zho lo mdio ga, te wenda ye? Ndionle ne ganle gre mdio ne riegana miech led Diosd ga, tibaque men ne nac Dios no.

<sup>5</sup> No zho rzac nziandox Dios, nzian-dox men rnabey no, no me no gbaa, nogaa me no lo guidzliu,

<sup>6</sup> sangue ne ndion ne ganle tibaque Dios no, lëe men co nac Pxoze ne, me psan gretaa ncuaane no, me psan ne parne dziuunbey ne me. Ni scaquejaa, tibaque men ne rnabey ne, lëe

me ga nac Jesús, me bzaa grëtaa ncuaane no, me nac men ne rneedz xquielmban ne.

<sup>7</sup> Per no zha ne riladzle Xtiidz Dios, bii gardaque guien zho ne tibaque Dios no. Tibaque rzac zho mban mdio, gane zeene rquuin zho bëel ne rgogon zho lo mdio racchop guic zho, lëëque zha runctal xtol zho ga sca run zho.

<sup>8</sup> Golguien sca, tel Dios rwid me dien cho pe row. Guiabd ne togo por gow ne o gowdgaa ne bëel co laa ne guiannziiu lo me.

<sup>9</sup> Laa to nanle nasca, peet nacda yquuin to guielwagw co, per scagaa golcobey adel min co yquiaaqui gunctal to xtol tib zha ne squi bii racchop guic.

<sup>10</sup> Sac gon, nenda tibliladz to zob to zaatne riegan grë miech mdio no-quuin to bëel co, ni gan tib zha ne bii racchop guica. Zeene gan zho to, nend yeque zho gbig gow zhow, per zeene lozh ga tibaque laa guic zho tsienie lëda ga been zho.

<sup>11</sup> Zha ne sca gun, niicle ne nli rien zho peet nacd ncuaane noyun zho ga, per por zha laa zha co gunctal xtol. Gunscade to, golguien ganle ye zho ga psilaa Jesús zeene gut me lo cruz;

<sup>12</sup> gacxe waa, telne sca gun to por to yquiaaqui gun zho tib ncuaane rzac zho nonguield, lole Jesús ga quiayun to falt.

<sup>13</sup> Min co nagon, tel naa mazd maase gowd naa bëel co, telne por min co yquiaaqui gunctal naa xtol tib zha ne nole xnëz Dios; sac lëda ga gun naa gac naa zig tib quie ne griel ni zho.

## 9

### *Mineriegual zha ne run xtsiin Dios*

<sup>1</sup> Zigne nagon zac gun to grë ncuaane wen ne racladz to, scaquegaa naa, zac gnab naa ncuaane wen ne racladz naa. Tel naa gonlo naa Jesús men ne rnabey ne, Dioszhal bzo naa pxeel me naa none naa Xtiidz me. Ne squi ptsëe Dios lo xquielmban to

zeene bialseed naa to, i rlu ganle me nacnie naa.

<sup>2</sup> No zha ne rzac nlid Dios pxeel naa, sangue to nanwen to ganle me pxeel naa, sac gonlo to mine ben naa, mine blu naa; ni scagaa niina, lo xquielmban to i rlu ganle ne nli xtsiin me quiayun naa.

<sup>3</sup> Grë zha ne sca rzac nlid Dios pxeel naa, rzac zho peet raguiald naa, gacnan zho ganle:

<sup>4</sup> ;Raguial naaw gon! Ni grëragaa zha ne rdziuungza no xtsiin Dios, riogual no gneedz to ncuaane yquuin no, gneedz to zaatne gbiaaz no.

<sup>5</sup> Tel naa, haxta raguial yquianie naa tib men wnaa ne gac tsiel naa, ine sënie naa me zigne run grëraa zha ne rdziuungza no dziin rii, zig nac Pedr, zig nacgaa grë zha bets men ne rnabey ne.

<sup>6</sup> ;Teloxaque grop no Bernabé naye znu zhaaque no dziuun no stib dziin, par gdziniaa no ncuaane dioow no?

<sup>7</sup> Golgan ganle, zig nac zha ne rzëeb lo xtsiin menguiib, ;niacxe zhaa lo dziin ne rdziniaa zho ncuaane row zho rio zho lo xtsiin menguiib? ;Zha ne rangaa, niacxe rieguald zho yquuin zho ncuaane rac zaatne ran zho? ;Zha ne na rangaa ma, niacxe rieguald zho yquuin zho ma zigne racladz zho?

<sup>8</sup> Guiabde to togo bod guicse naa riab mine rne naa nu, golgan ganle haxta lo ley ne psan Moisés

<sup>9</sup> no tib zaatne rnee: “Zeene guncun to xcon to dziin gzëeni ma mzion zhobxtil gacmbew, code to guix ro ma, golsaan gow ma mine yгаа ro ma.” Golwi ganle zha rnee Dios, nana pe nan to ngonse rquia zdoo me.

<sup>10</sup> Lëda gon, grëse ne rquia zdoo me ne. Ga rlu me ganle, zha ne run xtsiin me, ible riegual zho ycaa zho mine non xtsiin zho. Zig nacaque guielgon, zigtaa zha ne rana, zigtagaa zha ne runmbe grë guielnzaac co, ible riegual zho yquuin zhow.

<sup>11</sup> Tel no, rriequia nazho tib gon i bdziuun no biadseed no to Xtiidz Dios, ;niacxe rioguald no dzigo

gneedz to ncuane yquuin no?

<sup>12</sup> Blalaa zha ne nale griin riaadted lo to i, rnabey zho to rdeed to ncuane rquuin zho, ¿pe leḷ no dzigo rioguiald gnaba lo to? Mazdraa gon rioguial no gnab now, per haxta lo nadze gard dziuun no min co, notaa nan zha rdziniaa no ncuane rdioow no; zeena guiaand zdoow to, lozh ga laa to csaan mine nac Xtiidz Dios.

<sup>13</sup> Led nanle to ganle, grē zha ne run dziin len xyadoo Dios, psan me diidz grē ncuane nac gon, ga xen zho pe yquuin zho, zig nac zha ne run dziin zaatne nac lo pcoog, lo ncuane rielogon miech ga, ga rdioob ncuane row zho.

<sup>14</sup> Ni scaquegaa psan Jesús diidz, zha ne cseed miech Xtiidz me, ib none lo dziin co gdziniaa zho pe yquuin zho.

<sup>15</sup> Per tel naa gon, wlaltaa peet gard gnab naa lo miech.

Laa naa rzet min rii lo to, per guiabde to togo run naaw parne csilo to pe gneedz to lo naa. Ib zanaḷd naa min co, sac rley naa znu quiayazhd naa quiayun naa xtsiin Jesús, mazd maase guetgbin naa, lēdle ctiche zho guieḷbley rii lo naa.

<sup>16</sup> Niicle ne znu quiayazhd naa quiayun naa dziin rii, per ni lalnu racniatsd naa, sacne ible laa Dios bzo naa par gne naa Xtiidz me lo miech; ni, jprobsaxe naa telne gned naaw!

<sup>17</sup> Noyund naaw par dien pe premio yгаа naa, sac zig rne naa ga Dios bzo naa, me rnabey naa quiayun naaw, masaque nacse naa zig tib ngundziin.

<sup>18</sup> Par naa, lēele premio nu nac guieḷbley rii ne znu liga quiaseed naa miech Xtiidz Dios, rnabd naa gneedz-paa zho ncuane yquuin naa niicle ne ragual naa gnab naaw.

### *Tsoxco zho yгаа zho premio*

<sup>19</sup> Stiba mazdragaa wena, znu choot noneedzd ncuane yquuin naa, sac sca grieelod cho gnabey naa; per niicle ne nagon choot rnabeyd naa, zhaal naa rac naa zig tib ngundziin lo

grēse miech, parne gdeeda diidz tso guic zho sēeb zho xnēz Jesús.

<sup>20</sup> Gacxe waa zeene no naa lo grē zha Israel, rac naa zigne rac zho, zeena tso guic zho gliladz zho cho nac Jesús. Zeene nogaa naa lo grē zha ne zianaḷ xley zha Israel, niicle ne rnalodraa naa ley, per run naa grē ley ne zianaḷ zho, zeena sca grieelo yquiabladz zho sēeb zho xnēz Jesús.

<sup>21</sup> Scaquegaa zeene no naa lo grē zha ne runbeyd ley co, rioxco naa rac naa zig tib zha ne runbeyda; per guiabd ne togo haxta grē ncuane rleyniedraa Dios run naa. Laa naa run min co, zeena ye zho sēeb xnēz Jesús.

<sup>22</sup> Grē zha ne pense quiayacnan zha nac Xtiidz Dios, zeene no naa lo zho, rund naa gne naa grē ncuane gard guien zho zha nac, rund naa csanwin naa zho, sac mine rioxco naa lozh gliladz zho cho nac Dios. Tib tib miech, rguib naa rac naa zigne rac zho, parne grieelo gzodiidz naa lo zho cho nac Jesús, zeena gacnan zho zha sēeb zho xnēz Dios.

<sup>23</sup> Laa naa run min co, parne gdeeda diidz gnee naa Xtiidz Dios grēse lo miech, ni scagaa, gley naa gan naa ye zho yгаа lo guieḷndzon ne zhubnee lo Xtiidz Dios.

<sup>24</sup> Nanle to ganle zha rzac zha ne rie tib lo corr, nzian zho nac zha ne rie per tibaque zha ne run gan, zha co rcaa tib premio. Golgun cuent nasca tib lo corr i no to, grēse to goḷtsoxco xoon to zeena grēse to yгаа tib premio.

<sup>25</sup> Grē zha ne sca rio tib lo wguut, par grieelo gun zho gan rioxco zho ran zho xcuerp zho, rund zho ncuane csiaab xfuers zho. Nroob cuidad ne rap zho zho par gun zho gan tib coron guizh nguia ne znuse rgool. Scase nac premio ne rgaa zho, sangue ne gon, laa ne noxco yгаа ne tib premio ne gdziḷd dze nitlo.

<sup>26</sup> Gacxe waa, tel naa tibaque noxco naa dien zha xoonraa naa. Nanpaa naa pa gdziḷd naa, nacd naa zig zha ne riend dien pa gdziḷd, zha ne lega

rquiaagaa puñet, rdeete zhow zaatne nõ ygaaw.

<sup>27</sup> Ni lalnu rdete naa diidz gac mine racladztaa xcuerp naa, tibaque rnabey naaw parne guiena ncuaane nonguiel min co none guna, led gunda ncuaane racladztaaw. Laa naa run min co zeena gun naa gan, sac gon, guiel todox ga grieequia naa znu no naa none naa lo miech zha gun zho, ni tel lozh ga naapaze biaan bend naa gan.

## 10

### *Nodne gleynie miech mdio*

<sup>1</sup> Bets, bzian, golsoladz ganle zha bzhaac grë pxozgol ne zha ne sca bzënie Moisés ga. Pxeel Dios tibxcow been ncal zaatne zieetaa zho, ni pteed me zho lo Nisdoo Nizhnie.

<sup>2</sup> Zigtaa lo xcow cow, zigtaa lo nisdoo cow, masaque rrieequia lo co brobnis zho, parne tibaque niac zho niacnie zho Moisés.

<sup>3</sup> Grëse zho gon milagr nroob ne been Dios, bnabey me bliaal quietxtil zhan gbaa bdeed me dow zho,

<sup>4</sup> beencta me nis tib cho quie bdeed me go zho no zho dan bidz co. Lëële Jesús ga bdeed nis co go zho. Lo zho ga zo me, rrieequia me ga nac quie ne bda nis go zho, sac mese rzhixcuaa lo grëtaa xliaadz miech.

<sup>5</sup> Niicle scataa gon Dios zho, per led grëd zho bioxco nion xtiidz me, nacne ndal zho bnitlo bioliuse zho dan co.

<sup>6</sup> Gase na ganle gotsaa gwi ne zha bzhaac zho, zeena gzoobladz ne dziuun ne grë ncuaane ndzinlid ne been zho.

<sup>7</sup> Golguien gleyniede to mdio, zigne been zho. Rnee lo Xtiidz Dios: "Blozhse dow zho, go zho, laa zho psilo biee lo zhimdio zho."

<sup>8</sup> Gotsaa gwi ne ganle, pe guielne ne bgaa zho zeene brieequia bla zho lega bionie wnaa, tib dzeque bnabey Dios gut galptson mil zho. ¡Ni lalnu tsod guic to gun to min co!

<sup>9</sup> Ib gunglëëde to Dios, sac zha, zeene beungulëë zho me, bnabey me

brieequia grë meel pquiaa maw zho, ndal zho gut.

<sup>10</sup> Niicle glisquidgaa to tel pe nac mine quiayun me, sac tel zha, sca been palal zho; nacne pxeelaque me anjl ne rnitlo, ndal zho bnitlo anjl co.

<sup>11</sup> Sca nagon bzhaac grë pxoz gol ne ga, gotsaa guien ne sca dziuund ne mine been zho, mine been zho ga laaw zhobnee lo Xtiidz Dios parne gacndion new, guien ne zaacse gban ne, ne nac ne miech ne mban len dze rii ne znu ziaadyoble nitlo guidzliu.

<sup>12</sup> Gacxe waa, zha ne rzac mbanpaa zho zigne racladz Dios, none nsin so zho zeena gund zho ncuaane guntal xtol zho.

<sup>13</sup> Nli no ncuaane rcheep ne guntal ne xtol ne, per nacda ncuaane griin rien. Pe zhidaa miech ne zieded lo min co. Tsod mine guiab ne ib lëbd ne griee ne lo. Mine naca none gnalo ne Dios, sac tel me ib csaand me guiab ne tib lo ncuaane glëbd ne griee ne; sca nac xtiidz me, ni mesi gon ctsëed me mine rnee me. Me nac men ne gacnie ne grieelo griee ne low.

<sup>14</sup> Bets, bzian, golguien sca ib none csaan to grë mdio, gnalodraa tow.

<sup>15</sup> Miech nixbiini nac to, grë mine rne naa lo to nu, nan to ganle ncuaane rquina.

<sup>16</sup> Golwi ganle, zeene rdioow ne guietxtil, rdio ne vin, rdziuun ne xtsee ne been Jesús ga, ga rlu tipse nac ne grë ne nacie ne me.

<sup>17</sup> Niicle ne ndal nac ne, per ne tibaque guietxtil ne rdioow ne, min co gane tibaque cuerp nac ne grë ne, ni lëë xcuerp Jesús ga.

<sup>18</sup> Scaque zha Israel, zeene row zho xpëel ma ne riogon lo Dios, ga rlu zho ne nacie zho me.

<sup>19</sup> Zha ne rنالogaa mdio, zeene row zho grë ncuaane riogon lo mdio, scaque tibaque rac zho grë zho mdio. Per guiabde to togo mban mdio, togo mazdragaa nac bëel ne rgogon zho lo mdio.

<sup>20</sup> Mine racladz naa guien to, zeene sca run grë miech pe rgogon zho lo grë mdio, lo mendox ga rgogon



zhow, led lo Diosda. Golguien sca, ib tsiesëbde to lo grë zha ne quiyownie mdio, zeena gacniede to mendox.

<sup>21</sup> Lëdraaw ga gon gun to, tel rlozhse rquiin to xtsee ne psan Jesús diidz ga dziuun ne, ni tsieque to tsieguie to, tsietow to zaatne rownie zho mendox.

<sup>22</sup> ¡Gunscaade to, gunglëede to Dios! ¡Golguien ganle, lëbd ne dzian ne xquielblëe me!

### *Zha gun zha ne riladzle Jesús*

<sup>23</sup> Zig rne naa ga: “Nli zac gun ne ncuaane gacladztaa ne, per led grëda nonguiel.” Tel naa, zrieelo gun naa ncuaane gacladztaa naa, per led grëda yquiin par gun naa xyudar grëraa zha bets ne, lozh tsoguic zho Xtiidz Dios;

<sup>24</sup> sac gon, ib none dzioxco ne grëraa zha ne nacgrë ne.

<sup>25</sup> Zig nac grë bëel ne rdo lo lgui, zac gow tow, ib gunde to gnabdiidz to dien zha naca, sac gon nend bëel ne biogon lo mdiow, dzigo laa dzeb co tsonie guic to.

<sup>26</sup> Golguien ganle, Dios psan guidzliu, scagaa grëtaa ncuaane no low chen me naca.

<sup>27</sup> Zeene tel zha tsiegaa to tib wagw lidz tib zha ne gard gliladz Jesús, bëel ne gneedztaa zho golgowa, per scaque gnabdiidzde to dien zha naca; zeena peet dzeb tsonied zdoo to.

<sup>28</sup> Per telne grieequia tib zha ne gnë bëel ne biogon lo mdiow, gowde tow; zeena csande to zdoo zho.

<sup>29</sup> Niicle ne ndionpaa ne led dold ga gun to gow tow, per zha ne gana ga sadol zdoo zho.

Nana gnë to: “¿Pe nac dzigo por stib zho grieelod gun naa mine racladz naa?”

<sup>30</sup> Tel rded naa xquizh lo Dios zeene pe tib guielwagw ne rquiin naa, ¿pe nac dzigo por mine rzacse stib zho, grieelod gow naaw?”

<sup>31</sup> Golguien ganle, racda por zha cose; sac grëse ncuaane dziuun ne, haxta ncuaane dioow new, ncuaane dio new, none zeene nodziuun new

cxobnen ne ganle pa lotaa men nroob nac Dios.

<sup>32</sup> Gotsaa guien ne sca ganle dziuun ne ncuaane yquiaaqui csan ne zdoo stib miech, zigtaa zha Israela, zha stib guiedza, zha ne nolegaa xnëz Dios.

<sup>33</sup> Tel naa, zanaid naa ncuaane gdziladz naa naase, sinque rioxco naa grëtaa ncuaane run naa, run naaw par gacnie naa grëse miech, zeena grieelo tso guic zho gnab zho lo Dios csilaa me zho lo xtol zho.

## 11

<sup>1</sup> Golwi sca, zigne ran to noxco naa mban naa zigne blu Jesús, scaquegaa to goltsoxco gban to zigne ran to mban naa.

<sup>2</sup> Bets, bzian, rleynie naa to gon sac tibaque rsoladz to naa, ni rioxco to zienal to grë mine pseed naa to.

<sup>3</sup> Per golsoladz ganle: grëse men wnaa, none zha bgui gnabey lo zho, tel zha bgui Jesús rnabey lo zho, zigne rnabey Dios lo me.

<sup>4</sup> Gacxe waa, tel tib zha bgui yase nozodiidznie zho Dios, quiateedgaa zho xtiidz me, ni zob xombrel zho; xquielto Jesús ga rbee zho.

<sup>5</sup> Scagaa men wnaa, tel zhoobd bay guic zho ni zo zho nozodiidznie zho Dios, quiateedgaa zho xtiidz me, xquielto mgui ga rbee zho; sac ga rlu zho rond zho mine rnabey mgui.

<sup>6</sup> Telne racladzdgaa zho gdze lad guic zho, mazd gnabey zho chug guitsguic zho. Laa telne rtoladz zho chuga, rtoladz zho gacruxa, dzigo mazd cxobguic zho xpay zho.

<sup>7</sup> Grë zha bgui, nod pe nacne gdze lad guic zho, sac choot samiech guidzliu zho rnabeyd lo zho. Zeene bzaa Dios mgui, bzaa me zho zigne nac me, zeena glu zho ganle pa lotaa men non nac me; scagaa wnaa, laa wnaa biaan par glu zho ganle non mgui.

<sup>8</sup> Gotsaa gwi ne ganle, letxe xcuxtid wnaa waa biao mgui, sinque xcuxti mgui brie biao wnaa.

<sup>9</sup> Stiba, zeene psan Dios wnaa, ib laa me psan zho par gacnie zho mgui.

<sup>10</sup> Gacxe nagon waa ib none gdze lad guic wnaa, zeena glu ganle ngu-zobdiidz zho lo zha ne rnabey zho; haxta grë anjl ne no gbaa zley zho gan zho min co.

<sup>11</sup> Per guiabde to togo peet nond wnaa, golsoladz ganle psanle Dios didz zigtaa mguiw, zigtaa wnaaw rquiinsa zho; sac telne guiend wnaa guiend mgui, telne guiendgaa mgui guiend wnaa.

<sup>12</sup> Gotsaa gwi ne ganle, zeene biao wnaa cho mgui brie dzit ne biao wnaa, per zeene laa wnaa biaan, haxta lo nadze wnaale rzo mgui; zigtaa mguiw, zigtaa wnaaw Dios psan zho grop zho.

<sup>13</sup> ¿To nadien zha rzac to? ¿Pe nli nonguiela gdze lad guic wnaa zeene nonab zho lo Dios, te nonguielda ye?

<sup>14</sup> Golwi ganle ib no gdze guic wnaa, biaanle zho roob guits guic zho parne ctsew lad guic zho;

<sup>15</sup> Tel zha, haxta rleynie zhow zeene scataa noola, sangue ne nac ne zha bgui, guieltow ga guiool guitsguic ne.

<sup>16</sup> Tel nogaa zha ne rzac led scada, maase gnee zho. Per ible znu gon noseed no miech, ni grëragaa zha ne rliadzle Xtiidz Dios, rien zho ne nli scaw.

### *Zha none gac xtsee ne psan Jesús*

<sup>17</sup> Bets, bzian, ne nligaa rley naa tibaque rsoladz to naa, per bin naa zeene rcaalsa to row to xtsee ne psan Jesús diidz, laa ne gley to ycaalsa to, lel quiayuntal to xtol to. Mincosi nagon ni lalnu riidz doo naaw.

<sup>18</sup> Ziyon naa gzobtaa zeene rcaalsa to, pe na tsiegald tildiidz to, laa ne tipse gac to lel rleëlsa to. Ni rgobey naa nli scaw.

<sup>19</sup> Rien naa masaque rzac to ible sca none gac to, parne glupaa cho nac zha ne non xtiidz, zeena guianziuu zho lo miech.

<sup>20</sup> Led zhixtseedraa Jesús i gon run to.

<sup>21</sup> Sac ron naa zeene laa to row, masaque lëëlëd rac to row to ncuaane zienie to, ib rwide to no zha ne rdzin ga quianied zho nroob ncuaane gow

zho. Squi rzob to rowcho to, haxta rzudz to; laa zha mbanse rac zho grieelod gow zho ncuaane row to.

<sup>22</sup> ¿Mod guiend lidz to, ga sob to gow to, guie to haxta zaatne guieltaa to, led node to runctoladz to zha ne squi guiend pe yquiin? I gon rlu to rleyniede to grë zha ne no xnëz Dios. ¿Ni palal gon rdziguiend naa ncuaane noyun to i!

<sup>23</sup> Golsoladz ganle zha nac ne laa xtsee rii biaan, Jesús psan diidz gaca, sca gocnan naaw ni scagaa biallu naaw lo to. Wdze ne bnaaz zho Jesús ga, zeene blozh dowxtseenie me xpëëdscuel me, bzhen me tib guietxtil, bdeed me xquizh lo Dios;

<sup>24</sup> blozhse bdeed me xquizh, nzian lë been me guietxtil co, bdeed mew lo zho rëb me: “Golquiina, rriequia lëë xcuerp naa nu, sac gon znu gun zho xcuerp naa parne csilaa naa to grë to. Golgun xtsee rii, parne glu to ganle tibaque rsoladz to naa.”

<sup>25</sup> Blozh ga, scaque bzhen me tib cop no vin, rëb me lo zho: “Lëë stib trat cub nu gon riaan Dios grë me miech, rriequia xchen naa nu nac vin rii, ren ne tso sell trat co par glu nona. Gzataa zeene znu guie to vin, golsoladz ganle zha naca.”

<sup>26</sup> Golguien sca, zeene guntaa to xtsee co zaacse golguna, sac gon, ga quiaxobnen to lo miech Jesús nac men ne gut xcuent to, psilaa me to. Tibaque none gun to xtsee co, haxta gdzin dze ne laa me guiaad stib.

<sup>27</sup> Gacxe waa, zha ne rieniewguit guic rquiind zho xtsee co zigne no yquiin zhow, dol nroob ga run zho, xcuerp Jesús ga, xchen me ga noguitnie zho.

<sup>28</sup> Zeene gun to xtsee co, none wen wen sob to ganle zha naca, pe nacne laaw rac, dzigo lozh ga zac yquiin tow.

<sup>29</sup> Sac gon zha ne lega gow guietxtil co, lega guie zho vin co, sac zhow zig beelze pe xtsee; rriequia guielne ne ygaa zho ga gow zho, guielne co ga guie zho.

<sup>30</sup> Min cocxe waa, blactaa zha ne nacgrë to i quiayaan nsis, nogaa zho rzacnële, haxta nzian zho gutle.

<sup>31</sup> Telne niaca mine wen wen gwi ne ganle zha nac xtsee co, tsod pe nacne pe guielnë ne cxeel Dios dzian ne.

<sup>32</sup> Ni zeene scagaa rteed me ne tib caxtigw, laaw run me parne tsa ne biini gbiire gbig ne lo me, zeena led yed ne nitlo gal dze ne nitlo grëraa miech ne zienal ncuaane lo guidzliu rii.

<sup>33</sup> Bets, bzian, golguien sca zeene ycaalsa to gun to xtsee co, golcuëz grëraa zha ne nacgrë to dzigo tipse golsilo golquiina.

<sup>34</sup> Tel zha ne rienгаа лёbd zho lozh gdziñ grëraa zha ne nacgrë zho, mazd gowgazh zho lidz zho, zeena yguibd zho ygaa zho guielnë co.

No spalal mine racladz naa gacnan to, per naa zeene guial naa nëz qui dzigo gne naaw lo to.

## 12

### *Guielbiini ne rdeed Espiritu Sant*

<sup>1</sup> Bets, bzian, nugaa na ganle laa naa gzet zha nac guielbiini ne rneedz Espiritu Sant, sac racladz naa wen wen guien to zha naca.

<sup>2</sup> Rsoladz to ganle zeene gard gliladz to Xtiidz Dios, nëzrii nëzrec bio to güeygan to stib stib grë mdio, ncuaane ni tib lan diidz rneed; sangue Dios ne rliladz to niina, led scad nac me.

<sup>3</sup> Per nsin golso dien cho nac zha ne noteedpaa xtiidz me, sac nzian zha ne rnee xtiidz Espiritu Sant noteed zho lo miech, per tel rzo zho rdzibdee zho Jesús, ga rlu rquidie zho. Sac zha ne nli nacnie Espiritu Sant, rdzibdeed zho Jesús, sinque rlu zho ne me rnabey zho, ni haxta dib zdoo zho rnee zhow.

<sup>4</sup> Tib tib zha ne rliladz Jesús, zhaase zhaase nac guielbiini ne rgaa zho, per tibaque men ne rdeeda, lëe men co nac Espiritu Sant.

<sup>5</sup> Nzian mod zrieelo dziuun ne dziin lo Jesús, per grëse ne me rnabey ne.

<sup>6</sup> Tib tib ne zhaase zhaase mod ne rlu Dios nacnie me ne, per grëse ne me nac men ne rlu zha dziuun ne xtsiin me.

<sup>7</sup> Guielbiini ne rneedz Espiritu Sant lo ne tib tib ne, laaw rneedz me parne dziuunlsa ne xyudar grë zha ne nacgrë ne gacndionraa ne zha racladz Dios.

<sup>8</sup> No lo zho rdeed me guielbiini rien zho zha cso zho diidz lo miech, no lo zho rdeed me guielbiini rseed zho grë ncuaane ngañ ni rlu zhow lo miech.

<sup>9</sup> No lo zho rdeed me guielbiini dib zdoo zho rnalo zho Dios, niicle ncuaane mazdraa ngañ rnab zho lo me, raca.

No lo zho rdeed me guielbiini zeene rnab zho lo Dios, riac grë men rzacnë.

<sup>10</sup> No lo zho rdeed me guielbiini rnab zho lo Dios rac grë milagr,

no lo zho rdeed me guielbiini rteed zho xtiidz Dios lo miech,

no lo zho rdeed me guielbiini rien zho cho nac zha ne nlipaa nacnie me, cho zhagaa nacnie mendox.

No lo zho rdeed me guielbiini rnee zho stib diidz ne gard cseed zho,

no lo zho rdeed me guielbiini rien zho pe rnee zha ne rnee diidz co, dzigo rnee zhow.

<sup>11</sup> Grëse guielbiini, Espiritu Sant rdeeda, ni me nan pa mine rneedz me lo ne tib tib ne.

<sup>12</sup> Lo grëse ne ne nac ne zha ne no xnëz Jesús, rriequia xcuerp me nac ne. Tel cuerp, niicle ne nzian part niaaw, per tibaque naca.

<sup>13</sup> Ndal miech ne nac xcuerp me, no zho nac zha Israel, no zho nac zha zit, lo grë zho no zho ngadoo lo ben, nogaa zho zonlaa, per grëse ne tibaque Espiritu ne nacnie ne, sac tibaque Espiritu bgaa ne zeene brobnis ne.

<sup>14</sup> Gotsaa gwi ne ganle, no ni ne, no nia ne, no diag ne, nzian lë niaa xcuerp ne, per tibaque naca.

<sup>15</sup> Gacxe waa telne niaca mine rnee ni ne, grieelod guiaba porne nacda nia ne, nacda xcuerp ne.

16 Scaque diag ne, grieelod guiaba porne nacda bziaalo ne led yedraaw nac xcuerp ne.

17 Sac telne niaca mine gdipse xcuerp ne niaa bziaalo ne, ¿zha nadien gon ne? Telne gdipsegaa xcuerp ne niaa diag ne, ¿zha gzoobzhi ne?

18 Lëezhe wen led scad psan Dios xcuerp ne, sinque grëse part ne niaaw bzaa mew zigne gocladz me, psanse mew zaatne rquiina tib tiba.

19 Sac telne tipse niaa grëse part ne nac xcuerp ne, ¿zhazhe rlu ncuaan co!

20 Goda sca, sinque zhaase zhaase nac tib tib part co, per grësew tibaque cuerp naca.

21 Gacxe waa grieelod guiab bziaalo ne lo nia ne: “Ib rquiind naa luu”; guiaabgaa guic ne lo ni ne: “Ni lalnu rquiind naa to.”

22 Grëse part ne niaa xcuerp ne nose zaatne rquiina, haxta mine mazdraa nda lëë min co rquiinraa.

23 Stiba, no part ne niaa xcuerp ne rzac ne zhi nona, no part haxta rtoladznie ne, per gotsaa gwi ne ganle part co nac zaatne ranraa ne, rioxco-raa ne rdze;

24 sangue part ne nziuu lo ne, zienied guic ne dien zha gdzew. Ible sca psan Dios xcuerp ne, zeena sca gacnon part ne rzac ne zhi non.

25 Sca niaa xcuerp ne, grëse part ne niaaw rquiinlsaw xcompañera; led yeda rtsolsa.

26 Golwi ganle, zeene në tib part xcuerp ne, grëse part ne niaaraaw zienie në co; scaquegaa zeene rdioon tib part co grësew zienie guielbley co.

27 Laa naa rne min rii lo to, sac racladz naa guien to sca none tipse gac to. Golguien ganle xcuerp Jesús i nac to grë to, tib tib part ne niaa cuerp co i nac to, rquiinlsa to zha ne nacgrë to.

28 Ni zigne sca tib tib part ne niaa cuerp nose zaatne rquiina, scaquegaa grëse zha ne no xnëz me, bzose Dios zho pe nac dziin ne gun zho: no zho rienee xtiidz me lo miech, no zho rteed xtiidz me lo miech, no zho rseed miech xtiidz me,

no zho rnab lo me rac grë milagr nroob,

no zho rnab lo me riac men rzacnë, no zho rioxco run xyudar grë miech, no zho rzo rac zho zha rnabey, nogaa zho rnee grë diidz ne gard cseed zho.

29 Golgan ganle, psod me zho grëse zho tsienee xtiidz me lo miech, grëse zho cteed xtiidz me, grëse zho cseed miech xtiidz me, grësegaa zho gnab gac milagr.

30 Niicle psodgaa me zho grëse zho gnab guiac men rzacnë, grëse zho gnee stib diidz, grësegaa zho gnee zha nac grë diidz co.

31 Zhaase zhaase nac guielbiini ne rgaa tib tib zha ne no xnëz me, per goltsoxco ygaa to guielbiini ne mazdraa rquiin.

Sca nagon naca, per golquiaadiaga ganle, nu laa naa gzet lo to stib mine mazdraa non lo grë guielbiini rii.

## 13

### *Guiewleynie*

1 Mine mazdraa rquiin gon nac ne gleynie ne samiech ne. Tel niaca mine bgaa naa guielbiini rne naa grë lose diidz ne rnee miech, haxta grë diidz ne rnee xanj Dios rne naa, ni tel rleynie naa samiech naa, ¿pa dien rquiin rac naa grëta diidz co? Rrieequia nac naa ga zig tib lë guib ne loxaque rzedz.

2 Tel niaca mine rteed naa xtiidz Dios lo miech, rien naa pe nac mine naraa cxobnen me, grëse wseed ne no rien naa, ni rleynie naa samiech naa, ipaat rquiinda! Tel dib zdoogaa naa rnalo naa Dios, haxta ncuaane mazdraa ngan rnab naa run mew, ni rleynie naa samiech naa, ipeet nonda!

3 Tel quiizgaa naa grë ncuaane quianie naa lo grë zha ne guien pe yquiin, haxta gded naa naa tsec naa, per tel rleynie naa samiech naa, ¿zhlëse ga gun naa min co!

4 Sac gon zha ne nli mban zigne nac guiewleynie co: rievednie zho samiech zho,



wen rac zho lo samiech zho,  
 racnëd zdoos zho, niicle ran zho wen-  
 raanoded stib miech lo zho,  
 runð zho ne lëëque zha gunnon zho,  
 racniatsd zho lo samiech zho,  
<sup>5</sup> runð zho ncuaane coguieinë zho,  
 gunglëëgaa zho samiech zho,  
 zienald zho ne tebaa lose zho yquiin  
 grë pe cos,  
 nacd zho zha ne lega zolëë,  
 rapguieinëd zho samiech zho,  
<sup>6</sup> ni lalnu riod zdoos zho miñe run zha  
 ne rsacsi samiech,  
 miñe rleyne zho nac diidzli.

<sup>7</sup> Zha ne nli rleyne samiech, ni  
 lalnu peet grieelod yca gleyne zho  
 zho; rquiaadiag zho miñe rnee zha  
 co, rzhidznied zho zho; tibaque  
 rquiablazd zho wen grieequia zho,  
 rsaand zho zho, tibaque racnie zho  
 zho.

<sup>8</sup> Zdzin dze yquiindraa cho cteed  
 xtiidz Dios lo miech, yquiindraa  
 gnee zho stib diidz, yquiindraa grë  
 guieirac, sangue guieiwleyne gdziind  
 dze ne nitlow.

<sup>9</sup> Niicle ne nogaa ne guieibiini ne  
 rneedz Espíritu Sant, niicle no zha  
 ne rien zha gnee zho Xtiidz Dios lo  
 miech, per palalse nac ncuaane rien  
 ne niina.

<sup>10</sup> Sangue gal dze ne laa Dios lozh  
 gzhixcuuaa ne zigne no gac ne, grëse  
 guieibiini ne rdziaap ne niina, paat  
 yquiindraaw.

<sup>11</sup> Masaque nac ne niina zig tib  
 mëëdlas. Tel naa, zeene goc naa  
 mëëdlas grëse ncuaane bne naa, grëse  
 ncuaane bien naa, grëse ncuaane  
 pseed naa, grëse ncuaan co beñ naaw  
 zigne run grëraa mëëdlas. Per zeene  
 laa naa broob, laa naa biala biini,  
 grëse ncuaan co laa naa bienpaa zha  
 naca; laa guieimëëdlas co bded.

<sup>12</sup> Scadaa nagon rziaac ne niina,  
 palalse rien ne zha nac Dios, rrie-  
 quia rdzianse ne me niina zigne ran  
 ne zhimlë ne lo beelze pe tib lë vidr;  
 per dzin dze laa ne dzianlo me zigne  
 nacpaa me. Palalse ndion ne ni-  
 ina zha nac me, palalse rsilo rdzian

ne me, per gal dze co laa ne dzi-  
 uunbeypaa me zigne runbey me ne ni-  
 ina, nanpaa me zha nac zdoos ne tib tib  
 ne.

<sup>13</sup> Golgacnan sca ganle, grë guieibiini  
 co dzin dze ne yquiindraaw, sangue  
 ne znu: dib zdoos ne rnalo ne Dios,  
 noniepaa guic ne zac mine rnee me,  
 ni rleyne ne samiech ne, lozhda. Per  
 lo gza tsona nagon, guieiwleyne co  
 nac miñe gdziind dze ne gdzëë.

## 14

### *Zha ne rnee stib diidz*

<sup>1</sup> Laa to nanle pa miñ nac miñe maz-  
 draa non, igolleyne samiech to sca!  
 Per scagaa golnab ygaa to guieibiini  
 ne rneedz Espíritu Sant. Zig nac  
 guieibiini ne rgaa zha ne rteed xtiidz  
 Dios lo miech, golnab ygaa to miñ  
 co zeena sca grieelo cseed to miech  
 xtiidz me.

<sup>2</sup> Sac tel zha ne rgaa guieibiini rnee  
 zho stib diidz, zeene rnee zho diidz co  
 choot riend dien pew, sac lo Dios ga  
 rnee zho. Tel pe nac miñe rnee zho  
 ga, Espíritu Sant rsiaaba guic zho, per  
 choot racnand dien zha naca.

<sup>3</sup> Sangue zha ne rgaa guieibiini rteed  
 zho xtiidz Dios lo miech, miñe rnee  
 zho ga rquiina par tsoguicraa miech  
 zha racladz me, par guien zho pe  
 nonguiel gun zho, ni rchooblazda  
 zdoos zho.

<sup>4</sup> Tib zha ne sca rnee stib diidz,  
 lose zho rquiin guieibiini co, sac zhase  
 rioguicraa zha racladz Dios; sangue  
 zha ne rteed xtiidz me, diidz ne rnee  
 zho rquiina lo grëraa zha ne no xnëz  
 me, grëse zho rioguicraa zha racladz  
 me.

<sup>5</sup> Wena tebaa grëse to ygaa  
 guieibiini co gnee to stib diidz, per  
 mazdraa gon wena cteed to xtiidz  
 Dios lo miech, cseed to miech xtiidz  
 me; sac miñ co mazdraa rquiin, lëdle  
 gnee to stib diidz. Zacaquegaa gnee  
 to stib diidz co, totsaque lozhse gnee  
 tow, gneegazhaque to dien zha naca;  
 zeena sca yquiina lo grëraa zha ne no  
 xnëz Dios.

<sup>6</sup> Bets, bzian, to gase nadien, tel  
 niaca miñe glanso naa lo to i csilo naa

gne naa stib diidz, ¿pa dien yquiina lo to? Per tel glanso naa, ine csilo naa clar gne naa lo to pe nac mine zinee Dios lo naa, pe nac gre mine rien naa, pe nac mine ziaadyob gac, zha nac gre mine zhobnee lo Xtiidz Dios, led grese min co zien to zha naca, ni squiina lo to grese to.

<sup>7</sup> Haxta gre ncuaane rool miech, zig nac bzie zig nacgaa vihuel, tel csilo zha ne noyoola tel zhataa gool zhow, ¿zha dien guien miech pa di noyool zho?

<sup>8</sup> Zig nacgaa zha ne rcuedz cornet lo menguib, telne tel zhataa ycuedz zhow, ¿zha dien gacnan menguib pe nac vis ne quiayun zho?

<sup>9</sup> Scadaa nagon run to zeene rnee to stib diidz lo miech, ¿zha nadien guien zho pe nonee to? Rriequia lo mese g rnee to.

<sup>10</sup> Zig nac lo guidzliu ndal lo diidz rnee miech, per tib tiba nose mod ne rnee zhow, nose zha ne riena.

<sup>11</sup> Telne guiaad tib zho lo naa csilo zho gnee zho, ni rien naa pe quianee zho, grielod guien naa pe racladz zho, guienгаа zho zha rzaac naa.

<sup>12</sup> Nana sca, zha ne rquiabladz yгаа guielbiini ne rneedz Espiritu Sant, gnab zho yгаа zho mine grieelo yquiin lo greeraa zha ne nacgre zho, zeena gre zho tsoguic zha racladz Dios gban zho.

<sup>13</sup> Gacxe nagon waa, zha ne rneele stib diidz, none gnab zho gdeed Espiritu Sant guielbiini lo zho guien zho pe nac gre diidz co, parne gnee zhow lo miech;

<sup>14</sup> sac zha ne sca rnee stib diidz, tel so zho gnab zho lo Dios, rien zho pe nonab zho, loxaque zhiespirituse zho quianee ga.

<sup>15</sup> Gacxe waa zeene gnab ne lo Dios, zeene goolniegaa ne me, zac gnee ne stib diidz, per scagaa none gnee ne diidz ne rien ne, mine riengaa greeraa miech.

<sup>16</sup> Sac gon tel stib diidz nonee ne noyoolnie ne Dios, nodeed ne xquizh lo me, ¿zha dien yquiab greeraa zha ne ndxie ni rien zho pe rnee ne?

<sup>17</sup> Niicle ne ndzon sca nodeed ne xquizh lo Dios, per zha ne noquiaadiaga ga, paat yquiinda lo zho.

<sup>18</sup> Xquizh Dios, tel naa ye naa rne stib diidz, ni mazdraa gon rne naaw que zha ne rneew lo to i,

<sup>19</sup> per zeene zo naa zaatne ndxie gre zha ne noquiaadiag Xtiidz Dios rund naa ne gnee naa stib diidz, sinque rne naa mine guien zho. Rien naa wenraaw gne naa maase gaayaque lan diidz, per mine guien zho, ledle so naa gne naa tsii mil diidz, ncuaane ni tib choot guien.

<sup>20</sup> Bets, bzian, golguien sca golsaan guielmeedlas qui. Zacgaa gac to meedlas per nez lo guielntseeba, sangue xpensar to golgac zig zha ne biaa biinile.

<sup>21</sup> Gotsaa gwi ne ganle zha nac stib diidz. Zhobnee lo Xtiidz Dios reb me, laa me cxeel miech stib dan miech ne rnee stib diidz, par gnee zho lo zha Israel; per niicle tsienee zha co, ib guien zhow.

<sup>22</sup> Gase naganle rlu rquiind stib diidz co par gre zha ne rnalole Dios, sinque laaw rquiin parne gre zha ne nod xnéz me gan zho ganle nli no me. Zha ne nole xnéz me, zha co rquiin gon zho pe nac mine racladz me gacnan zho, pe nac mine zhobnee lo Xtiidz me.

<sup>23</sup> Per niicle scaw, telne zob bla zha ne sca gard gliladz Xtiidz me, zobгаа bla zha ne pense rsilo rquiaadiaga, ni csilo to gnee to stib diidz, zeene gan zhow leetaa mine guiab zho rzhinle guic to sca rac to.

<sup>24</sup> Laa telne grese to no noteed to xtiidz me, nonee to mine racladz me gacnan miech, zha ne sca gard gliladz Xtiidz me, zha ne sca pense rsilo rquiaadiaga, zeene gon zho greetaa mine nonee to, haxta ziaa zho biini zien zho ne nli tib miech ngoopdol nac zho.

<sup>25</sup> Zigse quianee to laa zdoo zho lozh yguudz, laa zho ted yquiitsgzhib zho gnab zho perdon lo Dios; ga guien zho ganle ne nli nacie me to.

<sup>26</sup> Bets, bzian, golguien sca zeene ycaalsa to cseed to Xtiidz Dios, zig-

taa zha ne goola, zha ne cteed xtiidz Diosa, zha ne gnee stib diidza, zha ne gneegaa zha nac diidz co, none tsienie guic zho mine gun zho ga laaw yquiin parne tsogucraa los demas zho zha racladz Dios gban zho.

<sup>27</sup> Zeene gnee zho stib diidz, none choptaa zho, tson>tagaa zho gneew. None tibga zho gnee, ni rquiin zole zha ne gnee pe nac diidz co.

<sup>28</sup> Laa telne guien d zha ne grieelo gnee dien pe naca, nodne gnee zhow; mazd len zdoose zho gnee zhow, Diosse gon pe nonee zho.

<sup>29-30</sup> Scaque zha ne cteed xtiidz Dios, choptaa zho, tson>tagaa zho gneew, laa grëraa zha ne ndxie none yquiaadiag zho mine nonee zho. Telne lëëtaque nonee tib zho, ni csiaab Dios guic stib zho gnee, dzigo none cuëz zha ne quianeele ga zeena grieelo gnee zha co.

<sup>31</sup> Sca none gaca, none tibga tibga zho gnee, zeena grëse zha ne ndxie grieelo gon zho dien pew, parne cseed zho, ni gacnguieelraa zho lo Xtiidz Dios.

<sup>32</sup> Zha ne sca rteed xtiidz Dios, none cseed zho gnabey zho zho, cuëz zho nieeda gdziñ hor ne gnee zho.

<sup>33</sup> Sac tel Dios, rdziladzd me guiots gnaaz pe cos, rdziladzd me ncuaane nzhiitni. Mine rdziladz me zaacse gac tib cos, ni scagaa run grëraa zha ne no xnëz me.

<sup>34</sup> Ni stiba, zeene sca rcaalsa to, racladz naa guien grë men wnaa dzese sob zho. Nodne so zho ye zho gnee, sac gon mgui rnabey zigne zhobneeque lo Xtiidz Dios.

<sup>35</sup> Ncuane racladz zho gacnan zho, ro yu ga gnabdiidz zhow lo zha bgui, sac gon, rdzieelda lëëpaaze wnaa gnee zaatne rcaalsa to rquiaadiag to Xtiidz Dios.

<sup>36</sup> Zaacse sca golgac, golguien ganle grieelod gun to mine notaa guic to, sac gon led loxaque todse nac zha ne runbey Xtiidz Dios, par guiab to zigne racladz to gac tib cos, sca none gaca.

<sup>37</sup> Mine rne naa lo to nu xtiidz Dios naca, zha ne rteed xtiidz me lo to i,

zha ne rapgaa pe stib guielbiini ne rneedz Espiritu Sant, zha co gunbey ganle nli mine rnabey mew.

<sup>38</sup> Zha ne gliladzdgaaw, maase gliladzd zhow.

<sup>39</sup> Sca nagon naca. Goltsoxco sca ygaa to guielbiini cteed to xtiidz Dios lo miech, zeena gacnan zho zha racladz Dios gban zho; per scagaa, ib ycade to tel cho zha ne rnee stib diidz.

<sup>40</sup> Per zigne rne naa ga, grëse mine gun to none zaacse gun tow, tib tiba gacsew hor ne rieguiala.

## 15

### *Brieaban Jesús*

<sup>1</sup> Bets, bzian, nu laa naa gbire gzet lo to ganle zha nac Xtiidz Dios. Zigne bialseed naa tow, scataque naca; led yeda rdzëë. Lëew ga pcaania to, ni haxta niinagaa rliladz tow.

<sup>2</sup> Lëew rlu zha grieelo ycaania Dios to, totsaque nli dib zdoo to bliladz tow, ni bii lëëgaaw rnalo to.

<sup>3</sup> Zeene bial naa lo to i, pseed naa tow zigne pcaaniase naaw. Gocnan to cho nac Jesús, gocnan to por xtol ne gut me lo cruz, zigne zhobneesew lo Xtiidz Dios.

<sup>4</sup> Gocnan to ganle zeene goc tson ngbidz pqueets zho me laa me brieaban, zigne raquietaquew lo Xtiidz Dios.

<sup>5</sup> Len dze ne brieabanle me ga, gonlo Pedr me, niicle grëragaa zha ne nacgza Pedr bzënie zho me, gonlo zho me sac güeyted me lo zho.

<sup>6</sup> Güey me güeyted me zaatne ndxie ndziibsräa gaay gayoo zha ne nole xnëz me, grëse zho gon me; ndal zha co bii mban niina.

<sup>7</sup> Bded ga gonaque Santiagw me, ni biire güey me lo zha ne bzënie me ga stib;

<sup>8</sup> goc palal tiempa, lega naclew haxta lo naa brieequia me. Tel naa gon, rrieequia nac naa zig tib mëed ne rzamëed,

<sup>9</sup> lo grëraa zha ne nac poxtl, ni lalnu peet nond naa, per ni rdzieeld gnee zho naa poxtl; sac gon pa lotaa ptsidil

naa grë zha ne glopaa bzëëb xnëz Dios.

<sup>10</sup> Per xquizh Dios tibaque noxco me naa, bzooblo me naa gane laa naa nac mine nac naa niina. Ni led zhlëdgaa bzooblo me naa, sac gon nroobraa xtsiin me noyuu naa lo mine noyuu grëraa poxtl; per rned naa togo naase quiayuna, sinque me noyacnie naa rrieelo noyuu naaw.

<sup>11</sup> Laa naa rzet min rii, per nacda par glu dien cho nroobraa noyuu xtsiin me, sac mine mazdraa non nac ne noseed no miech Xtiidz me; lëew biadseed no to, ni bliladzdga tow.

<sup>12</sup> Nana sca, racladz naa gnë to dien zha nacne no bla to i rnee nlid grieegan menqut; led wen wen name gocnan to brieegan Jesús.

<sup>13</sup> Telne rnee to nlid grieelo grieegan menqut, rrieequia gon rnee to ga nlid brieegan Jesús.

<sup>14</sup> Nana telne brieegand me, paat rquiind mine dzigo noseed no miech nu, zhlëse znu noteed-xtse ne rnalo ne Dios.

<sup>15-16</sup> Rrieequia noquidiee no miech, sac gon tibaque rnee no lo zho bleeban Dios Jesús; ni telne nli rrieegand menqut, ye Jesús dzigo bii noliu me niina.

<sup>17</sup> Stiba, telne nlid brieegan me, zhlëse dzigo rnalo to me ycaania me to; telne nlid brieegan me, scase bii zëëb to grë xtol to.

<sup>18</sup> Grë zha ne bliladz me, zha ne nacle menqut niina, lëe bnitlole zho ga dzigo.

<sup>19</sup> Nana telne loxaque lo guielmban riise nona gnalo ne Jesús, ne dzigo nac miech ne mazdraa nxen.

<sup>20</sup> Per gacnan to sca ganle, ¡brieegan Jesús! Me nac men ne glopaa brieegan lo grëraa miech guizhiu ne grieegan.

<sup>21</sup> Grëse ne ne nac ne miech, ible laa ne none guet; sac laa guielgut biaan por mine been Adán; per niina ne laa Jesús biaad, por mine been me grëse menqut laa zho none grieegan.

<sup>22</sup> Zigne grëse miech ret porne ziaad zho lo xtii Adán, scaquegaa grëse

zha ne gbig lo Jesús, zgaa zho tib guielmban ndzon.

<sup>23</sup> Ible sca none gaca, ndion ne ganle laa Jesús brieeganle, ni zeene laa me guiaad, grë zha ne no xnëz me laa zho grieegan.

<sup>24</sup> Gal dze co laa me lozh gnitlo mendox ni grëraa ma ne nacie ma, dzigo laa me csan grëse miech ne no xnëz me lадznia Dios men ne nac Pxoze me; dze cotaa nagon laa Dios gon guielwxtis.

<sup>25-26</sup> Sac ible Jesús nonabey haxta gdzin dze co, zeene laa me gnitlo grëse meyozh ne rlëe lo me; zig nac guielgut, lëew nac mine lultm gnitlo me.

<sup>27</sup> Zigne zhobneeque lo Xtiidz Dios, lадznia me biaan grëtaa ncuaane no; per guiabd ne togo ye Dios no lадznia me, sac gon Dios nac men ne bdeeda lo me.

<sup>28</sup> Gacxe waa, zeene gal dze ne laa me sca lozh gnitlo grë zha ne rlëe lo me, Pxoze me nac men ne gnabey lo me; sac gon men co gocie me been me gan, ni men co nac men ne rnabey.

<sup>29</sup> Nana, ne rnee to i nlid rrieegan menqut, ¿pe nac dzigo no zha ne rrobnis xcuent zha ne gutle?

<sup>30</sup> Telne niaca mine nlid grieegan menqut, ¿pe nac nadien znu gzataa dze quiabeeladz no no lo grë guielxtseeb?

<sup>31</sup> Bets, bzian, nligaaw tel naa gon gzataa dze noxtseeb naa lo guielgut; nanle to ganle zeene rne naa rleynie naa to, diidzli rnee naa; scaquegaa niina, mine rnee naa nu diidzliw.

<sup>32</sup> Ne nligaa zeene glo bial naa guiedz Efés nu, ntseeb goc miech rii lo naa, pale grë ma ntseeb. Telne nlid grieegan menqut, zhlëse dzigo nodeed naa grë min co; mazd tel zhataa dzigo gban ne, zigne rëbaque diidz ne rëb: “¡Golgotsaa dioow ne, golgotsaa dio ne, benque guielgutse quiambiaaz ne!”

<sup>33</sup> Per lëda ga gon. Zha ne zienal min co, ib yquiaadiagde to xtiidz zho, zeena gacde to zigne nac zho; zigne



zëëbaque diidz: “Telne ndzinlid miech ne ctsieelsa luu, zdziñ dze ne gac luu zigne nac zho.”

<sup>34</sup> Golquix biini sca, guñctaldraa to xtol to; pe rtoladzde to, golwi ganle no bla to i gard sëëb xnëz Jesús, haxta ni rienđ zho zhapaa nac Dios.

### *Zha grieewan menğut*

<sup>35</sup> Nana, no to gnë: “¿Per zha grieewan menğut? ¿Zhazhe nac cuerp ne grieebannie zho?”

<sup>36</sup> ¡Aque nxen wnabdiidz co! ¿Perande to zig nac grë midz ne rioliu rac bni, rlozhse rnitlo midz co dzigo laa guizh ne naca ga rlan?

<sup>37</sup> Tel rnee to zha nac cuerp ne grieebannie zho, golwi ganle zig nac zhobxtil, zig nac grëragaa midz, ¿pe niacxe zigne nacsew riow liu, scasaque naca rлана? Led zeene laaw rlan, guizhle naca.

<sup>38</sup> Tib midzse naca riow liu, Diosle nac men ne rdeed zhiblaga zigne racladz me. Tib tib midz, psanle me dien zha gluw zeene laaw glan.

<sup>39</sup> Zigne zhaase zhaase nac tib tib midz, tib tib guizh, scaque nzian lo cuerp no.

Zig nac miech, zhaa nac xcuerp zho lo xcuerp ma, niicle magaaw, zhaa nac xcuerp ma ne no lo liu, zhaa nac xcuerp ma ne no lo nis, ni zhaaque nac xcuerp ma ne rsiibe.

<sup>40</sup> Grë anjl ne no gbaa, zhaa nac xcuerp zho lo xcuerp ne nac ne miech guidzliu; zhaa nac xquielniow cuerp co lo xquielniow cuerp ne no lo guidzliu.

<sup>41</sup> Gotsaa gwi ne ganle, zig nac xbiini ngbidz zhaa naca lo xbiini mëë, lo xbiinigaa mel. Niicle melgaaw, zhaase zhaase nac xbiini ma tib tib ma, no ma palalse rlu, nogaa ma rol rna.

<sup>42</sup> Scadaa nagon, zhaa rlu cuerp ne rap miech niina, ni zhaagaa glu mine ygaa zho zeene laa zho grieewan. Cuerp ne rdziaap ne niina, ncuaane tib rded naca, sanğue cuerp ne grieebannie ne gal dze co, led yedraa min co nitlo.

<sup>43</sup> Mban nac cuerp rii, sac rzacnëw, reta; sanğue cuerp ne grieebannie ne, tib cuerp ne gdziñd dze nitlo gaca. Lega zozhidz cuerp rii, sanğue cuerp co tib cuerp ndip ndaan gaca.

<sup>44</sup> Cuerp ne rdziaap ne niina, tib cuerp ngoopdol naca, sanğue cuerp ne grieebannie ne, min co gac tib cuerp ne gban zigne racladzpaas Dios. Sac zigne znu no cuerp ne rquini lo guielmban rii, scaquegaa no mine yquini stib lo guielmban ne gneedz Dios.

<sup>45</sup> Golsoladz ganle, rnee lo Xtiiidz Dios Adán goc miech ne glopaa biaan ni Dios nac men ne bdeed guielmban lo Adán; sanğue Jesús, me rap guielmban, ni zrieelo gdeed me guielmban co lo miech.

<sup>46</sup> Scaque nagon, glo rgaa ne cuerp ngoopdol ne rdziaap ne niina, dzig-oraa ygaa ne cuerp ne gban zigne racladzpaas Dios.

<sup>47</sup> Gotsaa gwi ne ganle, zeene biaan Adán yudiese bzaa Dios me; sanğue Jesús, men gbaa nac me.

<sup>48</sup> Grëse ne nac ne miech, cuerp ne rdziaap ne lo guielmban rii, zigne gocdaa xcuerp Adán naca; per zha ne gnalo Jesús, zeene laa zho grieewan laa zho gaple tib cuerp zigne nac xcuerp me.

<sup>49</sup> Masaque nac ne niina zigne goc Adán, ni scaquegaa zdziñ dze ne glu ne zigne rlu Jesús.

<sup>50</sup> Golgacnan sca ganle, cuerp ne rdziaap ne lo guidzliu rii, grielod gdziña zaatne rnabey Dios; sac rdziñ dze ne rnitlow, grielod gaca tib cuerp ne guete.

<sup>51</sup> Wen wen golzoobdiag mine gne naa lo to nu ganle, wlaltaa choot gard gacnana: Grëse ne ne nac ne zha ne rnalo Jesús, gal dze co zigtaa zha ne mbana, zha ne gutlegaaw ible stsëë Dios xcuerp ne.

<sup>52</sup> Znuse gac min co zig nacse zeene riab tib belye; lëë min co gac lultm vuelt ne ycuedz xanjl Dios zhitrompet zho. Zeene sedz trompet co, hor co grëse zha gut, laa zho grieebannie tib cuerp ne gdziñdraa dze

nitlo; scagaa grë zha ne bii zomban, hor co laa xcuerp zho gdzëë. ¡Grëse ne dziaap tib cuerp cub!

<sup>53</sup> Ible sca none gaca, ib none gdzëë xcuerp ne gaca tib cuerp ne xiñd, tib cuerp ne gdziñdraa dze nitlo.

<sup>54</sup> Zeene gac miñ co, ga grieequia mine raquiet lo Xtiidz Dios zatne rnee: “Nasi laa guielgut bñitlo, guielmbanle nac mine rnabey.

<sup>55</sup> Ah guielguta, ¿yora na zeene scataa psacsi luu? ¿Yora zeene scataa gocndip xtiidz luu?”

<sup>56</sup> Griee lodraa pe gun guielgut ne hor co, sac led yedraa hor co tso dol, led yedraa hor co gnabey ley; sac por dol gane rrieelo rsacsi guielgut ne niina, ni por ley rlu pe nac xtol ne.

<sup>57</sup> ¡Xquizh xquielnzaac Dios pxeel me Jesús, sac gon por Jesús zrieelo griee ne ladznia guielgut!

<sup>58</sup> Bets, bzian, ne nac to zha ne rleynie naa, golguien sca tibaque dziits golso lo Xtiidz Dios; zig zie dze goltsoxcoraa golgun xtsiin me, beñque nanle to ganle, grëse xtsiin me mine rdziuuñ ne nacda ncuane zhlëse.

## 16

### *Gon ne guey Jerusalén*

<sup>1</sup> Laa zig nac gon ne noyaclo guey gac xyudar grëraa zha ne no xnëz Jesús Jerusalén, laa naa rso diidz lo to zigne psoque naa diidz lo zha Galás.

<sup>2</sup> Tel palal run to gan tib len zmal, lo co golcob mine ral zdo to gdeed to gac gon co; gzobse dze goltsiesana lo zha ne noyunlow. Adel na ganle haxta glansoraa naa i, dzigoraa no to dien zha topa.

<sup>3</sup> Ni golzoobloga dien bla zha ne tsie tsiesana, na zeene glanso naa i dzigo yquia naa tib guits ne güey zho tsiesan zhow;

<sup>4</sup> ni tel rquiinpagaa ye naa ga, dzigo na maase ga naa ganie naa zho.

<sup>5</sup> Len dze rii no guic naa gateed naa nëz Macedon, dzigo gale griee naa glanso naa lo to i.

<sup>6</sup> Nend zbëz naa lo to i palal dze, togo iquegaa teed naa len mëe nal ne

ziaad; ni racladz naa zeene gbi naa i, siguiel to gun to xyudar naa tel pa nëz ne no ga naa len dze co.

<sup>7</sup> Telne zneedz Dios diidz cuëz naa lo to grë len dze co, zbëz naa, sac racladz naa tib guialteed naa lo to i.

<sup>8-9</sup> Niina ne no naa Efés nu, len dze riipaa rlu ndal miech ne no liaadz ycaania Xtiidz Dios, gane zbëz naa nu haxta ted lni Pentecostés. Nligaa ndal zha ne no liaadz co, per scagaa ndalaque zha ne rtsidila.

<sup>10</sup> Nacle diidz laa Timoté guiaad i; tel nanñ new naraa guiaad me, golsiguiel zeene glanso me zaacse golcaania me, zaacse golcuëzlo me, zeena tsonley zdo me; golgan ganle, ye me quiayun xtsiin men ne rnabey ne.

<sup>11</sup> Golguien csañwinde to me, sinque golgap me respet; zeena zeene glanso me lo naa nëz rii in nley gac me csoladz me zha biaadted me lo to i. Laa naa quiambëz glanso me nëz rii, gza me zha ne guiaadnalraa zhits me.

<sup>12</sup> Sangue bets ne Apol, blactaa bnab naa lo me niaadgza me zha ne ziaad i niaadgan me to, per rzac me griee loda niina. Rien naa zeene gdeedtaaw diidz, ible ziaad me ziaadgan me to.

<sup>13</sup> Bets, bzian, nsin golso, tibaque golnalo Dios. Ib ctsëede to xtiidz to, tibaque goltsoxco tsienal to mine rnabey me.

<sup>14</sup> Ncuane guntaa to, golconie guic to gun tow porne rleynie to Dios, porne rleyniegaa to samiech to.

<sup>15-16</sup> Laa naa rso diidz lo to, niowse gon golgac lo grë zha bets ne, zha ne run xyudar to i; zig nac Stef grë menlidz me, golgon xtiidz zho. Led nanle to ganle, Stef nac tib men ne glopaa bliladz Xtiidz Dios nëz Gres i grë menlidz me; ni desde dze co laa me pquiabladz tibaque squi quiayun me xyudar grëraa zha ne no xnëz Jesús.

<sup>17</sup> Rley naa gon zeene gon naa laa me blanso nu gza me Fortunat ni Acaic, haxta stib goc zdo naa goc-

nañ naa zha no to, masaque gun naa cuent grële lo to ga gon naa.

<sup>18</sup> Ne nligaa bloonley zho zdoo naa, ni rien naa scaquegaa to nley gac to niina zeene gon to zha no naa. Golguien gon zha non nac zho, golwi ganle pa lotaa nac dziin ne quiaayun zho.

<sup>19</sup> Grëse zha ne no xnëz Jesús nëz Asia nu, laa zho rxeeļ bdiuzh lo to, golcaania zhibdiuzh zho. Scaque Aquil grop me Priscil, ni grëraa zha ne rcaalsa lidz zho rieseed Xtiidz Dios, grë zho laa zho rxeeļ bdiuzh lo to.

<sup>20</sup> Scagaa grë zha ne no nu, ye zho laa zho rquiaabdiuzh to. Zeene ycaalsa to i, ine golnaaznialsa, golqueedzlsa, golcaania zhibdiuzh no.

<sup>21</sup> Nu laa naa cso schop lan xtidz naa lo to, ni golwi ganle naazhal yquiaw:

<sup>22</sup> Grëse zha ne gon nëd gleyniepaa Jesús, miech ndziibdeele ga nac zho. ¡Ni ile gon ziaad me!

<sup>23</sup> Mese nac men ne gacnien to, me nac men ne no zhixco to, sac ne nligaa rleynie me to.

<sup>24</sup> Niicle naaw rleynie naa to, sac gon tibaque nac ne ngab ne lo me. ¡Lëed bii gdzieel ne sca!

Pabl

## BROP GUILTS NE PXEEL PABL LO ZHA CORINT

¡Diuzh to grëse to!

<sup>1</sup> Naa nac Pabl, grop no bets ne Timoté, laa no rquia stib guits rii rxeel no guiedz Corinth i. Nanle to ganle Dios bzo naa, pxeel me naa none naa Xtiidz Ndzon Jesús lo miech.

Laaw ziaad lo to i, grëse to ne nac to zha ne ngab xnëz Dios; zigtaa tow, zigtaa grëragaa zha ne no dib nëz Gres iw.

<sup>2</sup> Dios men ne nac Pxoze ne, ni Jesús men ne rnabey ne, me gunlay to, me glu ganle pa lotaa noxco me to zeena peet zhgab ctsebde to.

<sup>3</sup> Bets, bzian, golgotsaa gwi ne ganle, ¡zha ndzontaa Dios, Pxoze Jesús men ne rnabey ne! Sac gon, pa lotaa rquia zdoo me ne, pa lotaa rchoobladz me zdoo ne

<sup>4</sup> lo grëtaa guielnë ne rdieed ne. Ni laa me rchoobladz zdoo ne gon, zeena scagaa grëraa zha ne rdzian ne no guielnë, mban rac zho, guio ne guiochoobladz ne zdoo zho zigne rchoobladzaque me zdoo ne.

<sup>5</sup> Zig nac niina, nroob guielnë ne nodieed no loxaque ne rliladz no Jesús, per scaquegaa ib rsaand me no tibaque nochoobladz me zdoo no.

<sup>6-7</sup> Laa no nodzian grë guielnë rii, sacne noxco no nonee no lo miech zha laa zho lo dol, parne scagaa grieelo cchoobladz no zdoo to. Lo grë guielnë rii, me nac men ne nochoobladz zdoo no, gane ndion no scaque squia zdoo me to, schoobladz me zdoo to zeene gdziñ dze ne laa to gan grë guielnë ne nodzian no nu niina. Ni me gon nac men ne gacniën to glëb to gan tow.

<sup>8</sup> Bets, bzian, tel niaca mine nian to ganle zha nactaa grë guielnë nroob ne bdieed no zeene no no nëz Asia. Ne nligaa nroob psacsi zho no, ncuaane lëbdraa no lo grë guielnë co, tibaque rdzieets no bod gataa niet no.

<sup>9</sup> Masaque bzhiaac no len dze co zig rzac tib zha ne nole guet, laa zho quiambëzse gal hor ne guet zho. Garaa bdzion no peet grieelod dziuun no ne nose, sinque Dios none gnalo no, mese zac csilaa no lo grëtaa guielnë; sac tel me, haxta mengut rbeeban me.

<sup>10</sup> Ni nligaa blee me no lo guielnë co, bla me no lo guielgut co; ni ndion no scaque zla me no lo grëraa guielxtseeb ne dzian no,

<sup>11</sup> totsaque gacnie to no tibaque gnab to lo me gacniën me no. Zeena, tibaque gac ne grëse ne gdeed ne xquizh lo me.

<sup>12</sup> Rley no sacne rien no choot noquidied miech, ndzinli mban no, zigtaa zeene zo no lo tow, zigtaa zeene zogaa no lo grëraa miecha. Per guiabd ne togo por niini now, sinque ne nquialadz Dios no gane quiayacniën me no znu mban no.

<sup>13</sup> Grë mine rnee no lo guits ne zixeel no lo to, niapse diidzliw, ni mine rgobey no grielo guien to miñ co rquiaa no; gane racladz naa gdziñ dze ne guien tow.

<sup>14</sup> Nli runbeydpaa to zha nac naa, per racladz naa gley to zeene ran to naa, zigne gleyaque naa gan naa to gal dze ne laa Jesús, men ne rnabey ne guiaad stib.

<sup>15-16</sup> Sca nagon rzaac naa, gacxe na ni naa glo nialgan naa to, dzigo ile nrie naa nia naa nëz Macedon. Ni zeene mbire naa nëz co, nialtedaque naa lo to i stib; zeena niac chop vuelt ne nionley zdoo to. Lozh ga, ine niowse nzonëz to naa nia naa nëz Judé.

<sup>17</sup> Ni pasëe naa nial. Per guiabde to togo bod notiblid guic naa zeene sca bne naa, o nacgaa naa zig nac grë zha ne laglaase rnee tib diidz, laa len zdoo zho nanpaa zho gund zhow.

<sup>18</sup> Dios zobwi ganle rdziuunscad no. Mine rnee no, rdziuun now.

<sup>19</sup> Golgan ganle, zigtaa naaw, zigtaa Silvana, zigtagaa Timotéw, no biadseed to cho nac Jesús, men ne nac



Xpëed Dios; ni zig nac Jesús, rquidied me. Grëse miñe rnee me run mew,

<sup>20</sup> ni grëse miñe psan Dios diidz gun me, grësew noyun mew; gane niicle nogaaw rnee no lo miech ganle ible run me miñe rnee me, ga rlu ganle pa lotaa men nroob nac me.

<sup>21</sup> Ni lëë Dios co gon nozhixcuua lo xquielmban ne, laa ne ngab xnëz Jesús niina; me bzooblo no nonee no Xtiidz me.

<sup>22</sup> Haxta pxeel me Espíritu Sant zdoon ne, rrieequia bloobey me ne ga, par glu ganle lo me ngab ne, ni ible zgaa ne grëtaa guielnzaac ne bneelee me gneedz me lo ne.

<sup>23</sup> Me zobwi, me nan ganle pe nacne gard guial naa. Gard gon guial naa, per por tow; sac rquia zdoon naa to, racladz naa loxaque guialquiago naa to i, lozh ga mban gac to.

<sup>24</sup> Guiabde to sca togo bod racladz no guiaad no. Nli rquiindraa to guidnee no lo to zha gliladz to Dios, sac dib zdoole to rililadz to me; per laa no racladz ine guiaadlonley no zdoon to i. Golguien sca, min co racladz no, racladz no guiaadloguielnë no to.

## 2

<sup>1</sup> Min co nagon bend naa ne nial naa,

<sup>2</sup> sac nonguielda ga coguielnë naa to, ni to nac zha ne rgonley zdoon naa.

<sup>3</sup> Ne racladzaxe naa min co waa, gane pxel naa tib guits co lo to glo, zeena nzhixcuuaale lo guielto ne nobee to i, zeene laa naa nlanso. Sac tel lega nlansose naa, laa ne ndzio ne guielbley, lel guielnë ndzio ne. Ni nan to ganle, tipse nac guielbley ne rdziaap ne; ¿niacxe zrieelo nley gac to telne ran to mban rac naa?

<sup>4</sup> Tel gan to ganle zeene pxel naa guits co, jne nlipaa mban rac naa no naa zhizhgab to! Haxta roon naa zeene noquiaa naaw. Laa naa pxel guits co lo to, per pxeld naaw par ngoguielnë naa to; sinque laaw pxel naa, zeena xixcuaniob lo ncuaane ndzinlid ne noyac i; ni laa naa ben min co sacne rquia zdoon naa to.

<sup>5</sup> Zeene bin naa zha nac dol ne noyun zha co i, zig rne naa ga: bio naa guielnë; per rien naa mazdraa nroob bio to guielnë.

<sup>6</sup> Nana gon, ne squi laa to pteedle zho tib caxtigw, jlëëlew ga na!

<sup>7</sup> Golguiaanladz miñe been zho ga, golneewen lo zho stib, golchoobladz zdoon zho zeena gacmband zho. Sac telne csaanladz to zho, nend scase lozh guiuu zho lo xquielnë zho.

<sup>8</sup> Rnab naa lo to, golleynie zho stib, zigne rleynieque to zho glo.

<sup>9</sup> Ni stiba, laa naa pxel guits co lo to, zeena dien pe zon to diidz gun to miñe rne naa lo to ga.

<sup>10</sup> Golguiaanladz miñe been zha co sca, tel naa laa naa biaanladzlew. Jesús zobwi ganle laa naa benle zho pardon, zeena gbiire zaacse gac to;

<sup>11</sup> ni scagaa gleyd mendox gungüet ma ne. Led nanle to ganle, zombëzle ma dien zha gnitnëz ma ne.

*Tibaque noxco Pabl cseed miech Xtiidz Dios*

<sup>12</sup> Bded ga nagon dzigo bia naa guiedz Troas. Zeene bdzin naa ga, ne nligaa bneedz Dios diidz niun naa xtsiin me ga.

<sup>13</sup> Nac diidz ga ndzieelo naa bets ne Tit, per zeene gon naa bdzin me, biotiblidraa guic naa. Nacne brieque naa ga bia naa nëz xtan zha Macedon, biaguib naa me.

<sup>14</sup> Per, ¡xquizh xquielnzaac Dios! Sac zaatne ziotaa no, Jesús ner lo no, me rlu ganle rdziun no gan lo grëtaa ncuaane rca. Tibaque rnee no lo miech gacnan zho ganle cho nac me, sca quiaxobnen no Xtiidz me, zig rzëbxlaa tib ncuaane nex rlaa.

<sup>15</sup> Haxta no, masaque nac no lo Dios zig tib ncuaane sca nex rlaa; sca nac no lo me sacne laa no ngable lo Jesús. Nëzrii nëzrec nex zëbxlaa gox co, zigtaa lo grë zha ne ngable xnëz Diosa, zigtagaa lo grë zha ne zie nëz ne nitlow.

<sup>16</sup> Par grë zha ne nole nëz ne nitlo, masaque rzac zho no zig tib gox ne nguid rlaa, haxta rsoladz zho pe nac guielgut ne quiambëz zho; sangue grë

zha ne nole xnëz Dios, rzac zho no zig tib gox nex ne runcsoladz zho guielmban ndzon ne no yгаа zho. ¡Ni led chold zha ne gon grieelo gun dziin rii!

<sup>17</sup> Nu rquiin zha ne dib zdo rquiabladz gun dziin lo Dios, glu zho ne nli Dios pxeel zho, ne nli Jesús nacie zho. Sac no zha ne, loxaque rquiaalo zho ye zho rseed miech Xtiidz Dios, per laa zho runa par cuee zho dimi.

### 3

<sup>1</sup> Nana ne znu rne naa, guiab to bod yeque no rdziuun zig run zha ne sca rquidie ga, lëëque zha runnon zho, rio zho dieen pe diidz ne rquia rey zho par glupaa dien cho nac zho. Ni lalnu rdziuunnond no no, niicle peet diidz rquiindгаа no.

<sup>2</sup> Led yed no rquiin pe diidz ne dzeey no, to rlu cho nac no. Grëse miech ne gan zha notsëë Dios lo xquielmban to, gase gunbey zho no, ga glu pe nac dziin ne rdziuun no.

<sup>3</sup> Gane rriequia nac to zig tib diidz ne quialu ganle cho nac no. Jesús zhal pquiaa diidz co, ni pquiind me pe tint ne nquiaa mew, sinque laa me pquiaaw con guielbiini chen zhiEspíritu Dios, men ne nguiamban. Ni pquiindгаа me pe lo guits ne nquiaa mew, sinque laa me pquiaaw zdo to.

<sup>4</sup> Ni ndionpaa no nli scaw, sac Dios zhal rluw, ne nac no zha ne ngab lo Jesús.

<sup>5</sup> Per guiabd ne togo nose rrieelo rdziuun grë mine rdziuun no, led scada, Dios nac men ne racien no rdziuun now;

<sup>6</sup> sac me bdixbiini no zha cseed no miech diidz cub ne psan me. Gane laa no noseed miech niina, per rseete no zho tsienal zho mine rnabey ley, sinque laa no noseed zho guien zho tsienal zho mine rnabey Espiritu Sant. Sac tel leya, lëë gdib rnabeya guet grëse miech ngoopdol; sangue Espiritu Sant, laa me rlu zha yгаа zho tib guielmban ndzon.

<sup>7</sup> Golsoladz ganle, zha blu Dios biini ne nac xquielndzon me zeene pcaania Moisés ley ne rnabey guet grë zha ngoopdol. Biinidoo ne biaan lo Moisés dze co, haxta lëbd lo zha Israel gwi zho lo me, per dzega dzega biuu biini co.

<sup>8</sup> Scaque nagon nolu Dios xquielndzon me, niina ne laa Espiritu Sant nolu zha yгаа miech guielmban; per, ¡mazdraa gon nroob nac guielndzon rii!

<sup>9</sup> Sac gon, tel scataa blu xquielndzon Dios zeene biaan guet grë zha ngoopdol; mazdraa dzigo nroob nac guielndzon ne rlu niina.

<sup>10</sup> Ne nligaa, palalse ga nac biini ne blu lo Moisés zeene pcaania Moisés ley co, mazdraa nroob biini ne ziaadnie xtiidz cub Dios niina.

<sup>11</sup> Ni stiba, bza dze ne been ley co dziin; sangue xtiidz cub me, gdziind dze ne gdzëëw. Gacxe waa, mazdraa nac biini ne ziaadniew.

<sup>12</sup> Ni ne ndionaxe no waa gdziind dze ne gdzëëw, gane tiblque laa no noneew lo miech;

<sup>13</sup> rdziuun no zig been Moisés. Sac tel Moisés, pquia tib lë lar lo me dzigo gond zha Israel zha bnitlo biini ne biaan lo me ga.

<sup>14</sup> Ni rriequia ye lo grë zha Israel ga sca bdze, gacxe waa, haxta lo nadze riend zho zha zhubnee lo Xtiidz Dios, mine psan me padzeela. Ible riend zho ne bdedle dze ne pquiin diidz gol co, Jesúsle none gliladz zho niina. Me nac men ne cxal lo zho.

<sup>15</sup> Ne nligaa sca nac zho, haxta lo nadze niicle rlabraa zho lo guits ne pquiaa Moisés ga, tibaque ndip nac zdo zho.

<sup>16</sup> Per tel zha ne csaan grë guielntseeb, dib zdo zho guien zho cho nac Jesús, ible zlit me lar co lo zho;

<sup>17</sup> sac gon, miech ne naciele zhiEspiritu me, led yedraa zho ngadoo lo ley gol co. Ni ndion ne ganle, meque ga nac Espiritu.

<sup>18</sup> Gacxe waa, grëse ne ne ngab ne xnëz Jesús, led yedraa lo ne ndze. Masaque nac ne niina zig tib

quiewan, zeene ran miech zha mban ne, ga ran zho ganle pa lotaa nac xquielndzon Dios. Tibaque nozhix-cuaa zhiEspíritu me lo xquielmban ne, zigse zie dze noluraa me zha nactaa guielndzon ne rap me.

#### 4

<sup>1</sup> Ne nligaa noxco Dios ne, gane niicle peet nond no laa me bzo no quia-nee no Xtiidz Ndzon me lo miech; ni choot rsaand dziin rii.

<sup>2</sup> Zeene rseed no miech, choot rquidied zho par gliladz zhow. Choot nolud wseed ne ziaate lo Xtiidz Dios; guieltole ga, tel dzio no yquidiee no miech, cseed no zho ncuaane nacdrea Xtiidz me. Me zobwi ganle niapse diidzli rnee no, niicle grëгаа zha ne rdziuunbey no, nan zho rquidied no.

<sup>3</sup> No grë zha ne ib nëd tsoguic zha nac zhiwseed Dios miñe nonee no; sac lëëque grë xtol zho notse lo zho, laa zho zie nëz ne nitlo zho.

<sup>4</sup> Nëd zho gliladz zhow, sac ible mendox (ma ne nonabey lo guidzliu rii) noyūñ ncow xquielrien zho; gane rienđ zho ycaania zho Xtiidz Ndzon Jesús, men ndzon ne biaadlu ganle zhapaa nac Dios.

<sup>5</sup> Laa no quiaseed miech, per rseete no zho gacnan zho dien cho nac no, sinque laa no noseed zho gunbey zho cho nac Jesús. Gacnan zho, ne me nac men ne rnabey; laa no, tib ngundziin winse nac no lo to, sacne rleynie no me.

<sup>6</sup> Ne nligaa tib ngundziin winse nac no! Golwi ganle Dioszhal, men ne bnabey biaan biini ne rziini guidzliu, me bdixbiini guic no bien no xquielndzon me ga biaadlu Jesús.

*Rsaand Dios zha ne dib zdoon rnalome*

<sup>7</sup> Ne nlipaa, lega nacse no zig nac tib guies yu ne notsow grëtaa ncuaane ndzon ne zieneedz Dios lo no. Gase na ganle rlu, Dios naccheña grësew, peet nond no loxaque nose.

<sup>8</sup> Me nacie no, niicle nroob zhgab ne rio no, per racmband no; niicle

nroob nac guielxtseeb ne rdzian no, per choot rdziebd.

<sup>9</sup> Tibaque notsidil miech no, per rsaand Dios no; niicle rsacsi zho no zootle laa no nitlole, per rbiire riochee no ga stib.

<sup>10</sup> Zaatne ziotaa no, quianañ miech gut zho no, zigne beenaque zho Jesús; per me rsilaa no ladznia zho. Ga rlu ganle ne men mban nac me, ni me nacie no.

<sup>11</sup> Gzataa dze noxtseeb no gut miech no, loxaque ne rdziuun no xtsiin me; per ga rdeeda diidz rlu no ganle pa lotaa nacie me no, niicle ne tib lëse ben nac no.

<sup>12</sup> Ne nligaa, tibaque noxtseeb no lo guielgut ne znu nonee no Xtiidz Jesús; per scagaa, porne biadnee now i laa to bgaa guielmban ne gneedz Dios lo to.

<sup>13</sup> Niicle nagon ne znutaa noxtseeb no, per ndionpaa no me quianap no, gane rdzieebd no noseed no miech Xtiidz me; zig zhobneeque lo Xtiidz me, zaatne rnee: “Bliladz naa miñe rnee me, gane rne naaw.”

<sup>14</sup> Ni ndion ne ganle, zigne bleeban me Jesús, scaque zbeeban me ne, lozh ga tipse gac ne gdzinnie Jesús ne lo me.

<sup>15</sup> Grëse guielnë ne nodzian no, laaw nodzian no sacne nligaa noxco no to; zeena grëse to sëëb xnëz me. Sac telne ndal grë zha ne sëëb xnëz me, scaquegaa ndal zha ne gdeed xquizh lo me, cxobnen zho pa lotaa men ndzon nac me.

<sup>16</sup> Miñcocxe waa, ib choot riablod. Nli zigse zie dze laa no bii noyoxraa, sangue zhiespíritu no, zigse zie dze laaw racncubraa, laaw riaanmberaa nëz lo Dios.

<sup>17</sup> Ni stiba, niicle ne znutaa nodzian no grë guielnë rii, per ncuaane tib rded naca, led ncuaane rnada; sac gon, zeene laa no lozh dieed grë miñ rii, mazdraa nroob nac lo guielndzon ne ygaa no, ni miñcosi gdzindraa dze lozha.

<sup>18</sup> Gacxe waa, choot rdziuuncas grë ncuaane quiazian no lo guidzliu rii, sinque laa guic no nonie ygaa no grëtaa guielbley ne no gbaa. Sac grë

ncuaane ran ne niina, ncuaane tib rded naca; sanque grë ncuaane gard dzian ne ga, led yedraa min co nitlo.

## 5

<sup>1</sup> Ni ndion ne ganle, zeene laa xcuerp rii ne nitlo, laa Dios gneedz stib mine gdziindraa dze nitlo. Masaque nacse xcuerp rii ne zig nac tib yu guizh win ne rbëz miech lo wgaa; sanque cuerp ne gneedz me lo ne, rriequia naca zig tib yu ne gbiaazpaa ne gbaa.

<sup>2</sup> ¡Bactaa guienë ne rdieed ne niina ne rdziaap ne cuerp rii! Gacxe waa, quiambiaaznë ne gdziñ dze ne gneedz me stib cuerp co.

<sup>3</sup> Sac gon, led niapdse espíritu gdziñ ga, sinque none gapa cuerp.

<sup>4</sup> Ne nligaa, niina ne mbannie ne cuerp rii, zeene në nodieed ne, rziaac ne tebaa laa ne mbanniele stib cuerp co. Per par ygaa ne cuerp cub co, ible none guet ne. Per zienied guic ne sca, sinque laa ne racladz zhits cuerp riise tsie cuerp co, zig nacse ne niina ygaa ne guielmban ndzon co. Sca rziaac ne, sac choot rdziladz guet.

<sup>5</sup> Dioszhal bzo ne ygaa ne min co, ni ible zaca, sac gon laa me pxeelle Espíritu Sant nacie ne.

<sup>6</sup> Tel no, min co nagon quiambiaaz no; ndionle no laga mbannie no cuerp rii, grielod ygaa no min co, grielod gdziñ no zaatne no Jesús.

<sup>7</sup> Nli rdziand now niina, per dib zdoo no rliladz no ib laaw none gac.

<sup>8</sup> Gacxe waa, haxta nley rac zdoo no quiambiaaz no gdziñ dze co; rziaac no tebaa laa no briele len cuerp rii, zeena guiobannie no Jesús.

<sup>9</sup> Min co nagon, tibaque noxco no gac no zigne rdziladz me, zigtaa niina ne no no lo guidzliu riw, zigtagaa zeene gdziñ no lo mew.

<sup>10</sup> Sac gon, grëse ne zdziñ dze ne laa ne gacredz lo me zaatne gun me guielwxtis. Grëse ne ne nac ne miech, tel zha mban ne niina ne rdziaap ne cuerp rii: zigtaa zha ne zaacse mbana, zigtagaa zha ne tel zhataa

mbana, ga ygaa ne mine guioguial ne tib tib ne.

<sup>11</sup> Min rii nagon nonie guic no, gacxe waa noxco no none no lo miech zha nac Xtiidz Dios. Ni me nan ganle dib zdoo no nodziun no dziin rii, ni racladz naa guien to ganle sca nac no.

### *Zaacse golgac lo Dios*

<sup>12</sup> Grë mine blozh bne naa nu, zig bnele naa ga: nacda par dziuunnon no no. Laa no rnee grë min rii, zeena guienpaa to ganle cho nac no; ni sca-gaa, guien to zha ctsire to lo xtiidz grë zha ne squi riaad i rlozhd gacniats zho. Tel zha, laglaase rlu zho miech wen nac zho.

<sup>13</sup> Nligaa, dib zdoo no noxco no xtsiin Dios, laa miech masaque rzac zho riotsle guic no. Nana niicle tel riotsgaaw, per xtsiin Dios nodziun no. Sanque no, ndionpaa no riotsd guic no; laa no rdziun grë min rii, sacne noxco no cseed to Xtiidz me.

<sup>14</sup> Laa no nodziun dziin rii, sacne rleyne no Jesús, maase tel zhataa rzac miecha.

Ndionpaa no Jesús bgaa guielgut ne nioguial ne; scaquegaa, ndion no niina ne laa no bziaab xnëz me, rriequia gutle no lo grëta ncuaane ndzinlid ne bdziun no glo.

<sup>15</sup> Gacxe nagon waa, grëse zha ne rzëeb xnëz me, nodraa gban zho zigne notaa guic zho, sinque laa zho none tsoxco gban zho zigne rdziladz me; guien zho ganle, me gut bdi-izh me xtol zho (ni brieaban me), par ygaa zho tib guielmban ndzon ne gdziñ dze lozh.

<sup>16</sup> Gotsaa guien sca, zha ne nole xnëz Dios, ziaacd ne zho zig rzac grëraa miech zho, rzac zho peet nond zho. Tel naa glo sca bzhaac naa Jesús, masaque bzob naa cholze miech nac me; sanque niina, ndionpaa ne ganle cho nac me.

<sup>17</sup> Sac gon, grëse zha ne ne nlipaa dib zdoo rliladz Jesús, stible miech nac zho. Grëse tel zha goc zho glo, laa min co bdedle. ¡Ncuble nac lo xquielmban zho!



<sup>18</sup> Ni loxaque Diosse gon zrieelo sca gunncub miech. Sac gon, me pxeel Xpëed me Jesús bиаadtizh grëse xtol ne, laa ne biaanwen lo me. Ni scagaa niina, me bzo no znu quiaseed no miech, zeena gacnan zho zha grieelo guiaanwen zho lo me.

<sup>19</sup> Znu gon naca: Laa Dios nodeed diidz niina guiaanwen miech lo me, gunquizhd me zho tel pe nactaa xtol zho, totsaque gliladz zho cho nac Jesús. Miñ rii nagon bzo me no nonee no lo miech.

<sup>20</sup> Golgan sca ganle, xmandad Jesús nac no. Me zobwi ganle laa no rnab lo to niina: ¡Golguiaanwen lo Dios! Golguien ganle, rriequia gon Dioszhal rso diidz rii lo to.

<sup>21</sup> Sac gon, Dios bzo Jesús bgaadz me grëse xtol ne, niicle ne ni tib dol rapd me; zeena niina ne laa ne wbig lo me, grieelo ndzinli gban ne, zigne racladz Dios. ¡Masaque Jesús bdiizh grëse xtol ne, psanwen me ne lo Dios!

## 6

<sup>1</sup> Gotsaa gwi ne ganle pa lotaa noxco Dios ne. Gacxe waa, no ne nac no zhingundziin me laa no rso diidz lo to: golguien golgon mine nonee me lo to niina.

<sup>2</sup> Lo Xtiidz me, no tib zaatne znu zhobnee:

Lëetse len dze ne nosilaa naa miech, laa to bnaab gacnie naa to.

Lëetse len dze ne rdeeda diidz gac mine quiambëz to, laa grë xli-aadz to blanso lo naa.

¡Ni lëe dze co nu nagon bdzin!  
¡Nadzegazh quiambëz me gbig miech lo me, zeena csilaa me zho!

<sup>3</sup> Dziin rii quiadziuun no, choot quiadziuun tald xtol miech, choot noguibd sozit zho lo Dios. Zaatne ziotaa no, tibaque noxco no zaacse gac no, zeena tsod pe yquiaaqui zho gneenë zho Dios.

<sup>4</sup> Zigtaa ncuaane rdziuun now, zig-taa grëgaa ncuaane nodieed now, rlu no ganle ne nli xtsiin me nodziuun no. Tel pe nactaa grë guielnë ne nodieed no, tel pe nactaa grë xli-aadz

no, niicle no zaatne rsacsi miech no, per choot rieetede.

<sup>5</sup> Blactaa zaatne rguin zho no, zaatne rsioogyu zho no, zaatne rree zho ndal zho racntseeb zho lo no. Blactaa rdib rdzaag no rdziuun no dziin, no zaatne rree zhimcaalo no dipse guieel, no zaatne retgbin no.

<sup>6</sup> Ne nligaa rdioxco no ndzinli mban no, choot rieetede, wen wen rdziuunbey no zha nac Xtiidz Dios, sca ran miech ganle ne nli Dios pxeel no. Dib zdoo no rleynie no samiech no, wen rac no lo zho, zilu no ganle pa lotaa racnie Espiritu Sant no.

<sup>7</sup> Niapse mine nac diidzli miñ co rnee no, ni scagaa Dios, nolu me ganle ne nli scaw. Niapse guielwen, niapse diidz ndooladz rlu no ne nli lo Dios quiadziuun no dziin.

<sup>8</sup> Choot rsaand mine pso Dios no nodziuun no, maase niicle mine runtaa miech no. No zaatne runnon zho no, nogaa zaatne rzhidznie zho no; no zaatne rneenë zho no, nogaa zaatne rleynie zho no. Niicle ne diidzli rnee no, per no zho rzac noquidiee no miech.

<sup>9</sup> Runbeyd miech cho nac no, sangue Dios runbey me no. Niicle ne tibaque noxtseeb no lo guielgut, per peet gard gac no laa no bii mban; niicle ne rsacsi zho no, per choot gard guet.

<sup>10</sup> Niicle ne no hor mban rac zdoo no, per znusaque rneedz Dios tib guielbley zdoo no. Nacd no zha dimi, per nroob nac grë guielnzaac ne rgaa miech zeene rnee no lo zho. Rdziaapd no grë ncuaane rap grëraa miech, per ncuaane rdziaap no, nroob nona.

<sup>11</sup> Bets, bzian, ne no to Corint i, laa no rzodiidznie to, laa no rnee lo to grëse zigne rza zdoo no. Ne nligaa rleynie no to.

<sup>12</sup> Telne rzac to gard gacpaa ne tipse, per led nod naca. Tel no rleynie no to, sinque to gon rien no laglaase rleynie to no.

<sup>13</sup> Ne nligaa peet rqueets naa lo to, laa naa rne lo to zig rnee tib dad lo mëed. ¡Scaquegaa to, golsiguiel zaacse golgac!

*Zhaa nac biini lo guielcow*

<sup>14</sup> Golguien, guiabde to tipse gac to grë to zha ne gard sëeb xnëz Dios. Golgan ganle, tib zha ne nole xnëz me, rdzieeld gac zho zig rac zha ne bii no lo dol. Zig nacgaa biini, zhaa nac biini, zhaagaa nac lo guielcow.

<sup>15</sup> Sac gon, tel Jesús, çniacxe tipse nac me grë me mendox? Scaquegaa grë zha ne nole xnëz mew, grieelod tipse gac zho grë zho zha ne no lo dol.

<sup>16</sup> Tel xyadoo Dios, nacda zig nac xyadoo grë mdio. Ni rrieequia gon ne nac xyadoo me, zigne raquiet lo Xtiidz me zaatne rnee:

Na gbannie naa to, ine sënie naa to.

Naa gliladz to, ni scagaa to, lo naa ygab to.

<sup>17</sup> Gacxe waa, rbiire me rnee me:

¡Golriee lad grë zha qui, golbiche lo zho!

Gunde to grë ncuaane ndzinlid ne run zho,

golbig lo naa, naa ycaania to.

<sup>18</sup> Naa gac PxoZ to grëse to, scagaa to, laa to gac xpëed naa.

Lëe xtiidz men ne rnabey to nu.

**7**

<sup>1</sup> Bets, bzian, gotsaa gwi ne ganle zha nactaa ncuaane psan Dios didz ygaa ne. Gacxe waa, golgotsaa lozh griee ne lo grë zhgab yozh, lo grë ncuaane ndzinlid ne runctal xtol ne. None zigse zie dze dzioxcora ne gban ne zigne rdziladz me.

<sup>2</sup> Ne nligaa, zaacse golgac golcaania no stib. Tel pe guielnë ne noded to, tel zha rzac to, to bguiba; zig nac no, choot noquidiede to, choot nosacside to.

<sup>3</sup> Guiabde to togo noquiago naa to nu, laa naa nile ganle dib zdoo no rleynie no to. Len ngbidz ne gbantaa no lo guidzliu rii, ib csaand no to.

<sup>4</sup> Laa naa rne grë min rii lo to, sacne nanpaa naa zha nac to, nanpaa naa zac gne naa lo to zigne nose guic naa. Zeene rsoladz naa to, haxta riaanladz naa grë mine nodeed naa, ine riaad tib guielbley zdoo naa; haxta riats naa ne runbey naa to.

<sup>5</sup> Wlal ne blanso no Macedon nu, ni tib lë notiblid guic no; lala noxtseeb no lo grë zha ne quiana no, lala nonieque to guic no dien yo to.

<sup>6</sup> Per rsaand Dios zha ne no lo zhgab, me pchoobladz zdoo no; sac zeene blanso Tit lo no nu,

<sup>7</sup> blansonie me diidz zaacse pcaania to me. Per nli rley no bdzion ndzinlile mban to, në me bio to guielnë grë len dze ne bded ga, ni në me nonie no guic to, quiambëz to tebaa zha ganniob to lo no stib.

<sup>8</sup> Zeene pxel naa guits co lo to glo, mban goc zdoo naa sac bien naa ib zgoguelnëw to, sangue niina racmbandraa zdoo naa; sac rien naa niicle ne bio to guielnë tib bla dze, per na laa ncuaan co bdedle.

<sup>9</sup> Gacxe waa rley naa niina, per guiabde to togo rley naa bio to guielnë, sinque rley naa gon naa laa to wbiire wbig lo Dios por guielnë ne bio to ga. Ni sca nagon racladz Dios gun grë zha ne ngab xnëz me zeene runctal zho xtol zho, gane rienpaa naa led psacsid no to ga.

<sup>10</sup> Zeene Dios rdeed diidz sca rio miech guielnë, lo guielnë co laa zho rbig lo me rsanmbe me zho lo xtol zho; rsaan zho tel pe nac ncuaane ndzinlid ne noyun zho. Zha ne sca rac-wen lo Dios, nodne gacmban zho guiab zho pe nacne bded zho guielnë co. Laa grëraa guielnë ne ran miech, zig nac zha ne nod xnëz Dios, loxaque rlozh runmbana zho, laa zho bii zie nëz ne nitlo zho.

<sup>11</sup> Golgan ganle, pa lotaa bzhixcuaa to niina ne bio to guielnë co. Haxta biala to biini, bioxco to blee to zha co lo dol ne quiayun zho ga; bien to ganle nonguiela rlisqui naaw. Gacxe waa, zeene gon to pa lotaa nac dol co, güeyniew guic to ni wbinladz to; gonzedraa to zho. Niicle ne gocladz to tebaa i zo naa nedz naa rson dien zha niun to; per tibaque beenquish to zho mine been zho ga. Wen ne sca been to, ga blu to ganle rdziguiende to dol ne been zho.

<sup>12</sup> Ne nligaa tibaque noxco no zaacse gac to. Zeene pxeel no guits co

lo to, guiabd ne togo zhizhgabpaa zha ne been dol co no no, zhizhgabpagaa pxoz zho; sinque laa no pxeela sac tibaque noxco no zaacse gac to.

<sup>13</sup> Gacxe waa, zeene bdzion no bin to diidz been to mine rnee no lo guits co, per nli rley no.

Ni zeene bdzion no grëse to zaacse blëzlo to Tit, mazdraa bley no; niicle megaa rley me ne squi niowse gon to me; haxta nguieel rac me niina.

<sup>14</sup> Bzodiidzle naa lo me, ne squitaa wen miech nac to, gane rley naa psande to naa guielto. Tel naa niapse diidzli rne naa, zig nac niina, zig repse naa lo Tit scase gon me rac to.

<sup>15</sup> Rleynie me to, rzac zdoo me zeene rsoladz me grëse to ndooladz goc to pcaania to me, ni bin to diidz been to mine bnabey me to.

<sup>16</sup> ¡Ne nligaa, rley naa niina bin naa squi zaacse rac to! ¡Nasi, nanpaa naa racnie to naa zigne racnie naa to!

## 8

### *Dib zdoo to goldeed gon*

<sup>1</sup> Bets, bzian, laa no gzodiidz lo to ganle pa lotaa quiayacnieñ Dios grë zha ne ngab lo Jesús nëz Macedon nu.

<sup>2</sup> Nli nroob grë guielne ne quiayan zho, per nguieel rac zho. Len dze ne bded nu beenlo zho tib gon, niicle ne zhis ncuaane rap zho, per nroob gon ne beenlo zho.

<sup>3</sup> Laa naa rnew lo to, sac naazhal gona. Ne nligaa, dib zdoo zho bleeladz zho grë ncuaane bloogon zho; ncuaane rgaataa lo zho laa zho bdeeda.

<sup>4</sup> Dzigo bnab zho lo no gdeed no diidz ye xgon zho guey lo grë zha ne nacgrë ne, zha ne guieñd pe yquiin.

<sup>5</sup> Ni lëdsew ga, bzee zdoo no zeene bdzion no blozhse psan zho zho ladz-  
nia Dios, laa zho wbig lo no në zho, mine csiaabtaa Dios guic no gnabey no zho, zun zhow. Ni lalnu gon güeynied guic no gon zho grëtaa min rii.

<sup>6</sup> Niina ne bdzion no znutaa biabgan zho nëz rii noyunlo zho gon rii, nacne rdzieets no lo Tit siguiel me

guiaad me nëz lo to i stib; zeena lozh gunlo to gon ne bnabeyle me to i quiayunlo to.

<sup>7</sup> Rdziunbey no to: dib zdoo to rnalto to Dios, zha niini nac to, rien to zha gnee to Xtiidz Dios lo miech, nguieel rac to run to xtsiin me, ni pseed to rleynie to samiech to. Nana sca, zig nac gon rii, scaque dib zdoo to goltsoxco golgunlow.

<sup>8</sup> Laa naa bzeta lo to nu zha been zha Macedon, per guiabde to bod non-abey naa to scapaa gon to. Sinque laa naa bzeta lo to, zeena gacnan to ganle ye zha co pquiabladz bdeed gon co. Nu nagon rdeeda diidz glu to ne nli rleynie to grëraa zha ne nacgrë ne, led loxaque diidzsew.

<sup>9</sup> Golwi ganle, zig nac Jesús pa lotaa noxco me ne. Niicle ne me nacchen grëtaa ncuaane no, per bdeed me diidz goc me zig tib zha ne peet rapd; ga bgaa ne grëtaa guielnzaac ne rap me. Laa me been min co sacne rleynie me ne.

<sup>10</sup> Wena, tebaa tsoxco to lozh gunlo to gon qui. Golsoladz ganle, topaa psilo bleebey gaclow wdibiz ga, ine nguieel rac to psilo to.

<sup>11</sup> Nana sca, zigne psilo to hor co, scaquegaa niina nguieel golgac golsiaal lo dziin co. Golquiabladz tel palaltaa ncuaane rgaa lo to tib tib to, dib zdoo to goldeeda;

<sup>12</sup> sac zeene dib zdoo miech rquiabladz zho cogon zho, tel palal-  
taa mine ygaa lo zho, scaania Diosa. Nanle me palal ncuaane rgaa lo tib tib miech, gnabd me ncuaane ni quianied zho.

<sup>13</sup> Sac nacda ne ygad to grëse ncuaane rap to lo stib zho, lozh ga guiaanmban to; laa zha yquianie grësew.

<sup>14</sup> Led scada. Laa min rii rac, zeena grëse ne lalga ncuaane yquianie ne. Niina ne rgaaw lo to, goldeed palala yquiin grë zha ne rapd nrooba; dzingaa dze na pe gunfalt lo to, dzigo laa zho gneedz tel pe nacgaa ncuaane quianiede to. Sca none dziunlsa ne xyudar zha ne nacgrë ne, zeena zig

rne naa ga: lalga ncuuane yquianie ne.

<sup>15</sup> Gol<sub>1</sub>soladz gan<sub>1</sub>le, znu rnee lo Xtiidz Dios: “Zha ne ptop nrooba, beenda sobr lo zho; niicle beenfaltegaaw lo zha ne ptop zhisa.”

### *Laa Tit guiaad i stib*

<sup>16</sup> Xquizh Dios psiaab me guic Tit, zigne rzacaque naa to scaque rzac me to; tibaque nonie to guic no.

<sup>17</sup> Zeene bnaab naa lo me siguiel me guiaad me lo to i, bzhiguielga me; ni nolegaa guic me guiaad me, sac ne nligaa racladz me guiaadso me lo to stib.

<sup>18</sup> Nēz rii, no tib bets ne, nroob yudar quiayun me nogaaz Xtiidz Dios lo miech; zaatne rcaalsataa zha ne no xnēz Dios nu, grēse zho runbey me, tib men nziuu nac me lo zho. Me gagrop Tit, niina ne laa no cxeel Tit lo to i;

<sup>19</sup> ni meque bzooblo zho, sēnal zhits no zeene guiosa<sub>1</sub> no gon rii. Nozhal guiosa<sub>1</sub>na, sac ne nligaa dib zdoo no noxco no zha gac xyudar grē zha ne guiend pe yquiin. Nu rlu gan<sub>1</sub>le pa lotaa men nroob nac Dios, sac me quiayacniēn ne ne laa dziin rii noyac.

<sup>20</sup> Gza no bets co guio, zeena gzadol<sub>1</sub>d zdoo miech guiab zho nend zha lega zhieen no palal gon rii, sac gon nligaa nroob naca.

<sup>21</sup> Dios zobwi gan<sub>1</sub>le mbe lo no, ni racladz no ye miech gan<sub>1</sub> zho gan<sub>1</sub>le ne nli zha legal nac no. Min co nagon, nacne sca guio no gza no.

<sup>22</sup> Rdziuunbey no stib bets ne nu, rdzian no nli dib zdoo me rleynie me Dios. Niina ne laa grop zha co guiaad i, ye me guiaadnal zhits zho. Rley me ne laa me guiaadgan to i, sac ziyon me ye to noxco gacnie to zha ne nacgrē ne.

<sup>23</sup> Tel nand new cho gnabdiidz lo to dien cho nac Tit, golguiab lo zho tipse nac no grop no me, xyudar naa noyun me quiaseed no to. Ni tel gnabdiidz zho cho nac schop zha ne ziaadnal zhits me i, dzigo golguiab grē zha ne ne no nēz rii pxeel zho, dib

zdoo zho noxco zho mban zho zigne rdziladz Dios.

<sup>24</sup> Golguien sca, gza zho zigne ziaad zho lo to i, niowse golcuēzlo zho. Gollu gan<sub>1</sub>le ne nli dib zdoo to rleynie to zho, zigne rleynieque to naa; zeena gacnan grēraa zha ne nacgrē ne nli mine rnee no zeene rzodiidz no lo zho zha nac to.

## 9

<sup>1</sup> Nanle naa, rquiindpaa gni naa lo to zha gdeed to gon ne gaclo nu gac xyudar grēraa zha ne nacgrē ne, sac laa to noyunlolew.

<sup>2</sup> Runbey naa to, nanle naa ible rquiabladz to gun to xyudar zho, gacxe waa rley naa rzodiidz naa lo zha ne no nēz Macedon nu, rne naa lo zho: wdibizlaa psilo to nēz Acay i quiayunlo to gon co. Min cocxe waa, zeene bin zhow, nzian zho pquiabladz laa zho bdeeda.

<sup>3</sup> Per laa no rxeel gza bets rii ziaad i, ziaadgun<sub>1</sub>soladz zho to lozh gunlo niob tow; zeena glu gan<sub>1</sub>le led lega rneed no zha nac to.

<sup>4</sup> Sac gon guielto ga grieequia naa lo zha rii, tel guialnie naa bla zho i, ni gan zho peet gard gaclo. Nli ziaan naa guielto, per mazdraa gon nac guielto ne guiaan to.

<sup>5</sup> Min co nagon, ni naa mazd cxel naa zha rii, ziaadnerga zho zeena gun zho xyudar to lozh ycaalsa gon ne pquiabladz to gunlo to ga.

Laa naa rnab lo to, tel pe nac ncuuane cogon to, dib zdoo to goldeeda. Golguien zha cogon to.

<sup>6</sup> Golwi gan<sub>1</sub>le zha nac guielgon: Zha ne zhis ran, zhis guielnzaac ne rcaa zho; sangue zha ne nroob ran, scagaa nroob guielnzaac ne rlis zho.

<sup>7</sup> Tib tib to sca, golcobey palal ncuuane gdeed to. Mine gdeedtaa to, dib zdoo to goldeeda; ib gunde to ne guiab to por rac-wnabsew laa to gdeeda. Sac gon, zha ne dib zdoo rdeed ncuuane rgogon zho, rleynie Dios zho.

<sup>8</sup> Ni me ne nac me men ne rrieelo rneedz grēse ncuuane rquiin, me nac men ne gneedz grētaa ncuuane



yquuin to; ni haxta ziaan mine gdeed to gac xyudar grëraa zha ne nacgrë ne.

<sup>9</sup> Zigne raquetaque lo Xtiidz me, zaatne rnee:

Zha ne nguzobdiidz lo Dios,

dib zdoos zho rgad zho ncuaane rap zho lo grë zha ne guiend pe yquuin;

ni scagaa sëëb diidz ne miech wen nac zho.

<sup>10</sup> Dios gunlay ncuaane quanie to, ygaaw gdeed to, ni scagaa me gacniën to nroobraa guieInzaac ne yгаа to. Golwi ganle, zha runlay me zha ne ran: Me psan grëse lo bni ne ran zho, ni meque rchooba; rlozh ga, nroob guieInzaac ne rlis zho, rgaaw row zho.

<sup>11</sup> Ne nligaa, Dios nac men ne gunnroob ncuaane quanie to, zeena scagaa nrooba cogon to. Golguien ganle, zeene laa no guiosana lo grë zha ne yquuina ga, blactaa gley zho gdeed zho xquizh lo Dios.

<sup>12</sup> Led lega nacdse gon ne gdeed to i. Sac gon, led loxaque xyudardse zho guna, sinque zeene laa zho ycaaniaw, haxta squiabladz zho dib zdoos zho gdeed zho xquizh lo Dios.

<sup>13</sup> Zley zho gan zho grëtaa ncuaane cxeel to yquuin zho; ni zleynie zho Dios gan zho ron to mine rnabey Xtiidz Jesús.

<sup>14</sup> Haxta dib zdoos zho gnab zho gacniën Dios to, por grëtaa guieInzaac ne gdeed me ga yгаа zho.

<sup>15</sup> ¡Xquizh xquieInzaac Dios, sac gon tel me nroobraa nac guieInzaac ne bneedz me lo ne! ¡Gotsaa gwi ne ganle, haxta Xpëed me bleeladz me!

## 10

### *Rieguial gnabey Pabl lo zha Corint*

<sup>1</sup> Ziyon naa rnee zho i, zeene zose naa zit nguieex rzë xtidz naa rxel naa; laa zeene zo naa lo to, rdziel naa pe gne naa. Sangue tel naa, tibaque nac naa, ndooladz rac naa lo to, niicle zeen tel pe diidz ne rso-gaa naa, ndooladz rne naaw; zig gun Jesús, tel niaca mine mezhäl gnee lo to.

<sup>2</sup> ¡Tebaa gdzind dze pe yquiaaquu glu naa xquieIndox naa lo to! Zha ne squi rzac lalaque nac no grë no grëraa miech, rnee zho mine run miech, mincoque rdziuun no, ¡tebaa siguiel zho zaacse gac zho, sac racladzd naa tilnie naa zho!

<sup>3</sup> Nli miechse nac no, per ib zionald no gacndaan no zigne racndaan grëraa miech guidzliu.

<sup>4</sup> Sac tel no, choot rnalod grë guiib las ne rnalo zho, sinque laa no rnalo poder ro ne rap Dios; mincosi zrieelo gnitlo grëtaa guieIntseeb ne racladz mendox gac.

<sup>5</sup> Con poder rii, zrieelo csioog no ro zha ne squitaa lega rnee, zha ne racndaan néd zho gacnan miech cho nac Dios. Grë zha ne racntseeb lo Dios, con poder rii zrieelo co no guic zho gbiire gbig zho lo me, gac zho tib miech nguzobdiidz lo Jesús.

<sup>6</sup> Ni poder co yquuin no gnee no lo to lozh guien to gban to zigne racladz Jesús; lozh ga, grëragaa zha ne racntseeb, lëëquew yquuin no par gacnan zho ganle zha rieguiäl gac zho.

<sup>7</sup> Zha ne rnee i loxaque rzedz yan naa, laglaase ga ran zho, nand zho zhapaa nac naa. Naasi xnëz Jesús no naa; gacxe waa, zha ne rnee xnëz me no zho, none guien zho ganle cho nac naa.

<sup>8</sup> Nana no to guiab guieInsiatsle nu, sac rlu naa ne naa rnabey lo to. Per nacda guieInsiats, ible Dios bzo naa gnabey naa lo to, ni laa me bzo naa par glu naa zha tsienäl to grë mine rnabey me, bzod me naa par yquidiee naa to tsienäl to nëz ne nitlo to.

<sup>9</sup> Golgacnan sca ganle Dios bzo naa, guiabde to togo lega rnese naa par ctseb naa to.

<sup>10</sup> Sac nanle naa no zha ne rnee i: “Gonde to mine rnee men qui. Loxaque lo guits ne rxeel me squitaa ndox rzë xtiidz me, per loxaque didza. ¡Zeene zo me lo ne, tib zha yozhsew, per ni riend me zha gnee me!”

<sup>11</sup> Per led scada gon. Niina ne laa naa guial i, laa naa glu lo zho ganle

zigne rzë xtidz naa zo naa zit, sca nac naa.

<sup>12</sup> Ib guiabde to, togo ye naa quiayun zigne run zha qui, lëëque lëë zho runniats zho. Tib guieln xen ga, sac gon lëëque zha runnon zho.

<sup>13</sup> ;Tel no, choot rdziunniatsd no ncuaane ni nacd no! Ni zeene rnee no cho nac no, per mine bzo Dios no nodziun no min co rnee no; ni mecxe waa bzo no quiaseed no to.

<sup>14</sup> Ible riogual ne no gnabey lo to, sac gon no gloopa biaad i biadseed no to zha nac Xtiidz Ndzon Jesús; choot noziaabd zaatne rioguald no.

<sup>15</sup> Stiba, rdziladz no gdaannie no xtsiin stib miech. Laa no bii cseed to lozh tsoguc to zha nac Xtiidz Dios, zeena haxta yele to gun xyudar no ygaazraa Xtiidz me.

<sup>16</sup> Dzigosi nagon laa no guio grëraa guiedz ne ndxie dib nëz qui, guioseed no zho gacnan zho zha laa zho lo dol; per zig neque naa ga, guiosiaabd no zaatne psilole stib zho, zeena gan miech ganle rdaannied no xtsiin stib zho.

<sup>17</sup> Znu ziaad lo Xtiidz Dios, zaatne rnee: “Zha ne zienie guic xoobnen lë zho por dziin ne run zho, mazd tsoxco zho xoobnen lë Dios.”

<sup>18</sup> Sac paat rquiinda ne lëëque ne gunnon ne, mine mazdraa rquiin nacne Dioszhal glu zha non nac ne.

## 11

### *Nlid Dios pxeel zha qui*

<sup>1</sup> Laa naa rnab lo to, igolxecw yquiaadiag to mine gne naa nu, niicle tel no mine rzac to rquiind!

<sup>2</sup> Golgacnan ganle, zigne rzac Dios to scaque rzaac naa to, ib racladz naa cho guidaquidie to. Mine racladz naa Jesússe gleyne to, zig run wnaa nguieg ne no xtiidz ctsieelnia. Sac tel wnaa nguiega, mgui ne no xtiidz zho mgui cose rleyne zho, haxta rdzin dze ne rtsieelnia zho.

<sup>3</sup> Sca none grieequia to lo me; per rdzieeb naa gon nend zha yguib mendox yquiil ma to, gondraa to mine rnabey Dios, dzigo laa to gac zig rac

grëraa miech ndzinlid. Sac gon tel Ev, sca pquiil ma Ev.

<sup>4</sup> Laa naa rzet min rii lo to, sac rien naa, zha ne riaadtaa i ween rdeed to diidz rquiaadiag to zhiwseed zho. No zho rzeet Jesús, rzeetgaa zho espíritu, per rzeete zho me zigne biadseed no to; rneegaa zho zha laa miech lo dol, per nacda zigne pseedle to glo.

<sup>5</sup> Haxta rnee zho, rienraa zho lo grëraa zha ne noteed Xtiidz Dios; sangue naa, nanpaa naa led scada, zrieelo glu naa lo zho ganle peet riend zho.

<sup>6</sup> Nend nli gacd naa gne naa zigne rneetaa zho, per zeene rne naa rienpaa naa ne diidzli none naa; ni ziyanlegaa tow ganle.

<sup>7</sup> Rzaac naa lëda ga ben naa, zeene bial naa bialseed naa to Xtiidz Dios; sac rsoladz to ganle ib peet bnabd naa lo to, scase bialseed naa to. Niicle mban bdeed naa, per bioxco naa wbig to lo Dios bgaa to guielnzaac nroob ne rap to niina.

<sup>8</sup> To rieguial needz ncuaane nquinn naa, na lel grë zha ne nole xnëz Jesús len dze co, zha co pxeel ncuaane pquiin naa, rrieequia bla naa xtimi zho ga.

<sup>9</sup> Niicle bdzin dze ne peet guiendraa lo naa, per ni tib lo to ib psodziind naa; lëëtaque len dze co biaad bla zha bets ne zha ne ziaad nëz Macedon, zha co biaadnie ncuaane pquiin naa. Ib peet bnabd naa lo to hor co, ni gdzindgaa dze ne pe gnab naa.

<sup>10</sup> Ni golgacnan ganle, ib tedsod sodidz naa grë min rii dib nëz Gres i. Ible zun naaw, led yed naa rquidie, sac gon runbey naa zha nac Xtiidz Jesús.

<sup>11</sup> Per guiabde to togo rlëenie naa to, racladz naa csañ naa to guielto; sac Dios zobwi ganle rleyne naa to.

<sup>12</sup> Golgacnan sca led scada, sinque laa naa gun min co, zeena csioog naa ro zha ne rlozhd gacniats i, rnee zho ye zho quiayun xtsiin Dios zigne quiadziun now.

<sup>13</sup> Sangue no, ndion no nlid Dios pxeel zho, lega noquidiese zho to i

squi no zho, rquiaalo zho zig nacne nli xtsiin Jesús quiayun zho.

<sup>14</sup> Ni led ncuaane gzeed zdoo ne ga. Sac ible sca run mendox, no hor rzëeb ma rded ma zig tib xmandad Dios.

<sup>15</sup> Gacxe waa, ¿zha ne squi run xtsiin ma, mincoque run zho rquiaalo zho rac zho zig cho miech wen, rquidie zho miech! Per zdzin dze ne laa zho ygaa guielndox ne tsieguial zho, zaatne tsietizh zho grëtaa mine noyun zho i.

*Blactaa ncuaane zadeed naa*

<sup>16</sup> Laa naa rnab lo to nu stib, golquiaadiag mine gne naa, niicle tel rzë xtidz naa zig rzë xtiidz zha ne rzhinle guic. Nli lega niats gne naa, per golxecw gon tow, sac laa naa gunnon naa zig run grë zha qui.

<sup>17</sup> Led Jesús d rnabey znu gne naa, sinque masaque laa naa gun min rii, zig run tib zha ne riotsle guic.

<sup>18</sup> Tel squitaa niats rac zha qui lëëque lëë zho runnon zho, lozhd gool zho lo to dien pe nac ncuaane noyun zho; golquiaadiaggaa mine gne naa nu na ganle:

<sup>19</sup> Conque rzac to name nixbiini to, ¿zha nac dzigo rdeed to diidz rquiaadiag to ncuaane rnee grë zha yozh qui?

<sup>20</sup> ¿Pe ib riende to ganle quianabeyzhoole zho to i, quiasacsi zho to, quiaquidie zho to, quiala zho grë ncuaane rap to, quiasanwin zho to, ya zig zgap zho lo to?

<sup>21</sup> ¿Haxta rtoladz naa gon, sac laa ne naa squi nabey to lel zhale squitaa no!

Grë ncuaane riats zho i nac zho, ye naa zrieelo sca gunniats naa naa (znu nagon rac zha ne rzhinle guic).

<sup>22</sup> ¿Telne riats zho rnee zho zha Israel nac zho? Yecxe naa waa zha Israel nac naa. ¿Telne rnee zho lo dii ne bzooblo Dios ga ziaad zho? Ye naa lo dii co zial naa. ¿Telne rnee zho Abraham nac xmengol zho? Men cocxe waa nac xmengol naa.

<sup>23</sup> ¿Telne niats rac zho rnee zho xtsiin Jesús quiayun zho? Gacnan zho ganle, naasi xtsiin paa me quiayun

naa. Nroob dziin ne ziyun naa, blactaa ncuaane zadeed naa, pe zhidaa zigo miech naa ladzguiib, blactaa zineedz dooguid zho naa, blactaa zaatne zadedlaa naa lo guielgut.

<sup>24</sup> Gaayle vuelt zisacsi zhiwxtis zha Israel naa, galptsibguieega nia dooguid bneedz zho naa.

<sup>25</sup> Tsonle vuelt zineedzyag zho naa, stib vuelt bneedzquie zho naa. Tsonle vuelt zadzieelo naa rdedquie barcw ne no naa len nisdoo; tib vuelt, tib dze tib guieel bzhoobse naa lo nisdoo.

<sup>26</sup> Pa lotaa grë dan ne ziya naa. Nzian vuelt ne bdedlaa naa niet naa: zaatne bdedlaa naa lo nis guiubee, zaatne bdedlaa naa lo ngbaan, zaatne bdedlaa naa lo grë menzit, zaatne bdedlaa naa lo grë menladz naa. Ziyoxtseeb naa lo guielgut, zigtaa zaatne nac len guiedza, zaatne nac dana, zaatne nac lo nisdoo, zigtagaa lo grë zha ne laglaase rquiaalo rililadz Jesús a.

<sup>27</sup> Blactaa rdib rdzaag naa run naa dziin, blactaa guieel ni niip raaguiess naa, blactaa zaatne retgbin naa, zaatne retnis naa, zaatne rcuan naa, zaatne mbanse rcuub naa ni guienlar ne piix naa.

<sup>28</sup> Ni zhaaque tibaque nonie guic naa dien yo to, grëse to ne nac to zha ne nole xnëz Dios, zha no to tib tib guiedz zaatne squi blansole Xtiidz Dios.

<sup>29</sup> Zeene ron naa cho tib to racladz guiaan zdoo, mban rac naa zeene rrieelod gane naa lo zho; zeene rongaa naa cho tib to quiayunctal xtol stib zho, ni rrieelod galisqui naaw lo zho, scaque mban rac zdoo naa.

<sup>30</sup> Grë mine bne naa nu, nacda guielniats; telne rieguialpaa gunniats naa naa, mazd gzet naa grë mine rlu ganle peet gacd gun naa naase.

<sup>31-33</sup> Zig bzhaac naa tib vuelt zeene bia naa Damasc, len dze co zob tib gobernador nac dziin lo rey Aret. Bnabey gobernador co xmenguiib me pquianap zho gzase puert ne rap biedz nroob ne ndze igo ro guiedz co; nan me naaz zho naa ngo zho naa ladzguiib. Per brieelod naaz zho

naa, sac grë zha ne nole xnëz Jesús ga, zeene bin zhow dzigo bloo zho naa tib len chicuid pteed zho naa tib ro ventan ne quia cho biedz nroob co. Sca bdeeda diidz brie naa ga, biabd naa ladznia gobernador co.

Ni Dios gon, men ne nac Pxoze Jesús, men ne rieguial dzuunnon ne gzataa dze, me zobwi ganle diidzli rne naa.

## 12

### *Racniatsd Pabl*

<sup>1</sup> Nanle naa nonguielda lëëque ne gunniats ne, per laa naa sodiidz lo to ganle zha nac grë ncuaane zinabey Dios zilulo lo naa, ni grëga mine zinee me lo naa.

<sup>2-3</sup> Niina rac tsiida iz ga blis Dios naa güeynie me naa gbaa. Nand naa dien pe dib znu naa bia naa, te zhiespirituse naa ye güeynie me; loxaque mese nan dien zha güeynie me naa. Loxaque mine bien naa ne laa naa bia lugar ndzon co,

<sup>4</sup> ga bin naa grë diidz ndzon ne waltaa gard gon miech, ncuaane guiend zho zha naca, ni nodgaa diidzbey gne naaw.

<sup>5</sup> Zrieelopaa nagon gunniats naa naa ne laa naa bia ga, per ib gund naa min co. Laa ne gunniats naa naa zig rnele naa ga, mazd gzet naa grë mine rlu ganle peet gacd gun naa naase.

<sup>6</sup> Ni tel gacladzga naa gunniats naa naa por mine blozh bzet naa nu, led guiend ga gun naa; sac mine nli-paa goca. Per rund naa min co, sac laa naa racladz tozhal guien cho nac naa, benque ran to ganle zha mban naa, rangaa to zha rne naa.

<sup>7</sup> Ne nligaa ndzondoo nac grë ncuaane blu Dios lo naa ga, zac nazho gunniats naa naa sac naa gona; per parne gund naa min co, laa Dios bdeed diidz biaad tib xmandad mendox psanwin naa, biaan tib yoob xcuerp naa zig nac zeene pe tib guiets nroob ne niaaz naa.

<sup>8</sup> Tsonle vuelt zinab naa lo Dios ctiche me yoob rii;

<sup>9</sup> biontaa vuelt në me lo naa: "Bui ganle laa naa naciele luu, ni min

co nac mine rquinnraa lo luu. Peet tsienied guic luu sca, zha ne squi nsis rac, ga rdeeda diidz rlu naa ne nli naa nacie zho." Min co nagon rley naa, sac ne znu nsis rac naa, grëse miech zeene ran zho grëta ncuaane rrieelo run naa, rien zho nli Jesús nacie naa.

<sup>10</sup> Ne nligaa rley naa, sac niicle ne miech gzhe gzhele rac naa, niicle nroob guiend ne nodeed naa, niicle rbidzgo miech lo naa, rtsidil zho naa, no hor guiend pe yquinn naa, per rley naa sac laaw nodeed naa porne no naa xnëz Jesús. Rne naa rley naa, sac zeene sca zootle grieequiadraa naa lo zhgab ne no naa, hor co laa Dios rlu ne me nacie naa.

<sup>11</sup> Nligaa lega guiend nu znu rne naa, rac naa zig tib zha ne rzhinle guic! Per to gon rap dol, sac laa ne cxobnen to nli miech wen no, lel zhaa mine noyun to. Nli nacd naa cho zha non, per tsod ncuaane csanwin grë zha qui naa, niicle ne squitaa rzac zho zha rien nac zho, niicle ne rnee zho Dios pxeel zho.

<sup>12</sup> Golsoladz ganle, zeene bialseed naa to i, blu naa lo to ne nli Dios pxeel naa noteed naa Xtiidz me, blactaa grë ncuaane bneedz Dios diidz blu naa lo to, blactaa grë milagr, blactaa grë ncuaane bzee zdoo to gon to. Biod dze ne nieednie naa to.

<sup>13</sup> Lëëse mine bend naa lo to i, nacie nab naa needz to pe nquinn naa; sac grëraa zaatne ziyaseed naa miech, zha rneedz ncuaane rquinn naa. Golsoladz dispensar telne rbinladz guic to min co!

### *Nonie zha Corint guic Pabl*

<sup>14</sup> Laa naa nozhixcuaale par guialgan naa to stib. Nu gac tson vuelt guial naa lo to i; ni scaquegaa niina gon ib csodziind naa lo to. Sac tel naa, noguibd naa dien pe gneedz to lo naa, sinque to guialguib naa. Golsoladz ganle, niicle ne racladzde to, per rrieequia gon mëed nac to lo naa; ni ndion ne ganle, led mëete rieguial gdeed ncuaane yquinn dad,



sinque dad none gdeed ncuane yquuin mēēd.

<sup>15</sup> Ne nligaa, tib guielbleya lo naa quiateedlo naa to, laa naa noxco guien to zaacse gban to, zeena gdziñ to zaatne gneedz Dios cuēz to. Xco co no naa, ib rquiad zdoo naa lozh grē ncuane rap naa, o lozhgaa naa lo xco co; maase niicle squi zootne laa ne rleynieraa naa to, leļ nozozit to lo naa.

<sup>16</sup> Nanle naa, no bla zha ne rnee i: “Nli peet bnabd me zeene biadseed me ne, per ne squi miech ndzielguic nac me bod no pa stib mod ne rienđ ne quiaban me ne.”

<sup>17</sup> Nana, zig nac zha ne zixel naa ziyaadgan to i, ¿pe niacxe biaadban zho to? ¿Pe niacxe biaadquidie zho to?

<sup>18</sup> Naa quia bnaab naa favor lo Tit biaad me i, ni pxel naa stib zha bets ne biaadgrop me. ¿Pe no pe bnaab zho lo to? Golgacnan ganle nodziuuñ no min co, sac zigtaa naaw, zigtagaa mew, dib zdoo no nodziuuñ no dziin rii, choot noquidied miech.

<sup>19</sup> Nana gza zdoo to guiab to bod parne guiaanwen no lo to, gane znu rne naa. Dios zobwi ganle led scada. Bets, bzian, grē mine none naa lo to nu, laaw rne naa sacne racladz naa lozh tsoguic to gban to zigne nac Xtiidz Dios.

<sup>20</sup> Sac gon, rdziladzd naa telne glanso naa lo to i, ni gan naa racde to zigne racladz naa; dzigo niicle togaaw, tsod zdoo to zeene gan to laa naa glisquiw. Adel gon zeene laa naa glanso i, leļ diļ no to; zha ne nē rac zdoo dien cho stib noded, zha ne nozhixcuaa diidzguizh, zha ne quia- neenē, zha ne quiayacniats; nend haxta chop tson diile nac to.

<sup>21</sup> Tel gan naa sca rac to, mbe gon stoladznie naa to ni haxta siaabguielnē to naa; sac nanle naa ni lalnu rdziladzd Dios grē min co. Zig nac grē zha ne squi padzeelale quiayunctal xtol ni rsaand zho grētaa guielyozh, grētaa ncuane ndzinlid ne bii quiayun zho, mbe gon sigoon zho naa.

## 13

### *Rso Pabl diidz*

<sup>1</sup> Niina nagon ne gac tson vuelt guialgan naa to, tel pe nactaa falt ne cho quiayun i, guiaanda scase. Zigne rnee lo Xtiidz Dios: Tel no chop zho, tsongaa zha ne nanpaa zha nac falt co, zha ne beena ga ib none laa zho quizh xfalt zho. Nu rac bion vuelt ne rso naa diidz rii lo to.

<sup>2</sup> Laaw nile naa lo to lultm vuelt ne bialgan naa to, ni niina laaw rneque naa stib: Grēse zha ne quiayunctal xtol i, zigtaa zha ne padzeelale squi no, zigtagaa zha ne wriin psilow, gacnan zho ganle zeene laa naa glanso i, grēse mine quiayun zho ib tedlaad zho, laa naa gunquizh zhow zigne rieguial zho.

<sup>3</sup> Ga gan to ganle nli Jesús rnabey naa, ni Xtiidz me none naa lo to; sac mesi gon, gdziguiend me sca gac to, sinque zigne racladz me sca none gac to.

<sup>4</sup> Nli nguudz goc me bdeed me didz pquiaa zho me lo cruz hor co, sangue niina men rnabey nac me; laa me mban niina niapse por poder ne rap Dios. Ye no, zig nac niina miech nguudz nac no, per ible zgaa no tib guielmban ndzon, sacne me nacie no; ni zrieelo gnabey no to sacne rdzi- aap no xpoder me.

<sup>5</sup> Nana sca, tozhal golcobey dien zha mban to. Wen wen golcobey dien pe nli dib zdoo to riladz to Jesús. ¿Pe nli mban to zig none gban zha ne riladz me? ¿Pe zig zie dze rienraa to ne me nacie to, me rnabey lo to? ¿Te loxaque diidzse ye nac ne laa to riladz me?

<sup>6</sup> Sangue no gon, wen wen ndion no zha mban no, ndionpaa no ne lo Jesús ngab no.

<sup>7</sup> Tibaque rnab no lo Dios cxob- nia me guic to zaacse gban to. Ni guiabde to togo par guiaanziiuu no lo miech gane noxcopaa no zaacse gac to; sinque laa no rdziuuña parne gban to zigne rieguial gban zha ne nli no xnēz Dios. Min co nagon noxco no, niicle tel rzac to lēda nu quiadziuuñ naa.

<sup>8</sup> Sac tel no, laa no zional gac to miech wen, zha ne zional mine nac diidzli; choot ziaate par lega gactox no lo to.

<sup>9</sup> Gacxe waa, tib guielbley nroob ga lo no, telne zhal to znuse xixcuaa to, gac to zha ne nlipaa dib zdoorleynie Dios; laa ne yquiambëz to guiaadlisqui no grë ncuane noyun to. Laa no racladz gdziñ dze ne gac to zigne rdziladz Dios, ni mincogaa quianab no lo me.

<sup>10</sup> Laa naa rso diidz rii lo to lo guits ne rxel naa nu, sacne racladzd naa gactox naa lo to zeene laa naa glanso i. Nli Dios bzo naa rnabey naa lo to, ni mine racladzpaa naa nacne lozh tsoguic to zhiwseed me; ib racladzd naa yquiaago naa to.

<sup>11</sup> Nu ne laa naa csiaal lo guits rii, laa naa rnab lo to bets, laa naa rnab lo to bzian: Nley golgac, goltsoxco gban to zigne racladz Dios, zha ne mban rac, golchoobladz zdoor zho; ine niowse golban, tipse golgac. Scagaa Dios zleynie me to, ni haxta zacnie me to zeena peet ctsebde to.

<sup>12-13</sup> Nana sca, tib tib zha ne nacgrë to golquiaabdiuzh zho, ine golxen nia zho. Grëse zha bets ne, zha bzian ne, zha ne rililadz Jesús nëz rii; laa zho rxeeel bdiuzh lo to. Golcaania zhibdiuzh zho.

<sup>14</sup> ¡Dios sca guiaanne to! Ine nley golgac, golgan ganle pa lotaa rleynie me to. Peet tsienied guic to, Jesús nac men ne noxco grë zhizhgab to; ni scagaa Espíritu Sant gacnieñ to tibaque tipse gac to.

Pabl

## GUITS NE PXEEL PABL LO ZHA GALÁS

¡Diuzh to grëse to!

<sup>1</sup> Naa nac Pabl, tib zha ne pxeel Dios nonee Xtiidz Ndzon me lo miech. Led miechd bzoos naa, led miechd pxeel naa, sinque Jesús pxeel naa, me ni Dios Pxoz me, men ne bleeban me.

<sup>2</sup> Laa naa rxel tib guits rii ziaad lo to zigne no to nëz Galás i, nac to zha ne ngab lo Jesús; rquiaabdiuzh naa to, ni scagaa grë zha rii laa zho rxeel bdiuzh lo to.

<sup>3</sup> Dios men ne nac Pxoz ne, ni Jesús men ndzon ne rnabey, me nac men ne tsoxco grë zhizhgab to, zeena peet tsienied guic to.

<sup>4</sup> Jesús bdeed xquielmban bdiizh me xtol ne, psilaa me no lo grëtaa guielntseeb ne no lo guidzliu rii, laaw been me zigne gocladzse Dios men ne nac Pxoz me.

<sup>5</sup> ¡Gotsaa dziuunnon ne Dios sca, ni gdziind dze ne csaan ne dziuunnon ne me! Sca rieguiala.

<sup>6</sup> Rzee zdoo naa gon ne gardle gac nroob dze ga, laa to bzozitle lo Xtiidz Ndzon Dios, men ne bredz to pcaania me to, porne nquialadz Jesús to. Wseed ne riladz to niina, masaque rzac to na mincogaa csilaa to lo dol.

<sup>7</sup> Per guiendraa stib wseed ne gon csilaa ne lo dol. Mine naca zha ne biadseed to i, lega rquidiese zho to, racladz zho ctsë zho mine nac Xtiidz Ndzon Jesús.

<sup>8</sup> Grëse zha ne guiaadnie stiblo wseed mine pseete no to, ni gnë zho lëë min co csilaa to lo dol; zha ne sca gon, miech ndziibdeele ga nac zho. Tel chotaa sca gon, niicle tel naazhala, tib anjl ne quietgaa gbaaw, ible zdzibdee Dios zho.

<sup>9</sup> Bnele naaw lo to, ni na laaw rneque naa stib: Tel cho zha ne guidseed to stiblo wseed mine pseete no to, ni gnë zho lëë min co csilaa to lo dol, ible zdzibdee Dios zho.

<sup>10</sup> Nana gon ne znu rne naa, no to guiab parne guianzuiuu naa lo miech gane znu rne naa; per golgacnan ganle, quiaguibd naa guianzuiuu naa lo miech, sinque laa naa noxco gon naa mine rnabey Dios. ¡Sac telne lel ncuane gleyne miech noxco naa, nlid dzigo xtsiin Jesús ga noyuu naa!

*Jesús pxeel Pabl gnee Pabl Xtiidz me*

<sup>11</sup> Bets, bzian, golgacnan sca ganle: Wseed ne nac Xtiidz Ndzon Jesús, mine bialseed naa to, led guicd miech biaba.

<sup>12</sup> Paat biad naa nseed miech naaw, sinque Jesús zhal bneedza lo naa.

<sup>13</sup> Led nanle to ganle, zha nactaa grë mine beu naa zeene bii no naa lo zhiwseed zha Israel; ptsidil naa grë miech ne no xnëz Jesús, blëenie naa zho, pquiana naa nlóozh naa zho.

<sup>14</sup> Bzhoob diidz ne naa nac zha ne pseedraa lo grë menladz naa, zha ne tipse biagrëe naa scuel; naa nac zha ne neer lo zho, sac naa run grëse mine rnabey zhiwseed zha Israel, ni naa rioxcoraa run grëse mine been grë pxozgol no. Sca nagon goc naa lo zha Israel.

<sup>15</sup> Ible güeynied guic naa, antes ne gal naa laa Dios bzooblolé naa gunbey naa Xpëed me; laa me bleextsole naa, niapse porne nquialadz me naa. Zeene bdziin dze co

<sup>16</sup> laa me blu me lo naa, bzo me naa ga naa zaatne ndxie grë miech ne nacdraa zha Israel, gaseed naa zho Xtiidz me mine glu zha laa zho lo dol. Zeene blozh gon naa Xpëed me, biad naa niaguib naa ne goon dien cho nseed naa,

<sup>17</sup> ni niicle biadgaa naa Jerusalén, nianabdiidz naa lo grë zha ne pxeelle me nonee Xtiidz me; sinque laa naa bia nëz Arab, wbierele naa nëz co, dzigora naa bdziin naa Damasc stib.

<sup>18</sup> Gocle tson iza dzigora naa bia naa Jerusalén, hor coraa beenbey naa Pedr; blëz naa lo me ga tsiin ngbidz.

<sup>19</sup> Gaque beenbey naa Jacob bets Jesús, laa grëraa zha ne pxeel Jesús noyuu xtsiin me, ni tib zho gon naa.

<sup>20</sup> Dios zobwi ganle diidzli nac grë mine rne naa nu, led lega rned naaw.

<sup>21</sup> Zeene brie naa ga, laa naa bia nëz Siria ni nëz Cilis.

<sup>22</sup> Grë zha Judé zha ne nole xnëz Jesús, gard gunbey zho naa len dze co.

<sup>23</sup> Diidz ronse zho rnee zla zha ne nacgrë zho: “Men ne scataa pquianal ne, yele me noseed miech Xtiidz Dios, ni glo scataa gocladz me nitlo mew.”

<sup>24</sup> Dzigo rley zho, rdeed zho xquizh lo Dios ne yele naa rliladz Jesús.

## 2

### *Rcaania zho Pabl*

<sup>1</sup> Zeene blozh tsiida iza, dzigo laa naa biire bia Jerusalén stib, bio no grop no Bernabé, ni bionie no Tit.

<sup>2</sup> Laa naa bia, sac ib Dios blu lo naa ne no ga naa. Dzigo ga pcaalsa no grë no zha ne zo rnabey lo grë zha ne no xnëz Jesús ga, bzodiidz naa lo zho zha noseed naa grë zha ne nacd zha Israel Diidz Ndzon ne rlu lo zho zha laa zho lo dol, ni naa zeena guien zho ganle ne nli rquiin dziin ne benle naa, ni mine quiayungaa naa.

<sup>3</sup> Ni nligaa bley zho bin zhow.

Niicle ne led zha Israeld nac Tit, per bnabeyd zho niopaa Tit bey ne rio grë zha Israel.

<sup>4</sup> Per lo zha ne zioobgza no ga, lad co briequia bla zha ne bnab nio Tit bey co, per choot pquiaadiagd xtiidz zho. Nac diidz ye zho rliladz Jesús, per nlida; ib blud zho cho nac zho, ngeets bzëeb zho lad no biadleets zho dien zha mban no, niina ne Jesúsle rnabey no, rnabeydraa ley no. Gocladz zho nquiaadiag no xtiidz zho, biire ndziuuñ no mine rnabey ley.

<sup>5</sup> Per ni palal bdeete no diidz niac mine rnee zho, laa no racladz guiaannie to Xtiidz Ndzon Jesús mine rlu zha laa miech lo dol, sac min co nac diidzli.

<sup>6</sup> Grë zha non ne zo rnabey lo grë zha ne no xnëz Jesús ga (zha non guiab ne, per ndion ne ganle grëse ne tibaque nac ne nëz lo Dios)

<sup>7-8</sup> ib peet blisquid zho lo naa, niicle peet pseetragaa zho naa. Sinque laa

zho gocnan ganle ne ib Dios bzoo naa gun naa xtsiin me, gaseed naa grë zha ne nacd zha Israel guien zho zha laa zho lo dol; zigne bzoque me Pedr noseed Pedr zha Israel. Dios men ne bzo Pedr quiaseed Pedr zha Israel, lëeque me bzo naa quiaseed naa grë zha ne nacd zha Israel.

<sup>9</sup> Gacxe waa, zig nac Pedr, Jacob, Juan, zha ne zo rnabey lo grë zha ne rliladz Jesús ga, laa zho bien ne ible naa bgaa guienzaac rii, bneedz Dios dziin rii lo naa. Dzigo rley zho haxta bzhen zho nia no grop no Bernabé, laa no biaan diidz ne zha tsieeed zha Israel, laa no guioeed grë zha ne nacd zha Israel.

<sup>10</sup> Lëese mine pso zho diidz lo no, dzioxco no dziuuñ no xyudar grë zha ne guien pe yquiin; ni nligaa ib nonguiel min co ni laaw noyoxco naa.

### *Ractox Pabl lo Pedr*

<sup>11</sup> Laa zeene biaad Pedr Antioquí, dzigo ga nli laa naa goctox lo Pedr, sac ncuaane ndzinlidraa quiayun Pedr.

<sup>12</sup> Glo, grëse zha ne nacd zha Israel zha ne rliladzle Jesús, rzënie Pedr zho, tipse rbenie Pedr zho zeene laa zho row; ni blozh ga, zeene laa bla zha ne pxeel Jacob bdzin ga, pasëraa Pedr sca tipse niownie zho, laa Pedr bzozit lo zho. Rdzieb Pedr zha ne bdzin ga, sac lëe zha co racladz, grëse zha zit ne rzëeb xnëz Jesús ib none tso zho bey ne rio zha Israel.

<sup>13</sup> Grë zha Israel ne nole xnëz Jesús ga, yeque zho laa zho gocnie Pedr lo xtseb Pedr ga, haxta ye Bernabé wbig lo zho.

<sup>14</sup> Nacne zeene gon naa sca zienaldraa zho zigne nacpaa wseed ne ziaadnie Xtiidz Dios, squi ndxie grëse zha ne rcaalsa ga goctox naa lo Pedr, rep naa: “Luugase name niicle ne zha Israel luu, ni mband luu zigne nac zhiwseed zha Israel, ¿pe nac dzigo ne racladz luu gnabey luu grë zha ne nacd zha Israel, gban zho zigne nac zhiwseed zha Israel?”

### *Zha rlaa miech lo dol*

<sup>15</sup> Golquiaadiaga ganle, tel no desde gol no zha Israel nac no, nacd no



zigne nac grëraa miech ngoopdol ne nac stib nacion; ible pseed no grë mine nac xley zha Israel.

<sup>16</sup> Sangue niina laa no ndion ganle, niicle mazdraa gun miech mine nac ley grielod guiaanwen zho lo Dios, sinque zha ne dib zdoo gliladz Jesús, zha co nac zha ne guiaanwen lo me. Gacxe waa, ye no laa no bliladz Jesús dib zdoo no, zeena guiaanwen no lo Dios; ni laa no guiaanwen lo me porne dib zdoo no rililadz no Jesús, nacda porne dziuun no mine nac ley. Sac gon niicle zha ne tsoxcoraa gun zho grë mine nac ley, grielod guiaanwen zho lo Dios.

<sup>17</sup> Nana ne laa no wbig lo Jesús parne guiaanwen no lo Dios, no zha ne rzac dol ga. Masaque rzac zho xtol no ga rdziuuntal no porne rililadz no Jesús, per, jled scada gon!

<sup>18</sup> Mazd dol ga gun naa, telne rlozhle rseed naa miech rne naa lo zho ne led leyd nac mine csilaa ne lo dol, ni lozh ga naaque no lozhd tsoxco gun grë mine nac ley.

<sup>19</sup> Sac tel naa, ib brieelod niun naa grë mine rnabey ley, ni zha ne rguiits ley gon ib none guet zho; gane niina masaque rrieequia laa naa gutle. Niina ne laa Jesús gut por grë xtol naa, rrieequia ye naa gutnie me ga, zeena grielo gun naa mine rnabey Dios.

<sup>20</sup> Led naadraa nu znu mban, Jesúsle nu mbannie naa, ni guielmban ne mban naa niina, lëe min rii bneedz Dios lo naa porne rililadz naa Xpëed me, men ne rquia zdoo naa, men ne bleeladz xquielmban ga beet zho me bdiizh me xtol naa.

<sup>21</sup> Nana, telne niaca mine nli zrieelo guiaanwen ne lo Dios porne gun ne mine nac ley, zhlëse ga dzigo bi-aadguet Jesús. Golgacnan sca ganle, Jesússe nac men ne csañwen ne lo Dios, gacxe waa nonguielda ga csañ ne me tiblاد, ni pa lotaa ga pquia zdoo Dios ne.

### 3

*Jesús none gliladz miech*

<sup>1</sup> ¡Nadzpaa nxen to nac to zha Galás! ¿Pe goc to, cho biaadgunüet guic to squi rac to? Pe led zeene biadseed no to, wen wen gocnan to cho nac Jesús, ni zha nacne sca beet miech me lo cruz.

<sup>2</sup> Zhal to golcobey dien, ¿pe ne been to grë mine nac xley zha Israel, laa to bgaa guielbiini chen Espíritu Sant, te ne bliladz to Xtiidz Diosa ye?

<sup>3</sup> Pa lotaa gon rdzin lo xquielnxen to i, conque laa to gonle ganle ne niapse por guielbiini chen Espíritu Sant laa to psilo mban tib guielmban cub, ni na nanaque to tsienal to ley.

<sup>4</sup> Pe nlipaa rnee to, ¿pe lega scase nazho gon to grë guielnë ne pteed miech to, zeene psilo bliladz to Xtiidz Jesús?

<sup>5</sup> ¡Golzhixcuaa guic to! Golguien ganle, laa Dios bneedz zhiEspíritu me lo to, ni laa me noyun grë milagr lo to, per nacda porne run to mine rnabey ley, sinque porne dib zdoo to rililadz to Xtiidz mew, mine biadseed no to.

<sup>6</sup> Zig Abraham, porne dib zdoo me bliladz me xtiidz Dios mine rëb Dios lo me, gane pcaania Dios me zig tib zha ne peet xtol d.

<sup>7</sup> Golgacnan sca ganle, grëse miech ne dib zdoo gliladz Xtiidz Dios, grëse zha co laa Dios ycaania zho zig xpëedpaa Abraham.

<sup>8</sup> Ni mine nodzian ne niina, ib lo Xtiidzle Dios zhobneew, zeene bnee me ne grëse miech ne nacd zha Israel, silaa me zho telne dib zdoo zho gliladz zho me. Lëe min co ga bnee me zeene znu rëb me lo Abraham: “Grëse miech ne ndxie dibdoo lo guidzliu, zha ne dib zdoo gliladz naa zigne rililadz luu naa, zunlay naa zho.”

<sup>9</sup> Gane grëse zha ne dib zdoo rililadz Jesús, runlay me zho zigne beenlayaque me Abraham, zeene laa Abraham bliladz me dib zdoo Abraham.

<sup>10</sup> Sangue zha ne rnalo ley ne lëew csilaa zho, laa zho noyac ndziibdee ga, sac lo Xtiidz Dios no tib zaatne rnee: “Ndziibdee grë zha ne grielod gun grëse zigne nac ley.” ¡Ni tsod zha

ne gon grieelo gun grëse mine rnabey ley!

<sup>11</sup> Gase naganle rlu tsod tib zha ne grieelo guiaanwen lo Dios por gun zho mine nac ley; ni laaw zhobneeque lo Xtiidz Dios zaatne rnee: “Zha ne guiaanwen lo Dios, laa zho guiaanwen porne dib zdoo zho gliladz zho me; ni zha co ygaa tib guielmban ndzon.”

<sup>12</sup> Led yed ley rnab dien cho dib zdoo gliladz; sinque rneew: “Zha ne racladz gban, none gun zho grëse mine rnabey ley.”

<sup>13</sup> Min co nagon, grëse ne nac ne miech laa ne biabdee, sac brieelod mban ne zigne nac ley. Per niina, laa Jesús biaadsilaa ne lo grëtaa dee co, masaque lëe grë dee ne nac ne ga bi me zeene sca pquia me lo cruz; zigne zhobneeque lo Xtiidz Dios, zaatne rnee: “Miech ndziibdee ga nac grëse zha ne ret rquianga zho tib lo yag.”

<sup>14</sup> Ni por mine sca bded Jesús ga, min co niina grëse miech ne nacd zha Israel, zac ygaa zho grëse guielnzaac ne bzeet Dios lo Abraham ga; ni niicle tib tibгаа zha ne ngab lo mew, scaania zho Espíritu Sant, Espíritu ne rëb me cxeel me lo grë zha ne dib zdoo gliladz me.

### *Zha ne nlipaa nac xpëed Abraham*

<sup>15</sup> Bets, bzian, laa naa gzet ncuaane rac lo guidzliu rii. Nanle to ganle, zeene laa chop miech run tib trat, rquia mine rnee zho ga lo guits ni rquia lë zho lo guits co grop zho; zeene laa lë zho pquiase ga, ni tib zho gacdraa ctsëe trat co.

<sup>16</sup> Nana gotsaa gwi ne ganle zha been Dios: Psañ me xtiidz me lo Abraham, ni tib lo men ne grieequia lo xtii Abraham. Raquiete nzian zho, rëb me: “grë zha xtii Abraham”, sinque tibaque men ne bzeet me, ni lëe men co ga nac Jesús.

<sup>17</sup> Znu nagon nac mine quiane naa lo to nu: Tib trat ga been Dios grop me Abraham, zeene rëb me scaania me grëse zha ne dib zdoo gliladz me; ni ible laa xtiidz co me biaan zig tib trat ne quia lë me lo. Min co nagon,

grieelod ctsëe ley trat co; zig nac ley, blozhle tap gayoo galptsii iz biaan xtiidz co me zeene laa ley biaad.

<sup>18</sup> Nana, telne por gun ne mine rnabey ley, laa ne ygaa grë guielnzaac ne bzeet Dios lo zhitrat me gdeed me por tib men ne grieequia lo xtii Abraham; ¿pazhe dzigo rquiin trat co? Sac lo trat co gon raquiet ne por tib men ne grieequia lo xtii Abraham, laa me gneedz guielnzaac co lo ne.

<sup>19</sup> Nana gnë to: “¿Pa dzigo rquiin ley ne laa ley biaan, ni tel nole trat co glo?” Laaw biaan gon zeena glu ganle zha nac miech, ib rond zho mine rnabey Dios zho, laaw been dziin laga bdzin dze ne laa men ne briequia lo xtii Abraham ga biaad, men ne bzeet Dios ga zeene psañ me xtiidz me lo Abraham. Ni tel ley, dze ne pcaania zha Israela tib xanj Dios pxeel me bdeeda lo Moisés, dzigo Moisésle psana lo menquiedz Israel.

<sup>20</sup> Sangué dze ne been Dios trat co grop me Abraham ne laa me csilaa miech lo dol, pxeeld me cho tib miech, cho tib anjlgaa niaadnie xtiidz me; sinque mezhad biadneew lo Abraham.

### *¿Pa rquiin ley?*

<sup>21-22</sup> Nana gnë to: “¿Zig gocladz dzigo lëe nsiooglo xley Moisés lo trat ne been Dios ga?” ¡Led scada! Sac grieelod ygaa ne guielmban ndzon ne gdzind dze lozh ga, telne gnalo ne ley; ib grieelod ley csañwena ne nëz lo Dios. Telne niaca mine nrieelo ley nsilaaw miech lo dol, nod pe nacne dzigo nxeel Dios Xpëed me, biaad me biadbee me miech lадznia dol (sac rnee lo Xtiidz Dios masaque ngadoo miech lo dol). Jesússe gon zrieelo csilaa miech lo dol, totsaque dib zdoo zho gnalo zho me, mese zrieelo gdeed guielmban ndzon co lo zho.

<sup>23</sup> Zeene gard guiaad Jesús ga, laa ley co pquiin pquianapa ne zigne rquianap wxtis zha ne nioogyu, laga bdzin dze ne laa me biaad.

<sup>24</sup> Zig tib ngudziaan ne riaannie mëedwin, sca pquiin ley co lo ne, pseedaa ne zha gban ne, ni gacnañ ne

cho nac Jesús, men ne csilaa ne lo dol zeene dib zdoo ne gliladz ne me.

<sup>25</sup> Sangue niina ne laa Jesús biaadle, led ley codraa gnabey ne, ni niicle rquiindragaa pe cseedaa ne.

<sup>26</sup> Gacxe waa, tel to xpëedle Dios nac to porne dib zdoo to rililadz to Jesús,

<sup>27</sup> ni grëse zha ne brobnisle porne no zho xnëz Jesús, laa zho rlu ganle ne Jesúsle nacie zho, ni laa zho zienal gban zho zig racladz me.

<sup>28</sup> Mincoxe nagon waa, grëse ne tibaque nac ne niina, guiendraa ne goon cho nac zha Israel, cho nacgaa zha zit; dien cho nac ngundziin, cho nacgaa zha ne rnabey; goon dien cho nonraa pe mguiw te wnaaw ye; sac grëse zha ne naciele Jesús, tibaque nac zho grë zho.

<sup>29</sup> Ga nagon, telne ngable to lo Jesús, dzigosi nli zha xtii Abraham nac to, ni zgaa to grë guielnzaac ne bzeet Dios zeene psan me xtiidz me lo Abraham.

## 4

### *Zha ne nac xpëed Dios*

<sup>1</sup> Golgona ganle, nligaa tib mëedwin lëe, niicle guiaannie win ncuaane rap pxoz win, per lega nacse win zig tib ngundziin win ne run xtsiin pxoz win. Niicle chen win grë ncuaan co, per grielod win gnabey wina.

<sup>2</sup> Laa win riaan ladznia zha ne ran win, zha ne rseed win dien pe nac ncuaane gun win, laga gdzin dze ne laa win zacle ycaania ncuaane psan pxoz win.

<sup>3</sup> Scadaa nagon bzhiaac ne glo zeene gard guiaad Jesús, rrieequia masaque ngadoo ne lo grë ley co, ni lo grëraa ncuaane rac lo guidzliu rii.

<sup>4</sup> Laa zeene bdzin dze ne laa Dios pxeel Xpëed me Jesús lo guidzliu (tib wnaa bded por xniaa me, bzoob me diidz been me grëse zigne rnabey xley zha Israel),

<sup>5</sup> laa me biaadsilaa ne, biadbee me ne ladznia ley co, bdiizh me grë xtol ne, zeena ycaania Dios ne gac ne mëed lo Dios.

<sup>6</sup> Ni parne glu ganle ne nli xpëedle Dios nac ne, pxeel Dios zhiEspíritu Xpëed me blëz zdoo ne; gacxe waa niina laa ne rien rnee ne lo me: “¡Papá yeen!” Espiritu co rnee ne Pxoze nac me.

<sup>7</sup> Ga nagon, led yedraa niina nac ne zig cholze cho ngundziin, sinque xpëedle Dios nac ne, ible ye ne yгаа grë guielnzaac ne rap Dios.

### *Rnee Pabl rnabeydraa ley*

<sup>8</sup> Bets, bzian, golsoladz ganle, zeene bii gard gunbey to men ne nacpaa Dios, masaque rrieequia ngadoo to lo ncuaane nac zhimdio to hor co, rdib rdzag to run to grë mine rzac to rdziladz grë mdio co.

<sup>9</sup> Nana, laa to runbeyle Dios, mazd gni naa ganle ledaa Dios runbeyle to, ¿pe nac dzigo racladz to gbiire tsiegan to, tsiequitsgzhib to lo grë mdio co, gbiire guiab to ladznia grë ncuaane paat rquiind co, gnabeya to?

<sup>10</sup> Rquia to gon run to grë lni, dien pa mëe ndzonraa, dien pa dze nac dze ndaraa, pa iz nac iz ne ndaraa, dien pa dze zac pe gow to, pa dzeegaa gacda.

<sup>11</sup> ¡Rdziebnie naa to gon! ¡Pe nlipaa zhlëse bialseed naa to, ne squi laa to racladz csaan mine bialne naa lo to!

<sup>12</sup> Bets, bzian, laa naa rnab lo to golban zigne mban naa, tel naa niicle ne zha Israel nac naa per zanaalraa naa mine nac xley zha Israel. Ngadoodraa naa lo ley, gane rne naa: Golban zigne mban naa. Ni guiabde to togo bod nend no pe falt ne been to lo naa.

<sup>13</sup> Led rsoladz to ganle, rzacne naa len dze ne psilo pseed naa to zha laa to lo dol; min co nacie nzianlaa dze blëz naa lo to i.

<sup>14</sup> Niicle ne sca rzacne naa, gondze to naa; laa ne mbix zdoo to nian to xquielguidz naa, znu pquia zdoo to naa, rley to blëzlo to naa pale cho xanjl Dios o Jesúsгаа, tel niaca mine mezhal niadseed to.

<sup>15</sup> ¡Ne nlipagaa rleydox to len dze co! Tel niaca mine niac mbee to bzi-aalo to, zootle zig mbee tow ngad tow

lo naa. ¿Yo grë guie|bley co na? ¿Yo ne scataa rleynie to naa leñ dze co?

<sup>16</sup> Nana, pe rëb to rlëë naa lo to ne znu rne naa miñe nacpaa diidzli. ¡Lëda gon!

<sup>17</sup> Golquiaadiaga ganle, grë zha ne gon squi ziadseed to i niina, nli laa zho noxco to per zhaa ncuaane no guic zho. Laa zho racladz tebaa zha guiaanladz to naa, csaan to grë mine bialseed naa to, zeena gbig to lo zho.

<sup>18</sup> Rtsidild naa pe nacne cho gacnie to, totsaque zha ne nli nquialadz tow. Zig nac naa tibaque noxco naa to, led loxaque zeene zodse naa lo to i.

<sup>19</sup> ¡Xin, ne nlipagaa gon rdednë naa ran naa squi rac to! Masaque nac guie|në rii lo naa niina, zig tib yoob ne rquia grë men wnaa ne gap mëed. Ni lëë nole naa guie|në rii nu nagon, haxta gdziñ dze ne gan naa laa to wbiire wbig lo Jesús stib.

<sup>20</sup> Tebaa niaca mine grieelo guialzhaal naa lo to i niina, zeena gan naa zha no to, dzigo dien zha gnegaa naa lo to; per na ne znu zit zo naa, nand naa dien pe nacraa ncuaane noyun to.

<sup>21</sup> Zha ne racladz gnabey xley zha Israel zho, racladz naa gnë zho dien, ¿pe ib rienñ zho zha zhobnee lo guits ne ziaad Xtiidz Dios

<sup>22</sup> zaatne raquiet xingan Abraham? Rneew: Chop xingan Abraham, tib mëed co gop wnaa ne nac ngundziin lidz me, laa stib mëed gop wnaa ne nacpaa tsiel me.

<sup>23</sup> Xpëed wnaa ne nac ngundziin ga, laa win goc mëed zig grëraa xpëed miech; sangue mëed ne gop tsiel me ga, laa win gol porne ib Dios rëb ne laa me yquianie win.

<sup>24</sup> Lo gop wnaa co, tibga me rlu ganle zha nac gop trat ne been Dios: Mine bzhaac Agar, ga rlu ganle zha nac trat ne been Dios guic gui Sinaí. Grëse zha ne zienal trat co, nac zho zig goc xpëed Agar, ladznia trat co no zho.

<sup>25</sup> Gzoob ne Agar nac Gui Sinaí, gui ne riaan nëz Arab; me nac guiedz Jerusalén ne ndxie leñ dze rii, sac

te| grë menguedz Jerusalén, masaque ngundziin nac zho lo ley.

<sup>26</sup> Sangue wnaa ne gocpaa tsiel Abraham ga, rrieequia me nac Jerusalén ne no gbaa, zaatne ngab grë zha ne no xnëz Jesús, sac led yedraa grë zha co ngadoo lo ley; ye ne ngab ga, ni gzoob ne lëë xniala ne ga nac wnaa co.

<sup>27</sup> Lëë Jerusalén co ga raquiet lo Xtiidz Dios, zaatne znu rnee:

Luu, ne nac luu wnaa ne brieelod niap mëed, bley niina;

nguee| goc, nguiedz broptsie lo guie|bley qui,

luu ne bdziñ dze niacnan luu zha nac yoob mëed.

Sac gon ndalraa xpëed wnaa ne brieelod niap mëed,

lëdle grë xpëed wnaa ne gop mëed.

<sup>28</sup> Bets, bzian, golgacnan sca ganle, laa ne nacle niina zig Isaac, xpëed tsielpaa Abraham, wnaa ne gacd yquianie mëed ga; sac te| Isaac, ib Dios psan diidz ne laa Isaac gac mëed lo Abraham.

<sup>29</sup> Ni zigne sca blëenie xpëed wnaa ngundziin co Isaac, mëed ne Dioszhal psan diidz gal ga; scasaque niina, no zha ne rlëë ran zho zionald ne mine rnabey ley, sinque laa ne zional dib zdoo ne rliladz ne Jesús.

<sup>30</sup> Ni nana, led lo Xtiidzaque Dios zhobnee ganle zha rëb Dios lo Abraham, rëb me: “Wnaa ne nac ngundziin lo luu i, bzonëz me gop xpëed me, nonguield ne ye mëed qui guiaanne ncuaane csañ luu lo xpëed tsiel luu.”

<sup>31</sup> Gacxe nagon waa, te| ne nacd ne zig xpëed wnaa ngundziin co, sinque laa ne nac zig xpëed tsielpaa Abraham.

## 5

### *Dziits golso*

<sup>1</sup> Peet lo ngadoodraa ne niina, sac gon laa Jesús biaadsilaale ne, sinque to none dziits so zeena ygadoode to lo xley zha Israel.

<sup>2</sup> Naa nac Pabl, ni naazhal rne lo to nu. Golgona sca ganle, te|ne laa to gdeed diidz tso to xbey zha Israel, nacdiedraa to Jesús ga dzigo.



<sup>3</sup> Ni laaw gneque naa lo to nu stib, grëse zha bgui ne rio bey co, ib none gun zho grëse zigne rnabey ley co.

<sup>4</sup> Zha ne rzac por gun zho grë miñe rnabey xley zha Israel, miñ co laa Dios csilaa zho lo dol, gacnañ zho ganle, leñ nozozit zho lo Jesús ga; ygaad zho guieñzaac ne yгаа zha ne gnalo Jesús.

<sup>5</sup> Sangue tel no, ndionpaa no silaa Dios no lo dol, sacne dib zdoo no rliladz no Jesús ni nacie Espíritu Sant no.

<sup>6</sup> Sac zha ne nli nole xnëz Jesús, peet liaadz nodraa zho bey ne rio zha Israel. Miñe noxcoraa zho nac ne dib zdoo zho gliladz zho Jesús, ni scagaa grieelo gleynie zho samiech zho.

<sup>7</sup> ¿Ese tow nli! ¿Pex goc to waa? Zaacse name rac to zeene psilo to bliladz to miñe nac diidzli. ¿Cho pquiil to ne nëdraa to tsienal tow?

<sup>8</sup> Miñe squi nonie guic to i niina, led zhiwseete Dios i, meñ ne bredz to grieet to lадznia ley.

<sup>9</sup> Golguien sca, adel ye to sac zig rëb diidz ne rnee: “Niipaxe ncobi waa runcsibe ncob guietxtil.”

<sup>10</sup> Per nanpaa naa, ible meñ ndzon ne rnabey ne meñ co gacnie to, zeena csaande to miñe nac diidzli; ni zha ne squi racladz gungüet to, tel chotaa nac zho ib tedsod siaabzi Dios zho.

<sup>11</sup> Bets, sangue naa tel niaca mine nli ye naa quianabey tso grë zha ne rliladz Jesús xbey zha Israel zig quianee zha qui, bod goonzhe ni ct-sidildraa zha Israel naa dzigo, glëëdraa zho zig rlëëtaa zho niina zeene ron zho rne naa zha nacie biaadguet Jesús lo cruz.

<sup>12</sup> Zha ne squi ziaadnabey tsopaa to bey ne rio zha bgui nëz Israel, jtebaa mazd ladaque zho yгаа zho, niicxe gdib nase zho waa cueniaal zho, led tsod zho noyunneed zho to!

<sup>13</sup> Bets, golguien ganle ne ygadoo-draaxe to lo ley waa, miñ co nacie biaadsilaa Jesús to. Per guiabde to togo ne laa me psilaale to, laa to gun ncuaane guiaabtaa guic to. Gunscade to, sinque tib tib to golleynie samiech

to, ine golgun ncuaane rquiin grë zha ne nacgrë to;

<sup>14</sup> sac niina totsaque gban to zigne rnabey Dios nu: “Bleynie samiech luu zigne rleynieque luu luu”; lëële grë miñe nac ley ga gun to.

<sup>15</sup> Per tel laa ne gleynie to zha ne nacgrë to, leñ dil no to, zig run grë ma ne lëëque ma noquiaalaylsa, lëëque ma noyowlsa; dzigo lëëque to gnitlo to ga. ¡Gunscade to!

### *Zha ne lega mbanse*

<sup>16</sup> Gacxe, laa naa rnab lo to: Goltsoxco golban zigne racladz Espíritu Sant, ni me gacnie to; led tso de to dien zha gun to grë ncuaane ndzinlid ne racladz xcuerp to.

<sup>17</sup> Sac gon grëse ncuaan co, rleynie Espíritu Santa. Laa xcuerp ne run ncuaane racladz Espíritu Sant, ni ncuaane racladz gaa Espíritu Sant nëd xcuerp ne gac miñ co. Gunde to miñe racladz xcuerp to sca.

<sup>18</sup> Telne gban to zigne rnabey Espíritu Sant, dzigosi nodraa pe nacie ygadoo to lo xley zha Israel.

<sup>19</sup> Ni miech ne sca run grë ncuaane ndzinlid, ib paat ngueetsd zho: rionie zho zha ne led tsieeld zho, run zho grë ncuaane ndzinlid ne racladztaa xcuerp zho,

<sup>20</sup> riegan zho grë mdio, rnab zho pe sac samiech zho, rlëënie zho samiech zho, rdilnie zho samiech zho, rzac zho adel cho glale tsieel zho, rnadse pew laa zho rlëële, runctil zho miech, rguib zho rtso miech, rbeextso zho dien cho zha ne gacnie zho,

<sup>21</sup> në rac zdoo zho ran zho ncuaane quianie stib miech, rzudz zho, rcaalsa zho zaatne loxaque rowcho zho, ni run zho grë guieyozh.

Grë ncuaan co run zho ni grëragaa ncuaane ndzinlid ne sca nac. Laa naa rbire rso diidz lo to, gunde to grë ncuaan co; sac gon grëse miech ngoopdol ne sca rban, grieelod gdzin zho zaatne rnabey Dios.

22 Sangue zha ne zienal mine  
racladz Espíritu Sant, znu nac zha co:  
rleyne zho samiech zho,  
tibaque nguieel rac zho,  
peet dzeb nonied guic zho,  
rxecw zho, rievedniobd zho,  
niowse rnee zho lo samiech zho,  
niapse ncuaan wen run zho lo  
samiech zho,  
run zho mine rnee zho gun zho,  
23 miech ndooladz nac zho,  
zha rnabey xcuerp zho.

Ni telne gban ne zigne nac grëse  
min rii, ni tib ley noguuitsd ne ga.

24 Grëse miech ne nli xnëzle Jesús  
no, zieniedraa guic zho gun zho grë  
ncuaane ndzinlid ne bzoobladz zho  
padzeela, grë ncuaane ndzinlid ne  
racladznë xcuerp zho, sac rien zho  
paat rquiind ncuaan co lo zho.

25 Gacxe nagon waa, telne nli  
mbannie ne guielmban ne rneedz  
Espíritu Sant, golgotsaa dzion ne mine  
rnabey me.

26 Dzigosi gacniatsdraa ne lo  
samiech ne, tsienaldraa ne dien cho  
glaaraa guiaan, tso ne në gac zdoo ne  
gan ne grë ncuaane rap zho, ncuaane  
racгаа zho.

## 6

### *None gacnie ne samiech ne*

1 Bets, bzian, telne gan to laa cho  
tib zha ne nacgrë to noyun pe tib dol,  
dzigo to ne nac to zha ne nlipaa zienal  
mine rnabey Espíritu Sant, to golnee lo  
zho. Diidz wen, diidz ndooladz golco  
zdoo zho gbiire xixcuaa guic zho; ni  
scagaa tib tib to none nsin so to, sac  
gon adel nenda yeque to sca sac.

2 Zeene ran to zha ne mban noded,  
golgun xyudar zho, golchoobladz zdoo  
zho, sac gon sca rnabey Jesús gban  
miech.

3 Tel zha ne rzac zha non nac zho,  
ni laa zho peet nond zho; lëëque zha  
noguitnie zho ga.

4 Tib tib to, wen wen golguien dien  
pe quiayun to, telne ncuaane ndzin-  
liw ine golley, per tsode to glëë zdoo to  
gan to mine run stib zho.

5 Sac tib tib ne, psose Dios ne pe nac  
xtsiin me mine gun ne.

6 Grë zha ne noseed Xtiidz Dios, ib  
none ncuaane rgaataa lo zho gdeed  
zhow yquiin zha ne noluw lo zho.

7 Tsienie wguite guic to sca, sac  
gon led yed Dios guiab ne quitnie ne.  
Tib tib ne, tel pe nac mine run ne  
mincoque ctsire me lo ne.

8 Zha ne run grë ncuaane ndzin-  
lid, lëë mine cueequia zho ga laa zho  
nitlo. Laa zha ne gun grë mine rn-  
abey Espíritu Sant, lëë mine ygaa zho  
ga nac tib guielmban ndzon ne gdziind  
dze lozh.

9 Gacxe nagon waa, tibaque got-  
saa dzioxco ne dziuun ne ncuaane  
ndzinli, ncuaane rquiin, guieete ne;  
sac telne sca tibaque dzioxco new,  
zeene gal dze co laa ne ygaa mine  
guioguial ne.

10 Zeene gdeedtaaw diidz sca,  
golgotsaa dzioxco ne dziuun ne xyu-  
dar grëse samiech ne, ni nana zeene  
zha ne noque xnëz Dios nac zho,  
mazdraa riegual dziuun ne xyudar  
zho.

### *Rso Pabl diidz*

11 ¡Golwi ganle, naazhal pquia nu!  
¡Golwi ganle mbee mbee nac letr rii  
pquia naa rso naa diidz lo to!

12 Grë zha ne gon squi racladz  
tsopaa to bey ne rio zha Israel, laa zho  
runa zeena glëënie miech zho, zigne  
rlëënie zho grë zha ne rseed miech  
ne ib laa Jesús gut lo cruz, psilaa me  
grëse miech lo dol.

13 Nana, niicxe grë zha ne nole bey  
co, rundaque zho grë mine rnabey ley;  
sinque laa zha qui nagon quiaguib  
tebaa gdeed to diidz tso to bey, zeena  
sca lozhd guiats zho ne zha bnabey to  
bio to bey.

14 Sangue tel naa, ib quiaguibd naa  
ne dien zha gacniats naa, sinque laa  
naa quiaguib gacnan miech ganle zha  
nac ne laa Jesús gut lo cruz. Sac  
tel naa, por grë mine bded Jesús ga,  
grëtaa ncuaane no lo guidzliu laaw  
psan naa tib lad; ni niicle naagaa, sca  
rzac grë miech guidzliu naa.

<sup>15</sup> Grëse zha ne ygab xnëz Jesús, nacda ne dien cho no bey ne rio zha Israel, chogaa noda; sinque mine non nacne ctsëë Dios lo xquieľmban zho.

<sup>16</sup> Grëse to ne nac to zha ne zienal diidz ne rso naa nu, Dios yquia zdo to, ni me gacnieň to ctsebd grë zhgab to; niicle tow ni niicle grëragaa zha ne ngable lo mew.

<sup>17</sup> Bets, bzian, golgacnan sca ganle, ib racladzdraa naa gon pe yquiaaqui gbiire gaquiet mine bnele naa lo to nu; sac tel naa, grëtaa mdel ne no xcuerp naa nu, lëëlew nac bey ne rlu ganle ne nli lo Jesús ngab naa, ni xtsiin me noyun naa.

<sup>18</sup> Jesús men ndzon ne rnabey ne, me tsoxco grë zhizhgab to. Sca gaca. Pabl

## GUITS NE PXEEL PABL LO ZHA EFÉS

¡Diuzh to grëse to!

<sup>1</sup> Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

Laa naa rxel guits rii lo to grëse to bets, grëse to bzian, zigne nose to guiedz Efés i, ne nac to zha ne ngable lo Dios niina ne tiblrique laa to rililadz Jesús.

<sup>2</sup> Dios men ne nac Pxoz ne, ni Jesús men ndzon ne rnabey, me glu lo to guien to ganle pa lotaa noxco me to, ni me gacnien to ctsebd grë pe zhgab to.

<sup>3</sup> ¡Gotsaa dzioolnie ne Dios, Pxoz Jesús, men ndzon ne rnabey ne! Sac gon, zha nactaa grë guielnzaac nroob ne bneedz Espíritu Sant lo ne niina ne laa ne ngab xnëz Jesús.

<sup>4</sup> Haxta zeene gard cue guidzliu, bzooblo Dios ne gac ne zha ne gdziñ lo me zeene laa ne gliladz Jesús, gac ne tib miech peet xtold, zha ne gban zigne racladz me.

<sup>5</sup> Nquialadz me ne, gane bzooblo me ne gac ne xpëed me zeene laa ne gliladz Jesús, ib me sca bnabey gaca sac ib sca gola zdo me.

<sup>6</sup> Mincoxe waa tibaque none dzioolnie ne Dios, sac gon zha wentaa me lo ne, pxeel me Xpëed me men ne nquialadz me ga, biaadgunlay me ne.

<sup>7</sup> Ne nligaa nquialadzdox Dios ne, gane pxeel me Xpëed me bzhiee xchen psilaa me ne lo grë dol ne ngadoo ne, been me ne perdon grë dol co.

<sup>8</sup> Ni led loxaque mincodse, sinque haxta bneedz me guielrien lo ne, bdixbiini me ne,

<sup>9</sup> ni bneedz me diidz gocndion ne pe nac mine no zdo me, mine mese nan, mine nole me gun me.

<sup>10</sup> Sac niina laa ne ndionle: Grëse ncuaane no gbaa, ncuaane no guidzliu, tibaque gaca grëw ni Jesús

gnabeya grësew; sca gaca zeene laa dze co gdziñ.

<sup>11</sup> Grëse ncuaane bnabeyle Dios no gac, run mew zigne racladz me. Got-saa gwi ne ganle, glole bzooblo me ne ygaa ne grë guielnzaac ne nacle diidz gdeed me lo grë zha ne no xnëz me, guielnzaac ne bgaa ne zeene laa ne bziaab xnëz Jesús.

<sup>12</sup> Ni laa me bzooblo ne, zeena ne ne nac ne zha ne glopaa psilo bnalo Jesús, cxobnen ne lo miech ganle pa lotaa men nroob nac me.

<sup>13</sup> Xquizh Jesús, ye to zeene laa to psilo pquiaadiag diidzli, Diidz Ndzon ne rnee ganle zha laa to lo dol, ni bliladz to cho nac Jesús, laa Dios pxeel Espíritu Sant lo to zig tib bey, bey ne rlu lole me ngab to; zigne bnee me glo.

<sup>14</sup> Ne znu pxeel me Espíritu Sant nacie ne, ga rlu ganle ib nli zgaa ne grë mine bnee me gdeed me lo grë zha ne ngab lo me, ni lëe min co ygaa ne zeene gal dze ne laa me blozh psilaa grë zha ne ygab lo me; zeena grë ne gleyne me me por squitaa men nroob nac me.

### *Rnab Pabl guielbiini lo Dios*

<sup>15</sup> Zeene gocnan naa ne nlipaa dib zdo to rililadz to Jesús, ni ne nli nquialadz to grëraa miech ne no xnëz Dios,

<sup>16-17</sup> rded naa xquizh lo me. Zeene rzodiidznietaa naa me, rsoladz naa to, rnab naa lo me gneedz Espíritu Sant guielbiini lo to guien to cho nac me, zeena lozh gunbey to me. Lëe me nac xDios Jesús, lëe me nac Pxoz ndzon ne.

<sup>18</sup> Rnab naa lo me quixbiini me guic to, guien to ganle zha nactaa grë ncuaane ygaa to ne laa me bredz to, guien to ganle zha ndzontaa, zha nontaa ncuaane gdeed me lo grëse miech ne ngab lo me,

<sup>19</sup> ni guien to zha nroobtaa guielrnabey ne rap Dios, pa lotaa naca; lëe guielrnabey co nacie ne ne nac ne zha ne no xnëz me. Lëe guielrnabey co ga blu me



<sup>20</sup> zeene bleeban me Jesús bzoob me me cue me gbaa, zaatne riegual sob me ne nac me men rnabey,

<sup>21</sup> bzo me me, me rnabey lo grëse zha ne rnabey, lo grëse zha ne non, ni lo grëragaa ncuaane no; niicle niinaw, niicle len dze ne naragaa guiaada.

<sup>22</sup> Grëse ncuaane notaa, laa Dios psana ladznia me, ni bzo Dios me me rnabey lo grëse zha ne no xnëz me.

<sup>23</sup> Sac grëse zha ne no xnëz me rriequia xcuerp me ga nac zho, gacxe waa grëse zha ne nac cuerp co, zha none cxobnen ganle pa lotaa men nroob nac me. Tel pe lotaaw me nacie zho, sac grëtaa ncuaane no ladznia me now.

## 2

*Ne noxco Dios miech gane psilaa me zho*

<sup>1</sup> ¡Laa Dios bneedzle tib guielmban cub lo to niina, niicle ne ntseeb goc to glo! Golsoladz ganle, zeene scataa beenctal to xtol to, masaque nac to lo Dios hor co zig tib zha ne gutle,

<sup>2</sup> laa to güeynal niapse grë ncuaane ndzinlid ne rac lo guidzliu rii, been to grë mine rnabey ma ne rnabey lo mendox, ma ne rcheep grë zha ne ib nëd gon xtiidz Dios.

<sup>3</sup> Grëse ne sca wban ne glo, bional ne ncuaane ndzinlid ne bzoobladz-taa ne, bdziuuñ ne ncuaane bdeedtaa guxt xcuerp ngoopdol ne, ncuaane biaabtaa guic ne. Ni ne scataa nac ne, ib biogual ngaa ne lo guielnëdox ne cxeel Dios, lo guielnë ne noxtseeb grëraa miech niina.

<sup>4</sup> Per ne nquialadz Dios ne nac ne miech, gane pquia zdoo me ne,

<sup>5</sup> ni niicle ne rriequia mengutle nac ne ne scataa quiazziuuñ ne grë dol co, per bleeban me ne; lëe min co ga been me zeene bleeban me Jesús. ¡Laa me psilaa ne lo guielgut co, niapse por mezhah noxco ne!

<sup>6</sup> Laa me bleeban ne, zeena ygaa ne guiosiobnie ne Jesús zaatne gnabey Jesús.

<sup>7</sup> Zigtaa len dze riiw, zigtagaa len dze ne ziaadraaw, ga gan miech ganle

pa lotaa nquialadz me ne, pa lotaa wen me lo ne, sac pxeel me Jesús biaadsilaa ne.

<sup>8</sup> Golsan ganle, ne wen me mezhah noxco guiaanwen miech lo me, gane rsilaa me ne lo dol zeene laa ne rliladz Jesús dib zdoo ne; guiabd ne togo por pe guielwen ne gun ne laa me csilaa ne. Ible zdoo me ral rsilaa me miech,

<sup>9</sup> racda ne por pe guielwen ne gun zho; zeena gdaannied zho guielwen ne run zho.

<sup>10</sup> Dios nac men ne psan ne, ni niina ne laa ne bziaab xnëz Jesús, laa me bredz ne dziuun ne grë guielwen ne racladz me, mine bzooblote me ne dziuun ne.

*Grëse zha ne ngab lo Jesús, tipse nac zho*

<sup>11</sup> Golsoladz ganle miech ngoopdol, miech ne ngabd lo Dios, miech beed, sca lë to lo grë zha Israel glo (sac zha, ne rio zho bey zigne rnabey xley zho, rzac zho miech wen, miech mbe nac zho, zha nac zha ne ngabpaa lo Dios).

<sup>12</sup> Len dze co gard ygab to lo Jesús, gard gac to tipse grë to zha Israel, led yede to no lo trat ne biaan Dios grë me zha Israel, nande to grë diidz ne psan me lo zho. Lega laa to mbanse, runbeyde to Dios, ni tib guielnzaac quiambëzde to ygaa to.

<sup>13</sup> Sangué niina ne laa to bzëeb xnëz Jesús porne bzheie xchen me psanme me to, laa to ngable lo Dios.

<sup>14</sup> Jesús nac men ne psanwen ne grë ne, ptiche me grëtaa ncuaane pca zacse ndzianlsa ne; zigtaa zha Israela, zigtagaa zha zita, tibaque been me ne lo me niina.

<sup>15-16</sup> Zeene pquia me lo cruz, gataa ptiche me grë ley ne zianal zha Israel, ne scataa rsanglaa zho zho; gane niina zigtaa zha Israela, zigtagaa zha zita, laa me been zho tipse, been me zho tib guiedz cub ne ngab lo me. Sca nac ne laa me psanwen zho grë zho, ni psanwen me zho nëz lo Dios.

<sup>17</sup> Jesús nac men ne biaadnie Xtiidz Ndzon me lo ne grëse ne, gocndion ne zha guiaanwen ne nëz lo Dios, zigtaa tow ne nac to zha ne zit zo lo Dios glo,

zigtagaa zha Israela ne nac zho zha ne gax zo lo me.

<sup>18</sup> Gane niina, niicle zha Israela, niicle zha zita, zrieelo ygab zho lo Dios men ne nac Pxoꝛ ne, zeene laa Espíritu Sant guñquien zho none gbig zho lo me.

<sup>19</sup> Gacxe waa, tel to nacdraa to menzit niina, lole Dios ngab to, lal non to, lal nac to grē to grēraa zha ne ngab lo me.

<sup>20</sup> Golguien ganle, grēse ne niina gzoob ne nac ne zig tib yu ne noyaa, yu ne psilo grē zha ne pxeel Dios nonee xtiidz me lo miech niina, grē zha ne pxeelgaa me pteed xtiidz me lo miech padzeela, ni Jesús nac quie ne naaz yu co.

<sup>21</sup> Grēse zha ne zienal mine rnabey me, rreequia nosoquiaraa zho yu co ga, haxta guirew gaca tib yadoo ne nlipaa mbe nēz lo Dios.

<sup>22</sup> Zig nac to gon, tib tib to ne nac to zha ne ngab lo Jesús, ye to nac yadoo co, zaatne rbēz Espíritu chen Dios.

### 3

#### *Pabl nac zha ne güeyseed zha zit*

<sup>1</sup> Ni ne bialnecxe naa Xtiidz Jesús lo to waa, gocnan to ne niicle men zit nac to zrieelo ygab to lo Dios, min co gane znu nioogyu naa nu.

<sup>2</sup> Nanlaxe to ganle ne wen Dios, laa me bzo naa guñ naa dziin rii cseed naa grē menzit.

<sup>3</sup> Laa me blu lo naa zha nac grē ncuaane no guic me guñ me, mese nana per laa me blu lo naa zha naca, ni laa palala psilo bzetle naa lo to lo guits rii.

<sup>4</sup> Zeene glab tow i, dzigo guien to ganle ne nli nan naa zha nac grē mine guñ Jesús, mine mese nan.

<sup>5</sup> Wlaltaa choot miech gocnanda, laa niina laa Dios pxeel zhiEspíritu me bneedz guielbiini lo no gocndion now, zigtaa no ne nac no zha ne pxeel me nonee xtiidz me, zigtagaa grē zha ne pxeel me noteed xtiidz me.

<sup>6</sup> Ni znu naca: grēse zha zit, zгаа zho guielnzaac ne rēb Dios gdeed me lo grē zha ne ngab lo me, tibaque

nac guielnzaac ne ygaa zho grē zho zha Israel. Niicle zha Israela, niicle zha zita, laa Dios quiambēz gdeed me guielnzaac co lo zho, totsaque gliladz zho Xtiidz Ndzon Jesús.

<sup>7</sup> Niicle ne tib miech peet nond nac naa, per laa Dios bzooblo naa gne naa lo miech gacnan zho mine blozh bzet naa nu, me nacie naa, me rneedz grētaa poder ne rap me parne grieelo guñ naa dziin rii.

<sup>8</sup> ¡Ncuane gzee zdoo new! Golwi ganle, naa nac tib zha ne mazdraa peet nond lo grē zha ne ngab lo Dios; per laa me bzooblo naa, naa bgaa dze ndzon rii gne naa Xtiidz Ndzon me nu lo grē zha zit, zeena gacnan zho ganle pe zhistaa grē guielnzaac ne gdeed Jesús lo zho.

<sup>9</sup> Gne naa lo zho gacnan zho ganle zha nactaa grē mine no guic Dios guñ me, mine wlaltaa choot gard gacnan; Dios, men ne bzaa grēse ncuaane no.

<sup>10</sup> Nana gnē to: “¿Pe nacne sca been me?” Laa me beena zeena grēse zha non, zha rnabey ne no gbaa, zeene gan zho tipse nac zha Israel grē zho zha zit ngab zho lo me, ga guien grē zha gbaa co ganle zha ndzielguictaa Dios.

<sup>11</sup> Sca nac mine no guic me padzeela, ni zeene laa me pxeel Jesús laaw goc.

<sup>12</sup> Gacxe waa, niina ne laa ne ngable lo Jesús, peet lo ngadoodraa ne, niinasi zrieelo gbig ne lo Dios, sac ndion ne zha ne rnalo Jesús ible scaania Dios zho.

<sup>13</sup> Laa naa rso diidz lo to sca, niicle ne znutaa quiadeed naa loxaque ne bialseed naa to, gunde to ne minriise laa zdoo to guiaan, sinque golley golwi ganle nu rlu zha nziuu, zha non nac to lo naa.

#### *Nquialadz Jesús miech*

<sup>14-15</sup> Zeene rsoladz naa grētaa mine no guic Dios guñ me, ni mine beenlegaa me (me ne nac me Dad lo grēse zha ne ngab lo me, niicle lo guidzliu nuw, niicle gbaagaaw); rded naa xquizh lo me.

<sup>16</sup> Ni ne squitaa ndzon, ne squitaa ncuaane lozhd nac grëtaa guieInzaac ne rap me, laa naa rnab lo me cxeel me zhiEspíritu me gneedz xfuers to dziits so to.

<sup>17</sup> Ni rnab naa lo me tibaque dib zdoo to gliladz to Jesús, zeena scagaa tibaque gbannie to me, parne guien to ganle pa lotaa nquialadz me to.

<sup>18</sup> Ga guien to ganle grë to grëraa zha ne ngab lo me, ne nligaa pa lotaa nquialadz me to, nacda ncuaane grielo ctiix ne, guiab ne lalnuw.

<sup>19</sup> Niicle ne znu nacda ncuaane grielo guiab ne znu znu naca, per laa naa rnab lo me zig zie dze guienraa to pa lotaa rleyne Jesús to; zeena glu ganle ne nli nacie Dios to.

<sup>20</sup> Ni Diossi gon ne nac me men ne ndzon, mazdraa ncuaane grielo gneedz me lo ne, lëdle mine riab guic ne rnab ne lo me; ni ncuaane gaca gon, sac me nacie ne.

<sup>21</sup> Grëse ne ne nac ne zha ne no xnëz Jesús, itibaque golgotsaa gleyne ne me sca, ne squitaa ndzon me! Sca rieguiala.

## 4

### *None tipse gac zha ne rliladz Jesús*

<sup>1</sup> Zigne rne naa ga, laa naa nioogyu nu loxaque ne run naa xtsiin men ndzon ne rnabey, per laa naa rnab lo to zaacse golgac, golban zigne rieguial gban grë zha ne bredzle Dios ngab lo me, sac gon laa me bredzle to.

<sup>2</sup> Golgac tib miech ndooladz, tib miech wen, tib miech nlëëguicd, tib miech ne guieednied samiech sinque ine gleyne to zho.

<sup>3</sup> Wenle na ndxie to niina, ni Espiritu Sant nac men ne gacnen to; zeena tibaque squi tipse gac to.

<sup>4</sup> Sac gon tibaque cuerp nac ne grë ne, tibaque Espiritu nacie ne, ni tibaque nac mine ndion ne gneedz Dios lo ne, ne laa me bredz ne.

<sup>5</sup> Tibaque men ndzon ne rnabey ne, tibaque men ne rliladz ne, tibaque wrobnis ne no par grë ne ne dib zdoo ne rliladz ne me;

<sup>6</sup> tibaque Dios no, me nac Pxoze ne grëse ne, me nac men nroob ne zo lo ne, me racnen ne grëse ne, ni me nacie ne.

<sup>7</sup> Tipse nac ne, per tib tib ne ppose Jesús ne pe nac dziin ne grielo dziuun ne lo me, zigne gola zdoo me.

<sup>8</sup> Min rii ga raquiet zaatne znu zhobnee lo guits ne ziaad Xtiidz Dios: Blozhse psanwin me grëse zha ne rlëë ran me,

laa me biire zey gbaa stib;  
ni ppose me tib tib miech pe nac dziin ne grielo gun zho lo me.

<sup>9</sup> Golgotsaa gwi ne ganle, Jesús raquiet nu, rneew “biire zey me gbaa stib”, ga rlu ganle tib men ne biet gbaaw biaad me lo guidzliu.

<sup>10</sup> Sac me biet gbaa, ni biire zey me gbaa stib, zeena glu ganle tel pa lotaa zrieelo gdzin me.

<sup>11</sup> Ni mezhal rzo ne tib tib ne pe nac dziin ne dziuun ne; me rzo:

zha ne rxeel me gnee xtiidz me,  
zha ne rxeel me cteed xtiidz me,  
zha ne rienee Xtiidz Ndzon me tib tib lo miech zha laa zho lo dol,  
zha ne rteedlo grë zha ne ngab lo me,  
ni

zha ne rseed zho zha nac Xtiidz Ndzon me.

<sup>12</sup> Laa me run min co, sac laa me racladz grëse zha ne ngab lo me lozh xixcuaa lo xquielmban zho, zeena guien zho zha gun zho xtsiin me;

<sup>13</sup> haxta gdzin dze ne tibaque mine gliladz ne grë ne, grëse ne dziuunbeypaa ne men ne nac Xpëed Dios. Laa ne lozh sodziits, haxta gac ne zig me.

<sup>14</sup> Gacdraa ne zig chol cho mëedlas ne beelze pe rliladz; niicxe guiaad grë zha ne guiaadnie stib wseed, zha ndzinlid ne zombëz loxaque dien zha gdeeda diidz yquidie zho miech; yquidied zho ne.

<sup>15</sup> Sinque guional ne mine nac didzli, ine gleyne ne samiech ne, tibaque laa ne guional zigne nac Jesús, men ne rnabey lo ne grë ne ne ngab ne lo me (rriequia xcuerp me nac ne, me nac guic cuerp co).

<sup>16</sup> Ni ne me nac men ne rnabey lo ne, me rnabey zha gac tib tib dziin ne pso me ne dziuun ne; niicle ne nzian ne, per tipse nac ne laa ne nodziuun dziin ne pso me ne, zeena xixcuaaraa lo xquielmban ne, ni lozh guien ne zha gleynieraa ne samiech ne.

### *Guielmban cub ne rneedz Jesús*

<sup>17</sup> Laa naa rso diidz lo to nu, ni golquiaadiaga zig nac zeene men ndzon ne rnabey ne rnew lo to: gbandraa to zigne mban grëraa miech ne zozit lo Dios, grë zha ne mban zigne notaa guic;

<sup>18</sup> sac tel zha, ncow nac guic zho. Gard ygaa zho guielmban ndzon ne rdeed Dios, nand zho zha nac guielmban co sacne ndip zdo zho.

<sup>19</sup> Laa zho gocnadle, niapse lo grë ncuaane ndzinlid no zho, ib rgobeyd zho run zho grëtaa guielyozh ne no.

<sup>20</sup> Sangue to gon, ne nac to zha ne no xnëz Jesús niina, led mincod noseed to;

<sup>21</sup> telne nli noquiaadiag to ganle cho nac me, telne nli rien to zhiwseed me mine rlu ganle zha nac diidzli.

<sup>22</sup> Miech yozh ne goc to glo, grëtaa ncuaane ndzinlid, grëtaa guielyozh ne gocladztaa xcuerp to been to, igolsaana!

<sup>23</sup> None gdzëe lo xquielmban to, zigtaa grë mine no zdo to, zigtagaa grë mine rza guic to,

<sup>24</sup> golgac tib miech cub, zaacse golban, ndzinli golgac; zeena glu ganle ne nli beenncuble me to zigne racladz me.

<sup>25</sup> Golguien sca, yquidiedraa to samiech to, sinque niapse mine nac diidzli golnee, sac gon tel ne pe nacne yquidielsa ne ni tibaque nac ne grë ne.

<sup>26</sup> Telne glëe to, code to guielblëe co zdo to dib dze, sac gon dol ga.

<sup>27</sup> Gunde to mine racladz mendox.

<sup>28</sup> Zha ne goc ngbaan lëe, cuandraa zho, sinque gun zho dziin gdziniaa zho ncuaane yquiin zho, zeena scagaa grieelo gun zho xyudar zha ne guien pe yquiin.

<sup>29</sup> Gneede to diidznë, sinque diidz ne ndzinli, diidz ne yquiin golnee, zeena zha ne gona ine cchooblada zdo zho, ine yquiina lo zho.

<sup>30</sup> Golguien, gunde to ncuaane coguieinë to Espíritu Sant. Golgan ganle laa Dios pxeel me, nac me zig tib bey ne glu ganle ne nli lo Dios ngab to, gal dze ne laa me lozhpaa csilaa grë zha ne ngab lo me.

<sup>31</sup> None csaan to: guielnialadz, tso to gow gzhiizh zdo to;

glëedraa to,

sobzhiandraa to,

coredzdraa to,

gacntseebdraa to, ni

grëragaa guielntseeb ne no, gunde tow.

<sup>32</sup> Sinque none:

wen gac to lo samiech to,

golquia zdo samiech to,

golgun samiech to perdon, zigne

beenaque Dios to perdon zeene

laa to beenbey Jesús.

## 5

### *None glu cho nac zha ne ngab lo Dios*

<sup>1</sup> To ne laa to nacle xpëed Dios ni nquialadz me to, goltscoxco gac to zig me.

<sup>2</sup> Zaacse golban, golleynie samiech to zigne rleynie Jesús to, sac gon tel me, haxta bleeladz me me gut me xcuent ne, gut me biogon me lo Dios psanmbe me ne lo xtol ne, me goc tib gon ne pcaania Dios.

<sup>3</sup> Golguien sca, none glu to ne nli xnëz Dios no to;

gunde to grë guielyozh ne run grë zha ne zienald zigne nacpaa guieltsieel,

gunde to grë ncuaane yozh ne run miech ndzinlid,

gunde to grë ncuaane run grë zha ne zienal loxaque dien zha gunlo dimi.

Gunde to grë ncuaan co, per ni gzodidzde tow.

<sup>4</sup> Gneede to grë diidzguidz,

gneede to grë diidz ne paat rquiind,

gneede to grë diidz ro nëz;



sac gon rdzieeldraa gnee to grē ncuaañ co; sinque Dios golgoolnie, goldeed xquizh lo me.

<sup>5</sup> Nanle to ganle, grēse:

zha ne zienaldraa zigne nac guieltsieel,

zha ndzinlid ne run grēraa guielyozh, zha ne mbidz (zha ne rleynieraa dimi, laa ne gleynie zho Dios); ni tib zho grieelod gdziñ zaatne rnabey Jesús grop me Dios.

<sup>6</sup> Gdeete to diidz lo zha ne gacladz yquidie to gnē zho peet nacd grē min co, sac gon, grēcxe min co waa run grē zha ne nēd gon xtiidz Dios, lozh ga, lēē mine tsieguial zho laa zho yгаа lo guielzi ne csiaab me.

<sup>7</sup> Golguien sca, yquiaadiagde to xtiidz grē zha ne sca rnee, per ni ctsieel-sade to zho.

<sup>8</sup> Nli, ¿lëë?, ndzinlid wban to glo, rriequia lo ncow ga bio to, gocnie to mendox; sangue niina ne laa to nacie Jesús men ne nac biini, rriequia lo biinile no to. Golguiena sca, zaacse golban,

<sup>9</sup> sac niina ne laa to nole lo biini, none gac to:

tib miech wen,

tib miech ne zienal gac mine nac diidzli,

tib miech ne rnee diidzli.

<sup>10</sup> Goltsoxco guien to zha racladz Dios gban to.

<sup>11</sup> Gandzede to grē ncuaañ ndzinlid ne run grē zha ne no lo ncow, sinque gollisquiw;

<sup>12</sup> sac grē ncuaañ run zho ngueets zhliaan, haxta ncuaañ ctoladz ne gnee new.

<sup>13</sup> Grēse zha ne gbig lo biini co, zien zho ganle zha nactaa grē ncuaañ yozh ne noyuh zho; sac gon telne biiniw, tsod ncuaañ guiañgueets low.

<sup>14</sup> No tib zaatne znu zhobnee lo Xtiidz Dios, rneew:

Luu ne tibaque guieel no luu, blee mcaal lo luu;

briee lad grē zha ne squi nole ladznia guielgut,

zeena gban luu lo biini ne nac Jesús.

<sup>15</sup> Golguien sca:

Miech nixbiini golgac, ndzinli golban; gbande to zig chol cho grē miech nxen ne run mine notaa guic.

<sup>16</sup> Cteed zhlēde to xtse to lo ncuaañ paat rquiind, niicle ne niapse grē min co zienal grēraa miech len dze rii.

<sup>17</sup> Gunde to ncuaañ paat rquiind ne rza guic to, sinque golguien dien pa minpaa racladz Dios gun to, dzigo goltsoxco min co golgun.

<sup>18</sup> Gzudzde to, sac gon lo guielgonzi run miech ncuaañ nonguieldraa; sinque mazd golnab gneedzraa Espiritu Sant guielbiini lo to, zeena ine:

<sup>19</sup> goal to grē salm, grē himno, grē cant ne csiaab Espiritu Sant guic to; dib zdo to golgoolnie men ndzon ne rnabey.

<sup>20</sup> Goldeed xquizh lo Dios men ne nac Pxoz ne, por grētaa ncuaañ ran to, ncuaañ rded to; golguien ganle lo Jesús ngab to.

### *Zha none gban zha ne riladz Jesús*

<sup>21</sup> To ne nac to zha ne ngable lo Jesús, tib tib to golgon mine rnee zha ne nacgrē to, zeena glu ganle me nac men non lo to.

<sup>22</sup> To ne nac to men wnaa ne ptsieelniale, golgon xtiidz tsieel to, zigne rioxcoque to ron to mine nac xtiidz men ndzon ne rnabey.

<sup>23</sup> Sac ible tsieel to nac men ne no gnabey lo to, zigne Jesús rnabey lo grē zha ne no xnēz me (ni me psilaa zho lo dol, laa zho nac zig xcuerp me).

<sup>24</sup> Ni zigne sca ron zho xtiidz me, scaque none gon to mine rnabey tsieel to to.

<sup>25</sup> Togaa ne nac to zha bgui ne ptsieelniale, golleynie tsieel to, zigne rleynie Jesús zha ne no xnēz me. Tel me haxta bleeladz me xquielmban me,

<sup>26</sup> blee me zho lo dol, ni biaanmbe zho zeene laa zho pquiaadiag xtiidz me, wban zhow ni brobnis zho;

<sup>27</sup> zeena gal dze ne laa me ycaania zho, laa zho nacle miech ne rieguial gdziñ lo guielndzon ne no me, ni tib dol rapdraa zho, miech mbele nac zho, zig tib lē lar nquitsbie ne ni tib pxud neyd.

<sup>28</sup> Sca nagon none gun mgui, none gantsi zho tsieel zho zigne rantsi zho xcuerp zho. Mgui ne rantsi tsieel, rriequia xcuerp zho ga rantsi zho;

<sup>29</sup> sac gon, tsod tib zha ne lëëque zha csacsi xcuerp zho, sinque ran zhow. Ni scadaa nagon rzac Jesús grëse miech ne ngab lo me,

<sup>30</sup> sac nac zho zig xcuerp me. Ni lëë tib lë cuerp co nu nac ne.

<sup>31</sup> Zha ne pcatsieel-le, ible tibaque cuerp nac zho grop zho, laaw zhobneeque lo Xtiidz Dios zaatne rnee: "Ib none greezhaa mgui lo pxoz zho, lo xniaa zho, zeena gbannie zho tsieel zho gac zho zig tibaque miech grop zho."

<sup>32</sup> Rgobey naa ngan tsoguic to zha nacre chop miech gac tibaque cuerp; per ga gon rlu ne niicle nzian ne per tibaque cuerp nac ne, ni lëë xcuerp Jesús ga.

<sup>33</sup> Mine racladzpa naa csoladz to nu: to ne nac to men bgui, none gleynie to tsieel to zigne rleynieque to xcuerp to; ni niicle togaa ne nac to men wnaa, none gon to xtiidz tsieel to, cueede to xquielto zho.

## 6

<sup>1</sup> To ne nac to mëed, golgon xtiidz pxoz to, xtiidz xniaa to, sac sca nonguiela, ni scagaa glu ne nli rleynie to Dios.

<sup>2</sup> Golgan ganle, lo grë xley Dios no tib mine znu rnee: "Bin xtiidz pxoz luu, xtiidz xniaa luu, zeena ine niowse gac lo xquielmban luu, ni nroob dze ne gban luu lo guidzliu rii." Ni lëëw glopaa rnee ganle pe nac mine yгаа zha ne gun mine rnabeya,

<sup>3</sup> sac rneew, niowse gac lo xquielmban zho, ni nroob dze ne gban zho lo guidzliu rii.

<sup>4</sup> Togaa ne nac to men nguzan, gunde to ncuaane yquiaaguielnë to xpëed to, sinque golcobey dien zha gun to parne gon zho diidz, ni cseed zho gban zho zigne rdziladz Dios.

<sup>5</sup> To ne nac to zha ne ngadoo lадznia ben, golgon xtiidz men ne rnabey to. Golguien zha rnabey to, dib zdo

to, goltsoxco golgun xtsiin zho, zig nac zeene xtsiin Jesús ga noyun to.

<sup>6-7</sup> Gunde to ne loxaque zeene zose zho lo to, dzigose yquiaalo to gun to dziin zeena guiannziuu to lo zho, sinque ine nguieel golgac golgun xtsiin zho, zig nac zeene xtsiin Jesús ga quia to, ine dib zdo to quiayun to mine racladz Dios.

<sup>8</sup> Benque nanle to, zigtaa zha ne ngadoo lадznia bena, zigtagaa zha ne rnabeya, zdeedse Dios mine tsieguial zho tib tib zho tel pe nac ncuaane wen ne noyun zho.

<sup>9</sup> Togaa ne nac to zha ne rnabey, niowse golgac lo zha ne quia xtsiin to, gacntseebde to lo zho. Golguien ganle, zigne rzacaque zho, scaque rzac to, no tib men ne rnabey to grë to, lëë me ga zob gbaa; ni tel me gon led yed me guiab dien cho rnabey, chogaa run dziin.

### *None nsin so zha ne riladz Jesús*

<sup>10</sup> Bets, bzian, nu ne laa naa csi-aalle, laa naa rnab lo to gon tibaque gonalo Dios; golgan ganle, con grëtaa guielrnabey ne rap me, me gneedz grë lose fuerz lo to.

<sup>11</sup> Zig nac grë menquiib, ible no grë ncuaane rquiin zho zeene laa zho rie lo dil, scaque to niina nagon, golquiin grë lose fuerz ne bneedz Dios lo to, zeena glëbd mendox gungüet ma to.

<sup>12</sup> Golgan ganle, led-xe miech guidzliud waa nodilnie ne, sinque laa ne nodilnie grë me yozh ne quianzë zhan gbaa, ma ne quianabey grëtaa guielntseeb ne rac lo guidzliu rii.

<sup>13</sup> Gane nagon none yquiin to grëse lo fuerz ne zineedzle Dios lo to, zeena guiablode to zeene laa grë me ntseeb co csilo ygaal to; ni scagaa, zeene laa ma biablo, tibaque dziits so to grë to.

<sup>14</sup> Dziits sca golso:

Dziits golso lo mine nac diidzli, zigne dziits dziits rzhidoo len menquiib zeene laa zho tsie lo dil.

Golgun mine nonguiel zeena ctse to lo mendox, zigne rtse ncuaane racw menquiib lo grë ncuaane gnitlo zho.

<sup>15</sup> Nsin golso zeene laa to tsienee Xtiidz Dios lo miech gacnan zho zha

guiaanwen zho lo me, zigne nsinle zo menꝑuiib zeene laa zho no tsie lo dil.

<sup>16</sup> Guiaanladzde to, goꝑnalo Dios, zeena peet grieelod gun gre me yozh co to, zigne rnalo menꝑuiib guiiblag ne rsaac zho lo zha ne nodilnie zho.

<sup>17</sup> Goꝑsoladz ganle laa Dios psilaale to lo guielgut, goꝑsaca zigne rzac menꝑuiib pchog guiib ne rzob guic zho, rsilaaw zho lo guielgut. Ni goꝑsac Xtiidz Dios mine rneedz Espiritu Sant lo to, zigne rzac menꝑuiib xquiib zho.

<sup>18</sup> Nsin sca goꝑso, guiablode to. Tibaque goꝑzodiidznie Dios. Goꝑnab lo me mine rsiaab Espiritu Sant guic to, goꝑnab gacnieꝑ me grese zha ne ngab lo me; ni

<sup>19</sup> goꝑnab lo me gacnieꝑ me naa, csiaab me guic naa pe nac mine gne naa, peet dzeb tsod lo naa gne naaw lo miech; zeena gacnan zho ganle, zha nac Diidz Ndzon ne rnee zha laa miech lo dol, mine choot gocnanꝑ glo.

<sup>20</sup> Ib me bzo naa cteed naa xtiidz rii me lo gre zha zit, ni mincocxe waa rquiaqui znu no gre guiib rii nia naa, ngoguiu zho naa nu. Goꝑnab lo me gacnieꝑ me naa, gdzieebd naa gne naa ganle cho nac me. ¡Nsin sca goꝑso!

<sup>21</sup> Laa naa rxel Tic lo to, me nac tib men nziuu lo naa, dib zdoo me laa me quiayun xyudar naa lo xtsiin men ndzon ne rnabey ne. Me guiaadnie diidz lo to ganle zha rac naa, zha no naa nu.

<sup>22</sup> Mincopaa ziaad me i, ziaadnie me diidz zha no no nez rii, zeena ine gley to tsoxcoraa to mine rliladz to.

<sup>23</sup> Rnab naa lo Dios men ne nac Pxoꝑ ne, ni lo Jesus men ndzon ne rnabey, me gacnieꝑ to peet zhgab ctsebde to, ine tibaque gliladz to me, ine gleyne to samiech to.

<sup>24</sup> Me gunlay to, grese to ne nac to zha ne nlipaa dib zdoo rleyne Jesus.

Pabl

## GUITS NE PXEEL PABL LO ZHA FILIP

¡Diuzh to grëse to!

<sup>1</sup> Naa nac Pabl, grop no Timoté laa no rxeel guits rii guiedz Filip i. Laaw ziaad lo to ne nac to zha ne ngable lo Dios, ni nacie to Jesús; zigtaa tow, zigtaa zha ne zo lo tow, zigtagaa zha ne run xyudar zhow. Nanle to ganle zigtaa naaw, zigtaa Timotéw, tib ngundziin nac no lo Jesús.

<sup>2</sup> Dios men ne nac Pxoze ne, ni Jesús men ndzon ne rnabey, me glu ganle pa lotaa noxco me to, zeena ni tib zhgab ctsebde to.

<sup>3</sup> Zeene rsoladztaa naa to, rded naa xquizh lo Dios;

<sup>4</sup> ni zeene rzodiidznie naa me, rley naa gon rnab naa lo me gacnien me to;

<sup>5</sup> sac desde dze ne laa to psilo bliladz Jesús haxta lo nadze, tibaque laa to quiayacnie naa, quiayun to xyudar naa noseed naa miech Xtiidz Ndzon me.

<sup>6</sup> Ni nanpaa naa, zigne squi psilo Dios nozhixcuaa me lo xquielmban to, zigse zie dze laa me gzhixcuaaraa to, zeena nsinle zo to gal dze ne laa Jesús guiaad stib.

<sup>7</sup> Min co racladz naa, ni ib rieguiala sac ne nligaa rleynie naa to. Sac ib rsaande to naa, zigtaa zeene znu no naa ladzguiiba, zeene zonlaagaa naaw, zaatne racpaa rne naa ni rlu naa ganle ne nli diidzli nac Xtiidz Jesús.

<sup>8</sup> Dios nan ganle pa lotaa nonie to guic naa, rquiané zdoonaa to, zigne rzacaque Jesús ne.

<sup>9</sup> Rnab naa lo Dios gacnien me to, zig zie dze gleynieraa to samiech to, tsabiiniraa to,

<sup>10</sup> zeena guien to cue to niapse grë ncuaane ndzinli gun to. Sca ine ndzinli nac lo xquielmban to, ni tib xtol to guien gal dze ne guiaad Jesús;

<sup>11</sup> zaacse gban to. Ga glu to ganle lëe min co blu Jesús lo to, zeena sca csanglaa to Dios.

<sup>12</sup> Bets, bzian, racladz naa gacnan to ganle niicle tel pe nactaa ncuaane nodeed naa, per led mincod gon cuëz ygaazdraa Xtiidz Ndzon Jesús, sinque lel znu mazdraa ndal miech ne noquiaadiaga.

<sup>13</sup> Sac tel niina, zigtaa grë zha ne rquia dziin lo gobierna, ni grëragaa miecha, laa zho nanle ganle ne loxaque noyun naa xtsiin Jesús gane znu no naa ladzguiib.

<sup>14</sup> Sac ndal grë bets zeene gon zho laa naa znu biab ladzguiib, laa zho bguiaalraa laa zho noseed miech Didz Ndzon rii; peet rtoladzdraa zho, peet dzeb guien draa lo zho, masaque Dios rnalo zho.

<sup>15</sup> Parga nli no stib dii zha ne psilo noyun dziin co, per laa zho noyuna loxaque par dien zha guianzuiuu zho, sac në rac zdoonaa zho ran zho zha none naa Xtiidz me. Per zigne no zha ne sca nac, noque zha ne nli dib zdoonaa zho quiaseed zho miech.

<sup>16-17</sup> Lëe zha co nagon rlu ne nli rleynie zho naa; sac nan zho ib laa Dios bzo naa gne naa ni glu naa lo miech ganle ne nli diidzli nac Xtiidz Jesús; laa zha ne sca noyun dziin co par guianzuiuu zho, rzac zho na tel mazdraa glaa guiaan zho lo naa, mazdraa lozh coguieinë zho naa ne laa naa znule no ladzguiib.

<sup>18</sup> Per par naa, pex gun naa zho. Tel zha ne zie dib zdoow, zha ne zieedgaa dib zdoow, totsaque ne Xtiidz Jesús quiaseed zho miech; min co nac mine mazdraa rley naa.

<sup>19</sup> Ni zleyragaa naa, sac nan naa ib zrie naa zaatne nioogyu naa nu; sac lala quianab to lo Dios por naa, ni lala nacie zhiEspíritu Jesús naa.

<sup>20</sup> Dib zdoonaa racladz naa, tiblque gac naa lëeb naa gan naa mine tedtaa naa, gdziind dze ne gun naa ncuaane cuee xquielto naa. Racladz naa cxobnen naa ganle zha men rottaa nac Jesús; niicle tel niaca por min co yquiaaqui gut miech naa.



<sup>21</sup> Sac gon, par naa laa naa mban par gun naa mine rnabey Jesús, ni zeene guetgaa naa, nanpaa naa tib guielbley nroob ne yгаа naa.

<sup>22</sup> Per tel laga mban naa, nzian-raa ncuaane grieelo gun naa lo me; dzigo nagon riendaque naa dien pa min wenraa. ¡Pe wena gbanraa naa, te wena ye prontga gbi naa lo guidzliu rii!

<sup>23</sup> No hor rzaac naa gbanraa naa, nogaa hor rzaac naa tebaa laa naa wBILE lo guidzliu rii; zeena ziagaa naa lo Jesús, sac nligaa zoot naa laa naa bdzinle lo me. ¡Min co mazdraa wen, ledle cuéz naa lo guidzliu rii!

<sup>24</sup> Per rien naa ible none cuéz naa, sac rquiinpaa to naa.

<sup>25</sup> Mincocxe nagon waa, rgobey naa zbanraa naa, zeena lozh cseed naa to choobraa to lo Xtiidz Jesús, ine nley gac to laa to riladza;

<sup>26</sup> ni zeene laa naa gbire guial lo to i, rien naa nroob gley to, zdeed to xquizh lo Jesús porne racnien me naa.

<sup>27</sup> Per mine rsopaa naa diidz lo to gon: Goltsoxco golban zigne no gban zha ne ngab xnéz Jesús, zeena niicle telne grieelod guial naa, racladz naa gon naa tipse nac to grè to, tiblque dziits zo to lo Xtiidz Dios; ni noxcó to dien zha gliladz grèraa miech Jesús,

<sup>28</sup> ni lalnu rdziebde to grè zha ne rlëe ran to. Ga guien zho ganle nöz ne nitlo zho zie zho, sangue to ga rlu ne laa Dios psilaale to lo xtol to, ni nacie me to.

<sup>29</sup> Sac gon, ible none gan to guielne porne no to xnéz me, bzooblod Jesús to loxaque par yгаа to guielnzaac qui gnalo to me.

<sup>30</sup> Niicle tow, niicle naagaaw none dzian ne min co. Gonle to ganle zha nactaa grè ncuaane bdeed naa, ni ziyongaa to grè mine nodeed naa niina.

## 2

### *Goc Jesús tib men ndooladz*

<sup>1</sup> Nanle to ganle Jesús rchoobladz zdoo to, me rlu zha gleyne to samiech to, tipse nac to ni Espiritu

Sant nacie to; nanle to ganle none yquia zdoo to samiech to.

<sup>2</sup> Gacxe nana sca, golconley zdoo naa, ine tipse golgac, golleynie grè zha ne nacgrè to, tipse golnee, ni tipse golgac tel pa lo dziin ne gnediidz to gun to.

<sup>3</sup> Ncuaane gun to, guiabde to ne laa to guna par dien zha csanwin to stib miech, zeen dien zha guiannziiu to; sinque ine ndooladz golgac, masaque goltzienie guic ne nonraa stib miech lo to.

<sup>4</sup> Ib yguibde to ne lose to yquiin ncuaane gun to, sinque golguib dien zha gun to xyudar grèraa miech.

<sup>5</sup> Golsoladz ganle pa lotaa ndooladz goc Jesús len dze ne biaadted me lo guidzliu, scaquegaa nasca ndooladz golgac.

<sup>6</sup> Sac tel me:  
Niicle ne Dios nac me,  
per led mincod niab me nried me lo guielndzon ne no me,

<sup>7</sup> sinque grèse zigne nac me, laa me psana tib lad,

laa me goc zig tib ngundziin win,  
biaad me gol me lo guidzliu rii goc me miech.

Nacle me miech,

<sup>8</sup> ni bii psanwin me me lo miech,  
haxta bdeed me diidz pquiaa zho me lo cruz,  
zig run zho cho grè zha yozh.

<sup>9</sup> Mincocxe waa, psanglaaraa Dios me,  
biaan me men ne mazdraa non, men ne mazdraa nroob;

<sup>10</sup> zeena zeene laa me gaquiet,  
grèse zha ne no gbaa, grèse zha ne no lo guidzliu,

ni grèse zha ne no nöz len guidzliu, laa zho yquiitsgzhib,

<sup>11</sup> ni grèse zho laa zho cueero, guiab zho ganle ne nli me nac men ne rnabey.

Ga laa zho cxobnen ganle, zha men nroobtaa nac Dios, men ne nac Pxoz me.

### *Zha ne nac biini lo guidzliu rii*

<sup>12</sup> Bets, bzian, ne nligaa rleyne naa to. Laa naa rnab lo to (zigne bioxco to bin to xtidz naa zeene bléz naa lo to i, scaquegaa niina niicle ne zit zo naa,

golgon mine rne naa nu), ib gdeete to diidz guiab to lадznia dol stib, niina ne laa Dios psilaale to; golguien tsienewguite guic to.

<sup>13</sup> Benque Dioszhal rsiaab guic to rquiabladz to gun to mine racladz me, ni scagaa me racnien to rrieelo run tow.

<sup>14</sup> Ni ncuane rieguial to gun to, ine nguieel golgac golguna, peet glisquide to, ni niicle tilidiidzdaa to;

<sup>15</sup> zeena tsod pe nacre cho glisqui guiab zho laa to pe falt, pe dol ne quiayun. Gollu ganle nli xpëedle Dios nac to; zaacse golban, niicle ne ladaque grë miech ntseeb, miech ncow ne ndxie lo guidzliu rii no to. Golgac zig tib biini lo zho, zigne rziini mel gbaa lo ncow ne nac guieel.

<sup>16</sup> Ib csaande to Xtiidz Ndzon Jesús, diidz ne rdeed guielmban, lëew golconie guic to. Sca golgac, zeena gal dze ne laa Jesús guiaad stib, per nli gley naa gan naa led zhlëd brie naa bial naa, bialseed naa to.

<sup>17</sup> Zig nac niina, tel niaca mine no gded naa xquielmban naa gaca zig tib gon, parne dib zdooraa to gliladz to Dios, haxta zley naa gded naa xquielmban naa; sac racladz naa ye to yгаа guielbley.

<sup>18</sup> ¡Golley sca! Zigne no guielbley rii zdoo naa, scaqueгаа to golco nley zdoo to, zeena grë ne gley.

### *Timoté ni Epafrodit*

<sup>19</sup> Telne gneedz men ndzon ne rnabey ne diidz, racladz naa cxeelnioab naa Timoté guiaadwi dien zha no to, zeena haxta stibgac zdoo naa zeene laa Timoté glansonie diidz lo naa.

<sup>20</sup> Me cxel naa, sac guien d stib zha ne zienie guic zig zienie guic naa, tel led med; sac tel me nonie to guic me.

<sup>21</sup> Grëraa zho, ncuane yquiin lo zho rioxco zho, laa ne tsoxco zho mine nac xtsiin Jesús.

<sup>22</sup> Laa Timoté, led nanle to ganle zha ndzinli nac me, tel niina ine tib mëed nac me lo naa, nroob yudar ne quiayun me noseed no miech Xtiidz Ndzon Jesús.

<sup>23</sup> Ible laa guic naa no cxel naa me lo to i, loxaque gacnanse naa dien zha csan wxtis rii xcuent naa nu.

<sup>24</sup> Ni ye naa nend pronaque guialso naa i dien yo to, sac rien naa ible zneedz Dios diidz guial naa.

<sup>25-26</sup> Ni rgobey naa nonguielaquew cxel naa bets ne Epafrodit guiaad me nëz qui, sac laa me rbanle to, ni no me zhgab bin me laa to gocnan ne laa me bzhaacnë. Nli laa to pxeel me lo naa nu, ni blactagaa noyun me xyudar naa ne znu mban nodeed naa, blactaa noyacie me naa lo dziin ne nodziunun no.

<sup>27</sup> Ni nligaa bzhaacnë me, nzho goc me zootle laa me nietle; per pquia zdoo Dios me ni pquiaagaa zdoo Dios naa peet godc me, sac gon nole naa guielnë, ni tel pe niacaque me mazdraa niac nroob xquielnë naa.

<sup>28</sup> Min co nagon laa naa cxelgazh me, zeena gley to gan to lo me stib, ni scagaa niicle naaw zley naa.

<sup>29</sup> Golley sca gon golcaania me, golguien ganle bets to nac me, bets new grë ne ne nac ne zha ne ngab lo Dios; ni grëragaa zha ne nac zig nac me, golleynie zho.

<sup>30</sup> Golgan ganle, tel me haxta bdedlaa me niet me nu niina ne biaadgun me xtsiin Jesús; per ib pquiad zdoo me me, bleeladz me xquielmban me biaadgun me xyudar naa, porne brieelod niaad-zhal to.

## **3**

### *Ncuane mazdraa non*

<sup>1</sup> Bets, bzian, golley ne laa to ngab lo Jesús men ndzon ne rnabey. Mine ziesole naa diidz lo to, guieete naa zneque naaw stib, sac ncuane yquiingaa lo tow:

<sup>2</sup> ¡ib cxende to lo grë mëcw dox qui! Grë miech ndzinlid ne squi quianzë, racladz zho tsopaa zha bgui bey, sac rzac zho zha ne sca tso bey, ga rlu xnëzle Dios no zho.

<sup>3</sup> Sangue ne, ndionle ne zha nac diidzli, zha ne rleynie Dios zigne rsiaab Espiritu Sant guic zho, ni dib zdoo zho run zhow, zha co nac zha ne

nlipaa no xnëz me. Ne ne nac ne zha ne no xnëz me, Jesús nac men ne rdziuunnon ne, sac ndion ne por me laa Dios ycaania ne; rnalod ne grë ncuaane laglaase,

<sup>4</sup> sac telne scaw; zig nac naa pe zhis-taa ncuaane dzigo zrieelo gnalo naa. Tel no zha ne rzac por ncuaane been zho min co laa Dios csilaa zho; tel scaw, nroobraa ncuaane ziyun naa lo zho;

<sup>5</sup> Xon ngbidz raap naa laa naa biole bey co, zha Israel nac naa, lo xtii Benjamín zial naa, merpaa zha Israel nac naa; sac niicle pxoz naaw, niicle xniaa naaw zha Israel nac me. Niicle xleygaa zha Israela, nroob pseed naaw, zha farisé goc naa;

<sup>6</sup> bleyniedox naa grë mine zienal zha Israel, gacxe waa pquianal naa grë miech ne no xnëz Jesús; zig nac mine raquiet lo ley, grësew ben naaw zigne naca, ib biod dze ne cho zha pe nlisqui lo naa.

<sup>7</sup> Lëe grë ncuaan co rnalo naa len dze co, sangue niina Jesús rnalo naa, grëse ncuaan co laaw psanle naa tib lad.

<sup>8</sup> Ni led loxaque psandse naaw tiblad, sinque grësew peet nondraaw lo naa, mine non lo naa niina nacne beenbey naa cho nac Jesús, men ndzon ne rnabey naa. Niina ne laa naa runbey me, grëse ncuaan co rzaac naaw zig rzac ne grë pe guizh beed, sac laa naa racladz gbigraa naa lo me, ni gacniera naa me.

<sup>9</sup> Zana draa naa gun naa mine rnabey ley par guiaanmbe naa lo dol, sinque laa naa zanal dib zdoo naa gliladz naa cho nac Jesús; sac zha ne dib zdoo rnalo me, sanmbe Dios zho lo dol.

<sup>10</sup> Racladz naa guienraa naa zha nac Jesús, ni gaap naa poder ne pquiin Dios zeene blische me me len baa, ye naa teed grë mine bded me, ni cueeladz naa xquielmban naa zigne bleeladz me xquielmban me;

<sup>11</sup> ni scagaa, nanpaa naa ye naa grieegan gal dze ne guiadbeeban me grë zha ne no xnëz me.

*Stsëe Jesús xcuerp zha ne ngab lo me*

<sup>12</sup> Gnid naa togo laa naa benle gan, nasi laa naa nacle zigne racladz Jesús gac naa; led scada, laa naa bii noxcow, sac nanpaa naa zac naa zigne no guic me gac naa zeene psilaa me naa.

<sup>13</sup> Bets, bzian, gard gun naa gan; per xco co no naa; grëse ncuaane bded laaw biaanladzle naa, laa guic naa zienie ncuaane naraa ziaad.

<sup>14</sup> Masaque rzaac naa niina zig rzac zha ne rie prueb lo corr; rded naa fuerz gdzin naa zaatne gneedz Dios zhipremio naa, guielnzaac ne rbedz Dios ne ygaa ne zeene laa ne riladz Jesús.

<sup>15</sup> Ni ib znu none tsonie guic grë zha ne nlipaa dziits zo lo Xtii dz Dios; telne nogaa bla zha ne rzac led scada, per Dios gdeed guielbiini lo zho guien zho ganle zha naca.

<sup>16</sup> Ni negaa, grë mine rienle ne zha nac, none gban new.

<sup>17</sup> Bets, bzian, golwi ganle zha mban naa, ni zha mbangaa grë zha ne zienal mine blu no lo to grë to; dzigo sca golban.

<sup>18</sup> Sac gon nzian zha ne nacgrë to i (blactaale zizet naa zho lo to, ni niina haxta roon naa rzet naa zho stib), laa zho mban zigne racladzta zho, rlëe zho ron zho pe nac gut Jesús lo cruz;

<sup>19</sup> ni nëz ne nitlo zho ga zie zho. Laa ne tsienal zho mine rnabey Dios, laa zho zienal grë ncuaane gdeed guxt zdoo zho, ncuaane gdeed guxt xcuerp zho. Loxaque grë ncuaane mbee guielto zienal zho, per zha rlozhd gleynie zhow; niapse grë ncuaan lo guidzliu rii nonie guic zho.

<sup>20</sup> Sangue ne, laa ne zional ncuaane ygaa ne gbaa, sac gbaa nac zaatne ngab ne, ni laa ne quiambiaaz quiet Jesús gbaa guiaad me stib (me nac men ne psilaa miech lo dol, me nac men ndzon ne rnabey);

<sup>21</sup> zeena ctsëe me xcuerp ben wiich ne nu, gaca zig nac xcuerp ndzon me. Ni ib zun mew, sac nroob poder ne rap me rnabey me grëta ncuaane no.

## 4

*Rnab Pabl nley gac zha Filip*

<sup>1</sup> Bets, bzian, ne nlipaa gon rleynie naa to, haxta rzaac naa tebaa laa naa ranle lo to; to nac xquiebley naa, to nac zig tib premio lo naa por grëtaa xtsiin Jesús mine ben naa lo to. Laa naa rso diidz lo to, tibaque squi dziits golso, ib csaande to zhiwseed Jesús.

<sup>2</sup> Rnab naa lo bzian ne Evodia, ni lo bzian ne Sintique glëëlsadraa zho, none tipse gnee zho; sac gon bel zho, xnëz Dios no zho grop zho.

<sup>3</sup> Ni luu gon bets, ne nac luu zha ne tibaque quiayacnie naa lo dziin ne quiadziun ne, laa naa rnab lo luu bnee lo grop wnaa qui gneewen zho stib, sac gon ye zho blactaa mine bded zho zeene bzënal zho zhits naa biotiiz no Xtiidz Jesús, ni zeene güeynalгаа zho zhits Clement, ni zla zha ne rdz-iuungza no dziin. Laa lë zho zhooble len libr ne quia lë grëse miech ne bgaale guieľmban ne gdzindraa dze lozh.

<sup>4</sup> ¡Golley sca, tibaque golley! ¡Golgan ganle lo Jesús ngab to! Ni rneque naaw stib: ¡Golley!

<sup>5</sup> Golguien zaacse golbannie grëse samiech to, zeena haxta gzëeb diidz ganle ne nli miech ndzinli, miech ndooladz nac to. ¡Golguien ganle, ile ziaad men ndzon ne rnabey ne!

<sup>6</sup> Tel pe nac grë ncuaane quiaded to, tsode to zhgab, gdziebde to, sinque golzodiidznie Dios, golsan grësew ladznia me; per led loxaque gnabdse to, sinque golsoladz goldeed xquizh lo me.

<sup>7</sup> Ni zeene sca csañ to grë xliaadz to ladznia me, haxta tibliladz guiaan zdo to, peet dzeb tsoniedraa zdo to, peet zhgab tsoniedraa guic to, masaque Jesús nac men ne nacie to; grëraa miech ib guiend zho zha nac ne scataa tibliladz rac to.

<sup>8</sup> Bets, bzian, nu ne laa naa csiaalle guits rii laa naa rnab lo to, min rii golconie guic to:

niapse mine nac diidzli,  
niapse grë ncuaane nonguiel gac,  
niapse grë ncuaane rac zigne nac diidzli,

niapse grë ncuaane mbe,  
niapse grë ncuaane gleynie miech,  
niapse grë ncuaane gley miech gon zho,  
niapse grë ncuaane yquiin,  
niapse grë ncuaane gzee zdo miech ni gleynie zho.

Grë min rii golconie guic to, ni lëew goltsoxco gun to.

<sup>9</sup> Ni golguien gon, grë mine pseed naa to, mine psañ naa diidz lo to gun to, grë mine bin to bne naa lo to, mine gon to ben naa, grë min co goltsienal; zeena scagaa zacnie Dios to ib peet zhgab ctsebdraa to.

*Gon ne bdeed zha Filip*

<sup>10</sup> Ne nlipaa rded naa xquizh lo men ndzon ne rnabey ne, ni rley naa ne laa to pxeel grë ncuaane yquiin naa stib. Nan naa ne led biaanladzde to naa, sac tibaque noxco to dien zha gun to xyudar naa; sinque bdeed-niobda diidz.

<sup>11</sup> Rley naa ne laa to psoladz naa, maase niicle nodpaa naa zhgab co dien pa griee pe yquiin naa, sac pseedle naa peet zienied guic naa niicle tel zhataa nodeed naa.

<sup>12</sup> Nan naa zha nac guieľprob, ni nanquegaa naa zha nac zeene quianie ne nroob ncuaane yquiin ne. Pseedle naa rzac zdo naa mine nodeedtaa naa, niicle zeene biödze zdo naaw, zeene rcaabedzгаа naaw; niicle zeene nroob ncuaane yquiin naa no, zeene peet guiendгаа.

<sup>13</sup> ¡Grësew rrieelo naa, sacne nacie Jesús naa, me rneedz xfuers naa!

<sup>14</sup> Per wen ga been to, pxeel to ncuaane pquiin naa lëëtaque len dze ne peet guiend lo naa.

<sup>15</sup> Zeene brie naa nëz xtan zha Macedon i, len dze ne wriin psilo noseed naa miech Xtiidz Ndzon Jesús ga, tosaque nac zha ne been xyudar naa, beenlo to gon pxeel to lo naa, porne rleynie to dziin rii.

<sup>16</sup> Scasaque len dze ne no naa Tesalónica, blalaa vuelt pxeel to pe pquiin naa.

<sup>17</sup> Guiabde to togo bod ne dien zha ygadraa miech lo naa gane rzetpaa



naaw; lēda, sinque rley naa ne squi rala zdoo to rgad to, sac squi nroobraa guielnzaac ne ygaa to.

<sup>18</sup> Tel na gon, grēle ncuaane yquiin naa no, haxta nrooblew nu. Ni ne pxeelaque to Epafrodit biaadsan stib nēza, haxta bdedsole goclow lo naa nu. Grētaa ncuaane bgad to lo naa, rriequia naca zig tib gon ne bdeed to lo Dios, zig tib gox ndzon ne sac zdoo me ycaania me.

<sup>19</sup> Scagaa niina nagon, grēse ncuaane yquiintaa to, Dios men ndzon ne riladz ne, me gneedza lo to, porne nligaa dib zdoo to riladz to Jesús; sac gon, nroobdoo grē guielndzon, grē guielnzaac ne rap Dios.

<sup>20</sup> ¡Lēē xDios ne ga, me nac Pxo ne grēse ne! ¡Gotsaa dziuunnon ne me sca, mesi gdzind dze ne nitlo xquielndzon me! Sca rieguiala.

<sup>21</sup> Goldeed tib zhibdiuzh naa lo grēse zha ne no xnēz Jesús i, grē zha ne squi noxco mban zigne racladz Dios. Scagaa golcaania zhibdiuzh grē zha bets ne, zha ne no lo naa nu.

<sup>22</sup> Golcaania zhibdiuzh grēse zha ne no nu, zha ne riladz Jesús; haxta ye grē zha ne rquia dziin lo rey Roma nu, laa zho rxeel zhibdiuzh zho lo to.

<sup>23</sup> Jesús, men ndzon ne rnabey ne; me noxco to, me nonie grē zhizhgab to. ¡Me gunlay to grēse to!

Pabl

## GUITS NE PXEEL PABL LO ZHA COLÓS

¡Diuzh to grëse to!

<sup>1</sup> Naa nac Pabl, tib zha ne pxeel Jesús nonee Xtiidz me lo miech, sac ible Dios bnabey ne sca gaca.

<sup>2</sup> Grop no Timoté laa no rxeel guits rii Colós i, laaw ziaad lo to grëse to ne nac to zha ne noxco mban zigne racladz Dios, ni dib zdoo to rleynie to Jesús.

Dios men ne nac Pxoze, me glu ganle pa lotaa noxco me to, zeena peet dzeb tsonied guic to.

<sup>3</sup> Gzobtaa zeene rzodiidznie no Dios, Pxoze Jesús men ndzon ne rnabey ne, rnab no gacnien me to, ni rdeed no xquizh lo me ne squitaa rneedz me guielbiini lo to;

<sup>4</sup> sac zidzion no ne nlipaa dib zdoo to rliladz to cho nac Jesús, ni rleynie to grëse zha ne no xnëz Dios.

<sup>5</sup> Min co nonie guic to, sac desde dze ne psilo pquiaadiag to Xtiidz Ndzon Jesús mine nac diidzli, laa to gongan ganle no tib guielnzaac nroob ne ygaa to gbaa.

<sup>6</sup> Golgacnan sca ganle, Xtiidz Ndzon Jesús, wseed ne rliladz to, nzianraa zaatne quiagaaza, ni lëew notsëe lo xquielmban miech, zigne bdzëeque lo xquielmban to zeene pquiaadiag tow, laa to bien ganle ne nligaa pa lotaa noxco Dios to.

<sup>7</sup> Lëe min co ga biadseed Epafr to; tib men ne nziuu lo no, ye me rquiagza no dziin; ranaxe to ganle zha rioxcota me xtsiin Jesús.

<sup>8</sup> Me bzodiidz lo no ne squitaa rneedz Espíritu Sant guielbiini lo to, rleynie to samiech to.

<sup>9</sup> Gane zeene bdzion no squitaa ndzinli mban to, tibaque laa no quianab lo Dios quixbiiniraa Espíritu Sant guic to, guien to zhapaa nac grë mine racladz Dios gun to;

<sup>10</sup> zeena grieelo gban to zigne no gban zha ne no xnëz Jesús, tibaque

gun to ncuaane conley to zdoo me; dzigosi grëse ncuaane ndzinli ne gun to, zlupaa ncuaane rquiina, ni ziogucicraa to zha nac Dios.

<sup>11</sup> Ni rnab no lo me, niapse por poder ne rap me gunndip me zdoo to, gunndip me guic to; zeena niicle tel pe nactaa guielnë ne gan to, ib peet tsienied guic to, ib sacxuude to,

<sup>12</sup> ine gley to gdeed to xquizh lo me nac me Pxoze, ne squi laa me bzooblo to, psanmbe me to; zeena gdziin to lo biini zaatne ygaa to mine no gdeed me lo grëse miech ne no xnëz me.

<sup>13</sup> Sac me nac men ne blee ne ladznia mendox, ma ne rnabey lo guielcow, psan me ne ladznia Xpëed me Jesús, men ne rleynie me ga.

<sup>14</sup> Jesús nac men ne bdiizh grëse xtol ne zeene sca gut me lo cruz, me nac men ne psanmbe me ne nëz lo Dios.

### *Grë ncuaane been Xpëed Dios*

<sup>15</sup> Niicle ne gard dzian ne Dios, per laa Xpëed me biaad biaadlu lo ne ganle zha nac me, sac zigne nace me scaque nac Xpëed me; ni ladznia Xpëed me no grëta ncuaane no.

<sup>16</sup> Zeene bnabey me tsa grëta ncuaane no gbaa, grëta ncuaane no lo guidzliu; Xpëed me bzaaw grësew, zigtaa grë ncuaane rdzian new, zigtagaa grë ncuaane grieelod dzian new, zig nac grë “me mban” ne rap guielrnabey, rap poder. Jesús bzaaw grësew, ni ible par me biaaw.

<sup>17</sup> Nole Jesús zeene biaz grë ncuaan co, me naaza, gane tib tiba nosew zaatne rieguiala.

<sup>18</sup> Ni grëse zha ne no xnëz me, me nac men nroob ne rnabey lo zho; grëse zho laa zho nac zig tib cuerp, dzigo me nac guic cuerp co. Me nac men ne nole glo, ni me nac men ne glopaa brieaban; zeena glu ganle me nac men ne mazdraa nroob, me nac men ne mazdraa non;

<sup>19</sup> sac ib Dios bnabey zigne nace Dios scaque nac me.

<sup>20</sup> Niapse por Jesús grëse ncuaane no zigtaa lo guidzliuw, zigtagaa

gbaaw, laaw biaanwen lo Dios, ni lëe min co goc zeene sca bzhiee xchen Jesús lo cruz.

<sup>21</sup> Zig nac to, glo zit zo to lo Dios, rriequia rlëenie to me, sac niapse grë ncuane ndzinlid güeynie guic to been to;

<sup>22</sup> sangue niina laa Jesús psanwenle to lo me, zeene sca goc me miech pquiaa zho me lo cruz. Ni laa me psanwen to, zeena ine mbele to, ni tib dol rapdraa to gdziin to zaatne no me.

<sup>23</sup> Per parne grieelo gdziin to ga, none tiblque golgun guic to, goltsienal Xtiidz Ndzon me mine riladz to, ib guiaanladzde to guielnzaac ne no yгаа to, zigne raquiet lo Diidz Ndzon ne pquiaadiag to ga. Lëe Diidz Ndzon co quiagaaz dipse lo guidzliu niina, ni ye naa nac tib zha ne quia quianeew lo miech.

*Dios bzo Pabl tsoxco me zha ne ngab lo Dios*

<sup>24</sup> Grë guielnë ne noyan naa porne rleynie naa to, rley naa noyan naaw. Laa Jesús gonle grë guielnë co zeene psilaa me grë zha ne ngab lo me niina, laa niina ye naa noyan spalala, loxaque ne noseed naa zho Xtiidz Ndzon me, ne nac zho zig xcuerp me.

<sup>25</sup> Ni ible Diosгаа bzo naa noyun naa dziin lo grë miech ne no xnëz me, zig nac to, gocnien me to bzo me naa bne naa grëse zigne nac Xtiidz Ndzon me lo to.

<sup>26</sup> Diidz ndzon ne gocnand grëtaa zha gol ne ziyaadmban wlal ne bre guidzliu, laaw gocnan grë zha ne no xnëz me niina.

<sup>27</sup> Ible zha gocladz me gacnan grëtaa guielnzaac ne yгаа zho zeene laa zho gacnan diidz co; haxta to ne nac to zha zit. Ni lëe diidz ndzon co nu: Zha ne nacie Jesús, me gdziinnie zho zaatne nac lo guielndzon ne no me.

<sup>28</sup> Gacxe waa, zaatne ziotaa no, Jesús nac men ne rzeet no lo miech, ni megaa rneedz guielbiini lo no rseed no zho, rso no diidz lo zho; zeena gac zho tib miech ndzinli, zigne no gac zha ne ngab lo me.

<sup>29</sup> Min co nac dziin ne noxco naa, per led dziin ligada, gane dib nacle guielndaan, dib nacle fuerz ne rneedz me lo naa, noxco naa noyun naaw.

## 2

<sup>1</sup> Racladz naa gacnan to ganle ne nlipaa tibaque no to guic naa, zig-taa tow, zigtagaa zha Laodicéw, ni grëragaa zha ne gard ganlo naaw.

<sup>2</sup> Rnab naa lo Dios ib guiaan dzo to, tipse gac to ine gleynie to grë zha ne nacgrë to, lozhraa tsa biini xquielrien to guien to ganle zhapaac nac Jesús, sac gon naraa bdeed Dios diidz gunbey miech me.

<sup>3</sup> Me nac men ne rap grëse guielrac, grëse guielbiini nroob chen Dios.

<sup>4</sup> Laa naa rne min rii lo to, zeena choot yquidiede to, niicle paraa ndzielguic rzë xtiidz zho.

<sup>5</sup> Niicle ne nli zozhaald naa lo to i, per zhiespíritu naa nacie naa to, ni rley naa ran naa squi zaacse mban to, tiblque nac guic to dib dzo to riladz to Jesús.

*Tib guielmban cub*

<sup>6</sup> Nana sca, zigne bzëeb to xnëz Jesús gnabey me to, scagaa goltsienal mine rnabey me,

<sup>7</sup> masaque ladznia me golsan xquielmban to, me gólnalo, gollu ganle ne nli dib dzo to riladz to me, zigne pseed no to, ni tibaque goldeed xquizh lo Dios.

<sup>8</sup> Nsin golso: ib gac-wete to lo grë zha ne guiaadnie wseed lo guidzliu rii, grë godiidz ne paat rquiind, sac laa zho gacladz yquidie zho to. Tel zha, ib rzeete zho lo miech dien cho nac Jesús, sinque lel grë ncuane run grë xmengol zho, grë wseed ne rleynie grë miech lo guidzliu, min co rseed zho miech.

<sup>9</sup> Sangue ne, ndion ne ganle zigne nac Dios scapaa nac Jesús.

<sup>10</sup> Gacxe waa, to ne nacie to Jesús, peet rquiindraa to. Me nac men ne rnabey lo grëse zha ne rap poder, lo grëse zha ne rnabey.

<sup>11</sup> Zeene bnalo to Jesús rriequia hor co bio to tib bey, per nacda

zig nac bey ne rio xcuerp zha bgui, sinque tib bey ne rlu ne laa to psaanle grē dol ne been to glo; ni Jesús nac men ne bloo to bey co.

<sup>12</sup> Ni zeene brobnis to, rrieequia bgueetsnie to me ga ni brieebannie to me, sacne bliladz to poder ro ne rap Dios men ne blische me len baa.

<sup>13</sup> Glo zha gutle nac to nēz lo Dios, lala por grētaa xtol to ni porne gard co Jesús to bey co; laa zeene bleeban Dios Jesús, men ne pxeel me biaad-silaa ne lo dol, laa to wbiire bgaa guielmban stib.

<sup>14</sup> Ptiche Dios grēse mine riogual ne, sac bdiits ne mine nac xley me; grēse dol co pcaadz me Jesús zeene laa Jesús pquia lo cruz.

<sup>15</sup> Ni zeene sca bded Jesús, ga psi-aablo me mendox; grē me yozh ne rap poder, me ne rap guielrnabey, psan me ma guielto; sac gasi laa me blu lo miech ganle ne nli ladzniale me no ma.

### *Grē wseed ne paat rquiind*

<sup>16</sup> Gacxe waa, ib guncasde to zha ne rlisqui dien pe nacne pe row to, pe nacne pe rie to, pe nacne runde to grē zhilni zha Israel, runndade to dze ne rquia mēē yeen, runndade to dze ne rdziiladz zha Israel lo dziin.

<sup>17</sup> Grē min co bioxco miech zeene gard guiaad Jesús, per lega gocse ncuaan co zig tib zhimlē guielbiini ne biaadnie Jesús.

<sup>18</sup> Ib gliladzde to xtiidz grē zha ne squi racladz csozit to lo Dios, niicle squitaa rquiaalo zho ndooladz rac zho, squitaa rleynie zho grē anjl, rnee zho goon dieen pe ncuaane gbaa ne zielulo lo zho, lēēque lēē zho rlozhd gunniats zho por grē zhiwseed zho.

<sup>19</sup> Led yed zho ngab lo Jesús, men ne rnabey lo ne grēse ne ne nac ne zha ne ngab lo me. Tel ne, me racniēn ne, tipse noyun me ne, laa ne noyabiini-  
raa zigne racladz Dios.

<sup>20</sup> Zeene sca gut Jesús, gataa bnitlo me grētaa mine nac to glo, gane niina ngadoodraa to lo grē ncuaane zienal grēraa miech guidzliu. ¿Pe nac dzigo ne bii zienal to grē min co?

<sup>21</sup> Zig nac grē mine rnabey zho to, rnee zho: “Nod gon yquiin to ncuaan rii, nod gow to min rii, gacd ygaal to ncuaan rii.”

<sup>22</sup> Ncuaane tib rded nac grē ncuaane qui, zig nac guielwagw led ncuaane gdiid ga, grēse wseed qui miechse bleebeya.

<sup>23</sup> Parga nli na zootle nixbiini nac grē wseed co, sac rioxco zho dien zha tsiegan zho grē anjl, rac ndooladz zho lo miech, ni rsacsi zho xcuerp zho; per rriee lod grē ncuaan co ctsēew xpensar zho, zdoo zho, parne gnabey zho xcuerp zho.

## 3

<sup>1</sup> Golguien ganle, stible guielmban rap to niina, lēē guielmban co bgaa to zeene brieeban Jesús; gacxe waa, goltsoxco yгаа to grē guielnzaac ne no gbaa, zaatne zob Jesús cue Dios nēz derech.

<sup>2</sup> Grē guielnzaac ne no gbaa min co golconie guic to, led grēd ncuaane no lo guidzliu rii;

<sup>3</sup> sac gon, rrieequia gutle to lo grē ncuaane no lo guidzliu rii, laa to mbanniele Jesús, zigne racladz Dios.

<sup>4</sup> Laa ne rdziaap tib guielmban cub niina, sacne nacie ne Jesús; gal dze ne laa me guiaad stib, laa ne no gdziin lo me gban ne zaatne nac lo xquielndzon me.

### *Zha gban zha ne rililadz Jesús*

<sup>5</sup> Gacxe nana sca, golsaan grētaa guielntseeb ne run miech lo guidzliu rii:

tsoniede to zha ne led tsieelde to, gunde to grē ncuaane mbeeguielto, gdeete to diidz gnabey xcuerp to to, gunde to ncuaane ndzinlid ne racladz to,

ni gacblēde to lo dimi (sac tel scaw, dzigo dimi rсан to xlugar Dios).

<sup>6</sup> Grē dol rii run grē zha ne nēd gon xtiidz Dios, lozh ga lēē mine tsieguial zho laa zho yгаа lo guielzi ne csaab Dios.

<sup>7</sup> Zig nac to, grē min co been to glo;

<sup>8</sup> sangue niina, none csaan tow, ni lalnu:



glëeniedraa to samiech to,  
sobzhiandraa to,  
gundraa to guielntseeb,  
gneenëdraa to samiech to,  
gneedraa to diidzguidz,  
9 yquidiedraa to samiech to.

Sac gon, nacdraa to zigne nac to glo,  
laa to brielee lo grëtaa miñe been to.

10 Stible nac lo xquielmban to niina:  
tib miech cuble nac to, ni laa to bii  
nodzëë haxta que ne gac to zigne  
racladz Dios men ne psan miech,  
zeena scagaa lozh gunbey to zha nac  
me.

11 Zha ne bgaale guielmban cub rii, led  
yedraa zho cue dien cho zha nac zha  
Israel, dien cho zhagaa nac zha zit;  
dien cho no bey, dien cho nodgaaw;  
dien cho ziaad guiedz nroob, dien  
cho ziaadgaa guiedz win; dien cho  
rac, cho gacdga; dien cho run xtsiin  
ben, dien chogaa nac zha rnabey.  
Miñe rquiinraa niina, nacne grëse  
zho guien ganle Jesús nac men ne  
mazdraa non, me none gnalo zho.

12 Golgan ganle, zha nquialadztaa  
Dios to, ib laa me ble to gac to miech  
ne ygab xnëz me. Zaacse sca golban,  
ne nlipaa dib zdoo to:

golquia zdoo samiech to,  
niowse golgac lo samiech to,  
ndooladz golgac lo samiech to,  
nguudzladz golgac lo samiech to,  
guieedniede to samiech to.

13 Guieedniede to samiech to, ni  
zeene cho zha run pe tib falt lo to,  
golgun zho perdon. Golguien ganle  
zha been Dios to perdon; scaque to,  
none gun to samiech to perdon.

14 Ni miñe mazdraa none tsoxco  
to, golleynie zha ne nacgrë to zigne  
racladz Dios, zeena tipse gac to; ni  
scagaa gleynie to grëraa samiech to.

15 Jesús nac men ne ctiche grëtaa  
ncuaane ndzinlid ne no zdoo to,  
zeena niowse gbannie to samiech to.  
Lëë tib guielnzaac co no yгаа to ne laa  
Dios bredz to, ni scagaa none gban  
to, zeena tipse gac to grë to. Golsoladz  
goldeed xquizh lo me.

16 Niapse miñe nac Xtiidz Jesús  
golconie guic to, golco zdoo to.

Golquiin grë guielbiini ne rneedz me lo  
to, golseed grë zha ne nacgrë to, ni zha  
ne rxin, golnee lo zho zaacse gac zho.  
Dib zdoo to goldeed xquizh lo Dios por  
grëtaa miñe run me, inë golgoolnie me  
grë salm, golgoolnie me grë cant ne  
rdziolnie ne me.

17 Ncuane guntaa to, niicle zeene  
gnee tow, zeene gungaa to tib dziina,  
golguna zigne rdziladz Jesús, men ne  
rnabey ne; ni tibaque goldeed xquizh  
lo Dios men ne nac Pxoz to, niina ne  
laa to ngable lo Jesús.

18 To ne nac to men wnaa ne ptsieel-  
niale, golgon xtiidz tsieel to, sac ible  
sca nonguiel gban miech ne no xnëz  
Jesús.

19 To ne nac to men bgui ne ptsieel-  
niale, golleynie tsieel to; gacnchogde  
to lo me.

20 To ne nac to mëed, golgon miñe  
rnee pxoz to, miñe rnee xnïaa to, sac  
sca rdziladz Dios.

21 Togaa ne nac to men nguzan,  
gunde to ncuaane gunglëe to xpëed to,  
zeena csande to zdoo zho.

22 To ne nac to zha ne lega run  
xtsiin ben lo guidzliu rii, golgun grëse  
miñe rnabey zho to; gunde to zeene  
zose zho lo to dzigose yquiaalo to gun  
to dziin, zeena guiannzïuu to lo zho;  
sinque dib zdoo to golgun xtsiin zho,  
golguien ganle Dios zobwi ran me pe  
run to.

23 Grëse dziin ne gun to, inë  
nguiel golgac golguna, zig nac zeene  
xtsiinzhal Dios noyun to.

24 Benque nanle to, zгаа to miñe  
gdeed Dios lo grë zha ne ngab lo me,  
telne gon to diidz; sac gon Jesús nac  
men ne nlipaa rnabey to, ni lo me  
quia to dziin.

25 Golgon diidz sca, sac zha ne  
gonda, ib tedsod zdeed Jesús miñe  
tsieguial zho; sac gon, tel me led yed  
lo me ncuee miech.

#### 4

1 Togaa ne nac to zha ne quia miech  
xtsiin, zaacse golgac lo zho, csacside  
to zho. Golsoladz ganle, ye to tib  
ngundziin nac to lo men rnabey ne  
zobgbaa, ni me zobwi ganle pe run to.

*Gnab zho gacniɛn Dios Pabl*

<sup>2</sup> Bets, bzian, tel petaa rzac to tibaque golzodiidznie Dios, nsin golso, goldeed xquizh lo me.

<sup>3</sup> Golnab lo me gacniɛn me no, grieelo ziaab no zaatne guioseed no miech Xtiidz Ndzon Jesús, gnee no lo zho ganle cho nac Jesús men ne beenbeyd miech padzeela; sac zig nac niina por min co znu nioogyu naa nu.

<sup>4</sup> Golnab lo me gneedzraa me guielbiini lo naa, zeene cseed naa miech xtiidz me, guien zho mine rne naa; gun naa dziin co zigne no gun naaw.

<sup>5</sup> Golquiin guielbiini ne rneedz Dios lo to, zeena guien to zha gnee to, zha gac to lo zha ne gard gliladz Xtiidz Jesús; ni zeene sca rdeeda diidz sodiidznie to zho, golnee lo zho ganle zha nac Xtiidz me.

<sup>6</sup> Golguien tib godiidz ndzinli, tib godiidz niowse, min co golzodiidznie zho, ni none guien to zha ctsire to lo xtiidz zho tib tib zho.

<sup>7</sup> Laa bets ne Tic guiaad i, me guiaadnie diidz lo to ganle zha no naa nu. Rleyne no me, tibaque laa me noxco quiadziuungza no me xtsiin men ndzon ne rnabey ne.

<sup>8</sup> Ga nagon laa naa rxel me, me gnɛ lo to ganle zha no no nɛz rii, ni gnee me lo to zeena cchoobladz me zdoo to.

<sup>9</sup> Ye menladz to Onésimo guiaadgrop me. Rleyne no Onésimo, ye me tibaque noxco me xtsiin men ndzon ne rnabey ne. Grop zho guiaadnie diidz i ganle zha nac grɛ ncuaane quiayac nɛz rii.

<sup>10</sup> Golcaania zhibdiuzh Ristarc, men ne nioogyunie naa nu, zhibdiuzh Marcw betsyeeñ Bernabé (laa naa nile lo to ganle, telne laa Marcw guiaadgan to i, niowse golcuézlo me);

<sup>11</sup> ni zhibdiuzh Jesús, tib men ne rneeqe zho Just. Lo grɛ zha Israel ne rliladz Jesús, lɛɛse gza zha rii nac zha ne quiayun xyudar naa quiaseed no miech zha sɛɛb zho xnɛz Dios, ni blactaa zichoobladz zho zdoo naa.

<sup>12</sup> Golcaania zhibdiuzh menladz to Epaf, ye me quiayun xtsiin Jesús

nɛz rii; tibaque rzodiidznie me Dios rnab me dziits so to lo Xtiidz Jesús, ni tiblrique gac guic to tsoxco to gban to zigne rnabey Dios.

<sup>13</sup> Nanpaa naa ganle pa lotaa nonie to guic me, grɛ to zha Laodicé ni zha Hierápolis.

<sup>14</sup> Golcaania zhibdiuzh Demas ne, ni zhibdiuzh Luc men ne run rmed, lɛɛ stib men ne nziuu lo no nu.

<sup>15</sup> Goldeed tib zhibdiuzh no lo grɛ zha ne no guiedz Laodicé, zha ne nacgrɛ ne. Goldeed zhibdiuzh no lo zhuz Ninf, ni lo grɛraa zha ne rcaalsa lidz me i, riegoolnie zho Dios.

<sup>16</sup> Zeene gon lozh glab to lo guits rii, dzigo golxeela lo zha Laodicé, zeena ye zho glaba; ni scagaa to, gollab mine cxel naa lo zho.

<sup>17</sup> Ni golguiab lo Arquip, tsoxco me zaacse gun me dziin ne bdeed Dios lo me i.

<sup>18</sup> Naa nac Pabl, golgan ganle naazhal pquia tib bdiuzh rii nu rxel naa lo to. Golsoladz ganle ladzguiib no naa. Dios nac men ne gunlay to, me glu lo to ganle pa lotaa noxco me to.

Pabl

## GUITS NE GLO PXEEL PABL LO ZHA TESALÓNICA

¡Diuzh to grëse to!

<sup>1</sup> Naa nac Pabl, gza no Silas ni Timoté, laa no rxeel guits rii Tesalónica i; laaw ziaad lo to grëse to ne nac to zha ne ngable lo Jesús, meñ ndzon ne rnabey, ni lo Dios meñ ne nac Pxoze.

Dios ni Jesús, me glu ganle pa lotaa noxco me to, zeena peet zhgab ctsebde to.

<sup>2</sup> Tibaque rdeed no xquizh lo Dios meñ ne nac Pxoze, squitaa rneedz me guielbiini lo to; gzobtaa zeene rzodiidznie no me rzeet no to lo me.

<sup>3</sup> Ni zeene rzeet no to lo me, rso-ladz no grëtaa dziin ne ruñ to niina ne dib zdoo to rleyne to me, ni zha quialëb to lo grëtaa guielnë ne noyan to, tibaque nonie guic to ne ible zdzin dze ne laa Jesús guiaad stib.

<sup>4</sup> Bets, bzian, rleynedox Dios to, ni ndion ne ganle me bzooblo to ygab to lo me.

<sup>5</sup> Zeene biaad no biadseed no to Xtiidz Ndzon Jesús, znuse ptsëew lo xquielmban to, sac gocnie Espíritu Sant to bien to ganle niapse diidzli nac grë diidz ne nonee no lo to; scagaa no, gon to ganle zha mban no, ga blu ne nli diidzli nac grë mine noseed no miech. Ni golsoladz ganle zha biaadbannie no to i, bdzioxco no bdziuuñ no xyudar to, sac ne nligaa rleyne no to.

<sup>6</sup> Scagaa to, pseed to wban to zigne mban no, ni zigne wban meñ ndzon ne rnabey ne. Laa to pcaania xtiidz me, blozh ga, niicle nroob guielnë ne bded to, per bneedz Espíritu Sant guielbley lo to, ib peet güeynied guic to.

<sup>7</sup> Grëse zha ne rliladz Jesús nëz Macedon, nëz Acay, zeene bin zho zha mban to, yeque zho laa zho pseed mban zho zigne mban to.

<sup>8</sup> Ni ne squi ndzinli mban to, nzian-raa zaatne rzeet miech Xtiidz Ndzon Jesús, led loxaque gropdse lugar

rii. Zaatne ziotaa no, zhoob diidz ne squitaa dib zdoo to rliladz to Dios, rquiindraa ne no gzodiidza lo zho.

<sup>9</sup> Zhale rzodiidz grëse zha biaad no lo to i, zha scataa niow blëzlo to no len dze co, ni zha psaan to grë zhiwseed xmeñgol to, grë ncuaane nac mdio lo to, laa to bliladz meñ ne nacpaa Dios ne nguiamban, ni laa to zianañ mine rnabey me.

<sup>10</sup> Ni rzodiidz zho zha zienie guic to ne ible zdzin dze guiet Jesús gbaa guiaad me stib, ni quiambëz to gdzin dze co. Xpëed Dios nac Jesús, Dios bleeban me lo guielgut, ni me psilaa ne lo guielnëdox ne ziaadyob guiaad.

## 2

### Zha güeyseed Pabl zho

<sup>1</sup> Bets, bzian, nanle to ganle zeene biaad no lo to i biaad-zhlëd no, brieelo pseed no to.

<sup>2</sup> Niicle ne wriin psacsi zho no guiedz Filip hor co, per laa no bii biaad ladz to i, ni niicle igaaw bioxtseebaque no, per ib bdziebd no laa no pseed to Xtiidz Ndzon Jesús; sac ndion no Dios nacie no.

<sup>3</sup> Ni diidzli nac mine pseed no to, choot biaate par nquidiee no to, niicle biaategaa no par dien pe niaadla no lo to.

<sup>4</sup> Xtiidz Dios bnee no, me bzo no gnee no lo miech zha laa zho lo dol, ni min co nac dziin ne quiadziuuñ no. Nli nzian zha ne rlëeniew, per laa no bii rdziuuñ dziin co; sac zionald no gac mine rdziladz miech, sinque laa no zional gac mine rdziladz Dios, meñ ne nan ganle pe rza zdoo ne.

<sup>5</sup> Gon to ganle, bneed no pe diidz niow lo to par nquidiee no to, niicle bguibdgaa no dien zha ndeeda diidz needz to dimi lo no. Dios zobwi rdziuuñ no min co.

<sup>6</sup> Wlaltaa ib bguibd no dien zha niacnon no lo miech, niicle lo tow, niicle lo stibgaa miecha.

<sup>7</sup> Laa ne nlu no ganle zha rnabey nac no, sac gon Jesús pxeel no, lel ndooladz goc no lo to. Masaque zigne

rleynie men wnaa xpëdyeen me, nda nda ran me win; scadaa bleynie no to,

<sup>8</sup> bio no bdzioxco no pseed no to Xtiidz Dios. Ne nlipaa bleynie no to, telne niaca miñe niedziña haxta mbeeladz no no niet no por to.

<sup>9</sup> Bets, bzian, rsoladzaxe to ganle ni lalnu ib psodziind no to; blactaa, dze guieel bdziuuñ no dziin, nozhal bdziniaa ncuaane pquiin no len dze ne biadseed no to.

<sup>10</sup> Dios zobwi ran me ganle zha nac lo xquielmban no, ni niicle togaaw (ne nac to zha ne ngab lo me) gon to ganle ndzinli wban no zeene biaad no i, bdziuuñ no ncuaane mbee no diidz ro miech, sinque laa no bdziuuñ miñe rdziladz Dios.

<sup>11</sup> Masaque rziaac no to zig rzac tib dad xpëed zho, blactaa pchoobladz no zdoo to, bloonley no zdoo to tib tib to;

<sup>12</sup> pso no diidz lo to zaacse gac to, gban to zigne no gban zha ne no xnëz Dios, men ne bredz to gdziñ to lo xquielndzon me, zaatne rnabey me.

<sup>13</sup> Ne nligaa rdeed no xquizh lo Dios, sac zigne biadnee no Xtiidz me lo to, laa to pcaaniaw, bien to Xtiidz me naca, nacda ncuaane bleebeey miech. Ni nligaa Xtiidz Dios, gacxe waa zha ne rliladza zigne rzac tow niina, rzhixcuua lo xquielmban zho.

<sup>14</sup> Per zeene laa to bliladza, laa menladz to psacsi to; bded to zigne bdedaque grë zha Israel ne rliladz Jesús, sac tel zhaw psacsi menladz zho zho.

<sup>15</sup> Ni lëëque zha ne psacsi zho ga, zha co bnab psacsi zho Jesús men ndzon ne rnabey, zigne beetaque zho grë zha ne pxeel Dios biadteed Xtiidz me; ni lëëque zho bençxoon no. Ncuaane rbinladz Dios run zho, rlëënie zho grëse miech,

<sup>16</sup> rtsidil zho pe nacne nonee no lo grë zhazit zha laa zho lo dol. Loxaque quiayunctalraa zho xtol zho, per; jprobsaxe zho, sac guielnëdox ne zi-aadyob cxeel Dios ygaa zho!

<sup>17</sup> Bets, bzian, nli gard dzianlolsa ne wlal ne wbii no i, per tibaque rso-ladz no to; blactaa rnee no tel paa zha guiaaddzian no to.

<sup>18</sup> Tel naa blactaa gocladz naa nial naa, nialgan naa to. Laa no niaadle, per ptse mendox lo no gon, pca ma xnëz no pasëe no niaad.

<sup>19</sup> Guiabde to togo quiayaanladz no to, sac gon to rnalo no conley zdoo no gal dze ne laa Jesús guiaad stib. To glu nli bdziuuñ no xtsiin me, to glu ne nli riogual no ygaa no premio ne gneedz me.

<sup>20</sup> Ne nligaa rley no rdzian no zha mban to, haxta riats no zeene raquiet to; sac to rlu ganle ne nli xtsiin Dios nodziuuñ no.

### 3

<sup>1-2</sup> Ni ne scataa tibaque nonie to guic no, dzigo mazd pxeelaque no bets ne Timoté biaad lo to i, laa no bii-aañ guiedz Aten. (Nanaxe to ganle ye Timoté nacgza no quiadziuuñ no xtsiin Dios, quiaseed no miech Xtiidz Ndzon Jesús.) Laa no pxeel me biaadgan me to, biadchoobladz me zdoo to, biadnee me lo to lozh sodziits to lo Xtiidz Dios;

<sup>3</sup> zeena niicle tel pe guielnë ne noyanta to, ib guiaand zdoo to. Nanle to ganle grëse ne ne rliladz ne Jesús, ib laa ne no dzian guielnë.

<sup>4</sup> Led rsoladz to zeene biaad no i, bneegazh no ne ib laa ne no dzian guielnë; ni gon to ganle scase goca.

<sup>5</sup> Ne nligaa tibaque bionie to guic naa, nacne mazd pxeelaque no Timoté, biaadso me dien pe bii zienal to miñe nac Xtiidz Dios; sac ni naa nend pquiil mendox to biire zienal to ncuaane rnabey ma, dzigo zhlëse biadseed no to.

<sup>6</sup> Laa niina ne laa Timoté blanso nu stib, blansonie me diidz, në me niowse mban to, rleynie to grë zha ne nacgrë to, dib zdoo to rliladz to Dios. Ni në me rleynie to no, ye to racladz tebaa zha gan to lo no, zigne rziaacaque no.

<sup>7</sup> Miñ co nagon, bets, bzian, niicle ne nroob zhgab, nroob guielnë ne

*Racladz Pabl tsiegan Pabl zho stib*



nodieed no nu, haxta biaanladz no grë ncuaan co zeene gocndion no dziits zo to lo Xtiidz Dios, mine rililadz ne.

<sup>8</sup> Haxta stib goc zdoo no bdzion no squi tiblque laa to rleyne men ndzon ne rnabey ne;

<sup>9</sup> ni rdzieldraa no diidz ne gnee no gdeed no xquizh lo Dios por to. Ni ne znutaa bloonley to zdoo no, haxta Dios ran ganle pa lotaa rley no.

<sup>10</sup> Dze, guieel, quianab no lo me gneedz me diidzbey gbiire dzian no lo to stib; zeena lozh cseed no to grëraa mine no gacnan to lo Xtiidz me.

<sup>11</sup> Dios men ne nac Pxoze ne, ni Jesús men ndzon ne rnabey ne, me gacniën no grieelo guiaaddzian no to.

<sup>12</sup> Jesús gacniën to tsaaraa to biini, zeena gleyneraa to grë zha ne nacgrë to ni grëraa samiech to, zigne rleyne no to.

<sup>13</sup> Ni rnab no lo me, gacniën me to tiblque gac to lo Xtiidz me, zeena ine mbe zdoo to, ni tib dol rapde to zeene laa me gzo to lo Dios men ne nac Pxoze ne, gal dze ne laa me guiaad stib con grë zha ne nacie me.

## 4

### *Guielmban ne rdziladz Dios*

<sup>1</sup> Zig zobwi Jesús men ndzon ne rnabey, laa no rso diidz lo to: zigse zie dze goltsoxcoraa gban to zigne rdziladz Dios,

<sup>2</sup> benque nanle to zhaw, sac lëë min co bnabey Jesús no biadseed no to gun to.

<sup>3</sup> Sac gon, laa Dios racladz mbe guiaan to lo me, gunde to guielyozh yquiangob to zha ne led tsieelde to.

<sup>4</sup> Grë zha bgui, zeene laa zho gnee lo tsieel zho, none niowse ndzinli gac zho;

<sup>5</sup> gund zho zigne run grëraa miech ne nan d zha nac Xtiidz Dios; sac tel zha co, rzac zho loxaque par gdeedse guxt xcuerp zho, mincose rquiin wnaa.

<sup>6</sup> Niicle yquiangobde to tsieel sabgui to; sac zha ne sca run, sabgui zho ga rguitnie zho; ni dol co ible tedsod zunquizh Dios zhow. Golsoladz

ganle psole no diidz rii lo to glo, ni na laa no rneequew stib.

<sup>7</sup> Golguien ganle, bredzdaxe Dios ne waa parne dziuun ne grë guielyozh, sinque laa me bredz ne gban ne zigne racladz me.

<sup>8</sup> Gacxe waa, zha ne zienald wseed rii, gacnan zho ganle xtiidz Dios ga (men ne rdeed Espiritu Sant lo zha ne ngab lo me) noguiits zho, led xtiidz cholze samiech zhow.

<sup>9</sup> Laa zig nac guielwleyne, nanle to zha no gleyne to grë zha ne nacgrë to. Rquiind cso no diidz lo to dien zha gun to, sac Dioszhal pseed to zha gleyne to zigtaa zha ne nacgrë tow, zigtagaa grë samiech tow.

<sup>10</sup> Zig nac grë zha bets ne, zha bzian ne, zha ne no xtan zha Macedon, zëëb diidz rleyne to grë zha co. Goltsoxco sca, golleyneraa samiech to.

<sup>11</sup> Ni stib mine rso no diidz lo to: niowse golbannie samiech to. Mine nac xtsiin to tib tib to, min co goltsoxco, tozhal goldziniaa ncuaane yquiin to;

<sup>12</sup> zeena peet gunfalte lo to, ni sca-gaa grë zha ne gard gliladz Xtiidz Dios, haxta gzee zdoo zho gan zho zha mban to. Golsoladz ganle psole no diidz rii lo to glo.

### *Ib ziaad Jesús stib*

<sup>13</sup> Bets, bzian, nu na ganle laa naa gzodiidz lo to zha gac grë zha ne ret, zha ne ngable lo Dios; zeena tsoode to guielnë zig rzac grë miech ne gard guien gnalo Jesús.

<sup>14</sup> Ne, ne dib zdoo ne rililadz ne nli gut Jesús ni bleeban Dios me; scaque-gaa none gliladz ne ible zbeeban Dios grëse zha ne dib zdoo rililadz Jesús, zeene laa Dios cxeel me guiaad me stib.

<sup>15</sup> Golgacnan sca ganle, znu gon nac xtiidz me: Grëse zha ne ngab lo me, zha ne bii zomban gal dze co (gal dze ne guiaad Jesús) tednerd zho lo grë zha ne gutle.

<sup>16</sup> Zeene laa me quiet gbaa, redz ro ne yquia, zlu zëëb tsi tib zha ne quianabey, tsi tib anjl ne nonraa, ni tsi zhitrompet Dios; hor co laa me

griet gbaa, laa grë zha ne ngab lo me, zha ne gutle, laa zho grieeban.

<sup>17</sup> Dzigo tipse gac zho grë zho zha ne bii zomban ga, laa zho soquia laglaa lo xcow tsiedzieelo zho me; dzigosi gdziñdraa dze ne gbiche zho lo me.

<sup>18</sup> Nana sca miñe rne naa nu, golsodiidza lo grëse zha ne nacgrë to; zeena conley to zdoo zho.

## 5

<sup>1</sup> Bets, bzian, nana par gni naa lo to dien pe guidze te guieel guiaad me, choot ndionda.

<sup>2</sup> Golgacnañ ganle, lega nacle zeene gan miech laa me ziaadle, zig nac zeene rzëeb ngbaan yu guieel, ¿cho dien nanpaa pa hor sëeb ngbaan?

<sup>3</sup> Zeene laa grë miech guiab: “Nasi wen ndxie ne, peet guiełxtseeb nodraa”, tibaque zeene guien zho laa dze ne nitlo zho bdziñle, ni gasi grieelodraa cho csilaa zho. Sac zig znuse rnaaz yoob men wnaa ne bdziñle dze gap xpëed; scadaa gdziñ dze co.

<sup>4</sup> Sangue to, bets, bzian, nacdraa to zha ne nonziaab lo ncow, tel pa hortaa guiaad me nsinle zo to; sacdraa to dze co zig rzac miech ngbaan, lega nacle zeene ran zho laa ngbaan rdziñ.

<sup>5</sup> Miech ne nole lo xbiini Dios nac to, niini zo to; nacdraa to zha ne no glowtaa guieel, zha ne no lo ncow;

<sup>6</sup> gacxe nagon waa, niini golso, tsienalde to miñe run zha ne zienal guiełntseeb; sac nac grë zha co zig nac zha ne nixguies, tibaque guieel no zho.

<sup>7</sup> Sac tel guieela, guieel raaguies miech, niicle zha ne rzuudzgaaw guieel rzudz zho.

<sup>8</sup> Sangue ne ne nac ne zha ne niini zo, none guien ne pe nac ncuaane noyac. Tibaque dib zdoo ne gliladz ne Dios, gleynie ne samiech ne, zeena csaaca ne zig rsaac ncuaane racw menğuib lo grë ncuaane gnitlo zho; ni csoladz ne ganle laa Dios psilaale ne lo guiełgut, gotsaa ziaac new zig rzac menğuib pchog ne rzob guic zho rsilaaw zho lo guiełgut.

<sup>9</sup> Sac gon bredzdaxe Dios ne waa ygaa ne guiełnëdox ne no guiaad, sinque laa me bredz ne csilaa me ne lo guiełnë co. Ni lëe miñ co rac zeene laa ne rililadz Jesús.

<sup>10</sup> Zeene gut Jesús, ga bdiizh me xtol ne; zeena yase mban ne o gutlegaa ne gal dze ne guiaad me, per me gbannie ne.

<sup>11</sup> Nana sca, tib tib to goldeed xfuers zha ne nacgrë to, niapse diidz ne gun xyudar zho choobraa zho lo Xtiidz Dios, miñ co golnee lo zho; zigne quiayunaque to niina.

### *Rso Pabl diidz*

<sup>12</sup> Bets, bzian, laa no rso diidz lo to: Niowse golgac, niowse golnee lo grë zha ne pso Dios noyun xtsiñ me lo to, zig nac zha ne zo lo to, zha ne rnee lo to zha no gban to.

<sup>13</sup> Golguien ganle cho nac zho, golleynie zho, sac gon led lega nacd dziin ne quiayun zho lo to. Golsoladz sca: ¿Zaacse golban, tilniede to samiech to!

<sup>14</sup> Tel cho zha ne nacgrë to i, rsilo quiayacgbech, golgactox lo zho, zeena guien zho gun zho dziin. Grë zha ne quiasaan Xtiidz Dios, golnee lo zho zeena gleynie zhow stib; grëgaa zha ne gard tsoguicpaa zha naca, golgun xyudar zho tsoguic zhow; niicle grëragaa zha ne nacgrë tow, ib guieedniede to zho.

<sup>15</sup> Golguien tel pe guiełntseeb ne run miech lo to, guiabde to ne scaque gun to zho; sinque mazd goltoxo tibaque niowse golgac lo grëse miech, niicle lo zha ne nacgrë tow, niicle lo grëragaa miecha.

<sup>16</sup> Tibaque nley golco zdoo to.

<sup>17</sup> Tibaque golzodiidznie Dios.

<sup>18</sup> Goldeed xquizh lo Dios, niicle zeene noyan to guiełnëw, zeena nogaa to guiełbleya, sac sca racladz me gun grëse zha ne no xnëz Jesús.

<sup>19</sup> Golquiaadiag miñe rnee Espiritu Sant lo to, ni golguna.

<sup>20</sup> Golquiaadiag miñe rnee grë zha ne rnee grë diidz ne rsiaab Dios guic zho;

<sup>21</sup> wen wen golwi dien pe nac mine rnee zho, dzigo miñe rzac to rquiin-raa lo to, miñ co golseed.

<sup>22</sup> Golbiche lo grëse guielntseeb ne no.

<sup>23</sup> Dios, meñ ne rtiche grëse dzeb, grëse zhgab, mezhal csañmbe to lo grëtaa guielntseeb; dib nacse to (zhiespíritu tow, xalm tow, xcuerp tow) zeeña ni tib dol rapde to gal dze ne laa Jesús meñ ndzon ne rnabey ne gbiire guiaad stib.

<sup>24</sup> Me bredz to, ni mesi run me mine rnee me, gane ndion no ne ìb zun me min rii.

<sup>25</sup> Grëse to bets, grëse to bzian, laa naa rnab lo to golsiguiel golnab lo Dios gacnieñ me no.

<sup>26</sup> Golcaania zhibdiuzh no i, ine golxen nia grë zha ne nacgrë to, gollu ne nli rleynie to zho.

<sup>27</sup> Meñ ndzon ne rnabey, me rnabey naa laa naa rso diidz lo to, glab to guits rii lo grëse zha ne nacgrë to i.

<sup>28</sup> Jesús, meñ ndzon ne rnabey ne, me glu lo to ganle pa lotaa noxco me to.

Pabl

## BROP GUILTS NE PXEEL PABL LO ZHA TESALÓNICA

¡Diuzh to grëse to!

<sup>1</sup> Naa nac Pabl, gza no Silas ni Timoté; laa no rxeel stib guits rii guiedz Tesalónica i, laaw ziaad lo to grëse to ne nac to zha ne nole xnëz Dios, men ne nac Pxoze ne, ni Jesús men ndzon ne rnabey.

<sup>2</sup> Dios men ne nac Pxoze ne, ni Jesús men ne rnabey, me glu ganle pa lotaa noxco me to, zeena peet zhgab ctsebde to.

<sup>3</sup> Bets, bzian, ible rieguiala gdeed no xquizh lo Dios ne squitaa noneedz me guielbiini lo to; sac gon zigse zie dze dib zdooraa to rililadz to Xtiidz me, ni rleynieraa to samiech to.

<sup>4</sup> Zaatne rdzintaa no lo grë zha ne nole xnëz me, ne nligaa rley no rzodidz no lo zho zha squitaa dziits zo to, tibaque dib zdoo to rililadz to me niicle maase rtsidil miech to, niicle maase nroob guielnë ne quiaded to.

<sup>5-6</sup> Nli nroob guielnë noyan to, per scagaa laaw noyan to zeena tsieguial to gdziñ to zaatne rnabey me. Nu rlu ganle, Diossi zeene run me guielwxtis, zigne no gaca sca run mew. Zig nac niina, grë zha ne squi nosacsi to i, ib zgaa zho guielnëdox ne csiaab me.

<sup>7</sup> To ne nac to zha ne quiaded grë guielnë qui, golgona ganle, gal dze ne guiet Jesús gbaa guiaad me stib, ible zgaa ne descans ne gneedz me. Gal dze co, laa me guietnie grë xanj me, zha ne rapraa poder;

<sup>8</sup> masaque tib beldox ne guietnie me, sac dzigosi laa me guiaad csiaabzi me grëse zha ne nëd niunbey Dios, grëse zha ne nëd nquiaadiag Xtiidz Ndzon me.

<sup>9</sup> Grëse zho laa me gnabey guey zho lo guielnëdox, zaatne gdzindraa dze grieese zho. Lëë bichele zho lo me ga, ib gdziñ dze gan zho lo xquielndzon me, gangaa zho grëtaa poder ne rap me.

<sup>10</sup> Dze co, grëse zha ne no xnëz me laa zho goolnie me, gunnon zho me. Grëse zho see zdoo zho gan zho me; ye to gacgrë zho, sacne bliladz to Xtiidz me mine biadseed no to.

<sup>11</sup> Gacxe waa, tibaque laa no quianab lo Dios gacnieñ me to grieelo gban to zigne racladz me; zeena glu ganle led zhlëd bzooblo me to. Ni rnab no lo me gneedz me xpoder me lo to, zeena grieelo gun to grëse ncuaane rquiabladz to, zeena grieequia grëse dziin ne quiayun to porne rililadz to me.

<sup>12</sup> Zeena sca cxobnen to ganle pa lotaa men nroob nac Jesús, men ndzon ne rnabey ne; ni niicle megaaw, zunnon me to. Sac zigtaa mew, zigtagaa Diosa, noxco me to.

## 2

### *Ziaad Jesús stib*

<sup>1</sup> Bets, bzian, ib laa Jesús men ndzon ne rnabey ne no guiaad, ni laa ne gbannie me.

<sup>2</sup> Zeene gon to laa miech gnë laa dze co bdziñle, niicle gnë zho Espiritu Sant bneew lo zho, gangaa to palo nonee zhow zaatne ndxie nzian miech, o cxeelgaa zho pe tib guits lo to zig nac zeene no pxeela; gliladzde tow. Laa no rso diidz lo to, peet tsienied guic to, gdziebde to.

<sup>3</sup> Ib gdeete to diidz yquidie zho to. Sac gon ansraa ne gdziñ dze co, ib none grieequia grë miech ne gacntseeb lo Dios; lozh ga, laa tib mgui ne nacie mendox grieequiaque, zactseeb me lo Dios, per gabil ga nitlo me.

<sup>4</sup> Lëë zha co ctsidil grëse zhiwseed Dios, grëse ncuaane naclay lo miech; ni haxta zie zho ziesob zho zaatne nac len xyadoo Dios, guiab zho zha nac Dios.

<sup>5-6</sup> Per no tib men ne notse lo zho niina, laga gdziñ dze ne laa zho guiaad. Golsoladz ganle, blactaa bzeet naa min rii lo to len dze ne blëz naa i.

<sup>7</sup> Grëse ncuaane no guic zha ntseeb co gun zho, laaw rsilole; loxaque runfalt gdeed men ne notse lo zho ga diidz guiaad zho.



<sup>8</sup> Zeene laa zho guiaad, hor co laa Jesús guiaadaque con grë xquielndzon me, dzigo me ne grieese ro me gloozh me zho, gnitlo me zho.

<sup>9</sup> Masaque mendox gnabey zha ntseeb co, niapse xpoder ma gap zho, nzian ncuaane glu zho; zun zho grë ncuaane gzee zdo miech, per led ncuaane nlida.

<sup>10</sup> Zun zho grë ncuaane lozh yquidie zho grë zha ne nole nëz ne nitlo, zha ne ib bzhiguield nliladz mine nac diidzli. Tel niaca mine nliladz zhow, nleynie zhow, nsilaa Dios zho.

<sup>11</sup> Saan Dios tsienal zho grë ncuaan co, ni zililadz zhow zig nac zeene diidzliw;

<sup>12</sup> per ib siaabzi Dios zho, sac laa ne gliladz zho mine nac diidzli, lel mazdraa gleynie zho grë guielntseeb.

### *Zha ne bdedlaale lo dol*

<sup>13</sup> Bets, bzian, golguien sca tibaque golgotsaa gdeed ne xquizh lo Dios; sac gon tel to padzeelale bzooblo me to csilaa me to lo dol. Nacle diidz zeene laa to gliladz Xtiidz me, mine nac diidzli, laa Espiritu Sant csanmbe to lo me.

<sup>14</sup> Min co nagon nagne pxeel me no biadseed no to xtiidz me, guien to zha laa to lo dol; zeena gdziin to zaatne nac lo xquielndzon Jesús, men ndzon ne rnabey ne. Gacxe waa, zha nziuu nac to lo me.

<sup>15</sup> Golguien sca, dziits golso, ib csaande to grë mine pseed no to len dze ne biaad no i, niicle mine rneegaa no lo to lo guits ne rxeel no.

<sup>16-17</sup> Ni Jesúsaque, men ndzon ne rnabey ne, ni Dios men ne nac Pxoze, me gneedz xfuers to dziits so to; zeena grëse mine gnee tow, mine gun tow, wen grieequiaw. Me blu ganle pa lotaa rleynie me ne, laa me bneedz tib guielbley ne gdziind dze lozh lo ne, ni psan me diidz pe nac mine naraa no ygaa ne. Ga rlu ganle pa lotaa noxco me ne, niicle ne rioguiald new.

## 3

<sup>1</sup> Bets, bzian, nu ne laa no csiaalle, laa naa rnab lo to golnab lo Dios gac-

nien me no, zeena znuse znuse diidz no Xtiidz Ndzon men ne rnabey ne; ni zha ne gontaaw, guien zho ycaania zhow zigne pcaania tow.

<sup>2</sup> Ni golnab lo me csilaa me no ladznia grë zha ntseeb, zha ne run mine notaa guic; sac gon led grëd miech rililadz Xtiidz Dios.

<sup>3</sup> Dios men ndzon ne rnabey, mine rnee me run mew; gacxe waa, ible zacnien me to dziits so to lo Xtiidz me, ni squianap me to tsobede to ladznia mendox.

<sup>4</sup> Ndion no ne me noyacnien to noyun to grë mine pso no diidz lo to, ni scagaa me gacnien to bii gun tow.

<sup>5</sup> Me gacnien to grieelo gleynie to samiech to zigne rleynie Dios ne, ni guiuude to lo guielnë, sinque golgac zigne been Jesús.

### *None gun zho dziin*

<sup>6</sup> Bets zig zobwi Jesús, laa no rso diidz lo to: Tel cho zha ne nacgrë to i, nëdraa yquia dziin gdziniaa zho ncuaane gow zho, ib ctsieelsade to zho; sac gon pseete no to min co.

<sup>7</sup> Tel no, gon to ganle zha wban no zeene bliaaz no lo to i; ni sca gon none gban to. Ib bdeddzed no,

<sup>8</sup> biod dze ne lega ndioow zhlë no xcuun miech, blactaa haxta guieel bdziuun no dziin bdziniaa no pe pquiin no; ib psodziind no lo to.

<sup>9</sup> Niicle ne ib rieguial nab no lo to needz to ncuaane nquiin no, per choot peet bnabd. Mine bdziuun no pquiaa no dziin bdziniaa no pe pquiin no, par gan to ganle zha nonguiel gban to.

<sup>10</sup> Led rsoladz to len dze ne bliaaz no i, pso no diidz rii lo to: Zha ne nëd gun dziin, scagaa nodne gow zho.

<sup>11</sup> Laa niina laaw rzetaque naa stib, sac zidzion no no bla zha ne nacgrë to i, mbe rundraa zho dziin scase quiaded dze zho; loxaque nëzrii nëzrec no zho rzëeb zho lo grë ncuaane rieguiald zho.

<sup>12</sup> Zig zobwi Jesús men ne rnabey ne, laa no rso diidz lo zha ne sca run: none gun zho dziin gdziniaa zho ncuaane yquiin zho.

<sup>13</sup> Bets, bzian, ib guieete to, tibaque goltsoxco golgun niapse grë ncuane yquuin lo samiech to.

<sup>14</sup> Tel cho zha ne nacgrë to i nëd gon diidz gban zho zigne rso no diidz nu, golwi dien chow, dzigo ctsieelsadraa to zho; zeeṇa sca ctoladz zho.

<sup>15</sup> Per gunde to zho zig run zha ne rlëenie samiech, sinque golnee lo zho gac-wen zho; golguien ganle bets to grë to.

<sup>16</sup> Jesús nac men ne rtiche grëse zhgab, grëse guielxtseeb, me cuee to lo grëse zhizhgab to, lo grëse guielxtseeb gzataa dze. Me gacnien to grëse to.

<sup>17</sup> Naa gon nac Pabl, naazhal pquia bdiuzh rii rxel naa lo to; naazhal pquia lë naa nu. Golgan ganle lëe xletr naa nu.

<sup>18</sup> Jesús men ndzon ne rnabey ne, me gacnien to, me glu lo to ganle pa lotaa noxco me to.

Pabl

## GUITS NE GLO PXEEL PABL LO TIMOTÉ

¡Diuzh Timoté!

<sup>1</sup> Naa nac Pabl, tib zha ne pxeeļ Jesús nonee Xtiidz Ndzon me lo miech. Ible Dios meņ ne psilaa ne lo doļ, ni Jesús meņ ne rnalo ne, me bnabey quiayun naa dziin rii.

<sup>2</sup> Laa naa rxelį guits rii lo luu, rzaac naa luu zig tib xpēed naa ne squi dib zdoo luu rliladz luu Jesús. Dios meņ ne nac Pxoz ne, ni Jesús meņ ndzon ne rnabey ne, me yquia zdoo luu, me tsoxco grē zhizhgab luu zeena peet tsienied guic luu. Miņ co racladz naa, ni miņ co rnab naa lo Dios.

<sup>3</sup> Zigne psoque naa diidz lo luu leņ dze ne laa naa za nēz xtan zha Macedon ga, laa luu biaan Efés i; scagaa niina laaw rneque naa lo luu stib: Sca no luu i, bnee lo bla zha ne squi no i, csetraade zho miech grē zhiwseed zho, sac ncuaane paat rquiinda.

<sup>4</sup> Bnee lo zho, csaan zho grē cuent gox qui, zhale noyunroobraa goon dien zharaa, peraa been grē xmenļol ne. Ncuaane paat rquiind ga, loxaque runctildiidza miech; mazd lo lal ne nodildiidz zho, tsoxco zho cseed zho miech ganle pe nactaa grē guielnzaac ne rgaa grē zha ne rquiabladz dib zdoo rliladz Jesús.

<sup>5</sup> Laa naa rso diidz rii lo luu, sac racladz naa guiaanmbe zdoo grēse miech qui, guiaanmbe xquielrien zho ni dib zdoo zho gliladz zho Dios; zeena scagaa grieelo gleynie zho samiech zho.

<sup>6</sup> Sac gon, no bla zha ne quiasaanle Xtiidz Ndzon Jesús mine nac diidzli, leļ lo grē cuent ncuaane paat rquiind co no zho.

<sup>7</sup> Racladz zho zha cseed miech zha nac xley Dios, ni niicle zha rienđ zha naca; zeene rseed zho miech ni zha rienđaque dien pe rnee zho.

<sup>8</sup> Ndionle ne ganle nli wen ley ne psan Dios, per tel niaca mine yquiin miecha zigne psan me yquiina.

<sup>9-10</sup> Golguien ganle, biaanđ ley par gnabeya grē miech ne nole xnēz Dios, sinque laaw biaan par gnabeya grē: zha ne racndaan lo Dios, zha ne rond xtiidz Dios, zha ntseeb, zha ngoopdoļ, zha ne rzacdraa ne meņ nroob nac Dios,

zha ne rguitnie lē Dios, zha ne rut pxoz, zha ne rut xniala, zha ne rut samiech, zha ne rionie zha ne led tsieeld, zha ne nac mrazh, zha ne rban samiech riecto zho zho stib nēz, zha ne rquidie, zha ne rzeet lē Dios par gliladz miech xtiidz zho, ni nanpaa zho led diidzlid rnee zho.

Par grē zha rii nagon biaan ley; grē zha ne mband zigne nac Xtiidz Ndzon Dios;

<sup>11</sup> wseed ne rlu ganle zha laa miech lo doļ. Ni lēē wseed co gon pso Dios naa none naa lo miech.

### *Pquia zdoo Dios Pabl*

<sup>12</sup> Rded naa xquizh lo Jesús meņ ndzon ne rnabey ne, porne bzooblo me naa gun naa xtsiin me, ni noyacnien me naa ne laaw quiayun naa.

<sup>13</sup> Ne nligaa rded naa xquizh lo me, sac glo ntseeb goc naa, bneenē naa me, ptsidil naa grē zha ne no xnēz me, ntseeb goc naa lo zho. Ni niicle ne scataa nac grē ncuaane beņ naa, per pquia zdoo me naa; sac leņ dze co gard gliladz naa cho nac Jesús, lega lo xquieln xen naa ga sca beņ naa.

<sup>14</sup> ¡Pa lotaa pquia zdoo Dios naa! Ga blu me ganle zha noxcotaa me naa, pxobnia me guic naa bliladz naa cho nac Jesús, ni zig nac niina dib zdoo naa rleynie naa me.

<sup>15</sup> Mine rne naa nu niina, diidzliw, ni racladz naa grēse miech gliladz zho ganle, ible laa Jesús biaad lo guidzliu, biaadsilaa me grēse miech lo xtol

zho; ni naapaa gon goc tib zha ne mazdraa ngoopdol.

<sup>16</sup> Gacxe waa pquia zdoo Dios naa, niicle ne scataa miech ngoopdol naa per psilaa Jesús naa. Ga blu ganle pa lotaa paciens ne rap me; ni ga gwi grëraa miech ganle, zha ne gliladz me, zгаа zho tib guielmban ne gdziṇd dze lozh.

<sup>17</sup> ¡Tibaque sca golgotsaa dziuunnon ne me, golgotsaa gnee ne grë diidz ndzon lo me, zigtaa ninaw zigtagaa len grëraa izdoo ne ziaada! Sac gon, me nac men nroob ne rnabey, men ne gdziṇd dze ne nitlo. Sca rieguiala.

<sup>18</sup> Timoté, xin, laa naa rso diidz lo luu gon: Tibaque dziits bzo, ib guiaanḁ zdoo luu; psoladz ganle scaque nac diidz ne bnee grë zha bets ne zeene psiaab Dios guic zho bzeet zho pe nac grë mine pso Dios luu gun luu.

<sup>19</sup> Bien tibaque dib zdoo luu bliladz Jesús, ib gund luu ncuaane nan luu ndzinlid, zeena ine mbe xquielrien luu; sac gon no zha ne niicle rienpaa zho pa min nac ncuaane ndzinlid, ni laa zho runa. ¡Mincoxe waa, grë zha ne sca nac, rsaanga zho mine bliladz zho!

<sup>20</sup> Zig nac Himené grop Lejandr, sca been zho; per laa zho bzonëzle naa sca tsie zho xnëz mendox telne sca racladz zho; zeena guien zho ganle nodne gneenë zho Dios.

## 2

### *Gac-wnab lo Dios por grë miech*

<sup>1</sup> Laa naa rso diidz lo to: Golguien none gnab to lo Dios por grëse miech ne ndxie lo guidzliu, golnab lo me gunlay me zho, gacnien me zho; ni goldeed xquizh lo me por grëtaa ncuaane run me.

<sup>2</sup> None gnab to lo me gacnien me grëse zha ne nac wxtis, grëse zha ne rnabey, gdeed me guielbiini lo zho zaacse gun zho guielwxtis, zaacse gnabey zho; zeena tibliladz cue miech, ine gban ne zigne racladz me, sin choot peet glisquid lo ne.

<sup>3</sup> Sca nagon nonguiel dziuun ne, ni scagaa rdziladz Dios, men ne pxeel Jesús bиаadsilaa grëse miech lo dol;

<sup>4</sup> men ne racladz grëse miech sëeb xnëz Jesús, gacnan zho mine nac diidzli.

<sup>5</sup> Guien zho ganle ne tibaque Dios no, ni tibaque men ne zac gdzinnie grëse miech lo me: lëe men co nac Jesús, men ne goc miech bиаad lo guidzliu;

<sup>6</sup> sac gon Jesús nac men ne bdeed xquielmban, beet zho me, bdiizh me xtol miech. Min rii nagon racladz Dios gacnan miech len dze rii.

<sup>7</sup> Ni laa me pxeel naa none naaw lo grëse zha ne nacd zha Israel, noseed naa zho grëse mine nac diidzli, zeena guien zho dib zdoo zho gliladz zho Dios. (Mine rne naa nu diidzliw, rquidied naa.)

<sup>8</sup> Laa naa racladz sca, zaatne notaa zha ne dib zdoo rliladz Dios, grëse zha bgui none gzodiidznie zho Dios. Ni zeene gzodiidznie zho me, none ine mbe zdoo zho, choot lo zha rlëed zho, choot zha nodilmied zho.

<sup>9</sup> Laa grë men wnaa, racladz naa tsoxco zho zaacse gacwxab zho, niowse, tibliladzse gac zho. Sac grë men wnaa ne rliladz Dios, par gluniow zho rquiind ne goon dien paraa xixcuaa guitsguic zho, dien pe quie rbebni, pe or gac xnil zho, gac zhibguiaa zho, pe lar niazh ne gacwgaa zho.

<sup>10</sup> Par gluniow zho, rquiin zaacse gbannie zho samiech zho, zig none gban zha ne nole xnëz Dios.

<sup>11</sup> Zig nac len yadoo, none tibliladzse gac zho, dzese sob zho yquiaadiag zho tel pe nac wseed ne noyac;

<sup>12</sup> gnedzd naa diidz ne zha so cseed miech, o zhagaa gnabey lo mgui. None dzese sob zho,

<sup>13</sup> sac gon zeene psan Dios miech lo guidzliu, glose bzaa me Adán, dzigora bzaa me Ev.

<sup>14</sup> Ni stiba, pquidied mendox Adán, sinque laa ma güeyquidie Ev; ni porne bliladz Ev xtiidz ma, ga bdiits Ev xti-



idz Dios.

<sup>15</sup> Per silaa Dios wnaa lo xtoj zho, telne dib zdoo zho gliladz zho me, tsoxco zho gban zho zigne racladz me, guien zho gun zho mine riegual wnaa, gap zho xpëed zho ni choob zho win.

### 3

*Zha ne so lo grë zha ne ngab xnëz Dios*

<sup>1</sup> Zha ne racladz so gnabey zho lo grë zha ne no xnëz Dios, tib dziin wen ga rquiabladz zho gun zho. Sca zëeb diidz rnee miech; ni nligaaw.

<sup>2-4</sup> Per ga nagon rquiin:  
tib zha ne zaacse mban,  
zha ne mbannie loxaque wnaa ne nacse tsiel zho,  
zha ne tibliladz,  
zha ne nixbiini, rien pe run,  
zha ne mbe lo, choot lega gzhidznied zho,  
zha ne ine nley rac, rbëzlo zho miech lidz zho;  
zha ne rien zha rseed miech,  
zha ne rquiad lo nziu,  
zha ne rleynied dil,  
zha ne wen zdoo,  
zha ne zaacse mbannie samiech,  
zha ne rzonald dimi,  
zha ne zaacse mban lidz,  
zha ne rrieelo rnabey lidz, rnabey xpëed,  
zha ne nguzobdiidz nac xpëed, rbeed meed xquielto zho.

<sup>5</sup> Sac tel zha ne rrieelod gnabey lidz, gnabey xpëed; ðpe lel ne so zho gnabey zho lo grë zha ne no xnëz Dios dzigo grieelo zho?

<sup>6</sup> Niicle tib zha ne griinpa psilo bliladz Xtiidz Dios grieelod gac zho dziin co; sac nend lëëque lëë zho gunnon zho, lozh ga lëëque zha yguib guiabdee zho. Golsoladz ganle zha bzhaac menox.

<sup>7</sup> Ni ye rquiin tib zha ne zëeb xtiidz ne miech ndzinli nac zho, haxta lo zha ne nod xnëz Dios; zeeña tsod lega pe glisqui miech lo zho, sca gleyd menox gac mine racladz ma.

*Zha ne gun yudar len yadoo*

<sup>8-12</sup> Scaquegaa zha ne so gun xyudar zha ne gnabey ga, ga rquiin:

tib zha ne zaacse mban,  
zha ne rnee niapse diidzli,  
zha ne rleynied guielgonziu,  
zha ne zienald dimi,  
zha ne dib zdoo rliladz grëse mine zhobnee lo Xtiidz Dios (mine rliladz ne, mine nac diidzli),

zha ne mbe lo,  
zha ne mbannie wnaa ne nacse tsiel zho,

zha ne rrieelo rnabey lidz,  
zha ne rrieelo rnabey xpëed.

Ni stiba, antes ne so zho none glugazh zho dien pe nli zrieelo gun zho dziin co. Zig nac tsiel zhow, none gac me:

tib wnaa ne zaacse mban,  
wnaa ne rleynied diidzguizh,  
wnaa ne rleynied nziu,  
wnaa ne rquidied.

<sup>13</sup> Sac zha ne zaacse gun dziin co, zianziuuraa zho lo grë zha ne ngab lo Dios, ni scagaa ine mbe lo zho haxta no ro zho gnee zho lo miech zha nac ne laa zho rliladz Jesús.

*Mine rliladz zha ne ngab lo Dios*

<sup>14</sup> Ib laa guic naa no guialniob naa i, guialgan naa luu; per laa naa rxel diidz rii lo luu,

<sup>15</sup> zeeña telne grieelod guialniob naa, per laa luu nanle naganle cho gzo luu yquiaanap grëraa zha ne ngab xnëz Dios nguiamban; zha ne runbey mine nac diidzli, ni rlu zho ganle ne nli diidzliw.

<sup>16</sup> Ne nligaa nroobdoo nac wseed ne ziaad lo Xtiidz Dios, mine rliladz ne, ngan guien miech zha naca. Nu raquiet mine been me:

Goc Jesús miech biaad me lo guidzliu, ni blu Espíritu Sant ganle ne nli Xpëedpaa Dios nac me;

ni gon grë anjl me.

Brieets bliaal Xtiidz me grë guiedz, ndaldoo miech ne bliladz ganle cho nac me,

blozh ga biire zey me lo guielndzon ne no me gbaa.

### 4

*Zha ne rsaan Xtiidz Dios*

<sup>1</sup> Ib laa Espíritu Sant rneele ne len dze ne ziaadyob guiaad Jesús stib, ndal grë zha ne rliladzle Xtiidz me, laa zho csaana laa zho tsienal grë mine rnee zha ne rquidie, grë mine nac zhiwseed mendox.

<sup>2</sup> Grë zha ne guiaadnie wseed co, ni lalnu yquiad zdoo zho zeene laa zho yquidie miech.

<sup>3</sup> Haxta stsidil zho ctsieelnia miech, znabey zho ycuee ncuaane gow miech; zig nac zeene led Diosd psan ctsieelnia miech, zig nac zeene led med psan grë ncuaane gow zho. Me psana grësew, zeena grëse zha ne ngab xnëz me (zha ne beenbey diidzli), zeene laa zho yquiina gdeed zho xquizh lo me.

<sup>4</sup> Sac grëse ncuaane psan Dios, wena; zig nac grë ncuaane rac wagw, peet nacda yquiin new, totsaque gdeed ne xquizh lo me zeene laa ne yquiina,

<sup>5</sup> ni gnab ne gunlay mew; sac zeene rdeed ne xquizh lo me ni rnab ne gunlay mew, rсанmbe mew.

### *None gun Timoté xtsiin Jesús*

<sup>6</sup> Zeene cseed luu grë zha bets ne, zha bzian ne i, pseed zho grë mine rne naa lo luu nu, tibaque mine nac zhiwseed Dios güeynal; sac sca no gun zha ne squi zo quianap grë zha ne ngab lo Dios.

<sup>7</sup> Ib yquiaadiagd luu grë cuent gox, grë cuent nxen ne paat rquiind; sinque Xtiidz Dios bioxco, min co bloonie guic luu.

<sup>8</sup> Gzoob ne zha ne rguit, wguite ne run zho, nli rquiina lo zho par gac macis xcuerp zho; per zig nac Xtiidz Dios, mazdraa rquiin dzioxco new; sac mincosi squiina lo ne zigtaa lo guielmban riiw, zigtagaa lo guielmban ne naraa dzian new.

<sup>9</sup> Ne nligaa sca rieguial gun miech, ni grëse zho none tsoxco zhow!

<sup>10</sup> Ni gacxe waa, laa ne quia dien zha gliladz zhow, niicle ne nroob grë guielnë ne quiazian ne; sac ible Dios nac men ne rnalo ne, men nguiamban ne rsilaa grëse miech lo

do; sac grëse zha ne dib zdoo rliladz me, rsilaa me zho.

<sup>11</sup> Bioxco sca pseed zho grë mine rne naa lo luu nu, ni bnee lo zho gun zhow.

<sup>12</sup> Nli lëe tib zha nguiegse nac luu, per blu lo zho ganle zha none gban zho: Zeene gnee luu, niowse bguib diidz ne gnee luu, zaacse goc, ine bleynie samiech luu, tibaque dib zdoo luu bliladz Xtiidz Dios, ine ndzinli wban; zeena gan zho ganle niicle ne zha nguieg luu, per nixbiini luu.

<sup>13</sup> Laga gal dze ne glanso naa i, bioxco blab Xtiidz Dios lo grëse zha bets ne, zha bzian ne i, bnee lo zho zha naca, bnee diidz ne conley zdoo zho; zeena ine nguieel gac zho.

<sup>14</sup> Ib csaand luu grë guielbiini ne bneedz Dios lo luu i (guielbiini ne bgaa luu zeene psiaab me guic grë zha ne rnabey lo grë zha ne no xnëz me, pxobnia zho guic luu).

<sup>15</sup> Grëse mine rne naa lo luu nu, bioxcow; zeena gan grëraa miech ganle zigse zie dze laa luu quiaayabiniraa lo Xtiidz Dios.

<sup>16</sup> Bien zaacse goc, bien mine nac Xtiidz Dios, min co pseed miech, ib csaand luuw; zeena tedlaa luu lo grëtaa guielnë ne no guiaad, ni scagaa haxta grë zha ne rquiaadiag wseed ne rlu luu ni rban zhow, ye zho zlaa zho lo guielnë co.

## 5

### *Men wnaa ne gutle tsieel*

<sup>1</sup> Grë zha bgui gol ne nac bets ne i, zeene zha rxin zho, bien gactoxd luu lo zho, sinque zaacse bnee lo zho zig nac zeene lo pxoz luu nonee luu; niiclegaa zha nguiega, zaacse goc lo zho, been zho cuent zig tib bets luu.

<sup>2</sup> Scaque grë men wnaa ne nac zhagol, ndooladz bnee lo me, been cuent lo xnial luu ga zo luu; lo grë wnaa nguiega, ndzinli goc, niowse bnee lo zho, bien ganle rrieequia tib bzian luu ga.

<sup>3-6</sup> Grë men wnaa ne gutle tsieel, men ne nlipaa choot rapd, to none

cteedlo me; totsaque nli Diosse rnalo me, dze guieel tibaque nozodiidznie me Dios. Sac no zho mban zigne notaa guic zho, laa zho zienal lox- aue grē ncuaane gdeed guxt xcuerp zho; zha ne sca run, rrieequia gutle zho ga. Laa tel men wnaa ne scaque gutle tsieel, ni no xpëed me, no xiag me, dzigo zha none cteedlo me; none cseed zho gan zho menlidz zho, gan zho pxoz zho, gan zho xnial zho, sac gon me pchoob zho. Sca nonguiela, ni scagaa rdziladz Dios.

<sup>7</sup> Pso diidz rii lo grē zha ne nacgrē to i, zeena cseed zho sca gban zho, ni scagaa tsod pe nace gneenē miech zho.

<sup>8</sup> Sac zha ne tsoxcod gan zha ne nacgrē zho, ni mine mazdraa telne niicle menlidz zho tsoxcod zho gan zho, rdzieeld dzigo guiab zho laa zho riladz Dios, haxta mazdraa nac xtol zho que tib zha ne gard gliladz me.

<sup>9-10</sup> Ni stiba, grē men wnaa viud qui zha ne rquiablaz gun pe xtsiin Dios, bien zha ne psale tsongal iz zha co psëeb lo list. Ni wen wen gocnan telne:

bionied me stib mgui zeene bii zom-  
ban tsieel me,  
zaacse mban me,  
zaacse pchoob me xpëed me,  
dib zdoo me rbëzlo me miech lidz me,  
ndooladz rac me lo grē zha ne no xnëz  
Jesús,  
run me xyudar grē zha ne no lo tib  
guielnë;

ni run me niapse ncuaane wen ne rquiin lo samiech me.

<sup>11-12</sup> Laa grē zha ne bii nguieg, ib yquiaad luu lë zho lo list co; sac nac wnaa nguieg, zeene sob guic zho ct- sieelna zho, laa zho ctsieelna stib. Loxaque gunctal zho xtol zho ga, telne glo rquiablaz zho gun zho xtsiin Dios ni lozh ga laa zho csaanaquew.

<sup>13</sup> Ni ye nac wnaa nguieg, rdziladz zho rquianzë zho; ni telne peet dziin gund zho, racgbech zho; ni stiba, zeene sca guiend pe gun zho dzigo laa zho rzhixcuaa diidzguizh, laa zho rzëeb lo grē cuent ne rieguialdraa zho.

<sup>14</sup> Gacxe waa, racladz naa grēse wnaa nguieg ne sca ret tsieel, mazd ctsieelna zho stib; zeena yquiaanap zho xpëed zho, yquiaanap zho ro lidz zho. Sca yguibd zho tso grē zha ne rlëeniele Xtiidz Jesús, gneenëraa zho zha ne riladz.

<sup>15</sup> Sac gon, blale wnaa ne sca gut tsieel zieriee xnëz Dios, lel laa zho zienal grē mine rnabey mendox.

<sup>16</sup> Psoladza ganle, tel cho tib zha bets ne, tib zha bzian ne i raclidz tib men wnaa ne gutle tsieel, none zha gan me, laa ne gnalo zho ne to yguib dien zha gdioon me; zeena grē ncuaane runlo to i, zgaaw yquiin grē men ne nlipaa guiend cho gan.

#### *Mine rieguial zha ne zo lo zho*

<sup>17</sup> Grē zha ne zo rnabey lo grē zha ne ngab xnëz Dios, zha ne za- acse noyun dziin co, zig nac zha ne tibaue rnee Xtiidz Dios lo miech, zha ne rseedgaa miech zha naca, tel palal ncuaane rcaa zho, ible rieguial ycaa zho chop lalgaw.

<sup>18</sup> Gotsaa gwi ne ganle zha quia lo Xtiidz Dios, rneew: “Code to guiex ro xma to, zeene no ma ye noguiits ma zhobxtil; jgolsaan gow ma!” Laa stib lugar rnee: “Zha ne run dziin, ib none ycaa zho mine non xtsiin zho.”

<sup>19</sup> Bien gon Timoté, zeene guiaad zho lo luu, guiaad-zo zho tib men ne rnabey lo to, ib yquiaadiagd luu mine rnee zho, telne gzod zho chop tson zha ne gon ne nli been me mine rquiaqui zho me.

<sup>20</sup> Telne bind me diidz, bii noyun me dol co, dzigo squi ndxie grē zha ne nacgrē to, goctox lo me; zeena sca gdzieb grëraa zho gunscad zho.

<sup>21</sup> Zig zobwi Dios, zig zobwi Jesús grē xanjl me, laa naa rso diidz lo luu, been mine rne naa lo luu nu. Gdzieebd luu, yquiad zdoo luu, bnee lo zho tel chotaa nac zho.

<sup>22</sup> Zeene gzo luu zha ne gun xtsiin Dios, gund luu ne lega tel chotaa gzo luu; sac gon, nend lëetse zha ne rap pe tib falt gzooblo luu, dzigo laa miech guiab nãnpaa luu zha nac zho ni rlisquid luuw lo zho. Ible gdeete

luu diidz gun luu ncuaane guncal xtol luu.

<sup>23</sup> (Gnid naa togo ible grieelodraa guie luu vin, zac guie luu niipyeena maase poc poc, laa ne guie luu niab nis; zeena glunëdraa zdoo luu.)

<sup>24</sup> Sac grë zha ne no lo dol, no dol co znuse rzhoobnen; nogaaw, haxta gal dze ne laa zho gacredz lo Dios, dzigora xobneña.

<sup>25</sup> Scaquegaa zha ne run guielwen, no ncuaan co znuse glu; nogaaw, nicle ne rluda niina per ible zdziñ dze ne laaw glu.

## 6

### *Zha ne quiazhoo xtsiin ben*

<sup>1</sup> Grë zha bets ne, zha bzian ne, zha ne lega run xtsiin ben, none gon zho xtiidz men ne quia zho xtsiin; zeena yguibd zho gneenë miech Dios, gneenë zho Xtiidz me mine noseed ne miech.

<sup>2</sup> Scaquegaa grë zha ne run xtsiin men ne riladzle Xtiidz Dios, none gon zho mine rnabey me zho; led guiabd zho por bets zhow, gun zho mine racladztaa zho. Ni gale none tsienie guic zho wenraa grieequia grë dziin ne noyun zho; sac gon lo tib men ne no xnëz Dios ga, lo tib men ne rleynie zho ga yquiin xtsiin zho.

Grëse mine none naa lo luu nu, pseed grë miech quiw, ni pso diidz lo zho gun zhow.

<sup>3</sup> Zrieequia zha ne guiaadnie stib wseed, mine ni nacdraa Xtiidz Jesús; sac zhiwseed Jesús rlu zha gban grë zha ne no xnëz Dios.

<sup>4-5</sup> Zha ne sca rlu stib wseed, lega: tib miech niats ga nac zho, ible peet rienð zho, runbeyd zho mine nac diidzli, rdziladz zho rdildiidznie zho miech; ga rlan, laa miech rdillsa, laa miech rlëëlsa, laa miech rbidzgolsa; rlozh ga, riladzdraa zho pe rnee samiech zho. Masaque nan zho telne sëëb zho xnëz Dios, nroob dimi ne gunlo zho. ;Bieñ ib ctsieelsad luu zha co!

<sup>6</sup> Parga nli zha ne rzëëb xnëz Dios, zeene rzac zdoo zho mine rzoladztaa Dios lo zho, tib guielnzaac nroob ga rgaa zho.

<sup>7</sup> Ni sca nonguiela, sac gon zeene rlanso ne lo guidzliu, peet rlansonied ne; ni scaquegaa zeene laa ne gbi, peet grieelod güey ne.

<sup>8</sup> Gacxe waa, none sac zdoo ne ni gley ne totsaque gneedz Dios ncuaane gow ne, ni ncuaane gacwxab ne.

<sup>9</sup> Sac grë zha ne rzoobladz xen nroob dimi, no zho rquiil mendox zho run zho ncuaane ndzinlidraa par gdziniaa zho dimi co; rlozh ga rzhin lo xquielmban zho, haxta rnitlo zho.

<sup>10</sup> Sac nac dimi, zeene rzoobladzdox miecha, ga rzobni ne laa zho run grë guielntseeb. Ndal zha ne ziesaan Xtiidz Dios, sac laa zho zienal dien zha xen zho nroob dimi; per rlozh ga, stib stib guielnë ne ziedziñ lo zho.

### *Dib zdoo Timoté gliladz Timoté Dios*

<sup>11</sup> Sangue luu gon, bien ganle xnëz Dios no luu, gun luu grë ncuaan co. Bioxco zaacse wban, tibaque bioxco gban luu zigne racladz Dios, dib zdoo luu bliladz me, bleynie me ni bleynie samiech luu, ndooladz goc lo zho, ni lalnu ib guiaand zdoo luu.

<sup>12</sup> Bleeladz luu been grë dziin ne run zha ne dib zdoo riladz Dios, zigne run zha ne rie lo dil, rbeeladz zho zho. Gon ganle, laa luu nole nëz ne ygaa luu guielmban ne gdziñd dze lozh, ib csaand luu nëz co; sac niicle Dios ible min co bzoblo me luu. Pso-ladz ganle, squi ndxie miech bleero luu ne dib zdoo luu riladz luu Xtiidz Jesús.

<sup>13</sup> Dios (men ne rdeed xquielmban grëta ncuaane no), ni Jesús (men ne ni lalnu bdziebd zeene güeyzo zho me lo Pons Pilat, bnee me cho nac me); me zobwi ganle

<sup>14</sup> laa naa rso grë diidz rii lo luu, bioxco beena zigne no gaca. Tibaque bioxcow haxta gal dze ne gbiire guiaad Jesús, men ndzon ne rnabey ne.



<sup>15</sup> ꞑib laa me no guiaad! Ni Dios cxeel me zeene laa dze co gdzin. Dios men nroob ne rnabey, men ne rnabey lo grëtaa zha ne nac rey, lo grëtaa zha ne rnabey.

<sup>16</sup> Mesi ib gdziṅd dze guet me, lo biini ne no mew, tsod zha ne glëb gdzinga; ni tib miech lo guidzliu rii gard gan me, ni grieelodgaa gan zho me. ꞑGacxe waa, ible me none dziuunnon ne, sac gon men non, men rnabey nac me! Miṅ co nagon no dziuun ne.

<sup>17</sup> Grë zha ne rapchen, bnee lo zho cseed zho gdaannied zho grëncuaane rap zho, ib gnalod zho grëncuaan co; sac gon ncuaane tib rdedga. Dios none gnalo zho, ni mesi rneedz me grëtaa ncuaane wen ne rquiin ne.

<sup>18</sup> Gudz lo zho gacmbidzd zho, none gun zho grëncuaane yquiin lo samiech zho, ycad zho ncuaane quianie zho, ine gun zho xyudar zha ne peet quianied.

<sup>19</sup> Zha ne sca gun, tib guielnzaac nroob ne ygaa zho; lëë guielnzaac co gan zho len dze ne ziaadraa. ꞑNi haxta zgaa zho tib guielmban ne gdziṅd dze lozh!

<sup>20</sup> Timoté, laa naa rbire rso diidz lo luu nu gon: ib csaand luu dziin ne bneedz Dios lo luu i. Yquiaadiagd luu grë wseed yozh ne ziaadnie stib miech, wseed ne rneenë Xtiidz Dios, niicle ne rnee zha ne ziaadniew zha rac nac zho, per nliid ne diidzli rnee zho.

<sup>21</sup> Sac gon, blale zha ne ziesaan miṅe nac diidzli, laa zho zienal wseed co; per rienḍ zho leḷ znu rziaabnëz zho ga.

Dios men ndzon ne rnabey, me noxco luu, me gzhixcuaa lo grë zhizhgab luu. Me gacnien luu peet tsienied guic luu.

Pabl

## BROP GUILTS NE PXEEL PABL LO TIMOTÉ

¡Diuzh Timoté!

<sup>1</sup> Naa nac Pabl, tib zha ne pxeel Jesús nonee Xtiidz Ndzon me lo miech. Ible Dios bzo naa quiaseed naa miech diidz ne rdeed guielmban lo zha ne rzëeb xnëz Jesús.

<sup>2</sup> Laa naa rxel stib guits rii lo luu i gon xin; xin rne naa lo luu sac rzaac naa luu zig tib xpëed naa. Mine racladz naa ni rnab naa lo Dios men ne nac Pxoze ne, ni lo Jesús men ndzon ne rnabey ne, yquia zdoo me luu, ni me tsoxco grë zhizhgab luu; zeena peet tsienied guic luu.

<sup>3</sup> ¡Gzataa zeene rzodiidznie naa Dios rzet naa luu lo me, niicle guidzew, niicle guieela, tibaque rded naa xquizh lo me ni rnab naa lo me gacniën me luu! Dib zdoo naa noxco naa zana naa mine rnabey me, zigne bioxcoque grë xmengoldoo naa güeynal zhow.

<sup>4</sup> Zeene rsoladz naa blactaa roon luu zeene wbi naa i, zoot naa tebaa zha ganñiob naa luu stib; zeena tsonley zdoo naa.

<sup>5</sup> Ni rsoladz naa scataa dib zdoo luu rliladz luu Dios; lëëdaaque xnanit luu Loid, ni xniaa luu Eunis, ni nanpaa naa scataque dib zdoo luu rliladz luu me.

<sup>6</sup> Gacxe waa, laa naa rso diidz lo luu pquiin grëse guielbiini ne bneedz Dios lo luu zeene pxobnia naa guic luu, ni bnaab naa beenlay me luu. ¡ib csaand luuw!

<sup>7</sup> Sac gon, laa Dios rneedz zhiEspíritu me lo ne, parne sodzieb-draa ne, parne dziaapraa ne xfuers me, gleynieraa ne samiech ne, ni tsabiiniraa ne.

<sup>8</sup> Gacxe nod pe nacne gdzieeb luu, bnee lo miech ganle zha nac Xtiidz Ndzon Jesús; ni niicle gdzieebdgaa luu ne znu nioogyu naa nu, loxaque ne rliladz naa me. Sinque bloo zdoo luu ne ib laa luu no gan grë guielne

rii, loxaque ne quiaseed ne miech Xtiidz me, diidz ne rlu ganle zha laa zho lo dol. Ga nagon rquiin fuerz ne rneedz Dios lo ne.

<sup>9</sup> Gotsaa gwi ne ganle laa me psilaa ne lo grëtaa xtol ne, ni bredz me ne gban ne zigne racladz me. Ni nacda por pe guielwen ne bdziuun ne, sac haxta zeene gard cue guidzliu, laa me psan diidz ne laa me glu ganle pa lotaa rleyne me ne.

<sup>10</sup> Ni niina ne laa me pxeel Jesús (men ne rsilaa miech lo dol), laa me blu ganle ne nli nquialadz me ne. Jesús nac men ne biaadtiche poder ne rap guielgut, ni biaadlu me ganle parne yгаа miech tib guielmban ne gdzind dze lozh, none gliladz zho Xtiidz Ndzon me.

<sup>11</sup> Ible min co nagon nacne bzo Dios naa gne naa Diidz Ndzon rii lo miech, pxeel me naa ga naa grë guiedz zatne nodraa zha Israel, gaseed naa zho zha naca;

<sup>12</sup> mincocxe waa znutaa grë ncuaane nodeed naa. Per ni lalnu ib rtoladz naa, sac wen wen nan naa cho nac men ne rliladz naa, ni nan naa mesi zrieelo yquiaanap me naa nitnëzd naa haxta gal dze ne laa me guiaad.

<sup>13</sup> Bien, güeynal grë mine pseed naa luu, sac gon min co nac mine rquiin. Tiblique bliladz Dios, ine bleyne samiech luu zigne no dziuun ne ne nac ne zha ne no xnëz Jesús.

<sup>14</sup> Espiritu Sant men ne nacne ne, me yquiaanap luu, me gacniën luu ib csaand luu zhiwseed Dios, ib csaand luu dziin ne bzo Dios luu gon luu.

<sup>15</sup> Nanlaxe luu ganle zha been zha Asia, grëse zho bzozit lo naa; zig nac Figel, zig nac Hermoj, mbe psaan zho naa.

<sup>16</sup> Sangue Onesifr, rnab naa lo Dios yquia zdoo Dios me grë menlidz me, sac blactaa biadchoobladz me zdoo naa. Niicle ne znu nioogyu naa nu, per ib been me ne ntoladz me ni-aadgan me naa;

<sup>17</sup> sinque zigne blanso me lad guiedz Roma nu, pquiaguib me naa haxta bdziel naa lo me.

<sup>18</sup> Ni zoladzaxe luu ganle, pe zhis-taa been me xyudar ne zeene no ne guiedz Efés i; rnab naa lo Dios yquia zdoo Dios me gal dze ne laa grëse miech gacredz lo Dios.

## 2

### *Dziits so Timoté lo Xtiidz Dios*

<sup>1</sup> Xin, sangue luu gon tibaque squi dziits bzo lo Xtiidz Dios, gon ganle Jesús noxco grëse zhizhgab luu.

<sup>2</sup> Grëse mine gon luu pseed naa miech, scagaa niina bioxco bneew lo zha ne rgobey luu grieelo tsie tsie-neew lo stib miech.

<sup>3</sup> Ib gacmband luu zeene noyan luu grë pe guielnë, sinque bioxco been xtsiin Jesús zigne no gon luuw, masaque been cuent xmenguiib me nac luu.

<sup>4</sup> Sac gon, tib zha ne nac menguiib, grieelod sëeb zho pe stib lo cuent ne nacd xtsiin menguiib, sac none nsin so zho gon zho tel pe nac mine rnee men ne rnabey zho.

<sup>5</sup> Bioxco been mine rnee men ne rnabey ne, zig run zha ne rie tib lo wguít; sac zha co telne tsoxcd zho quit zho zigne nacpaa lo wguít, ycaaniad zho premio.

<sup>6</sup> Been xtsiin me zigne no gaca, zig run zha ne ran; gon ganle zha ne rioxco ran, zha glopaa rquiin guielnzaac ne rac zaatne ran zho.

<sup>7</sup> Mine blozh bzet naa nu, blooniew guic luu, ni Jesús nac men ne gneedz guielbiini lo luu guien luu zha naca.

<sup>8</sup> Tibaque psoladz ganle cho nac Jesús, zha brieequia me lo xtii rey David, ni zha brieegan me; zig nac naa min co rzet naa lo miech zeene rseed naa zho Xtiidz Ndzon me, par laa zho lo xtol zho.

<sup>9</sup> Ni ne nonecxe naa Diidz Ndzon rii waa, gane nroob guielnë ne noyan naa; zig nac niina, laa naa ngadoo zaatne nioogyu naa nu zootne cho zha dox. Ni niicle ne znu nioogyu naa nu, sangue Xtiidz Dios led yeda nioogyu.

<sup>10</sup> Laa naa quiaxecw mine quiadeedtaa naa, zeena grëse zha ne bzooblöle Dios gliladz Jesús, grieelo

yquiaadiag zho zha laa zho lo dol, ni zha yгаа zho tib guielmban ndzon ne gdzind dze lozh.

<sup>11</sup> Ni znu gon naca:

Telne xnëzle me no ne zeene laa ne guet,

ib zгаа ne guiobannie ne me.

<sup>12</sup> Niicle nroob guielnë dzian ne porne rliladz ne me, scagaa ible dzin ne zaatne gnabeynie me ne;

telne guiab ne runbeyd ne me, scaquegaa me ziaab me runbeyd me ne.

<sup>13</sup> Niicle telne riaanladz ne me, sangue me riaanladzd me ne; mine rnee me run mew, sac mesi rt-sëed me xtiidz me.

### *Tsoxco Timoté grieequia xtsiin Timoté*

<sup>14</sup> Bien, beencsoladz grë zha bets ne i, zha bzian ne i grë min rii. Zig zobwi Dios ganle laa naa rso didz lo luu, gudz lo zho tildiidzniedraa zho miech grë godiidz ne paat rquiind; led ncuaane ndzinlida, loxaque rungüeta guic zha ne rquiaadiaga.

<sup>15</sup> Tibaque bioxco zaacse grieequia xtsiin Dios, mine noyun luu, zeena wen grieequia luu zeene laa luu gdzin lo me. Zigne nacsé Xtiidz me, sca pseed miecha.

<sup>16</sup> Yquiaadiagd luu grë wseed yozh, ncuaane ni lalnu paat rquiind; zha ne zienal wseed co, zig zie dze laa zho rzozitraa lo Dios.

<sup>17</sup> Lega nac zhiwseed zho zig nac grë guielguidzdox; sac tel guielguidzdoxa, znuse rded miecha ni zha ne glana ible zet zho. Zig nac Himené grop Filet, wseed co rleynie zho,

<sup>18</sup> sac tel zha zienaldraa zho mine nac diidzli; rnee zho bleebanle Dios grë mengut. No palal zha ne rliladzle Xtiidz Dios, zeene ron zho min co, riendraa zho dien pa mine gliladz zho.

<sup>19</sup> Sangue zha ne nlipaa no xnëz Dios, tsod pe nacne grieë zho xnëz me sac lole me ngab zho; zigne zhob-neeque lo Xtiidz me zaatne rnee: “Runbey Dios cho nac zha ne nlipaa no xnëz me”; ni rneequew: “Grë

zha ne nlipaa ngab xnëz Jesús, none csaan zho grëse guielntseeb.”

<sup>20</sup> Zaatne nac lidz tib zha ricw lëë, no grë xtsiin rotie zho mine niaa or, mine niaa plat, ni noquegaa mine niaa yag, mine niaa beñ. Mine mazdraa niazh, min co rquiin zho rio ncuaane row miech; laa mine beelze niaa, ga rgo zho ncuaane row ma.

<sup>21</sup> Scaquegaa miech, zeene csaan zho grëse ncuaane paat rquiind, ible squiin zho lo Dios gun zho xtsiin me mine mazdraa nroob, zigne rquiin grë trast niazh co.

<sup>22</sup> Nac lo guielnguieg, ndal grë ncuaane ndzinlid rio guic miech run zho, sangue luu gon tsienied grë ncuaan co guic luu, bioxco zaacse wban, dib zdoo luu bnalo Dios, ine bleynie grëse samiech luu, tilnied luu zho; grë zha ne squi nli mbe zdoo, rbedz zho Dios, zaacse wbannie zho.

<sup>23</sup> Ib yquiaadiagd luu grë godiidz ne paat rquiind, sac gon loxaque runctila miech.

<sup>24</sup> Zha ne squi run xtsiin Dios, nodne tso zho dien pe tildiidz zho; sinque none wen gac zho lo grëse miech. None guien zho zha cseed zho miech; ib guieednied zho miech,

<sup>25</sup> ndooladz gac zho gnee zho lo zha ne rlëenie Xtiidz Dios. Ni scagaa Dios cxobnia guic grë zha co, yguudz zdoo zho csaan zho grë xquielntseeb zho, gacnan zho mine nac diidzli;

<sup>26</sup> zeena tsaa zho biini grieë zho ladznia mendox, zaatne ngadoo zho.

### 3

#### *Len dze ne ziaadyob nitlo guidzliu*

<sup>1</sup> Ni none gacnan luu ganle, zeene laa dze ziaadyobpaa nitlo guidzliu, nroob nac guielnë ne gan grë zha ne no xnëz Dios.

<sup>2</sup> Zrieequia grë zha ne: gacladz tebaa lose zho yquuin grëtaa ncuaane no, loxaque dimi gleynie zho, niats gac zho, zdaannie zho ncuaane ni rapd zho, zneenë zho Dios,

gond zho xtiidz pxoz zho, xtiidz xnïaa zho;

sacd zdoo zho mine gun miech lo zho, laa zho gban zigne notaa guic zho, ib yquiaadiagd zho Xtiidz Dios.

<sup>3</sup> Gacnandraa zho pe nac guielwleynie, ib yquiad zdoo zho,

loxaque diidz gzhixcuaa zho, lëbd zho gnabey zho xcuerp zho, sacsi zho samiech zho, stsidil zho grëse ncuaane rquiin,

<sup>4</sup> zgo zho zha ne ndzieeldiidz zho nia zha ne quin zho,

ni lalnu guielto tsod lo zho, loxaque dien zha gdeed guxt xcuerp zho tso zho, laa ne yguib zho xnëz Dios.

<sup>5</sup> Squiaalo zho ye zho rliladz Dios, per lo grë ncuaane gun zho, ga glu ne rliladz zho me.

Bien, ib ctsieelsad luu grë miech ne sca nac.

<sup>6</sup> Sac lëë zha ne nacgrë zho ga, rzëëb yu rietsitnie grë wnaa yozh ne zianal ncuaane gdeedtaa guxt xcuerp.

<sup>7</sup> Tibaque no zho dieen peraa rseed zho, per ib rioguicd zho mine nac diidzli.

<sup>8</sup> Zigne been chop zha ne biil diidz dox padzeela, Janes grop Jambres, gocndaan zho lo Moisés; scaque run zha co niina, rlëeniedox zho mine nac diidzli. Miech yozha, ndzinlidraa nac guic zho, nacd zho zha ne gliladz Xtiidz Dios;

<sup>9</sup> per gacdaquew xtse, zeene laa didz guien ganle pe clas miech nac zho, dzigo lëëque grë ncuaane yozh ne run zho cuee xquielto zho; zigne bzhaacaque zha ne sca blëenie Moisés.

#### *Csaand Timoté mine pseed me*

<sup>10</sup> Sangue luu, nanle luu ganle zha nac grë mine pseed naa luu. Wen wen nan luu ganle zha mban naa, pe no guic naa gun naa, zha dib zdoo naa rliladz naa Dios, zha dib zdoo naa rleynie naa samiech naa, rieednied naa zho.

<sup>11</sup> Nanle luu ganle zha rneedz Dios xfuers naa, rlëëb naa grëtaa mine rteed miech naa, zig been zho naa guiedz Antioquí, guiedz Icon ni Listr, blactaa pquianaal zho naa; per



tibaque gocnie Dios naa, psilaa me naa lo grëtaa guielxtseeb co.

<sup>12</sup> Ni scagaa naca, grë zha ne rquiablazd gban zigne rnabey Jesús, ible squianał miech zho.

<sup>13</sup> Per probsaxe grë zha ne sca quiayunctal xtol, zha ne sca noquidie miech, zig zie dze laa zho noteedquie zho nëz ne nitlo zho. Quiaguitnie zho miech, ni quiaguitniegaa mendox zho.

<sup>14</sup> Sangue luu gon, csaand luu grë mine pseed luu. Nanween luu ganle diidzliw, ni runbeygaa luu cho nac grë zha ne bneew lo luu.

<sup>15</sup> Ni siba, zigne ziadroob luu psilo quiaseed luu Xtiidz Dios, ni lëew bdixbiini guic luu gocnan luu ne Jesús none gliladz miech parne laa zho lo dol.

<sup>16</sup> Dib nase Xtiidz Dios, Espiritu Sant psiaaba guic zha ne pquiaaw, laaw biaan:

rseeda ne mine nac diidzli,  
rsow diidz lo ne guien ne pa lo  
quiaxin ne,

rseeda ne zaacse gban ne.

<sup>17</sup> Zeeņa sca grëse zha ne no xnëz Dios, grieelo wen wen cseed zho, ni guien zho zha gun zho grëse dziin ne rquiin, dziin ne riegual zho gun zho.

## 4

### *None gnee Timoté Xtiidz Dios*

<sup>1-2</sup> Zig zobwi Dios, zig zobwi Jesús men ndzon ne rnabey ne, laa naa rso diidz lo luu, bnee Xtiidz Dios lo grëse miech. (Jesús nac men gunquizh miech grëtaa ncuaane been zho, zigtataa zha ne mbana zigtagaa zha ne gutlew, zeene gdzin dze ne laa me guiaad gnabey me.) Bioxco tel pa hortaa bneew lo zho, niicle zeene rzac luu riobda. Bloo guic zho gliladz zhow, bnee lo zho zeene gan luu pe falt ne noyun zho, ni scagaa bloonley zdoo zho. Bioxco tibaque pseed zho, ib guieednied luu zho.

<sup>3</sup> Sac gon, zdzin dze ne siguieldraa miech yquiaadiag zho mine nac diidzli; sinque laa zho yquiaguib zhaase zhaase dien cho cseed zho tel pe nac

ncuaane rdziladzse zho yquiaadiag zho.

<sup>4</sup> Gleynied zho Xtiidz Dios, laa ne yquiaadiag zho mine nac xtiidz me, lel laa zho tsoxco yquiaadiag zho grë mine nac zhiwseed miech guidzliu.

<sup>5</sup> Sangue luu gon, nsin bzo gdeete luu diidz gunguet zho luu. Zaacse been grë mine pso Dios luu gun luu, bnee lo miech zha laa zho lo dol; niicle tel pe nactaa guielne ne noded luu, gacmband luu.

<sup>6</sup> Rien naa ziaadyoble ne laa naa gbi lo guidzliu rii, zhile gdzin dze ne laa zho gut naa.

<sup>7</sup> Len ngbidz ne wban naa, tibaque dib zdoo naa bliladz naa Dios; xtsiin mew, laaw ben naa zigne bnabey me naa, ni laaw psiaalga naa niina. Zigne runda grë menguib ne rie lo dil, sca bleeladz naa naa ben naa xtsiin me;

<sup>8</sup> laa na nagon, mine quiambëzse naa nac premio ne no gneedz me lo naa. Lëe premio co gneedz me gal dze ne guiaad me guiaadgun me guielwxtis; ni led loxaque naadse ygaaw, sinque grëse zha ne rleynie me, grë zha ne dib zdoo quiambëz gdzin dze ne guiaad me stib, grëse zha co yгаа premio co.

### *Tsieniob Timoté*

<sup>9</sup> Bzhiguiel guiaadniob luu guiaadgan luu naa nu;

<sup>10</sup> sac zig nac Demas, laa me bichele lo naa. Psanaque me naa nu laa me zie nëz Tesalónica; sac mazdraa nonie grë ncuaane lo guidzliu rii guic me. Bay zig nac Crescent, laa me brieer zie me nëz Galás; Tit na, zieegaa nëz Dalmás; laa zho zie zaatne nacle diidz tsie zho.

<sup>11-12</sup> Niicle Tic guien nu, sac laa me pxel naa zie me Efés. Loxaque Lucse biaan lo naa nu.

Psoladz gon tsieguib luu Marcw, zeene laa luu guiaad nëz rii bzhiguiel guiaadnie luu me; sac rquiin me nu gun me xyudar naa lo xtsiin Dios.

<sup>13</sup> Ni psoladzpa guiaadnie luu lar ne rbiix naa, mine psan naa guiedz Troas lidz Carp; ni guiaadnie luu grë

xquits naa. Ib guiaanladzd luu mine nac grë guits nroob ga.

<sup>14</sup> Tel gan luu ganle nzian ncuaane nonguieldraa been Lejandr naa, men ne nac wncadzguiib ga; per Diostaa nan zha gunquizh me Lejandr grë mine been Lejandr ga.

<sup>15</sup> Ni niicle luugaa gon, nsinaque bzo lo me; sac ne nlipaa rlëenie me wseed ne nolu ne lo miech nu.

<sup>16</sup> Zeene glopaa gocredz naa lo wx-tis, choot bzëd nriee xfavor naa, grëse zho biche lo naa; rnab naa lo Dios gunquizhd me zho mine been zho, sca psaan zho naa.

<sup>17</sup> Sangu meñ ndzon ne rnabey ne psand me naa, me pchoobladz zdo naa, haxta bdeeda diidz bnee naa Xti-idz me lo grë zha zit rii. Sca gocnien me naa, gon naa cuent role meedz psilaa me naa;

<sup>18</sup> ni niicle niinagaa, nanle naa ne ib silaa me naa lo grëtaa ncuaane racladz miech cteed zho naa, ni me yquiaanap naa haxta gal dze ne laa me gdzinnie naa zaatne rnabey me gbaa. ¡Me riegual guiaan non gzataa dze, niicle nadzew, gzhew, ni grëragaa len izdoo ne ziaada!

<sup>19</sup> Bzhiguiel bdeed tib zhibdiuzh naa lo Aquil i grop Priscil, ni lo grë zha ne no lidz Onesifr.

<sup>20</sup> Gacnan to ganle, laa bets ne Rast biaan Corint, laa Trófimo biaan guiedz Milet, sac rzacne me.

<sup>21</sup> Bioxco gon guiaadniob luu, zeena blansole luu nëz rii zeene laa mëë nal sëëb. Pcaania zhibdiuzh Eubul, zhibdiuzh Pudent, zhibdiuzh Lin, zhibdiuzh Claud; ni grëragaa zha bets ne, zha bzian ne, zha ne no nëz rii, laa zho rxeel bdiuzh lo luu.

<sup>22</sup> Jesús meñ ndzon ne rnabey, me gacnie luu. Dios glu lo to ganle pa lotaa noxco me to. ¡Me gunlay to grëse to!

Pabl

## GUITS NE PXEEL PABL LO TIT

¡Diuzh Tit!

<sup>1</sup> Naa nac Pabl, tib ngundziin win nac naa lo Dios, tib zha ne pxeel Jesús nonee Xtiidz Ndzon me lo miech. Laa naa none xtiidz me, zeena grëse miech ne bzooblöle Dios, gliladz zho me, gacnañ zho zhapaa nac wseed ne zional ne (wseed ne rnee zha none gbannie miech Dios),

<sup>2</sup> wseed ne rlu ganle ible laa ne quiambiaaz ygaa ne tib guielmban ne gdzindraa dze lozh. Ansraa ne tsaa guidzliu, laa Dios bzeetle ne laa me gneedz guielmban co, ni mesi gon led yed me rquidie.

<sup>3</sup> Ni niina ne laa dze co bdziñ, laa me blu lo ne ganle zha nac xtiidz me, mincopaa nagon bzo me naa none naa lo miech. Lëe me ga nac Dios ne psilaa ne lo dol.

<sup>4</sup> Laa naa rxel guits rii lo luu gon Tit. Rzaac naa luu zig tib xpëed naa, sac nañ naa nli dib zdoo luu rliladz luu Dios zigne rliladz naa me.

Rnab naa lo Dios men ne nac Pxoze, ni lo Jesús men ne psilaa ne lo dol, glu me ganle pa lotaa noxco me luu, zeena peet zhgab ctseebd luu.

<sup>5</sup> Rsoladzaxe luu ganle, zeene psan naa luu lo guidzliu win ne lë Cret i, laa naa psan luu zeena lozh gun luu grëraa dziin ne no gac i, ni psan naa diidz lo luu zha gzo luu zha ne so gnabey lo grë zha ne rliladz Jesús, tib tib guiedz qui.

<sup>6</sup> Bien sca, zeene gzo luu zha co, ga rquiin:

tib zha ne zaacse mban, zeena peet glisquid miech lo zho;  
tibaque wnaa ne mbannie zho, men ne nacse tsieel zho,  
zaacse quiachoob zho xpëed zho, rliladz mëed Dios (zëebd diidz pe guielntseeb ne noyun mëed, o rondgaa mëed diidz).

<sup>7</sup> Sac zha ne sca so lo grë zha ne no xnëz Dios, ib none gac zho tib zha ne

ndzinli mban, sac gon xtsiin Dios ga gun zho. Nodne gac zho:

zha nlëeguic,  
zha ngonziu,  
zha nad ron diidz,  
zha nguibdil,  
zha ne rzonal dimi.

<sup>8</sup> Sinque none gac zho tib zha ne: ndzinli nac guic,  
ine niowse rdeed zho zaatne rbëz miech ne rdziñtaa lidz zho,  
rioxco zho run zho niapse ncuaane rquiin lo samiech zho,  
zional zho gac niapse mine nac diidzli,

rioxco zho run zho niapse mine rnabey Dios,  
rrieelo zho rnabey zho guic zho, rnabey zho xcuerp zho.

<sup>9</sup> Ni none tibaque tsienal zho mine nac Xtiidz Jesús, mine pseed zho; zeena guien zho zha gnee zhow lo grë zha ne gard tsoguic zha naca, ni grieelo zho glu zho lo grë zha ne rlëenie Xtiidz Jesús, guien zha co nonguielda ga glëenie zhow.

<sup>10</sup> Sac no ndal grë zha ne nëd gon Xtiidz Jesús niina, ncuaane paat rquiind rseed zho miech, rquidie zho; ni lëepaa zha ne sca run nac zha Israel.

<sup>11</sup> Gacxe waa, ib none guioog ro zho; sac gon par cueexlëse zho dimi no zho noseed zho miech grë ncuaane paat rquiind; zaatne no tib yu miech, grëse zho rquidie zho.

Bien sca gon nsin bzo lo grë zha Cret i. Sac gon,

<sup>12</sup> tib menladzaque zho, tib men rac lo zho bzeet ganle zha nac zho zeene znu bnee me: “Nandraaque zha Cret, loxaque noquidielsa zho samiech zho. Masaque mban zho zigne mban grë ma ntseeb ne no guix; loxaque gowse zho zienie guic zho, rbech zho gun zho dziin.”

<sup>13</sup> Ni nligaa sca nac zho. Gacxe waa, bien gdziguiend luu grë mine run zho, goctox lo zho zeena sodziits zho lo Xtiidz Ndzon Jesús mine no gliladz zho.

<sup>14</sup> Bnee lo zho yquiaadiagdraa zho beelze pe grë godiidz ne rbeebey zha

Israel, ni niicle yquiaadiagdgaa zho grë miñe rnabey zha ne rlëënie Xtiidz Ndzon Jesús.

<sup>15</sup> Golgañ ganle, grë miech ne ndzinli nac guic, zha ne mbe xquielrien, ncuaane notaa, mbe naca lo zho; sangue zha ne riladzd Xtiidz Dios, zha ne ndzinlid nac guic, tsod tib ncuaane mbe glulo lo zho; sac desde zdoo zho, desde xquielrien zho mbed.

<sup>16</sup> Rnee zho runbey zho Dios, per rlu nlida sac ndzinlid mban zho. Zha yozha, xquielndaan yozh zho zienie zho, led zha ne guiabd ne guñ ncuaane yquiina.

## 2

### *Znu nac Xtiidz Ndzon Jesús*

<sup>1</sup> Sangue luu gon, none gnee luu lo grë miech qui zigne nacse Xtiidz Jesús.

<sup>2</sup> Grë men bgui ne nac zha gol lo to i, bnee lo zho:

tibiladz gac zho,  
gund zho ncuaane cuee xquielto zho,  
quix zho biini, ncuaane ndzinli tsienal zho guñ zho;

tiblique gac zho lo Xtiidz Jesús,  
gleynie zho samiech zho, ni dziits so zho tel pe nactaa grë guielne ne noyan zho.

<sup>3</sup> Scaquegaa grë men wnaa ne nac zhagol, bnee lo zho:

gban zho zigne no gban zha ne nole xnëz Dios,  
gzhixcuaad zho diidzguizh,  
gzuzdz zho.

None zaacse gac zho,  
<sup>4</sup> zeena zha glu lo grë wnaa nguieg zha gban zho. Cseed zho grë wnaa nguieg:

gan zho tsieel zho,  
gan zho xpëed zho,

<sup>5</sup> gac zho tib wnaa nix biini,  
quitnied zho tsieel zho;  
zaacse guñ zho xtsiin zho,

niowse gac zho, niowse gnee zho,  
gon zho xtiidz tsieel zho; zeena tsod pe nacne gneenë miech Xtiidz Dios.

<sup>6</sup> Ni scaquegaa bnee lo grë zha bgui nguieg, gac zho zha nix biini.

<sup>7</sup> Luuzhal zaacse been grese ncuaane no guñ luu, zeena ga gwi zho ganle zha none gban zho. Zeene cseed luu zho, ine tibiladz goc, guñd luu ne quitnie luu zho.

<sup>8</sup> Bguib diidz ne gnee luu, zeena choot peet glisquid lo luu; ni scagaa, grë zha ne rlëënie Xtiidz Jesús, stoladz zho zeene gan zho guiend pe glisqui zho lo ne.

<sup>9</sup> Grë zha ne lega run xtsiin ben, pso diidz lo zho gon zho xtiidz men ne quia zho xtsiin, niowse gac zho, niowse gnee zho, yquiabrod zho lo me.

<sup>10</sup> Ib cuand zho, sinque ine ti miech mbe lo gac zho; zeena ga gan miech ganle zha niowtaa nac lo xquielmban zha ne zienal Xtiidz Dios, men ne psilaa ne lo dol.

<sup>11</sup> Grë diidz rii nagon pso lo zho. Gotsaa gwi ne ganle zha noxcotaa Dios miech, gacxe psilaa me ne lo dol waa;

<sup>12</sup> sac laa me racladz csaan ne grese guielntseeb, csaan ne grëtaa ncuaane rleynie zha ne nod xnëz me, guien ne ndzinli gban ne, tibaque gwi ne dien pa min wen, pa mingaa wend, ine dzioxco ne gban ne zigne racladz me.

<sup>13</sup> Sca none gban ne, haxta dzianlo ne gdzin dze ne laa Jesús guiaad stib, zigne psanle Dios diidz; gal dze co, laa me guiaad con grë xquielndzon me. Me nac Dios ro ne riladz ne, me psilaa ne lo dol.

<sup>14</sup> Sac gon, me bgaadz guielgut ne niogual ne, me bdiizh grëtaa guielntseeb ne bdziuun ne, psanmbe me ne lo grëtaa ncuaane bdziuun ne; gane niina, lo me ngab ne, ni none dzioxco ne gban ne zigne rnabey me.

<sup>15</sup> Grë min rii nagon pseed grë miech qui, bnee lo zho gban zhow. Zeene riegala gdzieebd luu goctox lo zho, sac gon luu riegual gnee lo zho. ¡Sca been, zeena choot quitnied luu!

## 3

### *Znu riegual gban zha ne no xnëz*



**Dios**

<sup>1</sup> Been̄csoladz zho gan̄le none gon zho mīne rnee gr̄e zha ne nac wx̄tis, gac zho tib zha nguzobdiidz, ni ib soliaadzd zho gun̄ zho gr̄e tel̄ pe ncuaanē yquiin lo samiech zho.

<sup>2</sup> Guien̄ zho gneen̄ed zho samiech zho, inē zaacse gbannie zho samiech zho, niowse gac zho, niowse gnee zho, ni zeenē cho lo gnee zho none ndooladz gac zho, ndooladz gnee zho.

<sup>3</sup> Sac gon̄ haxta ne, ib peet riend̄ ne glo, ntseeb goc ne, bdiits ne gr̄e mīne rnabey Dios; laa ne ziole n̄ez ne nitlo ne hor co, masaque bgadoo ne lo gr̄etaa ncuaanē racladz xcuerp ne, lo gr̄etaa ncuaanē ndzinlid ne bley ne bdziun̄ ne. Niapse guiel̄ntseeb bional̄ ne, n̄e rac zdoo ne rdziañ ne ncuaanē quianie, ncuaanē run̄ stib miech; zigtaa row rzhiih̄ zdoo zho gon̄ zho ne, scaque ne, zha ne rdziañ̄taa ne, row rzhiih̄ zdoo ne bdziañ̄ ne zho.

<sup>4</sup> Per bdziñ̄ dze, zeenē laa Dios (men̄ ne psilaa ne lo dol̄) blu gan̄le pa lotaa nac xquiel̄wen me, pa lotaa nquialadz me miech,

<sup>5</sup> laa me psilaa ne; per guiabd ne togo por pe ncuaanē wen ne bdziun̄ new, sinque porne pquia zdoo me new. Psan̄mbe me ne lo gr̄etaa xtol̄ ne, rriequia gol ne ga stib, ni bzhixcuaa Esp̄ritu Sant lo xquiel̄mban ne.

<sup>6</sup> Niapse por Jesús men̄ ne psilaa ne ga, laa Dios pxeel̄ Esp̄ritu Sant rneedz me gr̄ese guiel̄biini ne rquiin lo ne.

<sup>7</sup> Por mīne been̄ Jesús ni mīne been̄ Esp̄ritu Sant laa ne biaan̄wen lo Dios; ni porne noxco me ne gane bnabey me sca goca. Gane niina, ndion̄ ne ib zgaa ne tib guiel̄mban ne gdziñ̄d dze lozh, sac ib sca nac xtiidz me.

<sup>8</sup> Mīne rne naa lo luu nu, diidzliw. Racladz naa tibaque gnee luuw lo gr̄e zha qui, zeenā gr̄ese zho ne nac zho zha ne rliladz Dios, tsoxco zho gun̄ zho niapse gr̄e ncuaanē ndzinli; sac gon̄, miñ̄ co nac mīne nonguiel̄, ni miñ̄cogaa rquiin lo gr̄ese miech.

<sup>9</sup> Biche lo zha ne racladz tildiidznie luu gr̄e ncuaan̄ paat rquiind, zig nac

gr̄e godiidz dien̄ pe been̄ gr̄e mengol padzeela, dien̄ pe nonguiel̄ tsienal̄ ne ley, te nonguiel̄da ye. Ncuaanē paat rquiind ga, loxaque run̄ctilā miech; ni lalnu rieguald̄ gaquieta.

<sup>10</sup> Tel̄ cho zha ne rsilo rgodil̄ gr̄e zha ne rliladz Dios, blisquiw lo zho. Bnee lo zho tib, tel̄ gan̄ luu rond zhow, bnee lo zho stib; tel̄ne rondaque zhow, dzigo bzon̄ez zho gan̄ zho dien̄ pa n̄ez tsie zho.

<sup>11</sup> Zha ne sca run̄, gase rlu ne zieniedraa guic zho gon̄ zho mīne rnabey Dios; sac nan̄paa zho dol̄ ga, ni laa zho run̄a.

<sup>12</sup> Laa naa no cxel̄ tib zha ne guiaad i, yase cxel̄ naa Artem o cxeel̄gaa naa Tic. Zeenē glanso zho i, siguieel̄ luu guiaad luu Nicópolis ga gdzieel̄ ne; sac ib ga ni naa cūez naa len̄ m̄eē nāl ne ziaad nu.

<sup>13</sup> Laga no luu i, bioxco zaatne grielotaaw been̄ xyudar Apol grop me licenciad Zenas. Bdeed gr̄e tel̄ pe ncuaanē yquiin zho n̄ez; zeenā peet gun̄falte lo zho, grielo gdziñ̄ zho zaatne no tsie zho.

<sup>14</sup> Gr̄ese zha ne nacgr̄e ne ne rliladz ne Jesús, none cseed zho gun̄ zho xyudar zha ne no liaadz; glu zho gan̄le rquiin zho, led zhl̄ed mban zho.

<sup>15</sup> Gr̄ese zha ne no lo naa nu, laa zho rxeel̄ bdiuzh lo luu i. Bzhiguiel̄ bdeed tib zhibdiuzh no lo gr̄ese zha ne rleyne no i; sac ye zho rliladz Jesús.

Guiaann̄ie Dios to sca dien̄. Peet tsienied̄ guic to, me gacnīen̄ to; sac gon̄ me noxco gr̄ese zhizhgab to.

Pabl

## GUTS NE PXEEL PABL LO FILEMÓN

¡Diuzh Filemón!

<sup>1</sup> Naa nac Pabl, laa naa no ladzguiib nu loxaque ne quiayun naa xtsiin Jesús; grop no Timoté laa no rquia guits rii.

Laa no rxeela lo luu gon Filemón, ne nligaa rleyne no luu squi ye luu noyun xtsiin Jesús.

<sup>2</sup> Laaw ziaad lo to i gza to bzian ne Apia, bets ne Arquip tib zha ne noyunaque dziin rii, ni grëraa zha bets, zha bzian ne rcaalsa lidz luu i.

<sup>3</sup> Dios, men ne nac Pxoz ne, ni Jesús men ndzon ne rnabey, me glu ganle pa lotaa noxco me to, zeena peet zhgab ctsebde to.

<sup>4</sup> Ib riaanladz naa luu, zeene rzodidznie naa Dios, tibaque rded naa xquizh lo me squitaa noneedz me guielbiini lo luu.

<sup>5</sup> Sac ziyonle naa squitaa dib zdoo luu riladz luu Jesús, rleyne luu me, ni scaque rleyne luu grë zha ne ngab lo me.

<sup>6</sup> Rnab naa lo Dios, grëse mine noseed luu grë zha ne no i, tsoguc zhow, zeena yгаа zho grëse guelnzaac ne rdeed Jesús lo grë zha ne ngab lo me.

<sup>7</sup> Rley naa gon bets, sac zigtaa naa zigtagaa grëraa zha ne ngab lo Diosa, blactaa ziechoobladz luu, zigonley luu zdoo no, rlu luu ganle nli rleyne luu no.

<sup>8</sup> Niicle ne rieguala gnabey naa luu mine racladz naa gon luu, sac gon Jesús bzo naa none naa Xtiidz me,

<sup>9</sup> per gnabeyd naa luu, sinque laa naa rnab lo luu yquiaadiag luu ganle zha racladz naa; sac gon ndion ne zigne rleyne naa luu, scaque luu rleyne luu naa. (Gon ganle, mengol ne nac Pabl nu nonee lo luu, laa naa niogyu nu loxaque ne quiayun naa xtsiin Jesús.)

<sup>10</sup> Niina gon ne laa Onésimo glanso lidz luu i stib, bzhiguiel zaacse pcaania me, gon ganle rrieequia mëed nac me lo naa niina, sac nu len ladzguiib nu bne naa Xtiidz Dios lo me, xquizh-gaa Dios bliladz mew.

<sup>11</sup> Nli glo tib zha peet xtsiind nac me lo luu, sangue niina gon, zigtaa lo luuw zigtagaa lo naaw nroob yudar ne gon me.

<sup>12</sup> Laa me biire ziaad lo luu i, niowse pcaania me; masaque been cuent naa i zial i.

<sup>13</sup> Gocladz naa mbëz me lo naa nëz rii, zeena me niun dziin lo naa nu xcuent luu, ne znu niogyu naa nu loxaque ne noseed naa miech Xtiidz Ndzon Jesús.

<sup>14</sup> Per gocladz naa niunga naa mine no guic naa, ni nand naa dien pe gnë luu; gane ni naa mazd telne zrieelow, per zdoo luu gala.

<sup>15</sup> Nli laa Onésimo biche lo luu palal dze; per niina ne laa me glanso lo luu stib, lëe guiaanle me lo luu i.

<sup>16</sup> Per bien gon, sacdraa luu me niina zig tib zha ne runse xtsiin luu, gon ganle rrieequia tib bets luu i, tib zha ne nziuu lo luu i nac me. Tel naa, sca rzaac naa me, gacxe waa none gleyne luu me; sac gon tel niina, led loxaque tib ngundziindse nac me lo luu, sinque ye tib bets luu nac me, sac gon yele me ngab lo Dios.

<sup>17</sup> Telne nlipaa rzac luu naa zig tib bets luu, porne tibaque men ne riladz ne, nana sca been cuent naa i zial i, pcaania me zig nac zeene naa glanso lidz luu.

<sup>18</sup> Ni tel no pe guielqui ne been me lidz luu, tel pe zëëbgaa me lo luu, lo naa bnaba.

<sup>19</sup> Wi ganle, naazhal pquia diidz rii nu: Naa quizha. ¡Zig nac luu, gon ganle zëëble luu lo naa, ni haxta nroobraa zëëb luu! Sac gon, naa bnee Xtiidz Dios lo luu laa luu bgaa guielmban ndzon ne gdziind dze lozh.

<sup>20</sup> Sca gon bets gaca, bzhiguiel been guelnzaac co; bloonley zdoo naa, bien ganle tibaque lo men ne ngab ne.

<sup>21</sup> Laa naa pxel̄ guits rii lo luu, sac rien̄ naa ible zon luu mine rne naa lo luu nu, rgobey naa haxtā nroobraa mine gun̄ luu lo mine rnab naa.

<sup>22</sup> Lëë nēzle nu rnabaque naa lo luu, siguiel̄ luu gneedz luu lidz luu cuēz naa zeeṅe laa naa guial̄ i; sac rien̄ naa ib zun̄ Dios mine quianab to lo me, zneedz me diidz guial̄ naa guialgan̄ naa to.

<sup>23</sup> ¡Dios guiaañnie luu sca! Pcaania zhibdiuzh Epafṛ, meṅ ne nioogyunie naa leṅ ladzguiib nu loxaque ne rdz-iuun̄ no xtsiin̄ Jesús.

<sup>24</sup> Scaquegaa zla zha ne quiadz-iuun̄gza no dziin, zig nac Marcw, Ristarc, Demas ni Luc, gza zho laa zho rxeel̄ bdiuzh lo luu.

<sup>25</sup> Jesús meṅ ne rnabey ne, me glu ganle pa lotaa noxco me luu. ¡Me gunlay luu!

Pabl

## GUILTS NE BEY LO GRË ZHA ISRAËL

<sup>1</sup> Padzeela, ndal vult bnee Dios lo grë pxozgoldoo ne, pxeel me grë zha ne biadteed xtiidz me lo zho, bnabey me grë zha co zhaase zhaase mod ne bnee zho.

<sup>2</sup> Sangue niina, Xpëedpaa me Jesús pxeel me biadnee xtiidz me lo ne. Jesús men ne bzaagrop me grëtaa ncuaane no, ni men ne bzo me gnabeya grësew.

<sup>3</sup> Zeene biaad Jesús lo guidzliu, me blu ganle zha ndzontaa Dios, zhapaa nac Dios, sac Dios nac me; me naaz grëtaa ncuaane no, ni por xtiidz me laaw quiayun dziin. Ni zeene blozh bdiizh me xtol ne, dzigo laa me biire zey gbaa bzob me cue Dios, zaatne rieguaal me ne nac me men ne rnabey.

<sup>4</sup> Ga rlu ganle men nroob nac Jesús, led lega led me Xpëed Dios; men nroob nac me lo grë anjl.

<sup>5</sup> Ni tib lo anjl bneed Dios zigne bnee me lo Jesús, zeene rëb me: "Xpëed naa nac luu. Desde nadze laa zho gunbey ne Xpëed naa nac luu." Stib vult zeene bzeet me Jesús, rëb me: "Xpëed naa nac me, naa nac Pxoze me."

<sup>6</sup> Ni zeene biaad Jesús lo guidzliu; men ne nac Xpëedpaa me ga, rëb me: "Grëse xanjl naa, none yquitsgzhib zho lo me."

<sup>7</sup> Zaatne raquiet anjl, rneew: Tib mandadse nac zho lo Dios, pale zigne rzhoon me sca rzhoon zho rie zho zaatne rnabey me zho; me rnabey rlu zho zigne rlu bel.

<sup>8</sup> Sangue zaatne raquiet Xpëed me, rneew: Dios, luu nac men ne zobnabey, ni gdziind dze ne gree luu; zeene run luu guielwxtis, zigne rieguaala sca run luuw.

<sup>9</sup> Ni palal rdziguiend luu grë guielntseeb,

niapse ncuaane ndzinli, ncuaane nonguiel, min co rleynie luu; min co gane bzooblo Dios luu, nac luu men ne rnabey, luu nac men ne mazdraa nroob guielbley bgaa.

<sup>10</sup> Laa stib lugar rnee: Men rnabey nac luu, luu bzaa guidzliu, luu bzaa gbaa dib nacsew.

<sup>11</sup> Nli zdziin dze nitlo grë ncuaan co, grësew zlozha zigne riozh grë lar,

<sup>12</sup> dzigo laa luu ctibëda, zig rdibëd grë lar, laa luu cuee stib min cub; zigne run zha ne rtsëexab.

Sangue luu, tibaque nac luu, nacd luu men ne nitlo, nacd luu men ne lozh xquielmban.

<sup>13</sup> Haxta rëb Dios lo me: Cue naa nëz derech, nu bzob, nieeda lozh gnaz naa zha ne rlëe lo luu, csaan naa zho ladznia luu. Nligaa men nroob nac me lo grë anjl, sac ni tib lo anjl bneescad Dios.

<sup>14</sup> Lo me ga sca bnee Dios, sac gon grë anjl, mese nac zho run zho dziin lo Dios, rxeel me zho rquianap zho zha ne nacle diidz laa lo grëtaa guielne ne csiaab me.

## 2

<sup>1</sup> Gacxe nagon waa, gotsaa guien ne ganle ib none dzioxcö ne wen wen gwi ne zha nac Xtiidz Ndzon Jesús mine zidzion ne; zeena gnitnëzd ne.

<sup>2</sup> Sac gon, niicle zeene xanjlse Dios biadteed xtiidz me lo miech padzeela, ni goconona; grëse zha ne güeynalda, pteed Dios zho caxtigw ne rieguaal zho.

<sup>3</sup> ¿Pe lelgue niina dzigo ne Jesús zhal biadnee zha laa ne lo dol? ¿Zha dien tedlaa ne lo caxtigw, telne dzioxcod ne mine rnee me? Nli zha ne binlew zha co biadneew lo ne, per me nac men ne psilo bneew;

<sup>4</sup> niicle Diosgaa, blactaa grë ncuaane quialu me, blactaa grë milagr ne run me, rlu me ganle ne nli diidzli biadseed zho ne; ni zhaagaa grë guielbiini ne ral zdoo me rdeed Espíritu Sant lo grë zha ne dib zdoo rnalo Jesús.



*Jesús nac meñ ne grieelo gdziñnie miech lo Dios*

<sup>5</sup> Zig nac lo guidzliu cub ne ndion ne naraa gneedz Dios, psand me ne anjl gnabey low.

<sup>6</sup> Lo Xtiidz me zhobnee ganle zeene znu rëb David lo me:  
¿Cho nac miech ne squitaa noxco luu zho?

Zig nac tib meñ qui, ¿pe nacne squitaa runnon luu me?

<sup>7</sup> Tib blase dze psanwin luu me palal lo grë anjl; na laa luu psanglaa me stib, beennon luu me, bzo luu me mele gnabey.

<sup>8</sup> Grëtaa ncuaane no, laa luu psana ladznia me.

Nli gard gac grë mine bnee David ga,

<sup>9</sup> per ndionle ne ganle zha psanwin Dios Jesús lo grë anjl tib bla dze, ni blozh ga zeene laa me gut xcuent ne grëse ne, hor co laa Dios biire psanglaa me, laa Dios biire beennon me. Ni nligaa noxco Dios miech, nquialadz me ne, gane bdeed me didz gut Jesús psilaa me ne lo grëse xtol ne.

<sup>10</sup> Ible sca gocladz Dios, meñ nroob ne bzaa grëtaa ncuaane no, ible me bdeed diidz scataa grë guielnë ne gon Jesús; gane niina, Jesússe nac meñ ne grieelo ner lo grëtaa miech guizhiu ne no ygab lo me, gdziñnie Jesús zho lo guielndzon ne no me.

<sup>11</sup> Grëse ne ne nac ne zha ne psanmbe Jesús ngab ne lo Dios, yele ne nac mëed lo Dios. Gacxe waa, rley Jesús rnee me bets me nac ne;

<sup>12</sup> no tib lugar lo Xtiidz Dios zaatne raquiet zeene znu rëb me:

Zne naa lo grë bets naa, gacnan zho ganle cho nac luu;

ni zeene ycaalsa zho grë zho, tipse dzioolnie no luu.

<sup>13</sup> Stib vuelte rëb me:

Dios nac meñ ne rnalo naa.

Ni rëb me:

Laa naa nu, quiayacnie naa grë zha ne nac xpëed Dios.

<sup>14</sup> Min co gane, zigne znu nac ne miech, scaque Jesús goc me miech zigne nac ne. Sca bdeeda diidz gut me, ni zeene gut me, ga psanwin me

mendox, sac glo masaque ladznia ma no miech par gnitlo ma zho.

<sup>15</sup> Sca psilaa me grë miech ne ngadoo lo guielgut; rrieequia ngadoo zho, sac tibaque nonie xtseb guielgut guic zho.

<sup>16</sup> Ni wen wen ndion ne ganle, zeene biaad Jesús, biaate me par gacnie me grë anjl, sinque laa me biaad par gacnie me grë zha ne no ygab lo Dios.

<sup>17</sup> Gacxe waa, goc me zig nac miech, zigne nac ne ne nac ne bets me; ni parne scagaa grieelo gac me pxoz nroob ne gnab lo Dios por ne. Pquia zdoo me ne, bloogon me me bdiizh me grëtaa xtol ne;

<sup>18</sup> nroob nac grë guielnë ne bded me, pquianañ mendox nquiiil ma me niab me lo dol. Ni ne mezhal bded grë min co, nanpaa me zha rzac zha ne nodeda, gane ible zacnie me zho.

### 3

#### *Gunndipde to zdoo to*

<sup>1</sup> Bets, bzian, to ne nac to zha ne bredz Dios ngab to lo me; golguien cho nac Jesús, meñ ne pxeel me biadteed xtiidz me lo miech, meñ ne bzo me nac pxoz nroob ne rnalo ne niina.

<sup>2</sup> Tib meñ nguzobdiidz brieequia Jesús lo Dios, zigne nguzobdiidzaque brieequia Moisés zeene pquianap me grë zha Israel.

<sup>3</sup> Per Jesús nac meñ ne non, sac gon lo me ngab grë miech co, laa Moisés loxaque pquianap me zho.

<sup>4</sup> Zig nac zha ne rzhixcuaa tib yu, nli non zho, per mazdraa non meñ ne bzaa grëtaa ncuaane no; ni lëe meñ co nac Dios.

<sup>5</sup> Nli bin Moisés diidz been me xtsiin Dios, per laa me gocse zig tib ngundziin pquianap me grë zha Israel co, ni pteed me xtiidz Dios lo zho.

<sup>6</sup> Sangue Jesús, Xpëed Dios nac me, ni me rnabey grëse zha ne ngab lo Dios. Ni grëse ne, ne nac ne zha ne no xnëz me, lo Dios ngab ne; totsaque iney nley gac ne dib zdoo ne yquiambiaaz ne gac grë mine nacle diidz gneedz me lo ne.

<sup>7</sup> Ndionle ne sca ganle, men ro nac Jesús, gacxe waa gotsaa gwi ne ganle zha raquiet lo Xtiidz Dios rnee Espíritu Sant lo ne, rnee me:

Telne gon to gnee me lo to nadze,

<sup>8</sup> gunndipde to zdoo to,

gunde to zigne been grë pxozgol to, gocntseeb zho lo Dios, zeene sca mban noded zho, no zho grë dan ngan co.

<sup>9</sup> Ga raquiet ganle zeene znu rëb Dios: Ncuaañe lëbdraa guic naa been zho, per dipse len choo iz, blactaa ncuaañe gon zho beñ naa.

<sup>10</sup> Zeene gon naa scataa nac zho, laa ne gon zho diidz tsie zho nëz ne rlu naa lo zho, lel zhaa ncuaañe run zho;

nacne nli beñngulëë zho guic naa.

<sup>11</sup> Lo guielblëë co, bdetee naa diidz ndzin zho zaatne nded naa ndziiladz zho.

<sup>12</sup> Bets, bzian, golguien sca ganle ib gunndipde to zdoo to, zeena sozite to lo me ne nac me Dios nguiamban.

<sup>13</sup> Gzataa dze, golnee lo grë zha ne nacgrë to (nasraa laga rdeeda diidz), zeena ni tib tsienald grë ncuaañe runctal xtol miech, lozh ga lëew yquiaaqui gacntseeb to lo Dios.

<sup>14</sup> Sac gon, par gdziñ ne zaatne no Jesús, ib none tiblque gac ne, tibaque gnalo ne Dios zigne bnalo ne me zeene psilo bdziunbey ne me.

<sup>15</sup> Ni nadzegazh none dzioxco ne min co. Golsoladz ganle zha rnee lo Xtiidz me:

Telne gon to gnee me lo to nadze,

gunndipde to zdoo to,

gunde to zigne been grë zha ne sca gocntseeb lo me ga.

<sup>16</sup> Ni lëë min co gon bzhaac zha ne güeybee Moisés Egipt. Bin zho bnee Dios lo zho ni blozh ga gocntseeb zho lo me,

<sup>17</sup> beenctal zho xtol zho. Dipse len choo iz ne sca bio zho dan co, bieednie me zho.

<sup>18</sup> Zeene gon me rond zho xtiidz me, nacne bnee me lo zho rëb me gdziñ dze ne gdziñ zho zaatne ndeed me ndziiladz zho.

<sup>19</sup> Ni nligaaw bdziñd zho, grëse zho gut dan co; sac sca beenndip zho zdoo zho, ib bliladz zho mine rnee me.

## 4

<sup>1</sup> Sca nagon bzhaac grë miech co. Gacxe nagon waa, zig nac niina ne laa me rnee ganle laa me gneedz lugar ne gdziiladzga ne, none ndzinli gac ne, zeena ni tib choot sacd zig bzhaac grë zha co.

<sup>2</sup> Sac zigne nagon nonee Dios lo ne niina dieñ zha gdziñ ne zaatne gneedz me ga, znuque bnee me lo zho; per zhlëse bin zhow, ib bliladz zhow dib zdoo zho.

<sup>3</sup> Sac loxaque zha ne dib zdoose riladz xtiidz Dios, zha cose zrieelo gdziñ zaatne nacle diidz ga gdeed me gdziiladz zho. Mincoxe waa, zeene gon me bliladz zha co xtiidz me, bdeete me diidz ndziñ zho ga.

Niaale zaatne gdziiladz zho ga, nolew zeene blozh bzaa Dios grëtaa ncuaañe no.

<sup>4</sup> Sac gon rnee lo Xtiidz me: “Xoop ngbidz bzaa me grëtaa ncuaañe no, laa zeene gol ngbidz gadz laa me bdziiladz.”

<sup>5</sup> Niaalew nagon, sinque ne gocntseeb zho lo me gane bdeete me diidz ndziñ zho.

<sup>6</sup> Grë zha ne glo gocnañ xtiidz me ga, brieelod ndziñ zho; per zig nac niina, laa me bii quiambëz sëëb grëraa zha ne no sëëb.

<sup>7</sup> Gacxe waa, laa me biire pso stib dze ne yгаа zho guielnzaac co. Lëë min co ga znu bzeet David, zeene rëb me: “Telne gon to gnee me lo to nadze, gunndipde to zdoo to.” Ndaldoole iz sca bzhaac grë zhagol co, dzigora znu bzeet David;

<sup>8</sup> ga nagon rlu no stib lugar ne gdziiladz miech. Nacdraaw zaatne bdziñnie Josué grë zha ne biaan zeene blozh gut grë zha ne gocntseeb ga; sac telne lëële lugar co ga, nsodraa Dios stib dze ne yгаа miech guielnzaac co.

<sup>9</sup> Min co nagon, ndion ne ible no stib lugar co, ni ga gdziñ grëse zha ne ngab lo Dios.

<sup>10</sup> Grëse zha ne gdzin ga, gasi laa zho gdziiladz lo grëtaa xtsiin zho, zigne bdziiladzaque Dios zeene blozh bzaa me grëtaa ncuaane no.

<sup>11</sup> Gacxe nana sca, golgotsaa dzioxco ne dziuun ne mine rnabey Dios, zeena gdzin ne ga; dziuund ne zigne been grë zha wladz ne sca bind xtiidz me.

<sup>12</sup> Sac Diossi gon, diidz ne rnee me, nona. Zeene rnee me, rien ne grëse mine nac ne. Nan me pe no guic ne, pe rza zdoo ne; niicle ncuaane rzac ne mazdraa ngueetsa, nan mew.

<sup>13</sup> Tsod ncuaane tsongueets lo me. Grëse ncuaane rac, me rana; ni tib tib ne, lo me cueero ne grëse tel zha mban ne.

### *Lëe pxoz nroob ga nac Jesús*

<sup>14</sup> Per zig rne naa ga, rdziaap ne tib pxoz nroob niina, ni pxoz cosi men ne bzoquia gbaaw. Lëe me ga nac Jesús, men ne nac Xpëed Dios, me none gnalo ne; none tiblifique gac ne.

<sup>15</sup> Sac gon mesi rquia zdoo me ne, csaand me ne zeene zootle laa ne guiable lo dol, sac tel me gonle me zha nac lo guidzliu rii, gonle me grëtaa mod ne rquiil mendox ne par guncal ne xtol ne. Bzhaac me zigne rziaa- caque ne niina, lëeraasi biabd me lo dol.

<sup>16</sup> Gacxe nagon waa, ine tibliladz golgotsaa gbig ne lo Dios, ndion ne ganle ible squia zdoo me ne, ni ible zacnieu me ne zeene rquiinpaa ne gun me xyudar ne, sac ne nligaa noxco me ne.

## 5

<sup>1-3</sup> Ible Jesús nac zhipxoz nroob ne niina. Gotsaa gwi ne ganle, men ne rgaa rac pxoz nroob, ladaque miech rcuee me run me dziin co, ni laa me rzo rteed me xtiidz miech lo Dios. Zig nac grë gon ne rgogon miech lo Dios, xchen ma ne rut zho par guiooglo lo xtol zho, me riesana lo pcoog; ni scaquegaa riesan me mine guiooglo lo xtol me; sac gon, miech guidzliuque nac me. Ye me rzac zigne rzac grëraa miech, gane rien me rquia

zdoo me grë zha ne peet riend, grë zha ne mazdraa ngoopdol.

<sup>4</sup> Ni zha ne sca rac pxoz nroob, led zhald zho rzëeb zho rac zho dziin co, sinque Dioszhal rzooblo zho zigne bzooblo Dios Aarón, men ne glopaa goc pxoz nroob.

<sup>5</sup> Zig nac Jesús, Dioszhal bzooblo me ne laa me nac zhipxoz nroob ne; men ne znu rëb lo me: “Xpëed naa nac luu. Desde nadze laa zho gunbey ne Xpëed naa nac luu.”

<sup>6</sup> Ni rëb me:  
Luu nac pxoz nroob, gdzind dze ne gdzëe luu,  
luu gac zig pxoz Melquisedec.

<sup>7</sup> Zeene bii zo Jesús lo guidzliu rii, tib vult mban rac me zig zet me lo guielne, haxta roon me, nguiedz bnee me bnab me lo Dios csilaa Dios me lo guielgut co; scagaa Dios psilaa Dios me, sac tib men nguzobdiidz nac me.

<sup>8</sup> Niicle ne Xpëed Dios nac me, per tib men nguzobdiidz goc me, maase mincopaa pquiaqui nroob guielne ne bded me.

<sup>9</sup> Ni ne sca bin me diidz been me grëse mine bnabey Dios me, gacxe waa grëse miech ne gban zigne nac xtiidz me, me gdeed tib guielmban ne gdzindraa dze lozh lo zho;

<sup>10</sup> ni bzo Dios me nac me pxoz nroob niina, zigne gocaque Melquisedec pxoz nroob.

### *Gacde to zig cho mëdyeen*

<sup>11</sup> Racladz naa gneraa naa lo to nu pe run zhipxoz nroob ne, zha nac me, per ne squi rac to peet nede to yquiaadiag to, nagan gne naa lo to zha naca.

<sup>12</sup> Lo lal dze ne psilo rnalo to Jesús, haxta none tole cseed miech niina, per na gon lel rquiin to dien cho gbi- ire csilo cseed to stib. Rac mëdyeen to i gon, laa ne gow to ncuaane row zha brooble lel racladz to tibaque nidz guie to.

<sup>13</sup> Sac gon, mëdyeen rie nidz, ni riend win dien pe nac ncuaane ntseeb, pegaa nac ncuaane wen.

<sup>14</sup> Saingue grëloraa guielwagw, min co rquiin grë zha gol, ni zha co niinile

zho, rien zho pe nac ncuaane wen, pegaa nac ncuaane ntseeb.

## 6

<sup>1</sup> Gacxe waa, none tsoxco to gac to tib zha gol. Gunde to ne mine pseedse to glo zeene psilo bnalo to Jesús, lo min co ib grieede to. Laa to pseedle ganle:

zha none csaan to guie<sub>l</sub>ntseeb gbig to lo Dios,

zha none gnalo to Dios,

<sup>2</sup> zha cxobnia to guic stib zho, gnab to lo Dios por zha,

zha nac wrobnis,

zha cueeban Dios grë men<sub>g</sub>ut,

zha gun<sub>g</sub> Dios guie<sub>l</sub>wxtis ne gloozh grëtaa guie<sub>l</sub>ntseeb.

<sup>3</sup> Grële min rii nan to. Laa niina telne zneedz Dios diidz, laa to cseed mine noraa gacnan to.

<sup>4</sup> Sac gon, no ncuaane grieelod gac telne gneedzd Dios diidz gaca. Zig nac zha ne squi bienle zha nac Xtiidz Ndzon Dios, bley zho gon zho gol zdoos Dios psilaa me zho, bdeed Espíritu Sant guie<sub>l</sub>biini lo zho,

<sup>5</sup> bien zho zha wentaa nac xtiidz me, zha grieele sëeb zho zaatne ziaadyob gdzin zho (zeene glu Dios grë poder ne rap me),

<sup>6</sup> ni lozh ga csaan zhow, tsienal zho guie<sub>l</sub>ntseeb stib; grieelod nose co guic zho gbiire sëeb zho xnëz Dios. Ni zha ne gon sca run, rrieequia noquiaa zho Jesús lo cruz ga stib, gbiire gzhidznie miech me.

<sup>7</sup> Zig nac tib lë liu ne rgaa grëse nisguie ne riab, zeene rrieequia grë ncuaane ran zho low, runlay Diosa;

<sup>8</sup> laa telne niapse yag guiets, niapse grë guizh guiets rroob low, paat rquiinda; ib tedsod zdzibdee Diosa, ni lozh ga znabey me tseca. Scaque nagon nac miech ne runbey Xtiidz me.

<sup>9</sup> Bets, bzian, laa naa rne min rii lo to, per guiabde to togo mine run to rzet naa. Tel to, rien naa briele to lo grë guie<sub>l</sub>ntseeb, lölö Dios ngab to niina.

<sup>10</sup> Nanle to ganle, Diossi ncuaane rieguial tib tib miech, min co rdeed

me lo zho. Grëtaa ncuaane noyun to niina ne rleynie to me, grë tel zha rquia zdoos to been to xyudar grëraa zha ne no xnëz me, ni noyungaa tow niina; grësew ible guiaanladzd mew.

<sup>11</sup> Mine rzoobladz naa, tibaque squi nguieel gac to, zeena scagaa zgaa to grë ncuaane nacle diidz gneedz Dios lo to.

<sup>12</sup> Sac dzigosi guieete to, ib gbechde to; masaque laa guic to tsienie ycaania to grëtaa mine bneele me gneedz me lo ne; zigne been grë zha ne nli-paa bnalo me.

### *Mine rnee Dios run mew*

<sup>13-14</sup> Golsoladz ganle, zeene psan Dios xtiidz me lo Abraham been mew zigne bneese mew. Lëë hor co rëb me laa me gunlay Abraham, ni ndal gun me lo xtii Abraham. Ni lëëque lë me bzeet me, par glu ne ible zun me mine bnee me.

<sup>15</sup> Scagaa Abraham, tiblrique bliladz me ne laaw gac; lëë gdib pquiambëz me bdzin dze co.

<sup>16</sup> Zig nac miech, par glu ne zun zho mine rnee zho, dzigo rzeet zho lë tib men ne mazdraa non lo zho; ni deque sca run zho ga rlu ne gdzëedraa xtiidz zho.

<sup>17</sup> Scagaa Dios, laa me bzeet lë me sac guie<sub>l</sub>ndraa stib men ne mazdraa non lo me. Ga blu me ne ible zun me mine bnee me ga.

<sup>18</sup> Zeene sca rsan Dios diidz, ni rzeet me lë me, choot grieelodraa ctsëë mine rnee me, ni niicle megaaw nacd me men ne rquidie. Gacxe waa, grëse ne ne nac ne zha ne wbig lo me, none ine nley gac ne, sac ndionpaa ne ne ible zneedz me mine psan me diidz yгаа ne.

<sup>19</sup> Min co nagon, none tiblrique gac ne zig tib barcw ne dziits zob lo nis, sac no ncuaane naaza len nis; ndion ne ganle, ible zdzin ne len yadoo nroob ne zob Jesús.

<sup>20</sup> Laa me bner bdzin me ga nonab me lo Dios por ne. Me nac pxoz nroob niina, ni gdzindraa dze ne gdzëë me; laa me nac zig goc pxoz Melquisedec.



## 7

*Pxoz nroob ne lë Melquisedec*

<sup>1</sup> Nanle to ganle Melquisedec goc rey guiedz Salem, ni meque goc pxoz lo Dios ro ne zob gbaa. Golsoladz ganle, zeene znu wbirele Abraham güeyguncxoon me zha ne no grë guiedz ne rlëe lo me, Melquisedec goc pxoz ne güeydzieelo me, beenlay Melquisedec me.

<sup>2</sup> Dzigo lo grëse ncuane bla me lo grë zha co, been mew tsii lal, bdeed me tib lalgaw lo Melquisedec.

Melquisedec nac zig nacne rnee ne “guielwxtis”, min co nac ne rnee zho me “rey ne run guielwxtis”; ni rneeque zho me “rey ne rcuëez lo dil”, sac Salem (guiedz ne goc me rey ga) nac diidz co zig nac ne rnee ne “zaatne guiend dil”.

<sup>3</sup> Ib raquiete dien cho goc pxoz me, dien cho goc xniaa me, dien cho goc-gaa xmenjol me; niicle raquietegaa dien zha blanso me lo guidzliu, dien pe gutgaa me. Ziaad gac me zig Xpëed Dios, men ne nac zhipxoz nroob ne, men ne gdzind dze gdzëe.

<sup>4</sup> Rlu men non goc Melquisedec; sac gon:

a) Golwi ganle, haxta pxozgol ne Abraham bdeed palal ncuane bla me ga, lo Melquisedec.

<sup>5</sup> Nana, telne niac Melquisedec zha xtii Leví guiab ne por min co pcaa mew, sac zeene laa ley biaad rnabeya ne grëse zha Israel, tel pe nactaa ncuane quanie zho run zhow tsii lal rdeed zho tib lala lo zha xtii Leví, sac zha co nac pxoz; ni tibaque dii ne nac zho.

<sup>6</sup> Laa Melquisedec, niicle ne led zha xtiid Leví nac me, per bnab me bdeed Abraham tib lal grë ncuana co lo me.

b) Me beenlay Abraham; ni laa Abraham biaanniele diidz pe nac mine gdeed Dios lo Abraham.

<sup>7</sup> Ni ndion ne ganle men nroob nac zha ne runlay.

<sup>8</sup> c) Grë pxoz ne sca rcaania gon co, rdzin dze ne laa zho ret; sangue Melquisedec, zigne raquiet me lo Xtiidz Dios rlu ne mban me.

<sup>9</sup> d) Rrieequia ye grë pxoz ne brieequia lo zha xtii Leví ye zho ga bdeed gon lo Melquisedec, zeene sca bdeed Abraham gon co lo me.

<sup>10</sup> Sac niicle ne gard gal Leví hor co, per racle Leví cuent ga, sac xpëedaque Abraham goc Leví.

<sup>11</sup> e) Grë pxoz ne brieequia lo xtii Leví ga, zig nac Aarón; zha co nac zha ne blu ley lo men guiedz Israel; per brieelod zho mbee zho miech lo dol, gane laa ne nxeel Dios stib pxoz ne ziaad lo xtii Aarón, mazd pxeel me tib pxoz zig pxoz Melquisedec.

<sup>12</sup> Zeene sca ptsëe Dios lo dii ne ziaad pxoz, hor co nacne bdzëeque grë xley pxoz.

<sup>13-14</sup> Ndion ne ganle, Jesús men ne nac pxoz cub niina, lo xtii Judá brieequia me, ni ni tib zha dii co gard gac pxoz, sac ib bzod Moisés zha dii co ne laa zho niac pxoz.

<sup>15</sup> Ga nagon rlu ne nli grëw bdzëe. Sac gon, Jesús men ne nac pxoz niina, men ne nac zig pxoz Melquisedec,

<sup>16</sup> nacd mew porne ziaad me lo xtii Leví, sinque porne nac me tib men ne gdzind dze lozh xquielmban.

<sup>17</sup> Zigne raquetaque me, zaatne rnee:

Luu nac pxoz nroob, gdzind dze ne gdzëe luu,

luu gac zig pxoz Melquisedec.

<sup>18</sup> Gataa laa grë xley pxoz biaan tib lad, sac grëse mine bnabey pxoz hor co run miech, paat pquiinda.

<sup>19</sup> Ni lalnu brieelod nsanwena miech lo Dios; sangue niina, mazdraa wen zio ne, sac ndionpaa ne Jesús nac men ne csanwen ne lo Dios, sac me nac men nroob ne rnalo ne.

<sup>20</sup> Dioszhal rëb Jesús gac tib pxoz ne gdzind dze gdzëe, ni haxta bzeet me lë me parne glu ne ctsëed me xtiidz me;

<sup>21</sup> laa grëraa pxoz ne ziezo, ib beend me ne sca nzeet me lë me. Sac gon, lose Jesús znu rëb me:

Luu nac pxoz nroob, gdzind dze ne gdzëe luu,

luu gac pxoz nroob zig Melquisedec.

Naa rnew, ni naasi ctsëed naa xtidz naa.

22 Min<sup>cocxe</sup> waa ndion<sup>ne</sup>, diidz ne biaan<sup>nie</sup> Dios miech ga gdzi<sup>nd</sup> dze ne gdz<sup>ëw</sup>; sac gon<sup>ne</sup>, por Jesús laaw noyac.

23 Glo, ndaldoo zha ne goc pxoz, sac gr<sup>ëse</sup> zho miech nac zho, rdzi<sup>nd</sup> dze ne laa zho ret, ze<sup>ne</sup> laa tib zho ret laa stib zho rzo.

24 Sangue Jesús, led yed me grie<sup>e</sup> par dien cho stib so, sac mesi gdzi<sup>nd</sup> dze ne guet me.

25 Gacxe waa, gr<sup>ëse</sup> ne ne nac ne miech, zha ne gbig<sup>taa</sup> lo me parne ycaania Dios zho, ible silaa me zho lo do<sup>l</sup>, ni l<sup>ëe</sup> blaale zho ga. Tibaque laa me gnab lo Dios por zha, sac gdzi<sup>nd</sup> dze ne guet me.

26 Jesús nac tib me<sup>n</sup> ne nli<sup>paa</sup> mbe, ni tib do<sup>l</sup> rapd me, ib rdziguiend me guie<sup>nt</sup>seeb; gacxe waa, be<sup>nn</sup>on Dios me, ni l<sup>ëe</sup>paa pxoz nroob co nagon rqui<sup>in</sup> ne.

27 Led yed me nac zigne goc gr<sup>ëraa</sup> pxoz nroob ne bio glo. Gr<sup>ë</sup> pxoz co, gzobse dze rut zho ma ne rgogon zho lo Dios, parne csa<sup>n</sup>mbe me zho lo xto<sup>l</sup> zho; ni rutaque zho ma ne riogon lo Dios parne guiaa<sup>n</sup>mbe gr<sup>ëraa</sup> me<sup>ng</sup>uedz; sa<sup>n</sup>gue Jesús, tibaque vuel<sup>t</sup> bdeed me gon co, ni mezhal goc gon co.

28 Stiba, glo, zha ne rga<sup>a</sup> rac pxoz nroob zigne rnabey ley, ye zho ru<sup>ntal</sup> zho xto<sup>l</sup> zho; sa<sup>n</sup>gue niina ne laa Dios psan<sup>ne</sup> stib xtiidz me, laa me bzo Jesús nac me zhipxoz nroob ne, mesi tib me<sup>n</sup> mbe nac me, ni gdzi<sup>nd</sup> dze ne gdz<sup>ëe</sup> me.

## 8

### *Jesúsle nac me<sup>n</sup> ne rteed xtiidz ne*

1 Lo gr<sup>ë</sup> mi<sup>ne</sup> quiane naa nu, mi<sup>ne</sup> racladz<sup>paa</sup> naa gacna<sup>n</sup> to nac mi<sup>n</sup> rii: Jesús nac zhipxoz nroob ne, ni zaatne zob Dios, me<sup>n</sup> nroob ne rnabey, ga zob me.

2 Gbaa no me, ga quiayu<sup>n</sup> me dziin zaatne nac<sup>paa</sup> yadoo, Dios bzaa yadoo co, led yedraa mi<sup>n</sup> co bzaa miech.

3 Ndion<sup>ne</sup> ne gan<sup>le</sup>, zha ne rac pxoz nroob, laa zho rzo, ze<sup>na</sup> gr<sup>ë</sup> ma, gr<sup>ë</sup>gaa ncu<sup>aane</sup> rgogon miech, zha

rdeeda lo Dios; scaquegaa Jesús, ye me bdeed me gon lo Dios.

4 Tel<sup>ne</sup> niaca mi<sup>ne</sup> bii no me lo guidzliu niina, grieelod gac me pxoz nroob, sacne nole pxoz nroob ne rdeed gr<sup>ë</sup> gon co lo Dios, zigne rnabey ley.

5 Gr<sup>ë</sup> dziin ne ru<sup>n</sup> gr<sup>ë</sup> zha ne rac pxoz nroob lo guidzliu rii, lega nacsew zig zhim<sup>lë</sup> gr<sup>ë</sup> mi<sup>ne</sup> rac gbaa; yadoo ne rio zho lo guidzliu riiw, lega nacsew zig zhim<sup>lë</sup> yadoo ro ne zob gbaa. Go<sup>ls</sup>oladz gan<sup>le</sup>, ze<sup>ne</sup> laa Moisés gzaa yadoo, r<sup>ëb</sup> Dios lo me: “Zigne gon<sup>ne</sup> bluse naa lo luu guic guiga, sca none gzaa luuw.”

6 Gacxe waa, tel<sup>ne</sup> Jesús me<sup>n</sup> ne nac zhipxoz nroob ne niina, mazdraa non dziin ne quiayu<sup>n</sup> me; sac gon<sup>ne</sup>, ze<sup>ne</sup> pso Dios me gac me pxoz nroob, psan<sup>ne</sup> Dios diidz stib zha grieelo yga<sup>a</sup> ne gr<sup>ë</sup> guie<sup>ln</sup>zaac nroob ne gneedz Dios lo ne, ni me gun<sup>ctsin</sup> ne lo Dios.

7 Wenraa nac diidz ne psan<sup>ne</sup> Dios ga, sac tel<sup>ne</sup> niaca nl<sup>ëb</sup> diidz ne biaan<sup>ne</sup> glo ga ze<sup>ne</sup> r<sup>ëb</sup> me zha guiaa<sup>n</sup>wen miech lo me, dzigo nod pe nacne mbiire nsan<sup>ne</sup> me stib xtiidz me.

8 Ni bzeetlegaa me ne laa me csa<sup>n</sup> stib xtiidz me, sac gr<sup>ë</sup> zha ne biaan<sup>nie</sup> xtiidz me glo, loxaque be<sup>en</sup>ctal zho xto<sup>l</sup> zho. Min<sup>ne</sup> co ga raquiet lo Xtiidz me, zaatne znu rnee:

Rnee me<sup>n</sup> ndzon ne rnabey: Zdzi<sup>nd</sup> dze ne gbiire guiaa<sup>n</sup> no diidz gr<sup>ë</sup> no zha Israel, ni zha Judá.

9 Per gacdraaw zig diidz ne biaan<sup>ne</sup> no gr<sup>ë</sup> no xme<sup>ngol</sup> zho,

ze<sup>ne</sup> rrie<sup>e</sup>quia bzheen<sup>ne</sup> naa nia gr<sup>ë</sup> zha gol co, blee naa zho lo caxtigw ne noded zho Egipt;

sac ni lalnu güeyna<sup>ld</sup> zho diidz ne biaan<sup>ne</sup> no ga,

nacne niicle naagaaw, psaanladz naa zho.

10 Ze<sup>ne</sup> gdzi<sup>nd</sup> dze co,

znu nac diidz ne guiaa<sup>n</sup> no gr<sup>ë</sup> no zha Israel:

Gr<sup>ëse</sup> xley naa, nis nis gacna<sup>n</sup> zhow, zig nac ze<sup>ne</sup> haxta len<sup>ne</sup> zdoo zho, len<sup>ne</sup> guic zho zhubneew.

Dzigosi laa zho gunbey naa ne naa nac xDios zho, ni niicle naagaaw, laa naa gunbey zho ne lo naa ngab zho.

<sup>11</sup> Dzigosi yquiindraa tso zho gnee zho lo menlidz zho, lo menladz zho: “None gunbey luu Dios gon.”

Sac len dze co, grëse zho runbeyle zho naa,

niicle zha ne mazdraa wina, niicle zha ne mazdragaa nona.

<sup>12</sup> Tel pe nactaa xquientseeb zho, zun naa zhow perdon;

gdzindraa dze csoladz naa grë falt ne been zho lo naa.

<sup>13</sup> Zeene sca bzeet me ne laa me csañ stib xtiidz me, ga rlu ne rquiindraa mine biaan glo ga; sac nac grë ncuaan gox rquiindraaw, laaw nole par nitlow.

## 9

### *Yadoo ne no gbaa*

<sup>1</sup> Zeene glo biaan Dios diidz ga grë me zha Israel, hor co biaan diidz lo zho zha tsiegan zho me, ni zha tsaaw yadoo ne gac zaatne tsiegan zho me.

<sup>2</sup> Dzigo bzaa zho tib yu mantiad ne goc yadoo co, groltaa len yu co pquiaancaan zho tib lar nroob, goc len yu co chop len. Tib lena, mine riaan nëz ro yadoo, ga nac zaatne Nda, ga rzo tib candeler ne niaa niapse or, ni rzo tib mezh ne rbib quietxtil ne naclayle.

<sup>3</sup> Laa stib lena, mine riaan nëz zhits lar co, ga nac zaatne Ndadoo;

<sup>4</sup> ga rzo tib yag ndiaab niapse or lada, dzigo lo co rec yaal; leen coque zhoob tib guin scaque niapse or ndiaab lada. Len guin co no grop lë quie lag ne pquia ley ne pcaania Moisés, ga no bar ne bzhen Aaron, bar ne bdzib ben ga; leen coque no tib guies win niaa niapse or, len guies co no palal maná, quietxtil ne bguiaan Dios grë mengol co. Lëe guin co biaan par csoladz zho zha nac diidz ne biaan Dios zho.

<sup>5</sup> Zhits guin co zoli chop anjl ne bzaa zho, masaque rbebel grop anjl co rtsiig me xiil me rtse me zhits guin

co, zaatne rliaal xchen grë ma ne riogon lo Dios, par guiooglo lo xtol menguedz. Par gne naa zha nacraa grë ncuaan co, rneedzraaw diidz nu niina.

<sup>6</sup> Sca nagon biaa yadoo co, dzigo grë zha ne rac pxoz tibaque rzëeb zho zaatne Nda ga; ga riegun zho dziin ne rnabey ley zho gun zho.

<sup>7</sup> Laa stib lena, zaatne Ndadoo ga, loxaque men ne nase pxoz nroob rrieelo rzëeb ga, ni tibaque vult tib len iz rzëeb zho. Zeene rzëeb zho, rienie zho xchen ma ne rgogon zho par guiooglo lo xtol zho, ni guioogloogaa lo grë xtol menguedz, dol ne biend zho been zho.

<sup>8</sup> Gase na ganle rlu Espiritu Sant lo ne, gacd sëeb grëraa miech zaatne Ndadoo ga, laga bii sca chop len nac yadoo.

<sup>9</sup> Golgotsaa gwi ne niina na ganle zha naca: Glo, niicle ne scataa riesan zho gon, scataa rut zho ma ne rgogon zho, per brieelod grë ncuaan co nsanmbew zdo zho;

<sup>10</sup> sac hor co, laa zho güeynal grë ncuaane laglaase, rio zho dien pe zac gow zho, dien pe zac guie zho, dien zha gaz zho, dien zha tsar nia zho par guiaanmbe zho. Laa zho been min co, sac hor co gard gacncub diidz ne biaan Dios zho ga.

<sup>11</sup> Sanguie niina ne laa Jesús biaad, niina ne mele nac pxoz nroob, por me laa miech yгаа grë guienzaac ne bneele Dios ga. Bdziñ dze laa me bzëeb yadoo ro ne zob gbaa (yadoo ne mazdraa non, yadoo ne mazdraa nzhixcuaa, yadoo cosi led yeda bzaa miech),

<sup>12</sup> zeene bzëeb me, bzëebnied me pe xchen chiv yeen, pe xchen ngon yeen, zigne been grëraa pxoz nroob; sinque xchenpaa me bzëebnie me zaatne Ndadoo ga; tibaque vult bzëeb me, ni lëe psanmbele me ne lo grëtaa xtol ne ga.

<sup>13</sup> Nana, telne scataa pquiin zho xchen ngon yeen, xchen chiv yeen, rio zho rzëeg zho tib vac yeen rliaal xquidie co lad zha ne rap falt, par

gbiche dol co guiaanmbe zho lo Dios.

<sup>14</sup> ¿Pe lel xchen Jesús dzigo? Mazdraa gon nac xchen me, ibe sanmbew ne lo grëtaa ncuaane paat rquiind ne bdziun ne glo, niinasi zrieelo dziun ne mine rnabey Dios nguiamban. Sac gon, tel Jesús ni tib dol rapd me, ni Espíritu Sant bloo zdoo me bdeed me me goc me tib gon mbe.

<sup>15</sup> Gacxe waa, Jesúsle nac men ne gdziinne ne lo Dios, niina ne laa Dios psan stib xtiidz me. Zeene gut me, ga bdiizh me grëtaa xtol miech, zig-taa zha ne biaan nie diidz glo cow, zigtagaa zha ne nobedz me len dze riw; niinasi grëse zho zrieelo yгаа zho guielmban ne gdziind dze lozh ga, zigne nacle xtiidz me.

<sup>16</sup> Gotsaa gwi ne ganle, xtiidz miech, mine rсан zho par dien zha gac grë ncuaane rap zho zeene laa zho guet, laga bii mban zho grieelod gacnon diidz co;

<sup>17</sup> sinque haxta ret zho, dzigo laa diidz co racnon.

<sup>18</sup> Scaque nagon, zeene psan Dios xtiidz me glo, gutgazh ma ne brieen ren bzhiee dzigora laa diidz co psilo gocnon.

<sup>19</sup> Golgotsaa csoladz ganle, zeene blozh bnee Moisés lo men guiedz zha nac diidz ne psan Dios ga, laa xchen ngon yeen, xchen chiv yeen ndxiembëzle notsa nis; dzigo bzoob me tib lë guits mëcwxiiil rna nizhnie tib guic bar, blozh ga, psëeb mew lo ren co blaal me ren co lo guits ne quia grë diidz co, ni blaal mew lad grëse miech co,

<sup>20</sup> ni rëb me lo zho: “Laa ren rii bzhiee, zeena gacnan to desde nadzetaa laa diidz ne psan Dios lo to nu csilo gacnon, none gun to mine rnabeya.”

<sup>21</sup> Blozh ga, blaalaque me ren co gdipse len yadoo, ni blaal mew grëse lad ncuaane racdziin len yadoo.

<sup>22</sup> Sca nagon nac ley co, grëse ncuaane no guiaanmbe, ib ren rсанmbew; scaque miech, haxta rzhiee xchen ma ne riogon dzigora

riooglo lo xtol zho.

<sup>23</sup> Mincocxe waa, sca pxiee Moisés xchen ma biaanmbe yadoo co ni grë ncuaane racdziin lena (nacse yadoo co zig zhimlë yadoo gbaa); sangue yadoo gbaa, ga pquiin ren ne mazdraa non lo xchen ma, ni lëe ren co goc xchen Jesús.

<sup>24</sup> Zeene bzëeb Jesús zaatne Ndadoo güeynee me lo Dios por ne, güeyd me len yadoo ne bzaa miech, sinque len yadoo gbaa güey me; sac gon, nacse mine no lo guidzliu rii zig zhimlë mine no gbaa.

<sup>25</sup> Grë pxoz nroob, gzob iz rie zho zaatne Ndadoo rienie zho xchen ma; sangue Jesús, xchenpaa me güeynie me, ni tibaque vuelt güeylogon me me.

<sup>26</sup> Telne ye me niun zig run grëraa pxoz co, pe zhistaale vuelt na ziyet me wlal ne bre guidzliu, iper na, led yed me! Zeene laa dze bdziin, laa me bиаad, xchenpaa me bzhiee, ni tibaque vuelt bzhieew psanmbew ne lo dol grëse ne ne nac ne miech.

<sup>27</sup> Zigne biaan tibaque vuelt ret miech, lozh ga zeene laa Dios gun guielwxtis, laa zho none gacredz lo me;

<sup>28</sup> scaquegaa tibaque vuelt gut Jesús bdiizh me xtol grëse miech; ni zdziin ne guiaad me stib, per guiaatraa me par biire quizh me xtol miech, sinque laa me guidaad silaa grë zha ne quiambëzlo me, zeena gand zho grëtaa guielnë ne csiaab Dios.

## 10

### *Tibaque vuelt goc Jesús gon*

<sup>1</sup> Grë mine rnabey ley run pxoz, lega nacsew zig tib zhimlë grëtaa mine been Jesús por ne. Horco niicle gzobse iz rienie grë miech co gon zigne rnabey ley, per brieeloda nsanmbew zho lo dol.

<sup>2</sup> Tel niaca mine gon cose nsanmbe zho, dzigo tibtaa vuelt ne niesan zhow lëe niaanmbele zho ga; niicle zhagaaw, nienpaa zho ne laa zho mbele.



<sup>3</sup> Per na, gzobse iz zeene laa zho riesan gon co rsoladz zho ne bii no zho lo dol,

<sup>4</sup> sac gon, grieelod ne xchense ngon yeen, xchense chiv yeen guiaanmbe miech lo dol.

<sup>5</sup> Mincocxe waa, zeene laa Jesús bi-aad lo guidzliu, pe led znu rëb me lo Dios:

Grë xchen ma, grë ncuaane riaadlogon zho lo luu, racladzdraa luuw;

gane bnabey luu goc naa miech, zial naa lo guidzliu.

<sup>6</sup> Grë ncuaane rzëeg zho, grë ren ne rxiee zho, par guiaanmbe zho lo dol; racladzdraa luu gan luuw.

<sup>7</sup> Gane niina, laa naa zial nu Dios, zeena gun naa mine gnabeytaa luu; zigne zhobneele lo Xtiidz luu gac naa.

<sup>8</sup> Gotsaa gwi ne ganle, blozhse rëb me racladzdraa Dios tso zho pe ncuaane tsielogon zho lo me, tso zho cxiee zho xchen ma, gzëeg zho ma par guiaanmbe zho (niicle ne lo ley sca rnabey gun zho);

<sup>9</sup> dzigo rëb me: “Dios, laa naa zial nu zeena gun naa mine gnabeytaa luu.” Gase nagon rlu ptiche me diidz ne psan Dios ga glo, laa stib diidz cub ne biaanmie Dios miech ga psilo noquuin.

<sup>10</sup> Ni nligaa been me mine bnabey Dios, bdeed me me gut me lo cruz; ne sca nagon been me mine bnabey Dios, ga psanmbe me ne lo dol. Tibaque vuilt sca goc me gon co, ni lëe psanmbele me ne ga.

<sup>11</sup> Grë pxoz, gzobse dze rio zho len yadoo rdziib zho grë gon ne riesan miech; blactaa iz tibaque sca nodziib zho grë gon co, per brieeloda nsanmbew miech lo dol;

<sup>12</sup> sangue Jesús gon, tibaque vuilt bzhiee xchen me goc me gon psanmbe me miech lo dol. Laa niina, cue Dios nëz derech ga zob me,

<sup>13</sup> quiambëz me gdziñ dze zeene grëse zha ne rlëe ran me, laa zho guiaanwin lo me.

<sup>14</sup> Tibaque gon ne bdeed me ga, psanmbegazh me grëse zha ne nodzinnie me lo Dios.

<sup>15-16</sup> Ni nligaa scaw, haxta Espiritu Sant, zeene blozh bzeet me zha rëb Dios guiaannie me zha Israel diidz stib, zha nis nis gacnan zho xley Dios, zig nac zeene haxta len zdo zho, haxta len guic zho zhobneew;

<sup>17</sup> dzigo bzeet me zeene znu rëb Dios: “Tel pe nactaa xquielntseeb zho, tel pe nactaa xtol zho, gdziñdraa dze ne csoladz naaw.”

<sup>18</sup> Golgotsaa gwi ne sca ganle, rso-ladzdraa Dios xtol ne sac laa Jesús bdiizhlew; gacxe waa, nodraa dzio ne dien pe gon ne gdeed ne par csanmbe me ne.

### *None gbig ne lo Dios*

<sup>19</sup> Bets, bzian, glo loxaque men ne nacse pxoz nroob rzëeb len yadoo zaatne Ndadoo ga; sangue niina, haxta zaatne Ndadoo len yadoo gbaa zrieelo gdziñ ne, sac xquizh xquielnzaac Jesús, bdeed me me bzhiee xchen me psanmbe me ne.

<sup>20</sup> Zeene sca gut Jesús, rrieequia tib nëz cub ga pxal me par gdziñ ne zatne ygaa ne guielmban; lëe nëz co ga bzhial zeene sca briez lar ne quia len yadoo ga.

<sup>21</sup> Ni ne me nac zhipxoz nroob ne no me yadoo gbaa,

<sup>22</sup> niinasi zacle gdziñ ne haxta lo Dios. Nana sca, dib zdo ne golgotsaa gbig ne lo Dios, dib zdo ne golgotsaa gnalo ne me, benque laa me psanmbele ne lo grëtaa ncuaane yozh ne rza zdo ne, rza guic ne; rrieequia bgaz me ne tib nis mbe.

<sup>23</sup> Tiblique sca golgotsaa gac ne, benque ndion ne ganle ible zdziñ dze ne gac mine riladz ne; sac Dios psan diidz co, ni ndion ne rquidied me.

<sup>24</sup> Golgotsaa dzioxco ne cseedlsa ne gleyne ne zha ne nacgrë ne, ni dzi-uun ne ncuaane yquuin lo ne grë ne.

<sup>25</sup> Dze ne nacle diidz ycaalsa ne dzioolnie ne Dios, ible none ycaalsa ne grëse ne, guionald ne mine run grë zha ne rzozit. None cso ne diidz lo grë zha ne nacgrë ne, conley ne zdo zho

dziits so zho lo mine rililadz ne; xco co none dzio ne niina ne laa dze ne guiaad Jesús ziaadgaxle.

<sup>26</sup> Zha ne beenbeyle zha nac diidzli, ni lozh ga xtsiinpaa guntal zho xtol zho, tsodraa gon ne csaambe zho lo dol co;

<sup>27</sup> lëetaa mine tsieguial zho nac guielnëdox ne ygaa zho zeene laa Dios gun guielwxtis; dze co laa me cxeel zho lo guidox, zaatne nitlo grëraa zha ntseeb ne gocndaan lo me.

<sup>28</sup> Gotsaa gwi ne ganle, niicxe ley ne na pcaania Moisés padzeela ga, zha ne rguiits mine rnabeya, ni tel no chop tson zha ne gon ne nliw, niicle mazdraa mban rac zho ib rdedlaad zho rut zho zho.

<sup>29</sup> Nana, ¿pe lelgue zha ne dzigo quiits mine rnabey Jesús? Mazdraa gon nac guielnë ne ygaa zho, sac noguitnie zho xchen Jesús ga, rzhidznie zho Espíritu Sant ga sca gun zho. Noguitnie zho ren co, ni lëew bzhiee bi-aambe zho lo dol, lëew bzhiee zeene psan Dios stib xtiidz me zha gbig miech lo me; rzhidznie zho Espíritu Sant, ni men co no zhixco zho.

<sup>30</sup> Zha ne sca gun, ible nroob guielnë ne ygaa zho; sac ndion ne ganle zha nac xDios ne, me znu rnee: “Naa raguial gun guielwxtis; naa gded mine riegual tib tib miech.” Ni zhubneque lo Xtiidz me: “Grëse miech, lo me cueero zho grë ncuaane been zho.”

<sup>31</sup> ¡Ne nligaa ncuaane gdzieb ne ted grë zha ntseeb ne sca guiab lадznia Dios, men nguiamban!

<sup>32</sup> Sangue to, golsoladz ganle zha bded to zeene griinpaa psilo bnalo to Jesús, niicle ne scataa nroob guielnë ne gon to, per beenctalde to xtol to.

<sup>33</sup> Blactaa bdziitnie miech to, squi ndxie zha ne nowi laa zho nosacsi to; ni blactagaa gon to nosacsi zho zha ne nacgrë to.

<sup>34</sup> Grë zha ne biab ladzguiib, mbanse rac zdoo to ran to zha rac zho; niicle zeene biaad zha ne biaadla grë ncuaane nacchen to, psaan to ptiche zhow, peet güeyniedaque guic to; sac nanle to mazdraa nac

guielnzaac ne ygaa to gbaa, ni mincosi gdzind dze ne nitlow.

<sup>35</sup> Nana sca, scaque dziits golso; sac telne tibaque gnalo to Dios, ible zgaa to guielnzaac ne gneedz me.

<sup>36</sup> Ible guiaand zdoo to, tibaque dziits golso golgun mine rnabey me; zeena ygaa to grë ncuaane bneelee me gneedz me lo to.

<sup>37</sup> Golsoladz ganle, znu zhubnee lo Xtiidz me:

Ible ile ziaad men ne nacle diidz guiaad ga, led nroobdraaw, laa me glansole.

<sup>38</sup> Grë zha ne zienal mine nac diidzli, ible zban zho sac rnalo zho naa;

laa telne guiaan zdoo zho sozit zho lo naa, ni lalnu gleynied naa zho.

<sup>39</sup> Sangue ne gon, nozozite ne lo Dios, sinque dib zdoo ne rnalo ne me. Grë zha ne sca rzozit lo me, nëz ne nitlo zho ga zie zho; laa ne gon, ible zgaa ne tib guielmban ne gdzind dze lozh, sacne znu dib zdoo ne rnalo ne me.

## 11

### *Zhapaa nac ne dib zdoo ne gnalo ne Dios*

<sup>1</sup> Znu nac ne dib zdoo ne gnalo ne Dios. Zha ne dib zdoo rnalo Dios, tiblique zienie guic zho ne ible zgaa zho mine quiambëz zho gdeed me lo zho; niicle ncuaane gard gan zhow, per rzac zho zig nac zeene ranle zhow.

<sup>2</sup> Zig nac grë xmengol ne, ne scacxe waa bnalo zho Dios gane bleynie me zho.

<sup>3</sup> Scagaa niina, ne dib zdoo ne rnalo ne Dios, gane rililadz ne me bzaa guidzliu ni grëragaa ncuaane no, zeene bnabey me biaaw, niicle ne peet guiend hor co.

<sup>4</sup> Gotsaa gwi ne ganle lëe bla zhagol ne dib zdoo bnalo Dios nu:

Zig nac Abel, ne dib zdoo me bnalo me Dios, gane bleynie Dios gon ne bdeed me, lëdle gon ne bdeed bets me Caín. Ne sca bnalo me Dios, gane pcaania Dios me zig tib zha ne peet xtold, ni pcaania Dios gon ne bdeed me ga; gacxe waa, haxta lo nadze,

niicle ne gutle me, bii raquiet ganle pa lotaa dib zdoo me bnalo me Dios.

<sup>5</sup> Scaque Enoc, ne dib zdoo me bnalo me Dios, gane gute me, zomban me zeynie Dios me gbaa, choot gonndraa me. Zeene bii zomban me lo guidzliu, blu Dios ne rdziladz Dios zha mban me.

<sup>6</sup> Sac zha ne rnalod Dios dib zdoo, grielod gban zho zigne rdziladz Dios. Zha ne racladz gbig zho lo Dios, none dib zdoo zho gliladz zho ne nli no me, ni gliladz zho ne nli rcaania me zha ne nlipaa rio liaadz rbig lo me.

<sup>7</sup> Zig nac Noé, ne dib zdoo me bnalo me Dios, gane bliladz me xtiidz Dios zeene rëb Dios lo me pe nac ncuaane ziaadyob gac; bin me diidz bzaa me tib barcw nroob, ni len barcw co bio me gza xpëed me ni tsiel me, blaa zho lo guielne co. Ni ne sca bnalo me Dios, gane ible zгаа me grë mine gdeed Dios lo grë zha ne biaanmbele lo Dios; laa grë zha ntseeb co, ib bnalod zho Dios, gane sca bnitlo zho.

<sup>8</sup> Zig nac Abraham, ne dib zdoo me bnalo me Dios, gane zeene bredz Dios me ycaania me zaatne gdeed Dios lo me, binga me diidz brieeme zie me, niicle ne nannd me zha nac dan co.

<sup>9</sup> Ni ne sca rnalo me Dios, gane niicle bdziñ me lo liu co, laa me wbanse ga zig tib menzit. Lega nacse len grë yu mantiad bio me grop me Isaac, scaquegaa Jacob; sac ye grop zha co biaan diidz nacchen liu co.

<sup>10</sup> Scase bio Abraham ga, sac nanpaa me no tib guiedz ndzon ne bzaa Dios, ni ga nac zaatne gdeed Dios gdziñ me.

<sup>11</sup> Scaque Sar, wnaa ne goc tsiel Abraham, ne dib zdoo me bnalo me Dios gane gop me mëed, niicle ne nacd me wnaa ne gap mëed, ni lala gol-le me; laa me gop win, sac zeene rëb Dios lo me laa me yquianie win, dib zdoo me bliladz me ible zun Dios mine bnee me ga.

<sup>12</sup> Ye Abraham, mengol-le me, men ne yquianiedraa mëed nac me, ni zeene laa Sar gop mëed co, miech guizhiu ne brieequia lo dii co; pale

mel ne ndziib gbaa, yuzh ne ndxieгаа ro nisdo.

<sup>13</sup> Gza zha ne blozh goquiet nu, gardaque ygaa zho grë mine bnee Dios gdeed me lo zho, laa zho gut; zeene bii zomban zho lo guidzliu rii, dib zdoo zho bnalo zho me gane bliladz zho ne ible zгаа zhow, rzac zho zig nac zeene ranle zhow. Bien zho ne tib ziaadtedse zho lo guidzliu rii, nace zho zig tib menzit.

<sup>14</sup> Ni ne sca bien zho tib ziaadtedse zho lo guidzliu riñ, ga rlu ne dzigoraa gdziñ zho zaatne gacpaa ladz zho.

<sup>15</sup> Sac telne niend zho ne scaw, znuse mbire zho ney zho zaatne brieeme zho ga.

<sup>16</sup> Tibaque laa guic zho güeynie ne ib zdziñ zho zaatne gacpaa ladz zho gbaa; gacxe waa, rtoladzd Dios ne nac me Dios ne rliladz zho, laa me bzhixcuaale guiedz ne gac ladz zho ga.

<sup>17</sup> Zeene been Dios Abraham prueb dien pe nli rnalo Abraham me, rëb me cogon Abraham xpëed Abraham Isaac; ne dib zdoo Abraham rnalo me Dios gane niicle tibaque mëed ga lo me, per bleeladz me mëed co, laa me niutle win niac win gon.

<sup>18</sup> Ni laa xtiidz Dios nac ne win gunctal lo xtii me!

<sup>19</sup> Laa me niut win, sac nanpaa ne nroob poder ne rap Dios, telne niet win nrieelo mbeeban Dios win; ni nligaa rrieequia gut win ga ni biire brieeban win stib.

<sup>20</sup> Niiclegaa Isaac, ne dib zdoo me bnalo me Dios, gane zeene bnab me gunlay Dios grop xpëed me, Jacob ni Esaú, bzeet me zha gac lo xquielmban zho.

<sup>21</sup> Scaque Jacob, ne dib zdoo me bnalo me Dios, gane niicle laa me nole guet me bnab me gunlay Dios grop xpëedbgui José, bzeet me zha gunlay Dios zho; mengol-le nac me, yagale zhoob me per tibaque rleynie me Dios.

<sup>22</sup> Scaque José, ne dib zdoo me bnalo me Dios, gane zeene laa me merle guet bzeet me ne ib zdziñ dze grieeme zha Israel Egipt; haxta psan me

diidz güey zho xtsit me zeene laa zho grieega.

<sup>23</sup> Zig nac pxoz Moisés, xniaa Moisés, ne dib zdoos me bnalo me Dios, gane bloolan me mëed niow yeen co lidz me tson mëe; ib bdziebd me mine bnabey rey Egipt.

<sup>24</sup> Niiclegaa Moisés, ne dib zdoos me bnalo me Dios, gane zeene laa me broob bdeetraa me diidz niunbey zho me zig xpëedmiag rey;

<sup>25</sup> laa ne niaan me lidz rey nleynie me grë ncuane niunctal xtol me, mazd bleeladz me me psacsi zho me grë menladz me.

<sup>26</sup> Bien me ne nonguielraaw ted me guielnë zig pteed zho Jesús, lëdle niaan nie me grë ncuane non ne no Egipt; sacne mine mazdraa nonie guic me nac guielnzaac ne gdeed Dios lo me.

<sup>27</sup> Ne sca rnalo me Dios, gane bdziebd me xquieldox rey, tiblucque been me guic me brieega me Egipt; sac nanpaa me niicle rand me Dios, per Dios nacie me.

<sup>28</sup> Ne scaque rnalo me Dios, gane bnabey me been zha Israel lni Pascw, ni bnabey me bdiaab xchen carner yeen grëse ro lidz zho, zeena guete xpëed glo zho wdze co.

<sup>29</sup> Grë zha Israel co, ne dib zdoos zho bnalo zho Dios gane wbiig lo Nisdoo Nizhnie, bzhal tib nëz mbidz bded zho; laa zeene gocladz grë xmenguiib rey Egipt nded zho, znuse bdzieel lo nisdoo co stib, grëse zho gut.

<sup>30</sup> Ne scaque dib zdoos zho bnalo zho Dios, gane bliaal biedz nroob ne ndze igo guiedz Jericó, zeene bza gadz ngbidz noyecw zho igo biedz co.

<sup>31</sup> Zig nac Rahab, wnaa ro nëz ne bio guiedz Jericó, ne dib zdoos me bnalo me Dios, gane peet gocd me dze ne bnitlo grëse menladz me, sacne bnalod zho Dios; me ga bdeed zaatne blëz zha ne glole pxeel zha Israel güey wleets ga.

<sup>32</sup> Ni noragaa zha ne sca dib zdoos bnalo Dios, haxta tiemple ygaad gzet naa zho. Zig nac Gedeón, zig nac Barac, Sansón, Jefté, zig nac David,

zig nac Samuel, ni grëragaa zha ne biadteed xtiidz Dios lo miech.

<sup>33</sup> Ne sca dib zdoos zho bnalo zho Dios, no zho beenchen grë guiedz nroob, no zho bnabey grë guiedz zigne nonguiela, no zho gonlo grë mine bzeet Dios gdeed me lo zho, no zho role meedz bdedlaa zho;

<sup>34</sup> no zho lo beldox bio zho ni peet gocd zho, no zho lo spadle bdedlaa zho, no zho gzhe gzhele rac zho per bdaan zho; no zho biablöle lo dil ni biire pcaa zho fuerz stib, haxta benchoon zho zha zit ne nodilnie zho.

<sup>35</sup> Grë men wnaa, no zho gonlo brieegan menlidz zho.

Nzian grë zha ne sca bnalo Dios, no zho psacsixuu miech zho, per ib bdeete zho diidz niun zho mine racladz miech, mazd bleeladz zho zho beet miech zho; sac nanle zho mazdraa ndzon guielmban ne yгаа zho zeene laa zho grieegan.

<sup>36</sup> Nogaa zho bgaa beennguzee miech zho, bdiin zho zho, bzoob zho zho lo caden, ni bloo zho zho ladzguiib;

<sup>37</sup> no zho bdeedquie miech zho haxta gut zho, no zho bgaa bloosier miech zho, no zho bgaa gut zho lo spad. Nogaa zho mbanse rac, pquian-guzhoon zho lo miech, nëzrii nëzrec zie zho, mbanse rac zho guien pe gow zho, guien xab zho, tib lëse guid mëcwxiil, tib lëse guid chiv nriel zho.

<sup>38</sup> Miech wen nac zho, ni rieguiald grë miech guidzliu rii guiaadban zha co lo zho, per scataa bded zho. Niapse grë dan bidz, grë dan gui, bio zho; zaatne blëz zho grë len blë, zaatne blëz zho grë len bliee.

<sup>39</sup> Ni golgacnan ganle, niicle nli biannziuu zho lo Dios ne sca dib zdoos zho bnalo zho me, per gardaque yгаа zho guielnzaac ne psan me diidz ga yгаа zho;

<sup>40</sup> sacne laa Dios racladz tipse ygaanie ne zho guielnzaac ne psanle me diidz gneedz me lo ne niina, sac min co nac mine mazdraa nroob.

## 12

*Choot gbiched lo Jesús*



<sup>1</sup> Nziandox grē zha ne sca dib zdoobnalo Dios. Ni niina, grēse zha co laa zho ndxiewi lo ne; sac rrieequia tib lo prueb no ne noquiaa ne corr. Gacxe waa, golgotsaa csaan grē ncuaane runctal xtol ne, zeena ycadraaw parne grieelo tiblque dzio ne nēz gdziñ ne zaatne no gdziñ ne.

<sup>2</sup> Tibaque golgotsaa guionie guic ne laa ne gdziñ lo Jesús ga, men ne zo lo ne grēse ne ne rnalo ne Dios, ni me lozh gzodziits ne. Tel me gon, niicle ne nroob psacsi miech me, haxta lo cruz pquiaa zho me, per tibaque güeynie guic me nroobraa nac guielbley ne gan me zeene lozh ga. Ncuaane mbeeguelto ga zeene sca quia me lo cruz, per ptoladz me.

Ni nligaa, zig nac niina cue Dios nēz derech ga zob me gbaa.

<sup>3</sup> Golguien sca, zeene racmban zdooto, zeene racladz guiaan zdooto, ib gdeete to diidz; golsoladz ganle, zha pxcw Jesús bded me grētaa miñe pteed grē miech ngoopdol co me.

<sup>4</sup> Parga nli, nē noded to noxco to gunctalde to xtol to, per gard guiab ne ygaa to ne gut miech to.

<sup>5</sup> Golsoladz ganle zha rnee Dios lo grē zha ne nac xpēed me. Znu raquiet lo Xtiidz me, zaatne rnee:

Xin, zeene rso Dios diidz lo luu gundraa luu grē ncuaane nonguield, none sac zdooluuw;

niicle zeene gactoxgaa me lo luu, gacmband luu.

<sup>6</sup> Sac gon zha ne sca rso me diidz lo, ga rlu ne rleynie me zho; zha ne ractoxgaa me lo, ga rlu ne nli xpēed me nac zho.

<sup>7</sup> Golguien sca, gacbande to tel pe caxtigw ne cteed Dios to. Golgan ganle, niicxe miech na, ractox zho lo xpēed zho zeene rond win diidz.

<sup>8</sup> Nana, tel ib peet glisquidgaa me lo to, gase dzigo rlu ne led xpēete me nac to; sac gon, zha ne nac xpēed me, rlisqui me zeene rond zho xtiidz me.

<sup>9</sup> Golsoladz ganle, zeene rac ne mēedlas rlisqui pxoz ne zeene rdziuuñ ne ncuaane nonguield; scagaa

ne, rien ne ne me rnabey lo ne. Nana, ¿pe lel Pxoz ne dzigo men ne zob gbaa gnabeyd me ne? Ni none gon dzion ne xtiidz me, zeena ygaa ne guielmban.

<sup>10</sup> Gotsaa gwi ne ganle, zig nac pxoz ne, rquia me rlisqui me zeene rdziuuñ ne ncuaane nonguield, sac racladz me zaacse gban ne, ni chop tsonaque dze nac lo guielmban rii; sangue Dios gon, laa me noseed ne par gac ne tib miech mbe zdooto, zig me; ni lēe miñ co nonraa.

<sup>11</sup> Parga nli, tsod zha ne gley zeene noded zho caxtigw, sinque nē rzac zhow; per zeene rded ga, zha ne rienpaa rquiina haxta wen riaañ zdooto zho, sac rseed zho zaacse rban zho.

### *Nodne gbiche miech lo Dios*

<sup>12</sup> Nana sca, telne bdzagle to, golgun ndip nia to, golgun ndip ni to stib,

<sup>13</sup> zaacse golsē, tib nēz goltso zeena gziaabnēzde to; dzigo scagaa zrieelo gacnie to zha ne lega noyobe.

<sup>14</sup> Goltsoxco niowse golbannie samiech to, ib gunctalde to xtol to; sac zha ne mbed zdooto, grieelod gdziñ zho lo Dios.

<sup>15</sup> Tibaque golteedlolsa zha ne nac grē to, golguien ganle racladz Dios gacnie me to, napaa na lel nozozit to lo me. Sac zha ne rzozit lo Dios, zeene laa miñe nac zho rzhoobneñ, nzian zdooto zha ne rsañ zho, rlozh ga grēse zha co runctal xtol.

<sup>16</sup> Ib gunde to grē ncuaane tsod zdooto Dios, ib quitniede to guielnzaac ne bneedz Dios lo to; gunde to zigne been Esaú, tel Esaú, por tib plat nis scuaan psaan me guielnzaac ne bgaa me ne nac me mēedglo;

<sup>17</sup> ni nanwen to ganle, zeene laa me gocladz nab pxoz me niunlay Dios me zig mēedglo, brieelodraaw. Dzigoraa rquia zdooto me, haxta roon me rnab me ygaa me guielnzaac co stib, per pe xtsiñraaw.

<sup>18</sup> ¡Golguien sca ganle, nroob nac guielnzaac ne bneedz Dios lo to niina! Led yede to ndziñ pa tib cho gui, zig bdziñ xmengol to cho Gui Sinaípadzeela. Grē xmengol to, zeene

ndxie zho zhan Gui Sinaí, beldox ne gon zho rso guic gui co, ni goc tib ncow, lala rio bi ratsie nguzi ni rree me;

<sup>19</sup> ni lala nguiedz rcuedz trompet, ni nguiedz zëeb tsi Dios rnee me lo zho. Zeene gon zho scataa nguiedz rnee me, bdzieb zho; dzigo bnab zho lo me gneedraa me.

<sup>20</sup> Bdzieb zho bin zho rëb me, zha ne tsep cho gui co none gdeedquie zho zho, gliz lanzгаа zho zho haxta guet zho; scaque grë ma.

<sup>21</sup> Ncuaañe gdziebdoo ne gon zho ga; haxta Moisés rzhidz lo dzeb co.

<sup>22</sup> Sañgue to, rreequia haxta Jerusalén, zaatne no Dios nguiamban gbaa bdziñ to, zaatne ndxie grë anjl guizhiu ne roolnie Dios;

<sup>23</sup> zaatne ndxie grë zha ne glopaa bzëeb xnëz me, grë zha ne zhooble lë gbaa ga. Laa to bdziñle lo Dios, men ne run guielwxtis; zaatne ndxie grë zha ne psanmbe Dios biaan zho zig tib zha ne peet xtold.

<sup>24</sup> Laa to bdziñle lo Jesús, men ne rdziñnie miech lo Dios niina ne laa Dios psan stib xtiidz me; laa to bdziñle zaatne rreequia bliaal xchen Jesús len yadoo gbaa, lëe ren co mazdraa non lëdle xchen Abel.

<sup>25</sup> Miñ co nagon, golguien golgun mine rnabey Dios to. Golsoladz ganle, zha bnitlo grë zhagol ne sca ib bind xtiidz me, ni tib miechse pteed xtiidz me lo zho. ¿Pe lel na dzigo ne mezhal quianee lo ne? Ib diedlaad ne gon telne dziond ne mine rnabey me.

<sup>26</sup> Zeene bnee me lo grë zhagol co, haxta beencxidz me guidzliu, ni rnee me: “Zbire naa guncxidz naa guidzliu stib, haxta ye gbaa guncxidz naa.”

<sup>27</sup> Gase na ganle rlu, lo grëse ncuaañe bzaa me zdzin ne laa me csiniw, dzigo laaw nitlo; lozh ga, guiaan mine gdziñdraa dze nitlo;

<sup>28</sup> ni ga nagon gneedz me gbiaaz ne. Gacxe waa, golgotsaa dziuun ne mine rnabey me, golgotsaa gdeed ne xquizh lo me, guien ne men nroob nac me; ni scagaa me zley me.

<sup>29</sup> Golguien ganle, tel me ne nac me Dios ne rliladz ne, nac me zig nac tib beldox ne peet rdedlaad lo.

## 13

### *Golban zigne racladz Dios*

<sup>1</sup> Bets, bzian, golleynie grë zha ne nacgrë to, golguien ganle tibaque men ne nac Pxoz to.

<sup>2</sup> Goldeed zaatne cuëz grë menzit ne zo nëz. Blac zha ne sca bdeed lidz blëz zha ne zo nëz, no hor biend zho haxta xanjl Dios blëz lidz zho.

<sup>3</sup> Goltsiegan grë zha ne nioogyu ladzguiib, goltso xliaadz zho zig nac zeene ye to nogrë zho ga. Golgacnie grë zha ne nosacsi miech, nanle to ganle zha rzac ne zeene no ne tib lo guielnë.

<sup>4</sup> To ne nac to zha ne ptsieel-niale, sacde to guieltsieel zig beelze pe wguít, ib yquidiede to tsieel to; sac zha ne yquiangob tib zha ne nonguield tsonie zho o yquiangobгаа zho tib zha ne nole tsieel, ib tedsod zunquizh Dios zho dol co.

<sup>5</sup> Tsienalde to loxaque dien zha gunlo to dimi; sinque golley totsaque no mine yquiin to. Golsoladz ganle, led znu rnee Dios lo ne: “Tibaque gacnie naa to, ib csaand naa to.”

<sup>6</sup> Gacxe waa, nod pe nacne ctseb zhgab ne, none tibaque dzionie guic ne dzieets ne:

Dios nac men ne nacnie naa, ¿pe nac nadien gdzieeb naa?

¿Peet grieelod gun miech naa!

<sup>7</sup> Golsoladz zha goc men ne bzo lo to pseed to Xtiidz Dios, ni dib zdoo to golnalo Dios zigne bnalo me Dios.

<sup>8</sup> Golguien ganle, gdziñd dze ne gdzëe Jesús, zigne goc me padzeela, scaque nac me niina, ni scaqueгаа gac me grëtaa len iz ne guiaadraa.

<sup>9</sup> Ib gliladzde to grë wseed ne ziaadnie stib miech sca, wseed ne ni nacdraa Xtiidz Jesús. Diosse nac men ne lozh gzodziits ne lo mine rliladz ne; nacda por tsienal to dien pe gow to, pegaa gowde to; sac zha ne zienal miñ co, paat yquiinda lo zho.

10 Grëse zha ne guiab tsienal mine rnabey ley parne ycaania Dios zho, tib ladle rsan zho mine been Jesús ga. Rriequia no tib lo pcoog, ni nese zrieelo yquiin gon ne ndziib lo co; laa grë pxoz ne zienal mine rnabey ley, grieelod yquiin zho gon co.

11 Glo, zeene ret ma ne riogon lo Dios, rlozhse rielaal pxoz nroob xchen ma zaatne Ndadoo parne guiooglo lo xtol menguedz, dzigo rienie zho xcuerp ma ro guiedz, ga rzëeg zhow.

12 Scaque Jesús, zeene bzhiiee xchen me psanmbe me miech lo dol; ro guiedz ga güeysacsi zho me gut me.

13 Scagaa ne niina, golgotsaa griee ne lo grë ncuaane lo guidzliu rii, golgotsaa cueeladz ne ne guional ne zhits Jesús dzian ne grë guielnë, telne no dzian new.

14 Benque ndion ne ganle, nacd lo guidzliu rii zaatne gbiaazpaa ne, sinque laa ne zional yгаа ne zaatne naraa gneedz Dios gbiaaz ne.

15 Laa ne ndionle ganle, Jesús nac men ne gunctsin ne lo Dios; gacxe waa, golgotsaa gleynie ne Dios, golgotsaa gdeed ne xquizh lo me. Lëe min co gac zig tib gon ne gdeed ne lo me.

16 Goltsoxco golgun grë ncuaane yquiin lo samiech to, ncuaane rgaa lo to, goldeed palala lo grë zha ne guiend pe yquiin; sac rriequia lëe stib gon ga gdeed to lo Dios, ni mincogaa rleynie me.

17 Golgon xtiidz zha ne zo lo to noseed to Xtiidz Dios, golguien zha rnabey lo to, sac gon zha quianap to ni zha gdeed cuent lo Dios zha pquianap zho to. None gon to xtiidz zho, zeena ine gley zho yquiaanap zho to; sac gon, telne lel nogoguielnë to zho, lëda ga gun to.

18 Golnab lo Dios gacnien me no tibaque znu dzioxco no dziuun no mine racladz me, me nan ganle mbe zdoo no, mbe xquielrien no.

19 Ni mine rsopaa naa diidz lo to, golsoladz golnab lo Dios gneedz me

diidz gbiire guialniob naa i, guialgan naa to.

20 Jesús nac men ne quianappaa ne, zig rquianap baxtor xpëcwxiiil zho; me gut bzhiiee xchen me zeene psan Dios diidz stib zha gdziñ miech lo me; ni diidz cosi gdzindraa dze ne gdzëew.

Dios men ne bleeban Jesús, men ne racnien miech peet zhgab rtsebd zho,

21 me gneedz guielbiini lo to grieelo to gun to mine rnabey me. Jesús sca golnalo, zeena grieelo gban to zigne rdziladz Dios. Dios nac men ne rieguial dziuunnon ne, zigtaa niinaw, zigtagaa grëraa len izdoo ne guiaada. Scaw nagon.

22 Bets, bzian, laa naa rnab lo to ib glëed guic to, golcaania palalse diidz ne pso naa lo to nu.

23 Racladz naa gacnan to ganle, laa bets ne Timoté briele ladzguiib; telne zlansonioob me lo naa nu, grop no me guiaad lo to i.

24 Golsiguiel goldeed tib zhibdiuzh naa lo grë zha ne zo lo to i, ni lo grëragaa zha ne nacgrë to ngab to lo Dios. Ye grë zha ne no nëz Italia nu, laa zho rxeel zhibdiuzh zho lo to.

25 Guiaannie Dios to sca. Me glu ganle pa lotaa noxco me to.

## GUITS NE PQUIAA SANTIAGW

¡Diuzh to grëse to!

<sup>1</sup> Naa nac Santiagw, tib zha ne quiaayun xtsiin Dios, tib zha ne quiaayun xtsiin Jesús, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

<sup>2</sup> Bets, bzian, ndal ncuaane rded ne parne glu dien pe nli dib zdoo ne rnalo ne Dios. Tel pe nactaa ncuaane noded to i, ib gacmbande to, sinque golley.

<sup>3</sup> Sac gon, zeene squi ran ne grë pe guielnë, ga rseed ne tibliladz rac ne tel petaa noded ne.

<sup>4</sup> Golseed sca tibliladz golgac. ¡ib guiaand zdoo to tel petaa nac guielnë ne gan to! Sac zeene sca cseed to gan to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdziebd.

<sup>5</sup> Zha ne racladz yгаа guielbiini co, zac gnab zhow lo Dios, ni mesi gon zeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacte pe gnab ne lo me.

<sup>6-8</sup> Lëëraasi dib zdoo ne none gnab new, nodne gacchop guic ne; sac zha ne racchop guic, gdziind dze yгаа zho mine rnab zho. Nac zho, tib dze dib zdoo zho rililadz zho zгаа zho mine rnab zho, stibгаа dze na rililadzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

<sup>9</sup> No zha bets ne, zha bzian ne, quianied zho ncuaane yquiin zho, par miech peet nond zho; per none gon ine gley zho sac nroob non zho lo Dios.

<sup>10-11</sup> Scagaa zha ne rapchen, none ine gley zho niina ne biaanwin zho, sac nëz lo Dios grë ncuaane rap zho nonda. None guien zho niicle ne nroob rapchen zho, zeene laa zho

gbi lo guidzliu rii nuque guiaan grë ncuaane rap zho. Masaque nacse zho zig nac guieen grë guizh ye, tel guiee cow, zhixtsëese ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

<sup>12</sup> Dichos zha ne ib rrozite lo Dios niicle no nzian ncuaane rcheep zho gunctal zho xtol zho, per rund zhow; sac zha cosi zгаа zho tib guielmban ne gdziind dze lozh, guielmban ne bneele Dios gdeed me lo grëse zha ne rleynie me.

<sup>13</sup> Zeene sca no ncuaane rcheep ne gunctal ne xtol ne, guiabd ne togo Dios noquiil ne gon new; sac gon led yed Dios rzoobladz ncuaane ndzinlid, ni niicle rquiildгаа me miech gon zhow.

<sup>14-15</sup> Grë ncuaane ndzinlid ne rzoobladz ne, grë ncuaan yozh ne rionie guic ne, min co nac mine rquiil ne. Lëëw nac mine rcheep ne runctal ne xtol ne, ni ndionle ne ganle, lëë gdib mine gdeed dol lo miech nac guielnedox ne yгаа zho.

<sup>16</sup> Bets, bzian, gac-wete to sca.

<sup>17</sup> Golguien ganle, ncuaane rquiin, ncuaane ndzinli, min co nac mine rneedz Dios. Tibaque nac me, led yed me rdzëë par guiab ne meque rnabey rac guielntseeb. Me nac tib biini ne gdziind dze guiuu, ni tib lë guielcow guien zaatne no me.

<sup>18</sup> Zdoo me gola bneedz me tib guielmban ndzon lo ne niina ne laa bliladz Xtiidz me, masaque rriequia ne nac mëëdglo lo me.

### *Nacda yquiaadiagse miech Xtiidz Dios*

<sup>19</sup> Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gund ne ne rnadse pew laa ne glëële.

<sup>20</sup> Sac gon, zeene rlëë ne, grielod gon ne ncuaane rdziladz Dios.

<sup>21</sup> Golguien sca, golsaan grëtaa ncuaane ndzinlid ne ziyun to, golbiche lo grë guielntseeb ne znutaa



quiyac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

<sup>22</sup> Per guiabde to togo loxaque yquiaadiagse to Xtiidz Dios lëew ga; sinque ib none gban to mine rquiaadiag to, sac tel ib gbande tow lëew que to noquidie to ga.

<sup>23</sup> Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan:

<sup>24</sup> Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne.

<sup>25</sup> Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zunlay Dios zho lo grëtaa ncuaane gun zho.

<sup>26</sup> Gacxe waa, zha ne rnee xnëz Dios no zho ni rgobeyd zho pe rnee zho, lëew que zha noquidie zho ga, ga rlu nlid zienal zho mine rnabey Dios.

<sup>27</sup> Sac gon, par Dios men ne nac Pxoze ne, zha ne no xnëz me none tsie zho tsiegun zho xyudar grë mëedbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuaane ndzinlid ne run grëraa miech.

## 2

### *Lëda ga run zha ne rbe*

<sup>1</sup> Bets, bzian, gunde to ne ncuese lo miech ne gnee to, sac zha ne sca run, zha dien guiab zho xnëz Jesús no zho.

<sup>2-3</sup> Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëelëd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: "Ise bzo, telne racladzga luu sob luu, lo liuse i bzob."

<sup>4</sup> ¿Pe sca na rac zha ne no xnëz Jesús? Zha ne gon sca run, ga rlu zho niapse guielntseeb no guic zho.

<sup>5</sup> Lëda ga gon bets, lëda ga gon bzian. Golgacnan ganle, ible Dios ble

miech ne peet rapd lo guidzliu rii, zeena dib zdoo zho gnalo zho me, zeena yгаа zho zaatne bneele me gdeed me cuëz zha ne noxco rleyne me. Gotsaa gwi ne sca ganle, zha ricw nac zho nëz lo Dios;

<sup>6</sup> laa to gon, no to rlozhd gzhidznie to zho. ¿Pe ib riende to, grë zha ricw co nac zha ne rsacsi to? Rgobniu zho to, riego zho to lo wxtis;

<sup>7</sup> haxta rdzibdee zho Jesús, men ndzon ne nacie to niina.

<sup>8</sup> Ib none gban ne zigne rnabey Xley Dios, lo xley me zhobnee: "Bleynie samiech luu, zigne rleyne luu luu."

<sup>9</sup> Golguien gon, dol i noyun to squi rbe to dien cho nac zha ricw, chogaa nac zha mban; sac Xley Dios i quiaquiits to.

<sup>10</sup> Golgacnan ganle, zha ne rguiits tibaque xley Dios, niicle maase zienal zho grëraaw, laa zho beenctal-le xtol zho ga, rzacaque zho zig zha ne noguiits grëw.

<sup>11</sup> Sac tibaque men ne psana grësew. Gacxe waa, tel zha ne zienal mine rnee: "Gute luu samiech luu", per rguiits zho mine rnee: "Yquiangobd luu zha ne led tsieeld luu", laa zho beenctal-le xtol zho ga.

<sup>12</sup> Niowse sca golgac, niicle zeene gneegaa tow, niowse golnee; sac gon, dzin dze cxobdol ne dien pe wban ne zigne rnabey Jesús, te wband new ye.

<sup>13</sup> Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guielnëdox ne cxeel me.

### *Zha ne rnaló Dios none glu zhow*

<sup>14</sup> Bets, bzian, ¿pa dien rquiin guiab ne dib zdoo ne rnaló ne Dios, xnëz me no ne, ni tel rund ne xyudar samiech ne? ¿Niace scase laa Dios csilaale ne?

<sup>15</sup> Gzoob ne no zha ne nacgrë to i, yase tib bets tow, tib bziangaa tow, ranlo to guien xab zho, niicle quianied zho ncuaane gow zho;

<sup>16</sup> ni guiab to lo zho: "Csacsid luu luu, got xabnal luu, dow ncuaane

racladz luu”, per loxaque diidz sca guiab to, ni gdeete to ncuaane run falt lo zho. ¿Pa dien yquuin diidz co?

<sup>17</sup> Scadaa nagon paat rquiinda guiab ne rnalo ne Dios, ni tel rund ne mine rieguial ne gun ne.

<sup>18</sup> Gacxe waa, zha ne rnalo Dios ni run zho mine rieguial zho, no zho gnē lēda i run zha ne rnee lēlew ga totsaque gnalo ne Dios. Ni rap zho rson, sac grielod glu ne rnalo ne me, telne rund ne mine rieguial ne.

<sup>19</sup> Nli wena run zha ne rliladz tibaque Dios no, per grielod guiab zho lēlew ga, sac gon zig nac mendox ye ma rliladz tibaque Dios no, per led por mincod laa ma lo guielnē ne cxeel me, sinque haxta rdzieb ma me.

<sup>20</sup> Nadzpa n xen zha ne sca rzac, pe ni lalnu rien d zho paat rquiinda guiab zho rliladz zho Dios ni telne rund zho mine rieguial zho.

<sup>21</sup> Golgan ganle, zig nac pxozgol ne Abraham, porne been me mine rieguial me gane pcaania Dios me zig tib zha ne peet xtol. Led rsoladz to ganle, zeene rēb Dios lo me tsielogon me xpēed me, güey me zaatne pxeel Dios me.

<sup>22</sup> Gotsaa gwi ne ganle, zeene been Abraham mine bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios.

<sup>23</sup> Lo Xtuidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtold; zēeb diidz, tib zha ndzieeldiidz Dios goc me.

<sup>24</sup> Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli rliladz zho me, gun zho mine rnabey me zho.

<sup>25</sup> Golsoladz ganle, scaque wnaa ro nēz ne brieelē Rahab, por been me xyudar samiech me, gane pcaania Dios me zig tib zha ne peet xtold; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nēz ne wbire zho, bgaad zho.

<sup>26</sup> Gase na ganle rlu, paat rquiinda guiab ne rliladz ne Dios ni tel rund ne

mine rieguial ne, nacse ne dzigo zig tib xcuerp ngutoo, tel cuerp cow, ¿pa dien yquuina?

### 3

#### *Ncuaane run ludz miech*

<sup>1</sup> Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaane tsasqui lo zho gal dze ne laa zho gacredz lo Dios.

<sup>2</sup> Grēse ne nzian mod ne rxin ne lo samiech ne. Tel niaca mine no tib zha ne grielo ycuēez ludz pa lotaa gnee zho, zha cosi cxind zho, haxta xcuerp zho zrieelo zho gnabey zhow.

<sup>3</sup> Gotsaa gwi ne ganle zig nac guay, con tib lē win guiib ne rgo miech ro ma rrieelo rnabey zho ma, rienie zho ma nēz ne racladztaa zho.

<sup>4</sup> Scaque barcw, niicle ne nrooba, no hor rrie medox lo nis rcheepa, per con tib lē yag lag win ne rsēē miecha, rrieelo rienie zhow nēz ne racladztaa zho.

<sup>5</sup> Scapaa nagon nac ludz ne; niicle ne winsew, per nroob guielqui ne runa. ¡Ran to ganle tib bzhil yeense name rzobgui dan!

<sup>6</sup> Ni tel ludz ne gon, rrieequia tib bel ga naca. Tib lē win xcuerp ne naca, per guielqui nroob ne runa, runctala xtol miech. Gun ne cuent tib lē gui ne brieē gabil naca; ni dipse lo xquielmban miech noxtseeb zho low.

<sup>7</sup> Golwi ganle, rrieelo miech runndoo zho grē ma ne rsiibe, grē ma ne rzēlen liu, haxta grē ma ntseeb, haxta grē ma ne no nisdoo, rnabey zho ma.

<sup>8</sup> Per guiend zha ne gon grielo gnabey ludz; ncuaane ntseeb naca, choot grielod gnabeya; masaque laaw no par gnitlow miech, zigne run grē guizh ncuaan.

<sup>9</sup> Lēew name rquiin ne roolnie ne Dios men ne nac Pxoz ne, ni rlozh ga lēewew rdzibdee ne samiech ne, ni lalnu rien d ne me bzaa zho, biaan zho zigne rlu me.

<sup>10</sup> ¿Pe ga nadien, ro ne roolnie ne Dios, ni roque ne rgodee ne samiech ne?

<sup>11</sup> Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed?

<sup>12</sup> Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd min co.

### *Zha ne nixbiini*

<sup>13</sup> Lo grë zha ne nacgrë to i, tel no zha ne rzac zha nixbiini nac zho, none glu zhow ine zaacse gbannie zho samiech zho, gac zho tib miech ndooladz zig none gac tib zha nixbiini.

<sup>14</sup> Per tel tibaque në rac zdoo zho ran zho zha ne stib noded, tibaque noguib zho csañwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csannziuu zho zho.

<sup>15</sup> Led scad nac guielbiini ne rdeed Dios, sinque lëë zhiwseed mendox ga, lëë min co zienal grëraa miech guidzliu.

<sup>16</sup> Zeene sca në rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guielntseeb rzobni zho ga.

<sup>17</sup> Zha ne nli rap guielbiini ne rdeed Dios, rund zho min co, laa zho zienal: ndzinlise gban zho, rleynied zho dil, rguib zho zaacse rnee zho lo miech, wen rac zho lo grëse miech, rquia zdoo zho samiech zho, rund zho cue zho zha ne mazdraa gacnie zho, ncuaane run zho dib zdoo zho run zhow, niapse ncuaane ndzinli rioxco zho.

<sup>18</sup> Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdziñ dze ne ran zho zeene laa grë miech co rac tib miech wen.

## 4

### *Zha ne rleynie guielntseeb*

<sup>1</sup> Ne squi tibaque rlëëlsa to, tibaque quiadil to, lëë min qui gon riegat por grë guielntseeb ne rio guic to.

<sup>2</sup> Rio to riogui to ncuaane grieelod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuaane quianiede to, zeene ran to rrieeled yquianie tow laa to rlëënie zho, haxta rdilnie to zho. Rrieeled yquianie to ncuaane racladz to, sacne rnabde tow lo Dios.

<sup>3</sup> Niicle tel rnabгаа tow lo me, rneedzd mew, sacne laa guic to zienie yquianie tow loxaque par gdeedguxt zdoo to, gdeedguxt xcuerp to.

<sup>4</sup> ¿Que tal ntseeb to! ¿Pe ib riende to, Dios gon rlëënie to zeene squi rio to rleynie to grë guielntseeb? Sac miech ne squitaa rleynie guielntseeb, lo Dios ga racntseeb zho.

<sup>5</sup> Golgan ganle, zha rnee lo Xtiidz Dios: “Espíritu Sant, men ne pxeel Dios nacie ne, rleynie me ne, ni racladz me zhaa ncuaane gleyne ne laa ne gleyne ne me.”

<sup>6</sup> Ni tel Dios gon, noxco me ne, ib zacnie me ne griee ne lo guielntseeb; sca rnee lo Xtiidz me, zaatne rnee: “Zacnieñ Dios grë zha ndooladz, sangue grë zha niats, rdziguiend me zho.”

<sup>7</sup> Golguien sca, ine ndooladz golgac, golgon mine rnabey Dios. Gdeetrea to diidz yquiil mendox to, sca golgun zeena zhal ma gbiche ma lo to.

<sup>8</sup> Dib zdoo to golseëb xnëz Dios, zeena scagaa me zacnie me to. Goltsoxco guiaanmbe to lo grëtaa xtol to, golnab lo me csañmbe me zdoo to, mese gnalo to, gacchopdraa guic to.

<sup>9</sup> ¿Golguien ganle, ndzinlid i squi mban to! ¿Mban golgac, goltso guielnë, golgoon, laa ne tso to gzhidz to, laa ne tso to gley to!

<sup>10</sup> ¿Ndoooladz golgac lo Dios, zeena cuee me to lo grë ncuaane nac to, csanglaa me to!

<sup>11</sup> Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguiits zho. Laa ne so zho gacladz zho zha gun guielwxtis,

mazd tsoxco zho gban zho zigne rnabey ley.

<sup>12</sup> Golguien ganle, Dios psan ley, ni mese rieguial gun guielwxtis, me nan zho cuibdol, chogaa csilaa me; per to nadien, ¿cho nac to par gdziibdol to samiech to?

<sup>13</sup> Togaa ne nac to zha ne rnee: “Na gzhe widz dien pa tib guiedz ne guioo ne, guiobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag mine gne naa lo to ganle.

<sup>14</sup> Ne sca rnee to, ipe wen wen nan to dien yo to gzhe widz co! ¿Pe rande to lega nacse xquielmban ne zigne nac xcow las ne rbe ral sil? Zhisaque rbew, zeene rlozh ga rludraa dien yow.

<sup>15</sup> Mazd golguiab: “Telne zneedz Dios diidz gbanraa ne, min rii, min rii dziuun ne.”

<sup>16</sup> Led tsode tibaque guielniats qui zienie guic to, golguien guielntseeb ga run zha ne rac niats.

<sup>17</sup> Ni golsoladza ganle: Grëse zha ne nanpaa pe nac ncuaane ndzinli ne no gun zho ni rund zhow, xtol zho ga runctal zho.

## 5

### *Zha ricw ne zienal guielntseeb*

<sup>1</sup> ¿Grë zha ne rapchen, zha ne zienal loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnë ne gan to.

<sup>2</sup> Grë ncuaane beenlo to i, peet nonda, lega naca zig nac grë ncuaane biodzle; grë xab to i, rrieequia ncuaane dowle mxila.

<sup>3</sup> Grë guiib or, grë guiib plat ne squitaa quianie to, rrieequia noloozhle bioochena; ni scadaa gon nitlo to, masaque gac to zig tib ncuaane riab lo gui.

Laa to beenlo grëtaa dimi qui, rzac to lëew yquiin to len dze ne ziaad, ni nande to gon laa dze ne nitlo to ziaadyoble.

<sup>4</sup> Lëe grë dimi qui gon zëeb to lo grë zha ne quia xtsiin to, noquidie to zho

rguizhde to xtse zho. Per golgacnana ganle, grëse redz ne rquiaa zho zeene mban rac zho squi rsacsi to zho, laa Dios binlew.

<sup>5</sup> Lo grëtaa iz ne mban to lo guidzliu rii, loxaque grë ncuaane gdeed guxt zdoo to, grë ncuaane gdeed guxt xcuerp to noxco to, ncuaane yozh ne riaabtaa guic to laa to runa, ib riende to laa dze ne nitlo to ziaadgaxle. ¿Lëe to noyun xcuent ma ne nofo par guet ma!

<sup>6</sup> Pe zhistaa guielntseeb ne quiayun to, haxta zha ne peet xtold, zha ne nan glis nia lo miech, rquiaqui to zho ncuaane rund zho, rnabey to ret zho.

### *Nodne guieed zha ne rnalo Dios*

<sup>7</sup> Bets, bzian, sangue to gon tiblrique golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tiblrique rac zho gdipse len mëe guie, rquiambëz zho haxta rdzin dze ne rlaap zho.

<sup>8</sup> Tiblrique sca golgac. ¿Ib guiaand zdoo to, sac gon zhile gdzin dze ne laa men ndzon ne rnabey ne guiaad stib!

<sup>9</sup> Ib tsode to guieednie to grë zha ne nacgrë to, zeena gunctalde to xtol to; sac zhile gdzin dze ne laa men ne no gun guielwxtis guiaad.

<sup>10</sup> Golsoladz ganle, grë zha ne biadteed xtiidz Dios padzeela, niice nroob guielnë gon zho, per tiblrique goc zho.

<sup>11</sup> Zig nac Job, nanaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed Dios lo me. Ga rlu ganle, zha ne sca rdeed me diidz ran guielnë, led lega ran zhow; sac nquialadz me miech, rquia zdoo me zho. Dichos grë zha ne sca nac.

<sup>12</sup> Bets, bzian, zeene tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiab to: “Lëpaa gbaa qui”, “lëpaa guidzliu rii”, dien peragaa gzeet to. Tib diidz ne



nliw, golguiab: “Nliw”, tib diidz ne nliidgaaw, golguiab: “Nlida”, zeena gunctalde to xtol to; sac gon zha ne runctal xtol, ible zгаа zho guielnē ne csiaab Dios.

<sup>13</sup> Lo grē to, zha ne no pe tib lo guielnēw, gnab zho lo Dios gacniē me zho. Zha ne no pe tib guielbleya, goolnie zho me.

<sup>14</sup> Zha ne rzacnēgaaw, gnabey zho gacredz bla zha ne zo lo to, zha co quēēb nceit guic zho gnab zho lo Dios guiac zho.

<sup>15</sup> Telne dib zdoo zha co gnab zhow lo Dios, zunguiac Dios zha rzacnē co. Zlische me zho lo xquielguidz zho, ni tel por pe falt ne beēngaa zho lo me sca rzacnē zho, zun me zhow perdon.

<sup>16</sup> Gacxe waa, tib tib to zeēne run to pe tib falt, yqueetsde tow, golzodiidza lo zha ne nacgrē to, lozhse ga golinab lo Dios gun me to perdon, zeena guiaanmbe to lo me. Sac tib zha ne biaanwenle nēz lo Dios, zeēne sca pe rnab zho lo me run mew, niicle ncuaane mazdraa ngana.

<sup>17</sup> Golsoladz Lí ganle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz grol ni tib lab nis guie biabd;

<sup>18</sup> haxta bnabraa me lo Dios guiaba stib, dzigoraa biaba, laa guidzliu bire bdeed guielnzaac.

<sup>19</sup> Bets, bzian, tel cho tib zha ne nacgrē to i sozit lo Xtiidz Dios, ni grielo cho tib to ctsire zho nēz yozh ne zie zho ga;

<sup>20</sup> golgacnan ganle, ladzniale guielgut ga rsilaa zho zho, grēse xtol zha co zun Dios zhow perdon.

Santiagw

## GUITS NE GLO PQUIAA PEDR

Bets, bzian, jdiuzh to grëse to!

<sup>1</sup> Naa nac Pedr, tib zha ne rx-eel Jesús nonee Xtiidz Ndzon me lo miech. Laa naa rxel tib guits rii ziaad lo to grëse to ne nac to zha Israel, no to stib ladz ben: zig nac nëz Pont, nëz Galás, nëz Capadós, nëz Asia ni nëz Bitin.

<sup>2</sup> Dios men ne nac Pxoze, ible me bzooblo to mazd padzeela, sac nanle me laa to gac xpëed me. Bdzin dze, zeene laa me pxeel Espíritu Sant bleextso to laa to ngab xnëz me, zeena gban to zigne rnabey me, ni lozh csañmbe Jesús to; sac ible miñ co nacne bzhiee xchen me. Dios glu ganle pa lotaa noxco me to, zeena peet zhgab ctsebde to.

<sup>3</sup> Xquizh xquielnzaac Dios, Pxoze Jesús men ndzon ne rnabey ne, sac gon pquia zdoo me ne ptsëe me lo xquielmban ne, rrieequia gol ne stib. Xquizh me bleeban me Jesús, sac gon ga rlu ib zgaa ne guielnzaac nroob ne no diidz gneedz me lo ne,

<sup>4</sup> guielnzaac cosi ncuaane mbe naca, nacda ncuaane nitlo, nacda ncuaane gdzëelo, ni gbaa ga quianie mew.

<sup>5</sup> Ne squi dib zdoo to rnalo to me niina, gane quianap me to con grëtaa poder ne rap me, parne ygaa to guielnzaac co. Zeene laa dze co gdzin, zanlo to ganle zeene laa me ycaania to.

<sup>6</sup> Gacxe waa ine nley golgac. Nli zan to grë pe guielnë, per ncuaane tib rded ga.

<sup>7</sup> Ib none gan to grë guielnë, parne glu dien pe nli dib zdoo to rnalo to Dios. Zig nac guiib or, parne glu dien pe nli ora, none teda lo gui; scaquegaa to, none gan to guielnë parne glu to nli dib zdoo to rnalo to Dios; ni zig nac or, ncuaane rnitlo ga. Grëse zha ne tibaque gnalo me, niicle mazdraa guielnë ne gan zho, gal dze

ne guiaad Jesús stib, ine zunnon Jesús zho, sanglaa me zho, zley me gan me zho, sac blu zho nli dib zdoo zho rnalo zho me.

<sup>8</sup> Me i squitaa rleyne to, me i squitaa rnalo to, niicle ne gonde to me, niicle ne ranle to me. Tib guielbley nrooba lo to, tib guielbley ndzona, nacda ncuaane grieelo gnee to zha naca;

<sup>9</sup> sac gon, ne squi dib zdoo to rnalo to me, ib scaania me to.

<sup>10</sup> Grë zha ne biadteed Xtiidz Dios lo miech padzeela, bzeet zho laa Dios glu ganle pa lotaa noxco me ne, laa me csilaa ne lo dol; per ib biend zho dien zhapaa gun me.

<sup>11</sup> Zeene bdeed zhiEspíritu Jesús guielbiini lo zho bzeet zho ne ib laa Dios cxeel me, pe nac guielnë ne ted me, ni pe nac guielndzon ne guiaadnie me; gocladz zho niacnan zho dien cho nac men co, pa hor gac miñ co.

<sup>12</sup> Nacne blu Dios lo zho gocnan zho nacda ncuaane gac len dze co, sinque haxta nele ygaa dziana. Sangue niina, nanwen to ganle laa grë miñ co gocle, lëe diidz cub co i gocnan to niina, gbaa biet Espíritu Sant bdeed me guielbiini lo zha ne biadneew lo to. jNcuaane ndzona, haxta grë anjl racladz tebaa zha gacnanraa zho dien zha naca!

### *None gban ne zigne racladz Dios*

<sup>13</sup> Golquix biini xquielrien to sca. Tiblique golgun guic to ne laa to ygaa grëtaa mine ral zdoo Dios gneedz me lo to, zeene laa Jesús guiaad stib.

<sup>14</sup> Zig grë mëed ne ron xtiidz pxoz, sca nguzobdiidz golgac lo Dios; gundraa to grë ncuaan ndzinlid ne been to zeene gard gunbey to me ga.

<sup>15</sup> Goltsoxco golban zigne racladz me, zeena ine mbe guiaan to lo dol; sac gon tel me, men mbe nac me, nacd me men ne rdziguien dol.

<sup>16</sup> Zigne zhobneeque lo Xtiidz me, zaatne rnee: "None guiaanmbe to lo dol, sac gon men mbe nac naa."

<sup>17</sup> Pxoze to nac me, me rnalo to, nanle to zeene laa me gun guielwxtis, led yed me cue; mine been tib tib

miech, zunqu<sub>1</sub>zh me zhow. Golgu<sub>1</sub>en sca, golgon xtiidz me gzataa dze ne gbanse to lo guidzliu ri<sub>1</sub>.

<sup>18</sup> Gol<sub>1</sub>soladz me blee to lo gr<sub>1</sub>e wseed ndzinli<sub>1</sub>d ne psan<sub>1</sub> gr<sub>1</sub>e xmengol to; nanwen to gozh brie<sub>1</sub>e to ga; per pqui<sub>1</sub>ind me ncuaane rnitlo zig nac pe dimi or; pe dimi plat;

<sup>19</sup> sinque laa me pqui<sub>1</sub>in xchen ndzon Jesus<sub>1</sub>. Ren ne bzhiee goc zig tib gon, zigne rgogon miech carner yeen ne mazdraa niow, carner yeen ne mazdraa ndaan parne guiaanwen zho lo Dios.

<sup>20</sup> Padzeelale, haxta zeene gard cue guidzliu bzo Dios me gac me gon co, ni nligaa zeene laa dze co bdzi<sub>1</sub>n laa me biaad, biaadsanwen me to lo Dios; laa Dios been<sub>1</sub> mi<sub>1</sub>n co sacne rleynie me to.

<sup>21</sup> Gacxe waa, zrieelo dib zdoo to gnalo to Dios, mese none gliladz to. Me nac men<sub>1</sub> ne bleeban Jesus<sub>1</sub>, blu me ne men<sub>1</sub> non nac Jesus<sub>1</sub>.

<sup>22</sup> Ni niina ne laa to mban zigne nac XTiidz Dios, mi<sub>1</sub>ne nac diidzli, laa zdoo to biaanmbele lo dol; nasi zrieelo gleynie to zha ne nacgr<sub>1</sub>e to. Dib zdoo to sca gol<sub>1</sub>leynie zho,

<sup>23</sup> gol<sub>1</sub>guien gan<sub>1</sub>le, tib guie<sub>1</sub>mban cube rap to niina, rrie<sub>1</sub>equia gol to stib; per nacdraaw zigne gol to glo, sinque lee<sub>1</sub> guie<sub>1</sub>mban qui bгаа to zeene bliladz to Xtiidz Dios, diidz ne rneedz guie<sub>1</sub>mban, diidz ne gdzi<sub>1</sub>nd dze nitlo.

<sup>24</sup> Zigne zhobneeque low, zaatne rnee:

Gr<sub>1</sub>ese ne nac ne miech, zdzi<sub>1</sub>n dze ne lozh ne,  
lega nacse ne zig nac gr<sub>1</sub>e guizhye,  
gr<sub>1</sub>e xquie<sub>1</sub>ndaan ne, lega nacsew zig nac guie<sub>1</sub>en guizh co.

Sac tel<sub>1</sub> guizhyew, zeene laaw rbidz,  
laa guie<sub>1</sub>na rliaa<sub>1</sub>aque;

<sup>25</sup> sangue Xtiidz Dios, gdzi<sub>1</sub>nd dze ne nitlow.

Ni lee<sub>1</sub> diidz co ga gon biadseed zho to, lee<sub>1</sub>w rlu zha laa miech lo gr<sub>1</sub>e xtol zho.

## 2

<sup>1</sup> Nana sca:  
gundraa to gr<sub>1</sub>e guie<sub>1</sub>ntseeb,

yquidiedraa to samiech to,  
gundraa to ne laglaase glu to guie<sub>1</sub>wen,  
gacned zdoo to gan<sub>1</sub> to cho zha stib noded,

gzhixcuaadraa to diidzguizh.

<sup>2</sup> Sinque Xtiidz Dios gol<sub>1</sub>tsoxco, zeena lozh tsotibli guic to dziits so to low. Zig rzac medyee<sub>1</sub>n ne wri<sub>1</sub>n ral, nidz-paa rdziladz win guie win; scadaa gol<sub>1</sub>sac Xtiidz me, zeena ygaade to gr<sub>1</sub>e guie<sub>1</sub>nedox ne csiaab me.

<sup>3</sup> Laa to gon<sub>1</sub>le gan<sub>1</sub>le zha wentaa zdoo me, Xtiidz me sca gol<sub>1</sub>tsoxco.

### *Jesus<sub>1</sub> nac zig tib quie mban*

<sup>4</sup> Gol<sub>1</sub>big lo Jesus<sub>1</sub>, gol<sub>1</sub>gan gan<sub>1</sub>le lee<sub>1</sub> me nac zig tib quie ne rio squin yu, per tib quie mban. Ib bleynied miech me, san<sub>1</sub>gue Dios, men<sub>1</sub> non, men<sub>1</sub> nziuu nac me lo me.

<sup>5</sup> Gol<sub>1</sub>big lo me sca, zeena ye to gac quie mban ne tsaa xyadoo me. To gac gr<sub>1</sub>e pxoz ne nlipaa mbe zdoo, gun<sub>1</sub> to dziin len<sub>1</sub> yadoo co; gol<sub>1</sub>ban zigne rdziladz Dios, zeena guie<sub>1</sub>mban co gac zig tib gon ne gdeed to lo me, ne nac to zha ne ngab lo Jesus<sub>1</sub>.

<sup>6</sup> Zigne zhobneeque lo Xtiidz Dios, zaatne znu rnee:

Men<sub>1</sub> ne bzo naa cxel<sub>1</sub> naa Jerusalen<sub>1</sub>,  
me gac zig tib quie nroob ne gnaaz dziits xyadoo naa,  
ni lee<sub>1</sub> yadoo co nac gr<sub>1</sub>e zha ne ngab lo naa.

Men<sub>1</sub> non nac me, ni gr<sub>1</sub>ese zha ne gnalo me, ible csaand naa zho.

<sup>7</sup> Ne nligaa tib men<sub>1</sub> non nac me lo ne, san<sub>1</sub>gue gr<sub>1</sub>e zha ne rliladzd me cholze miech rzoob zho me; zigne zhobneeque lo Xtiidz Dios, zaatne rnee:

Quie ne sca bron<sub>1</sub> zho tib lad zeene quiazaa zho yu,

laaw bron<sub>1</sub> zho sac rzac zho paat rquiinda,

ni niina lee<sub>1</sub>epaaw nac quie ne nlibdziits xcox yu.

<sup>8</sup> Ni ziaad stib zaatne znu rnee:  
Quie co griel<sub>1</sub> ni miech, quie co gron<sub>1</sub> zho.

Gr<sub>1</sub>ese zha ne ned gliladz Xtiidz me zaatne rnee cho nac me, scapaa sac zho me, ni ib zhobnee<sub>1</sub>le ne mi<sub>1</sub>n co ygaa zho.

<sup>9</sup> Sangue to, lo Diosle ngab to, me ble to, zigne rnee lo Xtiidz me: tole nac zhipxoz me, tole nac zha non ne quiayun xtsiin me; miech ne mbele lo dol nac to lo me, mele rnabey to sac me bredz to laa to brieer lo guiel<sub>cow</sub> bzëeb to lo xbiini ndzon me; zeena gnee to lo miech ganle zha nactaa grë ncuaane run me.

<sup>10</sup> Glo peet nonde to, sangue niina non to sac gon lo me ngab to; glo nande to pa lotaa rquia zdoo me to, sangue niina rley to ran to ganle squitaa rquia zdoo me to.

### *Tibaque golgun mine racladz Dios*

<sup>11</sup> Bets, bzian, rleynie naa to. Ndion ne ganle, nase xquielmban ne lo guidzliu rii zig zha ne tibrded stib ladz ben; gane rso naa diidz lo to, ib gzoobladzde to gun to grë ncuaane ndzinlid ne racladz xcuerp to; sac min co rsacsi xalm miech.

<sup>12</sup> Golguien zaacse golgac lo grëraa zha ne gard gunbey Dios; niicle ne gneenë zho to niina, sac zho to zig cho grë zha ntseeb, per zeene gan zho ne ndzinli nac grë ncuaane run to, haxta zleynie zho Dios gal dze ne laa Jesús guiaadgun guielwxtis.

<sup>13</sup> Golgon xtiidz grëse men ne nac wxtis lo guidzliu rii, sac sca rdziladz Dios: zigtaa presidenta, ne nac me zha nonraa,

<sup>14</sup> zigtagaa grë zha ne nacie me dziina, sac zha run guielwxtis, rdeed zho caxtigw ne riegual grë zha ntseeb, ni scagaa runnon zho grë miech ne run ncuaane rquiin.

<sup>15</sup> Ible laa Dios racladz zaacse gac to, zeena grë zha nxen, grë zha yozh ne rienp pe rnee, haxta ni ro zho tsod pe gneenë zho to.

<sup>16</sup> Gollu ne peet lo ngadoodraa to, per guiabde to ne peet lo ngadoodraa to laa to gun grë ncuaane ndzinlid ne gacladztaa to. Led scada gon, mine racladz Dios min co golgun, gollu mele rnabey to niina.

<sup>17</sup> Zaacse golgac lo grë samiech to, golguien cho lo zo to. Golleynie grë zha ne nacgrë to, ndooladz golgac lo Dios, golguien ne men ro nac me; ni

scagaa golgon xtiidz grë zha ne nac wxtis nroob.

<sup>18</sup> Bets, bzian, to ne nac to zha ne quia xtsiin ben, golgon mine rnabey men ne rree to; tel zhataa nac zho, zigtaa men wena, zigtagaa men ne ntseeba.

<sup>19</sup> jNley golgac, goldeed xquizh lo Dios, tel porne noyun to mine rnabey me, laa zho rsacsi to!

<sup>20</sup> Sac gon, telne nosacsi zho to por xquielntseeb to, niicle paraa cxcw to paat yquiinda; sangue tel rxcw to nosacsi miech to porne noyun to ncuaane rdziladz Dios, dzigosi zleynie me to.

<sup>21</sup> Golgacnan ganle, ible none ted to min co ne nac to zha ne ngab lo Dios; sac gon, niicxe Jesús, blactaa guielnë ne bded me bdiizh me xtol ne. Glo me sca bded, nana negaa ible none sca dieed ne.

<sup>22</sup> Tel me ni tib dol beend me, ni tib miech pquidied me.

<sup>23</sup> Niicle zeene blooredz zho lo me, ible ptsired me lo diidz co; niicle zeene quiasacsile zho me, ib gocntseebd me lo zho; sinque grësew psan me ladznia Dios, men co gun guielwxtis zigne no gaca.

<sup>24</sup> Masaque Jesús bgaadz grëse xtol ne, blactaa psacsi zho me pquia me lo cruz bdiizh mew; laa me been min co, zeena grieelo grieer ne ladznia dol, gban ne zigne rdziladz Dios. Ne scataa psacsi zho xcuerp me, ga bi me grëse xquielnë ne.

<sup>25</sup> Glo lega nac to zig nac grë mëcwxiiil ne zonziaab, sangue niina mele quianap to. Me nac tib baxtor ne rleyniepaa to.

## 3

### *Zha gban zha ne ptsieelniale*

<sup>1-2</sup> Bzian, to ne nac to men wnaa ne ptsieelniale, golgon xtiidz tsiel to. Niicle tel néd zho gliladz zho Xtiidz Dios, per zeene gan zho ne nligaa ndooladz nac to, ine ndzinli rac to, haxta zhal zho laa zho yquiabladz gliladz zhow. Yquiindraa ne goon chopaa yquia gnew lo zho.



<sup>3</sup> Golguien sca, tsođe to ne goon dien pa xixcuaaraa to par gluniow to lo miech; dieen pa xixcuaaraa guitsguic to, dieen pe bguiaa or ne yquia diag to, dieen pe grē guib or tso yan to, tso nia to, dieen pe lar niazh ne gacwraa to. Tsienalde to grē guielniow co, sac gon ncuuan laglaase ga;

<sup>4</sup> sinque none xixcuaa zdoo to, gac to tib zha tibliladz, tib zha ne ndooladz. Lëe guielniow co nac mine niowraa nēz lo Dios, ni min co gdziñdze nitlo.

<sup>5</sup> Lëe guielniow co bioxco grē men wnaa ne biaadban padzeela, zha ne brie lo dol wban zho zigne racladz Dios; tel zha, dib zdoo zho bnalo zho Dios, ni bin zho xtiidz tsiel zho.

<sup>6</sup> Zig nac Sar, sca goc me, bin me xtiidz tsiel me Abraham, haxta rēb me masaque Abraham nac men ne rnabey me. Ni scagaa to, telne tsoxco to xixcuaa to, zac to zig goc Sar, dzigosi laa to gac zig xpēēd me; haxta ni tsoxtseebde to pe glisqui tsiel to lo to.

<sup>7</sup> Scaquegaa to bets, ne nac to zha ne ptsieelniale, goltsoxco tsoquic to zha nac tsiel to. Golgan me zigne nonguiela gan to me, golguien ganle nda men wnaa; ni lala, non me lo Dios, sac gon ye me yгаа guielmban ne psan Dios diidz gneedz me lo to. Sca golban, zeena scagaa zeene gnab to lo Dios, squiaadiag me xtiidz to.

<sup>8</sup> Nana sca, tipse golgac grē to. Ine niowse golleynie zha ne nacgrē to, miech wen, miech ndooladz golgac.

<sup>9</sup> Zha ne gacntseeb lo to, gunde to ne yeque to gacntseeb lo zho; zha ne coredzgaa lo to, gunde to ne yeque to coredz lo zho; sinque mazd golnab lo Dios gunlay me zho, zeena scagaa to, zunlay me to; sac gon, ible min co bredz me to.

<sup>10</sup> Zigne zhobneeque lo Xtiidz me, zaatne rnee:

Zha ne racladz ine gley zho ne laa zho mban, wen ted zho len ngbidz ne gban zho,

none tsoxco zho ycuēēz zho ro zho, gneenēdraa zho, yquidiedraa zho;

<sup>11</sup> none csaan zho grētaa guielntseeb, niapse ncuuan wen tsoxco zho gun zho,

yguib zho cuewen miech, niicle zhagaa wen gac zho lo grēse miech.

<sup>12</sup> Sac grē zha ne sca wen rac nēz lo Dios, tibaque quianap me zho, ni rquiaadiag me xtiidz zho tel pe rnab zho lo me;

sangue grē zha ntseeb, ni lalnu rdziguiend me ncuane run zho.

*Dichos zha ne mban rded lo samiech*

<sup>13</sup> Golguien sca, ncuane yquien golgun; scagaa tsod pe nacne ctsidil miech to.

<sup>14</sup> Laa telne ncuane yquiinaquegaa noyun to, ni laa miech rtsidil to, jdichos to ga! Ib gdziebde to grē miech guidzliu, niicle peraa gnē zho gun zho to.

<sup>15</sup> Tibliladz golgac, tibaque golgunnon Jesús men nroob ne rnabey ne, tibaque golconie Xtiidz Dios guic to, zeena nanle to pe guiab to lo zha ne gnabdiidz dien zha nacne rnalo to Jesús; ine niowse golgac, diidz ndooladz golnee lo zho.

<sup>16</sup> Zaacse sca golban, zeena grē zha ne rneenē to porne nac to zha ne no xnēz Jesús, dzin tib dze ne ctoladz zho, zeene guien zho lega bnexuu zho to.

<sup>17</sup> Wen zie zha ne ran guielnē, telne Dios rnabey gan zhow zeene noyun zho ncuuan wen; ledle gan zhow por xquielntseeb zho.

<sup>18</sup> Golgan ganle niicxe Jesús, zha nactaa grē guielnē ne gon me. Niicle ne ni tib dol beend me, per haxta beet miech me bdiizh me grēse xtol ne nac ne miech ntseeb, psanwen me ne lo Dios. Nli gut xcuerp me, per zhiespíritu me gutew;

<sup>19</sup> gane güeyted me zaatne niogyu zhiespíritu grē zha ne wban padzeela, güeynee me lo zho.

<sup>20</sup> Lëe grē zha co ib bzhiguield nililadz Xtiidz Dios, niicle ne dipse len dze ne nozaa Noé barcw nroob co pquiambēz Dios niac-wen zho.

Nanlaxe to ganle, xonaque nac zha ne bdedlaa lo nis co.

<sup>21</sup> (Lega rrieequia goc nis co zig nis ne rrobnis ne. Zeene rrobnis ne, ga rlu ne laa ne brieelē lадznia dol, ygaadraa ne guielnēdox ne tsieguial zha ngoopdol, sac gon por mincopaa gut Jesús ni brieeban me; ni guiabd ne togo nis co rсанmbe ne lo xtol ne, sinque ga rxobnen ne ne laa ne rnab lo Dios ctsēē me lo xquielmban ne.)

<sup>22</sup> Saᅅgue niina gbaa ga no Jesús, ga zob me cue Dios nēz derech, grēse anj non, grēse zha non ne no gbaa, rquitsgzhib zho lo me ni ruᅅ zho miᅅne rnabey me zho.

#### 4

<sup>1</sup> Golguien ganle, zha nactaa grē guielnē ne bded Jesús bdiizh me xtol ne; nana sca, scaque to gdziebde to golcueeladz to gan to guielnē. Ib rquiin guielnē, sac zha ne no tib lo guielnē, rioguid zho grē ncuane gunctal xtol zho,

<sup>2</sup> zēēb rguib zho gban zho zigne racladz Dios.

<sup>3</sup> Grētaa ncuane ndzinlid ne ruᅅ grēraa miech, golguiaaᅅladza. Golguiaaᅅladz zeene scataa ptsieelsa to zho, bzudz to, lega dowcho, lega gocho to nziu, haxta bionie to zha ne nacd tsieel to; bio to lo grē lni, bleynie to grē mdio.

<sup>4</sup> Grē zha co, rien naa rlēē zho ran zho rtsieelsadraa to zho lo grē ncuane ndzinlid co, gane haxta rneenē zho to.

<sup>5</sup> Per golsaan zho, benque zha quizha zeene gacredz zho lo men ne guiaadgun guielwxtis, gal dze ne gdeed me miᅅne tsieguial tib tib miech, zigtaa zha mbana, zigtagaa zha ne gutlew.

<sup>6</sup> Sac niicle zha ne gutlew, no zho gocnaᅅpaa zho zha nac Xtiidz Dios zeene bzomban zho. Ible rquiinᅅpaa Xtiidz me, sac zha ne rquiaadiaga, niicle ne zetaque zho, per nēz lo Dios mban zhiespīritu zho.

*Golgacnie zha ne nacgrē to*

<sup>7</sup> Zhile gdziᅅ gdze ne laa grē ncuane rac lo guidzliu rii nitlo; golquix biini zaacse golban, tibaque golzodiidznie Dios.

<sup>8</sup> Ine golleynie grē zha ne nacgrē to, sac zeene nlipaa rleynie ne samiech ne, tel pe falt ne guntaa zho zrieelo cteed new zdoo ne.

<sup>9</sup> Zha ne guiaad lidz to, goldeed zaatne cuēz zho; ine golcuēzlo zho, guieedniede to zho.

<sup>10</sup> Tib tib to bneedzse Dios tib guielbiini lo to. ¡Golquiina sca, golgunlsa xyudar zha ne nacgrē to! Ib ga rquiin guielbiini co bneedz mew lo to.

<sup>11</sup> Zha ne rseed miech Xtiidz Dios, none gnee zhow zigne racladz me. Zha ne ruᅅgaa pe stib xtsiᅅn Dios, ib yquiad zdoo zho none gun zhow dib nacse guielndaan ne rdeed Dios lo zho. Ncuane guntaa to, goltsienie guic to ne laaw gun to par csannon to lē Dios. Ga glu ne xtsiᅅn Jesús quiayun to, men ndzon ne rnabey, men ne gdziᅅnd dze gdzēē. Sca rieguiala.

<sup>12</sup> Bets, bzian, ne nligaa rleynie naa to. Golsoladz sca, tel pe guielnētaa gan to porne no to xnēz Jesús, peet tsienied guic to, sac ib scale no gaca.

<sup>13</sup> Mazd ine golley; sac gon ye Jesús sca gon guielnē, ni scagaa nroob guielbley ne tso to gal dze ne glu ganle zha nactaa guielndzon ne rap me.

<sup>14</sup> Zeene rgodee miech to, rquiaago zho to loxaque ne no to xnēz Jesús, nley golgac; wen zie to ga, sac gon zhiEspīritu Dios nacie to.

<sup>15</sup> Guieltow sca csacsi miech to, telne bgaa to laa to beet, laa to wban, laa to bzēēb lo cuent ne rieguialdraa to, pe stib guielntseeb ne noyunragaa to.

<sup>16</sup> Saᅅgue telne rsacsi zho to loxaque ne no to xnēz Jesús, led guieltod ga. Laa ne ctoladz to, ¡goldeed xquizh lo Dios, sac gon tib guielnzaac nroob bgaa to ngab to lo me!

<sup>17</sup> Golgacnaᅅ ganle, grēse ne ne nac ne zha ne ngab lo Dios, len dze rii laa ne csilo dzian guielnē. Nana, telne ye zha ne ngab lo me ted guielnē, ¿zha naczhe miᅅne ted grēraa zha ne nēd

gliladz Xtiidz me, gal dze ne laa me gun guielwxtis?

<sup>18</sup> Zigne zhobneeque lo Xtiidz me, zaatne rnee: “Niicle zha ne wenle nēz lo Dios, nroobaque nac guielnē ne ran zho haxta gdziñ dze ne ycaania me zho, ¿pe lelgue grē zha ne dzigo racntseeb lo me?”

<sup>19</sup> Gacxe nagon waa, niicle tel pe nactaa guielnē ne gnabey Dios ted to, tibaque golban zigne rnabey me, golsan xquielmban to ladznia me; sac gon me nac men ne rneedz xquielmban to, ni mesi ib csaand me to.

## 5

### *Golgon xtiidz zha ne rnabey lo to*

<sup>1</sup> Laa niina nagon, laa naa cso cho-plan diidz lo to, ne nac to zha ne rnabey lo grē zha ne no xnēz Jesús. Ye naa, dziin co nac naa, naa nac tib zha ne gonpaa zha psacsi zho Jesús, ni nanpaa naa zgaa naa lo guielndzon ne no me, zaatne rnabey me, gal dze ne laa me guiaad.

<sup>2</sup> Rso naa diidz lo to gon, zaacse golquianap grē zha ne bgaa to no-quianap to. Dib zdoo to golgun dziin qui, sac sca racladz Dios, ib tsienied guic to guiab to dien zha lega cob to dimi lo zho.

<sup>3</sup> Gundē to ne gnabey to zho zig cho xmoz to, sinque zaacse golgac lo zho, zeena lo to cseed zho zaacse gban zho.

<sup>4</sup> Scagaa, zeene laa men nroob ne quianap ne guiaad, zgaa to lo guielndzon ne gneedz me, lugar co gac tib premio ne gdziñd dze lozh lo to.

<sup>5</sup> To ne nac to zha nguieg, golgon xtiidz grē zha ne zo rnabey lo to. Tib tib to, golgon xtiidz zha ne nacgrē to, sac gon: “Grē zha niats, rdziguiend Dios zho, sangue grē zha ndooladz, racniēn me zho.”

<sup>6</sup> Telne guiaanwin to lo men ro ne nac Dios, ine ndooladz gac to lo me, scagaa me zunnon me to zeene laa dze co gdzin.

<sup>7</sup> Tel pe nactaa grē zhizhgab to, grē xliaadz to, ladznia me golsana, sac gon me quianap to, noxco me to.

<sup>8</sup> ;Nsin golso lo mendox, sac gon tibaque quianal ma gnitlo ma ne! Masaque rac ma zig rac grē meedz ne rgobeedz quiaguib ma ne gow.

<sup>9</sup> Dziits golso gdeete to diidz yquuil ma to. Tibaque dib zdoo to gonalno Dios. Nanle to ganle dipse lo guidzliu, zha ne notaa xnēz me, scaque quiaded zho.

<sup>10</sup> Tel pe nactaa guielnē ne noyan to, ible csaand Dios to sacne rleyndox me to, zeene laa dze co gza, hor co laa me gzhixcuaraa lo xquielmban to, gzodziits me to, guntibli me guic to. Me nac men ne bredz ne yгаа ne lo guielndzon ne no me grop me Jesús, guielndzon ne gdziñd dze nitlo.

<sup>11</sup> Mese nac men ne rnabey grētaa ncuane no, ni gdziñd dze ne gdzēē me. Nligaa sca nac me.

<sup>12</sup> Laa naa rxel guits rii lo bets ne Silas, ziaadnie mew lo to, bets ne rne naa me, sac nligaa dib zdoo me rleynie me Dios. Mine rne naa lo to lo guits rii, laaw rne naa sac racladz naa guien to ganle pa lotaa noxco Dios to, pa lotaa rleynie me to; zeena tiblique gac to gbichede to lo me.

<sup>13</sup> Grēse zha ne riladz Jesús Babiloin nu, zha ne bzooblo Dios gac xpēēd me zigne bzoobloque me to, laa zho rxeeł bdiuzh lo to; scaque Marcw, men ne rzaac naa nu zig tib xpēēd naa, ye me laa me rquiaabdiuzh to.

<sup>14</sup> Laa naa rnab lo to, golquiaabdiuzh grēse zha ne nacgrē to, ine golxen nia zho.

Dios gacniēn to peet zhgab ctsebde to, nac to zha ne no xnēz Jesús.

Pedr

## BROP GUITS NE PQUIAA PEDR

Bets, bzian, ¡diuzh to grëse to!

<sup>1</sup> Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnalo men nroob ne zob gbaa, zigne rnaloque no me. Xquizh Jesús men ne rsilaa miech, men ne nac Dios ne rililadz ne, sac gon me gocniën to squi rnalo to me niina; sac mesi mine nonguiel gac, min co run me.

<sup>2</sup> Zigse zie dze, goltsoxco lozh gunbey to zha nac Dios, zha nac Jesús men ne rnabey ne, zeeña scagaa zig zie dze zunlayraa me to, zacniënraa me to, parne peet zhgab ctsebde to.

<sup>3</sup> Sac zeeñe gunbey to zha nacraa me, con grëtaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. ¡Gotsaa gwi ne ganle zha nactaa ncuaane ro, ncuaane gzee zdoo ne been me parne gbig ne lo me!

<sup>4</sup> Ni psan me diidz pe nac grë ncuaane ndzon ne gneedz me lo ne. Psan me diidz, ib laa me cuee ne lo grëtaa guielyozh ne rac lo guidzliu rii, parne gac ne tib miech mbe zigne nac me.

<sup>5-7</sup> Nli laa to rnalole Dios, per parne ygaa to min co, none tsoxco to:

zaacse golban,  
goltsoxco guien to zha nac Dios,  
golseed gnabey to xcuerp to,  
guieete to,  
tibaque goltsoxco golgun mine racladz  
Dios,  
ine niowse golbannie grë zha ne nac-  
grë to, golsac zho zig tib menlidz  
to;

golleynie samiech to.

<sup>8</sup> Nana, telne tsoxco to znu gban to, dzigosi mazdraa tsoguc to mine racladz Dios, dzigosi zlu run to mine

rnabey Jesús men ndzon ne rnabey ne, led loxaque runbeydse to me.

<sup>9</sup> Sac zha ne tsoxcoda, rrieequia rchool lo zho ga, rrieequia rcowle guic zho ga, sac gon rsoladz zho zha nactaa lo grë dol ne blee Dios zho.

<sup>10</sup> Bets, bzian, golguien sca, niina ne laa Dios bzooblele to, laa me bredzle to ngab to lo me, goltsoxco sca golban, parne guiabde to lo dol stib.

<sup>11</sup> Niicle par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhiäl nëz zaatne ted to gdziñ to ga.

<sup>12</sup> Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow.

<sup>13-14</sup> Laa Jesús men ndzon ne rnabey ne, blule lo naa zhile gdziñ dze ne laa naa ghi lo guidzliu rii, gane niina laga bii mban naa rgobey naa ible nonguiela znu cso naa diidz lo to;

<sup>15</sup> zeeña niicle wbile naa lo guidzliuw, tibaque csoladz tow.

### *Gonpaa Pedr Jesús*

<sup>16</sup> Grëse mine bnee no lo to zeeñe pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me

<sup>17-18</sup> guic gui ne scataa pxobnen Dios ne men non, men ro nac me. Binpaa naa zëeb tsi Dios gbaa hor co, në me: “Lëë Xpëed naa i gon, rleynie naa me, nziuu me lo naa.”

<sup>19</sup> Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiaziini lo to niina, zig rziini tib biini guieel, haxta riini liu zeeñe laa Mel Ngol rlan; ni lëë Mel Ngol co nac Jesús.

<sup>20</sup> Per scagaa, racladz naa gacnan to ganle, grieelod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios,

<sup>21</sup> sac gon tel zha co, bneed zho ncuaane biaabtaa guic zho; cinque



laa zho bnee mine bnabey Dios psi-  
aab Espiritu Sant guic zho.

## 2

### *Zha ne rquidie (Judas 4-13)*

<sup>1</sup> Grë zha ne biadteed Xtiidz Dios padzeela, mine bnabey me zho min co bnee zho; per brieequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nand zho zha nactaa guielnedox ne yгаа zho, tibaque zeene guien zho laa zho nole lo caxtigw co.

<sup>2</sup> Ndal miech ne grieequia tsienal grë ncuaan yozh ne gun zho, niapse por zha laa grëraa miech csilo gneenë Xtiidz Dios.

<sup>3</sup> Zha yozha, laa zho tsienal lox-  
aque dien zha gunlo zho dimi, zguib zho yquidie zho to gdeed to dimi lo zho. Per ib tedsod zguizh zho min co, sac bzeetle Dios ganle zha nactaa lo guielnedox ne yгаа zho;

<sup>4</sup> sac Diossi gon, mine run grë zha ntseeb, sand mew scase. Golgan ganle, niicxe grë anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho.

<sup>5</sup> Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guiedox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me.

<sup>6</sup> Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac

mine tsieguial zho telne csaand zho xquielntseeb zho.

<sup>7-8</sup> Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho.

<sup>9</sup> Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnedox ne cteed me zho gal dze ne laa me gun guielwxtis.

<sup>10</sup> ;Zig nac zha ne guiaadquidie to ga, mincopaa yгаа zho! Ni lalnu gandzed Dios zho; sac gon, laa zho zienal loxaque grë guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guien lo zho rdzibdee zho grë men non ne no gbaa.

<sup>11</sup> Per ni grë anjl, niicle ne zha nroob nac anjl, niicle ne rap anjl poder, per rdzin anjl lo Dios gdz-  
ibdee anjl zho.

<sup>12</sup> Per zha, lo xquielyozh zho ga, haxta ncuaane riend zho zha nac, rdzibdee zho. Lëëdaa grë ma nac zho, tel ma laa ma ralse par yгаа ma nitlo ma; guien draa xquielrien zho, ncuaane racladztaa zho run zho. Per zdzin dze ne nitlo zho, zigne rnitlo-  
daque grë ma,

<sup>13</sup> por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguie<sup>l</sup>tow, rquiaalose zho miech wen nac zho zeene riaadsobnie zho to lo zhilni to.

<sup>14</sup> Wnaa ne gantaa zho, pe na gzoobladd zho tsonie zho wnaa co, tibaque quiayunctal zho xtol zho. Rio zho rquiil zho grë zha ne gard sodziits lo Xtiidz Dios; rienle zho zha gla zho ncuaane rquiin lo zho. Miech ndziibdeele nac zho,

<sup>15</sup> sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëed men ne lë Beor.

Tel Balam, haxta mine nonguieldraa been me par gun me gan dimi;

<sup>16</sup> per bdziñ tib dze zeene laa Dios blisqui lo me grëtaa ncuaane quiayun me ga. (Bnabey Dios lëëque xpurr Balam bnee, dzigoraa bien Balam psaan me xquielyozh me ga.)

<sup>17</sup> Masaque nac zho zig nac grë bzie ne bidzle nis, zig nacgaa xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guielcowdoo ne rieguial zho, zaatne gdzindraa dze grieë zho!

<sup>18</sup> Niats rzë xtiidz zho, per ncuaane paat rquiind rnee zho. Mine mazdraa mban run zho, rio zho lëëque lo grë guielyozh ne rdeed guxt xcuerp zho rquiil zho grë zha ne pense brieë lo dol, rlozh ga rbiire riab zha co lo grë dol co stib.

<sup>19</sup> Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gacdraa csaan tel pe grë guielyozh ne run zho, lëële grë ncuaan co rnabey lo zho.

<sup>20</sup> Tib zha ne sca brieële lo grëtaa ncuaane ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho.

<sup>21</sup> Lëda ga gon, telne gocnanle zho zha racladz Dios gban zho, ni lozh ga csañ zho xtiidz me tib lad, gbiire zho tso zho lo grë ncuaan yozh ne been zho glo. Nroobdox caxtigw ne gan zha co, mazd zhi mine ygaa zha ne gocnand zha nac xtiidz me.

<sup>22</sup> Zha copaa nagon run mine rnee diidz ne znu rëb: “Nandraaque mëcw, ncuaane bdzible ma rbiire ma row maw”; ni stib mine znu rnee: “Ngut-szhe, rlozhle raz ma nis mbe, ni rlozh ga riegaaque ma lo nis ben.”

### 3

*¿Zha nacne gard guiaad Jesús?*

<sup>1</sup> Bets, bzian, golgan ganle lëële guits rii raca chop zixel naa. Gropse low, rso naa diidz lo to tsoxco to zacse gban to, ine niini gac guic to.

<sup>2</sup> Golsoladz ganle, zha nac grëse mine bnee grë zha ne biadteed xtiidz Dios padzeela; golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

<sup>3</sup> Racladz naa gacnan to ganle, len dze ne ziaadyob guiaad Jesús, zrieëquia zha ne gzhidznie xtiidz me, csilo zho gun zho grëtaa guielyozh ne gzoobladz zho;

<sup>4</sup> guiab zho: “¡Pe gliladz ne nazho guiaad Jesús! Telne nli rëb me laa me guiaad, ¿yo me na? Grë xmenjol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

<sup>5-6</sup> Squiaalo zho rsoladzd zho zha bnitlole guidzliu tib vult, ni zhagaa nitlo mine no niina. Wen wen nan zho ganle zha bnabey Dios biala guidzliu, me bnabey brieew lo nis, ni masaque lo nis now; mincocxe waa nis bnitlow glo.

<sup>7</sup> Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon ygaa grëse zha ne run guielntseeb ted zho caxtigw.

<sup>8-9</sup> Zha ne rzac quiayaanladz Jesús diidz ne psan me ga, per led quiayaanladzd mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeena ni tib zho nitlod. Bets, bzian, nanle to ganle led yed me ngab xtse. Sac tel me, ncuaane gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze.

<sup>10</sup> Ib laa me no guiaad, per choot nan dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuaane no, hor co laaw lozh; bidox ne gdzieb ne tso zeene laa gbaa nitlo; grë mel ne ndziib gbaa,

masaque gazbel ma; haxta guidzliu, dib nacsew laaw tsec.

Pedr

<sup>11</sup> Scataa nagon nitlo guidzliu rii, ni grëraa ncuaane rdzian ne niina, igolguien sca golban zigne racladz men ndzon ne rnabey ne, gunctaldraa to xtol to!

<sup>12</sup> Tibaque golconie guic to ne ib laa me no guiaad; tibaque ndzinli golban, gollu ne quiambëz to gdzin niob dze ne sca gazbel grë ncuaane ran ne gbaa, dze ne sca tib guiaalse grë ncuaane niaaw.

<sup>13</sup> Horco nagon laa ne dzian tib gbaa cub, laa ne dzian tib guidzliu cub ne psanle me diidz ygaa ne; zatne tsodraa guientseeb.

<sup>14</sup> Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleyne me to gan me mban to zigne racladz me.

<sup>15</sup> Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, men ne nziuu lo ne, lo grë guielbiini ne rdeed Dios lo me rquiaa me grë guits ne zixeel me, zineele me lo to grë mine none naa nu.

<sup>16</sup> Parga nli no mine rnee me ga, ngan guien ne zha naca; grë zha ne rdziinpaa racladz ctsëë Xtiidz Dios, zeene laa zho rneew, laa zho rneew zigne racladz zho; zigne runaque zho grëraa mine zhobnee lo Xtiidz Dios. Zha ne sca run, lëëque zha noguib nitlo zho ga.

<sup>17</sup> Laa naa rzet grë min rii lo to nu, zeena nsin so to, ib gdeete to diidz cho grë zha ntseeb ne sca nac guiaadquidie to, yquiil zho to csaan to mine nac diidzli, csaan to nëz ne ziele to i.

<sup>18</sup> Goltsoxco zig zie dze guienraa to pa lotaa rleyne Dios to, ni guienraa to cho nac Jesús, men ndzon ne rnabey ne, men ne psilaa ne lo dol.

Me nac men non, me nac men nziuu, ible me riegual gunnon miech, zigtaa niinaw, zigtagaa grë izdoo ne ziaadraaw. Sca rieguala.

## GUILTS NE GLO PQUIAA JUAN

¡Diuzh to!

Laa naa gzodiidznie to ganle cho nac Jesús.

<sup>1</sup> Jesús nac Diidz Ndzon ne rdeed guielmban. Notaque me, nole me zeene bre guidzliu. Bdzin dze biaad me lo guidzliu; grop diag no bdzion no grè mine bnee me, grop lo no bdzion no grè mine been me; sac bdzionpaa no zha rac me, zha rnee me, haxta bzhiéen no nia me.

<sup>2</sup> Ni niina laa no quianee lo miech ganle cho nac me; golgacnan ganle, me rneedz tib guielmban ne gdziind dze lozh. Zaatne no Dios men ne nac Pxoze, ga no me; zeene biaad me lo guidzliu dzigo bdziuunbey no me.

<sup>3</sup> Gacxe waa, mine rnee no lo to led lega rneed now; nozhal bdziona, nozhal bdziona. Laaw rnee no lo to, zeena tipse gac ne grè ne, gacnie to no zigne nacie Dios no (men ne nac Pxoze), zigne nacie Jesús no, men ne nac Xpèed me.

<sup>4</sup> Laa naa rnee grè min rii lo to lo guits ne rxel naa nu, zeena zigne nonley zdoo no scaquegaa to tsonley zdoo to.

<sup>5</sup> Znu nac mine bdzion no pseed Jesús miech, rëb me: Nac Dios zig nac tib biini, ni tib lë guielcow guiend zaatne no me; laa grè dol, masaque naca zig nac guielcow. Ni mincoque gon rnee no lo to.

<sup>6</sup> Gacxe waa, telne rnee ne naciele ne me, ni rlozh ga tibaque lo guielcow co no ne, rquidie ne ga dzigo.

<sup>7</sup> Telne nlipaa mban ne lo xbiini me, zigne mban Jesús lo biini co, dzigosi haxta tipse nac ne grè ne; ni scagaa, xchen Jesús nac mine csambe ne lo grëtaa xtol ne.

<sup>8</sup> Nana tel guiab ne: Tel naa ib peet dol rapd naa. Lëëque ne noquidie ne ga, rneelid ne ga zha nac ne.

<sup>9</sup> Sangue telne cxobdol ne grëse xtol ne lo Dios, ible tedsod silaa me ne lo grëtaa dol co, sanmbe me ne lo grëtaa guielntseeb ne zidziuun ne; sac ible laa Jesús gut par csambe me ne.

<sup>10</sup> Telne sca guiab ne rapd ne dol, rrieequia dzigo rzoob ne Dios zig tib men ne rquidie; sac tel me, nanpaa me grëse ne miech ngoopdol nac ne.

## 2

<sup>1</sup> Xin yeena, laa naa rso diidz lo to: Gunctaldraa to xtol to; telne nandgaa new cho tib to zha been pe tib dol, gol soladz ganle no tib men ne quianab lo Dios men ne nac Pxoze ne yquia zdoo me ne, lëe men co nac Jesús, lo me golbig (tel me ni tib dol rapd me).

<sup>2</sup> Sac me bded grëtaa guielnë ne rigoial ne ndieed ne por grëtaa xtol ne, psanwen me ne lo Dios; me goc zig tib gon ne pcaania Dios gozh grëse xtol ne, ni xtol grëraa miech ne ndxie dibdoose lo guidzliu.

### *Golleynie samiech to*

<sup>3</sup> Golgona ganle: Telne run ne grëse mine rnabey Dios, gase rien ne ne nli xnëz me no ne.

<sup>4</sup> Laa tel zha ne rnee: “Xnëz me no naa”, ni rlozh ga rund zho grè mine rnabey me, rquidie zho ga.

<sup>5</sup> Sac zha ne nli rleynie Dios, rioxco zho rban zho zigne nac xtiidz me; ni tel ne, ndion ne ganle nli xnëz me no ne.

<sup>6</sup> Gacxe nagon waa, zha ne rnee xnëz me no zho, ib none zaacse gban zho, zigne wban Jesús zeene biaad me lo guidzliu.

<sup>7</sup> Bets, bzian, golgacnan ganle, none gleynie to samiech to. Guiabde to togo ncub mine rne naa lo to nu gun to, laa naa rzet mine binle to glo zeene psilo pquiaadiag to Xtiidz Dios. Niicle ne padzeelale zhobneew, niicle ne pquiaadiagle tow,

<sup>8</sup> per rrieequia ncuba niina; sac gon zeene biaad Jesús, me blu ganle zha none gleynie ne samiech ne. Ni scagaa niina ne laa to zienala, laa to noriee lo guielcow ne no to glo, laa to nozëeb nëz lo xbiini Dios.



<sup>9</sup> Ga nagon, tel zha ne rnee lo biini co mban zho ni rlëenie zho samiech zho, rquidie zho ga; bii lo guielcow ga mban zho.

<sup>10</sup> Zha ne rleynie samiech, zha cosi nli lo biini co mban zho, noxtseebd lega tsohe zho, sac ranpaa zho pa lo zie zho;

<sup>11</sup> sangue zha ne rlëenie samiech, lo guielcow ga no zho. Masaque nac zho zig zha ne rold lo, niicle zha riend dien pa nëz tsie zho, sac guielcow co quiantse lo zho.

<sup>12</sup> Xin yeena, laa naa rne grë min rii lo to, sac gon, tel to laa Jesús bdiizhle tel pe nactaa grë xtol to.

<sup>13</sup> To ne nac to dad, laa naa rxel diidz rii lo to, porne nac to zha ne rliladzle Jesús, nanle to ganle notaque me, nole me zeene bre guidzliu. Togaa ne nac to zha nguieg, laaw rxel naa lo to, sacne nligaa dziits zo to, rrieeodraa mendox yquiiil ma to. To ne nac to mөөdas, xin yeena laa naa rxel diidz rii lo to, porne nac to zha ne nole xnëz Dios men ne nac Pxoz ne.

<sup>14</sup> Nana sca, zigtaa tow ne nac to dad ne runbeyle Dios; zigtagaa tow ne nac to zha nguieg, ne nataa ndip ndaan to laa to pcaaniale Xtiidz Dios dib zdoo to, ne nac to zha ne lëbdraa mendox yquiiil,

<sup>15</sup> golguien, gleyniede to grë ncuaane rap to, gleyniede to grë ncuaan ndzinlid ne rac lo guidzliu rii. Zha ne rleynie grë ncuaan co, nlid rleynie zho Dios men ne nac Pxoz ne;

<sup>16</sup> sac grëse ncuaane rac lo guidzliu rii (zig nac zha ne zienal ncuaane gdeedguxt xcuerp, zha ne rzoobladz yquianie ncuaane rdziladztaa, zha ne racniats lo samiech), grëse ncuaan co led Diosd rnabeya, sinque lëe mine rzona grëraa miech lo guidzliu ga.

<sup>17</sup> Ni na tel zig nac guidzliu, zig zie dze laaw quialozh grëw grë ncuaane rleynie miech low; sangue zha ne mban zigne rnabey Dios, laa zho bgaale tib guielmban ne gdziind dze lozh.

*Zha ne rlëenie Jesús*

<sup>18</sup> Xin yeena, zhile gdziind dze ne laa guidzliu nitlo. Led binle to ganle ib zrieequia tib zha ne glëenie zhiwseed Jesús, ni nligaa niina len dze rii ndalle zaatne norieequia grë zha ne rsilo quiatsidil Xtiidz me; gane ndion no ne laa dze co ziaadgaxle.

<sup>19</sup> Nli ladaque zha ne nacgrë ne brie grë zha co, per nlid naciepaa zho ne; sac tel niaca mine nlipaa nacie zho ne, nrieextsod zho. Ga nagon blu zho ne nlid nacgrë zho ne.

<sup>20</sup> Sangue to, nacte to zig nac grë zha co, sac nacie Espiritu Sant to, bneedz me guielbiini lo to runbey to mine nac diidzli.

<sup>21</sup> Guits ne rxel naa lo to nu, nacda par cseed naa to mine nac diidzli, sac runbeyle tow ni haxta rien to pa min nac guielwquidie; sinque laaw ziaad lo to par gacnan to ganle zha nac zha ne noquidie i.

<sup>22</sup> Grë zha ne rnee i nlid lëe Men ne zëeble diidz cxeel Dios lo guidzliu ga nac Jesús, noquidie zho miech ga. Ni zha ne sca run, rlëenie zho me ga; ni ne sca rliladz zho cho nac me, yele Pxoz me ga rliladz zho.

<sup>23</sup> Sac zha ne rlëenie men ne nac Xpëed Dios, ga rlu ne nlid rliladz zho cho nac Dios; sangue zha ne rxobnen cho nac Xpëed me, zha cosi nli rliladz zho cho nac me.

<sup>24</sup> Laa naa rso diidz lo to sca: Goltzienal grë mine pseed to zeene glopaa psilo bliladz to Xtiidz Dios, zeena zigtaa Dios, zigtagaa Xpëed mew, tibaque gbannie to me.

<sup>25</sup> Golsoladz ganle, laa Jesús psanle diidz ne ib zgaa ne tib guielmban ne gdziind dze lozh; lëe guielmban co ygaa grëse zha ne nacie me.

<sup>26</sup> Laa naa rzet min rii lo to, sac ne squi no grë zha ne ziaad racladz yquidie to.

<sup>27</sup> Sangue to laa Jesús pxeelle Espiritu Sant nacie to, rquiind ne goon chora cseed to; sac Espiritu Santzhal rneedz guielbiini lo to rien to zha nac grëraa ncuaane no gacnan to, ni mesi gon mine nac diidzli min co rseed me to, led yed me

rquidie. Golguien sca, Jesús golbannie, golbannie me zigne noseed Espíritu Sant to.

### *Zha ne nac xpëed Dios*

<sup>28</sup> Xin yeena, nanle to sca sozite to lo Jesús, sinque tibaque golgacnie me; zeena ine tibiladz gac to gal dze ne laa me guiaad. Sac zha ne sozit lo me gban zho zigne gacladztaa zho, zeene laa me guiaad mban gac zho; sac guielto ne guiaan zho lo me.

<sup>29</sup> Nanle to ganle, mesi zigne rieguial gac guielwxtis sca run mew; gacxe waa, grëse zha ne nac xpëed me ible zdeed me mine rieguial zho.

## 3

<sup>1</sup> Golwi ganle pa lotaa rleyne Dios ne, laa me rneedz diidz laa ne gac mëed lo me. ¡Ni nligaa tel ne, xpëedle me nac ne! Grëraa miech riladz zhow, sacne runbeyd zho cho nac me.

<sup>2</sup> Bets, bzian, ne nligaa xpëedle Dios nac ne. Nli ndiond ne niina dien zha glu ne gal dze ne laa Jesús guiaad, per mine ndionpaa ne, zeene gal dze co laa ne gac zigne nacpaa me; ni dzigosi laa ne dzian me grop lo ne.

<sup>3</sup> Ni grëse zha ne zienie guic yгаа guielnzaac co, tibaque rioxco zho zig zie dze nosaan zho ncuaane runctal xtol zho, sac tel Jesús ranzed me dol.

<sup>4</sup> Grë zha ne runctal xtol, xley Dios ga rguiits zho, sac grëse dol ne runtaa miech ga rlu ganle ne rond zho mine rnabey me.

<sup>5</sup> Per nanle to ganle, laa Jesús biaad lo guidzliu, biaadsilaa me miech lo grëtaa xtol zho; ni mesi ni tib dol rapd me.

<sup>6</sup> Gacxe waa, zha ne nlipaa nacie me, zienaldraa zho ncuaane gunctal xtol zho; laa grë zha ne tibaque noyunctal xtol, gase rlu ne gard guien zho cho nac me, gard gunbey zho me.

<sup>7</sup> Xin yeena, ib gliladzde to mine rnee zha ne racladz guiaadquidie to. Golgan ganle, zha ne mban zigne rdziladz Dios, lëe zha co nli mbe zdo, zigne men mbe nac Dios;

<sup>8</sup> sangue grë zha ne tibaque quiayunctal xtol, xnëz mendox

ga ngab zho; sac tel mendox, desde padzeela tibaque guelntseeb quiayun ma. Ni min co nagon nacne biaadpaa Xpëed Dios lo guidzliu, biaadnitlo me grëtaa ncuaane run ma.

<sup>9</sup> Zha ne nac xpëed Dios, rdeetraa zho diidz gunctal zho xtol zho, sacne laa guic zho zienie gban zho zigne racladz Espíritu Sant, men ne nacie zho; rienle zho nodne gunctal zho xtol zho, sac laa zho nacle xpëed Dios.

<sup>10</sup> Nienenpaa cho nac xpëed Dios, chogaa nac xpëed mendox, sac grëse zha ne run guelntseeb, grëse zha ne rleyne samiech, led xpëete Dios nac zho;

<sup>11</sup> sac gon, desde dze ne psilo bliladz to Xtiidz Dios, bingazh to ib none gleyne ne samiech ne.

<sup>12</sup> Zig nac Caín, xnëz mendox ngab Caín, gane beet me bets me loxaque ne ndzinli mban bets me, laa me niapse guelntseeb run me. Ib gunde to mine been Caín.

<sup>13</sup> Gacxe waa, bets, bzian, zeene gan to laa grëraa miech rlëenie to, ib tsoode to zhgab guiab to pe nacne sca run zho.

<sup>14</sup> Sangue ne rleyne ne samiech ne, gane ndion ne noxtseebdraa ne guioo ne gabil, laa ne bgaale tib guielmban ndzon ne gdziindraa dze lozh; sac zha ne rleyne samiech, nëz ne nitlo zho ga zie zho.

<sup>15</sup> Grë zha ne sca rlëenie samiech, rriequia rut zho ga, ni nanle to ganle zha ne rut samiech, gard yгаа zho guielmban ndzon ne gdziind dze lozh ga.

<sup>16</sup> Ndion ne zha gleyne ne samiech ne, sac Jesús zhal blu zhaw zeene sca bleeladz me me gut me bdiizh me xtol ne. Gacxe waa, zha ne nlipaa rleyne samiech, none cueeladz zho zho, cueeladz zho ncuaane rap zho, gacnie zho samiech zho.

<sup>17</sup> Gzoob ne, tib zha ne rnee xnëz Dios no zho, nroob rapchen zho, ranlo zho rcaalsad pe yquiin tib zha ne nacgrë zho, per ib rdeete zho palal pe yquiin zha co. ¿Niacxe na nli rleyne zha co samiech zho ga?

<sup>18</sup> Xin yeena, golgacnan sca ganle, led loxaque diidzdse, led loxaque laglaadse gnee ne rleyne ne samiech ne; sinque none glu ne nli rleyne ne zho.

<sup>19</sup> Sca nagon none dziuun ne, dzigo niicle new ndionpaa ne nli xnëz Dios no ne, ni scagaa tsod pe nacne pe dzeb tsonie zdoo ne zeene laa ne gbig lo me.

<sup>20</sup> Tel zha ne rdzieb zdoo, sac rien zho noyund zho mine rnabey Dios, ib tedsod zlisqui Diosa lo zho; sac tel me grësew nan me.

<sup>21</sup> Xin yeena, laa zha ne desde zdoo zho nan zho noguiitsd zho mine rnabey me, scagaa tibliladzse gbig zho lo me;

<sup>22</sup> hor cosi ncuaane gnabtaa zho lo me squiaadiag mew, sacne mban zho zigne rnabey me, ni noxco zho noyun zho ncuaane rdziladz me.

<sup>23</sup> Ni lëe min rii rnabey me: Grëse miech, none dib zdoo zho gliladz zho Jesús men ne nac Xpëed me, ni gleyne zho samiech zho zigne psanle me diidz ga.

<sup>24</sup> Grë zha ne ron diidz run min co, ga rlu ne nlipaa mbannie zho me, ni scagaa me mbannie me zho. Ni ndion ne ganle, ib nli mbannie me ne, sac pxeel me Espiritu Sant nacne ne.

#### 4

<sup>1</sup> Bets, bzian, zha ne gnë zhiEspiritu Dios nacne zho, goon ye zho quia-nee Xtiidz me lo miech; ib gunde to ne lëelëd gliladz to xtiidz zho, sinque golwigazh dien pe nli zhiEspiritu Dios nacne zho. Sac ndal grë zha ne quianzë lo guidzliu, rquidie zho rnee zho Xtiidz Dios noteed zho.

<sup>2</sup> Parne guien to dien pe nli zhiEspiritu Dios nacne zho, golwi dien zha rzac zho Jesús: Tel zha ne rliladz ne nli zig tib miech goc me biaad me lo guidzliu, ga rlu ne nli zhiEspiritu Dios nacne zho.

<sup>3</sup> Laa tel rliladz zho ne nli sca biaad me, nlid dzigo zhiEspiritu Dios nacne zho; sinque lëele espiritu ne rtsidil Jesús ga nacne zho. Laa to binle ganle ib laa espiritu co guiaad;

ni lëele espiritu ntseeb co nacne grë zha ne squi quianzë lo guidzliu niina.

<sup>4</sup> Xin yeena, sangue to xnëzle Dios ngab to, yquidiedraa zha co to, sac gon mazdraa nroob poder rap men ne nacne to, lëdle espiritu ne nacne grë zha ne sca zianal grë wseed yozh ne no lo guidzliu.

<sup>5</sup> Grë zha co, ncuaane rac lo guidzliu rii nonie guic zho; gacxe waa, niapse lëew rnee zho, ni gagaa grëque zha ne rleyne grë ncuaan co, zha co rliladz zhiwseed zho.

<sup>6</sup> Sangue ne xnëz Dios no ne. Ni scagaa zha ne runbey Dios, zha co rquiaadiag mine rnee ne; laa grë zha ne runbeyd me, rquiaadiagd zhow. Gase na ganle rlu cho zha nacne zhiEspiritu Dios, ni cho zhagaa nacne espiritu ne ziaadquidie miech.

#### *Rleyne Dios miech*

<sup>7</sup> Bets, bzian, golgotsaa gleyne ne samiech ne, sac gon, tel Dios grëse ne rleyne me ne. Gacxe waa, zha ne rlu nli rleyne zho samiech zho, gase rlu ne nli xpëed Dios nac zho, nli runbey zho me.

<sup>8</sup> Laa grë zha ne rleynied samiech, runbeyd zho Dios ga gane sca run zho; sac gon ib Dios rneedz guielbiini lo ne gleyne ne samiech ne.

<sup>9</sup> Gotsaa gwi ne ganle, pa lotaa rleyne me ne: Tibpaa Xpëed me, ni pxeel me me biaadtizh me xtol ne, zeena ygaa ne tib guielmban ndzon ne gdzind dze lozh.

<sup>10</sup> Led guiabd ne togo glo miech bleynie Dios gane rleyne me zho niina; led scada, sinque ible zdoo me gola rleyne me ne. Ne nligaa gotsaa gwi ne ganle zha pxeel me Xpëed me, goc me zig tib gon ne gozh grëse xtol ne. Ga nagon rlu pa lotaa rleyne Dios ne.

<sup>11</sup> Bets, bzian, zigne scataa rleyne Dios ne, scaquegaa ne nagon none gleyne ne samiech ne.

<sup>12</sup> Gard tso tib zha ne gan Dios, per zha ne rleyne samiech, me ga nacne zho; ni zigse zie dze dib zdooraa zho rleyne zho samiech zho.

13 Me nac men ne pxeel zhiEspíritu me nacie no, parne glu nacie me no, ni scagaa no nacie no me.

14 Ni stiba, grop lo no bdzion no biaad Xpëed me biaadsilaa me miech lo dol; ni min co nonee no lo miech niina.

15 Grëse zha ne rliladz Xpëed Dios nac Jesús, ni rnee zhow lo miech, ga rlu ne nacie Dios zho, ni scagaa zha nacie zho me.

16 Ndion ne ganle nli rleyniedox Dios ne, sac rienpaa ne rleynie me ne, ni rliladz ne zeene rnee me pa lotaa rleynie me ne. Ible niaa me par gleynie me, me rdeed guielbiini lo miech gleynie zho samiech zho, zigne rleynie me zho; gacxe waa, zha ne rleynie samiech, ga rlu nacie zho Dios, ni scagaa me nacie me zho.

17 Zig nac ne, niina ne laa ne naciele Jesús, zig zie dze laa ne lozh cseed gleynie ne me, ni gleynie ne samiech ne zigne racladz me; ni scagaa tsod pe nacie ctoladz ne, pe nacie gdzieb ne gdziñ dze ne laa me gun xquielwxtis me; sinque haxta gley ne dzian ne me gal dze co.

18 Nod pe nacie gdzieb ne me, sac gon ndion ne pa lotaa rleynie me ne. Led yedraa niina pe dzeb ne dzio ne, sac grëse dzeb rbiche zeene rien ne rleynie me ne. Zha ne rdzieb, zienie guic zho pe nac grë guielnë ne gan zho, ga rlu zho gard guien zho ne rleynie me zho, ni gardgaa guien zho gleynie zho me.

19 Gotsaa guien sca ganle, nli laa ne rleynie Dios, laa ne rleynie samiech ne, per glo me blu ganle pa lotaa rleynie me ne.

20 Tel zha ne rnee, rleynie zho Dios, ni rlozh ga rlëenie zho samiech zho, rquidie zho ga. Sac gon, tel nand zho gleynie zho samiech zho, zha ne ranlopaa zho, ¿pe lel Dios dzigo gliladz ne nli rleynie zho, ni nac me men ne rand zho?

21 Sac gon, znu nac xtiidz Jesús: Zha ne rleynie Dios, zigne rleynie zho me, scaque none gleynie zho samiech zho. Ni min rii rnabey me dziuun ne.

## 5

### *Zac csaan ne ncuaane runctal xtol ne*

1-2 Grëse zha ne dib zdoo rliladz ne ible lëe Men ne zëeble diidz cxeel Dios lo guidzliu ga nac Jesús, grëse zha co xpëed Dios nac zho.

Grëse zha co, par guien ne dien pe nli rleynie ne zho, none guien ne dien pe nli rleynie ne Dios, dien pe nli run ne mine rnabey me. Nac cuent rii, zig nac tib yu miech, zha ne rleynie pxoz mëed, scaquegaa rleynie zho mëed.

3 Sac zeene rleynie ne Dios, zuñ ne grëse mine rnabey me. Ni grë mine rnabey Dios, nacda ncuaane guiab ne grielod gun ne;

4 sac grëse zha ne nacle xpëed Dios, totsaque rnalo zho ne Jesús gun xyudar zho, gac-wetraade zho lo grë ncuaane gunctal xtol zho.

5 Golgacnan sca: zha ne dib zdoo rliladz Xpëed Dios nac Jesús, zrieelo zho csaan zho grëtaa ncuaane runctal xtol zho.

6 Tel ne, ndion ne ni rliladz ne ganle nli Xpëed Dios nac Jesús, sac zeene biaad me horne norobnis me, horne nolozh me, ga blu ganle cho nac me. Ni ye Espiritu Sant nolu ganle ne scaw, ni mine rnee me diidzliw.

7-8 Gotsaa gwi sca ganle, tson mod rlu cho nac Jesús: Tiba por mine nolu Espiritu Sant, stiba por mine blu zeene norobnis me, ni stiba por mine blu zeene nolozh me. Zigtaa mine nolu Espiritu Santa, zigtaa zeene brobnis mew, zigtagaa zeene nolozh mew, blu ganle Xpëed Dios nac me.

9 Mine rnee Dios, none gliladz new. Xtiidz samiech ne name rliladz ne, ¿pe lel mine rnee Dios dzigo gliladz ne?

10 Zha ne gliladz mine rnee Dios, rriequia rzoob zho me ga zig tib zha ne rquidie; sangue zha ne gliladz mine rnee me, zien zho ganle nli Xpëed me nac Jesús.

11 Laa me bneele ganle: zha ne gnalo Xpëed me, zgaa zho tib guielmban ndzon ne gdziñd dze lozh; sac Xpëedse me rdeed guielmban co.



<sup>12</sup> Gacxe waa, zha ne rnalod Xpëed me, laa zho bgaale guielmban ndzon co; sangue zha ne rnalod Xpëed me, gard yгаа zhow.

*Bgaale to guielmban ne gdziind dze lozh*

<sup>13</sup> To ne nac to zha ne rnalole Xpëed Dios, laa naa rzet min rii lo to zeena gacnan to ganle laa to bgaale guielmban ne gdziindraa dze lozh ga.

<sup>14</sup> Ni scagaa, ndionpaa ne rquiaadiag Dios xtiidz ne, zeene ncuaane rio zdoo me rnab ne lo me;

<sup>15</sup> ni zigne ndion ne rquiaadiag me xtiidz ne, scaquegaa none gliladz ne ib zneedz me ncuaane rnab ne.

<sup>16</sup> Zig nac zeene gan to cho tib zha ne nacgre to been pe tib dol, ni rlu nacda dol ne gnitlo zho, zac gnab to lo Dios gun me zho perdon; ni gacnan to ganle, ible zun me zho perdon. Sac gon no dol ne rnitlo, ni zha ne gun dol co, nodne gnab to lo Dios gun me zho perdon.

<sup>17</sup> Nli grese guielntseeb dol naca, per no mine rnitlod miech.

<sup>18</sup> Ni ndion ne ganle, zha ne nacle xpëed Dios rundraa zho ne lega gunctal zho xtol zho; sac Jesús men ne nac Xpëed Dios, men co quianap zho, grielodraa lega pe gun mendox zho.

<sup>19</sup> Zig nac ne, ndionpaa ne xnëz Dios no ne. Nli ndalraa zha ne zienal ncuaane rnabey mendox,

<sup>20</sup> sangue ne, laa Xpëed Dios bi-aad bdixbiini me xquielrien ne bdzi-uunbey ne men ne nacpaa Dios. Ni-inasi laa ne ngable lo men ne nacpaa Dios ga, ni lëe me ga nac Jesús. Me nac Dios nguiamban, ni me nac men ne rdeed guielmban ndzon ne gdziind dze lozh.

<sup>21</sup> Xin yeena, golguien Diosse nac men ne gleynie to; gunde to ne lel gre ncuaane no lo guidzliu rii gleynie to, laa ne gleynie to Dios.

Juan

## BROP GUITS NE PQUIAA JUAN

¡Diuzh to grëse to!

<sup>1</sup> Laa tib zhagol rii rxeel tib guits rii ziaad lo to i, ne nac to zha ne no xnëz Jesús. Dios bzooblo to, bredz me to ne laa to ngab xnëz me.

Ne nlipaa rleyne naa to gon, ni led naadsegaa, sinque ye grëraa zha ne runbey diidzli ne nac Xtiidz Dios.

<sup>2</sup> Rleyne no to sacne tibaque nac diidzli ne rliladz ne, ni tsod dze ne csaan new.

<sup>3</sup> Dios ni Jesús men ne nac Xpëed me, me glu ganle pa lotaa noxco me to, zeena peet tsienied guic to, ni yquia zdoo me to; ni zunpaa mew, sac rleyniedox me to.

<sup>4</sup> Ne nlipaa gon bleydoo naa zeene gon naa nzian zha ne nocaania Xtiidz Dios i, noxco zho mban zho zigne nacpaa diidzli; zigne rnabey Dios men ne nac Pxoz ne.

<sup>5</sup> Bets, bzian, laa naa rnab lo to, golgotsaa gleyne ne samiech ne. Guiabd ne togo ncub mine rne naa lo to nu gon to; sac gon, lëëquew ga bdzion ne zeene psilo bliladz ne Xtiidz Dios.

<sup>6</sup> Telne nli rleyne ne Dios, dzigo none gban ne zigne rnabey me; gacxe waa, none niowse gban ne, ine gleyne ne samiech ne, sac gon min co rnabey me.

<sup>7</sup> Ndal zha ne quianzë lo guidzliu niina, noquidie zho miech, rnee zho nlid goc Jesús zig tib miech zeene bi-aad me lo guidzliu. Nsin golso lo zho, sac gon notsidil zho mine nac diidzli ga, rlëenie zho Jesús ga sca run zho.

<sup>8</sup> Golguien, ib gdeete to diidz guiaadquidie zho to, zeena dziin ne quiayun to i gacda zhlëse. Goltsoxco tiblifique golgac, zeena ygaa to grëtaa guielnzaac ne no gneedz Dios lo to.

<sup>9</sup> Sac gon, zha ne csaan mine nacpaa zhiwseed Jesús, led xnëzdraa Dios ga no zho; ni scagaa, zha ne

zienaipaaw zigne naca, zha cosi xnëz Dios ga, xnëz Xpëed me Jesús ga no zho.

<sup>10</sup> Gacxe waa, zha ne guiaad lo to i ni tel ziaadnied zho wseed ne nacpaa Xtiidz Jesús, ycaaniade to zho. Ib gdeete to lidz to cuëz zho, ib tsode to gnee to pe diidz ne csaanziiu to zho;

<sup>11</sup> sac telne sca gon to, rrieequia yele to rleyne grë zhiwseed yozh zho ga.

<sup>12</sup> Ndal grë ncuaane no gne naa lo to, per racladzd naa gzet naaw lo guits rii. Laa guic naa no guialgan naa to i, dzigo mazd hor co naazhal gnew lo to; zeena nroob guielbley ne dzio ne grë ne.

<sup>13</sup> Grë zha rii, zha ne bzooblo Dios bredz me zigne bredzaque me to bzëeb to xnëz me, laa zho rxeel bdiuzh lo to grëse to.

Juan

## BION GUILTS NE P̄QUIAA JUAN

¡Diuzh bets!

<sup>1</sup> Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

<sup>2</sup> Bets, rnab naa lo Dios zigne squi wen mban luu n̄ez lo me, scaque zaacse grieequia gr̄etaa ncuaane gun luu, ni gneedz me guieḷndaan lo luu.

<sup>3</sup> Ne nlipaa bley naa, zeene bi-aad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu mine nac diidzli.

<sup>4</sup> Ne nligaa, nodraa pe stib conley zdoo naa zigne rleytaa naa zeene ron naa ine niowse mban gr̄e zha ne biane naa xtiidz Dios lo, zienal zho mine nac diidzli.

<sup>5</sup> Bets, ziyon naa squitaa tibaque noxco luu run luu xyudar gr̄e zha ne nacgr̄e ne, ni mazdraa zeene nac zho zha ne ziaad stib guiedz. ¡Wen ga!

<sup>6</sup> Squi ndxie gr̄eraa zha ne riladz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeena grieeo gdziḷ zho zaatne no tsie zho. Sca rdziladz Dios.

<sup>7</sup> Sac gon, niapse porne rleynie zho Dios, laa zho brie ziegun zho xtsiin Jesús, ni ib rziguiel d zho ycaania zho ncuaane rdeed gr̄e miech ne riladzd Xtiidz Dios.

<sup>8</sup> Min co nagon, ib none ne yquiambiaazlo zho, ne none gdeed ncuaane yquiin zho, zeena dziuun ne xyudar zho ygaaz Xtiidz Dios.

<sup>9</sup> Pxelle naa tib guits lo gr̄ese zha ne no xn̄ez Dios i, per zig nac Diótrefes gon, men ne racladz so gnabey lo to i, rond me mine rnee no.

<sup>10</sup> Gacxe na, telne laa naa guial i, dzigo laa naa glisqui lo me dien pe nacne quianeen̄e me no.

Ni tebaa mincose, na haxta run me ib rb̄ezlod me gr̄e zha bets, zha bzian

ne rlanso i; niicle rdeetegaa me diidz cho gdeed zaatne cūez zho. Zha ne rund mine racladz me, rbee me zho lad gr̄e zha ne nacgr̄e zho.

<sup>11</sup> Bets, sangue luu gon ib tsienald luu mine run gr̄e zha ne sca run guieḷntseeb, sinque bioxco güeynal ncuaane ndzinli. Sac gon, zha ne run niapse ncuaane ndzinli, xn̄ez Dios no zho; laa gr̄e zha ne run ncuaane ntseeb, gard s̄ēeb zho xn̄ez Dios.

<sup>12</sup> Zig nac Demetr, gr̄ese miech rnee ganle zaacse mban Demetr. Ni rlugaa nliw, sac gon tibaque zienal me mine nac diidzli. Niicle nogaaw, mincoque rnee no, ni nan luu ganle led yed no rquidie.

<sup>13</sup> Ndalraa ncuaane no gne naa lo luu, per racladz naa gzodiidz naaw lo luu lo guits rii;

<sup>14</sup> sac laa guic naa no guialgan niob naa luu i, dzigo hor co ziodiidz ne grop ne.

<sup>15</sup> Guiaannie Dios luu sca; peet tsienied guic luu. Gr̄ese xamigw luu zha ne runbey luu nu, laa zho rxeel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne n̄ez qui.

Juan

## GUILTS NE PQUIAA JUDAS

<sup>1</sup> Naa nac Judas, bets Santiagw; xtsiin Jesús quiayun naa.

Laa naa rxel guits rii lo to, grëse to ne nac to zha ne bredz Dios bzëëb xnëz me. Ne nligaa nquialadz me to, ni haxta quianap Jesús to.

<sup>2</sup> Dios glu ganle pa lotaa rquia zdo me to, pa lotaa rleyne me to, ni pa lotaa noxco me to zeena peet tsienied guic to.

<sup>3</sup> Bets, bzian, miñe gocladz naa nzet naa nu ganle zha nactaa miñe been Dios psilaa me ne lo xtol ne; per na rgobey naa nonguieraaw cso naa didz lo to, ib gandzede to grë zha ne rtsidil miñe rliladz ne. Dios bneedz diidz gocndion new, ne nac ne zha ne brie lo dol bziaab ne xnëz me.

<sup>4</sup> Sac gon, blalaa zha ne rquiaalo rliladz Dios, ngeuets zhliaan laa zho bzëëb lad to i. Miech yozha, niapse lo dol no zho, rnee zho zac gun ne ncuane guiaabtaa guic ne, sac nquialadz Dios ne; ib rliladz zho Jesús, Men ro, Men nroob ne rnabey ne. Padzeelale goquiet, ne grëse miech ne sca nac, lëëque lo xtol zho nitlo zho.

<sup>5</sup> Golsoladz ganle zha bzhaac grë zha ne gocntseeb lo Dios padzeela. Niicle ne nanle tow, per laaw gzet naa lo to nu, zeena csoladz tow: Zeene psilaa Dios grëse menladz ne lo guielnë ne noded zho Egipt ga, zha ne briequia ib bnëd niunbey me, ib gonzed me zho, bnitlo me zho.

<sup>6</sup> Scaque grë anjl ne biche lo me, psaan zho dziin ne pso me zho; bdziguiend me zho, laa me nsioogyu zho tib lo guielcowdoo, ga quiadoo zho haxta gdziñ dze ne laa me gun guielwxtis.

<sup>7</sup> Rsoladz to ganle zha goc guiedz Sodom, guiedz Gomorr, ni grëraa guiedz las ne bre gax ga. Grë miech ne bio grë guiedz co, laa zho güeynal miñe nacdreaa guieltsieel, tel chotaa

pquiangob zho, bionie zho haxta grë mrazh; grëse zho, lo gui ga bnitlo zho. Ga rlu ganle, grëse zha ne csaand xquielntseeb, no tib lo guidox ne gdziñ dze guiuu, ni ga nitlo zho.

<sup>8</sup> Ni zha ne gon blanso lo to i, scadaa run zho; sac tel zha, niapse guielyozh zienal zho, laa zho nosanbeed xcuerp zho, ib rond zho miñe rnee zha ne rnabey, haxta rdzibdee zho grë men non ne no gbaa.

<sup>9</sup> Per ni anjl Miguel, anjl rnabey ne bdilnie mendox zeene güeyla me xcuerp Moisés, ib beend me ndziibdee me mendox; lëë gdib rëb me: “¡Dios nac men ne gunquizh luu miñe run luu i!”

<sup>10</sup> Laa grë zha qui, haxta grë ncuane run Dios, ncuane ni riogucid zho zha nac, laa zho rdzibdeew; masaque mban zho zigne mban grë ma, laa zho run ncuane rdeedtaa guxt xcuerp zho; lëëque zha nonitlo zho ga.

<sup>11</sup> ¡Probsaxe zho! Sac gon, nëz ne zey Caín ga zienal zho. Lo guielblë dimi, laa zho brie xnëz Dios zigne brie Balam; ni zigne gut Coré zeene gocntseeb me lo Moisés, scaque nitlo zho.

<sup>12</sup> Zeene riaad zho lo guielwagw ne run to, loxaque rzhidznie zho, loxaque runnguzee zho, rzob zho rlozhd gowcho zho, zieniedraa guic zho dien chora no gow; ni lalnu guielto guien lo zho. Nëzrii nëzrec quianzë zho, masaque nac zho zig nac xcow ne ziaadnied nisguie, loxaque nëzrii nëzrec rienie mew; zig nac tib yag bgool ne guien nex lo, len dze ne no yquia nex low. Laa zho bnitlole ga, masaque nac zho zig tib yag bidz ne bliadzle dib lo; sac tel yag bidza, gdziñdraa dze ne yguiaw.

<sup>13</sup> Zigne nëzrii nëzrec rchoon nisdo grë mtsiin beed ne ndziib low, scadaa nëzrii nëzrec nolu grë ncuane mbeeguie to ne quiayun zho. Laa zho ziele nëz lo guielcowdoo ne rieguial zho, zaatne gdziñdraa dze grie zho; zig tib mel gbaa ne bnitnëzle, laa ma nonziaabse lo guielcow.



<sup>14</sup> Lëële zha qui ga bzeet Enoc (men ne brieequia lo dii ne rac xoop xti Adán), zeene psiaab Dios guic me, rëb me: “Golwi ganle laa Dios ziaad, pe zhidaa grë anjl ne ziaadnie me,

<sup>15</sup> ziaadgun me guielwxtis. Grëse miech ntseeb, laa me gunquizh zho grëtaa dol ne been zho, grëtaa diidz dox ne brie ro zho bneenë zho me.”

<sup>16</sup> Ni nligaa sca nac grë zha qui, ib nod ncuaane tso zho conform, tibaque wlisqui no zho; laa zho zienal grëtaa guelyozh, ncuaane racladztaxcuerp zho. Rto zho guieldzin, rlozhd dieen pa rac zho, rio zho pe diidz wen ne rnee zho lo miech, loxaque ne dien zha yquidie zho miech, gun zho mine racladz zho.

*Laa naa rso diidz lo to*

<sup>17</sup> Sangue to bets, bzian, golsoladz mine bnee grë zha ne pxeel Jesús bnee Xtiidz me, zeene biadseed zho to;

<sup>18</sup> led znu rnee zho: “Zeene zhile gdziñ dze ne laa guidzliu rii nitlo, zrieequia grë miech ntseeb ne gzhidznie zhiwseed Jesús, laa zho gban zigne nactaa grë zhgab yozh ne guiab guic zho.”

<sup>19</sup> Ni nligaa ran to niina ganle sca quiayaca, lëë grë zha co i squi nogodil grë zha ne no xnëz Jesús. Nacnied zho Espíritu Sant, gane niapse grë ncuaane dol ne racladz xcuerp zho, miñ co run zho.

<sup>20</sup> Bets, bzian, golguien sca tibaque dziits golso lo Xtiidz Dios mine rliladz to. Golzodiidznie Dios, zigne csiaab Espíritu Sant zdo to.

<sup>21</sup> Sozite to lo Dios, golguien ganle zha rleynietaa me to; golquiambëz dzian ne gal dze ne ygaa ne guielmban ne gdziñ dze lozh, mine ndionpaa ne gneedz Jesús men ne rnabey ne, porne rquia zdo me ne.

<sup>22</sup> Tel cho zha ne racchop guic lo Xtiidz Dios, golnee lo zho biire sodziits zho stib.

<sup>23</sup> Zha ne bii no lo dol, golnee lo zho guien zho csaan zhow; golcuee zho lo gui ne noxtseeb zho ygaa zho ga; scagaa grëraa miech, golquia zdo

zho, per ib cxende to lo zho. Ni lalnu gdziguiende to grë dol ne run zho, golsaca zig rzac to tib ncuaane rbixnë zdo to ran to.

<sup>24-25</sup> Tibaque Dios no, me psilaa ne lo dol, ni megaa csilaa grëraa miech. Men nroob nac me, ni zrieelo gacniën me to guiabde to ladznia dol stib; zeena ine mbe to, ine rley to laa me gdziñnie to zaatne nac lo guielndzondoo ne no me. Niina ne laa ne rdziuunbeyle Jesús, zrieelo dzioolnie ne me, mese nac men nroob, men ndzon, men ne rap guielrnabey. Tibaque nac me, niicle mazd glow, niicle niinaw, ni gdziñ dze ne gdzëë me.

Judas

## MIÑE BDEED DIOS DIIDZ GON JUAN

<sup>1</sup> Nu raquiet grë ncuaañe ziaady-oble gac. Dios bnabey Jesús glu mew lo grë zha ne no xnëz me. Nacne pxeel Jesús tib xanjl me biaad biaadluw lo ngundziin win ne nac naa nu, parne sca gacnañ zhow.

<sup>2</sup> Grëse miñe gon naa, grëse miñe bin naa ga, laaw gne naa zigne gonse naaw, zigne binse naaw. ¡Diidzliw!

<sup>3</sup> Dichos grë zha ne glab lo guits rii, ni dichos grë zha ne yquiaadiag grë miñe zhobnee low nu, ycaania zhow ni gliladz zhow; sac gon xtiidz Diosa, ni laa dze ne gac grë miñe rzeeta nu, ziaadgaxle.

<sup>4</sup> Naa nac Juan, laa naa rquia guits rii rxel naa ziaad lo to i, ne nac to zha ne ngab xnëz Jesús, zigne nose to gza gadz guiedz ne ndxie nëz Asia i.

Dios meñ ne no padzeela, meñ ne no niina, meñ ne nacle diidz guiaad, me gacniñ to lo grë zhizhgab to, me cchoobladz zdoo to peet tsienied guic to; me ni Espíritu ne zo lo me zaatne nac lo xcan ndzon ne zob me; Espíritu ne rlu zha nac gadz guielbiini ne rap me;

<sup>5</sup> ni Jesús meñ ne rnee niapse diidzli, meñ ne glopaa brieegan lo guielgut, meñ ne rnabey lo grëse zha non ne rnabey lo guidzliu.

¡Gotsaa dziuunnon ne Jesús! Sac gon pa lotaa rleynie me ne, bleeladz me me bzhiee xchen me psañmbe me ne lo grëtaa xtol ne,

<sup>6</sup> tibaque been me ne, psañnon me ne; bzooblo me ne gac ne pxoz ne gon dziin lo Dios meñ ne nac Pxoz me. ¡Mese nac meñ ne rap guielndzon, mese rap grëtaa guielrnabey! ¡Tsod cho stib zig me, ni gdziñd dze ne nitlo xquielrnabey me! Sca nac me.

<sup>7</sup> ¡Bii zanaque to ganle zeene laa Jesús ziad-zëeb lo xcow! Grëse miech zan zho me, zig nac zha ne sca bdiñ me, zha ne sca bliz lanz cue me,

zanlo zho me; dibdoo guidzliu, hor co mbanse gac miech, haxta zoon zho, haxta zdzieb zho. Ible sca none gaca.

<sup>8</sup> Znu rnee Dios, meñ nroob ne rap grëse guielrnabey: “Grëse ncuaañe no-taa, naa psilow ni naa csiaała; naa nac zigne nac letr “a” ni letr “z” lo grëse letr, “a” rsilow, “z” riala, zigne nac naa niina sca goc naa padzeela, ni scaque gac naa zeene laa naa guial stib.”

### *Gon Juan Jesús*

<sup>9</sup> Naa nac bets to Juan, tibaque nac ne niina grë ne, sac ye naa no xnëz Jesús; ye naa nodeed grë guielnë ne noded to. Zigne rneedz me paciens lo to lëb to lo grëtaa guielnë ne no gan to, scaque racniñ me naa; ni ye naa gdziñ lo me, zaatne no gdziñ to.

Sodiidz naa lo to ganle zha bzhaac naa. Lëëtaaque no naa lo guidzliu win ne lë Patmos, ga ngoguiu zho naa loxaque ne noseed naa miech Xtiidz Dios, miñe biaadlu Jesús zeene biaad me lo guidzliu.

<sup>10</sup> Tib dze, lëëtaque nacnie Espíritu Sant naa nozodiidznie naa Dios, tibaque zeene nguiedz zëeb tib tsi meñ co, pale tsi tib trompet;

<sup>11</sup> në me lo naa:

—Grëtaa ncuaañe ran luu nu niina, pquiaaw tib lo guits pxeela lo grëse zha ne ngab lo naa, grë zha ne no gza gadz guiedz rii nëz Asia: Efés, Smirn, Pérgamo, Tiatir, Sardis, Filadelf, ni Laodicé.

<sup>12</sup> Ptsire lo naa ni naa gwi naa dien cho ga sca rnee lo naa. Zeene bui naa, gon naa gadz candeler niaa niapse guib or.

<sup>13</sup> Glowtaa lo gza candeler co zo tib mgui zigne rlu miech lo guidzliu rii, nacw me tib lar nool rdziña haxta yan ni me, ni ndxie tib cinch niaa niapse guib or ngali ro zdoo me.

<sup>14</sup> Ine bie rna guitsguic me, zootle zhiil nquits, zootgaa luu guieg, masaque riaazbel bziaalo me.

<sup>15</sup> Ni mew, masaque rquiabniw zigne rquiabni guib brons zeene rlozh riaañmbew, zeene rrieenëzgaaw lo gui; tsi mew, masaque rio bi rnee

me zig rio bi grē guiubee nroob ne zhoob naal nis.

<sup>16</sup> Nia me mine nēz derech, nzhen me gadz mel gbaa; ni zob tib spad ro me, zigtaa nēz zhits spad cow zigtaa nēz low, gropse nēza ndox. Masaque biinidoo ne rriee lo me, zigne rlu lo ngbidz zeene lega recye lo ngbidz.

<sup>17</sup> Zeene gon naa me, mbe biaab naa zhan ni me zig tib zha ne gutle. Dzigo blis me nia derech me pxobnia me guic naa, nē me lo naa:

—jGdziebd luu! Naa psilo ni naa csiaa, naa psan grētaa ncuaane no, ni naa gnitlow;

<sup>18</sup> ni mban naa. Nli gut naa per briebaan naa, mban naa niina, ni gdzindraa dze ne guet naa; lадznia naa no guielgut. jGdziebd luu sca!

<sup>19</sup> Grēse ncuaane noyan luu nu niina, pquiaaw lo guits grēsew, niicle mine noyaclew, mine naragaa gaca.

<sup>20</sup> Znu gon nac mine blozh gon luu ga: gadz mel gbaa ne gon luu nzheen naa ga con nia derech naa, tib tib mel co nac tib tib zha ne quianap yadoo ne no gza guiedz co; laa gza gadz candeler co, nac tib tib yadoo co.

## 2

### *Diidz ne bnee Jesús lo zha Efés*

<sup>1</sup> Blozh ga nē me lo naa:

—Mine gni naa lo luu nu niina, pquiaaw pxeela Efés, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne nzhen gza gadz mel gbaa co, men ne zodeed vuilt lo gza gadz candeler ne niaa niapse guiib or ga, rnee me:

<sup>2</sup> 'Nan naa zha mban to, nan naa pa lotaa noxco to run to xtsin naa, ni nacle to zha ne lega znuse guiaan zdo; stiba, ib randzede to grē zha ntseeb. Grē zha ne ziyaad i rnee zho Dios pxeel zho ziadnee zho xtiidz me, per pquia to been to zho prueb, haxta gocnan to rquidie zho.

<sup>3</sup> Nan naa zha nactaa guielnē ne noded to loxaque ne rililadz to naa; per niicle scaw tibaque dziits zo to, ib riaand zdo to.

<sup>4</sup> 'Loxaque naca no tib ncuaane glisqui naa lo to: jRleyniedraa to naa niina, zigne rleynietaa to naa glo, zeene glopaa bliladz to xtidz naa!

<sup>5</sup> Golsoladz pa lo pxin to. Golbiire golgac stib zigne nac to glo zeene psilo bliladz to xtidz naa; sac gon, telne gacwende to, ible zial naa i zialtichee naa xcandeler to zaatne zow.

<sup>6</sup> 'Nli rleyniedraa to naa scataa, per rley naa ran naa ib rdziguiende to grē ncuaane ndzinlid ne run zha Nicolaít, sac tel naa, ni lalnu ib rdziguiend naa ncuaane run zho.

<sup>7</sup> 'Zha ne rioguicle godiidz rii, yquiaadiag zho ganle zha rnee Espíritu Sant lo grē zha ne no xnēz naa, rnee me: Grēse zha ne gdeete diidz gac-wet zho lo ncuaane gunctal xtol zho, zha co ygaa gow xnex yag ne rdeed guielmban ga, mine zob len huert ndzon ne rap Dios ga.”

### *Diidz ne bnee Jesús lo zha Smirn*

<sup>8</sup> Blozh ga nē me lo naa:

—Pquiaa mine gni naa lo luu nu, pxeela Smirn, lo zha ne quianap grē zha ne ngab xnēz naa ga, gudz lo zho: “Znu nac xtiidz men ne psilo grētaa ncuaane no, men ne csiaala, men ne gut ga ni brieaban me, rnee me:

<sup>9</sup> 'Ran naa zha nactaa grē guielnē ne noded to. Ran naa mban rac to guiend grē ncuaane yquiin to (nli-gaa peet rapde to lo guidzliu, per guielnzaac ne bgaa to i ngab to lo Dios, nroob nona). Ran naa, grē zha ne rnee i xpēed Dios zho sac zhasi zha Israel nac zho, no zho rneenē zho to; per nlid gon xpēed Dios nac zho, sac zhiwseed mendox zienal zho.

<sup>10</sup> 'Nroob grē guielnē ne ziaadyob gan to, per gdziebde to. Squil mendox miech, gnab zho tso to ladzguiib; ga nagon glu to dien pe nli dib zdo to rililadz to naa. Nli nzianlaa to guiab ladzguiib, per tib tsiise ngbidz sca yquiaanal zho to. Laga mban to lo guidzliu sca, ible csaande to zhiwseed naa, zeena ycaania to guielmban ndzon ne gnedz naa lo to.

11 'Zha ne rioguicle godiidz rii, yquiaadiag zho ganle zha rnee Espíritu Sant lo zha ne no xnëz naa, rnee me: Zha ne tiblifique tsoxco gun miñe rnabey Dios, led yedraa zha co tsoxtseeb guey gabil."

*Diidz ne bnee Jesús lo zha Pérgamo*

12 Blozh ga, nëque me lo naa:

—Miñe gni naa lo luu nu, pquiaaw pxeela Pérgamo, lo zha ne quianap grë zha ne ngab xnëz naa ga, gudz lo zho: "Znu nac xtiidz men ne nzobro tib spad lots ne ndox gropse nëz, rnee me:

13 'Nanpaa naa masaque mendox rnabey lad guiedz ne no to i, per ran naa tiblifique dib zdoo to rnalo to naa, niicle gon to zha psacsi zho Antip, beet zho me i, men ne scataa bioxco bnee xtidz naa lo miech.

14 'Per no chop ncuaane gon glisqui naa lo to: Lëda i run to randze to grë zha ne squi run zigne been Balam, men ne pquiil Balac bloo Balac guic grë zha Israel beenctal zho xtol zho, dow zho xpëel grë ma ne biogon lo mdio, ni pquiangob zho zha ne led tsieeld zho.

15 Lëe tiba ga, laa stiba, randze to zha ne bii zienal zhiwseed yozh zha nicolaít; tel naa, ni lalnu rdziguiend naa wseed co.

16 'Laa naa rso diidz lo to: golnab perdon, ni golnee lo grë zha co csaan zho grë ncuaane ndzinlid ne run zho; sac gon, telne gond zho diidz, ible zial naa zialtilnie naa zho con spad ne zob ro naa nu.

17 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa, rnee me: Zha ne gdeete diidz lo grë ncuaane gunctal xtol zho, zded naa guielwagw ne rap naa gbaa yquiin zho; ni zded naa tibga quie nquits lo zho, lo quie co quia lë cub zho, ni zhase gacnan zha nac lë co zho."

*Diidz ne bnee Jesús lo zha Tiatir*

18 Blozh min co, në me:

—Ye lo zha ne quianap zha ne no xnëz naa guiedz Tiatir, pxeel diidz rii, gudz lo zho: "Znu nac xtiidz Xpëed

Dios, men ne masaque riaazbel bziaalo, men ne masaque rquiabni ni zigne rquiabni guib brons ne tibaque riar; rnee me:

19 'Nan naa grëse zha mban to; ran naa pa lotaa rleyne to naa, dib zdoo to riladz to cho nac naa, noxco to quiaayun to xtsin naa, tiblifique rac to dziits zo to lo xtidz naa; ran naa noxcoraa to quiaayun to xtsin naa niina.

20 'Per no tib ncuaane no glisqui naa lo to: lëda i gon run to randze to wnaa ne lë Jezabel i, rnee me Dios rsiaab guic me grë ncuaane rnee me, per nlida; sac gon, loxaque noquidie me grë zha ne no xnëz naa, noquiil me zho rquiangob zho grë zha ne led tsieeld zho, ni row zho xpëel grë ma ne riogon lo mdio.

21 Blactaale pquiambëz naa nab me perdon, ntsëe me lo xquielmban me; per nëd me csaan me grë guielyozh ne run me i.

22 'Gacnan to sca ganle, laa naa gnabey glan me tib guielguidzdox, tsiechedraa me lo caxtigw co; scaque grëse zha ne zienal zhiwseed me, nroob guielnë ne gnabey naa ted zho, tel laa zho csaand grë guielyozh co.

23 Ni haxta zut naa zho, zeena sca gan grëse miech ne no xnëz naa ganle, naasi nan naa pe rza guic miech, pe rza zdoo zho; gacxe waa, tel pe ncuaane run zho, zdedse naa miñe rieguial zho tib tib zho.

24 'Sangue to grë to zha ne zienal guielyozh ne rlu wnaa qui (wseed ne rnee zho i rdeed nroob guielbiini, per nand zho gon zhiwseed mendoxa), peet glisquidraa naa lo to.

25 Per none gon tiblifique golgac, zeena ine dib zdoo to rnalo to naa gal dze ne laa naa guial stib.

26-28 Sac gon, grëse zha ne gdeete diidz lo grë ncuaane gunctal xtol zho, sinque tibaque tsoxco zho gban zho zigne rnabey naa, haxta gdzin dze ne nitlo guidzliu, zded naa tib mel gbaa lo zho, mel ne rlan ral sil, ni so naa zho gnabey zho grë guiedz. Naa gded guielrnabey co lo zho, zigne bneedz Pxoz naaw lo naa; ni lalnu



yquiad zdoos zho, grëse miech ntseeb, zunquish zho zho grëtaa guielntseeb ne been zho.

<sup>29</sup> 'iGrëse zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa!"

### 3

#### *Diidz ne bnee Jesús lo zha Sardis*

<sup>1</sup> Blozh ga, në me:

—Mïne gni naa lo luu nu, pquiaaw pxeela guiedz Sardis, lo zha ne quianap grë zha ne ngab xnëz naa, gudz lo zho: "Znu nac xtiidz men ne nzhen gadz mel gbaa, men ne nacie zhiEspíritu Dios, Espíritu ne rdeed gadz guielbiini, rnee me:

'Nan naa gon pe nac grë ncuane run to, niicle zëeb diidz mban to, per par naa miech gutle nac to.

<sup>2</sup> 'iGolcuae zhimcaalo to sca! Golsodziits lo spalalse xtiidz naa mine rsoladz to, sac gon zhile laa to lozh guiaanladza. Ne nligaa, ran naa quiaayunde to xsiin Dios zig none gaca.

<sup>3</sup> Golsoladz ganle zha nac grë wseed ne gocnan to, grë wseed ne bin to; dzigo goltsienala, ni golinab lo Dios gun me to perdon. Sac gon, telne tsienalde tow, zeene laa naa guial, lega nacle zeene gan to laa naa zole lo to; zig rzac zha ne rzëeb ngbaan lidz.

<sup>4</sup> 'Sca nac to, per lo to i gon no bla zha ne bii mbe zdoos, sac zienald zho grë ncuane run to; rriequia rdeete zho diidz guiacbeed xab nquits zho ga. Ni zha co nagon rieguial senal zhits naa, sac gop zho xab zho cuidad.

<sup>5</sup> 'Golgona ganle, grëse zha ne gdeete diidz lo grë ncuane gunctal xtol zho, scaania zho tib lar nquitsbie gacw zho; lë zhow, lëe quialew lo guits ne quia lë grë zha ne ygaa tib guielmban ndzon ga; haxta zanie naa zho lo Pxoos naa ni lo grë xanj me, guiep naa: Lëe zha rii gon no xnëz naa.

<sup>6</sup> 'Zha ne rioguicle grë godiidz rii, yquiaadiag zho ganle zha rnee Espíritu Sant lo grë zha ne ngab xnëz naa."

#### *Diidz ne bnee Jesús lo zha Filadelf*

<sup>7</sup> Blozh ga në me:

—Mïne gni naa niina, pquiaaw pxeela guiedz Filadelf, lo zha ne quianap grë zha ne ngab xnëz naa, gudz lo zho: "Men mbe ne rapd ni tib dol, men ne rnee niapse diidzli, men ne rnabey zigne bnabey rey David; zaatne rxal me, tsod zha ne grieelo csiooga, zaatne csiooggaa mew, tsod zha ne grieelo cxala; znu nac xtiidz me, rnee me lo to:

<sup>8</sup> 'Nan naa grëse zha mban to; niicle ne squi bii nsis rac to, per rioxco to ron to xtidz naa, ni rqueetsde to ne nli rililadz to naa. Gacxe waa, rriequia laa naa rxal tib puert ted to, ni choot grieelod csioog puert co.

<sup>9</sup> Bii zan to ganle, zeene laa naa cxel gza zha ne ngab lo mendox i, guiaad zho guiadquitsgzhiz zho lo to, zha ne noquidie i rnee zho xnëz naa no zho. Ga gan zho ganle nli rleyne naa to.

<sup>10</sup> Ne squi tiblque rac to ron to xtidz naa, peet güeynied guic to niicle pquiana miech to, ible squianaap naa to, gande to guielndox ne gan grë miech ne ndxie lo guidzliu.

<sup>11</sup> 'Golsoladza ganle, merle guial naa. Golguien csaande to xtidz naa mine nanle to, zeena tsod stib zha ne ctiche mine rieguial to gnedz naa lo to.

<sup>12</sup> Grëse zha ne gdeete diidz lo grë ncuane gunctal xtol zho, so naa zho gac zho zig grë pilar nroob ne zo len xyadoo ro Dios, ni gdzindraa dze ne griece zho ga; cho pilar co, ga yquia naa lë Dios, ga yquia naa tib lë cub naa. Laa zho ngable guiedz ne rnabey Dios ga; lëe guiedz co nac Jerusalén cub ne gnabey me quiet gbaa.

<sup>13</sup> 'Zha ne rioguicle godiidz rii, yquiaadiag zho ganle zha rnee Espíritu Sant lo grë zha ne no xnëz naa."

#### *Diidz ne bnee Jesús lo zha Laodicé*

<sup>14</sup> Ni në me:

—Mïne gni naa niina, pquiaaw pxeela guiedz Laodicé, lo zha ne quianap grë zha ne ngab xnëz naa ga,

gudz lo zho: “Meñ ne rnee niapse di-idzli, meñ ne run grëse miñe rnabey Dios, meñ ne bzo Dios psan grëse ncuaane no, znu nac xtiidz me, rnee me lo to:

<sup>15</sup> 'Nan naa grëse zha mban to. Ran naa noxcod to grë miñe rnabey naa to, ni niicle rsaandgaa tow; nac to zig nac tib ncuaane loxaque ndzëyopse, niicle niagda ni niicle nlëëdgaaw. ¡Tebaa nac to zig tib nis yag, zig tib nis lëëgaa!

<sup>16</sup> Per na gon ne squi nac to zig tib nis ndzëyopse, ni lalnu rdziguiend naa ncuaane run to. ¡Zhile gon laa to gunctsib naa!

<sup>17</sup> 'Rnee to grëse ncuaane rquiin to laaw quianiele to, ible peet liaadz racdraa lo to, ¡ni riende to gon ni lalnu peet nonde to! To nac miech ne mazdraa mban, peet rapde to, ni lar ne ctse lad to guiend, rrieequia haxta ni lo to roldraa.

<sup>18</sup> Laa naa rso diidz lo to: Telne racladz to nlipaa gapchen to, goltë lo naa, naa cto guiib or ne mazdraa wen lo to; xab tow, naa cto lar ne mazdraa nquits gacw to, zeena ctoladzniedraa to to ne squi guiend pe ctse lad to; haxta nis rmed ne tso bziaalo to, naa gnedza, zeena gbiire gan to stib.

<sup>19</sup> 'Grë zha ne rleynie naa, rlisqui naa grë ncuaane nonguield ne run zho, rteed naa zho tib caxtigw parne cseed zho ndzinli gban zho; gacxe waa golgac ndzinli stib, goltsoxco miñe rnabey naa.

<sup>20</sup> Laa naa quiambëz to gon gbiire gbig to lo naa. Rrieequia ro lidz to zo naa, quiabedz naa to. Zha ne yquiabladz cxal ro lidz sëëb naa, zdeed naa, ni haxta sobnie naa zho diowxtsee no grop no.

<sup>21</sup> Grëse zha ne gdeete diidz lo grë ncuaane gunctal xtol zho, zded naa diidz sob zho cue naa, zaatne sob naa gnabey naa; zigne zoob naa cue PxoZ naa niina nonabey no; sac tel naa, bdete naa diidz niun naa miñe rnabey menox.

<sup>22</sup> 'Zha ne rioguicle godiidz rii, yquiaadiag zho ganle zha rnee

Espíritu Sant lo grë zha ne no xnëz naa.”

## 4

### *Roolnie zho Dios gbaa*

<sup>1</sup> Zeene bui naa stib, gon naa laa tib puert quia zhan gbaa, nzhialse puert co. Horco biire bin naa tsi meñ ne bnee lo naa ga glo, meñ ne nac tsi ga zig tsi tib trompet, në me:

—Biep, dë nu ganle, zeena glu naa lo luu zha nac grë ncuaane ziaadyob gac.

<sup>2</sup> Zigne sca në me, hor co blu Espíritu Sant lo naa, gon naa laa tib xcan zo gbaa, tib xcan ne rzob meñ ne rnabeya. Lo xcan co, ga zob tib meñ co,

<sup>3</sup> masaque rbebni me zigne rbebni quie ne rnee zho jasp, quie ne rnee-gaa zho cornalin. Igose xcan co quia tib guitye, rbebniw zigne rbebni quie ne rnee zho smerald;

<sup>4</sup> ni zo zgalptap xcan igow, tibga mengol zob tib tib lo xcan co, dib nquitsbiese rna xab me, ni zob tibga coron or guic me.

<sup>5-6</sup> Masaque riab belye, ratsie rnee nguzi, ni zëëb tsi miech zaatne zo xcan ne riaan glowtaa ga. Zaatne nac delant lo xcan co, masaque rluw zig rlu lo nisdoo ni rbebel zig rbebel quie zed; ni noquia gadz biini nroob ga, lëë gadz biini co nac gadz guielbiini ne rap Dios.

Igo xcan co, ga zo tap bult mban, tibgaw zo tib nëz; nëz low, nëz zhit-saquew zob bziaalow.

<sup>7</sup> Tiba rlu zig rlu meedz, stiba rlu zig rlu tib ngon yeen; laa schop miñe riaan ga, tiba rac lo zig rac lo miech, laa stiba rlu zig rlu tib msi nroob ne quiasiibe.

<sup>8</sup> Tib tiba zob xoopga xiila, ndziib bziaalow zhits xiila, len xiila ne; tibaque nguiedz zëëb tsiw, rneew:

¡Meñ ndzondoo nac Dios!

¡Meñ rnabey nac me, nroob poder ne rap me!

Notaque me, me ga no padzeela, me no niina, ni lëëque me ga no guiaad.

<sup>9</sup> Gza tap bult mban co, roolniew meṇ ne zob lo xcan co, (meṇ ne gdziṇd dze guet) rsannona me, ni rdeeda xquizh lo me. Zigse sca run gza bult co,

<sup>10</sup> scasaque gza galptap meṅgol ne zob ga, rquitsgzhīb me lo meṇ ne zob lo xcan ro co, gzase me, rgob me xcoron me rguix mew nēz lo meṇ ne zob lo xcan co, ni rnee me:

<sup>11</sup> Luu nac xDios no, luu nac meṇ ne rnabey no.

Luuse nac meṇ ne rieguial̄ dziuunnon no,

ni gnee no grē diidz ndzon lo luu.

Nroob poder ne rap luu, sac grētaa ncuaane no, luu bzaaw;

laaw bīaa sac ible sca gocladz luu, ni laaw nīaagaa nīina, sac ible sca racladz luu.

## 5

### *Tib guits ne nzhidoo gadz lē cint*

<sup>1</sup> Zeene bui naa stib, gonpaa naa meṇ ne zob lo xcan ro co, nose tib guits nroob nīa derech me. Gropse nēz guits co quia, ndibēdsew, nzhidoo gaw gadz lē cint.

<sup>2</sup> Ni gon naa tib anjl, tib meṇ macis rlu me, nguiedz zēēb tsi me, bnabdidz me rēb me:

—¿Cho rieguial̄ cchug cint ne nzhidoo guits qui, cxal zho low?

<sup>3</sup> Ni tib choot pxald lo guits co, niicle gbaaw niicle lo guidzliuw, niicle zhan guidzliugaaw, brieequiad tib zha ne nchug cint co, nwi zho lo guits co.

<sup>4</sup> Mban goc naa, psilo naa nguiedz roon naa, gon naa sca brieequiad tib zha ne rieguial̄ nخال lo guits co, nlab zho low.

<sup>5</sup> Dzigo bnee tib meṅgol ne zo gax lo xcan co, nē me lo naa:

—Goond luu. Lēz ganle, meṇ ne brieequia lo xtii Judá, lo xtii rey David, me cchug gza gadz cint ne nzhidoo guits qui, me cxal low. Ible me rieguial̄a, sac gon psiaablo me grēse zha ne rlēē lo me; rrieequia nac me zig tib meedz.

<sup>6</sup> Horco bui naa zaatne nac lo xcan ro co, gon naa glowntaa lo gza bult

mban co ni lo gza meṅgol co, ga zo tib Carner yeen. Rlupaa zha psacsi zho ma, zeene beet zho ma. Zob gadz zhoz mā, ni zob gadz bzīaalo ma, rrieequia gza gadz bzīaalo ma ga, miṇ co nac gadz guiel̄biini ne rdeed zhiEspíritu Dios.

<sup>7</sup> Dzigo wbig meṇ ne nac Carner yeen co, bnaaz me guits ne no nīa derech meṇ ne zob lo xcan ro co.

<sup>8</sup> Zigne bnaaz me guits co, laa gza bult mban co, ni gza galptap meṅgol co pquitsgzhīb lo me. Tib tib meṅgol co nzheṇse me tib arp ni tib ptsigui or, rso tib gox ndzon len̄ ptsigui co (rrieequia gox co nac grē diidz ndzon ne rnee grē zha ne no xnēz Dios zeene rzodiidznie zho me).

<sup>9</sup> Dzigo psilo gza meṅgol co biil̄ me tib cant cub. Znu rnee lo cant co:

īble luu rieguial̄ ycaania guits qui, luu rieguial̄ cchug gza cint ne nzhidoo i!

Sac luu bded grētaa guiel̄nē co psacsi zho luu, haxta bzhīee xchen luu;

sca psilaa luu grēlose dii miech, tel̄ pa guiedztaa nac zho, tel̄ pa diidztaa rnee zho, tel̄ pa naciontaa ngab zho.

<sup>10</sup> Laa luu bzhīi no grē no gac no tib guiedz cub,

guiedz ne gnabey Dios; no gac pxoz ne gun̄ dziin lo me, masaque tipse gban no zeene gnabey me lo guidzliu.

<sup>11</sup> Zeene bui naa, gon naa anjl guizhiu ne ndxie zaatne zo xcan ro co, led zha ne grieelod glab new.

<sup>12</sup> Nguiedz zēēb tsi zho grē zho gza bult mban co, ni grē meṅgol co, rnee zho:

īMeṇ non nac meṇ ne nac Carner yeen ne squi rlu beet zho!

Me rieguial̄ gnabey, meṇ ro nac me, choot grieelod csīaablo me.

Ladznīa me no grēse guiel̄nzaac, me rap grētaa guiel̄rien,

Meṇ ndzon nac me, me none dziuunnon ne, me none dziool̄nie ne.

<sup>13</sup> Horco grēse miech, grēse ma, grēse ncuaane bzaa Dios, zigtaa

gbaaw, zigtagaa lo guidzliuw; zigtaa zhan guidzliuw, zigtagaa lo nisdoo; nguiedz zëeb tsi zho, rnee zho: ÿNliw, men ne zob lo xcan ro qui, ni men ne nac Carner yeen qui, ible rieguial dzuunnon ne grop me! ÿMe rnabey, lo me none gnee ne grëtaa diidz ndzon; nadzew, gzhew, ni grëragaa izdoo ne ziaadraaw!

<sup>14</sup> Pquiab gza tap bult co, rëb zho:

—ÿScaw, sca no gaca!

Dzigo gzase mengol co, laa zho pquiitgzhib lo men ne zob lo xcan ro co; psilo zho rnee zho grë diidz ndzon lo me.

## 6

### *Gza gadz sell co*

<sup>1</sup> Blozh ga, gonpaa naa zeene laa men ne nac Carner yeen co pchug primer cint ne nzhidoo guits co. Horco laa tib bult mban co bnee; masaque nac tsiw zig rio bi rnee nguzi, nëw lo naa:

—ÿDë ganle gwi luu!

<sup>2</sup> Dzigo wbig naa, gon naa tib guay nquits. Zhits guay co zob tib men co nzhen me tib yag arcw ne rquiaa zho flech; blozhse pcaania me tib coron ne rzob guic zha rnabey, dzigo laa me brieë. Ine zob nze me lad guay co, laa me zie ziegun me gan lo grë zha ne rlëë lo me.

<sup>3</sup> Blozh ga, laa men ne nac Carner yeen co pchug stib cint ne nzhidoo guits co. Dzigo bredz stib bult co naa.

<sup>4</sup> Dzigo bia naa, gon naa laa stib guay nizhnie brieë, zob stib men co lad ma. Blozhse pcaania me tib spad roob, ni pcaa me diidzbey tsielodil me miech lo guidzliu, zeena gutlsa zho; laa me brieë ga, laa me zie.

<sup>5</sup> Zeene laa men ne nac Carner yeen co pchug bion cint ne nzhidoo guits co, dzigo bredz stib bult co naa, nëw lo naa:

—ÿDë ganle gwi luu!

Dzigo gon naa tib guay ngas, scasaque zob stib men co lad ma, nzhen me tib zhiguiib.

<sup>6</sup> Ni groltaa zaatne zo gza bult mban co, zëeb tsi tib men co, rnee me:

—Tib kiltaa zhobxtil gon ycaa zha ne gun dziin tib dze; tel zhobgaaw, tsontaa kila ycaa zho; sangue nceit ni vin ib ygaald luuw.

<sup>7</sup> Laa zeene goc cint co tap ziechug men ne nac Carner yeen co, dzigo laa stib bult mban co bredz naa.

<sup>8</sup> Horco, zeene bui naa, gon naa tib guay nguets; lad guay co zob tib zha co lë Guielgut; zhiits co nal stib zho lë Gabil. Lo tap lal ne nlë miech ne ndxie lo guidzliu, pcaa grop zha co diidzbey tsiegun zho tib lal grë miech co; zha ne guet lo dil, zha ne guet lo gbin, zha ne guet lo guielguidz, zha ne guetga lo grë ma ntseeb.

<sup>9</sup> Dzigo pchug men ne nac Carner yeen co stib cint co, goca gaay. Horco, zaatne nac zhan mezh ne nac mezh lo pcoog, ga gon naa grëse zha ne psacsi miech, beet miech zho loxaque ne bnee zho Xtiidz Dios, ni dib zdoo zho bliladz zhow.

<sup>10</sup> Nguiedz zëeb tsi zho rnee zho:

—Luu ne nac luu men roob ne rnabey, luu ne nac luu men ne rnee niapse diidzli, ÿpa hor dzigo cuedz luu grë miech ne ndxie lo guidzliu, zha ne scataa psacsi no? ÿPa hor gunquish luu zho grëtaa mine been zho ga?

<sup>11</sup> Dzigo bdeed me lar nquits got zho; rëb me lo zho no cuëz zho zniip, sac grëraa zha ne nacgrë zho ngab zho lo Jesús, no spalal zha ne naraa csacsi miech zigne psacsi miech zho; haxta gza zho dzigo laa me gun guielwxtis.

<sup>12</sup> Blozhse ga, laa Carner yeen co pchug stib cint co, goca xoop; hor co laa tib zhodox bni. Gonpaa naa zeene laa lo ngbidz pcow, zig nac zeen tib lar ngas pquia lo ngbidz; laa mëë zig rludaa ren, sca nizhnie rlu lo mëë;

<sup>13</sup> grë mel ne ndziib gbaa, masaque bliaal ma lo guidzliu zig rliaal grë guigw yeen zeene rrieë medox.

<sup>14</sup> Znuse bdibëd gbaa, goca zigne racse grë guits ne rdibëd; grë gui, grë guidzliu win ne no lo nisdoo, nëzrii nëzrec biaan.



<sup>15</sup> Dzigo grëse zha ne nac zha rnabey lo guidzliu, grë zha ne nac zha non, grë zha ne rapchen, grë zha nroob ne rnabey lo menguiib, grë zha nroob ne non xtiidz, ni grëragaa miech, niicle grë zha ne run xtsiin beña, niicle grëgaa zha ne run xtsiin zhala, grëse zho biolan, zha ne biolan len grë bliee, zha ne biolangaa len grëraa quie ne no dan;

<sup>16</sup> nguiedz roptsie zho rnee zho lo grë gui co, lo grë quie co:

—¡Gol liaal lad no, gol colan no, zeena gandraa men ne zob lo xcan ro co no! ¡Gol colan no, zeena dziaand no grëtaa guielnë ne cxeel men ne nac Carner yeen co!

<sup>17</sup> ¡Sac nasi laa dze ro co bdzin! ¡Laa guielnëdox co nagon ziaadle! ¡Ncuane lëëbd no low!

## 7

### *Zha ne pcuee lo grëse zha Israel*

<sup>1</sup> Bded ga, gon naa tap anjl. Lo gza tap lad guidzliu, tibga anjl co zo tib lad nocuëëz me me. Wdzeepaaw, per ni tib zhiblag yag rnidraa, niicle lo nidoow dzese biaca; sac ni palal rriedraa me lo guidzliu.

<sup>2</sup> Tibaque zeene brieequia stib anjl nëz ne rlan ngbidz, neyse me xsell Dios; nguiedz bnee me lo gza tap anjl co (anjl ne pcaa diidzbey ga gun guielqui lo guidzliu ni lo nidoow) rëb me:

<sup>3</sup> —¡Golcuëz zniip! Gunde to guielqui lo guidzliu niina, niicle lo nidoow, niiclegaa grë yaga; sac naraa lozh guioquiaa no xsell xDios ne quia grë zha ne run xtsiin me.

<sup>4-8</sup> Zeene blozh pquia sell co quia grë miech co, bin naa lo grë zha ne ziaad lo xtii zha Israel, rgaa zho tib gayoo chooptap mil:

Tsiipchop mil zha xtii Judá,  
tsiipchop mil zha xtii Rubén,  
tsiipchop mil zha xtii Gad,  
tsiipchop mil zha xtii Aser,  
tsiipchop mil zha xtii Neftalí,  
tsiipchop mil zha xtii Manasés,  
tsiipchop mil zha xtii Simeón,  
tsiipchop mil zha xtii Leví,

tsiipchop mil zha xtii Isacar,  
tsiipchop mil zha xtii José,  
tsiipchop mil zha xtii Benjamín.

<sup>9</sup> Zeene bui naa zaatne zo xcan ro co, zaatne zo men ne nac Carner yeen co, miech guizhiu ne gon naa ndxie ga; grë lose dii miech ne ndxie dib lo guidzliuw. Ne nligaa miech guizhiuw, led miech ne lëbd ne glab new; grëse zho niapse lar nquits nacw zho, ni no tiblëga zin nguia nia zho;

<sup>10</sup> nguiedz zëëb tsi zho, rnee zho: Dios, men ne rdziuunbey ne, men ne zob lo xcan ro qui, me nac men ne psilaa ne lo grëtaa xtol ne;

me ni men ne nac Carner yeen qui.

<sup>11</sup> Horco grëse anjl ne ndxie igo xcan ro co, igo zaatne zob grë mengol co, ni zo gza tap bult mban co; grëse zho laa zho pquiitgzhib nëz lo xcan co, haxta bzooblo zho lo liu, rdeed zho xquizh lo Dios

<sup>12</sup> rnee zho: ¡Scaw! Luu none dzioolnie no, none tibaque gneedz no xquizh lo luu, luu rieguial dziuunnon no; sac luu nac xDios no. Luu nac nac men ne rienraa, men ne rap poder; gacxe waa luu none ycaania grëse diidz ndzon, gzataa dze, niicle nadzew, gzhew, ni grëragaa izdoo ne ziaada. ¡Sca none gaca!

<sup>13</sup> Dzigo bnabdiidz tib mengol co, në me lo naa:

—¡Pe nan luu sca cho nac grë zha ne nacw lar nquits qui? ¡Pe nan luu pa nëz ziaad zho?

<sup>14</sup> Dzigo rep naa lo me:

—Nand naaw. Bzhiguel bnëw lo naa.

Nëchaa me:

—Lëë grë zha qui gon bded grëtaa guielnëdox ne goc lo guidzliu. Laa zho nacw lar nquits qui, sac wbig zho lo Jesús psanmbe xchen me zho lo dol.

<sup>15</sup> Gacxe waa squitaa ndzon ndxie zho gax lo zhixcan ro Dios, dze guieel quiayoolnie zho me len xyadoo ro me.

Me nac men ne quianap zho grëse zho;

<sup>16</sup> led yedraa niina guet gbin zho, guet nisgaa zho; led yedraa niina ct-suu ngbidz zho, sonëëggaa zho.

<sup>17</sup> Men ne nac Carner yeen ne zo delant lo xcan ro qui, me gdeed ncuaane gow zho, ni zigne rienie baxtor xpëcwxiil zho ro guiuu, sca zienie me zho zaatne quiada nis ne rdeed guielmban. Led yedraa niina goon zho.

## 8

<sup>1</sup> Laa zeene laa men ne nac Carner yeen co pchug stib cint ne nzhidoo guits co, cint ne naca gadz ga, dzese biac gbaa; xtselaa sca biac dze gbaa.

<sup>2</sup> Blozh ga, gon naa zeene pcaania gadz anjl ne rzo lo Dios, tibga trompet.

<sup>3</sup> Ni brieequia stib anjl nzhen tib ptsigui niaa niapse guuib or. Zigne bdzin me, bzo me delant lo xcan ro co, zaatne zo mezh or ne nac lo pcoog; ga pcaania me nroob yaal parne ct-sieel mew grë diidz ne rnee grë miech ne no xnëz Dios zeene rzodiidznie zho Dios.

<sup>4</sup> Dzigo bzëëg anjl co yaal co, tipse goc gox co grëw xtiidz grë zha ne no xnëz Dios, laaw bdzin lo Dios.

<sup>5</sup> Blozh ga, ptop me grë gui ne ndziib lo pcoog co bloo mew len ptsigui ne nzhen me ga, blaal mew lo guidzliu; dzigo psilo masaque rnee nguizi, rio bi, riab belye ne, ni bni tib zhodox.

### *Pcuedz gadz anjl trompet*

<sup>6</sup> Horco laa gza gadz anjl ne pcaania gza gadz trompet co, laa zho nsinle nzhen, parne ycuedz zhow.

<sup>7</sup> Zeene laa tib anjl co pcuedz zhitrompet zho, hor co psilo bliaal guiequie lo guidzliu ni bliaal guilëë notsa ren. Gzoob ne telne glë guidzliu tson lal, dzigo masaque tib lala bnitlo, bnitlo grëse yag, grëse lo guizh nguia ne no low.

<sup>8</sup> Blozh ga, zeene laa stib anjl co pcuedz xquuib, hor co biab tib ncuaan co nisdoo, masaque rluw zig rlu tib gui nroob ne quiayazbel. Gzoob ne

tel glë nisdoo tson lal, bnitlo tib lala, bialow niapse ren zeene laa ncuaan co biab low.

<sup>9</sup> Bnitlo grëse ma, grëse guizh ne no lo tib lalga nis co, haxta grë barcw ne no low bnitlo.

<sup>10</sup> Loxaque blozh goc min co, laa stib anjl co pcuedzaque xquuib zho, hor co laa tib mel nroob bringaa gbaa, masaque rso ma bel zig razbel tib lë guier, biab ma lo guidzliu. Lo grë guubee, lo grë zhlian ne no lo guidzliu, lo tson lal ne gzoob ne naca, pxin ma tib lala.

<sup>11</sup> Grëse nis co goc nlayag, ndal miech ne gut low. Nacne bleelë zho mel co Nlayag.

<sup>12</sup> Zeene laa stib anjl co pcuedz xquuib goc zho tap, hor co zigtaa lo ngbidza, zigtagaa lo mëëw, biuu tib niaza, schop niazaquew biaan rziini; grë mel ne ndziib gbaa, gzoob ne lo tson lal ne nac ma, hor co biuu tib lal ma. Rlupaa lega net net rquiaa ngbidz; zaatne nacgaa guieel, ni palal peet rlud.

<sup>13</sup> Laa naa nowi, tibaque zeene gon naa laa tib anjl bded groltaa zhan gbaa, haxta rlupaa rio bi zie me lo me, nguiedz zëëb tsi me rnee me:

—jProbsaxe grë miech ne ndxie lo guidzliu! Sac ncuaane ntseebraa gac, zeene laa ston anjl qui ycuedz xquuib me.

## 9

<sup>1-2</sup> Zeene laa anjl ne nac zho gaay ga pcuedz xquuib, hor co gon naa laa anjl ne brieë gbaa padzeela ga pcaania tib liow, pxal zho ro tib guierdoo ro. Zeene laa ro guieer co bzial, per nli goxdoo ne brieë ga, tib psioogsew zhan gbaa, per ni palal rludraa lo ngbidz.

<sup>3</sup> Lo gox co, ga brieë tiblo metso bliaal, bioogse ma gdipse lo guidzliu, grëse ma zob xcots ma, zig zob xcots meegu.

<sup>4</sup> Nacle diidz, peet gund ma grë guizh nguia, grë yag ne zëëb lo guidzliu, sinque laa ma tsie tsiesacsi ma grëse miech ne quiad xbey Dios quia.

<sup>5</sup> Yoobdox ne yquia zaatne yquiaaxcots ma, zigne rquia yoob zaatne rquiaaxcots meegu; per gute ma zho, loxaque sca csaci ma zho dipse len gaay mää.

<sup>6</sup> Len dze co, haxta zhal miech yguib zho dien zha guet zho, per grielod guet zho; soobladznä zho, tebaa zha gdziñ guielgut lo zho, per lel sozita.

<sup>7</sup> Masaque rac grë metso co zig rac grë guay ne tsienie zho lo dil. Rac lo ma zig rac lo miech, ni zob tib ncuaan co guic ma, rluw zig rlu tib coron or;

<sup>8</sup> zëeb guitsguic ma zig zëeb guitsguic men wnaa, ni zëeb lay ma zig zëeb lay grë meedz.

<sup>9</sup> Dipse lad ma ntse tib ncuaan co, rluw zig rlu guib; rio bi rzedz lo xiil ma, pale bi ne rio zeene rded tib dzoon carret ne rgob guay, zie lo dil.

<sup>10</sup> Lëëdaa meegu, sca zob xcots grë metso co lo xcol ma, mine yquiaaxcots ma miech dipse len gaay mää co.

<sup>11</sup> Lëë grë metso co pxeel anjl dox ne rnabey guierdoo co, anjl ne rnee zha Israel Abadón, laa xtiidz zha Gres rnee zho ma Apolión. (Nac diidz co, zig rnee ne xtiitsä ne: Zha ne rnitlo.)

<sup>12</sup> Lëë tib guielnä ne gan miech ga, per bii ziaad schopa.

<sup>13</sup> Gon naa zeene laa anjl ne nac zho xoop ga pcuedz xquiib, hor co bin naa zëeb tsi tib men co lo mezh or ne nac lo pcoog ne zo lo Dios ga.

<sup>14</sup> Zëeb tsi men co rnee me lo anjl ne blozh pcuedz xquiib ga:

—Güey, güeyxadz gza tap anjl dox ne quiadoo ro guiubee nroob ne nac guiubee Eufrates.

<sup>15</sup> Ible bzole gza tap anjl dox co par gun ma guielqui zeene laa dze co, laa hor co gdziñ; dzigo nac ne hor co laa ma blaa, parne tsiegut ma miech. Gzoob ne telne gac miech ne ndxie lo guidzliu tson tant, masaque tib tant zho gnitlo ma.

<sup>16</sup> Bin naa chop gayoo millon zhaguiib ne gacnie ma, niapse guay sob grë zhaguiib co; masaque ma gnabey lo zho.

<sup>17</sup> Gonpaa naa zha rlu grë zhaguiib co zob zho lad grë guay co. Grëse zho quiantse tib lë guib gdipse zdoo zho; masaque tson color rbeew, rbeew color nizhnie, color nguia gbaa, ni color guts. Laa grë guay co, niaa guic ma zig niaa guic meedz, masaque rriee bel, rriee gox, rriee zufr ro ma;

<sup>18</sup> lo gza ncuaan ne sca rriee ro ma, min co beet lalga miech co.

<sup>19</sup> Lala rap grë guay co xquielntseeb ma ga nöz ro ma, ni rapaque maw nöz lo xcol ma; masaque nac xcol ma zig nac grë meel dox, rias xcol ma rquiaa maw lad miech.

<sup>20</sup> Niicle scataa nzian miech ne gut, zha ne biaan ib bdziebd zho. Tibaque laa zho no ziegan zho mendox, ziegan zho grë zhimdio zho, mdio ne niaa guib or, mdio ne niaa guib plat, mdio ne niaa guib brons, mdio ne niaa quie, mdio ne niaagaa yag; ncuaane randa, ncuaane ronda, ncuaane rzëda, per laa zho no tibaque ziegan zhow.

<sup>21</sup> Laa zho no quiayut zho samiech zho, quianab zho pe sac samiech zho, quiangob zho zha ne led tsieeld zho, tibaque quiaban zho, ni palal zienied guic zho csaan zho grë guielntseeb co gbig zho lo Dios!

## 10

### *Anjl ne nzhen tib libr win*

<sup>1</sup> Blozh ga, gon naa biet tib anjl gbaa, rlupaa tib anjl nona, masaque no me tib lo xcow, ni quia tib guitye glaa guic me. Biinidoo ne rriee lo me, lëëdaa lo ngbidz; scasaque ni me, masaque riaazbela.

<sup>2</sup> Nzhen me tib libr win, nzhialse lo libr co.

Bdziñ me lo guidzliu, bzo me ni derech me lo nisdoo, laa min revés bzo me lo guidzliu.

<sup>3</sup> Ga zo me pquiaa me tib redz nroob, lëëdaa zeene rgobeedz tib meedz; loxaque blozh pquiaa me redz co, zeene laa gadz nguzi bnee, pquiab lo redz ne pquiaa me ga.

<sup>4</sup> Laa naa zale yquia naa mine bnee gza nguzi co, tibaque bin naa tsi tib men co gbaa, në me lo naa:

—¡Coo, yquiaad luu mine bnee gza nguzi qui! Sac nodne gacnan miecha.

<sup>5</sup> Dzigo gon naa blis anjl co nia derech me nëz gbaa,

<sup>6</sup> bzeet me Dios (men ne gdziñd dze guet, men ne bzaa gbaa, bzaa guidzliu, bzaa nisdoo, ni grëtaa ncuaane no low), rëb me:

—Dios zobwi ganle, nasi gon laa dze co bdziñ.

<sup>7</sup> Grëse mine bnee me lo zha ne biadteed xtiidz me, laaw gac niina zeene laa stib anjl qui ycuédz xquiib zho. Grëse mine no guic me gon me ni gocnand miecha, niina laa zho gana.

<sup>8</sup> Dzigo wbiire bnee men ne zëeb tsi gbaa ga, në me lo naa:

—Güey, bnaaz libr win ne nzhen anjl ne squi zo i.

<sup>9</sup> Nacne bia naa lo anjl co, rep naa lo me gneedz me libr win co, dzigo nëchaa me lo naa:

—Ledaaw nu, per lëeraasi none gow luuw. Zeene laa luu noyowa, nex sac luuw; per zeene gdziña zdoo luu, laaw gacnla.

<sup>10</sup> Dzigo bnaz naa libr win co nia me, dow naaw. Nligaa nex rdioowa now ro naa, per zeene laaw bdziñ zdoo naa, beennëw.

<sup>11</sup> Blozh ga, nëchaa men ne bin naa tsi glo ga:

—Naraa gon none gnee luu ganle zha nac ncuaane ted grëraa miech, zigtaa zha ne no guiedz wina, zha ne no guiedz nrooba, zha ne rnabey-gaaw.

## 11

<sup>1</sup> Dzigo biaad tib men co bneedz me tib yag ne rbix lo naa, rgaaw zig tib metr, bnabey me naa ctix naa xyadoo Dios, ctix naa zaatne nac lo pcoog, ni glab naa dien palal miech ne rie yadoo co riegān zho Dios. Pso me diidz lo naa, në me:

<sup>2</sup> —Lëeraasi ctiixd luu nëz ley, sac laa lugar co nole ladznia zha zit; zha gnabeya, zha gnabey guiedz ndzon ne nacchen Dios i; dipse len tson iz

grol ne ziaad nu, gon zhow zigne gacladztaa zho.

<sup>3</sup> Gane len dze riique laa naa cxel chop zha ne runbeypaa cho nac naa, tib lar beelze gacw zho, zig racwxab zha ne no guieñë; dipse len tson iz grol co gnee zho ganle pe nac grë ncuaane ziaadyob gan miech.

<sup>4</sup> Lëe zha co nac grop zhan yag oliv ni grop biini ne raquietle lo Xtiidz Dios ga zo lo Dios (men ne nac bizhuan guidzliu).

<sup>5</sup> Zeene laa grop zha co bdziñ, choot brieelod lega nsacsi zho, sac grëse zha ne wbig gocntseeb lo zho, tib bieese zha co lo bel ne brieer zho.

<sup>6</sup> Bdeed Dios poder lo zho ycuëez zho nisguie, zrieelo gnabey zho guiabda dipse len dze ne nonee zho lo miech ga, haxta zrieelo gnabey zho tsaalo nis gaca ren; ni horne gacladztaa zho, zrieelo ndalraa grë guieñzi ne gnabey zho gan miech.

<sup>7</sup> Zeene bzase dze ne bnee zho lo miech ga, hor co laa tib madzabdoobrieer len guierdoo co; ntseeb rac ma lo zho. Mbe blëbd zho lo ma, beet ma zho.

<sup>8-9</sup> Tson ngbidz grol goot xcuerp zho grol len guiedz ro co, guiedz ntseeb co. Pale Sodom, pale Egipt, sac gon guiedz coque, ga pquiaa miech men ne rnabey zho lo cruz. Ib bdeete miech diidz ngeets zho, grëse miech ne no dib lo guidzliu gon sca nix zho ga;

<sup>10</sup> dipse lo guidzliu, masaque tib guieñbleydoo ne bio miech gza dze co, gon zho laa grop zha co gut, sac nroob benneed zho miech. Lo guieñbley co, haxta bioxco miech pe ncuaane bgadlsa zho lo samiech zho.

<sup>11</sup> Zeene blozh tson ngbidz grol co, tibaque zeene laa zhiEspíritu Dios bdeed guieñmban lo grop zha co stib, laa zho guche ga; grëse miech ne ndxie lo guidzliu, zeene gon zhow, per nli bdzieb zho, rdzieldraa zho zha gon zho.

<sup>12</sup> Horco nguiedz zëeb tib tsi men co gbaa, bredz me grop zha co. Gonlo grë miech ne rlëe ran zho ga,



masaque no zho tib lo xcow, laa zho bzoquia gbaa;

<sup>13</sup> loxaque laa zho bzoquia gbaa, zeene laa tib zhodox bni. Gzoob ne telne nlë guiedz ro co tsii tant, tib tanta bnitlo lo zho co; gut gadz mil miech. Grëraa zha ne biaan, mazdraa bdzieb zho, lo dzeb co laa zho psilo roolnie zho Dios.

<sup>14</sup> Sca gan miech stib guielnë co. Lëe bropa ga, per znusaque guiaad stiba.

<sup>15</sup> Sac loxaque blozh ga, zeene gon naa laa stib anjl ne nac zho gadz ga, pcuedzlaque xquiib; hor co nzian tsi men co zëeb gbaa, nguiedz rnee me:

Nasi nagon,

laa Dios gnabey grëse guiedz ne ndxie lo guidzliu, grop me Men ne pxeel me ga.

Mele gnabeya, grëtaa len izdoo ne ziaad.

<sup>16</sup> Psiloque gza galptap mengol ne zob lo xcan ne zo lo Dios ga, pquiitsgzhib zho lo me, haxta bzooblo zho lo liu, rdeed zho xquizh lo me,

<sup>17</sup> rnee zho:

Xquizh xquielnzaac luu,

sac nasi laa luu glu men nroob nac luu, laa luu csilo gnabey.

Luutaque nac men ne mazdraa nroob.

<sup>18</sup> Grëse guiedz, brieequia zha ne gocntseeb lo luu;

per nasi laa dze bdzin, laa luu glugaa xquielblëe luu lo zho.

Grëse zha ne gutle,

niina laa luu gdeed mine rieguial zho tib tib zho.

Grë zha ne been xtsiin luu, pteed zho xtiidz luu lo miech,

grë zha ne ngab lo luu, zha ne runnon lë luu,

zigtaa zha gola, zigtagaa zha wina, niina laa luu gdeed zhipremio zho;

zha ne na loxaquegaa guielntseeb been,

niinataa laa luu gnitlo zho.

<sup>19</sup> Loxaque blozh sca bnee gza mengol co, zeene laa yadoo ne no Dios gbaa bzhal, nieenpaa guin ne notsow quie lag ne pquia diidz ne

psan me lo miech. Horco psilo bliaal tib guiequiedox, loxaque nëzrii nëzrec riab belye, ni rio bi ratsie nguzi; guiequiedox co nolial, zeene laa tib zhodox bni que.

## 12

<sup>1</sup> Horco gon naa blu tib ncuaane gzee zdoo ne zhan gbaa. Ga brieequia tib wnaa, masaque igose me riab tib biini, zig riab xbiini ngbidz, ni zob tib coron guic me, quia tsiipchop mel cho coron co; ngali ni me zob mëe.

<sup>2</sup> Rlupaa zoney me mëed, rquiaadan me redz, laa me rquiale yoob ne gap me xpëed me.

<sup>3</sup> Tibaque brieequia tib ma ngol, dipse ma rna nizhnie, niaa ma zigne niaa ngutsiets; zob gadz guic ma, ni tsii zhoz ma, tibga coron zob tib tib guic ma.

<sup>4</sup> Znuse bzieecw ma xcol ma, blaal ma palal mel gbaa lo guidzliu; gzoob ne nlë mel tson tant, masaque tib tant mel co blaal ma. Wbig ma lo wnaa co, quiambëz ma gal xpëed me, parne gow ma win.

<sup>5</sup> Per zigne gol mëed co, znuse bdzin win nëz lo Dios, zaatne zob me rnabey me; tib mëedbguiw, nacle diidz tib men ndip xtiidz gac win, win gac men ne gnabey grëse guiedz ne ndxie lo guidzliu.

<sup>6</sup> Horcogazhaquew bzhoon wnaa co ga, laa me zie tib dan zit, zaatne psanle Dios diidz gan zho me dipse len tson iz grol.

<sup>7</sup> Nacne bio tib dil gbaa. Psilo anjl Miguel, grë me grëraa anjl ne nacie me, bdilnie me ma ngol co grë ma xanjl dox ma;

<sup>8</sup> per blëbd ma, benxoon zho ma gbaa.

<sup>9</sup> Lëe ma ngol co ga nac meel dox ne notaque padzeela, lëe mendox ga, lëe Satanás ga, ma ne scataa tibaque noquidie miech; hor co laa zho bzonëz ma nëz lo guidzliu, grë xanjl dox ma.

<sup>10</sup> Dzigo bin naa, nguiedz zëeb tib tsi men co gbaa, rnee me: ¡Lëew nagon!

¡Nasi laa dze ne ycaaniapaa Dios zha  
ne ngab lo me, laa dze co  
bdzin!

Nasi laa me blu poder ne rap me,  
nasi laa Men ne pxeel me lo guidzliu  
ga gnabey lo grëse zha ne ngab  
lo me.

¡Laa me beñcxoonle menox!

Ma ne scataa dze guieel nolisqui dien  
pe run zho,

nac zho zha ne nacgrë ne.

<sup>11</sup> Peet brieelod ma niun ma zho,  
sac niapse men ne nac Carner yeen  
ne gut lo cruz ga bnalo zho;  
ni lalnu ib bdziebd zho, bnee zho lo  
miech cho nac me,  
bleeladz zho xquielmban zho, no zho  
haxta beet miech zho.

<sup>12</sup> ¡Gacxe waa tib guiebley nroob ne  
rac gbaa niina!

¡Grëse to ne nac to zha ne no gbaa,  
golley!

¡Per probsaxe grë zha ne no lo  
guidzliu, sac laa menox co  
tsiesacsi zho!

Ntseeb rac ma laa ma zie nëz co,  
rien ma riaanndraa nroob dze ne son-  
laa ma.

<sup>13</sup> Zeene gon ma sca bzonëz zho ma  
lo guidzliu, dzigo ptsidil ma wnaa ne  
gop mëëdbgui co.

<sup>14</sup> Nacne bzoob zho chop xiil me,  
lëëdaa xiil msidoo; par grieelo xoon  
me lo ma, guey me dan zit ne nole  
diidz gan zho me dipse len tson iz grol  
co.

<sup>15</sup> Gocladz ma nsiloow ma me,  
blee ma tib nis naal ro ma, pale tib  
guiubee ro,

<sup>16</sup> per psaand guidzliu me, znuse  
bzhiäl low psi grëse nis naal co.

<sup>17</sup> Horco mazdraa blëënie ma me,  
psilo ma noguib ma zha csacsi ma  
grëraa zha ne ziaad lo xtii me. Lëë  
grë zha co ziana mine rnabey Dios,  
ni rdziebd zho rlu zho xnëz Jesús no  
zho.

<sup>18</sup> Nacne güey ma, bzo ma ro nis-  
doo.

## 13

### *Brieequia chop ma ntseeb*

<sup>1</sup> Tibaque zeene gon naa laa tib ma  
nroob brieequia lo nisdoo co, ntseeb

niaa ma. Ncuaañe gdzieb ne rlu  
ma, gadzraa guic ma zob ni zob tsii  
zhoz ma; tibga coron zob tib tib zhoz  
ma. Gzase guic ma quia diidznë ne  
rneenë ma Dios.

<sup>2</sup> Rna ma zig rna grë meedz rabon,  
per ni ma niaa zig niaa ni os, laa ro  
ma niaa zig niaa ro meedz. Dzigo bzo  
ma nizhnie co ma guiaan ma xlugar  
ma co, male gnabey.

<sup>3</sup> No tib guic ma no tib mdel nroob,  
rlu mer niet ma zeene sca goc guic co  
ma. Min co gon miech, grëse zho psilo  
zho rleynie zho ma, mine rnabeytaa  
ma zho, run zhow.

<sup>4</sup> Horco grëse zho rleynie zho ma  
nizhnie co, rquitsgzhib zho lo ma,  
rdeed zho xquizh lo ma bzo ma ma  
ntseeb co; scasaque rquitsgzhib zho  
lo ma ntseeb co, rnee zho:

—¡Tsodraa stib zha zig luu! ¿Cho  
dien grieelo tilnie luu?

<sup>5</sup> Dzigo rëb ma nizhnie co lo ma  
gnee ma grë diidz dox, grë diidznë,  
gneenë ma Dios; bdeed ma co diidz  
gnabey ma lo guidzliu dipse len tson  
iz grol.

<sup>6</sup> Nacne psilo ma rneenë ma Dios,  
rdzibdee ma me, rdzibdee ma grë zha  
no gbaa ne.

<sup>7</sup> Grë zha ne no lo guidzliu, zha  
ne ngab xnëz Dios, bdeed me diidz  
psacsi ma zho, haxta beet ma zho;  
masaque ma bnabey grëse miech ne  
ndxie lo guidzliu.

<sup>8</sup> Laa grëraa miech, güey zho  
güeygan zho ma, lëë grë zha co quiad  
lë lo xlibr men ne nac Carner yeen ne  
gut ga. Haxta zeene biala guidzliu no  
libr co, lo co quia lë grëse zha ne ygaa  
guielmban ne gdziñd dze lozh.

<sup>9</sup> Lo grë to ne nac to zha ne rnalo  
Dios, zha ne no liaadz mine none  
naa nu, golquiaadiag mine gne naa nu  
ganle:

<sup>10</sup> Zha ne gnaaz to co zho to  
ladzguiib, yeque zho zio zho  
ladzguiib; zha ne csacsigaa to, tel zha  
gut zho to, scaque gut miech zho.  
Gacmbande to sca, sac gon ga glu  
to nli rnalo to Dios, nli zlëb to tel pe  
nactaa guielnë ne gan to.

<sup>11</sup> Blozh ga, gon naa brieequia stib ma nroob lo guidzliu, scaque ntseeb niaa ma, zob chop zhoz ma zig zob zhoz carner, per ncuaane gdzieb ne zeene laa ma roptsie.

<sup>12</sup> Ye ma rap ma poder, squi zo ma ne no mdel nroob co guic rnabey ma tel zha racladz ma; bnabey ma yquitsgzhib grese miech lo ma co.

<sup>13</sup> Ncuaane gzee zdoo miech run ma, haxta brieelo bnabey ma biet gui gbaa bliaala lo guidzliu.

<sup>14</sup> Ne scataa gre ncuaan ro ne rrieelo ma run ma, pquidie ma miech, bnabey ma zho bzaa zho tib mdio zig niaada ma ne bdedlaa lo guielgut ga, ma ne scataa nat guic ga bga.

<sup>15</sup> Blozh ga, bdeed ma xquielmban mdio co, parne grieelo gneew. Bnabey ma guet grese zha ne soliaadz yquitsgzhib low,

<sup>16</sup> ni bnabey ma grese miech guey zho tib bey, yase yquiaaw quia zho; grese zho zigtaa zha gola, zigtagaa zha lasa, zigtaa zha ne rapchena, zigtagaa zha ne peet rapda, zigtaa zha ne run xtsiin bea, zigtagaa zha ne choot rnabeyda.

<sup>17</sup> Zha ne tsod bey co, grieelod gun zho wzi niicle grieelodgaa cto zho; sac bey co rlu cho nac zha ne ngab lo ma, lee le ma ga, lee numero co rlu zha le ma.

<sup>18</sup> Tib le miech nac numero co; xoop gayoo tsongal xoop naca. Zha ne ligier, zha ne niini, zien zho cho nac ma co.

## 14

### *Biil tib gayoo chooptap mil zho*

<sup>1</sup> Tibaque zeene gon naa laa men ne nac Xcarner yeen Dios ga zo guic Gui Si6n, miech guizhiu ne zonie me ga; lee gre zha co nac tib gayoo chooptap mil zha ne quia le me guic ga, grop me PxoZ me.

<sup>2</sup> Horco bin naa tib bi nroob gbaa, zig rio bi rrieengaa tib nis naal tib ro quie, zig ratsiegaa gre nguzidox, ni bin naa ndal tsi zha co zeeb noyool

zho tib cant, rlu niapse arp noyoolnie zho cant co.

<sup>3</sup> Tib cant cuba, laa zho noyoola lo men ne zob lo xcan ro co, zaatne zo gza tap bult mban co, zaatne zob gre mengol co. Loxaque tib gayoo chooptap mil zha ne pcuee lad gre miech guidzliu ga, zha cose brieelo pquiab lo cant co.

<sup>4</sup> Sac zha co ib beenctald xtol, rrieequia nac zho zig tib wnaa ne bgaald mgui; tibaque zo zho lo Men ne nac Carner yeen co, zaatne zieetaa me. Masaque nac zho lo Dios, ni lo men ne nac Carner co, zig tib nex ne glopaa riet riogon lo me.

<sup>5</sup> Biod dze ne nquidie zho, mbe zdoo zho, mbe lo zho nez lo me.

<sup>6</sup> Horco brieequia tib anjl nosiibe zhan gbaa, ney me Diidz Ndzon ne rdeed guielmban, diidz ne gdzind dze nitlo ga; laa me ziaad par gnee mew lo grese miech ne ndxie dipse lo guidzliu.

<sup>7</sup> Nguiedz zeeb tsi me, rnee me:

—iGolguien golgon mine rnabey Dios, ine golleynie me, sac gon laa dze ne gun me guielwxtis bdzinle! Ine golquitsgzhib lo me, golgan ganle me bzaa gbaa, me bzaa guidzliu, me bzaa nisdoo, me psan grese zaatne rlan nis.

<sup>8</sup> Zhits anjl co nal stib anjl, nguiedz rnee me:

—iNasi laa guiedz Babiloin nitlo! iGuiedz nroob ne scataa pquiil greeraa guiedz, been gre menguiedz co ncuaan ndzab ne beena, pxina guic zho!

<sup>9</sup> Zhiits co nalaque stib anjl, scaque nguiedz zeeb tsi me, rnee me:

—iGrese zha ne yquitsgzhib lo ma ntseeb ne brieequia lo nisdoo ga, yquitsgzhib zho lo mdio ne niaa zig niaa ma ga, gdeedgaa zho diidz yquia xbey ma nia zho, yquiaagaaw quia zho,

<sup>10</sup> ib tedsod ye zho yгаа lo gretaa guielnedox ne csiaab Dios! Squi zobwi gre xanjl me, squi zobwi Men ne nac Xcarner yeen me, laa zho guey lo guidox ne rieguial zho, zaatne tibaque quiayazbel tiblo ncuaane rt-suu le zufr.

11 Dze guieel cso laan ne tsec guidox co, ni palal gapd zho descans ga; sac sca pquitsgzhīb zho lo ma ntseeb co, pquitsgzhīb zho lo mdio ne niaa zig niaa ma ga, ni pquia zho xbey ma.

12 ꞑGa naganle gan grē zha ne ngab lo Dios, zha ne mban zigne rnabey me, zha ne tiblīque zienal zhiwseed Jesús, zeena gacmband zho niicle tel pe nactaa grē guielnē ne noyan zho!

13 Dzigo bin naa zēēb tib tsi men co gbaa, nē me:

—Pquiaa minē gni naa nu.

Nēchaa me:

—Dichos grēse zha ne rnalo Jesús, niicle niinaga guet zho.

Pquiabaque Espīritu Sant, rnee me:

—Nligaa dichos zho, sac grē guielnē ne bded zho, nataa laaw blozh; nasi laa zho ygaa guielnzaac nroob ne gdeed Dios lo zho, porne wban zho zigne rnabey me.

14 Zeene bui naa stib, dzigo laa naa gonle tib xcow nquits; lo xcow co zob tib men co, rlu me zig rlu Men ne pxeel Dios ga biaad lo guidzliu. Zob tib coron or guic me, ni nzhen me tib yaguiits nroob.

15 Dzigo brieē tib anjl len yadoo ro ne zob gbaa, nguiedz bnee me rēb me lo men ne zob lo xcow co:

—ꞑNiinaga blooyaguiits grē zhob ne squitaa zēēb lo guidzliu! ꞑSac gon gollew, laa dze ne tsasa bdzinle!

16 Dzigo pteed men co yaguiits dipse lo guidzliu, ptop me grēse zhob co.

17 Blozh ga, brieē stib anjl len yadoo ro co nzhen me tib guiib hoz, rlupaa per nli ndox low.

18 Loxaque brieē anjl co, laa anjl ne quianap gui ne ndziib lo pcoog brieēque; nguiedz bnee me rēb me lo anjl ne nzhen hoz ga:

—ꞑNiinaga pchug grēse mzhiig uv ne squitaa zēēb lo guidzliu, sac gon laaw gule!

19-20 Horco znuse pteed anjl co hoz lo guidzliu, pchug me grēse mzhiig uv co, güeycodzēē mew tib len pil nroob ne zob tib lad ro guiedz. Ga güeyzēēni zho grē uv co, ptaadz zhow;

dzigo ren naaldox ne brieē zhan pil co, masaque lal ne rzēni miech xoop ngbidz, lal ga wbiig lo ren co igo pil co; tel niaca minē sēēb tib guay low, zdziṅa haxta zhan cho ro ma. Rrieēquia sca nagon gac minē gnabey Dios ted grē zha ntseeb.

## 15

1 Tibaque zeene gon naa, ncuaane ro, ncuaane gzee zdoō ne goc gbaa. Brieēquia gadz anjl, tib tib anjl co tibga guielnē guiaadnie me ted grē miech ne ndxie lo guidzliu; guielnē co lozh cueezhian Dios miech.

2 Dzigo gax lo naa gon naa tib dzoon miech, masaque rquiabni, masaque rna gui zaatne zo zho, nēzrii nēzrec rac lo co, pale lo nisdoo. Lēē grē zha co beēn gan, pquitsgzhīb zho lo ma ntseeb co, pquitsgzhīb zho lo zhimdio ma, niicle biodgaa zho xbey ma. Grēse zho tibga xarp Dios nzhen zho,

3 quiayool zho zig biil grē zha ne psilaa Moisés Egipt. Rley zho, sac niina laa Xcarner yeēn Dios psilaa zho lo ma ntseeb co; rnee zho:

Dios, luu ne nac luu men ne grēsew rrieelo run, ncuaane nroob, ncuaane gzee zdoō miech, nac grē ncuaane run luu.

Luu nac men ne rnabey, lo grēse zha ne ngab lo luu, niapse diidzli rnee luu, niapse minē nonguiel rnabey luu.

4 ꞑZha rna zha ne dien gdzieebd luu? ꞑZha rna zha ne gleyd goolnie luu? Sac luuse nac men mbe zdoō, men ne ni tib dol rapd.

Grēse guiedz ne ndxie lo guidzliu, zrieē miech guiaad zho yquitsgzhīb zho lo luu;

sac nasi laa luu blu zha run luu guielwxtis.

*Gadz anjl ne pxeel guielnē lo guidzliu*

5 Horco gon naa bzhiāl zaatne nac Lugar Nda len xyadoo Dios gbaa,

6 ga brieē gza gadz anjl ne guiaadnie guielnē ne no guiaad lo guidzliu ga. Ine nquitsbie rna xab gza anjl co,



haxta rzëëg lada, ndxiega tib cinch or haxta ncaan len zhicw me.

<sup>7</sup> Dzigo wbig tib bult mban co, bdeeda tibga cop nroob niaa niapse guiib or lo tib tib anjl co; len cop co ga nodzë grëse guielnë ne nac xquielblëë Dios, men ne gdziñd dze guet.

<sup>8</sup> Horco grëse xquielndzon Dios, grëse poder ne rap me, biodzë len yadoo co, rluw zig rlu tib gox; choot brielodraa nzëëb len yadoo co, haxta blozh gon miech gza gadz guielnë ne güeynie gza anjl co.

## 16

<sup>1</sup> Dzigo bin naa nguiedz zëëb tib tsi men co len yadoo ro co, bnee me lo gza gadz anjl co, rëb me:

—Goltsie, goltsixiee gza guielnë ne nac xian Dios i lo guidzliu.

<sup>2</sup> Dzigo brieë tib anjl co, güey me, güeylaat me xcop me lo guidzliu, hor co grëse zha ne noquiitsgzhib lo zhimdio ma ntseeb co, zha ne quia xbey ma ga, psilo bial dipse lad zo, yoobdox ne rquia zho.

<sup>3</sup> Güeyaque stib anjl co, bdzin me blaata me xcop me lo nisdoo, zeene laa ncuaan co bzhiee lo nisdoo, grëse nis co bialo ren ctoo; ni stib ma ne no low biaanraa.

<sup>4</sup> Laa min co bded, zeene laa stib anjl ne rac zho bion ga güey, güeylaat me xcop me grëse guiubee, grëse zaatne rda nis; nacne grëse nis co bialo ren.

<sup>5</sup> Dzigo bin naa tsi anjl ne rnabey nis, rëb me lo Dios:

—Dios, ible rieguial mine been luu i; luu ne nac luu men mbe ne ni tib dol rapd, men ne tibaque nac, men ne gdziñd dze gdzëë. Lëew i been luu, squi beenquizh luu grë miech qui mine zëëb zho,

<sup>6</sup> sac gon blactaa grë zha ne ngab lo luu, blactaa grë zha ne biadteed xtiidz luu psacsi zho, pxiee zho xchen grë zha co. Min qui rquiin zho, guie zho grë ren qui na.

<sup>7</sup> Zëëbaque tsi stib men co zaatne nac lo pcoog len yadoo co, rnee me:

—iDios, luu ne nac luu men ne nroob ne grësew rrielo run, nligaa

ible rieguiala squi beenquizh luu grë zha qui mine been zho!

<sup>8</sup> Blozh ga, brieë stib anjl ne rac zho tap ga, güey me güeylaat me xcop me lo ngbidz, hor co gocnlëëraa xbiini ngbidz, ptsuuw miech.

<sup>9</sup> Niicle scale nodzu grë miech co, per ib biablod zho, laa ne nsaan zho xquielntseeb zho, nleynie zho Dios, lel psilo zho rneenë zho me, pe nacne noxeel me grë guielnë co.

<sup>10</sup> Zeene brieë stib anjl co, güey me güeylaat me xcop me zaatne zobnabey ma ntseeb ne brieëquia lo nisdoo ga, dzigo znuse goc tib ncowdoo grëse guiedz ne rnabey ma. Lo yoobdox ne rquia grë miech co, haxta rowye zho ludz zho;

<sup>11</sup> per niicle scaw, ib psaand zho xquielntseeb zho, lel psilo zho rneenë zho Dios, pe nacne scataa rquia zho yoob, pe nacne scataa quiayaal gdib lad zho.

<sup>12</sup> Zeene laa anjl ne rac zho xoop ga güey, güeylaat me xcop me len guiubee Eufrates, hor cogazh wbidz nis naal ne zhoob guiubee ro co. Nacne bio nëz ted grë men ne zobnabey grë guiedz ne ndxie nëz ne rlan ngbidz.

<sup>13</sup> Horco gon naa tson me yozh, niaaw zig niaa mbiich, tiba brieë ro ma ngol nizhnie co, tiba brieë ro ma ntseeb ne brieëquia lo nisdoo ga, laa stiba brieë ro zha ne noteed xtiidz ma ntseeb co.

<sup>14</sup> Chen mendox nac gza me co, runa grë ncuane nroob ne rzee zdo miech; dzigo güeya güeyzodiidzniew grëse zha rnabey ne no dipse lo guidzliu, parne tipse gac zho tilnie zho men ro ne nac Dios, gal dze ro ne gdeed me mine rieguial tib tib miech.

<sup>15</sup> Tibaque zeene laa men ne rnabey ne ga bnee, në me:

—Zhile gon laa naa guial. Nsin sca golso, sac zigne racnand bizhuan yu pa hor sëëb ngbaan yu, scaque gacnande to pa horpaa guial naa. Dichos zha ne yquiambëz naa, ine mbe xab zho nacw zhow; sac gon mban tsie zho telne scase zo zho zeene laa naa

glanso, ni lala tib guiełtodox ga grieequia zho.

<sup>16</sup> Dzigo pcaalsa grē zha rnabey co grē xmenguiib zho, zaatne rnee zha Israel Armagedón.

<sup>17</sup> Horco güey anjl ne nac zho gadz ga güeylaat me xcop me lo me ne rrie lo guidzliu; dzigo bnee tib men co zaatne nac lo zhixcan Dios leñ yadoo gbaa ga, nguiedz zēēb tsi me rnee me: —¡Nasi nagon ledaaw blozh bza!

<sup>18</sup> Dzigo psilo nēzrii nēzrec riab belye, loxaque bi rio ratsie nguzi. Lo belye co, lo bidox co, laa tib zhodox psiloque bni; waltaa ne ndxie miech lo guidzliu, gard gni tib zhodox zig min co.

<sup>19</sup> Grē guiedz ne ndxie lo guidzliu, per ni rludraa zha niaaw; zig nac guiedz nroob ne nac Babiloin ga, haxta tson lē goca. Horco beenquizh Dios zha Babiloin, grētaa guiełntseeb ne zēēb zho; psiaabzi me zho por grētaa zhian ne pquiaa zho me.

<sup>20</sup> Grēse guidzliu win ne no lo nisdo, rludraa dien yow; grē gui glaa, loxaque nēzrii nēzrec bliaala.

<sup>21</sup> Min co blozh, zeene psilo bliaal tib guiequiedox lad grē miech co, tib tib guiequie co nēw maase choo kil. Gon zho scataa noyab guiequie co, laa zho noque rdzibdee zho Dios.

## 17

*Zob tib wnaa yozh lad tib ma ntseeb*

<sup>1</sup> Lo gza gadz anjl ne sca blaata grē guiełnē co lo guidzliu, lad co brie tib me biaad, nē me lo naa:

—Dē ganle, zeena glu naa lo luu zha nactaa caxtigw ne ygaa wnaa yozh ne ran luu squi zob lo grēse nis ne no lo guidzliu.

<sup>2</sup> Lēē wnaa qui pxin guic grēse miech ne no lo guidzliu güeynal zho grētaa guiełyozh ne been me; haxta grē zha rnabey, güeynal min co.

<sup>3</sup> Sca nolu Espíritu Sant grē ncuaan co lo naa, dzigo güeynie anjl co naa tib dan zit. Ga gon naa laa wnaa co zoble lad tib ma nroob, ntseeb niaa ma co, zob gadzraa guic ma ni zob

tsii zhoz ma; gdipse ma rna nizhnie, gdipse lad ma quia grē diidz ntseeb ne rneenē ma Dios.

<sup>4</sup> Glaa glaa zhits ma ntseeb co zob wnaa co, masaque nizhnie nlaan, nizhnie ren rna xab me, loxaque grē guieł or, grē quie rbebni, grē quie perl, ngalguiee lad lar co. No tib cop nroob niaa me, niaaw niapse guieł or, rriequia leen co nodzē grētaa guiełntseeb, grētaa guiełyozh ne run me.

<sup>5</sup> Ni quia bla lan diidz quia me, rneew: “Lēē guiedz nroob ne nac Babiloin nu, guiedz ne nac xnīaa grēse wnaa yozh, guiedz ne nac xnīaa grēse zha ne run ncuaane mbixladz.” Lēē lē me ga, hor coraa bzhoobneñ zha nac lē me.

<sup>6</sup> Dze rwi naa lo me, dzigo gon naa rac me zig rac zha ne rzudz. Nzian-dox zha ne no xnēz Jesús beet me, rriequia grētaa ren ne pxiee me ga sca noyun me. Bzee zdo naa, ni bdzieeb naa gon naa zha rac wnaa co.

<sup>7</sup> Dzigo nēchaa anjl co lo naa:

—¿Pe nacte rdzieeb luu? Na ganle gni naa lo luu cho nac wnaa co, cho nac ma ne sca zob me lad ga.

<sup>8</sup> Padzeela no ma ntseeb co, guieł ma niinapaa, per zhile laa ma grie leñ guierdoo ne nioogyu ma, laa ma grie ga parne diunavez nitlo ma; grē zha ne quiad lē lo libr ne zhobnee cho nac zha ne ygaa guiełmban ga, seedox zdo zho zeene gan zho laa ma griequia stib, sac tibaque nan zho gutle ma.

<sup>9</sup> Wen wen pquiaadiaga ganle: gza gadz guic ma ga, rriequia lēēw nac gza gadz gui win ne zob wnaa co zobnabey me.

<sup>10</sup> Ni rriequiaque lēē gadz zha ne rnabey ga: gaay zho bnabeyle, tib zho quianabey niina, laa stib zho naraa gnabey; per zeene laa zha co guiaad, zhis dze ne gnabey zho.

<sup>11</sup> Lozhse gnabey zha co, laa ma gnabeyaque, ma gac zha rnabey co xon, niicle ne yele ma ga goc zha co gadz; gataa laa ma nitlo.

<sup>12</sup> 'Zhoz ma, rriequia lēē stsii

zha ne gnabey ga, gzase zha co naraa gnabey zho, tipse ycaania zho guielrnabey gza zho ma. Zhisaque dze sca gnabey zho,

<sup>13</sup> dzigo laa gza tsii zha co guiaan diidz gzo zho ma, ma gac zha nroob lo zho.

<sup>14</sup> Zacnie zho ma, grëse zho tsie tsietilnie zho Xcarner yeen Dios, per znuse gun men ne nac Carner yeen co gan lo zho; sac me nac men ne rnabey lo grëse zha ne rnabey, lo grëse zha ne non. Grëse zha ne tsienal zhits me, tsietilnie zho ma co, lëë grë zha co nac zha ne bzooblo Dios bredz me zho bgab zho xnëz me, ni ib psand zho me.

<sup>15</sup> Blozh ga, nëchaa anjl co lo naa:

—Lo grëtaa nis ne gon luu sca zob wnaa yozh co, rrieequia lëë nis co nac grëse guiedz, grëse dii miech ne ndxie lo guidzliu.

<sup>16</sup> Per zdzin dze lëëque ma ntseeb co, tilnie wnaa co, grë ma gza tsii zha ne rrieequia nac zhoz ma ga; zlëëniedox zho wnaa co, sanwin zho me, haxta xab me cuee zho, znitlo zho me, sëëg zho me lo gui.

<sup>17</sup> Ib Dios csiaab guic zho gnitlo zho wnaa co, ni meque csiaab guic zho gzo zho ma co gac ma zha ne gnabey lo zho; laa me gun min co, parne grieequia grëse mine bneele me no gac.

<sup>18</sup> Laa wnaa co, rrieequia me nac guiedz ro ne rnabey lo grëse guiedz ne ndxie lo guidzliu.

## 18

<sup>1</sup> Blozh ga, gon naa laa stib anjl ziad-zëëb gbaa, rlu tib anjl nona, dipse lo guidzliu biab biinidoo ne ziaadnie me,

<sup>2</sup> nguiedz zëëb tsi me rnee me:

—iNasi laa guiedz nroob ne nac Babiloin ga nitlo! iLoxaque mendox yquianzë ga, loxaque grë ma guix, loxaque grë ma mbixladz cuew!

<sup>3</sup> Laaw nitlo, sac noquiila grëse miech ne ndxie lo guidzliu, grëse zha ne rnabey, quiayun zho grëtaa guielyozh ne runa. Lo grëtaa guielyozh co quiayun ricwa grëse zha ne run

wto; quiaxin grë ncuaan co zho, masaque quiayuna zho zig run nziu.

<sup>4</sup> Dzigo zëëb stib tsi men co gbaa, rnee me:

—iGrëse to ne nac to miech ne ngab xnëz naa, golgon diidz, golriee guiedz qui! Ib gunde to dol ne quiayuna; zeeña ygaade to grëtaa guielnë ne ygaaw,

<sup>5</sup> sac nroobdox nac grë dol ne quiayuna, telne niaca ncuaane cue monton, rrieequia haxta gbaale rdzin guic monton co; gane ib tedsod zunquizh Diosa grëtaa guielntseeb co.

<sup>6</sup> Gacxe na grëse mine beena miech, mincoque saca. Grëse tel zha psacsiw miech, chop lalga mine teda.

<sup>7</sup> Zigne squitaa now lo grëtaa ncuaane racladza; scagaa na guielnëdox ne gana, haxta goona lo grëtaa guielnë co. Niats raca rneew: “Naa rnabey. Nacd naa cho zha ne zotib, zig rzac grë wnaa viud; naasi gdzind dze ne tso naa guielnë.”

<sup>8</sup> Nli squitaa niats raca, per zeeñe guiaba ladznia guielgut, ladznia gbin, ladznia grëraa guielnë ne gana, tib dzeque lozha. Ni lozh ga, haxta zeca lo gui; min co gnabey Dios teda. iMe nac men ro ne gunquizha grëtaa mine beena!

<sup>9</sup> Grë zha ne rnabey grë guiedz, zha ne scataa bley been grë guielyozh ne runa; zeeñe gan zho goxdoo ne rso noyeca, mban gac zho, zoon zho zio zho xquielnëw.

<sup>10</sup> Dziedz zho gan zho grëtaa guielnë ne nodeda ga, lo dzeb co, ni lalnu gbigd zho. Lëë gdib so zho goptsie zho, guiab zho: “iProbsaxe luu Babiloin, guiedz nroob, guiedz non nac luu! iPa brieë guielnë qui squi znuse nitlo luu!”

<sup>11</sup> Grë zha ne run wto dipse lo guidzliu, ye zho zio zho xquielnëw, mban gac zho guienndraa cho si lo zho.

<sup>12</sup> Sac masaque lëëw rzi:

guiib or,  
guiib plat,  
grë quie non,  
grë perl,  
grë lar niazh,

grë lar sed,  
 grë lar nizhnie nlaan,  
 grë yag ne nex rlaa,  
 grë ncuaane niaa marfil,  
 grë ncuaane niaa grë yag wen,  
 grë ncuaane niaa guiib,  
 grë ncuaane niaa brons,  
 grë ncuaane niaa quie mármol,  
 13 grë blad canel,  
 grë guizh scuaan,  
 grë yaal ne ndzon rlaa,  
 grë guizh, grë nceit ne nex rlaa,  
 grë nziu,  
 grë nceit,  
 grë zhobxtil,  
 grë rin niazh,  
 grë ma ne rey yo,  
 grë mëcwxii,  
 grë carret,  
 haxta grë miech ne runzhoo dziin lo samiech.

14 'Zriequia zha ne guiab lo guiedz co: "¡Bdzinaque dze ne blozh luu, pa sëraa scataa yquianie luu grë ncuaane rdziladz luu! ¡Grëtaa ncuaan niazh, grëtaa ncuaane rap luu, gdziandraa dze ne gbiire gan luuw!"

15 'Grë zha ne run wto ga, zha ne scataa gocricw lo grë wto ne been zho guiedz co, zdieb zho, zit so zho gan zho grëtaa guielnë ne nodeda. Zio zho xquielnëw, haxta zoon zho

16-17 guiab zho: "¡Probsaxe guiedz ro qui, squi znuse bnitlow! Biopaa dze gocnona, masaque goca zig tib wnaa ne racw grë lar niazh, grë lar nizhnie nlaan; wnaa ne rna grë guiib or, grë quie non, grë quie perl, rio yan, rio yan nia."

'Grë zha ne rnabey barcw, grë zha ne rsëew, zha ne no lena, ni grëragaa zha ne run dziin lo nisdoo, zit so zho gan zho tsec guiedz co;

18 zeene gan zho goxdoo ne rso noyeca, ziaa zho: "¡Zha rnaraa dze ne dzian ne stib guiedz nroob zig guiedz qui?"

19 Mban gac zho, zio zho xquielnëw, zoon zho, squiaadan zho redz, guiab zho: "¡Probsaxe guiedz ro qui squi znuse bnitlow! Lo grëtaa dimi ne

pquianiew, blactaa beenricwa ne grë ne grëraa zha ne run dziin rii."

20 'Sca nagon nitlo guiedz co. Grëse to ne nac to zha ne no gbaa, grëse to ne nac to zha ne ngab lo naa, grëse to ne nac to zha ne pxel naa güeynee xtidz naa, zha ne güeyteed xtidz naa, zeene gan to laa guiedz co nonitlo, golley, sac gon ga gunquizh Dios miech ne no ga grëtaa mine been zho to.

21 Zeene blozh bnee men co, dzigo gon naa tib anjl, rlu tib anjl macisa, znuse blis me tib quie nroob, niaaw zig niaa quie molin zhobxtil dipse gan bron mew lo nisdoo; blozhse bron mew, nëchaa me:

—Squi nagon nitlo guiedz ro ne nac Babiloin ga, gdziandraa dze ne gbiire gan miecha.

22 Masaque nroobladzdoo ne raca niina, loxaque di noyac grë ro xnëza, zaatne noyool zho vihuel, zaatne noyool zho bzie, zaatne nocuedzгаа zho trompet, nëzrii nëzrec rac miech zie zho lo xtsiin zho, loxaque lo grë quie molin rzedz nozoo zho zhob; per gal dze co grësew lozh.

23 Squitaa biini ne rquiaw niina, squitaa tibaque quiayac guieltsieela, per gal dze co ncowse gnaw, pa sëraa gac lniw. Laaw nitlo, sac blactaa noyungüeta miech ne no grëraa guiedz ne ndxie lo guidzliu lo grë zhiwseed mendox; pe zhidaa noyunricwa grë zha ne run wto por grë wseed co;

24 pe zhidaa miech zëeba. Nzian zha ne ngab lo Dios, nzian zha ne riadteed xtiidz me, rnabeya ret zho.

## 19

1 Zeene blozh ga, bin naa zëeb ndal tsi men co nëz gbaa, rlu miech guizhiuw, nguiedz rnee zho:

¡Zha ndzontaa xDios ne! Me nac men ne rsilaa miech, parne ygaad zho lo caxtigw.

Me nac men ne rap poder, me nac men ne rieguial dziuunnon ne;

2 sac gon mesi run me guielwxtis zigne no gaca.



Gacxe waa, sca gunquizh me guiedz  
 qui grëtaa guielyozh ne noyuna,  
 grëtaa xchen zha ne ngab lo  
 me, zha ne bnabeya gut;  
 rrieequia naca zig tib wnaa yozh,  
 quiayungüeta miech quiayunctal zho  
 xtol zho.

<sup>3</sup> Blozh ga, biire bin naa tsi zho,  
 rnee zho:

¡Zha ndzontaa Dios! ¡Min qui nagon  
 rieguala, gdzind dze ne lozh csow  
 gox!

<sup>4</sup> Horco laa gza galptap mengol co,  
 ni gza tap bult mban co pquiitsgzh  
 lo Dios lo xcan ne zob me ga, haxta  
 bzooblo zho lo liu, beennon zho me,  
 rnee zho: “¡Nliw! ¡Luuse nac men ne  
 ndzon!”

<sup>5</sup> Zëëbaque stib tsi men co zaatne  
 nac lo xcan co, rnee me:

¡Grëse to ne nac to zha ne quiayun  
 dziin lo me,  
 zha ne rien men non nac me,  
 zigtaa zha wina, zigtagaa zha nona,  
 golgoolnie me!

<sup>6</sup> Dzigo wbiire bin naa tsi grë miech  
 guizhiu co nëz gbaa, rio bi zëëb tsi  
 zho, pale zeene rio bi nisdoo, zeene ri-  
 ogaa bi rnee grë nguzidox, rnee zho:  
 ¡Golgotsaa dzioolnie ne me!

¡Me nac xDios ne, me nac men nroob  
 ne rnabey!

<sup>7</sup> Golgotsaa gley ne, golgotsaa dzi-  
 uunnon ne me,  
 sac gon laa dze bdzin laa Carner yeen  
 ne nac Xpëed me ga ctsieelnia;  
 grë zha ne ngab lo me,  
 zha ne rrieequia nac ndzooop ne ct-  
 sieelnia Carner yeen co, laa  
 zho nacwxable.

<sup>8</sup> Masaque rlu zho zig tib ndzooop ne  
 ctsieelnia,

ine nquitsbie, ine rbebni lar niazh ne  
 nacw zho;  
 me bdeed diidz got zho lar co,  
 ga rlu ganle mban zho zigne racladz  
 me.

<sup>9</sup> Dzigo rneechaa anjl ne sca bron  
 quie co lo nis:

—Wen zie grë zha ne bredz Dios  
 tsie lo xquieltsieel men ne nac Carner  
 yeen co.

Bnabey me naa pquia naa diidz co,  
 blozhse ga, nëchaa me lo naa:

—Xtiidz Dios ga gon, me rneew.

<sup>10</sup> Horco pquiitsgzh naa lo anjl co  
 ni naa gunnon naa me, per bzhiguield  
 me.

—¡Coo! —në me lo naa—. ¡Guso i!  
 Gocnan ganle ye naa tib ngundziinse  
 nac naa lo Dios, nac naa zigne  
 nacaque luu grë luu grëraa zha ne  
 squi noxco zienal mine nac zhiwseed  
 Jesús. Dios none gunnon luu, sac gon  
 tib ngundziinse nac naa bzet naa min  
 co, lëë gdib bne naa ganle zha nac  
 xtiidz Jesús.

<sup>11</sup> Dzigo hor co gon naa bzhial zhan  
 gbaa, ga brieequia tib men co zob me  
 lad tib guay nquits, zëëb diidz niapse  
 diidzli rnee me, sac run me guielwxtis  
 zigne no gaca, ni rdilnie me zha ne  
 riegual tilnie me.

<sup>12</sup> Masaque rbebel bziaalo me,  
 nzian xcuaa coron zob guic me, ni  
 quia stib lë me quia me, loxaque  
 mese nan dien zha nac lë co me.

<sup>13</sup> Rnadraa xab me di ren, lëë me ga  
 rnee zho: Xtiidz Dios.

<sup>14</sup> Ndal grë menguiib ne no gbaa nal  
 zhits me, ye zho niapse guay nquits  
 zob zho; niapse lar niazh nacw zho,  
 ine nquitsbie rna grë lar co.

<sup>15</sup> Rlu choot grielod gacndaan lo  
 me, masaque zob tib spad lots ro me,  
 laa me nzobro spad co parne tilnie  
 me grë guiedz ne gacntseeb lo me.  
 Masaque me gnabey grëse guiedz,  
 ndip gac xtiidz me, ni tib choot qui-  
 itsd mine gnabey me; zeene laa me  
 gunquizh miech grë xquielntseeb zho,  
 cxeel me zhian ne csiaab Dios ygaa  
 zho, zun me zho zigne run miech uv  
 zeene rzëeni zhow.

<sup>16</sup> Lad lar ne nacw me ga, ni tib cho  
 cor me, ga quia cho nac me, rneew:  
 “LËË MEN RII NONRAA LO GRËSE  
 ZHA NON, ME RNABEY LO GRËSE  
 ZHA NE RNABEY.”

<sup>17</sup> Blozh ga gon naa zo tib anjl lo  
 ngbidz, nguiedz zëëb tsi me rbedz me  
 grëse maxiil ne row grë magut, rnee  
 me:

—¡Ligier golcaalsa! ¡Goltë zeena  
 yquiin to guielwagw ne gneedz Dios  
 lo to niina!

<sup>18</sup> Goltë zeena gow to grë zha ne rnabey grë guiedz, grë zha ne rnabey lo menguiib, grë zhaguiib ne zëëb didz nac zha valor; goltë gow to grë guay, gow to grë zha ne rzob lad ma. Goltë gow to grëse miech, zigtaa zha ne runcunzhoo miech dziina, zigtagaa zha ne choot rnabeyda, zigtaa grë zha ne nac zha nona, zigtagaa grë zha wina.

<sup>19</sup> Dzigo gon naa ma nroob ne briequia lo nisdoo ga, ma ne scataa ntseeb rlu ga, psilo ma ptop ma grëse zha ne rnabey grë guiedz ne ndxie lo guidzliu. Pcaalsa zho grë xmenguiib zho, zha guizhiuw, laa zho brie zietilnie zho men ne zob lad guay nquits co grë xmenguiib me.

<sup>20</sup> Lo dil co, ga bgaa ma nroob co, ni bgaa zha ne pteed xtiidz ma lo miech; zha ne scataa squi zo ma been zho grë milagr co pquidie zho miech, bio guic zho bio zho xbey ma, ni beennon zho mdio ne rlu zig rlu ma ga. Zigtaa maw, zigtaa zha ne pteed xtiidz ma ga, nguia mban zho laa zho biab tib lo guidox zaatne noyec zufr.

<sup>21</sup> Laa grëraa zha ne scataa gocnie ma ga, grëse zho gut lo spad ne nzo-bro men ne zob lad guay nquits co, hor co bdziñbe grëse maxiil ne row magut, güeytow ma grëse ngutoo co haxta biel ma.

## 20

### *Bnabey Jesús tib mil iz*

<sup>1</sup> Blozh ga, tibaque zeene gon naa laa tib anjl biet gbaa, nzhen me tib liow, ni nzhen me tib caden.

<sup>2</sup> Dzigo bnaaz me ma ngol ne rna nizhnie ga, meel ne notaque padzeela ga, ma ne nac mendox ga, ma ne nac Satanás ga, bzoob me ma caden co;

<sup>3</sup> con liow ne nzhen me ga pxal me tib ro guierdoo, psëëb me ma len guierdoo co. Blozh ga dziits dziits psioog mew, zeena grieelod grie ma tsiequidieraa ma miech.

Ga tsogyu ma dipse len tib mil iz, lozhse tib mil iz co ible laa ma no grie ga, sonlaa ma zniip.

<sup>4</sup> Horco gon naa laa grë zha ne bzo Dios cobey pe nac xtol tib tib miech, laa zho bzob lo xcan ne rieguial sob zho. Gonaque naa xalm grë zha ne psacsi miech, bga zho yan zho, beet zho zho loxaque ne no zho xnëz Jesús ni bnee zho xtiidz me lo miech; gon naa grë zha ne bzhiguield nquiitsgzhil lo ma ngol ne briequia lo nisdoo ga, bzhiguield zho niunnon zho mdio ne rlu zig rlu ma, niicle bzhiguield zho nio zho xbey ma. Gon naa brieaban zho grëse zho, par gbannie zho Jesús, gnabey me grë me zho dipse len tib mil iz.

<sup>5</sup> Lëë grë zha co nac miech ne glopaa grieaban, laa grëraa mengut, zha co grieaban zeene laa tib mil iz co gza.

<sup>6</sup> Dichos grë zha ne glo grieaban ga; lo Diosle ngab zho ga, noxtseebdraa zho guey zho gabil, masaque lo Dios, lo Jesús gun zho dziin, gac zho zig tib pxoz lo me; tipse gnabey me grë me zho len tib mil iz co.

<sup>7</sup> Zeene blozh tib mil iz co, dzigo gon naa laa mendox brie zaatne nioogyu ma ga,

<sup>8</sup> güey ma güeyquidie ma zha Gog, güeyquidie ma zha Magog, grëse guiedz ne ndxie lo guidzliu güeyquidie ma miech, tipse been ma zho grëse zho parne tilnie zho Dios. Miech guizhiuw, miech ne lëb ne glab new, gun ne cuent yuzh ne ndxie ro nisdoo,

<sup>9</sup> ntseeb rac zho, grëse zho laa zho bdziñ zaatne ndxie guiedz ne rleyne Dios, zaatne no grë zha ne ngab lo me ga; per zeene laa zho ndxiele igo guiedz co parne gnitlo zhow, hor co bnabey Dios bliaal gui lad zho, bzëëga zho grëse zho.

<sup>10</sup> Laa mendox, bnabey me bgaa ma bey ma lo guidox ne nac gabil, zaatne nole ma ngol ne sca briequia lo nisdoo, grop ma co zha ne pteed xtiidz ma ga. Lo guidoxa, niapse zufr noyec lugar co, ga tsu ma dze guieel, gdzindraa dze ne grie ma ga; caxtigwdox ne ted ma.

*Beenquizh Dios miech mine been zho*

<sup>11</sup> Blozh ga, gon naa tib men co zob me tib lo xcan ro, dib nquitsbiese rna xcan co. Zigtaa guidzliu, zigtaa gbaaw, zeene gona me znuse bichew, per bdziel pa niolana lo me.

<sup>12</sup> Grëse zha ne brieband glo ga, zigtaa zha nona, zigtaa zha wina, laa zho bdzin lo me. Laa zho ndxie ga, zeene laa lo bla libr co bzhiäl, ni bzhiälague lo mine quia lë zha ne bgaa guielmban cub ne rdeed Dios ga; hor co bgaase zho mine rieguial zho tib tib zho tel zha zhobnee lo libr co wban zho.

<sup>13</sup> Grëse zha ne biaan len nisdoo, blieequia nisdoo zho, grë zha ne bioliu blieequia baa zho; grëse zho blieequia guielgut zho.

<sup>14-15</sup> Blozh ga, zigtaa guielguta, zigtaa zha ne quiad lë len libr ne no lë zha ne bgaa guielmban ga, laa zho biobe lo guidox ne nac gabil; lëe guielgut brop ga.

## 21

<sup>1</sup> Dzigo gon naa tib bgaa cub, ni tib guidzliu cub; sac zigtaa gbaa ne rdziuunbey ne, zigtaa guidzliuw, zigtagaa nisdoo grësew bnitlo.

<sup>2</sup> Grop lo naa gon naa laa Jerusalén, guiedz ne nacchen Dios ga, ziad-zëeb zhan bgaa brieew zaatne zob me; tib guiedz cuba. Tib guiedz nzhixcuaa naca, pale tib ndzoop nguieg dze ne rtsieelnia zho.

<sup>3</sup> Dzigo bin naa nguiedz zëeb tib tsi men co zaatne nac lo xcan ro ne zo gbaa ga, rnee me:

—Nasi nagon laa Dios cuëz lo miech, nasi laa me gbannie zho; zan lo zho me, peet gunfaltraade lo zho.

<sup>4</sup> Led yedraa niina pa glunë zho, led yedraa niina tsoxtseeb zho lo guielgut, led yedraa niina mban gac zho cuedz zho dien cho gun xyudar zho, led yedraa niina goon zho; grëse nis ne zo lo zho zeene biin zho, niina laa me gunmbew. Grëse ncuaan co, gdzindraa dze gan zhow.

<sup>5</sup> Zëeb tsi men ne zob lo xcan co, rnee me:

—Grëse ncuaane no niina ncuble naca, ni naa beenncuba.

Blozh ga, nëchaa me lo naa:

—Grëse diidz ne gni naa lo luu nu niina gon, pquiaaw, ib none gacnan miecha, sac ncuaane no gaca.

<sup>6</sup> jLëew nagon, grëse mine no gac, laaw blozh ben naa! jNaa psilow, ni naa psiaala, naa nac zigne nac letr “a” ni letr “z” lo grëse letr, “a” rsilow “z” riala!

jZha ne në rnab zhis, naa gded nis ne rdeed guielmban guie zho, ygad naa nis co lo zho, peet gacnonda!

<sup>7</sup> Ni golgacnan ganle, grëse zha ne gdeete diidz lo grë ncuaane gunctal xtol zho, ible zgaa zho grë guielnzaac ne noyaquiet nu, naazhal gbannie zho peet gunfalte lo zho, masaque tib mëed gac zho lo naa.

<sup>8</sup> Sangu grë zha ne rdzieb gban zigne rnabey naa, grë zha ne rbiche lo naa, grë zha ne run grë ncuaan mbixladz, grë zha ne rut samiech, grë zha ne rionie zha ne led tsieeld zho, grë zha ne rleynie guielbruj, grë zha ne rleynie grë mdio, grë zha ne tibaque noquidie samiech, grëse zha co mine yгаа zho nac lo guidox ne noyec zufr ga; lëe guielgut brop ga.

*Guiedz ne gdzin zha ne ngab lo Dios*

<sup>9</sup> Lo gza gadz anjl ne bzhen cop ne bio grë guielnë ne gon miech ga, biaadgax tib me lo naa në me:

—Dë ganle zeena gan luu ndzoop nguieg ne gac tsieel men ne nac Xcarner yeen Dios i.

<sup>10</sup> Blozh ga, dzigo güeynie anjl co naa tib guic gui nroob, tib guic gui glaa, ga gon naa guiedz Jerusalén stib, guiedz ne nacchen Dios ga, gonpaa naa bieta zaatne zob Dios, laaw ziad-zëeb gbaa.

<sup>11</sup> Masaque rbebela guielndzon ne rap me, lëedaa grë quie niazh ne lë jasp, ni rol rnaw lëedaa grë vidr.

<sup>12</sup> Rna tib biedz nroob, tib biedz glaa ndze igow, quia tsiipchop puert cho biedz co, tibga anjl zo quianap tib tib ro puert co, tib tib puert co neysew tib lë men goldoo ne goc xpëed Israel.

<sup>13</sup> Tson puert co quia nēz ya, tsona quia nēz quiet, tsona quia ngali nēz ne rlan ngbidz, stsona quia ngali nēz ne rzēeb ngbidz.

<sup>14</sup> Lo tsiipchop quie nroob ne zob biedz co, tibga lē xpoxtl men ne nac Xcarner yeen Dios ga quia lo co.

<sup>15-16</sup> Rlupaa cuadrad niaa guiedz co; dzigo gon naa no tib bar ne rbix nia anjl co, niaaw niapse guiib or, psilo me ptiix me guiedz co, ptiix me biedz ne ndze igow ga, ni ptiix me xpuerta. Zeene blozh ptiix mew, tib tib nēza no gaay gayoo choo kilómetro, lal ne rzēni miech tsiipchop ngbidz; lal ne zioola lalga nzhenā, ni lalgaque glaaw;

<sup>17</sup> laa xquielnaal biedz co nzhenā lal ne rgaa tsiipchop docen dzit nia ne; ptiix mew zigne rtiixaque ne nac ne miech.

<sup>18</sup> Niapse guiib or niaa guiedz co, zigne rne naa ga, rol rnaw lēēdaa vidr.

<sup>19-20</sup> Biedz ne ndze igow ga, niapse quie niazh ne lē jasp niaaw; scaque gza tsiipchop quie ne naaz biedz co, niapse quie niazh ngalguieew:

tiba ngalguiee quie niazh ne lē jasp,  
tiba ngalguiee quie niazh ne lē zafir,  
tiba ngalguiee quie niazh ne lē ágata,  
tiba ngalguiee quie niazh ne lē smerald,

tiba ngalguiee quie niazh ne lē ónice,  
tiba ngalguiee quie niazh ne lē coralin,

tiba ngalguiee quie niazh ne lē crisólito,

tiba ngalguiee quie niazh ne lē beril,  
tiba ngalguiee quie niazh ne lē topás,  
tiba ngalguiee quie niazh ne lē crisoprás,

tiba ngalguiee quie niazh ne lē jacint,  
tiba ngalguiee quie niazh ne lē amatist.

<sup>21</sup> Gza tsiipchop puert ne quiaw ga, tibga quie perl niaa tib tib puert co; nēzyu ne rded groļ guiedz co, niapse guiib or niaaw, masaque mbe rol rnaw.

<sup>22</sup> Ni tib yadoo gonđ naa, sac dipse lad guiedz co rleynie zho Dios, rleynie zho men ne nac Xcarner yeen me.

<sup>23</sup> Led yedraa ga rquiin xbiini ngbidz, rquiin xbiini mēē, sac masaque xquielndzon me, ni xquielndzon men ne nac Xcarner yeen me ga nac biini.

<sup>24</sup> Grēse miech ne ngab lo me, ine gziini biini co lo zho sē zho lad guiedz co; zha ne bnabey grē guiedz ne bre lo guidzliu, bio dze zha goc zha non, per zeene gdziñ zho ga ye zho zunnon zho me.

<sup>25</sup> Led yedraa ga ycow liu, tibaque niini gnaw, tibaque gzhal gza xpuerta.

<sup>26</sup> Grēse ncuaane mbe ne gocnon lo grē guiedz ne bre lo guidzliu, laaw gdziñ ga;

<sup>27</sup> sangue grē ncuaane mbixladz gdziñda ga. Zig nac grē miech ne run grē guielntseeb, grē zha ne tibaque noquidie, gdziñd zhow; loxaque zha ne zhoob lē len xlibr men ne nac Carner yeen co (libr ne no lē zha ne yгаа guielmban cub ne gdeed Dios ga), zha cose gdziña.

## 22

<sup>1</sup> Blozh ga, blu anjl co tib guiubee lo naa, nē me zha ne guie nis co, zgaa zho guielmban; mbe rol rnaw, haxta rbebel low. Merse zhan xcan ne zob Dios ni zhan xcan ne zob men ne nac Carner yeen co, ga rriee guiubee co,

<sup>2</sup> rdeda groļtaa nēzyu ne rded len guiedz co. Gropse nēz ro guiubee co zēeb yag ne rdeed guielmban, gzobse mēē rquia nex low, tsiipchop vult rdeeda nex tib len iz, haxta ye zhiblaga rquiin grē zha ne no ga, parne sacnēd zho.

<sup>3</sup> Led yedraa ga no ncuaane ndziibdee, ga zo zhixcan Dios ni zo zhixcan men ne nac Carner yeen co; grēse miech ne ngab lo me, rleynie zho me runnon zho me.

<sup>4</sup> Ranlo zho me, grēse zho quia lē me quia zho.

<sup>5</sup> Led yedraa ga yquiin zho pe gziini lo zho, yquiingaa zho xbiini ngbidz, sac Dioszhal rziini lo zho, led yed ga ycow liu; ga gban zho gdziñdraa dze ne grieē zho ga.

*Ile ziaad Jesús*



<sup>6</sup> Dzigo nëchaa anjl co lo naa:

—Grëse ncuaane quiayan luu nu, ible ncuaane no gaca. Bui ganle Dios men ne rdeed guielbiini lo grë zha ne rieteed xtiidz me lo miech, rnee zho ncuaane naraa gac, mezhal pxeel xanj me ziadnee lo luu, zeena gacnan grëse zha ne ngab lo me ziaadyoble gac grë ncuaan rii.

<sup>7</sup> Ible nacle xtiidz men ne rnabey ne, zhile laa me guiaad. ¡Dichos grë zha ne gliladz grë mine noxobnen Dios nu!

<sup>8</sup> Grop lo naa gon naa grë ncuaan rii, naazhal bin znu bnee anjl co. Nacne pquitsgzhil naa lo me ni naa gunnon naa me;

<sup>9</sup> dzigo nëchaa me lo naa:

—Guso i, rieguald gunnon luu naa, laa naa nile lo luu ye naa tib ngundziinse nac naa lo Dios, nac naa zigne nacaque luu grë luu grë zha ne noteed xtiidz men ne rnabey ne lo miech, ni grëraa zha ne gliladz mine noxobnen me nu. Me none gunnon luu.

<sup>10</sup> Blozh ga, nëchaa me:

—Bien, grëse mine quiayan luu nu, yqueetsd luuw, sac zhile gdziñ dze ne gaca.

<sup>11</sup> Lo spalalse dze ne riaan niina, grë zha ne noyun guielntseeb, telne racladz zho mazdraa guielntseeb ne gun zho, maase gun zhow; zha ne runгаа guilyozh, telne mincotaa rleynie zho, maase gunraa zhow. Sangue grë zha ne noxco gun mine rnabey Dios, none tsoxcoraa zhow; zha ne ngableгаа lo me, none gunraa zho mine racladz me, gbiched zho lo me.

<sup>12</sup> Horco bin naa tsi men ne nac Carner yeen co, në me:

—Psoladza sca gon, ible zialniob naa; zeene laa naa gual, hor co gded naa mine riegual tib tib miech, tel zha wban zho.

<sup>13</sup> Notaque naa, zig nac grë ncuaan rii naa psilow ni naa csiaala; nac naa zig nac letr “a” ni letr “z” lo grë letr, “a” rsilow, “z” riala.

<sup>14</sup> Dichos grë zha ne noxco guiaanmbe zho nëz lo Dios, sac rreequia xab zho ga nosanmbe zho, parne grieelo ted zho ro puert ne quia guiedz cub ne nac Jerusalén ga; gdziñ zho ga ine gow zho xnex yag ne rdeed guielmban ga.

<sup>15</sup> Sangue grë miech ne racntseeb lo Dios, zha ne rleynie guielbruj, zha ne rionie zha ne led tsieeld, zha ne rut samiech, zha ne rleynie grë mdio, zha ne loxaque noquidie samiech, ni tib zha co grieelod ted ro puert co.

<sup>16</sup> Naa gon nac Jesús, naa pxeel xanj naa ziaadlu grë ncuaan rii lo luu, zeena grëse zha ne no xnëz naa gacnaa. Naa ga briequia lo xtii rey David, per naa psan grëse xmenjol me. Rreequia naa nac mel ngol ne rziini ral sil.

<sup>17</sup> Zigtaa Espiritu Sant, zigtaa grë zha ne no xnëz me, zha ne rreequia gac tsieel me ga, laa zho quiambëz me; niicle zha ne gacnanragaa laa me no guiaad, none yquiambëz zho me. Zha ne në rnab zhis, telne gacladz zho zac gbig zho lo me, me gdeed nis ne rdeed guielmban guie zho; ygad me nis co lo zho, peet gacnonda.

<sup>18</sup> Grëse zha ne gon grë mine pxobnen Dios nu, laa naa rso diidz lo zho: Gneed zho ncuaane nacda, sac zha ne gdziibraa diidz zeene gnee zhow, scagaa me, lo grë guielnë ne raquiet nu yгаа miech, zdziibraa me mine yгаа zho;

<sup>19</sup> zha ne cticheгаа palala zeene gnee zhow, scaque stiche me lë zho lo libr ne zhobnee cho nac zha ne yгаа guielmban ne gdeed me, grieelodraa gdziñ zho guiedz ne blozh goquiet nu, ygaadraa zho yquiin zho xnex yag ne rdeed guielmban ga.

<sup>20</sup> Men ne blozh bnee lo naa ga, ible ziaadniob me rnee me. Gacxe waa, dib zdoo naa laa naa rne lo me nu:

—¡Scaw gon Jesús! ¡Dë, laa no quiambiaaz luu!

<sup>21</sup> Me nac men ne gacnien to grëse to, me gunlay to.

Juan